


Dibshon Mengi-kan Ni  
Pansigshan



Ibaloi: Dibshon Mengi-kan Ni Pansigshan (New Testament)

## **Dibshon Mengi-kan Ni Pansigshan**

### **Ibaloi: Dibshon Mengi-kan Ni Pansigshan (New Testament)**

copyright © 2019 Wycliffe Bible Translators, Inc.

Language: (Ibaloi)

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 25 Nov 2022 from source files dated 29 Jan 2022  
6f85e932-8eee-5911-b890-a31a1da75d8c

## Contents

SAN MATEO . . . . .	1
SAN MARCOS . . . . .	68
SAN LUCAS . . . . .	110
SAN JUAN . . . . .	176
INPASPASING . . . . .	227
I-ROMA . . . . .	291
1 I-KORINTO . . . . .	322
2 I-KORINTO . . . . .	350
I-GALASIA . . . . .	369
I-IPISO . . . . .	380
I-PILIPOS . . . . .	390
I-KOLOSAS . . . . .	398
1 I-TISALONIKA . . . . .	405
2 I-TISALONIKA . . . . .	411
1 TIMOTEO . . . . .	415
2 TIMOTEO . . . . .	423
TITO . . . . .	429
FILEMON . . . . .	433
HODIYOS . . . . .	435
SANTIAGO . . . . .	459
1 SAN PEDRO . . . . .	467
2 SAN PEDRO . . . . .	477
1 SAN JUAN . . . . .	483
2 SAN JUAN . . . . .	491
3 SAN JUAN . . . . .	492
SAN JUDAS . . . . .	494
INPA-AMTA NEN JE-	
SUCRISTO . . . . .	497

## SOTA INSOLAT NEN SAN MATEO JA MAYPANGKEP NI KABEBIYAG TAN TORO NEN JESUCRISTO

*Sota tonton ni naypolipoli-an  
nen Jesucristo*

<sup>1</sup> Si Jesucristo, poli nen David tan si Abraham. Nem wára pay iray eshom, jet sajay iray ngarangan sha: <sup>2</sup> Si Abraham, ama nen Isaac; jet si Isaac, ama nen Jacob; jet si Jacob, ama nen Joda, asan wára pay iray potot to ja agi nen Joda. <sup>3</sup> Jet si Joda nen Tamar, anak sha si Piris nen Sara. Jet si Piris, ama nen Isrom; si Isrom, ama nej Aram. <sup>4</sup> Si Aram, potot tos Aminadab; si Aminadab, ama nen Naason; si Naason, ama nen Salmon. <sup>5</sup> Jet si Salmon nen Rahab, anak sha si Boos; jet si Boos, inesawa to si Ruth et anak sha si Obid; jet si Obid, ama nen Jesse. <sup>6</sup> Si Jesse, ama nen David ja nan-ari, jet si David, inpotot tos Solomon. (Say ina nen Solomon sota istay asewa nen Orias.) <sup>7</sup> Si Solomon, ama nen Roboan; si Roboan, ama nen Abias; jet si Abias, potot to si Asa. <sup>8</sup> Si Asa, ama nen Josapat; si Josapat, ama nen Joram; jet si Joram ama nen Osias. <sup>9</sup> Potot ngo nen Osias ma si Joatam; si Joatam, ama nen Akas; jet si Akas, ama nen Isikias. <sup>10</sup> Jet si Isikias ama nen Manasis; si Manasis ama nen Amon, jet si Amon ama nen Josias. <sup>11</sup> Jet si Josias potot to si Jikonias, tan wára pay iray a-aki nen Jikonias. Sajay iren a-aki nen Jikonias, pati si-kato, nay-anak ira nonta timpon in-ilaw sha sota toon i-Israel ja maybedod shima dogad ja kowan sha ey Babilonia.

<sup>12</sup> Idi nonta wára ma ira shi Babilonia, waray inpotot nen Jikonias ja inpanngaran to ni Salatiil, jet si Salatiil, inpotot to ngo si Sorobabil. <sup>13</sup> Naytoltoy ja naypolipoli ira jay jet si Sorobabil, ama nen Abiod. Si Abiod i ama nen Iliakim; si Iliakim, ama nen Asor; <sup>14</sup> si Asor, ama nen Sadok; si Sadok, ama nen Akim; si Akim, ama nen Iliod; <sup>15</sup> si Iliod, ama nen Eleazar et si Eleazar ama nen Matan. Si Matan ma i ama nen Jacob. <sup>16</sup> Jet si Jacob, potot to si Jose et si-kato may maka-asewa so nen Maria ja engi-nak so nen Jesus, ja inewagan sha met laeng ja si Cristo.

<sup>17</sup> Jet sajay iren nanpolipoli, manshoki so nen Abraham ingkato so nen David, sampolo tan epat ta apo. Jet manshoki mowan so nen David ingkato nonta timponindaw sha so nonta tood Israel shima dogad ja kowan sha ey Babilonia, sampolo tan epat mowan na apo. Manshoki mowan nonta wára ired Babilonia ingkato ngo nonta inkay-anak nen Cristo, sampolo tan epat ta apo mowan.

*Sota inkay-anak nen Jesucristo*

<sup>18</sup> Iyay i shoki-an ni inkay-anak nen Cristo. Nonta aneng pay laeng nga may-enak si Cristo, si Maria ja mengi-nak ali son si-kato, naykari ja esaw-en nen Jose. Jet si Maria, nonta eg ira pay laeng nan-asewa nen Jose, na-amta-an ey malokon. Nem sotan na dokon to, in-iyan gayam ni Ispirito Santo nen Apo Shiyos. <sup>19</sup> Nem si Jose ja naykarin mengesawa so nen Maria ali, kowan to ey eg to itoloy ya esaw-en si Maria. Nem piyan ton dibas i pesing ton mengisijan, ta eg to koston mebebaingan si Maria. Si Jose, na-anos sa daki, isonga sajay i kowan to ey pesing to. <sup>20</sup> Nem idi sajay i toka nemnemnema ja kowan to ey dag-en to, nanpa-sas i anghil

nen Apo Shiyos shi kokokip to, ja kowan nonta anghil son si-kato ey, “Jose ja poli nen Ari David, kareka manshanag ja mengesawa so nen Maria, ta sama dokon to, Ispirito Santo nen Apo Shiyos i engi-jan so. <sup>21</sup> Say i-anak to ali, daki et say ingaran mo son si-kato, Jesus (ja say olog to, mengisedakan), ta si-kato diy mengisedakan ira nonta too to say eg ira meshosa pangkep ni basol sha.”

<sup>22</sup> Sajay ya emin i epasemak say mayto-to-wa sota kowan ni para padto nonta bayag da ja esel nen Apo Shiyos, <sup>23</sup> ja kowan to ey, “Wara aliy balasang ja enshiy dakin en imaro-arol so, nem on-anak ali. Say i-anak to ali, daki jet say ingaran sha so nontan na i-anak to ali, si Emanuel.” (Say olog niyay ya ngaran shi esel ira ni Hodiyo, “Si Apo Shiyos, wara son si-katejo.”)

<sup>24</sup> Jet idi bimangon si Jose, pinati to sota inkowan ni anghil nen Apo Shiyos shi kokokip to et inesawa to si Maria. <sup>25</sup> Nem eg to ineshol si Maria nonta maramen malokon. Jet idi nay-anak sota dokon nen Maria, inpanngaran nen Jose ni Jesus sota nga-nga.

## 2

*Sota totoon nankedaing ja edapod bedalan*

<sup>1</sup> Jet nontan na inkay-anak nen Jesus shi Bitlihim, ja sakop ni Jodia, maramen si Hirodis i ari. Idi nontan, waray mimotok shi Jerusalem ja toon nankedaing ni bisto ni talaw ja edapod bedalan.

<sup>2</sup> Jet sha inbaga ey, “Towa sota nga-ngen nay-anak ja ari ali ni Hodiyo? Inon-an miy inbo-day nonta talaw shi bedalan et si-katoy engamta-an mi so ey nay-anak. Dimaw kami di say kami manshedjaw so nontan na nay-anak ka ari.”

<sup>3</sup> Idi inamta-an nen Ari Hirodis iyay ya kowan sha, ngaaw i deknata to, jet angken pay sota ira emin na tood Jerusalem. <sup>4</sup> Jet si Ari Hirodis, sina-nop ton emin sota ira apo ni papashi tan sota emantosho ni dinteg ni Hodiyo et insho-petan to ira ja kowan to ey, “Towa kariy koston kay-enakan nonta naypadto nonta bayag da ey mengitoshay son si-katejo, ja ibetkag kono ali nen Apo Shiyos?”

<sup>5</sup> Jet inkowan sha son si-kato ey, “Shi Bitlihim ja sakop ni Jodia i koston kay-enakan to, ta si-kato met i naysolat ja kowan nonta para padto nonta bayag da, ja esel met laeng nen Apo Shiyos, <sup>6</sup> ja kowan to ey, ‘Say Bitlihim, shima dogad ja sinekohan ni poli nen Joda, ootik nga agpayson siyodad no may-inges shima emin na kait ton siyodad nodtan met laeng nga dogad. Nem maybidang ey epateg ta si-kato aliy kedepo-an nonta mengitoshay ni took ja i-Israel.’ ”

<sup>7</sup> Jet nontan ma si Ari Hirodis, inpa-odop to ira ngo sota nankedaing nga too ja edapod bedalan. Jet insho-petan to iren pasiya nonta a-abos sha no pigan ni inbo-day nonta talaw wa inon-an sha. <sup>8</sup> Jet inbetkag to ira shi Bitlihim ja kowan to ey, “Eti, daw kayo ngarod, singpet joy anap nonta nga-nga, jet no sepolen jo, ipa-amtayo ali son si-kak. Say ondawak ngo ja en manshedjaw son si-kato.”

<sup>9</sup> Idi itenengan ira niya toon nankedaing iya kowan nen Ari Hirodis, dima-jat iren ondaw shi Bitlihim. Jet sota talaw wa inon-an sha alid bedalan ja edapo-an sha, epangdo ey si-kara shima dogad ja dawan sha, jet nan-akad ira ingkatod simalsheng sota talaw. Jet pintek ton kosto sota kawad-an nonta nga-nga. <sup>10</sup> Idi inon-an shen simalsheng sota talaw, ebadeg i imdeng sha. <sup>11</sup> Simekep ira nodta

baley et inon-an sha sota sanina. Jet sota ira toon nankedaing ja edapod bedalan, nantalimokod ira ja nanshayaw son si-kato. Jet inbo-day sha sota inta-jon sha ja nankebanol ja i-akan sha so nonta nga-nga, ja balitok, tan sota emanseng-ew wa kowan sha ey insinso, tan mira.

<sup>12</sup> Idi imakad ma ira, apil i shindan sha tep waray inpa-amta nen Apo Shiyos son si-kara shi kokokip sha ey eg ira kari manshedan shi baley nen Ari Hirodis.

*Inpabono nen Hirodis i dakin anak, nem indisi sha si Jesus*

<sup>13</sup> Idi naksheng den dimaw ira jay ya too, sota anghil nen Apo Shiyos, nanparang so nen Jose shi kokokip to ja kowan to ey, “Bangon ka et ibtik mo ita nga-nga tan si ineto shi Egypt. Jet pan-iyang kayo nin shiman ingkatod ekak ikowan ey on-etan kayo mowan. Ta si Hirodis piyan ton pa-enap ali iya nga-nga ja kowan to ey bonon to.”

<sup>14</sup> Jet si Jose, idi bimangon, inda to sota nga-nga tan si Maria nontan na dabi met laeng et inbakwit to ired Egypt. <sup>15</sup> Jet nan-iyang ired man ingkatod etey si Hirodis. Wara si Jesus shi Egypt nin say metongpal sota kowan ni padto nonta bayag da, ja esel nen Apo Shiyos met laeng, ja kowan to ey, “Shi Egypt aliy edapo-an ni anak ko, ja inedjaban ko so di.”

<sup>16</sup> Idi inamta-an nen Hirodis ey nandibas ira sota nankedaing nga too, kowan tod nemnem to ey, “Endedamsis sha gayam sota inbilin ko nontan!” Jet ebadeg ga pasiya ma i bonget to. Inbetkag to ira sota solsharo to ja memono ni emin na nga-ngen daleki shi Bitlihim ja mantaw-en ni showa ono ekolang, ingkato nodta dogad ja nandi-mot shi Bitlihim. Ta say kowan nonta

nankedaing nga too, inon-an sha sota talaw nonta shownen tawen den edabas. <sup>17</sup> Sajay i kaytoshongan nonta padto nen Jeremias nonta bayag da ja kowan to ey, <sup>18</sup> “Waray naytenengan ja maked-sang i ngogngog to shi Rama. Si-kato si Rakil, ja toka ira neng-nengisi sota annak to. Eg to koston ma-adok tep na-enshi ira da sota annak to.”

<sup>19</sup> Jet idi etey si Ari Hirodis, nanparang mowan sota anghil nen Apo Shiyos so nen Jose shi kokokip to nonta wara ired Egypt, ja kowan to ey, <sup>20</sup> “Bangon ka et alam ita nga-nga, tan si ineto, jet akad kayo ma shi Israel. Pesed ma niman tep sota kowan to ey memono so nita nga-nga, etey da.”

<sup>21</sup> Jet si Jose bimangon et inda to sota nga-nga, tan si Maria et nay-oli ira ma shi Israel. <sup>22</sup> Nem idi inamta-an to ey si Arkilao ja anak nen Hirodis i naysa-dat so nen ameto ja man-eshi shi Jodia, timakot si Jose ja ondaw shiman. Binanshaanan mowan ni anghil shi kokokip to ey angken eg metodoy shiman no diket ondaw et shi ili ni Galilia. <sup>23</sup> Jet siya, dimaw ired man et nan-iyang ired ma siyodad ja kowan sha ey Nasarit. Sajay i edaga say metongpal sota naypadto nonta bayag da ja kowan to ey, “Si-kato, mayngadnan ey i-Nasarit.”

### 3

*Intoro nen Juan ey ibebawi ni totoo i basol sha*

<sup>1</sup> Nontan na timpon wares Jesus shi Nasarit, waray toon emantoshos shima sakop ni Jodia ja nayarawi shi kad-an ni totoo. Jet say awag sha so nontan na too, si Juan ja para bonjag. <sup>2</sup> Say kowan to so nonta ira totoo ja dimaw nodtan, kowan to ey, “Baliwiyo i ngaaw wa wared nemnem jo, ta sota pantoshayan nen Apo Shiyos

ja naypadto nonta bayag da, shan-shani ma.”<sup>3</sup> Saja si Juan, si-katoy kaytoshongan nonta padto nen Isaias nonta bayag da ja kowan to ey wára aliy toon ikeljaw toy esel to shima dogad ja nay-arawi shi kad-an ni totoo, ja ikowan to ey, “Pansagana kayo ta shanshani ma aliy imotok nen Apo! Singpet joy shalan na pan-akshan to!”

<sup>4</sup> Say baro nen Juan, nagshengan: sota na-abel la bowek ni animal ja kowan sha ey camel i toka osala bengat, ja ebalkesan ni kolti. Jet nagshengan ngoy toka kena, ja shoron tan shanom ni dinowan.<sup>5</sup> Sota ira tood Jerusalem, tan eshom ma toon nanbaley shi probinsiya ni Jodia, tan sota ira toon nanbaley ja nay-esop shima ebadeg ga pa-dok ja kowan sha ey Jordan, ireka mansisina-dat ja ondaw son si-kato.<sup>6</sup> Inkowan shen emin i basol sha say pekawanan ira nen Apo Shiyos; isonga binonjagan ma ira nen Juan.

<sup>7</sup> Nem idi inon-an nen Juan ira sota Parisiyo, tan sota ira Sadosiyo, ja emandaw son si-kato, ja kowan sha ey ira manpabonjag ngo son si-kato, kowan nen Juan son si-kara ey, “Si-kayo, singa oleg i ogadiyo! Say kowan jo emo, mebedin na disi-an joy penosa nen Apo Shiyos no manpabonjag kayo bengat?”<sup>8</sup> Nem enshi! Mesepol la ma-sas shi ogadiyo ey inbebawi jo sota basol jo.<sup>9</sup> Karejo panshingan sota kowan jo ey si-kayo ket poli shakejo nen Abraham. Enshi, eg on-anay iyay! Tep si Apo Shiyos, mebedin ton osalen i bato ja palsowa-en ni too jet ikowan to ey poli nen Abraham.<sup>10</sup> Jet niman, waray naysagana ja may-eshig ey wasay ja maywa-tek nodta damot ni kakadasan na eg ondames ni mapteng. Sajay iren kakadasan, mebetang et maypool shi apoy.”

<sup>11</sup> Jet kowan pay nen Juan ey, “Nem si-kak, dimawak ali ja shanom i inpamonjag ko son si-kayo, ni inpanbebawi jo, nem waray ondaw alin maysa-dat son si-kak ja ebadbadeg i panakabalin to nem say si-kak. Jet ekak pay maykeshi ja angken baga-en to koma ja mengkal ni sapatos to. Sotan aliy onbonjag son si-kayo ni Ispirito Santo nen Apo Shiyos, asan pay ya apoy.”<sup>12</sup> Jet si Juan, in-arigan to ira, ja kowan to ey, “Sotan aliy may-eshig ey mengitanil ni bekas shi taap. Sota bekas, isingpet tod tado-an, nem sota taap, ipool tod apoy ya emanshedang ni olay ja eg ma-ma-shep.”

#### *Binonjagan nen Juan si Jesus*

<sup>13</sup> Nontan, edapo ngod Galilia si Jesus ja ondaw shima kawad-an nen Juan, say en manpabonjag ngo son si-kato shima pa-dok ja kowan sha ey Jordan.<sup>14</sup> Nem si Juan, istay en-asneng, ja kowan to so nen Jesus ey, “Si-kak komay ondaw son si-kam ja manpabonjag; aliwen si-kam et ngo mowan i ondaw alin manpabonjag son si-kak!”

<sup>15</sup> Nem si Jesus, simongbat ja kowan to ey, “Eti, dagam et niman. Bonjagimak ma. Mapteng i itongpal ta so ni bilin nen Apo Shiyos maypangkep niyay.”

Jet si Juan, timolok.<sup>16</sup> Idi ebonjagan ma si Jesus, kima-jat ta shagos nodta shanom et nayinshas ngon edo-katan i dangit. Jet inon-an toy Ispirito Santo nen Apo Shiyos ali ja singa inges toy itsora ni kalopati ja emandespag alin onsepa son Jesus.<sup>17</sup> Jet nontan met laeng, wára aliy esel nen Apo Shiyos ja edapod dangit ja kowan to ey, “Si-kam i Anak ko jet ensemble taka, tan si-kam i naka pandadsaki.”

## 4

*Pineshas nen Satanash ja panbesol si Jesus*

<sup>1</sup> Idi naksheng ja ebonjagan si Jesus, intorong ni Ispirito Santo ja ondaw shima dogad ja arawid kawad-an ni too, say peshasen nen Satanash shiman ja panbesol koma si Jesus. <sup>2</sup> Jet nontan si Jesus, eg eng-engan ni epat ta polon akew, tan epat ta polon dabi, tep epaladoy kepemeshas nen Satanash. Jet idi naksheng iyay, na-agang si Jesus.

<sup>3</sup> Jet si Satanash, dimaw ja kowan to so nen Jesus ey, “No agpayson anak toka nen Apo Shiyos, ikowan mo iren ja bato ey manbedin ira ni tinapay.”

<sup>4</sup> Nem si Jesus, simongbat ja kowan to ey, “Enshi, tep say naysolat nonta bayag da ja bilin nen Moises, kowan to ey, ‘Aliwén na mekan ni abos i panbiyag ni too, no diket manbiyag ni sanseskey ja esel nen Apo Shiyos ja ikowan to.’ ”

<sup>5</sup> Idi naksheng iyay, indaw nen Satanash si Jesus shi Jerusalem, ja kaibilang nen Apo Shiyos ja dogad to, jet to inpa-tok nodta Timplo. <sup>6</sup> Jet kowan to so nen Jesus ey, “No agpayson anak toka nen Apo Shiyos, pan-ekas ka. Say kowan met ni naysolat nonta bayag da, kowan to ey, ‘Ibilin nen Apo Shiyos so nonta anghil to ey ajowanan shaka.’ Isonga eg ka mesekitan. Tan say kowan to pay, ‘Egni-an shaka ni takday sha, say eg mesekitan i sedim ni bato.’ ”

<sup>7</sup> Simongbat si Jesus et kowan to ey, “Enshi, ta say kowan mowan ni naysolat nonta bayag da, ‘Karam pedpeshasen si Apo Shiyos, ja kowan mo ey ma-sas ka no agpayso i kowan to.’ ”

<sup>8</sup> Jet si Satanash indaw to mowan si Jesus shima kakedjangan na shontog et inpa-sas ton emin i

ilid ja dobong, tan sota kamapteng sha. <sup>9</sup> Jet si Satanash, kowan to pay so nen Jesus ey, “Emin ira jay, i-akan ko son si-kam no si-kak i pantedimokoshan mo ja panshed-jawan.”

<sup>10</sup> Simongbat ngo si Jesus, ja kowan to ey, “Ki-nan ked jay Satanash! Say kowan ni esel nen Apo Shiyos ja naysolat nonta bayag da, kowan to ey si-kato bengat i panshedjawan mi tan pansilbi-an mi.”

<sup>11</sup> Idi naksheng nga pineshas nen Satanash si Jesus ja istay piyan ton panbesol, indekjas to ma. Jet sota anghil, dimaw ira di son Jesus ja sha in-aknan ni kompormin kasapolan to.

*Inshogi nen Jesus i obda to*

<sup>12</sup> Nontan ngo ma, naybalod si Juan ja para bonjag. Idi inam-tan nen Jesus, imoli ma shi Galilia.

<sup>13</sup> Indekjas toy Nasarit et nan-iyen shi siyodad ni Kapirnaom ja naykilig shi baybay, ja istay sakop ni Sabolon tan Niptali. <sup>14</sup> Sajay i edaga say metongpal sota in-padto nen Isaias nonta bayag da ja kowan to ey, <sup>15</sup> “Shima Galilia ja petek ni baybay tan shemang ni pa-dok ja kowan sha ey Jordan, ja istay sinekapan ni poli nen Sabolon tan Niptali, si-katoy nay-daokan ira nonta aliwén Hodiyo, <sup>16</sup> jet shiman, sota ira too ja may-eshig ey edabi-an ja imekok shima embolinget ta shalan, singa waray on-an sha alin maniyal la silew ja menidew son si-kara. Jet angken sota ira toon patey i istay toshongen sha, singa ewa-wa-an ira.”

<sup>17</sup> Jet manshoki ma nontan na timpo, nantoro ma si Jesus, ja kowan to ey, “Baliwiyo i ngaaw wa wared nemnem jo, ta sota naypadton pantoshayan nen Apo Shiyos, shanshani may timpo to.”

<sup>18</sup> Idi sakey ja akew, eman-ekad si Jesus shima kilig ni baybay shi



Galilia et inon-an to sota san-agi ja si Andres nen Simon. (Si Simon, Pedro met laeng i shaka pengeŵag son si-kato.) Shaka pan-iteknal sota embanaw wa balsheŵ shi shanom, tep nigay i shaka panbiyagi. <sup>19</sup> Jet si Jesus, kowan to son si-kara ey, “Kay-olop kayo son si-kak et panbedin takejo ni took, jet mengolnong kayo ngo ni too ja itod-an jo para son si-kak. Aliŵa malen sota pengolnong ni nigay i obdayo.” <sup>20</sup> Jet idi inkowan nen Jesus iyay, indekjas nonta san-agin shagos sota embanaw wa balsheŵ sha et si Jesus i nay-olopan sha.

<sup>21</sup> Intoloy shen nan-akad et wára pay i inon-an shen san-agi ja anak nen Sibidi, ja si Santiago nen Juan. Wára ira nodta bangkara ja shaka pansingpeta sota balsheŵ sha, jet wára ngo si Sibidi ja amesha nodtan. Jet si Jesus, tinewal to ira sota showen san-agi ja manbedin ni too to. <sup>22</sup> Jet nontan met laeng, indekjas sha shagos si amesha tan sota bangkara, jet eki-odop ira son Jesus, jet nanbalin ma iren too to.

<sup>23</sup> Si Jesus, pinasiyal ton emin i sakop ni Galilia, jet nantoro pay shima sa-nopan ira nonta Hodiŵos nodta dinadawan to. Inpalewag tod man sota mapteng nga shamag maypangkep ni pantoshayan nen Apo Shiyos. Jet angken sota ira toon ekalkalasiy sakit sha, inpamapteng to ira. <sup>24</sup> Isonga nontan, eshamag iyay shi intiron sakop ni Siria, jet indaw sha ali son si-kato sota ekalkalasiy sakit sha, pati sota ira emankelshas tan sota eg makakeykey i bakdang sha. Tan angken pay sota ira eman-engaw ja kawad-an ni dimonyo. Jet si Jesus, inpamapteng to ira jay ya emin. <sup>25</sup> Jet eshakil iray toon pasiya ja emay-odo-odop son Jesus: iman i edapod Galilia,

Dikapolis, Jerusalem, Jodia, tan shima dogad ja baliw ni pa-dok ka Jordan.

## 5

<sup>1</sup> Jet nontan, idi inon-an nen Jesus ira sota eshakil la too, eniyed nodta shontog. Idi timongaw ja esagana men mantosho, nay-es-hom ali ira sota too to. <sup>2</sup> Jet inshogi ton nantoro son si-kara ja kowan to ey:

*Sota bindisiyon nen Apo Shiyos*

<sup>3</sup> “Si-kayon maka-amta ey ebadeg i kasapolan jo son Apo Shiyos, bindisiyanan shakejo nen Apo Shiyos, tep mayda-kam kayod pantoshayan to.

<sup>4</sup> “Si-kayon emandeshingit, bindisiyanan shakejo nen Apo Shiyos, tep si-katoy mengkal ali ni daringit jo.

<sup>5</sup> “Si-kayon ekombaba, bindisiyanan shakejo nen Apo Shiyos, tep si-kayoy onkon-od niya dobong.

<sup>6</sup> “Si-kayon makapipiyan ja mandeka nonta ka-aporbali nen Apo Shiyos, bindisiyanan shakejo nen Apo Shiyos, ja mepnek kayo di.

<sup>7</sup> “Si-kayon manangaasi, bindisiyanan shakejo nen Apo Shiyos, tep si-katoy mismon mengaasi son si-kayo.

<sup>8</sup> “Si-kayon poro mapteng i wáred nemnem to, bindisiyanan shakejo nen Apo Shiyos, ta mismon asen jo ali si Apo Shiyos.

<sup>9</sup> “Si-kayon emengi-kan ni talna, bindisiyanan shakejo nen Apo Shiyos, ta si-kayo sota maybidang ali ey annak nen Apo Shiyos.

<sup>10</sup> “Si-kayon pinedigat ni kait jon too kabol ni dingka-an jo so nonta ka-aporbali nen Apo Shiyos, bindisiyanan shakejo nen Apo Shiyos, ta mayda-kam kayo shi pantoshayan to.

<sup>11</sup> “Si Apo Shiyos, bindisiyanan shakejo no somangen shakejo

ni kait jon too, ja kompormiy ikokowan sha, angken enshiy basol jo, ono bebaingan shakejo, ono pedigaten shakejo tep too takejo. <sup>12</sup> Pan-imdeng kayo no sajay i mepesamak son si-kayo, ta ebadeg i naytalo shi dangit ja kon-oren jo ali. May-inges kayo nodta ira para padto nen Apo Shiyos nonta bayag da, ja pinedigat ngo ni too nontan da, jet may-inges kayo nodta kon-oren sha.

*Sota kay-eshigan ni asin tan silew*

<sup>13</sup> “May-eshig kayo ey asin ja emengi-kan ni mapteng shiya dobong. Nem no ma-omas i pait ni asin, ja entamnay ma, eg maymowan. Jet enshi may silbi to, may-ibong sotan ja angken kegkegtinan ni too.

<sup>14</sup> “May-eshig ey singa si-kayo sota silew ja ondawag niya dobong. Jet sota ili ja naypa-tok shima shontog, eg mebedin na mesa-dinan, ema-sas ni olay i itsora to. <sup>15</sup> No bilang ey waray kingki ja inparedang ni too shi naydaem ni baley, simpri eg mesa-keban, no diket maypa-tok shi ekayang, say sota emin na wared baley, asen shay dag-en sha. <sup>16</sup> Inges niyay koma ngoy pesing jon menidew ni nemnem ni too shiya dobong. Isonga eg jo sa-dinan i silew jo, no diket ipasas joy mapteng nga ogadiyo, say asen ni totoo. Jet say ishayaw sha si Apo Shiyos ja Amejo ja wared dangit.

*Sota maypangkep ni bilin nen Moises*

<sup>17</sup> “Aliwen jo ipangkep koma ey dimawak ali ja en menadat nonta dinteg ja para son sikejo, ja in-awat nen Moises nonta bayag da, ono en menadat nonta inkowan ira nonta para padto met laeng nontan da, no diket dimawak ali say amta-an

joy koston olog nonta inkowan sha nontan da. <sup>18</sup> Ikowan ko et i podno son si-kayo. No wara pay laeng iya dangit tan dobong, eg mepokaw i angken sakey ya ko-nit shima dinteg ja in-awat nen Moises ingkatod metongpal la emin. <sup>19</sup> Waray eshom ma in-awat ton bilin ja kowan jo ey aliwen pilit ta pati-en, nem say podno, sota eg memati ni angken sakey so ira niyay ya bilin, tan mengitosho ni kait to say eg sha ngo pati-en, si-kato aliy ka-otikan i shayaw to shi pantoshayan nen Apo Shiyos. Nem sota mengonod so ira nonta bilin ja in-awat nen Moises, tan mengitosho so ni eshom, si-katoy mandesin aliy shayaw to shi pantoshayan nen Apo Shiyos. <sup>20</sup> Mesepol la mayenam i ogadiyo shi bilin nen Apo Shiyos, ja aliwen inges to ira sota Parisiyo tan mamaistoro ni dinteg. No eg mandesin i pengonod jo nontan na bilin nem say si-kara, eg mebedin na mayda-kam kayo shi pantoshayan nen Apo Shiyos.

*Sota maypangkep ni panbengan ni bonget*

<sup>21</sup> “Amtayo met sota kowan ni bilin nonta bayag da so nonta ira apo tayo da ey eg ira memono, ta sota onbono, meshosa met laeng. <sup>22</sup> Nem say kowan ko son si-kayo, angken sota toon mengibonget bengat ni kait to, waray ikaro to son Apo Shiyos. Jet sota toon memebaing ni kait to, mas embelbel-at pay i ikaro to. Jet sota toon kowan to so ni kait to ey maypowisha koma son Apo Shiyos, dilikaroy kasesaad to, ta shi impiyarno i toshongen to. <sup>23</sup> Isonga no bilang ey marama ja kaka mengileton shima Timplo para so nen Apo Shiyos, jet waray nemnemen mon eg kosto ni kait mo son si-kam, <sup>24</sup> taynim nin sota moka pan-idaton jet daw ka so

nontan na too, mo tabtabal say man-inawatan kayo. Asan kaka may-oli et mo itoday sota daton mo so nen Apo Shiyos.

<sup>25</sup> “No bilang ey wáray mengireshom son si-kam shi oskaro, pakikajem ka et ja shagos son si-kato no maramen tokaka pan-ilaw shi oskaro, say eg toka i-awat nodta kowis. Say sota kowis ngo, eg toka i-awat ngo nodta kowadja ja mengibedod son si-kam. <sup>26</sup> Podno iyay ya ikowan ko son si-kam. No wára ka ma shima badoran, eg ka onbo-day ingkatod bayshan moy oltimon sintimos ja inotang mo.

#### *Sota maypangkep ni pemii*

<sup>27</sup> “Amtayo met sota kowan ni bilin nonta bayag da ey, ‘Kareka memii.’ <sup>28</sup> Nem say kowan ko pay son si-kayo, sota toon ngaaw i pangkep to so ni biin asen to bengat, nanbasol ja singa emii, ta say wáred nemnem to, ngaaw. <sup>29</sup> No bilang ey sota kanawan na matam i mengi-kan ni panbesolan mo, okit mo, et ibong mo. Mapmapteng ja wáray ma-kal la parti ni bakdang mo ja emengi-kan ni panbesolan mo, ey say sota wáren emin nem ondaw ka shima impiyarno ja meshosa. <sup>30</sup> No sota kanawan na takday mo i mengi-kan ni panbesolan mo, potol mo et ibong mo. Mapmapteng ja wáray ma-kal la parti ni bakdang mo ja mengi-kan ni panbesolan mo, ey say sota wáren emin nem ondaw ka shima impiyarno ja meshosa met laeng.

#### *Sota panbenagan ni pengisi-jan ni asewa*

<sup>31</sup> “Wara pay i naysolat ja dinteg ja kowan to ey, ‘Sota dakin mengisi-jan ni asewa to, mesepol la mengemag ni solat ja isepa to so nonta asewa to, et si-katoy pengamta-an ey koston insi-jan to

sota bii.’ <sup>32</sup> Nem say ikowan ko pay son si-kayo, sota dakin mengisi-jan ni asewa to, ey eg ekileki sota bii, si-katoy engi-kan ni nanbasolan nonta asewa ton bii. Jet sota mengesawa ngo nontan na biin naysi-jan, nanbasol ngo ja singa emii.

#### *Sota maypangkep ni sangba*

<sup>33</sup> “Amtayo met sota naysolat ja dinteg nonta bayag da so nonta ira apo tayo da ey, ‘Kareka manki-nat ni karim; isonga, no wára inkarim son Apo Shiyos, ja tinaksholan mo ni sangba, kenshat ta tongpalen mo.’ <sup>34</sup> Nem say ikowan ko pay son si-kayo, aliwén kayo mansangba so ni kompormi. Aliwén kayo mansangba so ni dangit, ta say dangit, si-katoy kawad-an nen Apo Shiyos. <sup>35</sup> Aliwén kayo mansangba so niya dobong, ta si-katoy kepanbagto- i ni sedi nen Apo Shiyos. Aliwén kayo pay mansangba so ni siyodad ni Jerusalem, ta si-katoy inbilang nonta Kangeto-an na ari, ja si Apo Shiyos ey siyodad to. <sup>36</sup> Tan aliwén kayo mansangba so ni toktok jo shorog, ta angken na sakey ya bowek shi toktok jo, eg mebedin na panbedin jo ni oban, ono pa-onong jo ni olay ya etoling. <sup>37</sup> No wáray mansedodsod son si-kayo, karejo i-eshom i sangba shi ‘Owen’ ono ‘Enshi’, ta sota songbat ja onsolok shi owen ono enshi, si Satanas i edapo-an to.

#### *Ngaaw i bales*

<sup>38</sup> “Amtayo met sota kowan sha ey, ‘No ngarantoy dingkara son si-kam, ibedes mo ja inges to ngoy inpasing sha son si-kam, nem karam debasen: no matam i sinekitan sha, shi matesha ngoy ibalesan mo so, kasta met no shi sangim.’ <sup>39</sup> Nem say ikowan ko son si-kayo, no wáray maked-sel, aliwén kayo mekibekal son si-kara. No bilang ey wáray

menengpel ni kanawan na tamil mo, itodok mo pay ya angken pinshowa-en tod piig. <sup>40</sup> No bilang ey wáray mengodop son si-kam ja ondaw shi oskaro say kowan to ey al-en toy barom, itodok mo pay ya angken al-en toy jakit mo. <sup>41</sup> Tan no bilang ey wáray memidit son si-kam ja kowan to ey mo itolod shi showen kilomitro, angken pay ya onsolok i pengitodoran mo son si-kato, ja epat ta kilomitro. <sup>42</sup> No wáray manbeka son si-kam, i-kan mo son si-kara i piyan sha. Tan no wáray kowan to ey memodod son si-kam, pabodorim.

<sup>43</sup> “Amtayo met sota kowan sha ey, ‘Semek moy kait mo et angken okesen mo sota makakontra son si-kam.’ <sup>44</sup> Nem say kowan ko son si-kayo, sota makakontra son si-kayo, semek jo kari, tan irewáti jo son Apo Shiyos sota ememedigat son si-kayo. <sup>45</sup> Ta no sajay i pesing jo, ingesen joy ogadi nen Apo Shiyos ja Amejo shi dangit. Ta si Apo Shiyos, nan-i-inges sa mapteng i toka pesing so ni angken sipen too, inges to no mapteng i aramid to ono ngaaw. Nan-inges ja toka peskit i akew shi kad-an sha, tan inges ton toka pa-oshan. <sup>46</sup> Mesepol la ensemek joy makakontra son si-kayo, ta no bilang ey say ensemek jo bengat ket sota toon ensemek shakejo ngo, enshiy jo kon-oren son Apo Shiyos. Ta sotan met laeng i kepesing ira nonta para singil ni bowis ja kowan jo ey enshiy kenshat sha. <sup>47</sup> Jet no bilang ey say joka bengat tetbala ni kosto ket sota kagajem jo, enshi met laeng i jo kaydesinan so nonta ira karakdan na too. Ta sotan met laeng i kepesing ira nonta toon enshiy Shiyos sha. <sup>48</sup> Mesepol la enshiy pankodangan ni ogadiyo ja inges toy ogadi nen Apo Shiyos ja Amejo wáred dangit.

## 6

### *Sota pesing ni tolong*

<sup>1</sup> “Eg mesepol la ipa-sas joy mapteng nga aramid jod karakdan, ja kowan jo ey say i-etek shakejo nonta mengesas son si-kayo. No sotan i pesing jo, enshiy jo kon-oren ja i-akan ali nen Apo Shiyos ja Amejo shi dangit.

<sup>2</sup> “Isonga si-kayo, no bilang ey wáray tolong nga i-akan jo shi eshom ma too, eg mesepol la pa-amtayo shi karakdan, ja inges to sota kepesing ira nonta toon emengipa-sas ni mapteng nga aramid sha say eg amta-an ni karakdan ey ngaaw i nem-nem sha, no wára ired sa-nopan tayan Hodiyo on angken shima kalsaren eshakil i too. Ta say wáred nemnem sha, piyan shen ishayaw ira nonta toon mengesas son si-kara. Nem podno iya ikowan ko son si-kayo. Sota ira toon sajay i itsora ni aramid sha, enshiy isobadit nen Apo Shiyos son si-kara, ta singa inewat sha lay konkona sha nonta in-etek ira ni totoo. <sup>3</sup> No bilang ey mengi-kan kayo ni tolong jo shi kakaasin too, eg mesepol la pa-amtayo iyay ja joka dagdag-a. No mebedin koma, angken sota kanigid ja takday jo, eg to amtay inpangi-kan nonta kanawan na takday jo. <sup>4</sup> Mapteng no sotan na tolong jo shi eshom ma too ket eg amta-an ni eshom, ta si Apo Shiyos ja Amejo, amta ton emin i joka dagdag-a, jet si-katoy mengi-kan ni konkona jo.

### *Sota maypangkep ni panshéwat*

<sup>5</sup> “No manshéwat kayo so nen Apo Shiyos, eg jo onoran sota kepesing ira nonta toon emengipa-sas ni mapteng nga aramid sha say eg amta-an ni karakdan ey ngaaw i nemnem sha. Say pipiyan sha ja panshéwatan son Apo Shiyos, shima sa-nopan, ono shima kalsara ja

karakdan ni too say asen ira nonta eshakil la too. Nem podno iya ikowan ko son si-kayo. Sotan iren too, enshiy isobadit nen Apo Shiyos son si-kara, ta singa inewat sha lay konkona sha nonta in-etek ni totoo ira. <sup>6</sup> No manshewat ka so nen Apo Shiyos, say pesing mo, daw ka shima kowadtom et pandekeb ka, asan ka manshawato so nen Apo Shiyos ja Amam. Jet sikato, wara nodtan na kowadtom ni moka panshewat ni abos mo, jet si-katoy mengi-kan ni konkonom.

<sup>7</sup> “No manshewat kayo so nen Apo Shiyos, aliwen sota enshokey ya esel ja enshiy silbi to i jo ikokowan, ja inges toy kepesing ira nonta pagano no manshewat ira nodta sinan shiyos sha. Tep say wared nemnem sha, no ishokey shay shawat sha, itenengan kono nonta shiyos sha. <sup>8</sup> Eg jo onoran sotan na shaka pesing, ta sota Amejod dangit, anken nonta eg jo pay laeng inkowan son sikato, amta to i emin na mesepol jo. <sup>9</sup> Isonga no manshewat kayo, inges niyay i pesing jo:

“Si-kam ma Amemi ja wared dangit, si-kam koma i mayshed-jaw ni olay.

<sup>10</sup> “Sota pantoshayan mo, pasebim koma ali, jet sota piyan mo, si-katoy medeka shiya dobong, ja inges to ngod dangit. <sup>11</sup> I-kan mo koma sota kenen mi ni inakew. <sup>12</sup> Si-kam i memekawan son sikami ni nanbasolan mi, ja inges toy mika pemekawan ni kait min too ja waray nanbasolan sha son si-kami. <sup>13</sup> Karam itolok koma ja manbesol kami, no diket si-kam i mengiredan son si-kami say eg kami manbesol.’

<sup>14</sup> “Agpayso iyay ya ikowan ko son si-kayo. No pekawanan jo sota ira toon waray nanbasolan sha son si-kayo, si Apo Shiyos ja Amejo shi dangit, si-katoy memekawan

ngo son si-kayo. <sup>15</sup> Nem no eg jo pekawanan ira sota toon waray nanbasolan sha son si-kayo, si Apo Shiyos ja Amejon wared dangit, eg shakejo ngo pekawanan shi basol jo.

*Sota maypangkep ni pengibiyang ni pangan*

<sup>16</sup> “Jet, no ibiyang jo nin ja eg mengan pangkep ni pamatiyo, eg mesepol la pa-amtayo shi eshom ma too, ja inges toy kepesing ira nonta toon mengipasas ni mapteng nga aramid sha say eg amta-an ni karakdan ey ngaawayan i nemnem sha. Emedew shi dopara ey si-kara, inbiyang sha nin i pangan sha maypangkep ni pamatira. Nem podno iya ikowan ko son si-kayo. Sota ira toon sajay i itsora ni aramid sha, enshiy isobadit nen Apo Shiyos son si-kara, ta singa inewat sha lay konkona sha nonta in-etek ira ni totoo. <sup>17</sup> Nem si-kayo, no ibiyang jo nin i pangan maypangkep ni pamatiyo, sagaysay joy bowek jo, tan pansha-dop kayo, say sota inpangibiyang jo so ni pangan maypangkep ni pamatiyo, eg medew. <sup>18</sup> Mapteng no say maka-amta bengat ket si Apo Shiyos ja Amejon wared dangit. Ta si-kato, wara met laeng shita kad-an mo ni abos mo, jet si-katoy mengi-kan ni konkona jo.

*Sota koston pannemnem ni too ja pengosal to ni kokowa*

<sup>19</sup> “Aliwen sota kokowa shiya dobong i jo kamkamkaman na olnongen, ta sotan iren kokowa, kesheshala ni bigis, kesheshala ni dati, tan kaibetik ni emengibot. <sup>20</sup> Nem say nemnemen jo et, sota pesing nga mengolnong ni kokowayod dangit. Ta shiman, enshiy onsharal so ono onkibot so. <sup>21</sup> Shi dangit komay wa-wa-shen pengolnongan jo ni kokowayo, ta

sota kawad-an ni kokowayo, si-katoy wared nemnem jo ni olay.

<sup>22</sup> “Sota mata, si-katoy may-eshig ey silew ni bakdang. Jet no mapteng i moka pengesas ja pesing mo ni kokowam, may-eshig ey napnoy bakdang mo ni dawag. <sup>23</sup> Nem no ngaaw i moka pengesas nontan na kokowa, ja piyan mon sinopen ja para son sikam bengat, may-eshig ey emin na parti ni bakdang mo ket wared embolinget. Jet no ma-enshiy istay dawag ni nemnem mo, may-eshig ey embolinget ngon emin i kawad-an mo.

<sup>24</sup> “Say too, eg mebedin na showay pansilbi-an to. No ensemek to sota sakey, okesen to sota maykadwa; no ishayaw to sota sakey, bedawen to sota maykadwa. Isonga eg kayo mebedin na mansilbi son Apo Shiyos no pilak i wa-wa-sha son si-kayo.

*Karekayo manshanag ni kom-pormi*

<sup>25</sup> “Isonga say ikowan ko son si-kayo, aliwen kayo meshanagan ni panbiyag jo: no ngarantoy kenen jo, ono inomen jo, ono ibaro jo. Ta say biyag tan bakdang, epateg nem say mekan tan baro.

<sup>26</sup> Idmang jo kari ira ja titit ja emantejatejab shi naykayang: eg ira manmoda ono mengepit, ono mengitdo ni apit shi sarosal. Nem si Apo Shiyos ja Amejon wared dangit, si-katoy ememekan son sikara. Jet si-kayo, mas epateg i biyag jo nem say sota ira titit.

<sup>27</sup> Sota joka panshanshanag, eg to met peshokey i biyag jo ni angken ootik. <sup>28</sup> Apay nga sota ibaro joy joka panshanshanagi? Asas jo kari ira sota sabsabong shima shontog; nemnem jo kari no toway toka pesing nga manbiyag. Eg met man-obda ono mengebel ni baro, <sup>29</sup> nem iyay i ikowan ko son si-kayo. Angken

si Ari Solomon ja kabaknangan nonta bayag da, emin sota osal ton nankemapteng, eg sha pay ingesen i kamapteng ira nima sabsabong. <sup>30</sup> No si Apo Shiyos ket eg to i-oway sota edet shima shontog ja wara niman et no kabasan ket maypool shi apoy, sinto pay kayo mangon too to ja i-oway to. Isonga eg tokejo baybay-an. Si-kayo, ootik eshan i pamatiyo, isonga kayoka meshanagin pasiya. <sup>31</sup> Karekayo meshanagan ja kowan jo ey, “Towa emoy pengal-an da ni i-ala ni mekan?” ono, “Towa emoy pengal-an ni i-ala ni ma-inom, ono ibaro?” <sup>32</sup> Tep si Amejon wared naykayang, amta ton emin i mesepol jo. Sota ira toon enshiy pamatira son Apo Shiyos, anam shen si-karay manshanag ni panbiyangan sha, aliwen si-kayo.

*Sota pantoshayan nen Apo Shiyos i nemnemen*

<sup>33</sup> “Nem say epateg jen mesepol la nemnemen jo, sota pantoshayan nen Apo Shiyos, tan sota mapteng ja piyan ton dag-en jo. Jet no sajay i pesing jo, emin na banag ja kasapolan jo, i-akan to.

<sup>34</sup> “Karekayo manshanag niman maypangkep ni ma-onod alin timpo, ta shi ma-onod alin timpo, si-kato ngoy pannemnem jo ni mesepol jo no onmotok sotan ali ngon akew. Sota problima niman na akew, si-katoy nemnemen jo bengat; eg jo i-eshom i problima ja onsabi nem kabasan.

## 7

*Aliwen en damsisen i eshom*

<sup>1</sup> “Karejo nemnemen i nankamali-an ni eshom ja si-katoy pengikowanan jo ma ey ngaaw ira, say eg ngo ikowan nen Apo Shiyos ey ngaaw kayo. <sup>2</sup> Sota wared nemnem jo ja joka pesing nga mandokod ni kowan jo ey

nankolongan ni eshom, si-kato ngoy osalen nen Apo Shiyos ja pandokod to ngo ni nankolongan jo. <sup>3</sup> Apay nga sota ootik ka naybosi shi mata ni kait mo i moka iningning, ey si-kam ma mismo ket eg mo nemnemen ey ebadeg i naypadkal shi matam? <sup>4</sup> Na-alas ja mo ikowan so ni kait mo ey a-kalen mo sota naybosi shi mateto, ey si-kam ket ebadeg i naypadkal shi matam ma shorog. <sup>5</sup> Ngaaw ita moka pesing ja moka idibak i ngaaw wa nemnem mo! Ekal mo nin sota mismon naypadkal shi matam say kosto may pan-esas mo, et say asen mo men pasiya ja a-kalen sota naybosi shi mata ni kait mo.

<sup>6</sup> “Nem mesepol la asen jo nin i pengipiyalan jo so ni inbilin nen Apo Shiyos, ta aliwen anam ni toon singa asoy ogadi to. No ipiyal jo son si-kara sota inbilin nen Apo Shiyos, sekitan shakejo et bengat. Kasta met no waray ensekig ga too ja singa keshel i itsora to, angken eg jo ngo ipiyal sota ebanol la maypangkep ni pantoshayan nen Apo Shiyos. Ta no sajay i pesing jo, singa joka pan-i-akan shi keshel sota ebanol la para alkos ni baro ni too. Jet sajay ya ebanol, kenshat ta dam-sisen mango ira nonta keshel iyay et pan-ikatin sha bengat.

### *Ma-ekan si Apo Shiyos*

<sup>7</sup> “No waray mesepol jo, si Apo Shiyos i panbeka-an jo, jet i-akan to. No eg kayo on-ekdas ja manshewat son si-kato, ewaten joy mesepol jo. Panogtog kayo nin et idokatan tokejo. <sup>8</sup> Ta emin ira sota manbeka, ono manshewat son Apo Shiyos, si-kara ngoy mengewat ni medepo son Apo Shiyos. Jet emin ngo iray menogtog, si-karay maydokatan. <sup>9</sup> Arig toy san-ama. Wara ayay

inon-an jon nga-nga ja no manbeka so nen ameto ni tinapay ket bato i i-akan nen ameto? <sup>10</sup> Ono kaspangarigan ey sota anak to ket manbeka ni piskaw, apay oleg i i-akan to aya? Enshi, say i-akan nonta ama so ni anak to, sota mapteng nga ibaga to. <sup>11</sup> Si-kayo, angken ngaaw i aramid jo, amtayo met ja mengi-kan ni mapteng nga ibaga ni anak jo. No satan i wara son si-kayo, mas pay ya amta nen Apo Shiyos ja Amejod dangit ja mengi-kan ni mapteng nga banag so nonta emengshaw son si-kato ni kasapolan to.

### *Sota sakey ya epateg ga bilin*

<sup>12</sup> “Sota piyan jon pesing ni kait jon too son si-kayo, si-kato ngoy pesing jo nonta eshom. Ta si-katoy wared ma naysolat ta bilin nen Apo Shiyos, tan si-katoy kowan ira nonta para padto nonta bayag da.

### *Sota arig ni edipit ta shalan*

<sup>13-14</sup> “No sota maypangkep ni pengitoshong jo shi biyag ja enshiy to engintegan, may-eshig shi sakepan ja edipit. Nem sota embanaw wa sakepan, inam-ay ya panshalnan, isonga eshakel i kaonsekep nodtan. Nem sotan i mengitoshong shi kesheshalan. Sota sakepan na edipit, edigat ta panshalnan, nem sotan i mengitoshong shi biyag ja enshiy to engintegan. Aliwen eshakel i kaonsekep shi edipit, nem si-kato komay seskepen jo.

### *Sota arig ni mola tan sota dames to*

<sup>15</sup> “Tanshaaniyo sota kowan sha ey para padto kono ira nen Apo Shiyos nem o-owap i shaka ikokowan. No wara di ira, singa maronong ira nem mareshal gayam ira ni pamatiyo. <sup>16</sup> Sajay ira, say pengamta-an jo no to-to-wen para padto ira, asas jo nin i shaka dagdag-a. Say kay-eshigan ni pengamta-an jo ni itsora

sha, inges to sota mola. Aliwén shi sebit i ka-epitan ni kowan sha ey obas, ono sota kowan sha ey higos. Eg ondames i mola ni dames ni sakey ya kalasi ngon mola. <sup>17</sup> Sota molen mapteng, mapteng i dames to, nem sota molen ngaaw, ngaaw ngoy dames to. <sup>18</sup> Sota molen mapteng, eg ondames ni ngaaw; kasta met sota ngaaw wa mola, eg mebedin na ondames ni mapteng. <sup>19</sup> Jet emin na molen eg ondames ni mapteng, mebetang ira jay jet maypool shi apoy. <sup>20</sup> Sajay iray kay-eshigan ni too. Ma-amta-an i itsora ni too no bidbiren i shaka dagdag-a.

*Sota mayda-kam shi pantoshayan nen Apo Shiyos*

<sup>21</sup> “Isonga aliwén emin na too ja mengewag ey apo towak ket mayda-kam shi pantoshayan nen Apo Shiyos. Nem say maydakam, sota mengonod ni piyan nen Amak ja wared dangit. <sup>22</sup> No ka-onoran alin akew, eshakil i mengikowan ey, ‘Pangaasim Apo, engitosho kami met ni esel nen Apo Shiyos et inkowan mi pay ey si-kam i engibetkag son si-kami. Inosal mi pay i ngaran mon engipabtik ni dimonyo so nonta ira toon eman-engaw, tan eshakil pay i milagron kaskasshaaw ja dingka mi ni in-osal mi so ni ngaran mo.’ Sajay i idason sha ali son si-kak. <sup>23</sup> Nem say isongbat ko son si-kara, ‘Eg takejo am-amta, ki-nan kayod jay! Ta si-kayo, ngaaw i aramid jo nontan.’

*Sota arig ey showen engitowen ni baley to*

<sup>24</sup> “Sota toon ontongpal niyay ya intenengan ton inkowan ko la, si-kato sota may-eshig ey toon waray nemnem to. Sajay ya too, may-eshig ey intowen toy baley tod naypilmin bato. <sup>25</sup> Jet idi imoran ali, nandayos, nem pesed

ja eg na-an-ano. Angken shimagem ni makedsang, ja sini-bok to sotan na baley, eg eto-dang, ta naytowen i tokod to nodta bato. <sup>26</sup> Nem sota toon itenengan to bengat i inkowan ko, ja eg to pinati, may-eshig ey toon enshiy am-amta to. May-eshig ey intowen toy baley tod ma sharat. <sup>27</sup> Jet idi imoran ali, et nandayos, shinepos to sotan na baley. Es-hagem pay sotan na baley jet kolpin etowang.”

Emin iyay, sajay i intoro nen Jesus so nonta ira too to nonta wara ired shontog.

*Embelbel-at i toro ngo eshan nen Jesus*

<sup>28</sup> Jet idi naksheng nga inkowan nen Jesus iyay, nasshaaw ira sota totoo nontan na inpangitoro to. <sup>29</sup> Ta say itsora ni toka pengitosho, wara et ngo mowan i kepengipateg ni too nonta toka pan-itoro nem say sota toro nonta sigod ja emengitosho son si-kara, ja mais-toro ni dinteg ni Hodiyos.

## 8

*Inpamapteng nen Jesus sota ebayabayang i bakdang to*

<sup>1</sup> Idi shimalong si Jesus nodta shontog, eshakil la pasiya ira sota toon imonod son si-kato. <sup>2</sup> Jet nontan, waray toon dimaw ali son si-kato ja ebayabayang i bakdang to. Sotan na too, nantalimokod shi sango-an nen Jesus ja kowan to ey, “Apo, no piyan mo, pamapteng mo iya bakdang ko, say eg sha-ak seskigen.”

<sup>3</sup> Jet si Jesus, inojad toy takday to et pinishat to sotan na too. Jet kowan nen Jesus son si-kato ey, “Siya piyan kon onmapteng ka.” Jet nontan met laeng, mimapteng nga shagos sota bakdang to. <sup>4</sup> Jet si Jesus, bini-din to sotan na too ja kowan to ey, “Karam ikokowan iyay so ni



eshom, no diket pandiritso ka et ja ondaw shima pari. Ipa-sas mo ita bakdang mo son si-kato, ja mimapteng ma. Jet pangidaton ka nonta kowan nen Moises shi dinteg ey maydeton son Apo Shiyos, say amta-en ni karakdan ey si-kam, enshi may bayang mo.” Kowan nen Jesus.

*Inpamapteng nen Jesus sota baga-en ni solsharo*

<sup>5-6</sup> Idi emanmotok si Jesus shi Kapirnaom, en inaspol nonta kapitan ni solsharo ni Roma, jet kowan nontan ey, “Pangpan-gaasim apo, emansekit sota baga-en ko. Eg makakeykey i bakdang to jet emandikat ta pasiya. Imed baley ko niman.”

<sup>7</sup> Jet si Jesus simongbat ja kowan to ey, “Ondawak da et nak pemapteng.”

<sup>8</sup> Nem sota kapitan ni solsharo, simongbat ja kowan to ey, “Nem si-kak, ekak maykeshi ja ondaw ka shi baley ko. Angken on-anay sota esel la ikowan mo et onmapteng ma sota baga-en ko. <sup>9</sup> Amtak ta paras ko ey angken esel bengat, kaon-anay. Ta si-kak waray apok, jet wara ngoy solsharo ja intorayan ko. No ikowan ko nonta sakey ey ondaw, pati-en to, jet no tewalen ko sota sakey, ondaw ali. Kasta met sota baga-en ko, no ikowan ko son si-kato ey, ‘Obdam iyay’, dag-en to.” Kowan nonta kapitan ni solsharo.

<sup>10</sup> Idi intenengan nen Jesus iyay ya kowan nonta kapitan ey sota esel nen Jesus i on-anay, nasshaaw wa pasiya si Jesus. Jet kowan to nonta ira eshakil la toon imonod son si-kato ey, “Istay sota Hodiyo et koma i makedsang i pamtira son Apo Shiyos, nem enshiy nak inon-an son si-kara ja maka-inges ni pamati niyay ya aliwen Hodiyo et ngo mowan!  
<sup>11</sup> Ikowan ko son si-kayo, eshakil

aliy medepod emin na sakop niya dobong, ja angken aliwen Hodiyo, jet si-karay ontongaw wa mekilikob so nen Abraham, si Isaac, tan si Jacob shima pantoshayan nen Apo Shiyos. <sup>12</sup> Nem sota ira Hodiyo ja istay inpatanil nen Apo Shiyos ja mayda-kam shi pantoshayan to, si-kara et ngo mowan sota pedaw to met laeng shima emboliget. Jet shiman, mannengnengis i wared man, tan panngedetngat shay sangi sha ni daringit sha.”

<sup>13</sup> Jet si Jesus, kowan to so nonta kapitan ni solsharo ey, “Eti akad ka, medeka sota kowan mo ta emati ka.”

Jet sota baga-en nonta kapitan, mimapteng nga shagos nonta mismon inkowan nen Jesus iyay.

*Inpamapteng nen Jesus i eshakil la too*

<sup>14</sup> Jet si Jesus, dimaw shima baley nen Pedro jet simbi ton emansekit sota inepo nen Pedro ja bii. Epaladoy petang ni bakdang to. <sup>15</sup> Jet si Jesus, pinishat toy takday nonta emansekit jet na-kal la shagos i sakit nonta bii. Jet nontan met laeng, bimangan na shagos et inkamakaman to ira.

<sup>16</sup> Idi mama-shem mala, eshakil ira di sota eman-engaw wa kawad-an ni dimonyo, ja indaw ni kait sha son Jesus. Jet si Jesus, esel bengat i inosal ton engipabtik so nonta dimonyo so nontan iren too. Tan inpamapteng to pay ira sota emanpansekit. <sup>17</sup> Sajay i edaga ta say metongpal sota inpadto nen Isaias nonta bayag da ja kowan to ey, “Si-kato aliy onsakbat so ni digat tayo, tan mengkal ali nonta sakit tayo.”

*Sota ira toon kowan sha ey may-odop ira son Jesus ni olay*

<sup>18</sup> Idi inon-an nen Jesus sota eshakil la toon nandikmot son si-kato, inkowan to so nonta too to

ey, “Eti, ondaw kito shima piig ni baybay.”

<sup>19</sup> Jet nontan, wáray dimaw ali ja maistoro ni dinteg ni Hodiyo, ja kowan to son Jesus ey, “Maistoro, angken toway dawan mo, mekidawak son si-kam.”

<sup>20</sup> Jet si Jesus, simongbat ja kowan to son si-kato ey, “Pannem-nem ka nin, ta saja obdak, edigat. Onito pay sota atap pa animal, tan titit, ta wáray koston shaka panini. Nem si-kak, enshiy koston baley ko ja pansalshengan ko.”

<sup>21</sup> Jet wára ngoy sakey mowan na too nen Jesus ja kowan to ey, “May-odopak ni olay son si-kam Apo, nem nak nin isingpet si amak.”

<sup>22</sup> Nem si Jesus, simongbat ja kowan to ey, “Kala et, olay ngo ira sota toon eg sha antes Apo Shiyos ja mengisingpet nonta etey. May-bidang ey etey ira, jet anam shen mengibka ni etey ja too.”

*Inpasalsheng nen Jesus i makedsang nga shagem man makedsang nga shadoyon*

<sup>23</sup> Jet idi nandogan si Jesus nodta bangka, ja onda-jat ma, nay-olop met laeng sota too to.

<sup>24</sup> Jet idi nonta wára ired ma baybay, ebiglen kimedasang i shagem nodta baybay, tan makedsang ngo i shadoyon shi baybay, isonga sota bangka, shanshanin sa-neben ni shanom. Nem si Jesus, en-amis i ogip to. <sup>25</sup> Sota ira too to, sha binengon si Jesus, ja kowan sha ey, “Apo! Isedakan jokami! Shanshani kiton metey!”

<sup>26</sup> Jet si Jesus, kowan to son si-kara ey, “Ngantoy! Apay entakot kayo? Ara kayon too! Ootik eshan i pamatiyo!”

Si Jesus, imetan et inkowan to nonta shagem tan baybay ey onsalsheng ira et timalna men pasiya sota baybay. <sup>27</sup> Jet nasshaaw ira ja too to ja kowan

sha ey, “Ngaranto emoy saad niyay ya too? Toka pesalsheng iray shagem tan shadoyon et shaka pati-a!”

*Inpabtik nen Jesus sota dimonyon pimeket shi showen toon eman-engaw*

<sup>28</sup> Intoloy shen bimaliw et mimotok ira nodta dogad ja kowan sha ey Gadara. Jet wáray showen too ja en nay-apol so nen Jesus. Sajay iren too, ireka man-engaw tep wáray dimonyon pimeket son si-kara, jet say shaka pan-iyani, shima kamposanto. Isonga enshiy emanshedan nodtan tep ireka mengila-kad. <sup>29</sup> Jet pimekis ira ja kowan sha ey, “Anak nen Apo Shiyos! Nganto may pesing mo son si-kami? Apay dimaw ka din jokami shosa-en, ey aneng nin i timpo to?”

<sup>30</sup> Nontan met laeng, wára iray eshakil la keshel la naybolos ja nay-esop nodtan. <sup>31</sup> Isonga sota ira dimonyo, ireka mekikaasi son Jesus ey, “No pebtik jokami shiya too, say piyan mi, on-etan kami shima eshakil la keshel.”

<sup>32</sup> Jet si Jesus inpalobos to ja kowan to ey, “Ti daw kayo.”

Jet sota ira dimonyo, bimetik ira nodta too et pimeket ira nodta eshakil la keshel. Jet sota ira keshel, namtik iren nan-ekas shima shepdas et dimened ira shi baybay.

<sup>33</sup> Jet sota toon istay emanbantay ira niyay ya keshel, kinanoan shen inshamag shi siyodad sota emin na epasamak, tan angken pay sota edaga so nonta showen istay kawad-an ni dimonyo. <sup>34</sup> Jet sota ira toon engitneng niyay ya shamag, dimaw ira di ja sha inonan si Jesus. Idi simbira, ekikaasi ira son si-kato, ja kowan sha ey, “Pangaasim, ki-nan ked jay ya kad-an mi.”

## 9

*Inpamapteng nen Jesus sota toon eg makakeykey i bakdang to*

<sup>1</sup> Si Jesus, en nandogan nodta bangka et pati ira sota too to, jet dimaw ira shima siyodad ja ili to. <sup>2</sup> Jet nontan, waray binangtal ali ni totoo jet sha inilaw son Jesus. Sotan na toon inilaw sha, eg makakeykey i bakdang to. Idi indasin nen Jesus ey ebadeg i pamatira, kowan to so nonta emansekit ey, "Pan-imdeng ka kajem ko. Ta sota basol mo, epakawan."

<sup>3</sup> Sota eshom so nonta ira maistoro ni dinteg ni Hodiyo, ja wara nodtan, kowan shed nem-nem sha ey, "Sajay ya too, toka pa-so-i si Apo Shiyos!"

<sup>4</sup> Nem si Jesus, amta toy wared nemnem sha et kowan to son si-kara ey, "Apay nga ngaaw i joka nemnemnema?" <sup>5</sup> Say kowan jo, inba-ngat kon memekawan ni emin na basol niyay ya too, ey ekak kabaalan? Nem iyay i dag-en kon pati-an jo so. Ikowan ko niyay ya too ey man-ekad, <sup>6</sup> jet no man-ekad, amta-en jo ey si-kak sota kowan nonta para padto nonta bayag da ey Anak ni Too. Amta-en jo pay ey waray kalintegan kod ja dabaw ni shaga ja memekawan ni basol ni too." Jet si Jesus inkowan to nonta toon eg man-ekad ey, "Alam ita amakam, jet akad ka."

<sup>7</sup> Sota too, bimangon et imakad shi baley to. <sup>8</sup> Idi inon-an ira nonta totoo sotan na edaga, naykel-ewan ira, nem inshayaw shes Apo Shiyos, tep inewatan sha ey panakabalin nen Apo Shiyos gayam sotan na inon-an shen edaga ja inpiyal nen Apo Shiyos so ni kait shen too.

*Inodop nen Jesus si Mateo ja nanbalin ni too to*

<sup>9</sup> Idi naksheng iyay, si Jesus, eman-ekad say on-etan nodtan na

dogad, jet inon-an to sota toon manngeshan ni Mateo ja para singil ni bowis ja eman-obded opisina to. Jet kowan nen Jesus son si-kato ey, "Kala, kay-olop ka son si-kak, et manbedin ka ni took."

Jet si Mateo, dimayat et imonod son si-kato, ja nanbalin ni too to.

<sup>10</sup> Jet nontan, engan si Jesus tan sota too to shi baley nen Mateo, jet dinikoban ira nonta kait nen Mateo ja para singil ni bowis, tan sota eshom ma kowan ni Hodiyo ey enshiy kenshat shen too. <sup>11</sup> Jet sota ira eshom ma Parisiyo, inon-an sha iyay et kowan sha so nonta too nen Jesus ey, "Apay nga sama maistoro jo ket emekipengan so ira nima para singil ni bowis tan sama eshom ma toon enshiy kenshat sha, ja eshakel i basol sha?"

<sup>12-13</sup> Nem idi intenengan nen Jesus iyay ja kowan sha, simongbat son si-kara ja kowan to ey, "Ekak ali dimaw ja mengewis ni toon maronong, nem dimawak ali ja mengewis ira nonta toon eshakel i basol sha. Mebedin na may-eshigak shi doktor. Eg bisita-en ni doktor i enshiy sakit to, no diket sota waray sakit to. Daw kayo et ashal jo no ngantoy olog niya esel nen Apo Shiyos ja naysolat nonta bayag da ja kowan to ey, 'Ekak kostoy animal la maydeton son si-kak, nem eg say piyan ko, kaasi-an joy eshom ma too.' "

*In-aknan to ira ni arig jet say olog to ket emankaisa-dat sota badon toro to*

<sup>14</sup> Nontan met laeng, dimaw ali son Jesus sota too nen Juan na para bonjag, jet kowan sha ey, "Si-kami tan sama ira Parisiyo ket kanayon na mika ibiyang i pangan mi no manngidin kami, nem apay nga sama toom ket eg sha ibiyang i pangan sha?"

15 Jet si Jesus, say songbat to son si-kara, in-arig toy bakdang to shi dakin engasewa. Isonga kowan to ey, “Piyan jon ikowan ey sota ira bisita shi kasal, eg ira mengan angken wára sota dakin engasewa? Enshi, kenshat ta mengan ira. Nem wára et mangoy timpon onmotok ali ja ma-enshi son si-kara sota dakin engasewa, jet si-katoy timpon ibiyang sha so ni pangan sha maypangkep ni daringit sha.”

16 Jet si Jesus inkowan to mowan i sakey ya arig son si-kara ja kowan to ey, “Na-alas no maysekab i badon abel shi shaan na baro. No maysekab sota bado, jey onkesen, a-naten to sota nayshaitan ton shaan; nakol ni mema-ma sota epi-kat.”

17 Tan wára pay i sakey ya inkowan ton arig, ja kowan to ey, “Na-alas no may-iyen i badon adak shi na-osal la inemag shen katat ja ijanan ni adak, ja kowan sha ey ‘wineskin’. No sotan i pesing jo, onpetjag sota nay-iyenan to et onkawas sota adak. Tan angken pay sota nay-iyenan to, mepilshi. Mesepol la no badon adak, bado ngoy kay-inan to, say eg onkawas iyay ya showa.”

*Inpamapteng nen Jesus sota anak nonta pangolo ni Hodiyo, man sota eshom ma waray sakit sha*

18 Idi maramen eman-a-sel pay laeng si Jesus, wára ngoy mimotok alin too ja pangolo ni Hodiyo. Nantalimokod shi sango-an nen Jesus ja kowan to ey, “No mebedin, kay-olop ka son si-kak shi baley ko, ta sota anak kon bii ket ena-bosan nonta ekay. Isonga pangaasim, mo isakpal i takday mo son si-kato. No sajay i dag-en mo, manbiyag mowan.”

19 Si Jesus, dima-jat ja ekidaw, jet angken sota too nen Jesus, nay-olop ngo ira.

20 Eshakel i toon imonod son Jesus et wára ngoy sakey ya biin naydaok ja nanshala ni sampolo tan showen tawen. Ekisikil la imonod son Jesus et pinishat toy kajaran ni baro nen Jesus. 21 Tep sota bii, kowan tod nemnem to ey, “No pishaten kos Jesus, angken sama baro to bengat, onmaptengak ma.”

22 Jet si Jesus, nanposipos et idi inon-an to sota bii, kowan to ey, “Anak ko, say minaptengan mo, sota pamatim son si-kak.” Jet nontan sota bii, nay-inshas ja mimapteng.

23 Idi mimotok si Jesus nodta baley nonta pangolo ja nay-olopan to, wára ira sota para mosiko ni etey, tan eshakel pay iray toon kaonnanangis ni makedsang. 24 Jet si Jesus, kowan to son si-kara ey, “Ki-nan kayod jay, eg etey itan na nga-nga, na-ogip bengat.” Nem sota ira totoo, inbi-wisan sha si Jesus.

25 Nem idi kimi-nan ira sota eshakel la too, simekep si Jesus et inegni-an to sota takday nonta biin nga-nga, jet nanbiyag mowan.

26 Sajay ya dingka nen Jesus, eshamag shiman na kedogadogad.

27 Idi eman-ekad si Jesus ja edapo nodtan na dogad, waray showen ekorab ja timened son si-kato. Kimeljaw ira ja kowan sha ey, “Apo, kaasi-i jokami! Waray namnama mi ey si-kam i mengi-odi nonta nantorayan da nen Ari David!” Kowan ira nonta ekorab.

28 Jet idi simekep si Jesus nodta baley, dimaw ira di sota ekorab son si-kato. Jet kowan nen Jesus son si-kara ey, “Jet kayoka memati ey mebedin na pan-esas takejo?”

Simongbat ira ja kowan sha ey, “Owen apo, kamika memati.”

<sup>29</sup> Jet si Jesus, pinishat toy mate-sha, ja kowan to ey, “Emati kayo et metongpal sota shawat jo.” <sup>30</sup> Jet nontan, nan-asas ma ira. Jet binidin ira nen Jesus ja pasiya, ja kowan to ey, “Eg jo pa-am-amta iyay shi eshom.”

<sup>31</sup> Nem sajay iren too, sha et inkokowan shi eshom sota dingka nen Jesus son si-kara; nakol ni inamta-an ni totoon emin nodtan na dogad i maypangkep so nen Jesus.

<sup>32</sup> Idi dimaw da ira sota showen ekorab, waray toon omel ja in-ilaw ali ni kait to. Say kabol la eg pan-a-selan niyay, waray dimonyo ja pimeket son si-kato ni olay. <sup>33</sup> Idi inpabtik nen Jesus sotan na dimonyo nodtan na too, nan-esel ma sota istay na-omel.

Sota ira eshakel la toon engasas niyay ya edaga, nasshaw ira ja kowan sha ey, “Angken nonta bayag da ingkato niman, enshiy inges niyay ya edaga shiya ilin Israel.”

<sup>34</sup> Nem sota ira Parisiyo, kowan sha ey, “Enshi kari! Sota apo ni dimonyo i toka osala ja mengipebtik so nonta ira dimonyo met laeng nga wared too.”

*Naysemekan si Jesus nodta eshakel la too*

<sup>35</sup> Jet si Jesus, pinasiyal ton emin sota siyodad tan eshom ma kawad-an ni totoo. Nantoro pay shima sa-nopan ira nonta Hodiyo, tan inpalewag to sota mapteng nga shamag maypangkep ni pantoshayan nen Apo Shiyos. Inpamapteng to pay ira sota totoon ekalkalasiy sakit sha. <sup>36</sup> Idi inon-an nen Jesus ira sota eshakel la too, naysemekan, ta say inpangidmang to son si-kara, singa na-na-josan ira ja enshi malay namnama shen pansigshan. Singa sota kalniron ebay-bayan i kasesaad sha, ja enshiy emengajowan son si-kara.

<sup>37</sup> Isonga si Jesus, kowan to so nonta ira too to ey, “Eshakel iray toon may-eshig ey ma-epit nem kolang iray man-obda. <sup>38</sup> Si Apo Shiyos i mengibetkag ni toon mengepit, isonga si-kato ngoy pengshawan jo say mengibetkag ali ni on-atang.”

## 10

*Inbetkag nen Jesus sota sampolo tan showen id postol to shi eshom ma ili*

<sup>1</sup> Si Jesus, sina-nop to ira sota pinidi ton too to ja sampolo tan showa. Jet kowan to son si-kara ey, “Ipiyal ko son si-kayo ey angken sama ira dimonyo ja pimeket shi totoo, mebedin na pebtik jo. Tan sota ira waray sakit to, mebedin ngon pemapteng jo ira.”

<sup>2</sup> Say ngaran ira nonta apostol ton sampolo tan showa, sajay. Say epateg son si-karen emin, si Simon ja say sakey ya ngaran to, si Pedro. Say eshom, si Andres ja agi nen Pedro, tan si Santiago nen Juan ja san-agin anak nen Sibidi, <sup>3</sup> si Felipe nen Bartolome; si Tomas, si Mateo ja istay para singil ni bowis; si Santiago ja anak nen Alpio, si Tadio, <sup>4</sup> sota si Simon ja bitarano, tan si Judas Iskariote ja mengileko ali so nen Jesus shi anongosto.

<sup>5</sup> Sajay iren apostol to ja sampolo tan showa, inbetkag to ira, ja kowan to ey, “Karekayo ondaw shima angken towen kawad-an ira nonta aliwen kait tayon Hodiyo, ono shima angken towen ili ni i-Samaria, <sup>6</sup> no diket say dawán jo bengat, topog jon ondaw nodta kad-an ni kait tayon Hodiyo ja singa may-eshig ey kalniron imarawi. <sup>7</sup> Emin na dawdawan jo, ikowan jo son si-kara ey sota naypadton pantoshayan nen Apo Shiyos, shanshani may timpo to. <sup>8</sup> Jet angken sota ira emansekit

nodtan, pamapteng jo ira, tan no waray sebi-en jon etey, panbiyag joy eshom. Pamapteng jo pay ira sota ebayabayang i bakdang sha. Sota ira toon eman-engaw ja waray dimonyon pimeket son si-kara, pabtik jo son si-kara sota dimonyon pimeket. Sajay ya panakabalin, inewat jon enshiy bayad to son si-kak, isonga no isal jod eshom ma too, eg kayo mengshaw ni bayad to.

<sup>9</sup> “Karekayo manbedon ni pilak, angken sota manintimos. <sup>10</sup> Eg mesepol la mengita-jon kayo ni bayong, ja pengi-iyanan jo ni mesepol jod shalan, ono baron pansa-datan jo, ono sinilas sa pansa-datan jo, ono sowan. Ta sota man-obda, nebeng ton mayaknan ni kompormin mesepol to. <sup>11</sup> No waray motoken jon ili ono baryo, say enapen jo nodtan, sota toon emepiyal. Jet pan-iyon kayo nin nodtan na baley to ingkatod eg jo pay laeng idekjas sotan na dogad. <sup>12</sup> Sotan na baley ja motoken jo, ikowan jo so nonta makabaley ey si Apo Shiyos, si-katoy onbindisiyon son si-kato. <sup>13</sup> Jet no sotan na too ket anam toy inkowan mon bindisiyon ta maronong, sota inkowan jon bindisiyon nen Apo Shiyos, ontoloy son si-kato. Nem no eg to anam ta ngaaw wa too, bebawi jo sota bindisiyon nen Apo Shiyos ja inkowan jo son si-kato. <sup>14</sup> Jet no sotan iren too nodtan ket eg shakejo ewaten, ono eg sha pati-en i ikowan jo son si-kara, sota depok ja naypeket shi sediyoy pokpok jo nin asan joka ilekjas sotan na baley ono ili. Ta si-katoy pengamta-an sha so ey enshi maybiyang jo son si-kara. <sup>15</sup> Jet no timpo alin pengigsheng nen Apo Shiyos no sipay maysedakan, say podnon mepesamak so nonta too nodtan na dogad, mas embel-at i keshosara nem say sota toon i-

Sodoma, tan i-Gomora.

<sup>16</sup> “Tanshaaniyo ta ibetkag takejo ja singa kalniron naydaok shima atap pa aso. Isonga mesepol la mantanshaan kayo ja inges toy kepantanshaan ni oleg. Nem mesepol la say itsora ni ogadiyo met laeng, inges toy itsora ni kalopati ja eg meneshal. <sup>17</sup> Tanshaaniyo sotan na toon kaydaokan jo, ta sota eshom son si-kara, si-kara met laeng i mengidaw son si-kayo shi oskaro. Tan angken shima sa-nopan sha, sepsepdaten shakejod man pay. <sup>18</sup> Jet ikoyod shakejo pay shi sango-an nonta ira gobinarol, tan sango-an nonta ira ari, ta too takejo. Jet sotan i waya jon mengiringan na mengikowan son si-kara ni maypangkep son si-kak. Tan angken sota ira aliwen Hodiyo, waray waya jon mengikowan son si-kara. <sup>19</sup> Jet no i-awat shakejod man, karekayo meshanagan no ngarantoy isongbat jo son si-kara, ono ikowan jo, ta sota isongbat jo, maypa-amta met laeng son si-kayo nontan na oras ja shakejosoka pan-ibag-i. <sup>20</sup> Ta aliwen si-kayon mismo i onsongbat so, no diket sota Ispirito nen Apo Shiyos ja Amejo, si-katoy mengitoshong son si-kayo.

<sup>21</sup> “Jet sajay alin timpo, angken san-agin daki, ibaag nonta sakey i agi to shi eshom, ey eg et meshanagan ey angken bono-en sha. Inges niyay met laeng i pesing ni a-ama shi annak sha. Jet angken sota ira a-anak, kontra-en shay maka-anak son si-kara et pebonora pay ira. <sup>22</sup> Jet angken si-kayo, sota joka pematy son si-kak, si-katoy kabol la okesan shakejo so ni karakdan na too. Nem sota mengitodod ni angken nganton digat ja onsabi son si-kato, si-katoy maysedakan. <sup>23</sup> No pedigaten shakejo shi sakey ya ili, betik kayo

shi eshom ma ili. Podno iyay ya ikowan ko son si-kayo. Mebedin na eg jo posposen na bebtikan na emin sota ili ni Israel ey onmotok ali sota kowan ni para padto ey Anak ni Too.

<sup>24</sup> “Iyay i nemnemen jo: sota man-ashal nin, eg ibaingan ni totoo nem say sota emengitosho son si-kato. Inges to met laeng sota baga-en, eg sha ibaingan nem say sota apo to. <sup>25</sup> Sota man-ashal, mepnek koma no ingesen to sota emengitosho son si-kato; jet angken ngo sota baga-en, mepnek ngo koma no ingesen to sota apo to. Say olog niyay, no si-kak ka apo jo ket eg sha ibaingan, ja kowan sha ey apo sha-ak ni dimonyo, mas pay ya ngaaw i ikokowan sha maypangkep son si-kayon took.

<sup>26</sup> “Nem say kowan ko, karekayo ontakot son si-kara. Sota inkowan ko ni abos jo, ja singa esa-dinan ono nay-emet niman, mesepol la amta-an ni eshom. <sup>27</sup> Sota inkowan ko son si-kayo ja sikrito, si-kato ngoy ikowan jo shima karakdan. Jet sota intenengan jon intetobok son si-kayo, si-kato ngoy ipalewag jod karakdan. <sup>28</sup> Karekayo ontakot so nonta ira makakontra son si-katejo, tep bakdang bengat i kabaalan shen bono-en; eg sha mebedin na pilshi-en i dinawayo. Nem say mesepol la metekotan koma, si Apo Shiyos, ta waray kabedinan ton meneshal ni bakdang tan dinawa ni too shi impiyarno.

<sup>29</sup> “Nem wara ngoy ebadeg ga semek nen Apo Shiyos. Nemnem jo kari sota titit. Emaydeko i showa ni sakey ya sintimos nem angken sanseskey so nonta titit ja singa enshiy banol sha, eg ibiyang nen Apo Shiyos. No waray makas sa angken sakey ya titit, amta nen Amejod dangit. <sup>30</sup> Angken pay sota bowek ni toktok jo, amta

nen Apo Shiyos i kabebilang to. <sup>31</sup> Isonga karekayo ontakot tep mas ebadbadeg pay i semek to son si-kayo nem say sota eshakil la titit.

<sup>32</sup> “Sota toon mengikowan so ni kait ton too ey si-kato ket took, ikowan ko ngo son Amak shi dangit ey sotan na too ket took ka emepiyal. <sup>33</sup> Nem sota toon mengikowan so ni too ey eg towak amta, ibiyang ko ngo shi sango-an nen Amak shi dangit.

<sup>34</sup> “Aliwen jo ipangkep ey dimawak alin mengi-kan ni olnos shiya dobong. Aliwen sota maypangkep ni olnos i dinawan ko di, no diket say panbenagan ali ni indaw ko, eg man-i-inawatan i totoo. <sup>35</sup> Angken sota san-ama, eg ira man-inawatan, ono sota san-ina, eg ngo ira man-inawatan. Angken pay sota san-inepon bii, eg ira man-inawatan. <sup>36</sup> Jet say wa-wa-sha ja mengontra so ni too, sota wara met laeng nodta pamilja to. <sup>37</sup> Sota pipiyan toy ameto, ono ineto nem say si-kak, eg maykeshin took. Angken sota makapipiyan ni anak ton bii ono daki nem say si-kak, eg maykeshi ngo ey took. <sup>38</sup> Jet sota toon eg to enosan i kaybebaing to ono kebitay to maypangkep son si-kak, eg maykeshin took, ta eg to onoran i inges ni pengenos ko. <sup>39</sup> Sota mengawan ni biyag to, mepokaw son si-kato et ngo mowan. Nem sota mepokaw i biyag to maypangkep son si-kak, odi-en to met laeng sotan na biyag to ingkatod ingka.

<sup>40</sup> “Sota mengewat son si-kayo, may-eshig ey si-kak i inewat sha. Jet sota mengewat son si-kak, may-eshig ey say inewat sha, si Apo Shiyos ja engibetkag ali son si-kak. <sup>41</sup> Sota menintil ni para padto nen Apo Shiyos ta amta to ey sotan i mengipedawag ni

esel nen Apo Shiyos, may-inges i kon-oren to nodta kon-oren nonta para padto ja i-akan nen Apo Shiyos son si-kato. Jet sota toon menintil ni toon maronong, ta amta to ey mapteng nga too, may-inges i kon-oren to nodta maronong nga too ja i-akan nen Apo Shiyos son si-kato. <sup>42</sup> Jet ag-payso iyay. Sota toon mengi-kan ni angken shanom ma inomen nonta sakey ya kabeba-an na took, ta amta to ey si-kak i makatoo son si-kato, sotan na toon mengi-kan ni shanom, sigoradon waray kon-oren to ja i-akan nen Apo Shiyos son si-kato.”

## 11

<sup>1</sup> Idi naksheng nga introd-an nen Jesus sota sampolo tan showa ja apostol to ja inbetkag ton en mengitosh, dimaw ngo nodta dogadogad ja nay-esop nodtan ja en nantoro so nonta totoo nodtan.

*En inbag-an nonta too nen Juan ja para bonjag si Jesus*

<sup>2</sup> Jet nontan, si Juan ja para bonjag, ja naybalod, shinemag to sota maypangkep ni dingdingka nen Cristo, jet say inpasing to, engibetkag ni totoo to son Jesus ja en mengibeka son si-kato, <sup>3</sup> no si-kato sota inkari nen Apo Shiyos nonta bayag da ey ibetkag to di ja mengisedakan. Jet inbaga sha pay ey, “Si-kam sota naypadton ibetkag ali nen Apo Shiyos, ono waray apil la seskeshen mi?”

<sup>4</sup> Simongbat si Jesus ja kowan to so nonta inbetkag nen Juan ey, “Kay-oli kayo jet ikowan jo so nen Juan sota inon-an jo tan intenengan jo ni kawasha jod jay. <sup>5</sup> Ikowan jo ey sota ira nankekorab nan-asas ira, sota ira nankepilay nan-akad ira, sota ira nankebayang i bakdang sha mimapteng ira, sota ira nanke-toleng emantetneng, sota eshom ma nanketey nanpawil ira, tan

sota ira nankebiteg naytoro son si-kara i mapteng nga shamag may-pangkep son Apo Shiyos. <sup>6</sup> Si Apo Shiyos i onbindisiyon so nonta enshiy showashowa to son si-kak.” Kowan nen Jesus so nonta ira inbetkag nen Juan.

<sup>7-9</sup> Idi dimaw da sota inbetkag nen Juan, inkowan ma nen Jesus so nonta ira totoo ey, “Nonta dimaw kayo so nen Juan shima dogad ja kad-an ton nay-arawi shi ili, amtayo ey si-kato ket para padto nen Apo Shiyos. Isonga dimaw kayod man ja en mengesas ni toon para padto nen Apo Shiyos, aliwen say kayo mengesas ni toon ekapoy ja singa bolong ni edet ja enam-ay ya iwagas ni shagem. Aliwa ngon say dinawan jod man ket say kayo mengesas ni toon nanbaro ni mapteng, ta say ka-asan ira niyay ket shi siy-odad ja engkakembaleg i baley sha. Dimaw kayon en mengesas ni para padto et siya, inon-an joy toon engatngato pay nem say sota eshom ma para padto nen Apo Shiyos.

<sup>10</sup> “Ta si Juan sota kaytoshongan nonta esel nen Apo Shiyos ja naysolat nonta bayag da, ja kowan to ey, ‘Waray ibetkag ko ja mepangdo ey say si-kam, jet to isagana ira sota totoo.’ Sajay i padto nonta bayag ja timorong son Juan. <sup>11</sup> Jet ikowan ko et son si-kayo. Podno ey si Juan, enshiy to kay-ingesan so ni emin na toon nay-anak, andken sipa. Nem say sakey ya toon kabeba-an shi pantoshayan nen Apo Shiyos, si-katoy engatngato nem say si Juan.

<sup>12</sup> “Jet idi nonta inshogi nen Juan ja para bonjag i obda to, ingkato niman, sota pantoshayan nen Apo Shiyos, eshakel la pasiya i makapiyan. Jet sota ira eshom, ireka emekisikil, ta piyan shen mayda-kam. <sup>13</sup> Ta sota



emin na wáred bilin ja in-awat nen Moises nonta bayag da, tan emin sota inkowan ira nonta para padto, inpadtora sota may-pangkep ali nonta pantoshayan nen Apo Shiyos. Si Juan i sakey ya engipadto et si-katoy ka-onoran. <sup>14</sup> Awatiyo koma iya naka pan-ikowan, ey si Juan, si-katoy tongpal nonta padto nonta bayag da ey si Elias, ja para padto nen Apo Shiyos nonta bayag da, ondaw mowan ali. <sup>15</sup> Niman i wáray wáya jon mengitneng niyay ya naka pan-ikowan, isonga itnengi jon pasiya.

<sup>16</sup> “Ara kayon too niman! Sota pemedaw bengat i amtayo. Ikowan koy joka kay-eshigi. Singa a-anak kayon wáred ma malkaro, ja ensikshal la meki-asil. <sup>17</sup> Kowan ira nonta eshom ma a-anak ja ka-asil jo ey, ‘Nanmosiko kami para son si-kayo, nem eg kayo met edadsakan! Insa-dat min nimangis, nem eg kayo met ekinengis!’ <sup>18</sup> Nonta timpon inpangitoro nen Juan, nagshengan i toka kena, eg menginom ni adak, jet kowan jo ey eman-engaw. <sup>19</sup> Jet si-kak niman na indaw ko di, enganak ni inges toy joka kena, tan enginomak, nem binedaw jowak met laeng, ja kowan jo ey, ‘Asas jo kari iman na too: makibel, ma-inom ni adak, tan say kajem to pay, sota ira para singil ni bowis, tan anken pay sota ira eshom ma toon enshiy kenshat sha ja eshakil i basol sha.’ Sotan i kowan jo, nem sota ira emati son Juan, tan emati son si-kak, si-karay ka-asan to ey say plano nen Apo Shiyos, podnon mapteng ni olay.” Kowan nen Jesus.

*Kakaasi ali sota ira eg memati son Jesus*

<sup>20</sup> Jet nontan si Jesus, wáray inkowan to maypangkep nonta dogad ja dingka-an to so ira nonta

eshakil la milagro, jet inkowan toy basol ni totoo nodtan na dogad, ta eg sha inbebawi i basol sha. <sup>21</sup> Jet kowan to ey, “Kakaasi kayo di ja toon i-Korasin, tan si-kayon tood Bitsaida. Eshakil i dingkak ka milagro shi ili jo jet inon-an jo, nem eg kayo nanbebawi. No sajay komen milagro ja inpa-sas ko son si-kayo ket inon-an ni tood Tira tan tood Sidon, anken aliwén too ira nen Apo Shiyos, sigoradon nanbebawi ira nonta mismon inon-an sha sota milagro, tan wára pay i ka-onanan to ey ireka mandeshingit maypangkep ni basol sha. <sup>22</sup> Nem ikowan ko son si-kayo, no onsabi ali sota timpon pengigsheng nen Apo Shiyos no sipay maysedakan, mas embel-at i keshosayo nem say sota tood Tira, tan tood Sidon.

<sup>23</sup> “Tan si-kayo ngon tood Kapirnaom, kowan jo ey ingato jon shorog i bakdang jo ingkatod dangit, nem ayshi, eg mebedin! Maybeba kayod impiyarno. Ta no sota milagro ja edaga shita kad-an jo ket istay edaga koma shi Sodoma nonta bayag da, sigoradon nanbebawi komay tood man. Jet sotan na dogad, istay wára koma niman ja eg pinilshi nen Apo Shiyos. <sup>24</sup> Nem iyay i ikowan kon podno son si-kayo. No onmotok ali sota akew wa pengigsheng nen Apo Shiyos no sipay maysedakan, mas embel-at i keshosayo nem say sota keshosa ni tood Sodoma.”

*Nem sota ira toon piyan ton metod-an, i-aknan to ira ni pansigshan sha*

<sup>25</sup> Nontan met laeng, si Jesus kowan to son Apo Shiyos ey, “Ama, apo ni dangit tan saja dobong, man-iyamanak son sikam, tep say inpa-amta-an mo so maypangkep ni pantoshayan mo ket sota ira toon mapiyan na metod-an. Nem sota ira toon kowan sha ey eshakil i amta to,

eg mo ipalobos sa amta-an shay maypangkep ni pantoshayan mo. <sup>26</sup> Owen Ama, edaga iyay tep si-katoy piyan mon medeka.” Sajay i iyaman nen Jesus son Apo Shiyos.

<sup>27</sup> Jet inkowan to pay ey, “Si-kak bengat i inpiyalan so nen Amak ni emin. Si-kak bengat i maka-amta ni emin na maypangkep son si-kato, tan si-kato ngo bengat i maka-amta son si-kak ka Anak to. Isonga sota piyan kon pengitoshoan maypangkep ni pantoshayan nen Apo Shiyos, si-katoy itoro-an ko so.”

<sup>28</sup> Jet kowan to pay ey, “Si-kayon nayda-karan ni toro ni eshom, daw kayo ali son si-kak ja manbedin ni took. May-eshig ey singa engaksiw kayo ni kalka ja eg jo posi-en. Daw kayo ali son si-kak et pan-ibdey takejo ni digat jo. <sup>29-30</sup> Si-kak i mengitosho son si-kayo et may-eshig ey engka-jas i kalkan pa-aksiw ko son si-kayo, ja inam-ay ya ma-aksiw. Si-kak, nanosak et no man-ashal kayo son si-kak, eg medikatan i nemnem jo.” Kowan nen Jesus.

## 12

*Eg nan-inawatan si Jesus tan sota ira toon mangidin*

<sup>1</sup> Naytompong nontan ja nanshalan si Jesus nodta oma ja emola-an, jet sota too nen Jesus, ematod ira nonta naymola jet kinotim shen kinan, ta na-agang ira. Timpo ni ngilin ni Hodiyo nontan na akew, <sup>2</sup> isonga idi inonan ira nonta Parisiyo, kowan sha son Jesus ey, “Asas mo kari ira ma toom! Apay nga dingkara iman ey inparit ni dinteg tayon Hodiyo i mengetod no timpo ni akew wa ngilin?”

<sup>3</sup> Si Jesus, simongbat ja kowan to son si-kara ey, “Arig to ngo sota inpasing nen Ari David nonta bayag da ni inka-ekang to, tan

sota ira too to. Apay eg jo aya amtay dingka to? <sup>4</sup> Dimaw shima tolshen baley ya inbilang sha ey para son Apo Shiyos et inda to sota tinapay ya naydaton son Apo Shiyos, jet kinan to. Jet in-aknan to pay ira sota too to. Sajay i inpasing to anta nga nayparit son si-kato tan sota ira kait to i pangan sha nontan na tinapay ya naydaton son Apo Shiyos. Ta sota pari bengat i palobos sa mengan nontan na tinapay. <sup>5</sup> Jet say sakey pay, apay eg jo aya amtay dinteg tayon Hodiyo ja no timpo ni akew wa ngilin, sota ira pari shima Timplo ket mebedin na man-obda ira? Jet sotan na dag-en sha no akew ni ngilin, aliwen basol sha. <sup>6</sup> Isonga angken saja ira took, aliwen ngaaw sotan na dingkara, ta iyay niman na timpo shiya kadan jo i toon eshayshayaw nem say Timplo. <sup>7</sup> Bimaki itan na kowan jo, ta eg jo inewatan i olog nonta esel nen Apo Shiyos ja naysolat nonta bayag da, ja kowan to ey eg to kostoy pengileton ni animal son si-kato, no diket say piyan to, sota pangaasi tayo ni kait tayon too. No istay inewatan jo iyay, eg jo inba-ngat i kowan ey waray basol ni enshiy basol to. <sup>8</sup> Si-kak ja kowan nonta para padto nonta bayag da ey Anak ni Too, si-kak i mengikowan no ngantoy mebedin na dag-en no akew ni ngilin.” Kowan nen Jesus.

*Inpamapteng nen Jesus sota toon eki-ngoy i takday to*

<sup>9</sup> Nontan met laeng nga akew ni ngilin ni Hodiyo, dimaw si Jesus shima sa-nopan ira nonta Hodiyo nodtan na dogad, <sup>10</sup> jet simbi tod man i too ja eki-ngoy i sakey ya takday to. Jet wara ngoy too nodtan ja makakontra son Jesus ja nansalodsod son si-kato ta piyan shen balang nem waray isongbat to ja ibasalan sha so ey basol

nen Jesus; isonga kowan sha ey, “Ngaaw aya i pemapteng so ni toon waray sakit to no timpon akew ni ngilin tayon Hodiyo? Ngantoy moka pengi-odog ni dintege tayo?”

<sup>11</sup> Simongbat si Jesus ja kowan to ey, “No kaspangarigan ey waray sakey ya too son si-kayo ja sesakey bengat i kalniro to jet nakas shi pel-og ni akew wa ngilin, apay baybay-an to aya? Kenshat ta to met laeng al-en nontan na akew shima pel-og. <sup>12</sup> Jet say biyag ni too, mas pay ya epatpateg nem say sota kalniro. Isonga say kowan ko, eg maypeshit i pandeka ni mapteng no akew wa ngilin.” <sup>13</sup> Jet kowan to so nonta toon eki-ngoy i takday to ey, “Oyad mo ita takday mo.” Pinati to sota kowan nen Jesus et mimapteng nga agpayso, ja may-inges ma nodta sakey ya takday to.

<sup>14</sup> Nem sota ira Parisiyo, bimoday ira jet nantatabal ira no ngarantoy pesing shen memono son Jesus.

<sup>15</sup> Nem si Jesus, amta toy pangkep sha, isonga indekjas to sotan na dogad. Nem eshakil iray imonod son si-kato, jet sota ira manpansekit, inpamapteng to iren emin. <sup>16</sup> Jet binidin to ira ey eg sha ikokowan i maypangkep son si-kato so ni angken sipa. <sup>17</sup> Saja eg kosto nen Jesus ey amtan ni emin i maypangkep son si-kato, si-katoy tongpal nonta padton Isaias nonta bayag da ey ekombaba ali sota ibetkag nen Apo Shiyos ja mengisedakan. Say kowan nonta padton Isaias, ja esel nen Apo Shiyos met laeng, kowan to ey, <sup>18</sup> “Sajay sota mansilbi di son si-kak ja pinidik; si-katoy ensemblek ko, ja emengi-kan ni naka pan-imdengi. Sota Ispiritok, si-katoy mengitoshong son si-kato. Jet sajay alin mansilbi son si-kak

i mengipa-amta nonta kosto ja piyan ko so nonta ira toon eg maka-amta son si-kak. <sup>19</sup> Sajay ali, eg mekibekal, ono onkeljaw, jet eg to ikedsang shi karakdan no waray ikowan to. <sup>20</sup> Sota ira ekapoy, eg to ma-ma-en, no diket pekedsang to ira. Kaspangarigan ey sota singa silew wa emankoko-shep, eg to kolpi-en na ashepen. Jet shi ka-onoran, isaad toy toray to jet poro mapteng i maysa-dat. <sup>21</sup> Si-kato pay i kawadan ni namnama ira nonta too ja eg nin maka-amta son si-kak.” Sajay i padto nen Isaias ja esel nen Apo Shiyos.

*Inba-ngat shen inkowan ey apo ni dimonyo i ka-osala nen Jesus ja mengipebtik ni dimonyo*

<sup>22</sup> Waray toon ekorab tan eg maka-esel pay ja nan-inan ni dimonyo ja indaw sha son Jesus et inpamapteng to sotan na too et nan-esel ma, tan nan-asas. <sup>23</sup> Jet sota ira eshakil la totoo, nasshaaw iren pasiya, jet kowan sha ey, “Sajay emo sota inpadtoeren Anak nen Ari David, ja ibetkag kono di nen Apo Shiyos son si-katejo? Si-kato emo, ono apil?”

<sup>24</sup> Nem idi intenengan ira nonta Parisiyo sota kowan ira nonta totoo, dinamsis sha, ja kowan sha ey, “Say pan-osala niyay ya too ja mengipebtik ni dimonyon pimeket shi totoo, sota apo met laeng ni dimonyo ja si Bilsibol.”

<sup>25</sup> Si Jesus, amta toy wared nem-nem sha et kowan to son si-kara ey, “Dokodoko tan na inkowan jo. Apay nga inkowan jo ey sota apo ni dimonyo i naka osala? Eg towak todongan na mengipebtik ni kait to met laeng ja dimonyo, ta amta to ey sajay, arig toy ilin manshowa. No manshowen shorog i sakey ya ili asan ireka manko-bat, kenshat ta mepilshi sotan na ili. Kasta met sota siyodad, ono

pamilja, ja manshowa, mansisi-jan ira sota totoo. <sup>26</sup> Eg mebedin na si Satanas, pebtik to met laeng i kait to, tep amta to ey no dag-en to iyay, eg onbayag i pansaad to. <sup>27</sup> No kowan jo ey si-kak ket say naka osala ni naka pebtik so ni dimonyo ket sota apo met laeng ni dimonyo, kowan jo ey si-kato ngarod i ka-osala ni too jo ni shaka pebtik so ni dimonyo? No sotan i kowan jo, angken sota ira too jo, bedawen sha ita kowan jo ey sota apo ni dimonyo i ema-osal ni pebtik so ni kait ton dimonyo. <sup>28</sup> Nem enshi: say naka osalen pebtik so ni dimonyo, sota Ispirito Santo nen Apo Shiyos, jet sotan i amta-an jo so ey say pantoshayan nen Apo Shiyos, wára ma son si-kayo.

<sup>29</sup> “Say agpayso, inebak ko nin sota apo ni dimonyo, jet arig to sota matekal la too. Eg kabaalan ni sakey ya toon onsekep shi baley ni matekal la too ja kowan to ey al-en ton emin sota wára nodta naydaem ni baley. Ayshi, kenshat ta say pesing to nin, bedoren to sotan na too asan toka al-en emin sota wára nodta baley.

<sup>30</sup> “Sota toon eg on-onod son si-kak, wára ira son Satanas ja makakontra son si-kak. Jet sota eg ontolong son si-kak ja mengolnong ni too, singa shaka pansisi-jan ira sota totoo. <sup>31</sup> Isonga ikowan ko son si-kayo ey emin na basol ni too, ono sota ngaaw ja shaka ikokowan, mebedin na mepekawanan. Nem sota ngaaw ja shaka ikokowan maypangkep nonta Ispirito Santo nen Apo Shiyos, eg mebedin na mepekawanan. <sup>32</sup> Angken sipen too ja ngaaw i toka ikokowan maypangkep nonta kowan sha ey Anak ni Too, mebedin na mepekawanan. Nem sota ngaaw i toka ikokowan maypangkep nonta Ispirito Santo

nen Apo Shiyos, eg mebedin na mepekawanan niman, angken pay shi ma-onod alin timpo ingkatod ingka.

<sup>33</sup> “Ngaran ni kowan jo ey naykaitan ko so nen Satanas? Na-alas i joka ikowan ey mapten-gak nem sina-shom jet kowan jo mowan ey ngaawak. Topog jon ikowan ey mapteng no mapteng; eg jo bedbediwan; jet no kowan jo ey ngaaw, topog jon ngaaw ngo ni olay. Arig toy mola: no mapteng nga mola, mapteng ngo ni olay i dames to, jet no ngaaw wa mola, ngaaw ngo ni olay i dames to. Say ka-amta-an ni itsora ni mola, no mapteng ono ngaaw ket, sota dames to.

<sup>34</sup> “Si-kayon singa oleg i ogadiyo, enshiy mapteng nga esel ja kaonbo-day shi bongot jo ta ngaaw i wáred nemnem jo. Ta sota wáred nemnem ni too, si-kato met laeng i kaonbo-day shi bongot to no wáray ikowan to. <sup>35</sup> Sota toon mapteng i wáred nemnem to, mapteng ngoy toka ikowan ta si-katoy wára son si-kato. Nem sota toon ngaaw i wáred nemnem to, ngaaw ngoy toka ikowan ta si-katoy wára son si-kato. <sup>36</sup> Ikowan ko son si-kayo, no timpo alin pengigsheng nen Apo Shiyos no sipay maysedakan, emin sota esel la inba-ngat ni toon inkowan ja enshiy silbi to, songbatan sha son Apo Shiyos. <sup>37</sup> Ta sota esel ja inkokowan mo, no mapteng, si-katoy kaybetayan to ey si-kam, maronong ka ja paboran toka so nen Apo Shiyos. Nem sota esel met laeng nga inkokowan mo, no ngaaw, si-katoy kaybetayan to ey si-kam meshosa ka.” Kowan nen Jesus.

*Pan-ibaga ira nonta eshom ma too ey mandeka si Jesus ni milagro*

<sup>38</sup> Sota eshom so nonta ira ma-maistoro ni dinteg ni Hodiyos, tan

sota ira Parisiyo, kowan sha son Jesus ey, “Apo, piyan min wáray dag-en mon milagro say asen mi.”

<sup>39</sup> Nem si Jesus sinongbatan to ira ja kowan to son si-kara ey, “Ngaaw iray aramid ni too ma niman, eg sha nemnemen si Apo Shiyos! Say shaka pan-ibaga, sota milagro ta kowan sha ey si-katoy asanan sha so no agpayson si Apo Shiyos i engibetkag son si-kak. Nem enshiy milagro ja en maypa-sas son si-kara niman! Say pengamta-an jo ey inbetkag towak ali nen Apo Shiyos, no onsabi son si-kak sota inges toy epasemak so nen Jonas, ja para padto nonta bayag da. <sup>40</sup> Ta si Jonas, tedon akew to, tan tedon dabi to shima ekes nonta ebadeg ga nigay shima baybay. Jet si-kak ja kowan sha ey Anak ni Too, iso met laeng ja metdon akew tan dabi shima nayshalem ni bo-day. <sup>41</sup> No timpo alin pengigsheng nen Apo Shiyos no sipay maysedakan, ondayat sota toon i-Niniba ja intod-an nen Jonas, jet si-karay mengikowan ey si-kayon too niman, kenshat ta meshosa kayo. Tep si-kara, nan-bebawi ira nonta intenengan shay esel nen Apo Shiyos ja inkowan nen Jonas son si-kara. Nem ikowan ko son si-kayo ey iyay shiyay niman i engatngato nem say si Jonas jet eg jo pinati. <sup>42</sup> Say sakey mowan, sota arin bii ja edapod ma pesaw. Ondayat ali no timpon pengigsheng nen Apo Shiyos no sipay maysedakan jet ikowan to ey kenshat ta meshosa kayo. Tep si-kato, edapod arawin dogad ni indaw ton to itenengan i kalaing nen Ari Solomon ni toka pantosho. Jet niman, asas jo ta wáred jay i engatngato ey say si Ari Solomon, jet eg jo mowan pinati.”

<sup>43</sup> Jet kowan pay nen Jesus ey, “No sota dimonyo ket onbetik shi

too, eman-eka-ekad shima kamagan ja eman-ena-enap ni pansalshengan to nem enshiy to sepolen. <sup>44</sup> Jet nemnemnemen to ey on-oli mowan shima toon istay kawad-an to. Jet no may-odi, sebi-en ton enshiy nan-iyen et ikowan to ey, “Siya, mimapteng ma iya baley ko, edinisan.” <sup>45</sup> Say pesing to, ondaw ja en mengodop ali ni piton kait to ja nankekedsel ey say si-kato, jet onsekep iren man-iyen nodtan na too. Jet sotan na too, memamay kasesaad to nem say nonta pilmiro. Sajay i kay-eshigan ni si-kayon too niman ta nankekedsel kayo.”

*Naysabi si ina nen Jesus tan sota ira a-aki to*

<sup>46</sup> Nonta marama ja eman-a-sel si Jesus so nonta ira totoo, sota ineto tan sota ira a-aki to, dimaw ira di jet wára ira nodta bo-dayan, ja kowan sha ey mekitbal ira kono son si-kato. <sup>47</sup> Isonga wáray sakey so nonta ira too ja engikowan son si-kato ey, “Wara si inam tan sota ira a-akim shi bo-dayan, ja piyan shen mekitbal kono son si-kam.”

<sup>48</sup> Nem si Jesus, kowan to so nonta too ja engikowan niyay ey, “Sipay ikarik ja inak, tan sipay ikarik ja a-akik?” <sup>49</sup> Jet intoro nen Jesus sota too to, ja kowan to ey, “Sajay iray ikarik ja innak, tan ikarik ja a-akik. <sup>50</sup> Tep say naka ikarin innak, tan a-akik, sota ira mandeka ni piyan nen Amak ja wáred dangit.”

## 13

*In-arig nen Jesus sota kalasin bo-day ja naysepa-an ni botil*

<sup>1</sup> Nontan met laeng nga akew, si Jesus, bimo-day nodtan na baley, jet dimaw nodta kilig ni baybay ja en mantosho. <sup>2</sup> Eshakel ngo i toon imonod ja sha binongolan si Jesus, jet kasoreng si Jesus ma ey man-a-tan nodta bangka ja

wára nodta shanom, jet timongaw nodtan. Sota ira too, wára iren esalpag nodta kilig ni shanom. <sup>3</sup> Eshakel i inkowan nen Jesus son si-kara, nem poro arig i inaspasing to.

Say sakey ya arig ga inkowan to son si-kara, sajay: “Waray too ja dimaw wa en nanbangkag shi oma. <sup>4</sup> Idi toka pan-iwariis sota botil, sota eshom, nayponta shi shalan, jet kinan ira ni titit. <sup>5</sup> Sota eshom ma botil nayponta ired kabato-an ja ma-ingpis i bo-day to, jet timemel la shagos, tep aliwén masshel i bo-day ja nayponta-an to. <sup>6</sup> Nem idi simekal i sekit, nakkit sota timemel la botil ta eg shimalem sota damot to. <sup>7</sup> Sota eshom ngon botil, nayponta ira shima similja ni sebit, jet idi bimengis iren showa, nabak sota temel ni mola jet eg timoloy ya bima-deg. <sup>8</sup> Sota eshom ngon botil, nayponta shima mapteng nga bo-day. Jet sajay ira, waray nandames ni sandasos, waray nandames ni enem ma polo, tan wára pay i nandames ngo ni tedon polo. <sup>9</sup> Niman i waray waya jon mengitneng niyay ya naka pan-ikowan, isonga singpet jon itenengan.” Kowan nen Jesus.

<sup>10</sup> Jet sota ira too met laeng nen Jesus, dimaw ira son si-kato et inbag-an sha, ja kowan sha ey, “Apay nga arig ga emin i moka pengitoshon son si-kara?”

<sup>11</sup> Simongbat si Jesus ja kowan to son si-kara ey, “Si-kayo nin i naypalobos ja on-awat so ni maypangkep nonta pantoshayan nen Apo Shiyos, nem si-kara, enshi nin. <sup>12</sup> Ta sota waray amta to, si-kato pay i metod-an, ingkatod eshakel i amta-an to. Nem sota enshiy am-amta to, angken sota ootik ja amta to, ma-kal son si-kato. <sup>13</sup> Isonga arig i naka pengitoshon son si-kara, ta angken isi-

ning sha, eg sha imatonan, tan angken itenengan sha, eg sha am-tay olog to. <sup>14</sup> Si-karay kaytoshongan nonta padto nen Isaias nonta bayag da ja esel met laeng nen Apo Shiyos, ja kowan to ey, ‘Itenengan jo ali, nem eg jo ewatan! Tan asen jo ali nem eg jo idasin. <sup>15</sup> Ta say nemnem ira niyay ya too, timangken, nakol ni eg sha ewatan. Angken matesha, singa ekimit, nakol ni eg sha idasin. Jet eg ira ma ontorong son si-kak say pemapteng ko ira.’ Sajay i padto nen Isaias. <sup>16</sup> Nem si-kayo, pan-imdeng kayo, ta inewatan jo sota inon-an jo tan intenengan jo son si-kak. <sup>17</sup> Agpayso iya ikowan ko son si-kayo. Eshakel ira sota para padto tan sota eshom ma toon Apo Shiyos nonta bayag da, ja piyan shen on-an koma iyay ya inon-an jo niman na timpo, tan piyan shen itenengan koma iyay ya intenengan jo, nem eg sha sinakop.

<sup>18</sup> “Itnengi jo ngarod i olog niya arig maypangkep nonta inkowan ko la ey en engiweshis ni botil shi oma. <sup>19</sup> No sota kompormin too ket itenengan to sota maypangkep ni pantoshayan nen Apo Shiyos, nem eg to ewatan, ondaw ali si Satanas et dingdingen to sotan na intenengan to la. Sotan i kay-eshigan nonta inkowan kon nayponta-an ni botil ja shalan. <sup>20-21</sup> Sota nayponta-an ni botil la kabato-an, si-katoy kay-eshigan nonta toon engitneng ni esel nen Apo Shiyos ja emati ni sankatikan. No itenengan to, wáren shagos i imdeng ton mengewat, nem eg may-a-det shi nemnem to. Isonga magenon ibi-jag to no onmotok ali sota digat to, ono okesen ni too maypangkep ni in-awat to so ni esel nen Apo Shiyos. <sup>22</sup> Sota nayponta-an ni botil ja similja ni sebit, si-katoy kay-eshigan

nonta toon engitneng ni esel nen Apo Shiyos met laeng, nem say toka nemnemnema, sota pesing ton manbiyag, tan sota ekanas sa biyag ni baknang. Jet anongosto ma ey medingding sota esel nen Apo Shiyos son si-kato, jet enshi may mapteng nga pantongpalan to. <sup>23</sup> Sota nayponta-an ni botil ja mapteng nga bo-day, si-kato ngoy kay-eshigan nonta toon engitneng ni esel nen Apo Shiyos, ja imawat ni olog to. May-eshig ma ey sajay ira, waray dames sha: waray nandames ni eshakil, waray nandames ni kalaingan, tan waray nandames ni otik.”

*In-arig nen Jesus sota edet ja naydaok shi pagey, tan wara pay i eshom ma arig ni pantoshayan nen Apo Shiyos*

<sup>24</sup> Wara pay i sakey ya arig ja inkowan to son si-kara, ja kowan to ey, “Say kay-eshigan nonta pantoshayan nen Apo Shiyos, inges to iyay. Waray too ja en nan-mola shi payew to, jet tima-nil la poron pagey i inmola to. <sup>25</sup> Nem idi kalebi-an, nandibas ali sota makakontra son si-kato, jet en engilaok ni botil ni edet nodta naymolen pagey, asan kabetik. <sup>26</sup> Idi kimabay sota pagey, jet bimosbos ma, wara gayam i apil la naydaok. <sup>27</sup> Jet sota baga-en to, dimaw ira ja sha inkowan so nonta apo sha ey, ‘Apo, kowan ko nem poron pagey sota botil la inpaimolam shima payew mo. Apay nga idi bimosbos ira, waray edet gayam ma naydaok?’ <sup>28</sup> Kowan to son si-kara ey, ‘Sota makakontra son si-kak, si-katoy dimaga so nontan.’ Jet sota baga-en to, kowan sha so nonta apo sha ey, ‘Jet ngantoy kowan mo? Piyan mon mi demonen sota ira edet ja naydaok?’ <sup>29</sup> Nem sota apo sha, kowan to ey, ‘Enshi, bay-iyo, ta no demonen ja sotan na edet, mekigebot da

sota pagey. <sup>30</sup> Isonga bay-iyo nin ingkatod onsabi sota timpon paneni. Jet ikowan ko so nonta maneni ey idasin sha nin sotan na edet ja bedbeshan shen para maypool. Nem sota pagey, sa-nopen sha et italo sha shima sarosal ko.’ ” Sajay i in-arig nen Jesus nonta pantoshayan nen Apo Shiyos.

<sup>31</sup> Wara pay i sakey ya arig ja inkowan nen Jesus son si-kara ja kowan to ey, “Say pantoshayan nen Apo Shiyos, may-eshig nodta botil ni sakey ya kalasin mola ja ootilik. <sup>32</sup> Sajay ya botil, si-katoy ka-otikan na botil so ni emin na botil, nem no i-esek nonta too nodta gardin to, ey onba-deg, si-katoy kabalkan so ni emin na mola. Jet sota ira titit, mebedin na man-obong ira shima pangpanga to.”

<sup>33</sup> Wara pay i arig ja inkowan nen Jesus son si-kara ja kowan to ey, “Say pantoshayan nen Apo Shiyos, may-eshig pay nodta para debag ni tinapay ja inda ni bii, ja to indaok nodta eshakil la arina ingkatod inedinan ton emin.”

<sup>34</sup> Nontan na timpo, emin na inpantoro nen Jesus so nonta ira totoo, arig ni olay i inpangitoro to. Enshiy eshom ma inkowan to son si-kara, nem eg sajay. <sup>35</sup> Sajay i tongpal nonta inkowan nonta para padto nonta bayag da ey, “Say pengikowan ko so ni totoo, arig, jet ipa-amtak son si-kara sota sigod ja plano nen Apo Shiyos ja eg sha amta, ja plano to nonta eg pay laeng epalsowa iya dobong.”

<sup>36</sup> Jet si Jesus, indekjas to ira sota totoo jet simekep nodta baley. Jet sota ira too nen Jesus, dimaw ira son si-kato jet kowan sha ey, “I-odog mo ga sota arig ja inkowan mo maypangkep nonta edet shi payew ja naydaok shi pagey.”

<sup>37</sup> Simongbat si Jesus ja kowan to ey, “Sajay i olog to: sota engimoda nonta tima-nil la botil ni

pagey, sotan sota kowan sha ey Anak ni Too. <sup>38</sup> Sota oma, si-katoy kay-eshigan niya dobong. Sota ira botil ni pagey, si-kara sota kay-eshigan ira nonta maydakam shi pantoshayan nen Apo Shiyos. Sota ira botil ni edet, si-kara sota kay-eshigan ira nonta toon wára son Satanas. <sup>39</sup> Sota en engilaok nonta edet, si Satanas i kay-eshigan to. Sota pan-eni, say olog to, sota timpon pengigsheng nen Apo Shiyos no sipa shiya dobong i maysedakan. Sota ira man-eni, si-kara sota anghil nen Apo Shiyos. <sup>40</sup> Sota edet, ma-olnong jet mepoolan. Sotan i kay-eshigan ni pesing nen Apo Shiyos no mengigsheng ey eg maysedakan sota nankeked-sel. <sup>41</sup> Si-kak sota inpadora nonta bayag da ey Anak ni Too, jet ibetkag ko ali sota anghil ko jet si-karay mengkal ira nonta toon emengi-kan ni panbesolan ni kait sha, tan angken pay sota ira ngaaw i aramid sha, say eg ira maydakam nodta pantoshayan ko. <sup>42</sup> Jet say pesing ira nonta anghil, iteknal sha ira shima apoy ya empetang nga pasiya. Shiman, mannengnengis i totood man, tan panngedetnget shay sangi sha ni digat sha. <sup>43</sup> Jet sotan alin timpo, sota ira too nen Apo Shiyos, singa sekit iren menenili shima pantoshayan nen Apo Shiyos ja Ame-sha. Niman i wáray wáya jon mengitneng niyay ya naka panikowan, isonga singpet jon itenen-gan.

<sup>44</sup> “Say pantoshayan nen Apo Shiyos, ebanol; isonga may-eshig ey singa sota pilak ja pino-jasan ni too shi payew. Say inpasing nonta too, tina-bokan to mowan et ebadeg i imdeng to. To indako sota kokowa ton emin et tinongkal to sotan na payew, ta ebanol son si-kato sota simpol ton pilak nodtan.

<sup>45</sup> “Say kay-eshigan pay nonta pantoshayan nen Apo Shiyos, singa sota toon emanbiyaki ja say toka en-enapa, sota ebanol la bato ja kowan sha ey pirlas. <sup>46</sup> Waray simpol ton sakey so nonta pirlas ja ebanol la pasiya. Jet say inpasing to, to indakon emin sota kokowa to et tinongkal to ma sotan na pirlas.

<sup>47</sup> “Say kay-eshigan pay nonta pantoshayan nen Apo Shiyos, singa sota inpasing ira nonta toon nannigay. Inteknal sha shima baybay sota embanaw wa balshew sha say mengna ira ni eshakil la nigay ya ekalkalasi. <sup>48</sup> Jet idi enapno sotan na balshew sha, inkoyod ali nonta ira too shima naykilig. Pinispis sha sota mapteng, jet si-katoy in-iyán sha nodta ijanan. Nem sota ngaaw, in-ibong sha. <sup>49</sup> Inges niyay i medeka no timpon pengigsheng ali nen Apo Shiyos no sipay maysedakan. Sota ira anghil, si-karay ondaw ali jet idasin sha sota ira toon ngaaw i aramid sha so nonta ira too nen Apo Shiyos. <sup>50</sup> Sota ira toon ngaaw i aramid sha, iteknal sha ira shima apoy ya empetang nga pasiya. Shiman, mannengnengis i totood man, tan panngedetnget shay sangi sha ni digat sha.” Sajay iray arig ga inkowan nen Jesus.

<sup>51</sup> Jet kowan ma nen Jesus son si-kara ey, “Jet inewatan jo ma i olog nonta arig ja inkowan ko la?” Simongbat ira sota too to ey, “Owen.”

<sup>52</sup> Jet kowan pay nen Jesus son si-kara ey, “No kasta, si-kayon maka-amta ni sigod ja bilin nen Apo Shiyos, no man-ashal kayo nonta maypangkep ni pantoshayan nen Apo Shiyos, komplito may amtayo. Jet may-eshig kayo so nonta toon wáray baley to ja amta ton mengosal nonta kompormin shaan tan bado ja naytalo nodtan.”



*Si Jesus, dinamsis ira nonta totoon kaidiyan to*

<sup>53</sup> Jet si Jesus, idi naksheng nga inkowan to iyay ya arig, indekjas to sotan na dogad. <sup>54</sup> Dimaw shima ili to, ja en nantoro shima sa-nopan ni si-karen Hodiyo. Jet sota ira too nodtan, ireka messhaaw nonta maypangkep ni toro to ja kowan sha ey, “Towa emoy inamta-an to so niman na daing to, tan towa emoy engalan to niman na panakabalin ton milagro?” <sup>55</sup> Sajay emo met sota anak nonta kalapintiro! Aliwa ayen si Maria i ineto? Amta tayo met sota ira a-aki to ja si Santiago, Jose, Simon, tan si Judas. <sup>56</sup> Tan iyay pay ired jay sota bibiin a-aki to. Towa ngatay inashalan to so niman na amta to?” <sup>57</sup> Jet sotan iren kaidiyan to, dinamsis sha si Jesus.

Nem si-kato, say kowan to son si-kara, “Emin ira sota toon inbetkag ali nen Apo Shiyos, mebedin na mayshedjaw shi emin na ili. Nem shi mismon ili to bengat i eg to kayshedjawan, tan angken pay sota mismon pamilja to, eg sha ishayaw.”

<sup>58</sup> Jet si Jesus, aliwen eshakel i dingka tod man ja milagro, ta eg ira memati son si-kato.

## 14

*Sota maypangkep ni inkatey nen Juan ja para bonjag*

<sup>1</sup> Nontan na timpo, si Ari Hirodis ja engitoshay ni Galilia, shinemag to sota maypangkep ni dingdingka nen Jesus. <sup>2</sup> Jet kowan to so nonta baga-en to ey, “Sajay ya shinemag kon milagron toka dagdag-a, sigosho si-kato si Juan da ja para bonjag. Nanbiyag emo shi patey, isonga waray panakabalin ton mandeka ni milagro.”

<sup>3-4</sup> Sajay i kowan nen Hirodis ta si-katoy inpabono so nen Juan.

Inpa-shel to nontan et inpaibalod to ta inkowan nen Juan so nen Hirodis ey, “Parit shi bilin nen Apo Shiyos i pengesawam so nen Hirodiyas ja asewa nen Felipe ja agim!” Isonga inpa-shel nen Hirodis si Juan ta pipiyan tos Hirodiyas. <sup>5</sup> Nontan ma, si Hirodis, piyan ton pebono si Juan, nem entakot so nonta ira totoo, ta si Juan, kaibilang ira nonta totoo ey para padto nen Apo Shiyos. <sup>6</sup> Nem idi nonta birthday nen Hirodis, eshakel i bisita to ja inewis to, jet nontan, sota anak nen Hirodiyas ja marikit, nansada shi sango-an shen emin et si Hirodis, emanimdeng nontan na dingka nonta marikit. <sup>7</sup> Isonga inkari to ey no ngantoy kekshawen nontan na marikit ja anak nen Hirodiyas, i-akan to. <sup>8</sup> Jet sotan na anak nen Hirodiyas, to inbaga so nen ineto no ngantoy kekshawen to so nen Hirodis. Jet inkowan nen ineto ey sota toktok nen Juan ja para bonjag i kekshawen to. Isonga kowan nonta marikit ey, “I-ekan mo ali son si-kak sota toktok nen Juan ja para bonjag et ipingkan mo di shi embanaw wa pingkan.” <sup>9</sup> Jet sota ari, naydaw-an nonta inkowan to so nonta kari to so nonta marikit. Nem mesepol la tongpalen to ta nankari ja intengan ira nonta bisita to. Isonga si Hirodis, inkowan to ey metongpal ja may-ekan sota toktok nen Juan so nonta marikit. <sup>10</sup> Jet nontan ma, engibetkag si Hirodis ni en mengokdo so nen Juan ja wared badoran, <sup>11</sup> jet sota toktok nen Juan, inpingkan sha et inakan sha so nonta biin anak nen Hirodiyas et to ngo in-akan so nen ineto. <sup>12</sup> Sota ngo ira too nen Juan, sha inday bakdang to jet sha inbeka. Jet dimaw ira so nen Jesus ja sha inkowan sotan na epasemak.

*Pinekan nen Jesus sota dimen*

*dibon motoo ja imonod son si-kato*

<sup>13</sup> Idi naksheng ja insodsod sha son Jesus iyay, en nandogan shi bangka et indekjas to sotan na dogad. Dimaw ma shima nay-desin na dogad ja enshiy totoo. Nem idi inamta-an ira nonta toon wared ka-ili-ili sota dinaŵan to, nan-akad ira ngo ja imonod son si-kato. <sup>14</sup> Idi ondisaag si Jesus nodta bangka, inon-an to ira sota eshakil la toon nay-aspol et nayse-mekan na pasiya son si-kara. Isonga sota ira emanpansekit son si-kara, inpampteng to ira.

<sup>15</sup> Nonta enaswíl malay akew, sota ira too nen Jesus, dimaw ira di son si-kato jet kowan sha ey, “Apo, arawí met iyay ya dogad shi kabalebaley, isonga pansisi-jan mo ira jay ya totoo say ira di koma mengenap ni tongkalen shen kenen sha shima kad-an ni totoo. Edabi met mala.”

<sup>16</sup> Nem si Jesus, kowan to son si-kara ey, “Angken eg ira ondaw. I-akniyo et ira ni kenen sha.”

<sup>17</sup> Nem kowan ira nonta too to ey, “Dimen boknol la tinapay met bengat iya wára, tan showen piskaw.”

<sup>18</sup> Si Jesus kowan to son si-kara ey, “Alejo did jay.” <sup>19</sup> Jet nontan, inkowan to so nonta ira totoo ey ontongaw ira, tep mapteng i edet nodtan. Inda to sota tinapay tan sota showen piskaw, intangkak tod naykayang jet nan-iyaman son Apo Shiyos. Idi naksheng nga nan-iyaman, shinowashowa to asan toka i-kan so nodta too to, ja si-karay mengiweshis so nonta ira eshakil la totoo. <sup>20</sup> Sota ira totoo, engan ira et napsel iren emin. Idi naksheng ira, inolnong ira nonta too nen Jesus sota ebay-an ja eg kinan ira nonta totoo jet say na-olnong, sampolo tan showen basket, ja nankepno. <sup>21</sup> Jet say kabebilang ira nonta totoo ja engan, ondaw wa dimen dibo,

powira ira sota bibii tan a-anak, ja eg naybilang.

*Nan-akad si Jesus nodta tapew ni shanom*

<sup>22</sup> Idi naksheng iyay, inkowan to so nonta ira too to ey, “Pandogan kayod ma bangka et angken mepangdo kayon ondaw shima shemang ni baybay. Jet si-kak, pansisi-jan ko nin ira ja eshakil la totoo.”

<sup>23</sup> Jet idi naksheng nga inpan-sisi-jan to sota totoo ja kowan to ey angken on-akad ira, timiyed ngo shima shontog ni abos to say en manshewat so nen Apo Shiyos. Jet edabi-an nodtan ja a-abos to.

<sup>24</sup> Nem sota bangka ja nandogan ira nonta too to, imarawí ma nodta kilig ni baybay. Jet nontan ma, makedsang i shadoyon ni shanom ta emansheshagem ja nay-aspol pay son si-kara. <sup>25</sup> Jet idi daem, dimaw alis Jesus son si-kara ja nan-akad shima tapew ni shanom. <sup>26</sup> Nem sota ira too to, inon-an sha ali ja eman-ekad shima tapew ni shanom, jet ireka mankel-ew wa pasiya ja kowan sha ey banig i inon-an sha. Jet kimeljaw ira ni takot sha. <sup>27</sup> Nem si Jesus, imesel la shagos son si-kara ja kowan to ey, “Pesed! Karekayo ontakot, tep si-kak iyay!”

<sup>28</sup> Jet si Pedro, simongbat ja kowan to ey, “No agpayson sikam, ipedobos mon ondawak da son si-kam!”

<sup>29</sup> Simongbat si Jesus ja kowan to ey, “Siya, kala.”

Jet si Pedro, jimapas nodta bangka, jet nan-akad nodta tapew ni shanom ja kowan to ey to sebi-en si Jesus. <sup>30</sup> Nem idi dekna-en nen Pedro ey maked-sang i shagem, timakot jet istay ya emanka-neng. Kimeljaw ja kowan to ey, “Apo atngimak!”

<sup>31</sup> Shinewat shagos nen Jesus, ja kowan to ey, “Ootik eshan i

pamatim. Apay nga wára eshan i showashowam?”

<sup>32</sup> Jet idi nandogan iren showa nodta bangka, simalsheng ma sota shagem. <sup>33</sup> Jet nontan, sota ira too to nodta bangka, nantalimokod ira ja nanshayaw son si-kato, jet kowan sha son si-kato ey, “Agpayson si-kam sota Anak nen Apo Shiyos!”

*Inpamapteng nen Jesus sota emanpansekit shi Ginisarit*

<sup>34</sup> Jet nontan, intoloy shen bimaliw et simabi ira nodta nayshemang nga dogad ja kowan sha ey Ginisarit. <sup>35</sup> Jet idi inimatonan ira nonta totoo nodtan ey si Jesus, inshamag sha nodtan na dogad ja nay-esop, jet emin ira sota emansekit, indaw sha ali son si-kato. <sup>36</sup> Jet sota ira totoo, kinshew sha son si-kato ey no mebedin, angken sota kajaran bengat ni baro to i pishaten sha say onmapteng ira. Jet emin sota ira emirat ni baro to, mimapteng ira.

## 15

*Inkowan nen Jesus i ngaaw wa aramid ira nonta Parisiyo tan ma- maistoro ni dinteg*

<sup>1</sup> Sota ira Parisiyo tan sota ma- maistoro ni dinteg ni Hodiyo ja edapod Jerusalem, dimaw ira so nen Jesus jet kowan sha ey, <sup>2</sup> “Apay nga sama ira toom ket eg sha onoren sota sigod ja ogadi nonta bayag da? No mengan ira ket eg ira nin manbodo.”

<sup>3</sup> Si Jesus, sinongbatan to ira ja kowan to ey, “Si-kayo, eg jo onoren sota bilin nen Apo Shiyos. Say joka et ngo mowan nemnemnema, sota ogadiyo. <sup>4</sup> Kaspangarigan say sakey ya bilin nen Apo Shiyos ja joka ibiyang, sota kowan to ey, ‘Shayaw mo si amam tan si inam’, tan sota kowan to pay ey, ‘Sota toon ngaaw i toka ikowan so nen ameto, ono si

ineto, kenshat ta mebono.’ <sup>5</sup> Nem si-kayo, say joka itoro, kowan jo ey angken ibiyang ni too si ameto ono ineto, basta ikowan nonta too so nodta maka-anak son si-kato ey, ‘Sota istay i-akan ko son si-kayo ja panbiyag jo koma, indasin kon maytodong shi Timplo.’ <sup>6</sup> Isonga sajay ya joka pengonod ni ogadiyon joka itoro, inpaskit jo nodta koston bilin nen Apo Shiyos, ja singa enshiy silbi to. <sup>7</sup> Sesi-kayo ngon toon kowan to ey wára son Apo Shiyos ni emin na poso to nem waray pangkep jon ngaaw! Agpayso ey si-kayo sota kaytoshongan nonta padto nen Isaias nonta bayag da ja esel nen Apo Shiyos met laeng, ja kowan to ey,

<sup>8</sup> ‘Sajay iren too, shi bongot bengat i engintegang ni shaka panshedjaw son si-kak, nem shi nemnem sha, arawi son si-kak. <sup>9</sup> Enshiy silbi ni shaka panshedjaw son si-kak, tep say shaka itodtoro ni olay, sota edapo met laeng shi nemnem ni si-karen too, asan sha mango ikowan ey bilin kono nen Apo Shiyos.’ ”

<sup>10</sup> Jet si Jesus, tina-wal to ira sota totoo jey ondaw ira di son si-kato jet kowan to son si-kara ey, “Itnengi jo iyay ya ikowan ko son si-kayo jet awatiyo. <sup>11</sup> Kowan ira nonta Parisiyo ey basol kono no eg kito manbodo asan mangan ja si-katoy ondogit so ni nemnem. Nem aliwen sota ikem-ot jod bongot ja tetdenen jo i ondogit son si-kayo, no diket sota kaonbo-day ali shi bongot ja mandepod nemnem jo, si-katoy kaondogit son si-kayo.”

<sup>12</sup> Idi naksheng ja inkowan nen Jesus iyay, sota ira too to, dimaw ira di son si-kato jet kowan sha ey, “Amtam? Idi intenengan ira nonta Parisiyo sota inkowan mo, ngaaw i nemnem sha son si-kam.”

<sup>13</sup> Jet si Jesus simongbat ni arig ja kowan to ey, “Emin na too,

may-eshig ey singa mola jet sota aliwén mola nen Apo Shiyos, a-kalen to met laeng. <sup>14</sup> Isonga baybay-iyó ira ma Parisiyo; olay tos Apo Shiyos son si-kara. Si-kara sota may-eshig ey ekorab ja emengiredan ni kait ton ekorab. No kowan nonta sakey ya ekorab ey to ibalnay sota kait ton ekorab, ma-kas iren showa shi pel-og.”

<sup>15</sup> Jet nontan met laeng, si Pedro kowan to so nen Jesus ey, “Ilewág mo ga i olog nita arig son si-kami.”

<sup>16</sup> Jet si Jesus simongbat ja kowan to ey, “Apay angken si-kayo, eg kayo pay laeng maka-aw-awat? <sup>17</sup> Apay eg jo amta ey sota maykem-ot shi bongot ket say dawan to, shi ekes, jet onboday met laeng? Eg to dokiten i nemnem. <sup>18</sup> Nem sota onboday ali shi bongot ja esel, si-katoy mandepo shi nemnem. Jet sotan na wáred nemnem, si-katoy ondogit so ni too. <sup>19</sup> Ta say kedepo i ni ngaaw wa pangkep ni too, shi nemnem to. Isonga wáray ememono, wáray ememii tan emekileki, wáray emengibat, wáray emengiwap, tan wáray ey emenomang ni kait ton too. <sup>20</sup> Sajay iray kaondogit so ni too. Kowan ni Parisiyo ey sota mengan ja eg nin manbodo, sotan i ondogit so ni too ja panbesolan to. Nem enshi kari.”

*Sota kaba-deg ni pamati nonta sakey ya biin aliwén Hodiyo*

<sup>21</sup> Nontan ma si Jesus indekjas to sotan na dogad jet dimaw shi nankinaw-an ni Tira tan Sidon. <sup>22</sup> Jet idi nonta wáres Jesus shiman, wáray biin dimaw ali son si-kato ja too nodtan na dogad. Aliwén Hodiyo tep poli nonta sigod ja too nodtan, nem kimeljaw ja kowan to ey, “Apo, naka memati ey si-kam aliy mengibengon son Ari David nonta bayag da! Kaasimak, ta wáray anak kon bii nem ansan i kepesing nonta

dimonyo ja pimeket son si-kato, toka pedigaten pasiya!”

<sup>23</sup> Nem si Jesus, eg to sinongsongbatan. Anongosto ma ey kowan nonta too nen Jesus son si-kato ey, “Pagi-nan mo ga et ita bii; aliwén en ontentened ali ja onkelkeljaw.”

<sup>24</sup> Si Jesus simongbat ja kowan to ey, “Say inbetkagan towak so bengat nen Apo Shiyos, sota ira Hodiyo ja may-eshig ey kalniron imarawi, jet enshiy biyang ko shiya tood jay ya aliwén Hodiyo.”

<sup>25</sup> Nem sota bii dimaw et ali ja en nantalimokod shi sango-an nen Jesus ja kowan to ey, “Apo, kaasimak.”

<sup>26</sup> Jet si Jesus simongbat ja kowan to ey, “Aliwén nebeng ja nak pekéwas sota istay para anak ja i-akan ko so ni aso.”

<sup>27</sup> Nem sota bii simongbat ja kowan to ey, “Owen apo, amtak ita kowan mo, nem angken sota ira aso, mebedin met ja manbiyag ira nonta ema-kas shi damisaan nonta apo sha.”

<sup>28</sup> Simongbat si Jesus so nonta bii ja kowan to ey, “Agpayson ebadeg i pamatim! Isonga sota shawat mo, medeka.” Jet nontan met laeng, sota anak nontan na bii, mimapteng nga shagos, ja bimetik sota dimonyo son si-kato.

*Inpamapteng nen Jesus sota eshakil la totoo*

<sup>29</sup> Si Jesus, indekjas to mowan sotan na dogad, jet nanshalan shima kilig ni baybay shi Galilia, asan tomiyed shima shontog. Timongaw shiman ja mantosho, <sup>30</sup> jet eshakil la pasiyya totoon dimaw ali son si-kato. Jet sota ira epilay, ekorab, omel, tan sota ira eshom pay ya wáray sakit to, indaw sha son si-kato shima shontog a kawad-an to, jet inparokol sha shi kad-an ni sedi to. Jet si Jesus, inpamapteng to ira.

<sup>31</sup> Jet sota ira eshakil la totoo, nasshaaw ira nonta in-*asas* sha so ey nan-esel ira sota istay eg maka-esel, nan-akad ira sota istay epilay, tan angken sota ira ekorab, nan-*asas* ira. Jet kowan sha ey, “Agpayso gayam noman na man-akabalin i Shiyos ni Hodiyo!”

*Sota maykepinshowen in-parakel nen Jesus i ootik ka mekan*

<sup>32</sup> Si Jesus, tina-wal to ira sota too to jet kowan to son si-kara ey, “Naka kaasi-i ira ja totoo, ta tedon akew sha niman ja wared jay son si-kak jet enshi may kenen sha. Ekak koston pa-ekad ira ja eg nin engan, say eg ira onkapoy shi shalan.”

<sup>33</sup> Jet sota ira too nen Jesus, kowan sha ey, “Toway pengal-an tayod jay ni kenen sha ey enshiy baley shiyay? Eshakil met iren pasiya.”

<sup>34</sup> Jet si Jesus, kowan to son si-kara ey, “Pigen boknol la tinapay sota wara son si-kayo?”

Simongbat ira ja kowan sha ey, “Piton boknol la tinapay, tan wara pay i piskaw, nem aliwen eshakil.”

<sup>35</sup> Jet si Jesus, inkowan to so nonta ira totoo ey ontongaw ira nodta bo-day. <sup>36</sup> Inda nen Jesus sota piton boknol la tinapay tan sota piskaw jet nan-iyaman so nen Apo Shiyos asan toka showashowa-a. In-akan to so nonta ira too to ja si-karay mengiweshis so nonta ira totoo, jet tinongpal sha. <sup>37</sup> Jet emin ira sota eshakil la totoo, engan ira jet napsel iren emin. Idi naksheng ira, sina-nop sha sota ebay-an ja eg sha kinan et ondaw wa piton baskit. <sup>38</sup> Sota engan niyay ya tinapay, epat ta dibo ja daleki, powisha sota bibii tan a-anak, ja eg ekibidang. <sup>39</sup> Jet nontan ma, inpa-ekad to ira sota totoo jet en nandogan nodta bangka jet

dimaw shima dogad ja kowan sha ey Magadan.

## 16

*Piyan nen Jesus ey eg onoran nonta ira too to sota Parisiyo tan Sadosiyo*

<sup>1</sup> Sota ira Parisiyo tan sota Sadosiyo, dimaw ira so nen Jesus ja sha peshasen ni dedamsis sha. Isonga kowan sha son si-kato ey mandeka ni milagro ja kowan sha ey asanan sha so no podnon inbetkag ali nen Apo Shiyos.

<sup>2</sup> Nem si Jesus, sinongbatan to ira ni arig, ja kowan to ey, “No mama-shem mala, ey asen jon nandangidang, kowan jo ey, ‘Siya, mapteng aliy timpo nem kabasan.’

<sup>3</sup> Jet no agsapa ey asen jon engolpot shi naykayang, kowan jo ey, ‘Ngaaw aliy timpo niman, on-oran.’ Joka ewati met shi naykayang no on-oran ono enshi, nem apay nga eg jo ewatan ey emin sota emepespesamak niman na timpon kawashak son si-kayo ket asdeg to met i kay-odogan to!

<sup>4</sup> Ngaaw iray aramid ni too ma niman, eg sha nemnemen si Apo Shiyos! Say shaka pan-ibaga et ngo mowan, sota kowan sha ey asanan sha so no si Apo Shiyos i podnon engibetkag son si-kak ali. Nem enshiy milagro ja en maypa-sas son si-kara niman. Say pengamta-an jo ey inbetkag towak ali nen Apo Shiyos, no onsabi son si-kak sota inges toy epasemak so nen Jonas, ja para padto nonta bayag da.” Sajay i kowan nen Jesus asan toka ira ilekjas.

<sup>5</sup> Idi mimotok shi ira Jesus nodta piig ni baybay, dinibkan sha gayam ja engita-jon ni balon sha.

<sup>6</sup> Jet si Jesus, kowan to son si-kara ey, “Tanshaaniyo sota singa para debag ni tinapay ja wara so nonta Parisiyo tan Sadosiyo ta baka madinan kayo.”

<sup>7</sup> Nem sota ira too nen Jesus, ireka mansosongbat ni abos ja kowan sha ey, “Dinibkan tayo eshan ja engita-jon ni balon tayon tinapay.”

<sup>8</sup> Si Jesus, indasin to ey sotan i shaka pansosongbati et kowan to son si-kara ey, “Apay nga kayoka mansosongbat ni ka-enshi ni balon jo? Ootik eshan i pamatiyo. <sup>9</sup> Apay eg jo aya ewatan? Dinibkan jo aya ey sota dimen boknol la tinapay i edapohan nonta kinan ni toon dimen dibo? Istay nemnemen jo koma ey eshakil la baskit i sina-nop jon eg kinan ira nonta totoo. <sup>10</sup> Tan say sakey pay, sota piton boknol la tinapay, si-katoy edapohan nonta kinan ira nonta epat ta dibon too. Jet eshakil mowan na baskit i inolnong jon eg sha kinan. <sup>11</sup> Isonga ewatan jo koma ey aliwen sota maypangkep ni tinapay i naka pan-ikowan nonta inkowan ko so ey mantanshaan kayo nonta singa para debag ni tinapay ja wara so nonta ira Parisiyo tan Sadosiyo.”

<sup>12</sup> Jet nontan ma, sota ira too nen Jesus, inewatan sha ey aliwen to-to-wen para debag ni tinapay i toka pan-ikowan. No diket toka pan-ibanshaan sota maypangkep ni o-owap pa toro ira nonta Parisiyo, tan sota toro ni Sadosiyo ta maganon man-a-elbat ja inges toy para debag ni tinapay.

*Inbolikas nen Pedro ey si Jesus i Anak nen Apo Shiyos*

<sup>13</sup> Idi simabi si Jesus nodta sakop ni Sisaria Pilipos, inbagan to ira sota too to ja kowan to ey, “Ngarantoy kaikokowan ira ni totoo ni maypangkep so nonta naypadton Anak ni Too? Eg sha aya tabtabalen nem sipa-ak?”

<sup>14</sup> Jet sota ira too to, simongbat ira ja kowan sha ey, “Eg met nan-inges i shaka ikowan. Say kowan ni eshom, si-kam kono si Juan ja

para bonjag ja etey da, nem sota ira eshom, kowan sha ey si-kam si Elias ono si Jirimias, ono sakey so nonta ira eshom ma para padto nen Apo Shiyos nonta bayag da ja nan-ongal mowan ali.”

<sup>15</sup> Jet si Jesus, inbagan to mowan ira ja kowan to ey, “Jet si-kayo ngay? Ngaranto ngoy kowan jo ni maypangkep son si-kak?”

<sup>16</sup> Si Simon Pedro, simongbat ja kowan to ey, “Si-kam sota inpadtora nonta bayag da ey ibetkag ali nen Apo Shiyos ja mengisedakan. Si Apo Shiyos, waray biyag to ingkatod ingka jet si-kam i Anak to.”

<sup>17</sup> Jet si Jesus, kowan to so nen Pedro ey, “Si-kam Simon ja anak nen Jonas, si Apo Shiyos i onbindisiyon son si-kam tep si-kato, ja Amak shi dangit, si-kato i engipa-amta niyay son si-kam ja inkowan mo, aliwen kait mon too i engikowan. <sup>18</sup> Jet niman, iyay i ikowan ko son si-kam Pedro. Say olog ni ngaran mo, bato, jet sotan na bato, si-katoy na-det ja kaypirmi-an ira nonta eshakil la totoo memati son si-kak met laeng. Isonga angken ngantoy katekal ni patey, eg mebedin na ipeked to ni olay sota memati son si-kak. <sup>19</sup> Jet si-kam i ipiyalan ko so nonta may-eshig ey tolbek ni pantoshayan nen Apo Shiyos. No ngantoy iparit mo shiya dobong, ono ipalobos mo, itolok nen Apo Shiyos ja wared dangit ja si-katoy medeka.” Kowan nen Jesus. <sup>20</sup> Jet binidin to ira sota too to ey angken sipa, eg sha ikokowan ey si-kato sota naypadto nonta bayag da ey ibetkag ali nen Apo Shiyos ja mengisedakan.

*Pan-idawag nen Jesus sota pandikat to ali*

<sup>21</sup> Jet manshoki ma nontan, kaipinpinshowa nen Jesus so nonta ira too to ey mesepol la

ondaw shi Jerusalem, jet kowan to ey manda-kam shiman ni eshakil la digat, ta sota ira pangolo ni Hodiyos, tan sota ira apo ni papashi, tan mamaistoro ni dinteg, bedawen sha kono, et anongosto ma ey bono-en sha. Nem kowan to ey no maykatdon akew, manbiyag mowan.

<sup>22</sup> Jet nontan ma, si Pedro, to indasin si Jesus et sinelkag to ja kowan to ey, “Enshi! Eg medeka itan son si-kam Apo! Eg itolok nen Apo Shiyos!”

<sup>23</sup> Nem si Jesus wíningi to si Pedro jet kowan to ey, “Betawimak si-kam ma Satanas! Karam tipeshen i mesepol la dag-en ko. Say nemnem mo, aliwén sota plano ja nemnem nen Apo Shiyos, no diket sota etoo-an na nemnem.”

*Edigat met laeng i pengonod son si-kato, nem epateg i mekonod ali shi ka-onoran*

<sup>24</sup> Inkowan pay nen Jesus so nonta too to ey, “No sipay makapiyan ja on-onod son si-kak ja took ni olay, mesepol la si-kak bengat i nemnemnemen to ja ibiyang ton emin i kompormi. Tan mesepol la enosan to pay ya angken maybebaing ono mebono ja inges to sota toon emasan ni koros ja kaydansa-an to. <sup>25</sup> Sota toon entapi toy biyag to ja kowan to ey ensikshal la metey maypangkep son si-kak, si-kato et ngo mowan i mepokaw i biyag to. Nem sota toon eg to kawanan i bakdang to maypangkep son si-kak ja angken metey ni toka pansilbi, si-kato et ngo mowan i i-aknan nen Apo Shiyos ni biyag ja enshiy to engintegan. <sup>26</sup> No kaspangarigan ey kinokowa ni sakey ya too i emin na wáred ja dobong, enshiy silbi nontan na kinokowa to, no eg to kon-oren sota biyag ja enshiy to engitegan. Enshiy silbi nontan na inpasing

to, ta sotan na biyag i epateg ga pasiya, ja enshiy to kaysa-datan na angken nganto. <sup>27</sup> Epateg, ta no sakey alin timpo, emin sota aramid ni too, si-kak met laeng i onsobadit son si-kara. Agpayson si-kak sota kowan nonta para padto nonta bayag da ey Anak ni Too, jet sota idaw ko ali mowan, say kasesaad ko, inges ko met laeng i kasesaad nen Apo Shiyos. Jet may-odop ali sota anghil ko son si-kak.

<sup>28</sup> “Agpayson wáray eshom son si-kayod jay ja eg metey ingkatod asen sha sota kowan sha ey Anak ni Too ja isaad to sota pantoshayan to met laeng.” Kowan nen Jesus.

## 17

*Nanbalin ni emenenili i bakdang nen Jesus nodta shontog*

<sup>1</sup> Idi wáray enem ma akew ja edabas da ni engikowanan nen Jesus niyay, inodop to si Pedro, tan si Santiago nen Juan ja sangagi, jet timiyed ira ni a-abos sha shima shontog ga ekayang. <sup>2</sup> Jet idi mimotok ira nodtan, inon-an shen nanbaliw i itsora nen Jesus ja emenenili. Singa sekiti i itsora ni dopa to jet sota baro to, empotin pasiya. <sup>3</sup> Jet nontan met laeng, inon-an sha si Moises nen Elias ja emekitbal so nen Jesus. <sup>4</sup> Jet si Pedro, kowan to so nen Jesus ey, “Apo, mapteng i kawasha tayod jay. No piyan mo, mengemagak ni tedon kampod jay: sota sakey para son si-kam, sota sakey para son Moises, tan sota sakey para son Elias.”

<sup>5</sup> Jet nonta marama pay laeng ja eman-a-sel si Pedro, ebighlen wáray kolpot ta emenenili ja dimespag ali son si-kara ja dinikopan to ira. Jet wáray esel ja edapo nodtan ja intenengan sha ja kowan to ey, “Sajay i Anak ko jet ensemek ko. Si-katoy naka kosto-

i, isonga patiyon emin i ikowan to.” Kowan nonta esel alid kolpot. <sup>6</sup> Jet idi intenengan ira nonta too nen Jesus iyay, nanshomog ira ja epaladoy takot sha. <sup>7</sup> Nem si Jesus, dimaw ali son si-kara jet to ira pinishat ja kowan to ey, “Ekwas kayo, karekayo ontakot.” <sup>8</sup> Jet idi onshemang ma ira, enshi met i eshom ma wara nodtan, no diket si Jesus bengat.

<sup>9</sup> Jet idi ireka manshedong ja edapo nodta shontog, si Jesus bini-din to ira sotan na too to ey eg sha ikokowan so ni eshom, ja angken sipa, sota inon-an sha nonta wara ired ma shontog. Jet inkowan to ey asan shaka ikowan iyay nem man-ongal ma ali sota kowan sha ey Anak ni Too.

<sup>10</sup> Jet sota ira too to, inbag-an sha si Jesus ja kowan sha ey, “Jet ngantoy kabol la kaikowani so ni mamaistoro ni dinteg ey mesepol la mepangdo alis Elias asan sota nappadto nonta bayag da ey ibetkag ali nen Apo Shiyos ja mengisedakan?”

<sup>11</sup> Simongbat si Jesus ja kowan to ey, “Owen, agpayso ja si Elias nin aliy mepangdo jet si-katoy mengi-odi nonta kimapoy ya pamati ni totoo say onkedsang ma. <sup>12</sup> Nem iyay i kowan ko son si-kayo. Si Elias, naksheng alin dimaw, nem eg indasin ni too ey si-kato. Jet dingkara son si-kato i kompormin kedsel la ninemnem sha. Jet iso met laeng nga sotan i dag-en sha so nonta kowan ni para padto ey Anak ni Too.” Kowan nen Jesus.

<sup>13</sup> Jet sota ira too to, inewatan sha ey say toka pan-i-arig ja kowan to ey si Elias, si-kato sota si Juan ja para bonjag.

*Inpamapteng nen Jesus sota nga-ngen mankelshas ja waray dimonyon pimeket son si-kato*

<sup>14</sup> Idi simabi ira nodta kad-an ni eshakel la totoo, waray toon en nantalimokod shi sango-an nen Jesus ja kowan to ey, <sup>15</sup> “Apo, kaasi-im sota anak ko, ta say sakit to, emankelshas. Kakaasin pasiya, ta kanayon na kaonkaro, nakol ni emetowang ni olay shi apoy, tan kanayon na emay-a-neng shi shanom. <sup>16</sup> Indaw ko so nonta ira toom nem eg sha met kabaalan.”

<sup>17</sup> Jet si Jesus, kowan to ey, “Enshiy pamatiyo eshan, ap-apil kayon too! Ebayagak met shiyay ja eman-enos son si-kayo, nem eg jo pay laeng pati-en i panakabalin nen Apo Shiyos! Ilaw mo did jay son si-kak sota nga-nga.”

<sup>18</sup> Indaw sha ali nontan met laeng jet si Jesus, inkowan to so nonta dimonyon pimeket so nonta nga-nga ey, “Betik ked ta nga-nga!” Jet bimetik nga agpayso sota dimonyo. Jet mimapteng nontan met laeng nga shagos sota nga-nga.

<sup>19</sup> Idi abos sha, sota ira too nen Jesus, kowan sha ey, “Apay nga eg mi binaalan na inpabtik nontan sota dimonyo so nontan na nga-nga?”

<sup>20</sup> Simongbat si Jesus ja kowan to son si-kara ey, “Ekolang eshan i pamatiyo. Agpayso iya ikowan ko son si-kayo. No wara koma i pamatiyo ja angken ootilik, ja inges toy kaba-deg nonta botil nonta mola ja kowan sha ey mostasa, mebedin na ikowan jo so nima shontog ey on-etan shi apil la dogad jet ma-tan nga agpayso. Jet no inges nontan i pamatiyo, enshiy jo ikowan ey edigat son si-kayo. <sup>21</sup> Nem sajay ya kalasin dimonyo, eg mebedin na pebtik bengat nem eg kita nin mengshaw ni tolong son Apo Shiyos tan mengibiyang ni pangan tayoy.”

*Inpa-amta to mowan sota ketey to di*



<sup>22</sup> Idi sakey ya akew, nan-o-odop ira shi Galilia, jet si Jesus kowan to so nonta ira too to ey, “Si-kak sota kowan ni para padto nonta bayag da ey Anak ni Too, nem may-ewatak so nonta ira toon makakontra son si-kak, <sup>23</sup> jet si-karay memono son si-kak. Nem no maykatdon akew, manbiyagak met laeng.”

Sajay ya inkowan nen Jesus son si-kara, ireka mandeshingit ta pasiya.

*Nanbayad met laeng si Jesus ni alos ni Timplo*

<sup>24</sup> Idi dimaw ired Kapirnaom, sota para singil ni alos ni Timplo shi Jerusalem, dimaw ira so nen Pedro jet kowan sha ey, “Sigosho sota apom, eg man-edos emo ni para so nonta Timplo shi Jerusalem?”

<sup>25</sup> Simongbat si Pedro ja kowan to ey, “Emengi-kan ngo ni alos to.”

Jet idi mimotok si Pedro nodta baley, si Jesus i epangdon imesel ja kowan to ey, “Simon, piyan kon amta-an i moka pannemnem niya ikowan ko son si-kam. Sipa iray kepansingili ira nonta a-ashi? Sota ira annak sha, ono sota ira eshom ma totoo?”

<sup>26</sup> Simongbat si Pedro ja kowan to ey, “Sota ira eshom.”

Jet si Jesus, kowan to ey, “No kasta, sota ira annak ni ari, dibshi mango ira. <sup>27</sup> Isonga si-kak, mebedin na dibshi-ak ni alos ni Timplo nen Apo Shiyos ja Amak. Nem say kowan ko, say eg mesekitan i nemnem ira nonta totoo, daw ka shima baybay et mo ipekat sota bengwit mo. Jet sota pilmiron nigay ya mekna, si-katoy al-en mo. Panga-wab mo et waray on-an mon pilak nodta bongot to. Si-katoy al-en mo ja mo i-akan ja alos ten showa.”

## 18

*Sota mengibeba ni bakdang to, si-katoy engato ali shi pantoshayan Apo Shiyos*

<sup>1</sup> Idi nontan met laeng, sota ira too nen Jesus, dimaw ira son si-kato jet sha inbag-an ja kowan sha son si-kato ey, “Sipa emoy engato ali i saad to shi pantoshayan nen Apo Shiyos?”

<sup>2</sup> Jet si Jesus, ena-wal ni nga-nga jet inpaledjat to nodta nankinawan ira nonta too to, <sup>3</sup> jet kowan to son si-kara ey, “Podno iya ikowan ko son si-kayo. No eg jo i-onod ja ingesen iya nga-nga, eg kayo mayda-kam shi pantoshayan nen Apo Shiyos. <sup>4</sup> Sota mengibeba ni bakdang to shorog ja inges toy kepesing niya nga-nga, si-katoy engato et ngo mowan i saad to shi pantoshayan nen Apo Shiyos.

<sup>5</sup> “No sipa ken too ja mapteng i pesing mo so ni inges niyay ya nga-nga maypangkep ni semek mo son si-kak, si-kak met laeng i tinoshong nonta inpasing mo.

<sup>6</sup> Nem sota istay mengi-kan ni panbesolan ira niya nankebaban emati son si-kak, say panmaptengan nontan na too ket ma-ononan koma ni ebadeg ga bato jet en mayteb-ok shima debeng nga baybay. Sotan i panmaptengan to ta engka-jas sotan na keshosa to nem say sota penosa nen Apo Shiyos son si-kato ja pengikesho to no istay itoloy ton panbesol sota kait to. <sup>7</sup> Ara, ngaaw i itsora ni tood ja dobong ja emengi-kan ni panbesolan ni kait sha! Waren kenshat i onsabin panbesolan ni too, nem kakaasi sota toon mengi-kan ni panbesolan ni kait to.

<sup>8</sup> “Isonga no bilang ey sota sakey ya takday mo, ono sota sakey ya sedim i mengi-kan ni panbesolan mo, potol mo et ibong mo. Ta no pa-onong mo, si-katoy kayteknalan mo shima apoy ya shosa-

an ingkatod ingka. Mapmapteng sota ka-enshi ni sakey ya tak-day mo ono sakey ya sedim, no sotan i kesalbaran mo. <sup>9</sup> Kasta met sota sakey ya matam: no si-katoy mengi-kan ni panbesolan mo, okit mo jet ibong mo. Ta no pa-onong mo, si-katoy kayteknalan mod impiyarno ja kad-an ni apoy. Mapmapteng sota ka-enshi ni sakey ya matam, no si-katoy kesalbaran mo.

<sup>10</sup> “Karejo damsisen ira ja toon nankebaba, ta si Apo Shiyos, eg to ira damsisen. Waray anghil iren jay ya nankebaba jet kepatki ira nen Amak shi dangit. <sup>11</sup> Ta si-kak ja naypadton Anak ni Too, say kabol la dinaŵan ko alid ja do bong ket nak ira isalakan sota imaraŵi son Apo Shiyos.

<sup>12</sup> “Piyon kon amta-an i joka pannemnem niya ikowan ko. No bilang ey waray toon nankalniro ni sandasos, nem sota sakey imaraŵi, aliŵa ngaten sotan na too ket idekjas to sota siyam ma polo tan siyam shima shontog jet pilit ta to enapen sota sakey ya imaraŵi? <sup>13</sup> Jet no sepolen to, man-imdeng nga pasiya ni insapol to so nonta sakey ya istay imaraŵi, nem say sota siyam ma polo tan siyam ja eg imaraŵi ja wara ni olay. <sup>14</sup> Sajay i arig ni nemnem nen Amejo ja wared dangit, ta eg to ngo kosto ja waray angken sakey so nonta ira took ja nankebaba ja on-araŵi son si-kak.

*Sota pesing no waray nanbasol son si-kam*

<sup>15</sup> “No bilang ey waray basol nonta kait mo son si-kam, mo ikowan son si-kato no abos jo. Jet no itenengan to sota ikowan mo son si-kato, may-odi mowan ma sota joka pesing nga singa san-agi ja istay esharal nonta inpanbasol to son si-kam. <sup>16</sup> Nem no eg toka itenengan, pangodop ka ni

sakey ono showa ja kadŵam jet daw kayo son si-kato, say emin na ikowan jon showa, waray mengitneng. Ta say naysolat ja esel nen Apo Shiyos nonta bayag da, kowan to ey mesepol i showa ono tedo ja onpaneknek so. <sup>17</sup> Jet no eg to pay laeng itenengan ja eg memati son si-kara, ikowan mo ma so nonta ira emati no mesanop ira. No iso met laeng ja eg to itenengan sota ikowan sha son si-kato, say pesing mo ma son si-kato, aliŵen mo i-inges so nonta ira eshom ma kait mod pamati, no diket pasing mo son si-kato sota moka pesing so nonta ira eg maka-amta son Apo Shiyos, ono sota para singil ni bowis ja nankekedsel.

<sup>18</sup> “Agpayso iya inkowan ko son si-kayo. No ngarantoy iparit jo ono ipalobos jo shiya do bong, itolok nen Apo Shiyos ja wared dangit ja si-katoy medeka.

<sup>19</sup> “Iyay pay i ikowan ko son si-kayo. Sota showen too shiya do bong, no nan-inges i nemnem sha maypangkep ni shaka panishawat so nen Apo Shiyos ja Amak shi dangit, sota kekshawen sha, si-katoy medeka. <sup>20</sup> Ta sota showa ono tedo ja esa-nop pangkep son si-kak, wara-ak son si-kara nontan na inkasa-nop sha.” Sajay den emin, inkowan nen Jesus.

*In-arig nen Jesus sota baga-en ja eg to pinekawananan i kait ton baga-en*

<sup>21</sup> Si Pedro dimaw son Jesus et kowan to ey, “Apo, meminpiga ja pekawananan ko pay laeng sota kait ko no manbesol son si-kak? Angken meminpito?”

<sup>22</sup> Simongbat si Jesus ja kowan to ey, “Aliŵen meminpito bengat, no diket meminshakel ja eg mebidang: meminpiton polon pito i pemekawan mo ni kait mo.

<sup>23</sup> Ta say kay-eshigan ni kaasi

nen Apo Shiyos shi pantoshayan to, sajay ya istoriya. Nontan da, waray ari ja piyan ton tabtabalen sota ira baga-en to maypangkep nonta otang sha son si-kato say man-i-inawatan ira. <sup>24</sup> Isonga sota ira baga-en to ja waray otang sha son si-kato, inpa-odop to ira. Jet waray sakey ali ja indaw sha son si-kato ja diniboy otang to. <sup>25</sup> Nem sajay ya baga-en, eg to posi-en i bayad nonta otang to so nonta apo to. Isonga sota apo to, inkowan to ey maydeko iren san-asewa, pati sota ira annak sha, tan angken pay sota kokowa sha, say bayshan sha sota otang sha son si-kato. <sup>26</sup> Nem sota baga-en, nantolimokod shi sango-an nonta apo to, ja ekikaasi son si-kato, ja kowan to ey, 'Kaasi-imak apo! Emin sota otang ko son si-kam, bayshan ko.' <sup>27</sup> Jet nontan ma, kinaasi-an nonta apo to sotan na baga-en; isonga inkowan to ey angken ondaw ja angken eg to bayshan sotan na otang to. <sup>28</sup> Nem sotan na baga-en, idi bimo-day, inapol to sota kait ton baga-en ja engotang ngo son si-kato ni otik ka pilak. Jet to inshel et sin-el to, ja kowan to ey, 'Bayshim niman sota inotang mo son si-kak!' <sup>29</sup> Jet sotan na kait ton baga-en, nanshomog shi sango-an to ja ekikaasi son si-kato, ja kowan to ey, 'Kaasi-imak ta sota inotang ko son si-kam, bayshan ko!' <sup>30</sup> Nem sotan na baga-en ja engotangan ni kait to, memasig, jet to et inbalod sota kait ton baga-en ja waray otang to son si-kato ingkatod kowan to ey bayshan to sotan na otang to. <sup>31</sup> Idi inon-an ira nonta eshom ma baga-en nonta ari iyay ya inpasing nontan, ngaaw i deknara jet sha inkowan so nonta apo sha. <sup>32</sup> Jet sota apo sha, to inpa-odop sota baga-en ja engibedod ni kait ton baga-en jet kowan nonta apo to ey, 'Si-kam ma makedsel la baga-

en! Pinekawananan taka ni emin na otang mo son si-kak ta ekikaasi ka son si-kak, <sup>33</sup> jet istay pekawananan mo koma ngo sota kait mon baga-en ja engotang son si-kam, ja inges to ngoy inpasing ko son si-kam!' <sup>34</sup> Isonga sota apo to, bimonget jet inkowan to so nonta emanbantay ni badoran ey ibalod sha sotan na baga-en to ingkatod eg to bayshan na emin sota otang to.

<sup>35</sup> "Sajay i arig ni kepesing nen Amak shi dangit son si-kayo no eg jo pekawananan sota kait jo ja manbesol son si-kayo. Jet mese-pol pay ya podnoy pesing jon memekawan." Kowan nen Jesus.

## 19

*Sota inpangitoro nen Jesus maypangkep ni pengisi-jan ni asewa*

<sup>1</sup> Idi naksheng ja inkowan nen Jesus iyay, indekjas toy Galilia jet dimaw nodta sakop ni Jodia ja wared baliw ni ebadeg ga pa-dok ja kowan sha ey Jordan. <sup>2</sup> Jet nontan, eshakil la pasiyay too ja imonod son si-kato, jet sota waray sakit to, inpamapteng to ira nodtan.

<sup>3</sup> Idi nontan, wara ngo aliy dimaw son si-kato ja Parisiyo jet kowan sha ni dedamsis sha ey peshasen sha. Isonga kowan sha ey, "Ngantoy moka pengi-odog ni dinteget tayon Hodiyo maypangkep ni pengisi-jan ni asewa? Bolos aya i pengisi-jan ni daki so ni asewa to, angken enshiy kabol?"

<sup>4</sup> Si Jesus, sinongbatan to ira ja kowan to ey, "Apay eg jo aya binasa sota esel nen Apo Shiyos ja naysolat nonta bayag da ja kowan to ey, 'Manshoki nonta pilmiro, pinalsowa nen Apo Shiyos i daki tan bii.' <sup>5</sup> Tan waray inkowan to pay nonta bayag da ey ma-alsa sota daki so nen ameto nen ineto et may-a-shom so nen asewa to. Jet sota showen bakdang, may-

eshig ma ey nansaksahey. <sup>6</sup> Isonga aliwén showa ma, no diket saksakey. Inpansaksahey nen Apo Shiyos i san-asewa, isonga enshiy nebeng ni toon mengisi-jan ni asewa to.”

<sup>7</sup> Jet sota ira Parisiyo, kowan sha mowan so nen Jesus ey, “No kasta, apay nga wara ngarod i bilin nen Moises maypangkep ni pengisi-jan? Kowan to ey sota mengisi-jan ni asewa to, mesepol la i-amagan to ni solat ja isepa to so nonta asewa to asan toka tayni.”

<sup>8</sup> Si Jesus, sinongbatan to mowan ira ja kowan to ey, “Say inpalobosan so nen Moises ey sotan i medeka ket kabol ni katangkan ni nemnem jo. Nem nonta pinalsowa nen Apo Shiyos i too, enshiy to inkowan na satan. <sup>9</sup> Jet niman, ikowan ko son si-kayo ey sota dakin mengisi-jan ni asewa to, ey eg ekileki sota bii, nanbasol ja inges to sota emii no mengesawa mowan ni apil la bii.”

<sup>10</sup> Jet sota too nen Jesus, kowan sha son si-kato ey, “No sotan i itsora ni pengesawa, pansigshan ngarod ni daki ey eg mengesawa.”

<sup>11</sup> Simongbat si Jesus ja kowan to ey, “Aliwén emin na too ket ewatan sha iyay ya inkowan ko ja onoren sha. Nem waray eshom ma toon intolok nen Apo Shiyos ja on-awat so. <sup>12</sup> Ta wara nga agpayso ira sota eshom ma eg mengesawa ta nay-anak iren sotan. Wara ira sota eshom ja eg mengesawa ta ekaponan, tan wara ngo ira sota eshom ma eg mengesawa say metopog i pansilbira shi pantoshayan nen Apo Shiyos. Sota toon mebedin na onoren to iya kowan ko, si-katoy dag-en to koma.”

*Inpalobos nen Jesus ja ondaw ira di sota a-anak son si-kato*

<sup>13</sup> Jet sota ira a-anak, indaw ira di nonta maka-anak son si-kara,

ta kowan sha ey say isakpal nen Jesus i takday to son si-kara ja ishawatan to ira son Apo Shiyos. Nem sota ira too nen Jesus, insegang sha ira sota engidaw ali nonta a-anak. <sup>14</sup> Nem si Jesus, kowan to ey, “Baybay-iyo ira di sota a-anak ja ondaw ali son si-kak, karejo iparit. Tep inges iren jay ya a-anak ja ekombaba i mayda-kam shi pantoshayan nen Apo Shiyos.” <sup>15</sup> Jet si Jesus, insakpal toy takday to so nonta ira a-anak, asan toka ira ilekjas.

*Sota balodakin entapi ton pasiya i kabaknang to*

<sup>16</sup> Jet nontan, waray sakey ya toon dimaw ali son Jesus jet kowan to ey, “Maistoro, ngarantoy dag-en ko ja mapteng say mewad-anak ni biyag ja enshiy to engintegan?”

<sup>17</sup> Sinongbatan nen Jesus ja kowan to ey, “Apay nga manse-dodsod ka son si-kak ni maypangkep ni mapteng? Amtam met ta saksakey ja si Apo Shiyos bengat i mapteng. Isonga no piyan mon mewad-an ni biyag ja enshiy to engintegan, patim sota bilin to.”

<sup>18</sup> Jet sotan na too, kowan to so nen Jesus ey, “Towa nodtan na bilin to i pati-en ko?”

Jet si Jesus, kowan to ey, “Say kowan ni bilin to, kareka memono, kareka memii, kareka mengibot, aliwén mo ba-ngaten ja man-a-sel ni aliwén kosto. <sup>19</sup> Tan say bilin to pay, shayaw mos amam tan si inam, tan semek moy kait mo ja inges toy kasmek mo so ni bakdang mo.”

<sup>20</sup> Jet sota balodaki, simongbat ja kowan to ey, “Emin itan na bilin to, inonod ko ni olay. Jet ngantoy pay laeng i kolang ko?”

<sup>21</sup> Simongbat si Jesus mowan ja kowan to ey, “No piyan mo ja enshiy mo pankodangan, ilekom ira sota kokowam jet sota dako to,

i-kan mo so nonta ira nankebiteg. No sajay i pesing mo, say kawad-an ni kabaknang mo ma, naytalo shi dangit. Jet no meksheng nga sotan i pesing mo, kay-eshom ka di so ira niya took!”

<sup>22</sup> Nem idi intenengan nonta balodaki iyay ya inkowan nen Jesus, namtik ja ensakit i nemnem to, tep toka tepi-en pasiya i kin-abaknang to.

<sup>23</sup> Jet si Jesus, kowan to so nonta ira too to ey, “Edigat so ni baknang ja onsekep shi pantoshayan nen Apo Shiyos!” <sup>24</sup> Sota animal ja kowan sha ey camel, no kas-anoy kalikat to ja on-osok shi ebot ni shakom, mas edigidigat pay ya onsekep i bebaknang shi pantoshayan nen Apo Shiyos!”

<sup>25</sup> Idi intenengan ira nonta too nen Jesus iyay ya kowan to, nasshaaw iren pasiya jet kowan sha ey, “No kasta, enshi ngarod i maysedakan?”

<sup>26</sup> Simongbat si Jesus ja kowan to ey, “Agpayson eg kabaalan ni toon mengisedakan ni bakdang to shorog, nem si Apo Shiyos, mebedin to tep kabaalan ton emin.”

<sup>27</sup> Simongbat ngo si Pedro ja kowan to ey, “Karam ngo dibdibkan ey si-kami, indekjas min emin i kokowa mi nonta nanbalian mi ni toom. Jet ngaranto ngarod i konkona mi?”

<sup>28</sup> Jet si Jesus, kowan to son si-kara ey, “Podno iya ikowan ko son si-kayo. No sota badon dobong ali ket sota kowan sha ey Anak ni Too, ipakat toy kina-Shiyos ton mantoshay, jet si-kayon took ja nay-ol-olop son si-kak, mekitoshay kayo. Si-kayoy mengigsheng ni panbenagan ni emin na Hodyos ja poli nonta sampolo tan showa ja annak nen Israel. <sup>29</sup> Jet ikowan ko son si-kayo, no sipay engilekjas ni baley to, a-aki to, annak to, bo-day to, ono sota maka-anak son si-

kato, kabol ni inpamati to ni bilin ko, ebadbadeg ga pasiyay ewaten to ja angken mansandasos, tan kon-oren to pay i biyag ja enshiy to engintegan. <sup>30</sup> Nem eshakil ira sota kowan sha ey si-karay mandesin i ewaten sha, nem ootik kari. Nem wára et ngo mowan i kowan ni karakdan ey ootik i ewaten sha, nem eshakil kari.

## 20

*In-arig nen Jesus ey nan-i-inges i dagbo ni man-obded gardin*

<sup>1</sup> “Iyay mowan i kay-eshigan ni pantoshayan nen Apo Shiyos. Sota pesing nen Apo Shiyos ja menobalit ni too to, may-eshig so nonta toon emangardin ja engala ni obrantis to. Sotan na too, bimowas ja en mengenap ni toon dagbo-an to ja man-obda nodta gardin to. <sup>2</sup> Jet idi waray simbi ton totoo, ekitodag son si-kara ey dagbo-an to ira ni kosto asan to ibetkag iren man-obda nodtan. <sup>3</sup> Idi nonta alas nowibi ni agsapa, dimaw mowan et waray inon-an to ja emandaydayat shima malkaro ja enshiy obdara. <sup>4</sup> Jet kowan to son si-kara ey, ‘Daw kayo ngo shima gardin ko jet kayo pan-obda. Dagbo-an takejo ni kosto.’ Jet sotan iren too, dimaw ira ja en nan-obda. <sup>5</sup> Idi alas dosi, tan alas tris mowan, dimaw mowan sota toon waray gardin to, jet sotan met laeng i inpasing to. <sup>6</sup> Nonta shanshanin alas singko ni mama-shem, dimaw mowan jet wára pay laeng i inon-an to ja toon emandaydayat, jet kowan to son si-kara ey, ‘Ngantoy? Wara kayod jay ni san-akew? Apay, enshiy obdayo aya?’ <sup>7</sup> Simongbat ira ja kowan sha ey, ‘Enshi met i mengeda son si-kamin man-obda.’ Isonga simongbat sota waray gardin to ey, ‘Daw kayo ngarod shima gardin ko et kayo

pan-obda.’ <sup>8</sup> Idi mama-shem mala, sota makakokowa nonta gardin, inkowan to so nonta emengiman-shal nonta ira man-obda ey, ‘Tá-wál mo di ira sota nan-obda et dagbo-im ira, manshoki nodta nanonod ja mimotok ingkato nodta epangdo.’ <sup>9</sup> Isonga say pilmiron tina-wál to, sota ira engiroki ni obda ni alas singko ni mama-shem. Jet say inewát ni sakey tan sakey son si-kara, sota koston dagbo ni san-akew. <sup>10</sup> Idi tina-wál to ngo ira di sota epangdon nan-obda, say namnama sha, kowan sha nem mandesin ira. Nem iso met laeng nga say inewát ni sakey tan sakey son si-kara, sota koston dagbo ni san-akew. <sup>11</sup> Idi inewát sha mala sota dagbora, pan-ikotot nonta ira epangdon nan-obda sota toon nan-obda-an sha, <sup>12</sup> ja kowan sha ey ‘Apay nga saja ira na-onod, ja nan-obda bengat ni sakey ya oras ket in-inges moy dagbora son si-kami ja nan-obda ni san-akew? Inen-enosan mi pay i embel-at ta obda, tan sakit ni sekit!’ <sup>13</sup> Nem sota dimagbo son si-kara, sinongbatan toy sakey son si-kara ja kowan to ey, ‘Kajem, enshiy ngaaw wa nak dingka son si-kayo. Timolok kayo met ey say idagbok son si-kayo ket sota koston dagbo ni san-akew. <sup>14</sup> I-ekad jo et ita dagboyo, kosto itan; angken ondaw kayo. Sota ira nanonod ja nay-inges i dagbora son si-kayo ja epangdon nan-obda, nemnem ko ngon may-inges ira son si-kayo. <sup>15</sup> Sota piyan kon penobalit ni took, si-kato, enshiy mengipeshit. Apay, kayoka aya ma-epal ta ma-ekanak so ni eshom?’ ” Sajay i arig ga inkowan nen Jesus so nonta ira too to.

<sup>16</sup> Jet si Jesus, intoloy ton kowan to ey, “Isonga sota toon namnama ni karakdan ey ootik i kon-oren to, si-kato et ngo mowan i mandesin aliy kon-oren to. Nem sota kowan

ni karakdan ey ebadeg i ewaten to, si-kato et ngo mowan i ootik i kon-oren to ali.”

*Sota maykepintedon engikowanan nen Jesus ni may-pangkep ni ketey to*

<sup>17</sup> Idi nonta kepan-ekad ira nen Jesus ja ondaw shi Jerusalem, in-pata-nil to ira sota sampolo tan showa ja apostol to et a-abos sha ma. Nonta wára ired ma shalan, kowan to son si-kara ey, <sup>18</sup> “Itnengi jo iya ikowan ko son si-kayo. Agpayson si-kak sota kowan ira nonta para padto nonta bayag da ey Anak ni Too. Nem no onmotok kitod Jerusalem, may-ewatak ma so nonta ira apo ni papashi tan mamaistoro ni dinteg tayan Hodiyo ja makakontra son si-kak. Jet sotan may timpo ja pengikowanan sha ey mebono-ak koma. <sup>19</sup> I-awat sha-ak so nonta ira too ja aliwen kait tayan Hodiyo say si-karay memebaing son si-kak. Sepsepdaten sha-ak pay, asan sha-ak ilansa ma shi koros. Nem no maykatdon akew, pan-ongal towak met laeng nen Apo Shiyos.”

*Inshawat nonta asewa nen Sibidi ja al-en nen Jesus iray anak to ni toray*

<sup>20</sup> Jet nontan, sota asewa nen Sibidi, dimaw ali so nen Jesus et pati sota showen anak to. En nantalimokod shi sango-an nen Jesus, ta waray ibaga to. <sup>21</sup> Jet si Jesus, kowan to son si-kato ey, “Ngantoy ibagam son si-kak?”

Simongbat sota bii ja kowan to ey, “Pangaasim, ikowan mo ni-man ey no mantoshay ka, meki-toshay ngo ira ja showen anak ko. Sota sakey, ontongaw shi petek ni kanawan mo et sota sakey, ontongaw shi petek ni kanigid mo.”

<sup>22</sup> Simongbat si Jesus ja kowan to ey, “Joka ba-ngatay бага ey eg jo nin nemnemen. Wara aliy

tasen napno ni digat jet mesepol la nak inomen. Kabaalan jo ayen mengenos ja meki-inom nontan?”

<sup>23</sup> Jet simongbat mowan si Jesus ja kowan to ey, “Agpayson mekilakam kayo nonta digat ja da-kaman ko. Nem sota itongaw jo shi petek ni kanawan ko, tan kanigid ko, aliwén si-kak i mengigsheng so. Sajay, para so nonta ira sigod ja insagana-an so nen Amak.”

<sup>24</sup> Idi intenengan ira nonta kait shen sampolo ja apostol nen Jesus iyay ya keshaw nonta san-agi, ngaaw i deknara son si-kara.

<sup>25</sup> Nem si Jesus, tina-wál to ira jet kowan to son si-kara ey, “Amtayo met i kepesing ira nonta mantoshay shima kompormin ili, tan sota eshom ma toon nankengatoy saad sha. Shaka ipakat i saad sha, ni shaka pengitoshay met laeng so ni sinekohan sha.

<sup>26</sup> Nem no si-kayo, aliwén inges nontan i pesing jo so ni sakey tan sakey son si-kayo. Sota kowan to ey si-katoy kangeto-an son si-kayo, mesepol la si-kato et ngo mowan i mengibeba ni bakdang to et si-katoy man-obda ni pansigshan ni kait to. <sup>27</sup> Jet sota piyan ton si-katoy mandesin son si-kayo, mesepol la panbedin toy bakdang to ni baga-en jon emin. <sup>28</sup> Ta angken si-kak ja naypadto nonta bayag da ey Anak ni Too, ekak dimaw ali ja pansilbi-an ni karakdan, no diket dimawak ali say mansilbi-ak son si-kara. Tan say sakey pay ya dinawan ko di, say itolok koy bakdang kon metey, tep si-katoy kaysedakan ni eshakil la totoo.”

*Inpan-asas nen Jesus i showen ekorab*

<sup>29</sup> Nonta shaka pan-idekjas i Jiriko, eshakil la pasiya ira sota toon imonod son si-kato. <sup>30</sup> Jet nodta kalsara, waray showen toon ekorab ja timongaw nodta naykilig. Idi intenengan sha ey si

Jesus i ondabas ali nodta kalsara, kimeljaw ira ja kowan sha ey, “Kaasi-i jokami, si-kam ma mengibengon son Ari David nonta bayag da!”

<sup>31</sup> Nem sota ira eshakil la too, sinelkag sha ira, ja kowan sha ey, “Eka-eket kayo!”

Nem mina-mara et ja kimeljaw ja kowan sha ey, “Apo! Kaasi-i jokami, si-kam ma mengibengon son Ari David nonta bayag da!”

<sup>32</sup> Kimi-neng si Jesus et tina-wál to ira ja kowan to ey, “Ngarantoy piyan jon itolong ko son si-kayo?”

<sup>33</sup> Simongbat ira ja kowan sha ey, “Apo, pan-asas jokami, say man-esas kami ngo.”

<sup>34</sup> Jet si Jesus, toka ira kaasi-i, isonga pinishat to i matesha. Jet mimapteng iren shagos ja nan-asas. Jet nay-eshom ira ma son Jesus.

## 21

*Edadsak i totoo nonta mimotok si Jesus shi Jerusalem*

<sup>1</sup> Nonta nay-esop ma shi Jesus shi Jerusalem ja wara ira shima dogad ja kowan sha ey Bitpag ja osshong ni shontog ja kowan sha ey Olibas, engibetkag ni showen too to, <sup>2</sup> jet inbilin to son si-kara ey, “Daw kayod ma dogad ja naysongbob et nodtan na dogad, waren shagos i asen jon naypagod ja animal la donkey et wara ngoy kilaw to. Okasiyo et alejo did jay sotan iren animal. <sup>3</sup> No waray mengibeka son si-kayo no ngantoy joka pan-okasi so, ikowan jo ey, ‘Si Apo Jesus, mesepol to jet i-oli to met laeng alin shagos.’ Satan day ikowan jo son si-kara.”

<sup>4</sup> Sajay ya inkowan nen Jesus, medeka say metongpal sota naypadto nonta bayag da, ja kowan to ey, <sup>5</sup> “Ikowan mo so nonta ira tood Jerusalem ey eg ira koma ontakot tep sota ari sha, ondaw

alin mengi-kan ni talna. Isonga nankabajo ali shi kilaw ni donkey ja para obda.”

<sup>6</sup> Jet sota ira too nen Jesus ja inbetkag to, dingkara sota inkowan to son si-kara. <sup>7</sup> Jet sota ta-kep ni baro sha, in-ap-ap sha nodta beneg ni donkey et nankabajo si Jesus. <sup>8</sup> Sota ira ngo eshom ma totoo, in-ap-ap sha ngoy baro sha nodta kalsaren panshalnan nen Jesus. Sota ira eshom, ira engala ngo ni emolong nga panga ni kadsan et in-ap-ap sha nodta kalsara. <sup>9</sup> Sota ira totoo ja epangdo ey si Jesus, tan sota ira na-onod, ireka onkaneljaw ja kowan sha ey, “Salamat son Apo Shiyos tep inbetkag to di iya mengibengon son Ari David nonta bayag da! Bindisiyonan to koma! Salamat son Apo Shiyos ja Kangeto-an!” Kowan ira nonta totoo.

<sup>10</sup> Idi emanmotok ma si Jesus shi Jerusalem, emin ira sota too nodta siyodad, eg sha tongolan no ngantoy emankepasemak, isonga kowan sha ey, “Apay sipa aya itan na toon emanmotok?” <sup>11</sup> Jet sota ira totoo ja nay-olop son si-kato, kowan sha ey, “Sajay sota para padto nen Apo Shiyos ja si Jesus i ngaran to. Too did Nasarit ja sakop ni Galilia!”

*Shinagshag nen Jesus ira sota emandeko nodta Timplo*

<sup>12</sup> Idi mimotok ma si Jesus, simekep shi Timplo, jet emin ira sota emandeko nodtan, tan emenongkal, shinagshag to iren inpabo-day. Jet tino-to-dang to pay ira sota damisaan ira nonta emena-dat ni pilak, tan sota tongawan ira nonta emandeko ni kalopati. <sup>13</sup> Jet kowan to son si-kara ey, “Say kowan ni esel nen Apo Shiyos ja naysolat nonta bayag da, kowan to ey sajay ya baley nen Apo Shiyos, nayngadnan

ey si-katoy panshewan ni totoo son si-kato, nem inpanbalin jo ni singa amotan ni tolisan!”

<sup>14</sup> Jet sota ira epilay, tan sota ira ekorab, dimaw ira son si-kato shima Timplo jet inpamapteng to ira.

<sup>15</sup> Nem inon-an ira nonta apo ni papashi ni Hodiyo tan sota ira mamaistoro ni dinteg ni Hodiyo sota kaskasshaaw wa dingka nen Jesus, tan intenengan sha sota keljaw ira nonta a-anak ja kowan sha ey, “Salamat son Apo Shiyos! Iyay ali sota mengibengon son Ari David!” Jet sotan na papashi tan mamaistoro ni dinteg, ngaaw i deknara. <sup>16</sup> Jet kowan sha so nen Jesus ey, “Apay nga eg mo selkagen ira ma a-anak? Apay eg mo aya itenengan ima kowan sha?”

Sinongbatan ira nen Jesus ja kowan to ey, “Owen, intenengan ko. Nem apay eg jo aya binasa sota esel nen Apo Shiyos ja naysolat nonta bayag da? Kowan to met ey, ‘Sota ira a-anak tan sota ira koyat, si-kara et ngo mowan i podno i shaka panshedjaw!’ ”

<sup>17</sup> Nontan met laeng, indekjas to ira et dimaw ma shi Bitania, jet na-ogip shiman.

*Sota inpasing nen Jesus so nonta kadsan na eg ondames*

<sup>18</sup> Idi agsapa, eman-ekad si Jesus say on-oli mowan shi siyodad ni Jerusalem et naytompong nga na-agang nontan. <sup>19</sup> Jet nodta toka pan-ekari, waray inon-an ton kadsan nodta kilig ni kalsara. To inon-an tep namnama to ey waray dames to, nem enshi gayam i dames to; bolong to bengat i wara. Jet si Jesus kowan to ey, “Si-kam ma kadsan, eg ka ma ondames, manipod niman ingkatod ingka!” Jet nontan met laeng, sota kadsan, nakkit ta shagos.



<sup>20</sup> Sota ira too to, idi inon-an sha iyay ya epasemak so nonta kadasan, nasshaaw ira jet kowan sha ey, “Nganto emoy nakkitan nima kadasan na shagos?”

<sup>21</sup> Kowan ma nen Jesus ey, “Agpayso iya ikowan ko son si-kayo. No waray pamatiyo ja enshiy showashowa to, aliwen sota dingkak so niya kadasan bengat i mebedin jon dag-en, no diket mebedin na ikowan jo pay niyay ya shontog ey ma-tan shorog ja ondaw shima baybay, jet mayto-to-wen medeka. <sup>22</sup> No ngantoy ibaga jo so nen Apo Shiyos, ewaten jo, no enshiy showashowa jo nonta panakabalin ton mengikan.”

*Sinongbatan nen Jesus ira sota eg makakosto ni dingdingka tod Jerusalem*

<sup>23</sup> Idi mimotok ma si Jesus shi Jerusalem, nantoro shima Timplo, jet sota ira apo ni papashi tan sota ira eshom ma pangolo ni Hodiyo, dimaw ira di son si-kato jet kowan sha son si-kato ey, “Sipay engikowan ey dag-en mo ira ta moka dagdag-a shiya Jerusalem? Sipay engibetkag son si-kam?”

<sup>24</sup> Simongbat si Jesus ja kowan to ey, “Ibag-an takejo ngo nin, jet no songbatan jo ni kosto iya salodsod ko, mebedin na ikowan ko son si-kayo no sipay engibetkag ali son si-kak ja mandeka niyay. <sup>25</sup> Jet sipa ngarod i engibetkag so nen Juan ja en memonjag nontan — nemnem to ngo shorog ono si Apo Shiyos?”

Nem sota ira apo ni papashi tan sota eshom ma pangolo ni Hodiyo, nantatababal ira ja kowan sha ey, “No ikowan tayo ey si Apo Shiyos, mesampolo kito tep ikowan to ey, ‘No kasta, apay nga eg jo ngarod pinati si Juan?’ <sup>26</sup> Nem no isongbat tayo ey nemnem ngo nen Juan,

katetakot i pesing ni karakdan son si-katejo. Ta shaka pati-a ey si Juan, podno inbetkag alin nen Apo Shiyos ja para padto.” <sup>27</sup> Jet say songbat sha so nen Jesus, kowan sha ey, “Tawey, eg mi amta no sipay engibetkag so nen Juan ja memonjag.”

Jet kowan ma nen Jesus ngo son si-kara ey, “Angken ngon si-kak, ekak ikowan son si-kayo no sipay engibetkag son si-kak ja mandeka niya naka dagdag-a niman.”

<sup>28</sup> Jet wara pay i inkowan nen Jesus ja arig son si-kara, ja kowan to ey, “Nemnem jo kari iyay ya istoriya. Waray toon showay anak to; dimaw so nonta pangodowan et kowan to ey, ‘Anak ko, ka panobda shima gardin tayo niman.’ <sup>29</sup> Nem sotan na anak to, kowan to ey, ‘Ensikshalak.’ Nem idi nan-nemnemnem, dimaw met laeng ja en nan-obda. <sup>30</sup> Dimaw mowan sota amesha so nonta maykadwen anak to et iso met laeng i inkowan to. Jet say insongbat nontan na anak to, ‘Owen ama, ondawak.’ Nem enshi kari; eg dimaw. <sup>31</sup> Jet sipa so nonta ira showa i dimaga so nonta piyan nen amesha?”

Simongbat ira ey, “Sota pangodowan.”

Jet si Jesus, kowan to son si-kara ey, “Ikowan ko son si-kayo i podno. Sota ira para singil ni bowis ja makedsel, tan sota ira bibiin maleki, si-karay epangdo et ngo mowan ja mayda-kam shi pantoshayan nen Apo Shiyos nem say si-kayo. <sup>32</sup> Ta dimaw alis Juan son si-kayo ja engipa-amta ni koston piyan nen Apo Shiyos ja dag-en jo, nem eg jo pinati. Sota ira para singil ni bowis tan sota bibiin maleki, emati ira et ngo mowan. Nem si-kayo, angken na inon-an jon mismo, eg kayo nanbebawi ni basol jo, tan eg kayo pay memati.” Kowan nen Jesus.

*In-arig pay nen Jesus sota makedsel la inpangajowan ni makabo-day*

<sup>33</sup> Wara pay i inkowan ton arig son si-kara, ja kowan to ey, “It-nengi jo pay iyay ya arig ja ikowan ko. Waray toon nanmola ni obas shi embanaw wa gardin to; inedad to, tan engamag ni shapidan nonta obas, tan engitowen pay ni baley ya kowadja-an. Inpaajowan to so ni eshom et dimaw ma shi arawin ili. <sup>34</sup> Idi simabi sota timpon pekibingay to nonta obas, engibetkag ira nonta baga-en to ja en mengeda ali nonta bingay to so nonta ira engajowan.

<sup>35</sup> Nem sota ira inpangajowan to so nontan na bo-day to, sinepsepdat sha et sota sakey ya baga-en, jet sota sakey, binonora. Jet sota maykatdo, kineskespigan sha ni bato. <sup>36</sup> Sota makabo-day, engibetkag mowan ni eshakil la baga-en to jet iso met laeng i dingka ira nonta inpangajowan to nonta bo-day. <sup>37</sup> Idi nonta anongosto, inbetkag nonta makabo-day sota anak ton mismo ja ondaw ta kowan to ey, ‘Mebedin emon ibaingan sha tep anak ko.’

<sup>38</sup> Nem idi inon-an ira nonta engajowan sota mismon anak nonta makabo-day, nantatabal ira ja kowan sha ey, ‘Sajay sota anak nonta makakokowa niya gardin na tayoka pan-obda-i. Bono-en tayo et say saja bo-day ya tawid to, kokowa-en tayo ma.’ <sup>39</sup> Indara nga agpayso sota anak nonta makabo-day nontan et inkoyod shen inbo-day nodta alad et binonora.” Kowan nen Jesus ni arig to.

<sup>40</sup> Jet nontan ma, inbag-an nen Jesus ira ja kowan to ey, “Jet no bilang ey ondaw ali sota makakokowa nontan na bo-day, ngantoy pesing to so nonta ira toon inpangajowan to?”

<sup>41</sup> Jet kowan sha ni songbat sha son si-kato ey, “Simpri angja-en

to ngo iren bono-en sotan na makedsel. Jet ipiyal to sota bo-day so ni eshom ma mengajowan say waray bingayen to no timpo ni apit.”

<sup>42</sup> Jet si Jesus, inbag-an to ira, ja kowan to ey, “Jet eg jo amten mengi-odog ngarod nonta esel nen Apo Shiyos ja naysolat nonta bayag da? Kowan to met ey, ‘Sota baton binedaw ira nonta para amag ni baley, ja kowan sha ey enshiy silbi to, si-kato et ngo mowan gayam i epateg ga bato so ni emin. Si Apo Shiyos i makabaal niyay ya edaga jet kaskasshaaw i tayosoka pengidmang.’ <sup>43</sup> Sajay i naysolat nonta bayag da, jet niman ma, sota pantoshayan nen Apo Shiyos ja istay wára son si-kayo, ma-kal son si-kayo et mayekan so ni eshom. Jet mapteng may panbenagan to. <sup>44</sup> Jet angken sipen too ja maysokbab nodtan na bato, mekosot; tan no sipay tedteshan to, memisit.”

<sup>45</sup> Idi intenengan ira nonta apo ni papashi ni Hodiyos tan Parisiyo ira jay ya arig nen Jesus, inewatan sha ey si-kara i kaytoshongan nontan na arig. <sup>46</sup> Kowan sha ey seskelen sha si Jesus nontan, nem entakot sha ira sota totoo, tep sota ira totoo, ireka memati ey si Jesus, kowan sha ey para padton inbetkag ali nen Apo Shiyos.

## 22

*In-arig nen Jesus sota kasal nonta anak nonta ari*

<sup>1</sup> In-arigan nen Jesus mowan ira ja kowan to ey, <sup>2</sup> “Say kay-eshigan mowan nonta pantoshayan nen Apo Shiyos, may-eshig so nonta ari ja nankastos ni ebadeg nonta inpangesawa nonta anak to. <sup>3</sup> Inbetkag nonta ari ira sota baga-en to ja sha odopen ira di sota inewis to nontan ja mekikan

nodtan. Nem sota na-awis, en-sikshal ira din ondaw. <sup>4</sup> Isonga engibetkag mowan ni eshom ma baga-en to ja kowan to son si-kara ey, 'Ikowan jo so nonta ira inewis ko nontan ey naksheng nga insaganak sota mekan ni mama-shem: sota bakak tan sota ira eshom ma animal la mateba, inpapaltik da. Esaganen emin, isonga mesepol la ondaw ira di koma.' <sup>5</sup> Dimaw da ira sota baga-en to ja sha inkowan sotan, nem sota ira toon na-awis sa mekikan, endedamsis sha. Sota ira eshom, dimaw ira et shi payew, jet sota ira eshom, ira nanbiyaki. <sup>6</sup> Sota ira eshom ngo so nonta ira na-awis, inshel sha et sota inbetkag nonta ari jet binebaingan sha ira, asan shaka ira bono-a. <sup>7</sup> Isonga sota ari, bimonget, jet engibetkag ni solsharo to jet sha ngo binono ira sota emono ni baga-en to, tan pinoolan sha pay sota siyodad ira nontan na totoo. <sup>8</sup> Jet inkowan to mowan ira nonta eshom ma baga-en to ey, 'Emin na mese-pol shiya pengesawa ni anak ko, esagana, nem sota ira na-awis, ja istay mekikan koma, eg ira gayam maykeshi ja mekikan. <sup>9</sup> Daw kayo mowan et angken kompormin as-polen jon too shi shalan, awis jo ira did jay.' <sup>10</sup> Sota ira baga-en to, dimaw ira nga agpayso, jet emin sota simbira, inodop sha ira — angken sota ira nankekedsel ono sota ira maronong. Jet nontan ma, sota baley nonta ari, enapno ni toon mekikan.

<sup>11</sup> "Nem idi simekep ali sota ari ja to koma asen ira sota dimaw alin bisita, waray inon-an ton toon ekiskep ali ja eg nanbaro ni para kasal. <sup>12</sup> Jet sota ari, kowan to son si-kato ey, 'Kajem, ita et mangon wara ked jay, ey eg ka nanbaro ni para kasal?' Sotan na too, ebebaingan na imeg-eket. <sup>13</sup> Jet sota ari, kowan to so nonta

toon emenintil ni toon onsekep ali ey, 'Balod joy takday nitan na too, pati sota sedo to, jet ipedaw jod ma embolinet. Shiman, manneng-nengis i totoo, tan panngedetngget shay sangi sha ni digat sha.' " Sajay i arig ja inkowan nen Jesus, asan waray inpan-onod ton esel ja kowan to ey, <sup>14</sup> "Eshakel i inewis nen Apo Shiyos, nem otik i maydakam shi pantoshayan to."

*Pineshas shen saolen si Jesus maypangkep nonta bayad ni bowis*

<sup>15</sup> Nontan ma, sota ira Parisiyo, dimaw ira ja en nantatabtabal no ngarantoy pesing shen menaol son Jesus say wara ikowan ton esel ja ikowan sha so ey waray basol to. <sup>16</sup> Jet say inpasing sha, engibetkag ira ni too sha ja nay-olopan ira nonta too nen Ari Hirodis, jet kowan sha so nen Jesus ey, "Maistoro, amta mi ey podnon emin sota kowan mo, tan sota torom ket si-katoy piyan nen Apo Shiyos ja dag-en ni totoo. Amta mi pay ey enshiy moka pabori, angken ngantoy katoo to. <sup>17</sup> Isonga iyay i ibaga mi son sikam. Maypeshit aya shi dinteg tayon Hodiyo i panbedjad ni bowis so ni gobirnod Roma, ono enshi?"

<sup>18</sup> Nem si Jesus, amta to ey ngaaw i pangkep sha jet kowan to son si-kara ey, "Si-kayon sinan maronong! Ngantoy jowaksoka pansaoli? <sup>19</sup> Ipa-sasi jowak ni pilak ka joka ibayad ni bowis." Inpasas sha son si-kato, <sup>20</sup> jet kowan to son si-kara ey, "Sipay makadopa niyay ya naymalked ja pilak? Tan sipay makangaran niya naysolat?"

<sup>21</sup> Simongbat ira ja kowan sha son si-kato ey, "Sota ari shi Roma."

Jet kowan ma nen Jesus son si-kara ey, "No kasta, sota pilak ja joka osala, edapod gobirno ni Roma, isonga mesepol met laeng nga pa-odiyon son si-kara. Sota

kowan ni gobirno ey may-ekan son si-kara, mesepol la maytongpal, jet sota kowan ngo nen Apo Shiyos ey may-ekan son si-kato, mesepol ngon mepati.”

<sup>22</sup> Nem idi intenengan sha iyay ya songbat to son si-kara, ireka messhaaw jet indekjas sha si Jesus.

*Pineshas sha mowan may-pangkep nonta panbiyag mowan ira nonta nanketey*

<sup>23</sup> Nontan met laeng nga akew, dimaw ira di sota Sadosiyo. Say pamatira, kowan sha ey eg kono manbiyag mowan i etey, isonga inparas shen inbag-an si Jesus, <sup>24</sup> ja kowan sha ey, “Maistoro, say insolat nen Moises nonta bayag da ja dinteg tayon Hodiyos, kowan to ey no sota dakin engasewa ket metey ja enshiy potot to nodta asewa to, sota agi nontan na dakin etey, si-katoy mengelbat nonta istay asewa to say balang nem waray enaken sha. Jet sota anak sha, maybidang ey singa potot nonta etey den agi to. <sup>25</sup> Iyay i piyan min ibaga. Nontan da kono, waray piton san-a-aki shima kadan mi, jet sota pangodowan, engasewa nem etey ya enshiy to inpotot. Inelbat nonta maykadwen agi to, <sup>26</sup> nem etey mowan kono sotan na daki. Nan-i-inelbat ira sotan na san-a-aki ma ja engasewa nontan na bii, ingkato nodta maykepito. <sup>27</sup> Jet shi karonoran, etey kono ngo sota bii. <sup>28</sup> Sajay i piyan min ibaga son si-kam, ta no bilang ey onsabi ali sota timpon pan-ongal ira ni nanketey, sipa emoy koston makasewa ali so nontan na bii? Ta nan-i-inelbat met ira sota piton san-a-aki ja engasewa son si-kato.”

<sup>29</sup> Simongbat si Jesus ja kowan to son si-kara ey, “Esama kayo, ta eg jo inewatan sota esel nen Apo Shiyos ja naysolat nonta bayag da,

tan eg jo pay amta sota panakabalin to. <sup>30</sup> Ta sota totoon panongal ali nen Apo Shiyos, eg ma ira mengesawa ta ingesen sha ira sota anghil. <sup>31</sup> Nem sigosho eg jo pati-en ey manbiyag mowan i nanketey. Apay eg jo aya binasa sota kowan nen Apo Shiyos son si-kayo ja naysolat nonta bayag da ja kowan to ey, <sup>32</sup> ‘Si-kak si Apo Shiyos ja Shiyos shi Abraham, Isaac, tan si Jacob!’ Say olog niyay, angken etey mangon bayag i bakdang shi Abraham, kowan nen Apo Shiyos ey mabiday ired sango-an to. Ta no enshi koma, istay eg to inkowan ey si-katoy Shiyos sha.”

<sup>33</sup> Idi intenengan ira nonta too iyay ya inkowan nen Jesus, ireka messhaaw nontan na toro to. <sup>34</sup> Nem idi inon-an ira nonta Parisiyo ey na-abak ira sota Sadosiyo ja enshiy isongbat sha ma so nen Jesus, nay-eshom ira di. <sup>35</sup> Jet waray sakey son si-kara ja nan-ashal ni dinteg ja nansalodsod so nen Jesus, say balang nem waray apil la ikowan nen Jesus ja pebesolan sha so. Jet kowan to ey, <sup>36</sup> “Maistoro, towa nodta bilin nen Apo Shiyos i kapatkan so ni emin?”

<sup>37</sup> Si Jesus, simongbat ja kowan to ey, “Say kapatkan so ni emin na bilin, sajay: ‘Si Apo Shiyos i topogen mon sesmeken, ja si-katoy pengitoshongan mo ni emin na nemnem mo tan posom.’ <sup>38</sup> Sajay i kapatkan na bilin ja mesepol la pasiya ja onoren. <sup>39</sup> Jet sota maykadwa ja bilin, kait to met laeng, isonga kowan to ey, ‘Semek moy kait mon too ja inges toy moka penmek ni bakdang mo.’ <sup>40</sup> Sota emin na bilin ja naysolat nonta bayag da, tan sota kowan ira ni para padto nen Apo Shiyos, minongsan niya showen bilin ja si-katoy singa naynadraran to.”

<sup>41</sup> Jet idi inon-an ton esa-nop ira di sota Parisiyo, inshingan ton nansalodsod ngo son si-kara, <sup>42</sup> ja kowan to ey, “Ngantoy joka pengi-odog nonta kowan ni padto nonta bayag da maypangkep nonta inkari nen Apo Shiyos ey ibetkag to ali ja mengisedakan? Sipay makapoli son si-kato?”

Simongbat ira son si-kato ja kowan sha ey, “Poli ali kono nen Ari David nonta bayag da.”

<sup>43</sup> Kowan mowan nen Jesus son si-kara ey, “No kasta, apay ngarod nga inkowan nen Ari David nonta bayag da ey sota naypadton mengisedakan ket apo to? Intorong met ni Ispirito Santo si David nonta engikowanan to ey, <sup>44</sup> ‘Si Apo Shiyos, inkowan to so nonta pangolok ey ontongaw si-kato shi apit ni kanawan to, ingkatod enshiy mebedin nonta kabakal to ja wára ma ired shalokap ni shapan to.’ <sup>45</sup> Jet no kowan nen Ari David ey pangolo to sota mengisedakan, toway in-pasing to ja kowan jo ey poli ali nen Ari David?”

<sup>46</sup> Jet angken sakey son si-kara, enshiy makabaal la onsongbat son si-kato. Jet manipod ma nontan na akew, polos malen eg sha intoled ja nansalodsod son si-kato, ta inewatan sha ey eg sha kabaalan na ebaken.

## 23

*Inkowan tod karakdan ni too sota ngaaw wa ogadi nonta ira Parisiyo tan sota kait sha*

<sup>1</sup> Jet si Jesus, kowan to so nonta ira totoo ja naydaokan ni too to ey, <sup>2</sup> “Sota ira mamaistoro ni dinteg tan sota ira Parisiyo, si-karay naysaad ja mengi-odog nonta dinteg ja in-akan nen Moises nonta bayag da. <sup>3</sup> Isonga sota kowan sha, si-kato komay onoren jon pati-en. Nem karejo onoran sota ogadira. Ta sotan

na toro shen mismo, eg sha kari met laeng tongpalen. <sup>4</sup> Shaka ida-kariy too ni embel-at ta bilin shen eg sha iposi. May-eshig ey shaka ira bel-ati ni kalka ja eg sha iposi, nem si-karen mismo ket eg sha pay peshasen na angken sakey ya kalomot shay mandibit. <sup>5</sup> Emin na shaka dagdaga, piyan shen asen ni totoo say i-etek sha ira. Singa agpayson epateg i pamatira son Apo Shiyos, ta waray shaka itaktakin ni olay ja papil la naysolatan ni esel nen Apo Shiyos, nem shaka peba-deg say on-an ni totoo. Tan shaka arti-i i kajaran ni baro sha say ikowan ni too ey sota bilin nen Apo Shiyos noman i pipiyan sha. <sup>6</sup> Jet no timpo ni piyasta, pipiyan sha pay ja ontongaw shima naysaganen tongawan say mebigbig ira, tan angken pay shima sa-nopan, sotan i shaka pesing. <sup>7</sup> Pipiyan sha pay ya rispito-en ni totoo ira ja semsemano-an shima malkaro ja karakdan ni too, tan pipiyan shen ewagan ira ni too ni ‘Maistoro’.

<sup>8</sup> “Nem si-kayo, karejo itolok ja ‘Maistoro’ i awag sha son si-kayo, ta sakey bengat i maistoro jo, tan sakey pay, san-a-aki kayo shi pamati. <sup>9</sup> Jet angken sipen too shiya dobong, enshi komay jo ewagan ey amejo shi pamati ta sakey bengat i Amejod pamati, jet si-kato, wared dangit. <sup>10</sup> Karejo itolok ja ikowan ni too son si-kayo ey apo shakejo, ta sakey bengat i apo jo: si-kato si Cristo.

<sup>11</sup> “Jet sota kangeto-an son si-kayo, si-kato et ngo mowan i mansilbi son si-kayo. <sup>12</sup> Sota mengingeto shorog ni bakdang to, maybeba et ngo mowan. Jet sota mengibebe ni bakdang to, si-katoy mayngeto.

<sup>13</sup> “Nem kaasi kayo din ma-maistoro ni dinteg, tan si-kayon Parisiyo! Sinan maronong kayon

too! Say keshosa-an jo, si-kayoy singa emengipeshit ni kait jon too ja mayda-kam shi pantoshayan nen Apo Shiyos. Jet angken si-kayon mismo, eg jo kosto. May-eshig ey si-kayoy mengilkeb ni sakepan ni pantoshayan nen Apo Shiyos so nonta ira makapiyan na onsekep koma. <sup>14</sup> Kakaasi kayo di, si-kayon mamaistoro ni dinteg tan si-kayon Parisiyo, ta sinan maronong kayo! Manpatang kayo mango ira nonta bibiin nankebal; jet no enshiy ibayad sha, piditen jon angken sota baley sha i ibayad sha. Jet no ondaw kayod sa-nopan, say joka pesing nga mena-din ni kakedsel jo, joka ishokey i shawat jo son Apo Shiyos, say ikowan ni too ey maronong kayo. Jet sotan i keshosa-an jo ni ebadeg. <sup>15</sup> Kakaasi kayo di, si-kayon mamaistoro ni dinteg tan si-kayon Parisiyo! Sinan maronong kayo! Kaasi kayo di, ta epaladoy joka pesing: kayoka man-eka-ekad shi intiron dobong ja mengewis ni angken sakey ya too, nem no nawis ja too jo mala, joka panbedin ni mas makedsel nem say si-kayo, isonga anam ton mandesin i shosa to shi impiyarno ey si-kayo.

<sup>16</sup> “Kakaasi kayo di, ta si-kayoy may-eshig ey ekorab ba emengiredan ni kait ton ekorab. Say kowan jo, no sota Timplo i pansangba-an ni too, enshiy silbi to, nem no sota balitok shima Timplo i pansangba-an to, mesepol la tongpalen to sotan. <sup>17</sup> Singa ekorab kayo mowan ta eg jo amten mengilesin ni mapteng. Taway epatpateg — sota balitok, ono sota Timplo? Sota balitok, no enshid ma Timplo, balitok bengat; sota Timploy engi-kan ni pateg nontan ja pasiya, ta wara nodtan. <sup>18</sup> Jet say kowan jo pay, no sota wared Timplo ja kowan sha ey

altar i pansangba-an ni too, enshiy silbi to. Nem no sota too ket mansangba so nonta wared ma altar ja naydaton, mesepol la tongpalen to sotan. <sup>19</sup> Singa ekorab kayo! Ta say epatpateg, sota altar, aliwen sota wara nodtan ja naydaton. Sota altar met i kabol la kapatkan nonta naydaton. <sup>20</sup> Isonga sota mansangba ja i-esel to sota altar, sota altar i nankari-an to, tan sota emin pay ya wara nodtan. <sup>21</sup> Jet sota mansangba ja i-esel to sota Timplo, sotan i nankari-an to, tan angken pay si Apo Shiyos ja may-eshig ey nanbaley nodtan. <sup>22</sup> Jet sota mansangba ja i-esel toy dangit, say nansangba-an to kari, sota tongawan nen Apo Shiyos, tan angken pay si Apo Shiyos.

<sup>23</sup> “Kaasi kayo di, si-kayon mamaistoro ni dinteg tan si-kayon Parisiyo, ta sinan maronong kayo! Joka tongtongpala sota bilin na ootik i pateg to, nem joka et ngo mowan ibiyang sota bilin na epateg ga pasiya. Joka idaton so nen Apo Shiyos ja singa bingay to sota maykesampolo nonta emin na apit jo, angken pay sota molejo ja para seng-ew ni sira. Nem joka diwayi sota wa-wa-shen piyan nen Apo Shiyos, ta piyan ton mapteng i pesing jo ni kait jon too: piyan ton kaasi-an jo ira, ja eg jo ira i-owapan. Sajay ya joka pesing nga mengi-kan ni singa bingay nen Apo Shiyos, mapteng, nem mesepol la eg jo diwayan iya wa-wa-shen piyan to. <sup>24</sup> Isonga may-eshig ey joka sekatay imok shi inomen jo, nem sota animal la camel i joka tetdena. Apaw kayon Parisiyo! Singa ekorab kayon emengiredan ni kait ton ekorab!

<sup>25</sup> “Kaasi kayo di, si-kayon mamaistoro ni dinteg, tan si-kayon Parisiyo, ta sinan maronong kayo! Say itsora ni ogadiyo, singa sota

tasa ono malokong ja showal to bengat i eki-wanan, nem sota dikong to, edogit ta pasiya. Sotan i kay-eshigan jo tep say joka ipasas shi karakdan, singa maronong kayo, nem say joka dagdag-a, sota penikap ni kokowa ni eshom, tan sota pingit jo bengat i joka nem-nemnema. <sup>26</sup> Si-kayon Parisiyo, singa ekorab kayo, ta eg jo idasin sota mapteng. Say pilmiron dagen jo koma, dinisiyo nin sota dikong ni tasa ono pingkan, say sota showal ja asen ni too, medinisan ngo.

<sup>27</sup> “Kaasi kayo di, si-kayon ma-  
maistoro ni dinteg tan si-kayon  
Parisiyo, ta sinan maronong kayo!  
Si-kayo, may-eshig ey say ogadiyo,  
singa sota naydiyangan ni toon  
etey, ja epintolan ni empoti, say  
mapteng i boya to. Nem shi nay-  
daem to, napno ni ensekig, pati  
sota pokel ni toon etey. <sup>28</sup> Sajay  
i sakey mowan na kay-eshigan  
jo, ta singa maronong i kepengid-  
mang ni kait jon too son si-kayo,  
nem shi nemnem jo, napno ni o-  
owap, tan ngaaw wa pangkep.

<sup>29</sup> “Kaasi kayo di, si-kayon ma-  
maistoro ni dinteg tan si-kayon  
Parisiyo, ta sinan maronong kayo!  
Si-kayo i nandaga ni monyominto  
ira nonta para padto nonta bayag  
da, jet inalkosan jo pay sota nay-  
beka-an ira nonta eshom ma  
too nen Apo Shiyos nonta bayag  
da. <sup>30</sup> Jet say kowan jo pay,  
‘No wára kami koma nonta timpo  
nen apo mi, arawin kami may-a-  
shom son si-kara ja memono ira  
nonta para padto nen Apo Shiyos.’

<sup>31</sup> Sajay den inkowan jo, si-kayo  
met laeng i kaonpaneknek so ey  
annak shakejo nonta emono so ira  
nonta para padto, jet tinewid jo  
may ogadira ngo. <sup>32</sup> Eti, itodoy jon  
dag-en ja kekshengen sota dingka  
ira nonta apo jo la! <sup>33</sup> Si-kayo,  
singa oleg i ogadiyo! Isonga eg

mebedin na disi-an jon meshosa  
shi impiyarno! <sup>34</sup> Jet niman, men-  
gibetkagak da ngo son si-kayo  
ni toon mengikowan ni esel nen  
Apo Shiyos, tan mengibetkagak  
ni eshom ma toon edaing nga  
mantosho ja ondaw son si-kayo.  
Nem bono-en jo ira sota eshom  
ja idansa shi koros, jet sota es-  
hom son si-kara, sepseptaten jo  
ira shima sa-nopan jo. Jet emin  
sota mebay-an ja eg jo bono-en,  
osilen jo pay ira shi ka-ili-ili.  
<sup>35</sup> Isonga meshosa kayo di ja ikaro  
jo sota inkabono ira nonta emin  
na maronong nga too ja naybok-  
bok i shalesha shi intiron dobong  
manshoki so nen Abel ja mapteng  
nga too, ingkato so nen Sakarias  
ja anak nen Barakias, ja binono  
ni too nonta bayag da ja kait  
jon Hodiyo shima naydaem ni  
Timplo, ja nay-esop shima kowan  
sha ey altar. <sup>36</sup> Ikowan ko son si-  
kayo ey emin iyay ya dingdingka  
ni apo jo nontan da, si-kayon too  
niman i mengikesho.

<sup>37</sup> “Si-kayon tood Jerusalem!  
Manshoki nonta bayag da ingkato  
niman, joka bono-a ni olay ja  
kespigan ni bato iray inbetkag nen  
Apo Shiyos son si-kayo, pati sota  
ira para padto. Ara! Piga mangoy  
pesing ko son si-kayo! Eminshakel  
la piyan kon i-okong takejon i-  
Jerusalem ja inges to sota kepengi-  
okong ni manok ira ni kipkip to.  
Nem en-asneng kayo! <sup>38</sup> Niman  
ma, olay to kayo ngo, tep enshis  
Apo Shiyos shi Timplojo ya men-  
gibediw son si-kayo. <sup>39</sup> Jet ikowan  
ko ey si-kayon i-Jerusalem, waray  
timpon imotok ko son si-kayo ja  
asen jowak et ikowan jo ey ‘Bin-  
disiyonan koma nen Apo Shiyos  
iya toon inbetkag to di!’ ”

## 24

*Indawag nen Jesus sota may-  
pangkep ni pantepos ni dobong*

<sup>1</sup> Si Jesus, bimo-day nodta Timplo jet nan-akad ja idekjas to koma sota Timplo. Nem sota ira too to, dimaw ira di son si-kato, jet intoro sha sota itsora ni ekalkalasin baley nodta kad-an ni Timplo.

<sup>2</sup> Nem si Jesus, simongbat son si-kara ja kowan to ey, “Owen, bisnayo niman. Tep ikowan ko son si-kayo ey wára aliy timpon onsabi ja sajay ya Timplon joka i-et-etek ey mapteng, mesheshal, jet angken sakey so ira nima baton mapteng i inkay-amag to, enshiy en mebay-an shima nay-amagan to; mesheshal la emin.”

<sup>3</sup> Idi pinsak ja wáres Jesus ja timongaw shima shontog ja kowan sha ey Olibas, jet dimaw ira di sota too to ni abos sha, jet kowan sha son si-kato ey, “Piyán min amtaan no pigan ali ita kowan mo. Jet nganto pay i amta-an mi so nem pigan aliy idaw mo mowan ja mo pengisaad ni pantoshayan mo? Tan nganto pay i amta-an mi so ey shanshanin mantepos i dobong?”

<sup>4</sup> Simongbat si Jesus ja kowan to son si-kara ey, “Nemnemnemen jo koma iyay. Karekayo pa-olbod so ni angken sipa, <sup>5</sup> ta eshakil aliy toon mengosal ni ngaran ko, ja ikowan sha ey si-kara si Cristo, jet eshakil noman i toon may-owapan. <sup>6</sup> Jet wára pay i mismon mankokobat ja itenengan jo, tan wáray shemagen jon kobat shi eshom ma ili. Nem karekayo meshanagan. Tep kenshat ta mepesamak ira jay, nem aliwén sotan i ka-amta-an to ey shanshani may pantepos ni dobong. <sup>7</sup> Angken ili tan ili, mankokobat ira, jet angken pay sota ka-ili-ilin intorayan ni ashi, mankokobat ngo ira. Wára pay i epaladon bitil tan jegjeg shi kedogadogad. <sup>8</sup> Nem emin iyay ya mepesamak, sajay i panshoki-an bengat ni digat.

<sup>9</sup> “Jet si-kayo, i-awat shakejo shi toray jet pedigaten shakejo asan shakejo bono-a. Karakdan ni tood ka-ili-ili, okesen shakejo may-pangkep ni joka pematí son si-kak. <sup>10</sup> Jet eshakil ma i took ja mengi-ibjag ni pamatira tan mengibaag ni kait sha so ni makakontra son si-kara, tan asdeg to so ni took ja emati i mankokontra. <sup>11</sup> Wára pay iray ondaw ali ja kowan sha ey para padto ira nen Apo Shiyos, nem o-owap kariy toro sha, jet eshakil noman i on-onod son si-kara ja may-owapan. <sup>12</sup> Jet sajay alin timpon onmotok, memama may ogadi ni toon ngaaw, jet nakol ni wa-wa-sha so ira nonta took i ootik may semek sha so ni kait sha. <sup>13</sup> Nem sota mengitoded niyay ya digat ingkatod meksheng, si-katoy maysedakan.

<sup>14</sup> “Jet sota mapteng nga shamag may-pangkep ni pantoshayan nen Apo Shiyos, maypedawag nin shi intiron dobong, say amta-an ni emin na tood ja ka-ili-ili, asan kesabi may pantepos ni dobong.

<sup>15</sup> “Jet on-an jon mepesamak sota inpadto nen Daniel nonta bayag da, ja ‘kataktakot alin on-dogit’. Jet isaad toy toray to nodta Timplo. (Sota memasa niyay, ewatan to komay kaytoshongan niya kowan nen Jesus.) <sup>16</sup> No on-an jo iyay, say pesing sha koma nonta ira wáred Jodia ket onbetik ira et ja manbakwit shi shonshontog. <sup>17</sup> Sota toon may-tompong nga man-adibay shi bo-dayan, eg to koma nemnemen ja onsekep shima baley to ja en mengeda nonta kompormin wára nodta naydaem ni baley. <sup>18</sup> Kasta met sota wáred payew, eg koma mesiwat ni aletó nonta insepa ton baro to. <sup>19</sup> Sajay alin mepesamak, kakaasi ira din pasiya sota bibiin malokon, tan sota bibiin wáray anak shen emenoso. <sup>20</sup> Irewat jo son Apo Shiyos ey eg koma mepe-



samak iyay ni timpon powek, ono timpo ni akew ni ngilin, say mariwes i pemtik jo. <sup>21</sup> Ta sotan alin digat ja onsabi, enshiy to kay-ingesan nodta ira digat ja epas-pasamak, manipod nonta epal-sowa iya dobong ingkato niman. Jet sajay ya digat ja mepesamak, enshiy kay-ingesan to di. <sup>22</sup> No eg ninemnem nen Apo Shiyos ey tikeyen to iyay alin digat, istay angken sipeen too, enshiy mebay-an na mebiyag. Nem si Apo Shiyos, tikeyen to iyay ya digat ta toka isakit ira sota too ton pinidi to.

<sup>23</sup> “Sotan alin akew, no wáray mengikowan son si-kayo ey am-taray kad-an nen Cristo, ja kowan sha ey jo asen, karejo patpati-en. <sup>24</sup> Ta eshakil aliy toon kowan sha ey si-kara si Cristo, ono kowan sha ey si-karay para padto nen Apo Shiyos, jet eshakil i dag-en shen kaskashaaw wa aramid ono milagro. Jet no mebedin, kowan sha pay ey i-owapan sha ira sota too nen Apo Shiyos ja pinidi to. <sup>25</sup> Naka pan-isigod i banshaan son si-kayo say amta-en joy mepe-samak ali.

<sup>26</sup> “Isonga no ikowan sha son si-kayo ey wára si Cristo shima dogad ja naybetaw shi ili, karekayo ondaw; ono no ikowan sha ey nan-emot si Cristo shi naydaem ni baley, karejo kari patpati-en. <sup>27</sup> Ta say itsora ni idaw ali mowan nonta kowan ni padto ey Anak ni Too, inges toy bagidat ja silwan to shagos i emin na naykayang.

<sup>28</sup> “No toway kad-an ni etey ya bangkay, si-kato ngoy kesa-nopan ira ni kawang.

<sup>29</sup> “Jet sotan alin timpo ja kek-shengan nonta digat, ma-shep shagos sota niyal ni sekít tan bolan, jet sama talaw, mepedaspas ira, jet sama naykayang, mebediwan i itsora to. <sup>30</sup> Sajay nin i mepesamak, asan wára ma ali

sota amta-an jo so ey emanmotok sota kowan sha ey Anak ni Too ja medepo alid dangit. Jet emin na kilasin too shiya dobong, mandeshingit ira, ta mismon asen sha-ak ja ma-odopan ali ni kolpot, tan asen sha pay i itsora ni bakdang kon emenenilin pasiya, tan asen sha ngo sota podnon panakabalin ko. <sup>31</sup> Jet sotan alin imotok ko, wáray makedsang nga janget ni trompita jet ibetkag ko iray anghil ko ja mengolnong ira nonta pini-dik ja took shi emin na sakop niya dobong.”

<sup>32</sup> Jet si Jesus, arig mowan i inpasing ton engilewag nonta idaw to mowan ali, ja kowan to ey, “Nemnem jo kari sota kadasan na kowan sha ey higos. Shiya kad-an tayo, no asen jon ondongkey sota panga to, asan somimit mowan i bolong to, am-tayo ma ey shanshani sota timpo ni petang. <sup>33</sup> Inges niyay aliy i-olik. No asen jon emanketongpal ira ja inkowan ko la, amtayo ma ey sota timpon idaw ko ali, shanshani ma, ja singa wára-ak nodta pasbol. <sup>34</sup> Podno iyay ya ikowan ko son si-kayo. Saja ira too niman, eg ira nin metey, no diket saken shen emin ira jay ya mepe-samak ali. <sup>35</sup> Sama naykayang tan saja dobong, mebedin na ma-enshi, nem saja esel la inkowan ko, kenshat ta metongpal, ja eg ma-enshi.

<sup>36</sup> “Nem si Apo Shiyos bengat i maka-amta ni timpo ja ketongpal niyay ya inkowan ko. Angken sama anghil shi dangit, tan sikak ja Anak nen Apo Shiyos, eg mi ngo amta. <sup>37</sup> Arig to sota timpo nen Noe. Ta sota aramid ni totoo nontan den timpo to, inges to met laeng i aramid ni too ni imotok mowan ali nonta kowan ni para padto nonta bayag da ey Anak ni Too, jet inges to mowan i idibag sha. <sup>38</sup> Ta nonta aneng pay

laeng sota dayos, enshiy shaka panshanagi ni inakew: ireka mengangan, ireka menginom, ireka man-asawa — ingkato nonta simabi sota timpon simekep ma si Noe nodta barko to. <sup>39</sup> Jet sotan iren too, dimibag ira ni insabi ali nonta dayos, jet dinedjos to iren emin. Jet angken ngon sota idaw mowan ali nonta kowan ni para padto ey Anak ni Too, inges niyay ja palibdibag. <sup>40</sup> Jet sota timpon idaw ko ali, odopen koy eshom ma too, nem sota eshom, bay-an ko. Et no kaspangarigan sota showen daki ja maytompok ja wared payew, sota sakey, may-odop son si-kak, nem sota sakey, mebay-an. <sup>41</sup> Angken ngon sota showen biin maytompok nga emengiding, sota sakey may-odop son si-kak, nem sota sakey, mebay-an.

<sup>42</sup> “Pansagana kayo, ta eg jo amta no nganton timpo i idaw ali nen Apo jo. <sup>43</sup> Sajay i nemnemen jo: say imotok ko ali, kompormin oras ja inges toy kaidaw ali nonta mengibot shi baley. Jet no sota makabaley ket amta to koma no nganton oras ni edabi i idaw ali nonta mengibot, kenshat ta mansekana, eg to itolok ka onsekep sota mengibot shi baley to. <sup>44</sup> Isonga angken si-kayo, mesepol la mansekana kayo, ta si-kak ja kowan ni para padto ey Anak ni Too, ondawak alin palibdibag.” Kowan nen Jesus.

<sup>45</sup> Jet wara pay i arig ja inkowan to, ja kowan to ey, “Sota baga-en ja mepiyal ja amta toy toka dagdag-a, si-katoy piyalen nonta apo ton mengimanshal ni kokowa to, tan no timpo ni pengi-idaw ni balon ira nonta kait ton baga-en, si-katoy kai piyal nen apo to. <sup>46</sup> Jet no sotan na baga-en ket maramen eman-obda ey onmotok ali sota apo to, mapteng i konkona ton i-akan nonta apo to. <sup>47</sup> Agpayso iya

ikowan ko son si-kayo. Sotan na baga-en, no sebi-en nen apo ton eman-obda, si-katoy piyalen nen apo to ja en mengimanshal nonta emin na kokowa to. <sup>48</sup> Nem apil i pesing to so nonta sakey ya baga-en ja maledamsis, ja makakowan ey, ‘Angkena, ta sota apok, metaktak alin onmotok’, <sup>49</sup> isonga ishogi ton sepsepdaten ira sota kait ton baga-en, tan mesiwat ja mekiladdadsak so nonta ira nankeboteng. <sup>50</sup> Kakaasi sotan na baga-en, ta sota apo to, on-oli alin palibdibag, jet ondibag sota baga-en tep eg to amta sotan na i-oli ali nonta apo to. <sup>51</sup> Jet sotan na baga-en, pekishosa to so nonta ira kait ton o-owap i shaka pansilbi. Jet shiman, mannengnengis i totoo tan panngedetnget sha i sangi sha ni digat sha.” Kowan nen Jesus.

## 25

<sup>1</sup> In-arig pay nen Jesus i timpon idaw to ali, ja kowan to ey, “Say arig ni pesing nen Apo Shiyos shi pantoshayan to, sajay ya istoriya. Wara konoy sampolon memeshikit ja engita-jon ni kingkira ja sha seskeshen sota dakin mengesawa, say mekidaw ira son si-kato shi kasal. <sup>2</sup> Sota dima so nonta ira memeshikit, waray nemnem sha, isonga nansagana ira; nem sota dima, enshi. <sup>3-4</sup> Sota ira nansagana, engita-jon ira ni silew shen kingki jet engita-jon ngo pay ira ni maykalka nodtan say eg ma-shep. Nem sota eg nansagana, engita-jon bengat ira ni kingkira. <sup>5</sup> Idi etaktak sota daki ja eg dimaw alin shagos, jimo-kew ira sota memeshikit jet na-ogip ira. <sup>6</sup> Nem idi kawa ni dabi, waray kimeljaw ja kowan to ey, ‘Bangon kayo! Malali sota daki! Jo aspol!’ <sup>7</sup> Jet emin ira sota memeshikit, bimangan ira, jet tinotongan sha sota kingkira. <sup>8</sup> Sota ira memeshikit ta

eg nansagana, kowan sha so nonta ira kait sha ey, 'Pangi-kan kayo ka di ni maykalka shiya kingki mi tep emanka-shep.' <sup>9</sup> Nem sota ira memeshikit ta nansagana, kowan sha ey, 'Enshi, ta baka et ey eg on-anay iyay ja para son si-kami no i-aknan mikejo. Daw kayo et shima kantina jet kayo panongkal ni osalen jo ngo.' <sup>10</sup> Nem idi dimaw da iren en menongkal, mimotok ali sota dakin mengesawa, jet sota ira memeshikit ta nansagana, si-karay ekidaw so nonta daki shima pankasalan to. Jet idi simekep ma ira nodta baley, naydekeb ngo mala sota sakepan. <sup>11</sup> Idi naksheng ma iyay, sota ira memeshikit ta eg nansagana, mimotok ngo ma ira di, jet kowan sha ey, 'Apo! Apo! Ilo- kati jokami!' <sup>12</sup> Nem kowan nonta dakin mengesawa son si-kara ey, 'Say agpayso, enshiy biyang ko son si-kayo.' " Sajay i arig ga inkowan nen Jesus jet intoloy ton kowan to ey, <sup>13</sup> "Isonga say kowan ko son si-kayo, mesepol la esagana kayo ni olay, ta eg jo amta sotan alin akew ja idaw ko di."

<sup>14</sup> Wara pay i inkowan ton arig say man-edisto sota ira too to ni eg to pay laeng ali imotok, ja kowan to ey, "Waray sakey ya baknang ja waray dawan ton nay-arawin ili, isonga inpa-odop to ira di sota baga-en to jet inpiyal to sota ira kokowa to son si-kara. <sup>15</sup> Sota sakey, in-aknan to ni dimen dibo, jet sota maykadwa, in-aknan to ni showen dibo, jet sota maykatdo, in-aknan to ngo ni sandibo, ta say in-akan to son si-kara, sota mebedin na kabaalan shen ibiyaki, asan ka-edaw shi dawan to. <sup>16</sup> Jet sota in-aknan to ni dimen dibo, dimaw wa shagos ja to inbiyaki, jet nandobli sotan na pilak. <sup>17</sup> Sota showen diboy inewat to, to inbiyaki ngo jet nan-

dobli sotan na pilak. <sup>18</sup> Nem sota sandiboy inewat to, to in-emot ja inbeka sotan na pilak ni apo to. <sup>19</sup> Idi edabas day ebayag ga timpo, sota apo ira nonta baga-en, mimotok ali jet to tinonton sota pilak ja inpiyal to so nonta ira baga-en to. <sup>20</sup> Jet sota in-awatan to so ni dimen dibo, dimaw ali ja inta-jon to sota dimen dibo ja inbiyaki-an to, jet kowan to so nonta apo to ey, 'Apo, sota dimen dibo ja in-awat mo son si-kak, nak inbiyaki jet nandobli.' <sup>21</sup> Jet sota apo to, kowan to ey, 'Siya, mapteng i dingkam; mebedin ken mepiyal la baga-en ko. Kaka mepiyal la mengimanshal ni otik ka banag, isonga niman, ebadeg i ipiyal ko son si-kam ma imanshal mo. Kala, mayda-kam ka ja meki-imdeng son si-kak shi baley ko.' <sup>22</sup> Jet sota showen dibo i inewat to, dimaw ngo ali, jet kowan to son apo to ey, 'Apo, sota in-awat mo son si-kak ja showen dibo, nak inbiyaki jet nandobli.' <sup>23</sup> Jet kowan nonta apo to ey, 'Siya, mapteng i dingkam; mebedin ken mepiyal la baga-en ko. Kaka mepiyal la mengimanshal ni otik ka banag, isonga niman, ebadeg i ipiyal ko son si-kam ja imanshal mo. Kala, mayda-kam ka ja meki-imdeng son si-kak shi baley ko.' <sup>24</sup> Sota sandibo ngoy inewat to, dimaw ngo ali jet kowan to son apo to ey, 'Apo, amtak ey si-kam ket palado ken too, ta angken sota aliwen molam, moka pan-epita, jet angken sota in-obda-an ni eshom, moka pay kepan-al-a. <sup>25</sup> Isonga etakotak jet nak inbeka ja in-emot sota pilak ka inpiyal mo son si-kak. Iyay, jet alam ta kokowam.' <sup>26</sup> Nem sota apo to, sinongbatan to ja kowan to ey, 'Si-kam, enshiy am-amtam, esarot ka! Amtam met gayam ey naka pan-epita i angken aliwen molak,

tan naka pan-al-a i in-obda-an ni eshom. <sup>27</sup> Jet apay nga eg mo inbangko itan na pilak, say niman alin inmotok ko, wáray ewaten kon patang to? <sup>28</sup> Alejo ita pilak ka inpiyal ko son si-kato, jet i-kan jo so nonta toon kawad-an ni dimen dibo! <sup>29</sup> Ta sota ira wa-wa-shanan, may-aknan pay, say eshakil la pasiya i si-kato. Nem sota ootik anan, angken sota oltimon wára son si-kato, ma-da pay. <sup>30</sup> Jet sotan na baga-en ja enshiy silbi to, iteknal jo shima embolinget, jet shiman, mannengnengis i totoo, tan pannedetnget shay sangi sha ni digat sha! ” Sajay i arig ga inkowan nen Jesus.

<sup>31</sup> Kowan to pay ey, “Sota timpon idaw mowan ali nonta kowan ni para padto ey Anak ni Too, ondaw ali ja inges tos Apo Shiyos. Emin sota anghil, may-odop ali son si-kato, jet isaad toy pantoshay to ja enshiy to kay-ingesan. <sup>32</sup> Sotan alin timpo, emin na totood ka-ili-ili, mesa-nop ired sango-an to, jet pandinasin to ira, ja inges toy kepesing nonta emanbantay ni kalniro, ja toka idasin ira sota kanshing so nonta ira kalniro to. <sup>33</sup> Jet say pesing nonta kowan ni para padto ey Anak ni Too, isingpet ton ipiig sota kalniro to shima petek ni kanawan to, nem sota kanshing, ibiyang ton idasin shima petek ni kanigid to. <sup>34</sup> Jet sota ari, ikowan to so nonta ira insingpet ton wára nodta petek ni kanawan to ey, ‘Kalejo, si-kayon kinaasi-an nen Amak! Si-kayoy mayda-kam ja mekitewid shima pantoshayan nen Apo Shiyos; naysagana ngo eshan para son si-kayo nonta eg pay laeng epalsowa iya dobong. <sup>35</sup> Kaasi-an tokejo, ta nonta naka man-ekang, pinekan jowak, tan nonta na-kewak ni shanom, inpan-inom jowak; nonta dimawak shi ili jo ja enshiy amtak ja pan-

iyanan ko, sinintil jowak; <sup>36</sup> jet nonta enshiy barok, binesho-an jowak; nonta nansakitak, jowak binisita, asan nonta naybaloshak, jowak inon-an.’ <sup>37</sup> Jet sotan iren inewat ni ari, onsongbat ira ja kowan sha son si-kato ey, ‘Apo, enshi met i amta min mi dingka so ira niya kowan mo ey pinekan mika nonta na-agang ka, ono inpan-inom mika nonta na-kew ka ni shanom. <sup>38</sup> Enshi met i amta min misoka sinintilan, ono misoka binesho-an. <sup>39</sup> Enshi met i amta min misoka binisita-an ni insakit mo ono inkabedod mo.’ <sup>40</sup> Jet onsongbat sota ari ja kowan to ey, ‘Podno iya ikowan ko son si-kayo. Sajay den inkowan ko, dingkayo so ira nonta kabeba-an na kait ko, jet maybidang ey si-kak i dingka-an jo so nontan.’ <sup>41</sup> Jet ikowan nonta ari ngo so nonta ira inbiyang ton wared petek ni kanigid to ey, ‘Ki-nan kayod ja kad-an ko! Meshosa kayo shima apoy ya shalang to ni olay ingkatod ingka! Sajay i naysagana para so nen Satanas, pati sota ira betkag ton anghil. <sup>42</sup> Sajay i pesing ko ta eg jowak kinaasi-an. Nonta naka man-ekang eg jowak pinekan, nonta na-kewak ni shanom eg jowak inpan-inom, <sup>43</sup> nonta dimawak shi ili jo, ja enshiy amtak ja nak pan-iyanan eg jowak sinintil, nonta enshiy barok eg jowak binesho-an, nonta naka mansekit tan nonta naybaloshak, eg jowak binisita.’ <sup>44</sup> Jet onsongbat ngo ira ja kowan sha ey, ‘Apo, enshi met i amta min mi so inowayan son si-kam ni inka-akang mo, ono inka-kew mo ni shanom, ono sota kowan mo ey enshiy amtam ma pan-iyanan mo, ono enshiy barom, ono insakit mo, ono inkabedod mo!’ <sup>45</sup> Jet songbatan to ngo ira ja kowan to ey, ‘Agpayso iya ikowan ko son si-kayo. Sota eg jo so insintil so ira niya kabeba-

an na kait ko, maybidang ey si-kak i eg jo sinintil.’<sup>46</sup> Jet sajay ira, meshosa ira shima shosa-an ingkatod ingka. Nem sota ira inewat to, may-aknan ira ni biyag ja enshiy to engintegangan.” Kowan nen Jesus.

## 26

*Nantatabalanan nonta makakontra son Jesus i pesing shen memono son si-kato*

<sup>1</sup> Idi enaksheng nga inkowan nen Jesus iyay ya emin, waray inkowan to so nonta ira too to, ja kowan to ey,<sup>2</sup> “Amtayo, no ondabas i showen akew, medeka sota piyasta tayon Hodiyo ja kowan tayo ey Paskowa, jet si-kak ja kowan ni para padto ey Anak ni Too, may-ewatak so ni toray say maydansa shi koros.”

<sup>3</sup> Jet nontan met laeng nga akew, sota ira apo ni papashi, tan sota ira pangolo ni Hodiyo, esanop ira shima ebadeg ga baley nonta kangeto-an na pari, ja si Kaypas.<sup>4</sup> Jet nantatabal ira no ngantoy pesing shen memono son Jesus, jet ninemnem sha ey olboren sha kono say ma-shel et mebono.<sup>5</sup> Nem say kowan sha, “Aliwen tayo itompong no timpon piyasta, ta baka et ey mankodo ira sota eshakel la totoo.”

*Shino-jagan ni sakey ya bii i toktok nen Jesus ni emanseng-ew wa dana*

<sup>6</sup> Jet nontan na akew, wares Jesus shi Bitania, shima baley nen Simon ja istay ebaybayang i bakdang to.<sup>7</sup> Wara ngoy biin dimaw ali son si-kato nodtan na baley, ja engita-jon ni palit ta danen emanseng-ew, ja nay-iyay shi botilja. Jet insho-jag to iyay shi toktok nen Jesus nonta maramen emengan si Jesus nodta damisaan.<sup>8</sup> Nem idi inon-an ira nonta too to, ireka mankotot ja kowan sha ey, “Ngantoy inpakewasan to so emo

nima dana?<sup>9</sup> No istay indako to koma sotan na dana, istay asdeg to komay tongkal to jet mebedin na may-ekan so ni nankebiteg.”

<sup>10</sup> Nem si Jesus, amta toy wared nemnem sha jet kowan to ey, “Baybay-iyo ita bii; karejo bedawen. Ta mapteng ita dingka to son si-kak.<sup>11</sup> Sota ira nankebiteg, wara ni olay son si-kayo, isonga mebedin na todongan jo; nem si-kak, eg mebedjag i pekikadwak son si-kayo.<sup>12</sup> Jet saja dana ja insho-jag to son si-kak, singa toka pan-isagana i kaybebka niya bakdang ko.<sup>13</sup> Jet agpayso iya ikowan ko son si-kayo. Shiya intiron dobong, no maytosho sota mapteng nga shamag maypangkep son si-kak, sajay ya dingka niyay ya bii, pekipedawag sha jet eg medidibkan.” Kowan nen Jesus.

*Bimaki si Judas ta ekitodag so nodta makakontra son Jesus*

<sup>14</sup> Sota sakey so nonta sampolan showen apostol nen Jesus, ja si Judas Iskariote i ngaran to, dimaw so nonta ira apo ni papashi ni Hodiyo,<sup>15</sup> jet kowan to son si-kara ey, “Ngarantoy i-akan jo son si-kak no itorok son si-kayo i kad-an nen Jesus?” Jet binayshan sha ni tedon polon palata.<sup>16</sup> Jet nontan ma, wara ni olay shi nemnem nen Judas Iskariote no toway pesing ton mengibaag so nen Jesus son si-kara.

*Sota ka-onoran na pekipangan nen Jesus so nonta ira apostol to*

<sup>17</sup> Idi shimanon sota pilmiron akew ni piyasta, ja shaka pengan nonta tinapay ya enshiy daok ton para debag, dimaw ira di sota apostol nen Jesus son si-kato, jet kowan sha ey, “Toway piyan mon mi pansekana-an ni penganan monem ma-shem, tep Paskowa ma?”

<sup>18</sup> Simongbat si Jesus ja kowan to son si-kara ey, “Daw kayo so

nen iman na polano shi Jerusalem jet no sebi-en jo, ikowan jo son si-kato ey, 'Kowan ali nen Maistoro ey mengan konod ja baley mo niman na piyasta, pati si-kamin too to, tep shanshani kono sota timpoo to.' ”

<sup>19</sup> Jet sota ira too to, pinatira sota kowan nen Jesus jet dimaw ira ja sha insagana sota kenen sha ni mama-shem nontan na Paskowa.

<sup>20</sup> Idi mama-shem mala, si Jesus tan sota sampolo tan showen apostol to, dimaw iren mengan nodtan, jet nansasango ired damisaan. <sup>21</sup> Idi maramen ireka emengan, kowan nen Jesus ey, “Agpayso iya ikowan ko son si-kayo. Waray sakey son si-kayo ja mengibaag son si-kak so nonta ira makakontra son si-kak!”

<sup>22</sup> Jet sota ira too to, ensakit ta pasiya i nemnem sha, jet kowan ni sakey tan sakey son si-kato ey, “Sipa apo? Aliwén si-kak emo?”

<sup>23</sup> Simongbat si Jesus ja kowan to ey, “Sota nay-okob son si-kak shi sakey ya pingkan, si-katoy mengibaag son si-kak. <sup>24</sup> Si-kak sota kowan ni para padto ey Anak ni Too jet kenshat ta metongpal sota padto ja naysolat nonta bayag da ni maypangkep son si-kak. Nem kaasi met laeng sotan na toon mengibaag son si-kak, ta meshosen pasiya! No dakaman to sotan na shosa, ikowan to shorog shi bakdang to ey, ‘Agpos et nem ekak koma nay-anak!’ ”

<sup>25</sup> Jet si Judas Iskariote ja mengibaag ali so nen Jesus, kowan to ey, “Sipa apo? Aliwén si-kak emo?”

Jet si Jesus, simongbat ja kowan to ey, “Siya, si-kam. Si-katoy inkowan mo.”

<sup>26</sup> Nontan na maramen ireka ma emengan, inda nen Jesus sota tinapay et nan-iyaman son Apo Shiyos, asan toka showashowa-a.

Jet in-akan to nodta ira apostol to, ja kowan to ey, “Iya, kan jo iyay. Sajay i bakdang ko.” <sup>27</sup> Jet idi naksheng, inda to sota tasa et nan-iyaman son Apo Shiyos, asan toka i-kan mowan son si-kara, ja kowan to ey, “Pan-i-inelbati jon inomen. <sup>28</sup> Ta sajay i shalak ja on-ayos ja pansigshan ni eshakil la totoo. Ta sota ketey ko di, si-katoy kepekawanan ni basol ni totoo, tan si-katoy panshoki-an nonta badon bilin nen Apo Shiyos so ni totoo. <sup>29</sup> Iyay i ikowan ko son si-kayo. Sajay i ka-onoran na penginom ko ni shanom niya obas, jet ekak nin menginom ingkatod onsabi sota penginom ko nonta badon shanom ni obas shima pantoshayan nen Apo Shiyos ja Amak; jet meki-inom kayo ngo.”

*Naysigod ja inkowan nen Jesus sota ngaaw wa pesing ali nen Pedro*

<sup>30</sup> Nankansiyon ira ni maypangkep ni panshedjaw sha son Apo Shiyos, jet idi naksheng, bimo-day ira nodtan na baley jet dimaw ired ma shontog ga kowan sha ey Olibas. <sup>31</sup> Jet si Jesus, kowan to so nonta ira too to ey, “Niman na dabi, ibaing jowak ka emin jet onbetik kayo, ta si-katoy ketongpal nonta padton naysolat nonta bayag da, ja kowan to ey, ‘Bono-en ko sota para bantay ni kalniro, jet sota emanoo-odop ja kalniro, mebodak ira.’ <sup>32</sup> Nem no meksheng i pan-ongal ko, mepangdo-ak ja ondaw shi Galilia ey si-kayo.”

<sup>33</sup> Nem si Pedro, kowan to ey, “Angken ibaing shaka ni emin na kait ko, eg taka mango ibaing.”

<sup>34</sup> Simongbat si Jesus ja kowan to ey, “Podno iya ikowan ko son si-kam Pedro: niman na dabi, isaot mowak ni memintedo ja ikowan mo ey eg mowak am-ama. Jet

no meksheng iyay, wára ngoy ontekok ja kawitan.”

<sup>35</sup> Nem si Pedro, kowan to ey, “Angken na pekibono shak son si-kam, ekak ikowan ey eg taka am-amta!” Jet sota ira kait to, sotan ngoy inonoran shen inkowan.

<sup>36</sup> Jet si Jesus, inodop to sota ira apostol to shima dogad ja kowan sha ey Gitsimani jet kowan to son si-kara ey, “Tongaw kayod jay, ta ondawak shima a-adaw ja nak nin manshewat son Apo Shiyos.”

<sup>37</sup> Inodop tos Pedro tan sota showen anak nen Sibidi, jet nontan ma, emankaikelkel-ewi. <sup>38</sup> Jet kowan to son si-kara ey, “Singa meteyak ni daringit ko! Shiyay kayo nin, eg kito ma-okip.”

<sup>39</sup> Idi naksheng nga inkowan to iyay, bintawan to ira ni ootik, jet nanshomog ja nanshawats son Apo Shiyos, ja kowan to ey, “Ama, no mebedin koma, karam ipalobos iyay ya pandikat ko di. Nem say kowan ko, sota piyan mo, si-katoy metongpal; aliwen sota kostok.”

<sup>40</sup> Idi imekwás, dimaw ja to inon-an sota too to jet simbi to iren na-ogip. Jet kowan to so nen Pedro ey, “Ngantoy? Na-ogip kayo. Apay, eg mebedin ja itoled joy jo-kew jo ni angken sakey ya oras bengat, ja kadwa-an jowak?

<sup>41</sup> Panmolakat kayo jet panshawats kayo ngo so nen Apo Shiyos ni kedsang say eg shakejo ebaken ni ngaaw wa onsabi son si-kayo. Sota nemnem jo, makedsang niman, nem baka et ey ma-ebak kayo tep ekapoy i bakdang jon ontongpal nonta wared nemnem jo met laeng.”

<sup>42</sup> Jet nonta maykepinshowa, dimaw mowan na en nanshawats son Apo Shiyos et kowan to ey, “Ama, no kenshat ta ipalobos mon mandikatak, i-onod ko sota piyan mon dag-en ko!” <sup>43</sup> Jet nay-oli mowan ali jet simbi to ira sota too

to ja na-ogip, ta epaladoy jo-kew sha. <sup>44</sup> Jet indekjas to mowan ira ja en nanshawats ni maykepintedo, jet iso met laeng i inkowan to ni shawat to son Apo Shiyos. <sup>45</sup> Idi naksheng, dimaw mowan ali so nonta too to, jet kowan to son si-kara ey, “Ngantoy? Piyan jon ma-okip ni olay? Edabas mala sota oras ja panshewats jo koma. Simabi ma sota timpo, jet si-kak ja kowan ni para padto ey Anak ni Too, may-ewatak ma so nonta ira toon nankekedsel. <sup>46</sup> Eti, ondaw kito. Iyay ma ali sota mengibaag son si-kak.”

*Si Jesus, inshel ma nonta makakontra son si-kato*

<sup>47</sup> Idi maramen eman-a-sel si Jesus, si Judas Iskariote ja sakey so nonta ira sampolo tan showa ja apostol nen Jesus, engolop ali ni eshakil la too. Sota eshom, nan-etak ira, tan sota ira eshom, waray peg-as sha. Sajay iren too, inbetkag ira nonta apo ni papashi tan pangolo ni Hodiyo. <sup>48</sup> Si Judas Iskariote, insigod ton inkowan so niya ira inodop to ey, “Say pengimatonan jo son Jesus, ongo-an ko; jet tengel jo.” <sup>49</sup> Isonga dimaw alin shagos si Judas so nen Jesus jet kowan to ey, “Apo, iyay ka gayam shiyay!” Jet inongo-an to ja singa agpayson ensemek to noman.

<sup>50</sup> Jet si Jesus, kowan to son Judas ey, “Kajem, ita et mangon wára ked jay?” Jet sota ira inodop ali nen Judas Iskariote, dimaw ira di jet tinngel shen shagos si Jesus ja a-shelen sha ma. <sup>51</sup> Jet nontan, sota sakey so nonta ira too nen Jesus, inokbos ton shagos i kampilan to jet kinimpas toy tangida nonta бага-en ni kangetoan na pari.

<sup>52</sup> Jet si Jesus, kowan to so nonta engimpas ey, “I-odim ita kampilan mo shita atip to, ta sota mengosal ni kampilan, kampilan met laeng i ipatey to. <sup>53</sup> Say kowan mo

emo, eg mebedin na mengshawak so nen Amak ni tolong? Say agpayso, no mengshawak son si-kato, mengibetkag alin shagos ni dinibon anghil. <sup>54</sup> Nem no sotan i dag-en ko, eg metongpal sota esel nen Apo Shiyos ja naysolat nonta bayag da ja nappadto. Isonga sajay niman i medeka.”

<sup>55</sup> Jet nontan met laeng, kowan nen Jesus so nonta ira eshakil la totoo ey, “No si-kak i kowan jo ey a-shelen jo, apay nga nan-etak kayo tan waray peg-as jo? Apay tolistanak? Inakew met ja wara-ak shima Timplo ja emantosh, ket apay nga eg jowak inshel nontan? <sup>56</sup> Nem mesepol la sajay i medeka ta say metongpal sota insolat ni para padto nonta bayag da.” Kowan nen Jesus.

Jet emin ira sota too to, namtik ira jet indekjias shes Jesus.

*Indaw shes Jesus nodta totoon pangolo ni Hodiyo*

<sup>57</sup> Jet si Jesus, indaw sha shi baley nen Kaypas ja kangeto-an na pari, tep shiman i na-olnongan ira nonta mamaistoro ni dinteg tan sota ira pangolo ni Hodiyo. <sup>58</sup> Jet si Pedro, tinned to ira nem bimetaw, ingkatod simabi nodta bo-dayan ni kangeto-an na pari jet simekep nodtan. Ekitongaw so nonta ira kowadja ta piyan ton asen no ngantoy pesing sha son Jesus.

<sup>59</sup> Nontan, sota ira apo ni pashish tan sota ira esa-nop pa toray, ireka mengenap ni ikowan shen basol nen Jesus, angken o-owap koma, say waray kabol la ikowanan sha so ey si-katoy kebono-an to. <sup>60</sup> Nem enshiy shaka sepolen koston basol to. Angken eshakil sota sistigon dimaw ali ja o-owap i kowan sha, enshiy eki-det kari. Nem shi ka-onoran, waray shown dimaw ali, <sup>61</sup> jet kowan sha ey, “Sajay ya

too, kowan to ey mebedin ton sheshalen kono ima Timplo nen Apo Shiyos jet i-oli to kono mowan na dag-en ni tedon akew.”

<sup>62</sup> Jet sota kangeto-an na pari, dimayat et kowan to son Jesus ey, “Jet enshiy isongbat mo? Sajay met i kowan ira niya too ey basol mo!” <sup>63</sup> Nem si Jesus, imeg-eket. Jet sota kangeto-an na pari, kowan to ey, “Ipodnom no agpayson sikam sota Anak nen Apo Shiyos ja inkari to nonta bayag da ey ibetkag to alin mengisedakan! Si Apo Shiyos, wara ni olay ingkatod ingka jet si-katoy pansangba-an mo!”

<sup>64</sup> Simongbat si Jesus ja kowan to ey, “Sota inkowan mo, si-kato. Nem say kowan ko ngo, si-kak sota kowan ni para padto ey Anak ni Too, jet no ekay ali, ontongawak shi apit ni kanawan nen Apo Shiyos ja Manakabalin, jet asen jowak ali mowan ja metaksholan ni kolpot.”

<sup>65</sup> Jet sota kangeto-an na pari, bini-nik to sota baro to shorong ni bonget to, jet kowan to ey, “Eg mesepol la wara pay i sistigo! Intenengan jo met i inkowan to! Toka pa-so-is Apo Shiyos! <sup>66</sup> Jet ngarantoy piyan jon pesing son si-kato?”

Simongbat sota kait ton toray, ja kowan sha ey, “Anam ton mebono!”

<sup>67</sup> Jet tinopsha-an shay dopa to. Shinengpel sha, tan wara pay aliy eshom ma enedpak son si-kato, <sup>68</sup> ja kowan sha ey, “Tiga, sikam ma inebetkag kono nen Apo Shiyos ali, ikowan mo ga no moka idasin met laeng sota enengpel son si-kam?”

*Indibak nen Pedro ey am-amta to si Jesus*

<sup>69</sup> Nontan met laeng, emantongaw si Pedro nodta bo-dayan ni baley nonta kangeto-an na pari, jet waray biin baga-en nonta



kangeto-an na pari ja dimaw ali son Pedro, jet kowan to ey, “Angken si-kam met, eki-od-odop ka son Jesus ja i-Galilia.”

<sup>70</sup> Nem si Pedro, indibak to son si-karen emin, ja kowan to ey, “Enshiy am-amtak shita moka pan-ikowan!”

<sup>71</sup> Jet idi dimaw si Pedro nodta pasbol, wára mowan i biin kowan to so nonta ira toon wára nodtan ey, “Sajay ya too, eki-od-odop met so nen Jesus ja i-Nasarit!”

<sup>72</sup> Nem insaot nen Pedro mowan ja tinaksholan to ni sangba ja kowan to ey, “Angken pansangba-an ko, ekak am-amta itan na too!”

<sup>73</sup> Idi ekay, sota ira toon wára nodtan, dimaw ira di son Pedro jet kowan sha ey, “Ayshiy showashowa! Kenshat ta si-kam i sakey ya kait to did Galilia! Maimaton shi moka pengibodikas ni esel!”

<sup>74</sup> Nem si Pedro, nansangba mowan ja kowan to ey, “Angken shosa-en towak nen Apo Shiyos, no o-owap iyay ya inkowan ko la! Ekak am-amta itan na too!”

Jet nontan, timekok nga ag-payso sota kawitan.

<sup>75</sup> Jet idi intenengan nen Pedro, ninemnem to ma sota inkowan nen Jesus ey, “Isaot mowak ni memintedo, ja kowan mo ey eg mowak am-amta, jet no meksheng, wára ngoy ontekok ja kawitan.” Jet si Pedro, dimaw shima powisha ja epaladoy nangis to tep naydaw-an.

## 27

*In-awat sha mowan si Jesus so nen Gobinarol Pilato*

<sup>1</sup> Idi nonta emankewa-wa ma, emin ira sota apo ni papashi tan sota ira pangolo ni Hodiyo, nantatabtabal ira ni pesing shen pebono so nen Jesus. <sup>2</sup> Jet say inpasing sha, binedod sha et inpaidaw sha so nen Pilato ja gobinarol.

*Nanposos ma si Judas Iskariote*

<sup>3</sup> Jet idi inamta-an nen Judas Iskariote ey pebonora gayam si Jesus, emanbebawi ta naydaw-an na pasiya, isonga to in-oli sota pilak ka tedon polon palata so nonta ira toray ni Hodiyo, <sup>4</sup> jet kowan to ey, “Nanbasolak ka pasiya! Ta inbaag ko sota toon enshiy basol to son si-kayo jet niman pebonoyo gayam!”

Nem kowan sha son si-kato ey, “Enshiy mi naybiyangan nitan; olay toka ngo.”

<sup>5</sup> Jet inkespig to sota pilak ka palata shima naydaem ni Timplo jet bimo-day. Jet say inpasing to, dimaw ja en nanposos.

<sup>6</sup> Nem sota ira apo ni papashi, indara sota palata, jet kowan sha ey, “Ngantoy pesing tayo niyay ya pilak? Parit shi dinteg ja mayashom iyay ya pilak shima tado-an ni alos, ta sajay, tongkal ni biyag ni too.” <sup>7</sup> Jet ninemnem sha ey sotan na pilak, itongkal sha nonta bo-day ya sigod ja kepengeda-i ni ma-emag ni banga, jet inpanbalin shen kamposanto ja kaybebka-an ni bisita shi Jerusalem ja metey shiman. <sup>8</sup> Isonga sotan na bo-day ja intongkalan sha so nonta pilak, inpanngaran ni tototo ma ni “Baley ni shala”, jet ingkato niman, sikatoy ngaran to. <sup>9</sup> Sajay i tongpal nonta padto nen Jirimias nonta bayag da, ja kowan to ey, “Say kowan nonta totohay ni Israel ey koston tongkal nontan na too, tedon polon palata. Jet idi al-en sha, <sup>10</sup> inbayad sha nonta bo-day ja kokowa nonta para amag ni banga, ta si-katoy bilin nen Apo Shiyos son si-kak.”

*Binistigal nen Gobinarol Pilato si Jesus*

<sup>11</sup> Jet nonta wares Jesus shima sango-an nen Gobinarol Pilato, sota gobinarol, inbag-an tos Jesus

ja kowan to ey, “Jet agpayso ja si-kam sota ari ni Hodiyo?”

Simongbat si Jesus ja kowan to ey, “Sota inkowan mo, si-kato.”  
<sup>12</sup> Nem idi wáray inkowan ira nonta apo ni papashi, tan sota ira pangolo ni Hodiyo ja kowan sha ey basol to, eg simongsongbat.

<sup>13</sup> Jet si Pilato, kowan to so nen Jesus ey, “Apay eg mo aya itenengan ima kowan sha ey eshakil la basol mo? Apay nga eg ka simongsongbat?”

<sup>14</sup> Nem si Jesus, angken sakey so nonta kowan sha ey basol to, eg to sinongsongbatan. Jet sota gobinarol, emesshaaw wa pasiya.

<sup>15-19</sup> Amta nen Gobinarol Pilato ey apal ira nonta pangolo ni Hodiyo son Jesus i in-awatan sha son si-kato, isonga piyan ton ibolos si Jesus. Tan sakey pay ya kabol la ibolosan to so koma, wáray inbetkag nonta asewa to ja en engikowan son si-kato ey, “Si asewam, kowan to ey kareka kono mandeka ni kompormi so nitan na too, ta enshiy basol to. Nandigat pay kono si asewam nonta edabi ta asdeg toy kinokokip to ni maypangkep nitan na too, jet emankaikelkel-ewi kono pay.” Isonga ninemnem nen Pilato sotaapal ira nonta pangolo ni Hodiyo son Jesus i in-awatan sha son si-kato, isonga piyan ton ibolos si Jesus. Tan sakey pay ya kabol la ibolosan to so koma, wáray inbetkag nonta asewa to ja en engikowan son si toka pesing ni olay no timpon piyasta ni Paskowa, ja wáray sakey ya piri-son toka ibolos ja piyan ira nonta totoon ibolos to. Isonga idi nalonong ira sota totoo, kowan nen Pilato son si-kara ey, “Sipay piyan jon ibolos ko? Si Barabas, ono si Jesus ja inbetkag kono nen Apo Shiyos son si-kayon Hodiyo?” (Jet saja si Barabas ja inngadnan nen

Pilato ja panpidi-an ni totoo, si-katoy sakey ya kakedselan na balod nontan.)

<sup>20</sup> Nem sota ira apo ngo ni papashi tan sota ira pangolo ira ni Hodiyo, intod-an sha sota eshakil la totoo ey say ikowan sha so nen Pilato ja ibolos to, si Barabas; jet si Jesus, angken ikowan sha ey si-katoy mebono kono. <sup>21</sup> Jet sota gobinarol, pininshowa ton inbagan ira mowan sota totoo, ja kowan to ey, “Jet sipa so ira niya shownen too i piyan jon ibolos ko?”

Simongbat ira sota totoo, ja kowan sha ey, “Si Barabas!”

<sup>22</sup> Jet si Pilato, kowan to son si-kara ey, “Jet no sotan i kowan jo, ngaranto ma i dag-en ko so nen Jesus ja inbetkag kono nen Apo Shiyos son si-kayo?”

Jet emin ira sota totoo, kowan sha ey, “Paidansam shi koros!”

<sup>23</sup> Kowan mowan nen Pilato son si-kara ey, “Ngantoy? Ngaran ni dingka ton ngaaw aya?”

Nem ema-ma et i keljaw sha ja kowan sha ey, “Paidansam shi koros!”

<sup>24</sup> Idi indasin ma nen Pilato ey enshiy pesing ton mengibediw son Jesus, tan ninamnama to pay ey wára aliy kolo ja medeka, en nanbolo shi sango-an ira nonta totoo, ta si-katoy ogadira nontan da no piyan shen ipa-sas ey enshi may kaybibiyangan sha shi dag-en ni eshom ma too. Isonga inkowan to ey, “Enshiy basol ko no mebono iyay ya too; olay tokajo ngo!”

<sup>25</sup> Jet emin ira sota totoo, kowan sha ey, “Owen, si-kamiy makamta, tan saja annak mi di!”

<sup>26</sup> Jet nontan ma, si Pilato, say inbolos to, si Barabas. Jet inpasepdad to nin si Jesus asan toka i-wat so nonta ira solsharo ja sha idansa shi koros.

*Dedamsis i inpaspasing ira nonta solsharo son Jesus*

<sup>27</sup> Sota ngo ira solsharo nen gobinarol, indara si Jesus jet indaw sha shima mismon baley nen gobinarol. Inolnong shen emin sota kait shen solsharo jet dinimot shes Jesus. <sup>28</sup> Sina-datan shay baro to ni singa baro ni ari ni Roma, ja say kolor to, sota kowan sha ey violet. <sup>29</sup> Tan say inpasing sha pay ni dedamsis sha, in-inges sha ni singa ari. Isonga engosikos ira ni wákal la nasbitan ja inpaidnget sha son si-kato, ja singa korona to. Engala pay ira ni pating, ja inpa-egnira shi kanawan to, asan ma ira nantalimokod shi sango-an to, ja kowan sha ey, “Onpalapalad ka koma, ari ni Hodiyo!” <sup>30</sup> Tinopsha-an sha pay jet indara sota pating ja inegshian to et inpeg-as shed toktok to. <sup>31</sup> Jet idi naksheng sota inpasing shen dedamsis, dinosora sota istay inpaibaro sha, jet in-oli sha met laeng sota sigod ja baro to. Jet inbo-day sha ma ja sha idansa shi koros.

#### *Indansara si Jesus shi koros*

<sup>32</sup> Idi maramen ireka man-ekad, naytompong nga inapol sha sota toon si Simon i ngaran to, ja i-Sirini, jet inpasakbat sha et son si-kato sota koros ja kaydansa-an nen Jesus. <sup>33</sup> Jet nan-akad ira ingkatod simbira sota dogad ja kowan sha ey Golgota. (Jet say olog niya Golgota shi esel sha, toktok.) <sup>34</sup> Idi mimotok ired man, in-aknan sha ni adak ja edaokan ni empait ta agas ja eg to so deknanan ni ensakit. Nem idi ninamntan to, eg to koston inomen. <sup>35</sup> Jet indansara ma shi koros. Idi indansara ma, nanbobonot ira sota solsharo no sipay ontompong so nonta baro nen Jesus, asan shaka panbibingayi. <sup>36</sup> Idi naksheng ma, timongaw iren nanbantay son si-kato. <sup>37</sup> Nodta koros to ja petek ni toktok to, waray naysolat ja kowan sha ey si-katoy kabol ni

naydansa-an tod koros, jet say olog nonta naysolat, kowan to ey: “Sajay si Jesus ja ari ni Hodiyo.”

<sup>38</sup> Jet waray showen tolisan ja inpakibitay sha son si-kato shi sanseskey ya koros. Sota sakey, wara nodta petek ni kanawan nen Jesus, jet sota sakey, wara nodta petek ngo ni kanigid to.

<sup>39</sup> Sotan ngo ira toon emandebas ja man-ekad nodtan, ngini-ngingian sha, tan inbi-bi-wisan sha pay, <sup>40</sup> ja kowan sha ey, “Towa! Kowan mo ey Anak toka nen Apo Shiyos, tan kowan mo pay ey she-shalen moy Timplo jet bengonen mo mowan ni tedon akew! Apay nga eg mo isalakan i bakdang mo shorog ja ondespag alid ta koros mo?”

<sup>41</sup> Jet angken sota ira apo ni papashi ni Hodiyo, tan sota ira mamaistoro ni dinteg, tan sota ira eshom ma pangolo ni Hodiyo, shaka sengsengkita, <sup>42</sup> ja kowan sha ey, “Insalakan to konoy eshom nem eg to met isalakan i bakdang to shorog! Kowan to ey si-kato kono sota ari ni Israel. Tiga, asen tayo noman no ondespag alid ma koros to say memati kito son si-kato! <sup>43</sup> Si Apo Shiyos konoy toka panshindi, jet asen tayo noman ka, no isalakan nen Apo Shiyos niman? Kowan to ey Anak nen Apo Shiyos, jet ma-sas ka no ensemek nen Apo Shiyos!” <sup>44</sup> Jet sota kait ton naykoros, ja tolisan, sajay met laeng i kowan sha ni dedamsis sha.

#### *Etey si Jesus*

<sup>45</sup> Idi nonta alas dosi ni kakawan, nanbolinget nodtan na dogad ingkato nonta alas tris ni mama-shem. <sup>46</sup> Jet idi nonta alas tris ni mama-shem, si Jesus kimeljaw ni makedsang, ja kowan to ey, “Eli, Eli, lama sabaktani!” Say olog niya kowan to, “Shiyos

ko, Shiyos ko, ngantoy in-owayan mowak so?”

<sup>47</sup> Nem sota eshom ma toon wára nodtan, idi intenengan sha sota kowan nen Jesus, kowan sha ey, “Toka emo panta-wála ali si Elias shi dangit.” <sup>48</sup> Jet sota sakey so nonta ira toon wára nodtan, kinano-an ton en engi-neng nonta singa bonot ja masbet ni shanom nodta empait ta tapey asan toka ipi-ket shi pating. Jet in-awat tod sobil nen Jesus. <sup>49</sup> Nem sota eshom, kowan sha ey, “Ekanin! Asen tayo ka no ondaw ali si Elias ja en mengisedakan son si-kato!”

<sup>50</sup> Jet si Jesus, inkedsang toy keljaw to mowan, asan ma mabosi.

<sup>51</sup> Jet nontan ma, sota masshel la kortina ja naysa-din nodta Kapatkan na kowadto shima naydaem ni Timplo, epi-kat ta nanshowa, manipod nodta naytapew ingkatod ma despag. Nanjegjeg pay jet angken sota engkakembaleg ga bato, nankepesjang ira, <sup>52</sup> tan angken sota ira naydiyangan ni etey, edo-katan ira. Jet nanbiyag ngo ira sota eshakil la too nen Apo Shiyos ja nanketey. <sup>53</sup> Idi nan-ongal ma ngo si Jesus ni maykatdon akew, bimo-day ngo ira sotan shima naydiyangan sha, jet dimaw ired ma Jerusalem ja en nanpa-sas so ira nonta eshakil la totoó.

<sup>54</sup> Sota kapitan ni solsharo, tan sota kait ton emanbantay son Jesus ja naykoros, dineknara sota jegjeg jet mismon inon-an shay epasemak. Eta-kot iren pasiya jet kowan sha ey, “Agpayso gayam ey sajay ya too ket anak ni Shiyos!”

<sup>55</sup> Eshakil ira sota bibiin wára nodta naybabetaw ja engikadmang niyay ya epasemak. Sajay iren bibii, tinodongan shes Jesus alid Galilia. <sup>56</sup> Jet say ngaran ira nonta eshom ma bibii ja wára nodtan, sajay: si Maria

Magdalena, si Maria ja ina nen Santiago nen Jose, tan sota asewá nen Sibidi ja ina nen Santiago nen Juan.

### *Indiyang sha si Jesus*

<sup>57</sup> Idi mama-shem mala, wáray dimaw alin baknang nga too ja manngeshan ni Jose ja edapod ili ni Jodia ja kowan sha ey Arimatia. Sajay ya too, emati met laeng so nen Jesus. <sup>58</sup> Dimaw so nen Pilato ja to kinshaw i bakdang nen Jesus, jet nontan si Pilato, inbilin to ey itolok ira nonta solsharo sota bakdang nen Jesus son si-kato. <sup>59</sup> Jet si Jose, impas toy bakdang nen Jesus nodta koros jet dinibotan to ni badon dopot ja empoti. <sup>60</sup> Saja si Jose, wáray badon inpaliyang ton bato ja kowan to ey kaydiyangan to kono nem metey. Shiyay i inilawan to so ni bakdang nen Jesus. Inodin to sota ebadeg ga baton tangeb nonta diyang, jet inpokit to nodta sakepan, asan toka ilekjas. <sup>61</sup> Jet si Maria Magdalena, tan sota sakey ya si Maria, timongaw ira nin nodta mamang ni diyang.

<sup>62</sup> Idi nonta maykadwen akew, ja naksheng ma sota akew ni shaka pansekana ni piyasta ni Paskowa, sota ira apo ni papashi, tan sota ira Parisiyo, nan-o-odop iren dimaw so nen Pilato, <sup>63</sup> jet kowan sha ey, “Apo, eg mi dibkan sota inkowan niman na toon mawap nonta mabiday pay laeng, ja kowan to ey no maykatdon akew, manbiyag mowan kono. <sup>64</sup> Isonga pabantay mon pasiya ima naydiyangan to ingkatod maykatdon akew, ta baka sota ira too to, ondaw iren sha ibetik ima bakdang to, asan sha ikowan mango ni totoo ey nan-ongal. Nakol ni memama ja eshakil i may-owapan ey say nonta pilmiro.” Kowan sha son Pilato.

<sup>65</sup> Jet si Pilato, kowan to son si-kara ey, “Eti, daw kayo, et pangodop kayo ni solsharo. Ipeshas

joy kabaalan jon memantay ja pasiya.”

<sup>66</sup> Jet dimaw ira nodta diyang et sha pinokit ja siningpetan na pasiya sota tangeb to, tan inpabantay sha pay ni solsharo sota diyang.

## 28

### *Nan-ongal si Jesus*

<sup>1</sup> Nem idi agsapen pasiya ni Domingko, si Maria Magdalena tan sota sakey ya Maria, dimaw ira ja sha on-an sota naydiyangan nen Jesus. <sup>2</sup> Jet nontan, ebigla ja waray makedsang nga jegjeg, ta waray anghil nen Apo Shiyos ja dimespag alid dangit, jet to pinodig sota baton naytangeb nodta diyang, jet si-katoy tinongawan to. <sup>3</sup> Say itsora ni dopa nonta anghil, singa bagidat, tan say baro to, empotin pasiya. <sup>4</sup> Isonga sota solsharon emanbantay, ireka manbebayedbed ni takot sha et singa etey ira. <sup>5</sup> Nem sota anghil, kowan to so nonta bibii ey, “Karekayo ontakot; amtak ey say piansa jon on-an, si Jesus ja naydansa shi koros. <sup>6</sup> Nem enshid jay, nan-ongal da! Nemnem jo kari: inkowan to met nontan da. Kalejo, jo asas sota istay inparokolan sha so. <sup>7</sup> Jet no asen jon enshi, daw kayon shagos, jet jo ikowan so nonta ira too to ey nanbiyag mowan da, jet niman, ondaw den mepangdo ey si-kayo shi Galilia, jet shiman i asanan jo so! Karejo dibdibkan iyay ya inkowan ko son si-kayo.” Kowan nonta anghil so nonta bibii.

<sup>8</sup> Jet nontan met laeng, indekjas ira nonta bibiin shagos sota diyang, jet nanbetik iren sha ikowan so nonta ira too nen Jesus. Ireka mankel-ew, nem ebadeg ngoy imdeng sha nonta ireka mandaw. <sup>9</sup> Idi nonta wara ired shalan, ebigenen nay-aspol si Jesus son si-kara jet kowan to

ey, “Siya, talna i mewesha son si-kayo!” Jet sota ira bibii, nan-shomog ira ja inegshi-an sha sota sedi to, jet nanshayaw ira son si-kato. <sup>10</sup> Jet kowan nen Jesus son si-kara ey, “Karekayo ontakot. Daw kayo, jo ikowan so nonta ira took ja naka ikarin a-akik ey ondaw ired Galilia, jet ikowan jo ey shiman i asanan sha-ak so.” Kowan nen Jesus.

<sup>11</sup> Idi nontan na emandaw ira jay ya bibii, sota eshom ma solsharo ja istay emanbantay nonta diyang, dimaw ira ngo shima siyodad jet sha inkowan so nonta ira apo ni papashi sota emin na epasemak. <sup>12</sup> Jet esa-nop ira sota apo ni papashi, tan sota ira eshom ma pangolo ni Hodiyo, jet nantatabtal ira ni pesing sha. Jet nontan ma, ninemnem sha ey i-aknan sha ira sota solsharon nabantay nonta diyang ni ebadeg ga pilak, <sup>13</sup> asan shaka ira bilina, ja kowan sha ey, “Ikowan jo so ni totoo ey sota ira too nen Jesus, dimaw ira di nonta edabin nasjep kayo ni ogip, jet kinibot sha sota bakdang to. <sup>14</sup> Jet no bilang ey amta-an nen gobinarol iyay, sikamiy mismon mekitbal son si-kato; enshiy jo panshanagan.”

<sup>15</sup> Jet sota ira solsharo, indara sota pilak jet pinatiren inkowan sotan na inbilin ni pangolo ni Hodiyo son si-kara. Jet ingkato niman, sotan i kaikokowan ni eshom ma Hodiyo maypangkep ni inka-enshi nen Jesus shima diyang.

*In-awat ma nen Jesus sota kaonoran na bilin ton epateg so nonta ira apostol to*

<sup>16</sup> Jet sota ira sampolo tan sakey ya apostol nen Jesus, dimaw ira nodta shontog shi Galilia ja inkowan nen Jesus son si-kara ey dawanan sha. <sup>17</sup> Jet idi inon-an sha si Jesus nodtan, nantalimokod

iren emin ja nanshayaw son si-kato, nem sota eshom, waray showashowa sha. <sup>18</sup> Jet si Jesus, imesop son si-kara, jet kowan to ey, “Say inkowan nen Apo Shiyos, si-kak i mengitoshay ni emin na wared dangit tan shiya dobong. <sup>19</sup> Isonga ikowan ko son si-kayo ey daw kayo shi emin na ili shiya dobong, jet itoshoyo i may-pangkep son si-kak say memati ira. Bonjagi jo ira shi ngaran nen Apo Shiyos ja Amak, shi ngaran ko ja Anak to, tan shi ngaran ni Ispirito Santo. <sup>20</sup> Jet itod-iyo pay ira say emin sota inbilin ko son si-kayo, si-kato ngoy pati-en sha. Jet nemnemnem jo ey wara-ak ni olay son si-kayo, ingkatod pan-tepos niya dobong.” Kowan nen Jesus.

## SOTA INSOLAT NEN SAN MARCOS JA MAYPANGKEP NI KABEBIYAG TAN TORO NEN JESUCRISTO

*Intoro nen Juan ey ibebawi ni totoo i basol sha*

<sup>1</sup> Sota mapteng nga shamag maypangkep son Jesucristo ja Anak nen Apo Shiyos, <sup>2</sup> nayshogi nonta engitosho si Juan ja para bonjag. Si-katoy nantongpalan nonta padto nen Isaias nonta bayag da, ja esel nen Apo Shiyos met laeng so ni Anak to, ja kowan to ey,

“Iyay sota ibetkag kon mepangdo ey say si-kam, jet si-katoy mengikowan nodta totoo ey mansekana ira ni imotok mo. <sup>3</sup> Si-kato ali sota toon ikeljaw toy esel to shima dogad ja nay-arawí shi kad-an ni totoo, ja ikowan to ey, ‘Pansagana kayo ta shanshani ma aliy imotok nen Apo! Singpet joy shalan na pan-akshan to!’ ”

<sup>4</sup> Siya, shima dogad ja nay-arawí shi kad-an ni totoo i nantoro-an nen Juan ja para bonjag. Say intoro to so ni totoo nontan, kowan to ey, “Mesepol la man-bebawi kayo pangkep ni basbasol jo, asan kayoka manpabonjag, say pekawanan nen Apo Shiyos i basol jo!”

<sup>5</sup> Sota ira tood Jerusalem tan eshom ma toon nanbaley shi probinsiya ni Jodia, ireka manisina-dat ja ondaw son si-kato. Inkowan shen emin i basol sha say pekawanan ira nen Apo Shiyos; isonga binonjagan ma ira nen Juan.

<sup>6</sup> Say baro nen Juan, nagshengan: sota na-abel la bowek ni animal ja kowan sha ey camel i

toka osala bengat, ja ebalkesan ni kolti. Jet nagshengan ngoy toka kena, ja shoron tan shanom ni dinowan.

<sup>7</sup> Say intoro pay nen Juan nontan, kowan to ey, “Wara aliy maysa-dat son si-kak ja ebad-badeg i panakabalin to nem say si-kak. Jet ekak pay maykeshi ja baga-en to koma ja mengkal ni sapatos to. <sup>8</sup> Dimawak ali ja shanom i inpamonjag ko son si-kayo, nem sotan aliy onbonjag son si-kayo ni Ispirito Santo nen Apo Shiyos.”

*Binonjagan nen Juan si Jesus*

<sup>9</sup> Nontan, edapo ngos Jesus shi Nasarit ja ili tod probinsiya ni Galilia ja ondaw shima kawad-an nen Juan, jet nanpabonjag son Juan shima pa-dok ni Jordan. <sup>10</sup> Idi kima-jat si Jesus nodta shanom, inon-an ton shagos ja edo-katan i dangit, tan inon-an toy Ispirito Santo nen Apo Shiyos ali ja singa inges toy itsora ni kalopati ja emandespag alin onsepa son si-kato. <sup>11</sup> Jet si Apo Shiyos, imesel alid dangit ja kowan to ey, “Si-kam i Anak ko et ensemek taka, tan si-kam i naka pan-imdengi.”

*Pineshas nen Satanas ja panbesol si Jesus*

<sup>12</sup> Jet nontan, inbetkag ni Ispirito Santo nen Apo Shiyos si Jesus ja ondaw shima dogad ja nay-arawí kawad-an ni too. <sup>13</sup> Jet wares Jesus shiman ni epat ta polon akew, jet pineshas nen Satanas ja panbesol. Saja dogad ja kawad-an nen Jesus nontan, eshakil i atap pa animal, nem nonta kawasha tod man, wara iray anghil ja emengajowan son si-kato.

*Sota inpangiroki nen Jesus ni obda to*

<sup>14</sup> Nontan ngo ma, naybalod si Juan ja para bonjag. Jet si Jesus, imoli shi Galilia, ja engitosho-an

to ma ni mapteng nga shamag ja edapo son Apo Shiyos. <sup>15</sup> Jet kowan to ey, “Niman sota naypadton timpo! Shanshani ma sota naypadton pantoshayan nen Apo Shiyos! Isonga baliwíyo sota ngaaw wa wared nemnem jo jet patriyo iya mapteng nga shamag ja naka pan-itoro!”

<sup>16</sup> Idi sakey ya akew, eman-ekad si Jesus shima kilig ni baybay shi Galilia jet inon-an to si Simon, tan si Andres ja agi nen Simon met laeng. Shaka pan-itekmal sota embanaw wa balshew sha shi shanom, tep nigay i shaka panbiyagi.

<sup>17</sup> Jet si Jesus, kowan to son sikara ey, “Kay-olop kayo son sikak et panbedin takejo ni took, jet mengolnong kayo ngo ni too ja itod-an jo para son si-kak. Aliwa malen sota pengolnong ni nigay i obdayo.”

<sup>18</sup> Jet idi inkowan nen Jesus iyay, indekjas nonta san-agin shagos sota embanaw wa balshew sha, jet si Jesus ma i nay-olopan sha.

<sup>19</sup> Intoloy shen nan-akad jet wara pay i inon-an nen Jesus ja san-agin anak nen Sibidi, ja si Santiago nen Juan. Wara ira nodta bangkara ja shaka pansingpeta sota balshew sha. <sup>20</sup> Jet si Jesus, tina-wal to ira sota showen sanagi ja manbedin ni too to. Jet nontan met laeng, indekjas sha shagos si amesha tan sama ira dinagboan ton too nodta bangka, jet ekiodop ira son Jesus, ja nanbalin iren too to.

*Inpamapteng nen Jesus i totoon nanpansakit*

<sup>21</sup> Mimitok ira shi siyodad ja kowan sha ey Kapirnaom, jet idi shimanon sota akew wa ngilin ni Hodiyo, ekisa-nop si Jesus nodta baley ya sa-nopan ni Hodiyo, jet nantoro nodtan. <sup>22</sup> Emesshaaw ira sota totood man ni itsora ni toka pengitosh, tep wara et

ngo mowan i kepengipateg ni too nonta toka pan-itoro nem say sota toro nonta ira mamaistoro ni dinteg ni Hodiyo.

<sup>23</sup> Jet nontan, nodtan na baley ya sa-nopan, waray toon emanengaw ja pingketan ni dimonyo. Jet inkedsang nontan i esel to, <sup>24</sup> ja kowan to ey, “Ngantoy! Dimaw ka di ja en meneshal son si-kami? Enshiy kaybiyangan mo son si-kami, Jesus ja i-Nasarit! Amtak nem sipa ka: si-kam sota shinotokan nen Apo Shiyos ja inbetkag to di!”

<sup>25</sup> Jet si Jesus, sinelkag to sota dimonyo, ja kowan to ey, “Eka-eket ka! Et ilekjas mo ita too!”

<sup>26</sup> Jet sota dimonyo, inpankenkenteg to sota toon pingketan to, jet kimeljaw sota dimonyo, asan kebetik nodta too. <sup>27</sup> Nasshaaw iren emin sota toon engasas; isonga nanbibinaga ira, ja kowan sha ey, “Ngaran emon jay? Emengipeteg gayam iyay ya toka pan-itoro! No ikowan to ey onbetik i dimonyon pimeket shi too, shaka pati-a nga agpayso!”

<sup>28</sup> Jet sajay ya shamag pangkep son Jesus, naywaris shi emin na sakop ni Galilia ja nay-esop nodtan na kawad-an sha.

<sup>29</sup> Idi bimo-day si Jesus nodta baley ya kesa-nopi ni Hodiyo, dimaw wa shagos nodta baley nen Simon nen Andres ja sanagi, jet nay-olop ngo si Santiago nen Juan. <sup>30</sup> Simbira sota inepo nen Simon ja bii, ja emansekit, ja empatang nga pasiya i bakdang to. Jet inpa-amtara son Jesus ey emansekit. <sup>31</sup> Si Jesus, dimaw nodta shinokolan to jet inegni-an toy takday nonta emansekit jet inatngan ton bimangon. Na-kal sota sakit to jet inkamakaman to ira.

<sup>32</sup> Idi mama-shem malen edimos i akew, in-ilaw ni totood man son Jesus i totoon emanpansekit



tan angken pay ira sota totoon eman-engaw ja pingketan ni dimonyo. <sup>33</sup> Eshakel la pasiya i totoon i-Kapirnaom ja esho-kon nodta sakepan ni baley. <sup>34</sup> Jet si Jesus, inpamapteng toy eshakel la totoon emanpansekit ja ekalkalasiy sakit sha, jet eshakel pay i inpabtik ton dimonyo ja pimeket shi totoo. Nem si Jesus, eg to ipalobos ja on-esel ira sota dimonyo tep amtaray katoo to.

*Bintikan nen Jesus ira sota toon emengen-enap son si-kato*

<sup>35</sup> Nonta daem mala, bimangon si Jesus et dimaw shi naydasin na dogad ja enshiy too, jet nanshawwat son Apo Shiyos shiman. <sup>36</sup> Nem si Simon, tan sota ira kait to, sha inena-enap, <sup>37</sup> jet idi simpol sha, kowan sha ey, “Shakaka en-enapa ni eshakel la totoo.”

<sup>38</sup> Nem simongbat si Jesus, ja kowan to ey, “Eti, ondaw kito et shima eshom ma kawad-an ni totoo ja nay-askang shiyay, say mengitoshok-ak ngod man ni mapteng nga shamag. Tep si-katoy obdak ja kabol la dinawan ko did jay.”

<sup>39</sup> Jet nan-ak-akad si Jesus shi ka-ili-ili ni Galilia, jet nantoro shi kebalbaley ya kesa-nopi ni Hodiyos nodtan iren dogad ja dinawan to, jet inpabtik to pay i eshakel la dimonyon pimeket shi totoo.

*Inpamapteng nen Jesus sota toon ebayabayang i bakdang to*

<sup>40</sup> Idi pinsak, waray toon dimaw ali son Jesus ja ebayabayang i bakdang to. Sotan na too, nantalimokod shi sango-an nen Jesus ja emengshaw ni kaasi son si-kato, ja kowan to ey, “No piyan mo, pamapteng mo iya bakdang ko, say eg sha-ak seskigen ni totoo.”

<sup>41</sup> Jet si Jesus, naysemekan; isonga inojad toy takday to et pinishat to sotan na too. Jet kowan

nen Jesus son si-kato ey, “Siya, piyan kon onmapteng ka.”

<sup>42</sup> Jet nay-inshas ngon na-omas sota ira bayang nonta too, jet pimeteng may bakdang to. <sup>43</sup> Jet si Jesus, binidin ton pasiya sotan na too, asan toka ibetkag, <sup>44</sup> ja kowan to ey, “Karam ikokowan iyay so ni angken sipa, no diket pandiritso ka et ja ondaw shima pari. Ipa-sas mo ita bakdang mo son si-kato, ja mimapteng ma. Jet pangidaton ka nonta kowan nen Moises shi dinteg to ey maydeton son Apo Shiyos, say amta-en ni karakdan ey si-kam ket enshi malay bayang mo.” Kowan nen Jesus son si-kato.

<sup>45</sup> Nem sota toon na-kal i bayang to, inpalewag to ey inpamapteng nen Jesus i bayang to. Jet sajay ya shamag, asdeg ton naywaris pay shima angken arawin dogad. Nakol ni si Jesus, eg mala makadedaw shi angken nganton siyodad. Nan-iyen ni olay shi naybetaw iren dogad, nem angken wared naybetaw, eg ngoreshan ma-enshiy eshakel la totoon kaondaw son si-kato ja emedepod kom-pormin dogad.

## 2

*Inpamapteng nen Jesus sota toon eg makakeykey i bakdang to*

<sup>1</sup> Idi edabas malay pigen akew, imoli si Jesus shi Kapirnaom. Jet shinemag ni eshakel la too ey wares Jesus shi baley to. <sup>2</sup> Esinop i eshakel la totoo nodtan: eposek i naydaem et pati sota sakepan ni baley, epokit ni too. <sup>3</sup> Idi maramen toka pan-itoro son si-kara sota mapteng nga shamag, binangtal ngo di ni epat ta too i sakey ya toon eg makakeykey i bakdang to, ja idaw sha ali son Jesus. <sup>4</sup> Nem eg mebedin na iesop sha son Jesus tep eshakel i too. Isonga ingkal shay atep nodta petek ni toktok nen Jesus,

jet idi edo-katan, inoy-oy sha sota emansekit ja ka-onong nga shimokol shi amaka.

<sup>5</sup> Idi indasin nen Jesus ey ebadeg i pamatira, kowan to so nonta emansekit ey, “Sota basol mo, epakawan.”

<sup>6</sup> Nem wára nodtan i eshom so nonta ira mamaistoro ni dinteg ni Hodiyo jet kowan shed nemnem sha ey, <sup>7</sup> “Apay nga saman i panikowan niyay ya too? Toka paso-i si Apo Shiyos! Kowan to ey emekawan ni basol, ey enshi met i eshom ma memekawan ni basol nem eg si Apo Shiyos bengat!”

<sup>8</sup> Nem si Jesus, amta to ey sajay i wáred nemnem sha, isonga kowan to son si-kara ey, “Apay nga joka sopngiled poso jo iyay ya kowan ko? <sup>9</sup> Say kowan jo, inba-ngat kon memekawan ni emin na basol niyay ya toon eg makakeykey i bakdang to, ey ekak kabaalan? Nem iyay i dag-en kon pati-an jo so. Ikowan ko so niyay ya too ey on-etan, al-en to ma shinokolan to, asan ma man-akad. <sup>10</sup> Jet no man-ekad, amta-en jo ey si-kak sota kowan nonta para padto nonta bayag da ey Anak ni Too, tan amta-en jo pay ey wáray kalintegan kod ja dabaw ni shaga ja memekawan ni basol ni too.” Jet si Jesus, inkowan to nonta toon eg man-ekad ey, <sup>11</sup> “Ikowan ko son si-kam, alam ita shokolan mo, jet akad ka!”

<sup>12</sup> Jet siya, bimangon sota toon istay eg makakeykey i bakdang to et inda to sota amaka to, asan toka ira ilekjas. Jet inon-an ira nonta eshakil la too iyay ya epasemak. Nasshaaw ira et inshayaw sha si Apo Shiyos, ja kowan sha ey, “Enshiy mi inon-an na inges niyay nontan da ingkato niman!”

*Inodop nen Jesus si Levi ja manbedin ni too to*

<sup>13</sup> Dimaw mowan si Jesus shima kilig ni baybay et eshakil la pasiya i tooton emansisina-dat ja en simabi son si-kato. Jet introd-an to ira.

<sup>14</sup> Idi naksheng iyay, nan-akad si Jesus say ma-tan nodtan na dogad, jet inon-an to sota toon manngeshan ni Levi, ja anak nen Alpio, ja eman-obded opisina to. Say obda to, para singil ni bowis. Kowan nen Jesus son si-kato ey, “Kala, kay-olop ka son si-kak et manbedin ka ni took.”

Jet si Levi, dimayat et imonod son si-kato, ja nanbalin ni too to.

<sup>15</sup> Jet nontan, engan si Jesus tan sota ira too to shi baley nen Levi, jet ekilikob ira so nonta kait nen Levi ja para singil ni bowis, tan sota eshom ma kowan ni Hodiyo ey enshiy kenshat shen too, ja mabesol kono. Tep eshakil iray inges niyay ja too ton emay-ododop son si-kato.

<sup>16</sup> Nem sota eshom so nonta ira Parisiyo, ja mamaistoro met laeng ni dinteg, idi inon-an sha ey emekipengan si Jesus so iren ja toon shaka ibilang ey enshiy kenkenshat sha, kowan sha so nonta ira too nen Jesus ey, “Ngantoy! Emekipengan ima apo jo so ira nima para singil ni bowis tan sama eshom ma toon enshiy kenshat sha, ja eshakil i basol sha!”

<sup>17</sup> Nem idi intenengan nen Jesus iyay ya inkowan sha, simongbat son si-kara ja kowan to ey, “Ekak ali dimaw ja mengewis ni toon maronong, nem dimawak ali ja mengewis ira nonta toon eshakil i basol sha. Mebedin na may-eshigak shi doktor. Eg bisita-en ni doktor i enshiy sakit to, no diket sota ira wáray sakit to.”

*In-aknan to ira ni arig jet say olog to ket emankaisa-dat sota badon toro to*

<sup>18</sup> Idi pinsak, sota ira Parisiyo tan sota ira too nen Juan ja para bomjag, inbiyang shay pangan sha tep ireka manngidin. Jet nontan, wára iray eshom ma toon dimaw son Jesus et kowan sha ey, “Sota ira too nen Juan tan too nonta ira Parisiyo, kanayon na shaka ibiyang i pangan sha no manngidin ira, nem apay nga sama toom ket eg sha ibiyang i pangan sha?”

<sup>19</sup> Jet si Jesus, say songbat to son si-kara, in-arig toy bakdang to shi dakin engasewa. Isonga kowan to ey, “Piyon jon ikowan ey sota ira bisita shi kasal ket eg ira mengan angken wára sota dakin engasewa? Enshi a! Kenshat ta mengan ira. <sup>20</sup> Nem wára et mangoy timpon onmotok ali ja ma-enshi son si-kara sota dakin engasewa, jet si-katoy timpon ibiyang sha so ni pangan sha maypangkep ni daringit sha.”

<sup>21</sup> Jet si Jesus, inkowan to mowan i sakey ya arig son si-kara ja kowan to ey, “Na-alas no maysekab i badon abel shi shaan na baro. No maysekab sota bado, ey onkesen, binaten to sota nayshaitan ton shaan; nakol ni mema-ma sota epi-kat.”

<sup>22</sup> Tan wára pay i sakey ya inkowan ton arig, ja kowan to ey, “Na-alas no may-iyon i badon adak shi na-osal la inemag shen katat ja ijanan ni adak, ja kowan sha ey ‘wineskin’. No sotan i pesing jo, pepetjag nonta adak sota nay-iyonan to, jet onkawas sota adak. Tan angken pay sota nay-iyonan to, mepilshi. Mesepol ja no badon adak, bado ngoy kay-inan to.”

*Eg nan-inawatan shi Jesus tan sota ira toon mangidin*

<sup>23</sup> Idi sakey ya akew wa ngilin ni Hodiyo, nanshalan shi Jesus shi oma ja emola-an, jet idi ireka

man-ekad, sota ira too nen Jesus, shaka pan-ina-jon i patod ni dames nonta mola.

<sup>24</sup> Nem sota ira Parisiyo, kowan sha son Jesus ey, “Asas mo kari ira ma toom! Apay nga dingkara iman ey kaiparit ni dinteg tayon Hodiyo i mengetod no akew wa ngilin?”

<sup>25</sup> Jet si Jesus, simongbat ja kowan to son si-kara ey, “Arig to ngo sota inpasing nen Ari David nonta bayag da ni inka-ekang to, tan sota ira too to, ta enshin polos i kenen sha. Apay eg jo aya amtay dingka to? <sup>26</sup> Dimaw si David shima tolshen baley ya inbilang sha ey para son Apo Shiyos nonta timpon inpanpari nen Abiatar ja kangeto-an et kinan to sota tinapay ya naydaton son Apo Shiyos. Sajay i inpasing to anta nga nayparit so ni kom-pormin too i pangan sha nontan na tinapay. Ta sota pari bengat i palobos sa mengan nontan na tinapay. Jet in-aknan to pay ira sota too to. <sup>27</sup> Iyay i nemnemen jo: epangdo i too ja ewara asan mawasha i ngilin ja para pansigshan ni too; aliwen ewara i too say tongpalen to sota dinteg maypangkep ni ngilin. <sup>28</sup> Isonga si-kak ja naypadton Anak ni Too, ja apo ni emin, si-kak met laeng i mengikowan no ngantoy mebedin na dag-en no akew ni ngilin.”

### 3

*Inpamapteng nen Jesus sota toon eki-ngoy*

<sup>1</sup> Ekisa-nop mowan si Jesus shi baley ya sa-nopan ni Hodiyo et nontan, naytompong nga wára nodtan i toon eki-ngoy i sakey ya takday to. <sup>2</sup> Wára ngoy eshom ma too nodtan ja emeni-siim son Jesus no waray ekasan to nontan na akew, tep kowan sha ey balang nem waray dag-en to ja ikowanan

sha so ey nanbasolan to. Ta nayparit kono shi dinteg sha i pengekas no akew ni ngilin.

<sup>3</sup> Jet si Jesus, kowan to so nonta toon eki-ngoy i takday to ey, “Daw ka did ja sango.” <sup>4</sup> Jet kowan to so nonta ira emeniim son si-kato ey, “Ngaaw aya i pandeka ni mapteng, ono pemiyaq ni too, no timpon ngilin? Enshi: say ngaaw ja kaiparit ni dinteg tayo, sota pandeka ni ngaaw tan pemono ni too.”

Nem enshiy shaka isongbat.

<sup>5</sup> Inbonget ira nen Jesus et emandeshingit pay ya pasiya tep shaka ipilit ni olay sota kostora. Sina-sa-key to iren insi-ning, asan to ikowan so nonta toon eki-ngoy i takday to ey, “Oyad mo ita takday mo.”

Pinati nonta eki-ngoy sota kowan nen Jesus et mimapteng mowan nga agpayso sota takday to.

<sup>6</sup> Nem sota ira Parisiyo, bimo-day ira et nantatabtabal ira so nonta ira too nen Ari Hirodis no ngarantoy pesing shen memono son Jesus.

*Emansisina-dat mowan i totoon kaondaw son Jesus*

<sup>7</sup> Si Jesus tan sota ira too to, indekjas sha sotan na dogad et dimaw ired kilig ni baybay. Jet eshakil la pasiya iray toon imonod son si-kato: iman i nankedapod Galilia, iman i nankedapod Jodia, <sup>8</sup> iman i nankedapod siyodad ni Jerusalem, iman i nankedapod Idomia, iman i nankedapod ma dogad ja baliw ni pa-dok ka Jordan, tan iman pay i nankedapod ma dogadogad ja diked ni siyodad ni Tira tan Sidon. Saja ira eshakil la totoo, shinemag shay kaskasshaaw wa kedagdag-a nen Jesus, isonga sha ali simbi.

<sup>9</sup> Inkowan nen Jesus so nonta ira too to ey mengisekana ira ni bangsa ja pan-iyanan to tep

kowan to ey baka i-ipit nonta eshakil la totoo. <sup>10</sup> Ta eshakil i inpamapteng ton toon emanpansekit et emansisikil i emin na toon kaonsanakit ja kowan sha ey pishaten shes Jesus. <sup>11</sup> Jet nontan, wara ngo iray totoon pingketan ni dimonyo et idi inshemang nonta ira dimonyo si Jesus, ireka mantemimokod shi sango-an to, ja shaka pan-ikeljaw ey, “Si-kam i Anak nen Apo Shiyos!” <sup>12</sup> Nem binidin to iren pasiya ey eg sha ikokowan i maypangkep son si-kato so ni angken sipa.

*Pinidi nen Jesus sota sampolan showa ja apostol to*

<sup>13</sup> Dimaw si Jesus shi shontog et sina-nop to ali ira sota kinostonan to, jet dimaw ira son si-kato, <sup>14</sup> jet shinotokan toy sampolan showa son si-kara. Saja ira sampolan showa, si-karay ninemnem ton kaiten to ni olay tan si-karay ibetkag ton en mengitosh. <sup>15</sup> Si-kara pay i piyalen ton angken pebtik sha iray dimonyo ja pimeket shi totoo. <sup>16</sup> Say ngaran ira nonta sawal ni showa, sajay: si Simon ja inngadnan ton Pedro; <sup>17</sup> si Santiago nen Juan ja sanagin anak nen Sibidi (saja san-agi, binshayan nen Jesus ni Boanijis, ja piyan ton a-selen ey, “anak ira ni kirol”); <sup>18</sup> si Andres, Felipe, Bartolome, Mateo, Tomas, Santiago ja anak nen Alpio, si Tadio, sota si Simon ja bitirano, <sup>19</sup> tan si Judas Iskariote ja mengileko ali so nen Jesus shi anongosto.

*Binediktad nonta makakontra son Jesus i obda ni Ispirito Santo, ja kowan sha ey obda ni dimonyo*

<sup>20</sup> Idi naksheng nga shinotokan nen Jesus ira sota sawal ni showen apostol to, imakad shi baley ya toka pan-iyani nontan. Jet esa-nop mowan i eshakil la totoo nodtan na kadnan sha jet nakol ni ayshiy waya shi ira Jesus ja mengan.

<sup>21</sup> Idi amta-an nonta a-aki nen Jesus, dimaw iren kowan sha ey i-akad sha tep kowan sha ey nalkal i nemnem to.

<sup>22</sup> Wara ngo iray mamaistoro ni dnteg ni Hodiyos ja edapod Jerusalem ja kowan sha ey, "Pimeket si Bilsibob ja apo ni dimonyo son si-kato." Tan kowan sha ey, "Sota apo ni dimonyo i toka osala ja pebtik so ni dimonyon pimeket shi totoo."

<sup>23</sup> Isonga si Jesus, tina-wal to ira et in-aknan to ira ni arig, ja kowan to ey, "Dokodoko itan na kowan jo ey sota apo ni dimonyo i naka osala ja pebtik so ni dimonyo. Taway pesing nen Satanas ja mengipebtik so ni bakdang to shorog?" <sup>24</sup> Ta amta to ey sajay, arig toy ilin manshowa. No manshowen shorog i sakey ya ili, kenshat ta mansisi-jan ira sota totoo nontan na ili. <sup>25</sup> Kasta met sota sanpamilja ja manshowa, mansisi-jan ira sota totoo. <sup>26</sup> Isonga si Satanas, eg mebedin na pebtik to met laeng i kait to, tep amta to ey no bekalen toy bakdang to, tan manbabakal i too to, eg onbayag i pansaad to, no diket menginteg i kabedinan to.

<sup>27</sup> "Say agpayso, inebak ko nin sota apo ni dimonyo. Arig to sota matekal la too. Eg kabaalan ni sakey ya toon onsekep shi baley ni matekal la too ja kowan to ey al-en ton emin sota wara nodta naydaem ni baley. Ayshi, kenshat ta say pesing to nin ket bedoren to sotan na too asan toka al-ala-en emin sota wara nodta baley.

<sup>28</sup> "Emin iray basol ni too, ono sota ngaaw wa shaka ikokowan, mebedin na mepekawanan, <sup>29</sup> nem sota ngaaw wa shaka ikokowan maypangkep nonta Ispirito Santo nen Apo Shiyos, eg mebedin na mepekawanan, no diket may-a-det son si-kato ni olay ingkatod ingka." <sup>30</sup> (Inkowan

nen Jesus iyay tep endedamsis ira nonta mamaistoro ni dnteg i Ispirito Santo nen Apo Shiyos, ja kowan sha ey, "Si-kato, waray dimonyon kaontolong son si-kato.")

*En naysabi sota ina nen Jesus tan sota ira a-aki to son si-kato*

<sup>31</sup> Mimotok nontan si ina nen Jesus tan sota ira a-aki ton daleki. Nanseked ired bo-dayan et inpatawal sha di si Jesus say ondaw ali ja to di ira on-an. <sup>32</sup> Eshakel iray totoon timongaw ja nandikmot son Jesus et kowan sha ey, "Wara si inam tan sota ira a-akim shi bo-dayan, jet piyan shaka konon on-an."

<sup>33</sup> Nem si Jesus, kowan to son si-kara ey, "Sipay ikarik ja inak, tan sipay ikarik ja a-akik?" <sup>34</sup> Jet inshemang toy totoon timanongaw ja nandikmot son si-kato et inkowan to ey, "Sajay iray ikarik ja innak, tan ikarik ja a-akik!" <sup>35</sup> Tep say naka ikarin innak tan a-akik, sota ira mandeka ni piyan nen Apo Shiyos."

## 4

*In-arig nen Jesus sota kalasin bo-day ja naysepa-an ni botil*

<sup>1</sup> Dimaw mowan si Jesus ja en nantoro shi kilig ni baybay et esa-nop i eshakel la totoo son si-kato. Kesoreng si Jesus ey manantan nodta banka ja wara nodta shanom. Timongaw si Jesus nodtan, ey sota ira too, wara iren esalpag nodta kilig ni shanom. <sup>2</sup> Eshakel i intoro nen Jesus son si-kara, nem poro arig i inpaspasing ton engikowan.

Say sakey ya arig ga inkowan to son si-kara, sajay: <sup>3</sup> "Itngiyo iyay! Waray too ja dimaw wa en manbangkag shi oma. <sup>4</sup> Idi toka pan-iwaris sota botil, wara iray nayponta shi shalan, jet kinan ira ni titit. <sup>5</sup> Sota eshom ma botil, nayponta ira nodta kabato-an ja

ma-ingpis i bo-day to, jet timemel la shagos, tep aliwén masshel i bo-day ja nayponta-an to. <sup>6</sup> Nem idi simekal i sekit, nakkit sota ira timemel la botil ta eg shimalem sota damot sha. <sup>7</sup> Sota eshom ngon botil, nayponta ira shima similja ni sebit, jet idi bimengis iren showa, na-abak sota temel ni mola jet eg timoloy ya dimames. <sup>8</sup> Sota eshom ngon botil, nayponta shima mapteng nga bo-day jet simimit et kimabay. Idi dimames ma ira, wáray nandames ni tedon polo, wáray nandames ni enem ma polo, tan wára pay i nandames ngo ni sandasos.” <sup>9</sup> Jet intobtob nen Jesus ey, “Niman i wáray waya jon mengitneng niyay ya naka pan-ikowan, isonga singpet jon itenengan.”

<sup>10</sup> Idi a-abos to, inbag-an nonta sawal ni showen apostol to tan sota eshom pay si Jesus no ngaran-toy olog nonta arig ja inkowan to.

<sup>11</sup> Simongbat si Jesus ja kowan to son si-kara ey, “Si-kayo nin i naypalobos ja on-awat so ni maypangkep nonta pantoshayan nen Apo Shiyos. Nem sota eshom, arig bengat i pengitoshok son si-kara, <sup>12</sup> say no angken isi-ning sha, eg sha imatonan sota inonan sha, jet angken itenengan sha, eg sha amtay olog to. Ta baka man-odi ira son Apo Shiyos et mepekawanan i basol sha.

<sup>13</sup> “I-olog ko niman sota arig ga inkowan ko la. Nem nasshaawak tep eg jo shagos inewatan i olog to. No eg jo ewatan iyay ya arig, toy pesing jo ngarod ja mengewat ni eshom ma arig? <sup>14</sup> Say olog nonta arig ga inkowan ko la, sajay. Sota botil ja pan-iwáris nonta too shi oma, may-eshig ey esel nen Apo Shiyos. <sup>15</sup> Sota nayponta-an ni botil ja shalan, si-katoy kay-eshigan nonta ira toon naykowanen ni esel nen Apo Shiyos, nem idi itenengan sha, ondaw alin shagos si

Satanas ja to dingdingen sota esel la naytoro son si-kara. <sup>16-17</sup> Sota nayponta-an ni botil la kabatoan, si-katoy kay-eshigan nonta toon engitneng ni esel nen Apo Shiyos ja emati ni sankatikan. No itenengan to, wáren shagos i imdeng ton mengewat, nem eg may-a-det shi nemnem to. Isonga magenon ibi-jag to no onmotok ali sota digat to, ono okesen ni too maypangkep ni in-awat to so ni esel nen Apo Shiyos. <sup>18</sup> Sota nayponta-an ni botil ja similja ni sebit, si-katoy kay-eshigan nonta toon engitneng ni esel nen Apo Shiyos met laeng, <sup>19</sup> nem say toka nemnemnema, sota pesing ton manbiyag, sota ekanas sa biyag ni baknang, tan sota kompormin toka kamkamkami. Jet anongosto ma ey medingding sota esel nen Apo Shiyos son si-kato, jet enshi may mapteng nga pantongpalan to. <sup>20</sup> Sota nayponta-an ni botil ja mapteng nga bo-day, si-kato ngoy kay-eshigan nonta toon engitneng ni esel nen Apo Shiyos jet toka ewata. May-eshig ey sajay ira, wáray dames sha: wáray nandames ni otik, wáray nandames ni kalaingan, tan wáray nandames ni eshakil.”

*In-arig nen Jesus sota kingki ja eg koma mesa-keban*

<sup>21</sup> Kowan pay nen Jesus ey, “Apay al-en jo aya i kingki et sakeban jo ni timba ono idoong jo shi katiri? Ayshi met: ipa-tok jod ekayang. <sup>22</sup> May-a-mot i sakey ya banag say ma-okat met laeng nem sakey ya akew; sota eg mamta-an niman, sigoradon mamta-an ali. <sup>23</sup> Niman i wáray waya jon mengitneng niyay ya naka pan-ikowan, isonga singpet jon itenengan.”

<sup>24</sup> Inkowan to pay ey, “Singpet jon itenengan iya naka pan-ikowan, tep sota joka penokat, si-

kato ngoy penokat nen Apo Shiyos no mengi-kan son si-kayo, ono sodokan to pay. <sup>25</sup> Sota toon mengitneng tan memati, metod-an pay. Nem sota toon endedam-sis to, ja eg memati, angken sota ootik ka amta to, ma-enshi pay.” Kowan nen Jesus.

*Wara pay i in-arig nen Jesus maypangkep ni pantoshayan nen Apo Shiyos*

<sup>26</sup> Inkowan mowan nen Jesus ey, “Say kay-eshigan nonta pantoshayan nen Apo Shiyos, inges to iyay. May-eshig shi toon engi-sek ni botil shi bo-day. <sup>27</sup> Sota too, ema-okip nem medebi jet kaon-bangon nem me-wa-wa, jet sota botil la in-esek to, simimit asan ma kekabay, ey eg dimbaotan nonta too i kepesing nonta botil la mandeka niyay. <sup>28</sup> Sota bo-day, si-katoy mengipedemes ni mola: emepangdo nin sota bolong to, asan kebosbos, jet medowem may dames to. <sup>29</sup> Nem angken eg to ewatan na emin, no medowem sota dames to, eni-en to tep simabi ma sota timpo ni pan-eni.”

<sup>30</sup> Intoloy nen Jesus ey, “It-nengiyo iya ikowan kon kay-eshigi ni pantoshayan nen Apo Shiyos. <sup>31</sup> May-eshig nodta botil ni sakey ya kalasin mola. Sajay ya botil, no may-a-sek shi bo-day, ootilik ka pasiya, ja enshiy kay-ingesan ni ka-ootik to shiya dobong, <sup>32</sup> nem no onba-deg, si-katoy kabalkan so ni emin na mola. Say pangeto, ebadeg et mebedin na man-obong iray titit, shima pangpangeto, ja sotan i pansishoman sha.” Sajay day inkowan nen Jesus.

<sup>33</sup> No mebedin ni totoon ewatan, angken pigen arig i inkowan nen Jesus son si-kara ja kait da iren ja arig ja inkokowan to la. <sup>34</sup> Enshiy eshom ma intoro to so ni karakdan na totoo nontan na timpo, nem eg arig ni olay.

Nem idi abos sha so nonta ira too to, in-olog ton emin son si-kara.

*Inpasalsheng nen Jesus i makedsang nga shagem man makedsang nga shadoyon*

<sup>35</sup> Idi mama-shem mala nontan met laeng nga akew, inkowan nen Jesus so nonta ira too to ey, “Eti, ondaw kitejo shima shemang niya baybay.”

<sup>36</sup> Jet siya, indekjas sha ma sota eshakil la totoo. Si Jesus, ka-onong nodta bangka ja tinongawan to nontan. Jet wara pay iray kait ton bangka ja nay-olop son si-kara.

<sup>37</sup> Idi maramen eman-ekad sota bangka ja ondaw nodta shemang, ebigen kimesang i shagem nodta baybay, nakol ni kepanshespega ni shadoyon sota bangka ingkatod eshogi-an ja emankepno sota bangka ni shanom. <sup>38</sup> Si Jesus, wara nodta obet ni bangka ja na-ogip shi kotsan, isonga sha binengon, ja kowan sha ey, “Apo! Ngantoy! Shanshani kito men metey, ey eg mokito sintilen!”

<sup>39</sup> Bimangon si Jesus et inkowan to so nonta makedsang nga shagem ey onsalsheng, tan inkowan to so nonta shadoyon ey, “Enog! Salsheng ka!” Jet simalsheng nga agpayso sota shagem jet timalna men kosto sota baybay.

<sup>40</sup> Inkowan ma nen Jesus so nonta ira too to ey, “Ngantoy? Entakot kayo? Ayshi pay laeng aya i pamatiyo?”

<sup>41</sup> Etakot iren pasiya; kowan sha ni sakey tan sakey son si-kara ey, “Sipa emo iyay ya too? Toka pesalsheng iray shagem tan shadoyon et shaka pati-a!”

## 5

*Inpabtik nen Jesus sota ira dimonyo nodta toon eman-engaw ja i-Girgasa*

<sup>1</sup> Intoloy shen bimaliw et mimotok ira nodta dogad ja kowan sha ey Girgasa. <sup>2</sup> Idi koston simekbit si Jesus ja edapo did ma bangka, inaspol ni sakey ya dakin eman-engaw ja pingketan ni dimonyo. Sajay ya too, edapo did kamposanto, tep nodtan i toka pan-iyani. <sup>3</sup> Istay ya shaka bedbedora iyay ya too nontan da, nem niman, angken kolkolong i pemedod sha, toka ketdanga ni olay. <sup>4</sup> Eminshakel la binedod sha iyay ya too ni karina tan kolkolong, nem toka ketketdanga ni olay sota kolkolong ja shaka pemedod son si-kato, tan toka sheshala sota karina. Enshiy toon maka-inges son si-kato ja on-abak so. <sup>5</sup> Kalebian man ono ka-akawan, eman-eka-ekad ja kaonkelkeljaw shima kamposanto tan shima shonshontog, jet toka sogsokata i bakdang to shorong ni bato.

<sup>6</sup> Idi naybetaw pay laeng si Jesus son si-kato, inon-an nontan na toon eman-engaw. Bintik toy kad-an nen Jesus ja to simbi, jet nantalimokod shi sango-an to.

<sup>7-8</sup> Si Jesus, kowan to ey, “Si-kam ma dimonyo, ilekjas mo ita tool!”

Jet sota too, inkedsang toy keljaw to, ja kowan to ey, “Jesus! Si-kam ma Anak nen Apo Shiyos ja Kangeto-an! Ngantoy pesing mo ma son si-kak? Pangaasim, karamak shosa-en!”

<sup>9</sup> Jet si Jesus, inbag-an to, ja kowan to ey, “Sipay ngaran mo?”

Kowan nonta too ey, “Say ngaran ko, si Dinibo, tep eshakel kamin pasiya.”

<sup>10-11</sup> Nontan met laeng, wara iray eshakel la keshel la naybolos nodtan na shontog. Jet sota toon pingketan nonta dimonyo, emekika-kaasi son Jesus ey eg to peki-nan ira sota dimonyo shima kad-an sha, <sup>12</sup> jet kowan sha ey, “Palobosim kami ka ja man-a-tan

so nima keshel la naybolos, say onpeket kami son si-kara!”

<sup>13</sup> Jet inpalobos nen Jesus. Jet sota ira dimonyo, indekjas sha sota too et pimeket ira nodta eshakel la keshel. Jet sota ira keshel, namtik iren nan-ekas shima shepdas et dimened ira shi baybay. (Say karakel ira nonta keshel, ondaw wa showen dibo.)

<sup>14</sup> Sota ira toon istay emanbantay so ira niyay ya keshel, kinanan shen inparemag sota epasemak shi siyodad tan shima eshom ma kait sha. Jet sota toon engitneng niyay ya shamag, dimaw ira ali et sha inon-an no ngarantoy epasemak. <sup>15</sup> Jet simbires Jesus, tan sota toon istay pingketan ni dinibon dimonyo, ja mimapteng may nemnem to. Timongaw ja nanbaro ma. Jet timakot iren emin. <sup>16</sup> Jet sota ira para bantay ni keshel ja engasas ni inpan-etan ni dimonyo, inkowan shay inpassing nen Jesus ja inpantik so ni dimonyo. <sup>17</sup> Jet sota ira too nodtan na dogad, kowan sha son Jesus ey no mebedin koma, idekjas to sotan na dogad sha. <sup>18</sup> Isonga si Jesus, nandogan shi bangka et emanda-da-jat ma. Nem sota toon istay pingketan ni eshakel la dimonyo, inbag-an tos Jesus nem mebedin na mekidaw son si-kato nodta bangka.

<sup>19</sup> Nem si Jesus, eg to intolok. Inkowan et nen Jesus son si-kato ey, “Akad ka, mo ikowan so ni kagajem mo i mapteng nga inpassing nen Apo Shiyos, ja engi-kan ni kaasi to son si-kam.”

<sup>20</sup> Jet sota toon mimapteng, imakad jet to insodsod so ni totood siyodad ni Dikapolis i kaskasshaaw wa dingka nen Jesus son si-kato. Jet nasshaaw wa emin ira sota engikowanan to.

*Emati ira sota showen too son Jesus et kinaasi-an to ira*



<sup>21</sup> Nandogan si Jesus shi bangka et bimaliw shima naymamang nga kilig ni baybay. Jet sota eshakil la too, esa-nop ira son Jesus nodta kilig ni baybay ja nandisaagan to.

<sup>22</sup> Jet nontan, wára ngoy mimotok alin too ja si Jairo i ngaran to, ja pangolo ni baley ya sa-nopan ni Hodiyo. Idi inon-an tos Jesus, nantalimokod shi sango-an nen Jesus, <sup>23</sup> ja kowan to ey, “Pang-pangaasim apo, kay-olop ka son si-kak shi baley ko, ta sota anak kon bebii, emanpatpatey. Isonga pangaasim, mo isakpal i takday mo son si-kato, say onpeteng et mebiyag.”

<sup>24</sup> Timolok si Jesus et ekidaw son si-kato. Jet eshakil la pasiya i toon nay-olop son si-kara, ja eman-inipit shi shalan, nakol ni pati si Jesus, emanka-ipit. <sup>25</sup> Jet wára ngoy sakey ya biin naydaok ja nanshala ni sampolo tan showen tawen. <sup>26</sup> Ebayag ga nansasadat i eshakil la doktor ja engagas son si-kato et kinasto ton emin i wára son si-kato, nem enshi met i to dinekna ja to na-agaman; nem ema-ma et ngo mowan. <sup>27</sup> Sigod ja shinemag to i mapteng nga kepesing nen Jesus, isonga ekisikil la imonod son Jesus et pinishat toy baro nen Jesus. <sup>28</sup> Tep sota bii, kowan tod nemnem to ey, “No pishaten kos Jesus, angken sama baro to bengat, onmaptengak ma.” <sup>29</sup> Jet siya, idi pinishat toy baro nen Jesus, simalsheng nga shagos sota toka pansheda, jet dinekna to ma ey na-kal sota sakit to.

<sup>30</sup> Nem idi koston pinishat toy baro nen Jesus, dinekna ngo nen Jesus ey wáray na-agaman ja emirat son si-kato. Nanposipos nodta kawa ira nonta eshakil la too, et kowan to ey, “Sipay emirat niya barok?”

<sup>31</sup> Kowan ira nonta too to son si-kato ey, “Eshakil met ira ja totoo ja nandikmot son si-kam et shakaka pan-ipita pay, ey apay nga moka pan-ibaga no sipay emirat son si-kam?”

<sup>32</sup> Nem inshemang nen Jesus ira sota toon nandikmot son si-kato, ta toka pan-enapa sota toon pimirat son si-kato. <sup>33</sup> Sota bii, emanbebayedbed ni takot to tep amta to sota inka-ekas to ni inpirat to so nonta baro nen Jesus. Isonga nantalimokod shi sango-an nen Jesus jet insodsod ton emin i podno son si-kato.

<sup>34</sup> Jet kowan ma nen Jesus son si-kato ey, “Anak ko, say minaptengan mo, sota pamatim son si-kak. Daw ka ja wára may talna son si-kam. Na-kal ma ita sakit mo.”

<sup>35</sup> Nonta marama ja pan-ikowan nen Jesus iyay, wára diy inbetkag shen edapo nodta baley nonta pangolo ja emansekit i anak to, jet kowan nonta naybetkag so nonta pangolo ey, “Kosto. Angken eg mo odopen ita maistoro. Enshi met laeng i silbi ni idaw to tep etey sota anak mo.”

<sup>36</sup> Nem si Jesus, intenengan to sota inkowan nonta too ey naksheng nga etey sota nga-nga, jet inkowan to son Jairo ey, “Kareka manshanag; pamati ka bengat.”

<sup>37</sup> Idi naksheng iyay, say inpalobos ton may-odop son si-kato bengat, si Pedro tan si Santiago nen Juan ja san-agi. <sup>38</sup> Jet idi mimotok ira nodta baley nonta pangolo, inon-an nen Jesus ira sota toon kaonnganogngog; ireka mannoteng nga pasiya ni nangis sha.

<sup>39</sup> Simekep si Jesus et kowan to son si-kara ey, “Ngantoy? Kayoka mannoteng ni nangis jo? Eg etey itan na nga-nga; na-ogip bengat.”

<sup>40</sup> Nem sota ira totoo, inbi-wisan sha bengat si Jesus.

Inpabo-day to iren emin et say ebay-an bengat ja intolok to, sota tedon too ton inodop to, pati sota ama tan ina nonta nga-nga. Jet dimaw ira nodta naydaem ma kad-an nonta nga-nga. <sup>41</sup> Inegni-an toy takday nonta nga-nga et inkowan to son si-kato ni esel sha ey, “Talita komi!” (Say olog nonta inkowan to, “Ikowan ko son si-kam anak, bangon ka!”)

<sup>42</sup> Jet bimangon na shagos sota nga-nga et nan-akad, tep say tawen to, sampolo tan showa. Jet nasshaaw iren pasiya sota en-goney so.

<sup>43</sup> Nem kowan nen Jesus son si-kara ey, “Karejo ikokowan shi eshom iyay ya epasemak niman. Akniyo et mango iya anak jo ni kenen to.”

## 6

*Si Jesus, dinamsis ira nonta totoon kaidiyan to*

<sup>1</sup> Idi naksheng iyay, imakad si Jesus shi ili to, jet inodop to ira sota too to. <sup>2</sup> Shimanon i akew wa ngilin ni Hodiyo et en nantoro si Jesus shima sa-nopan ni si-karen Hodiyo. Jet sota ira too nodtan, ireka messhaaw nonta maypangkep ni toro to, ja kowan sha ey, “Towa emoy inamta-an to so nima toka pan-itoro? Taway inashalan to so niman na daing to? Ngaranto emoy inasing ton dimaga so nima kaskasshaaw wa toka dagdag-a? <sup>3</sup> Sajay emo met sota anak nonta kalapintiro! Aliwa ayen si-kato sota anak nen Maria? Amta tayo met sota ira a-aki to ja si Santiago, Jose, Judas, tan si Simon. Tan iyay pay ired jay sota bibiin a-aki to!” Jet sotan iren kaidiyan to, dinamsis sha si Jesus.

<sup>4</sup> Nem si Jesus, kowan to son si-kara ey, “Emin ira sota toon inbetkag ali nen Apo Shiyos, mebedin na mayshedjaw shi emin na

ili. Nem shi mismon ili to bengat i eg to kayshedjawan, tan angken pay shi mismon partidos to tan pamilja to.”

<sup>5</sup> Jet shima ili ton mismo, eg bedinan nen Jesus ja mandeka ni eshakil la milagro. Sajay bengat i dingka tod ma mismon ili to: wara iray ingkal ton sakit ni too ni toka pengisakpal ni takday to son si-kara, nem aliwen eshakil. <sup>6</sup> Jet nasshaaw si Jesus tep eg ira memati son si-kato.

Jet pinasiyal to sota ira kawad-an ni too nodtan na dogad jet intod-an to ira.

*Inbetkag nen Jesus sota sampolo tan shown apostol to shima eshom ma ili*

<sup>7</sup> Sina-nop ma nen Jesus ira sota shinotokan ton sawal ni shown apostol to et inkowan to ey on-daw iren sansheshedwa shi eshom ma dogad. Jet kowan to son si-kara ey, “Ipiyal ko son si-kayo ey angken sama ira dimonyo ja pimeket shi totoo, mebedin na pebtik jo.” <sup>8</sup> Jet inparit toy panbedon sha ni mekan ono pilak, ono pengegnira ni bayong. Say inpalobos to bengat ja mebedin na itakin sha ket sota pengegnira ni sowan. <sup>9</sup> Binidin to ira ey mansinilas ira, nem eg sha kono itakin i baron pansa-datan sha. <sup>10</sup> Kowan to pay ey, “No sipay mengewis son si-kayo, si-katoy pan-inan jo ni olay ingkatod pan-a-tan jod eshom ma dogad. <sup>11</sup> Nem no sota dogad ja motoken jo ket eg shakejo ewaten, ono eg sha patien i itoro jo son si-kara, sota depok ja naypeket shi sediyoy, pokpok jo nin asan joka ilekjas sotan na dogad. Ta si-katoy pengamta-an sha so ey enshi may bibiyang jo son si-kara.” Kowan nen Jesus so nonta ira apostol to.

<sup>12</sup> Jet sota ira too to, dimaw ira et nantoro ira nodta emin na dinadawan sha, ja inkowan sha

so ni totoo ey manbebawi ira maypangkep ni basol sha. <sup>13</sup> Jet eshakil i inpabtik shen dimonyo ja pimeket shi totoo, jet pinojokan sha pay ni dana i eshakil la toon emanpansekit, jet inpamapteng sha ira.

*Sota maypangkep ni inkatey nen Juan ja para bonjag*

<sup>14</sup> Nontan na timpo, si Ari Hirodis, shinemag to sota maypangkep ni dingdingka nen Jesus, tep pan-i-etek ni karakdan na too si Jesus, jet kowan to ey, “Sajay ya shinemag kon too, sigosho si-kato emo si Juan da ja para bonjag. Nanbiyag emo shi patey, isonga waray panakabalin ton mandeka ni milagro.”

<sup>15</sup> Nem say kowan ngo ni eshom, si-kato si Elias ja para padto nonta bayag da, tan sota ira eshom pay, say kowan sha, si-kato konoy para padto nen Apo Shiyos ja inges nonta nankepangdo len para padto nonta bayag da.

<sup>16</sup> Nem si Hirodis, idi shinemag to sota maypangkep son Jesus, kowan to ey, “Sajay ya too, si-kato da si Juan. Pinotolan koy toktok to, nem iyay mowan na nan-ongal.”

<sup>17-18</sup> Sajay i pan-inemnem nen Hirodis tep mismon si-katoy in-pabono so nen Juan. Inpa-shel to nontan et inpaibalod to, ta idi inesawa nen Hirodis si Hirodiyas ja asewa nen Felipe ja agi to, inkowan nen Juan so nen Ari Hirodis ey, “Parit shi bilin nen Apo Shiyos i pengesawam so nen Hirodiyas.” Isonga inpa-shel nen Hirodis si Juan, ta pipiyan to si Hirodiyas. <sup>19</sup> Si Hirodiyas, engogeges to si Juan, jet piyan ton bono-en. Nem enshiy mebedin to, <sup>20</sup> tep si Ari Hirodis, entakot to si Juan et toka ibaliwi ni olay. Amta nen Hirodis ey si Juan, eshiyosan na too ja in-apil nen Apo Shiyos

ja mansilbi son si-kato. Idi itenengan nen Hirodis i pan-ikowan nen Juan, emandikat i nemnem to, nem piyan to met laeng karin mengitneng ni kowan to.

<sup>21</sup> Nem idi sakey ya akew, waray pinekan nen Ari Hirodis ja eshakil la totoo ni inpanbirth-day to. (Sotan ira inewis nen Hirodis nontan, sota ira nankengaton toray ni gobirno, sota ira apo ni solsharo to, tan sota ira eshom ma pangolo ni probinsiya ni Galilia.) Jet nontan, inshingan nen Hirodiyas ja engipabono son Juan.

<sup>22</sup> Tep nontan, nansada sota anak nen Hirodiyas ja marikit, jet eman-i-imdeng si Ari Hirodis tan sota ira naydikob son si-kato. Kowan nen Ari Hirodis so nonta marikit ey, “Ngantoy kekshawen mo son si-kak? Ikowan mo say i-akan ko.” <sup>23</sup> Nansangba pay ja kowan to ey, “Angken ngantoy kekshawen mo son si-kak, i-akan ko! Angken kagoshowa niya ilin intorayan ko, i-akan ko son si-kam no si-katoy kekshawen mo!”

<sup>24</sup> Bimo-day sota marikit et to simbi si ineto, jet inbag-an to ey, “Ngarantoy kekshawen ko?”

Simongbat si Hirodiyas ja ineto, ja kowan to ey, “Keshaw moy toktok nen Juan ja para bonjag.”

<sup>25</sup> Jet sota marikit, aliston dimaw so nen Ari Hirodis et inkowan to ey, “Piyan kon i-akan mo ali son si-kak sota toktok nen Juan ja para bonjag; ipingkan mo di shi embanaw wa pingkan!”

<sup>26</sup> Jet sota ari, naydaw-an na pasiya ni inkowan to so nonta kari to so nonta marikit. Nem mesepol la tongpalen to ta nankari ja intenengan pay nonta ira bisita to. <sup>27</sup> Isonga engibetkag si Ari Hirodis ni solsharo ton kowadja ja en mengeda ni toktok nen Juan. Sota solsharo, dimaw ja to inokdo-an si Juan nodta kad-an

tod badoran. <sup>28</sup> Jet sota toktok nen Juan, inpingkan to et in-akan to so nonta biin anak nen Hirodiyas et to ngo in-akan so nen ineto.

<sup>29</sup> Idi inamta-an ngo nonta ira too nen Juan, sha inday bakdang to et sha indiyang.

*Pinekan nen Jesus sota dimen dibon totoo ja imonod son si-kato*

<sup>30</sup> Sota ira apostol nen Jesus ja inbetkag to, imoli ira di et esanop ira son si-kato. Jet insod-sod sha son si-katon emin sota dingdingkara tan intoro sha nodta dinawdaʻwan sha.

<sup>31</sup> Jet inkowan nen Jesus son si-kara ey, “Eti, ondaw kitod sakey ya dogad ja abos tayo say man-ibdey kayo ni otik.” Tep eman-sisina-dat i eshakil la totoon kaon-motok nodta kad-an sha; isonga ayshiy ʻwaya shen angken meng-an.

<sup>32</sup> Jet siya, nandogan ired bangka et dimaw ma ira shima naydasin na dogad ja enshiy totoo.

<sup>33</sup> Nem eshakil i toon engasas ni indaw sha la, jet inimatonan sha ira. Jet say inpasing ira nonta toon nankedapo shi eshakil la dogad, kinano-an sha ngon nan-akad, jet epangdo iren mimotok nodta dogad ja daʻwan nen Jesus.

<sup>34</sup> Idi mandisaag si Jesus nodta bangka, inon-an to ira sota eshakil la toon nay-aspol et naysemekan na pasiya son si-kara, ta say inpangidmang to son si-kara, singa na-na-josan ira ja enshi malay namnama shen pansigshan. Singa sota kalniro iren nay-oway ja enshiy emengajowan son si-kara. Jet eshakil i intoro to son si-kara.

<sup>35-36</sup> Idi enasʻwil malay akew, sota ira too nen Jesus, dimaw ira di son si-kato jet kowan sha ey, “Apo, arawī met iyay ya dogad shi kebalbaley, isonga pansisi-jan mo ira jay ya totoo say ira di koma

mengenap ni tongkalen shen kenen sha shima kad-an ni totoo. Edabi met mala.”

<sup>37</sup> Nem simongbat si Jesus ja kowan to ey, “I-akniyo et ira ni kenen sha.”

Kowan ma nonta too to ey, “Apay si-kami aya i en menongkal ni kenen sha? Adipay banol ni showen dasos emoy kasto-en mi!”

<sup>38</sup> Kowan nen Jesus ey, “Pigen boknol la tinapay i ʻwara son si-kayo? Jo on-i.”

Sha binidang et inkowan sha son Jesus ey, “Dima, tan ima pay i showen piskaw.”

<sup>39</sup> Jet inkowan nen Jesus so nonta ira totoo ey ontongaw ira, ja mandinasin konod eshakil la gropo, tep mapteng i edet nodtan.

<sup>40</sup> Jet siya, ekalbat iren timongaw, ja sandedasos i ʻwared sakey ya kalbat, tan imay sandi-men polo shi eshom ma kalbat. <sup>41</sup> Jet si Jesus, inda to sota tinapay tan sota showen piskaw, intangkak tod naykayang jet nan-iyaman son Apo Shiyos. Idi naksheng nga nan-iyaman, shinowashowa to sota tinapay asan toka i-kan so nonta ira too to, ja si-karay mengi-weshis so nonta ira eshakil la totoo. Jet inpaiweshis to mowan sota showen piskaw so ira nonta totoo. <sup>42</sup> Sota ira totoo, engan iren emin et napsel ira. <sup>43</sup> Idi naksheng iren engan, inolnong ira nonta too nen Jesus sota ebay-an ja eg kinan ira nonta totoo ja tinapay tan piskaw, jet say na-ol-nong, sampolo tan showen basket, ja nankepno. <sup>44</sup> Jet say kabebilang ira nonta totoo ja engan, dimen dibon daki, powira ira sota bibii tan a-anak, ja eg naybilang.

*Nan-akad si Jesus nodta tapew ni shanom*

<sup>45</sup> Idi naksheng iyay, inkowan nen Jesus so nonta ira too to ey, “Pandogan kayod ma bangka

et angken mepangdo kayon on-daw shima shemang niya baybay, shima siyodad ni Bitsaida. Jet si-kak, pansisi-jan ko nin ira ja eshakel la totoo.”

<sup>46</sup> Jet idi indekjas to ira, timiyed shima shontog ja en manshewat so nen Apo Shiyos. <sup>47</sup> Jet edabi-an nodtan ja a-abos to.

Nem sota bangka ja nando-ganan ira nonta too to, imarawi ma nodta kilig ni baybay. <sup>48</sup> Inon-an nen Jesus ey ireka mandikat ni shaka pan-ekad shi baybay tep emansheshagem et nay-aspol pay son si-kara i shagem. Isonga idi daem, dimaw si Jesus son si-kara ja nan-akad shima tapew ni shanom. Istay dabsan to ira, <sup>49</sup> nem sota ira too to, inon-an sha ali ja eman-ekad shima tapew ni shanom, jet kowan sha ey banig i inon-an sha. Isonga kimeljaw ira, <sup>50</sup> tep emin ira, ireka mankel-ew ni in-asas sha so.

Nem si Jesus, imesel la shagos son si-kara, ja kowan to ey, “Pesed! Karekayo ontakot, tep si-kak iyay!”

<sup>51</sup> Jet idi ekilokan ma ngos Jesus nodta bangka, simalsheng ma sota shagem. Sota too to, nasshaaw ira, <sup>52</sup> tep eg sha pay laeng inewatan ey eg nagshengan i kabedinan nen Jesus, angken inon-an sha sota inparakelan nen Jesus so ni tinapay. Etangkan pay laeng i nemnem sha.

*Inpamapteng nen Jesus sota emanpansekit shi Ginisarit*

<sup>53</sup> Jet nontan, intoloy shen bimaliw et simabi ira nodta nayshemang nga dogad ja kowan sha ey Ginisarit. Jet insinged sha sota bangka. <sup>54</sup> Idi kima-jat ira nodta kilig ni baybay, inimatonan ira nonta totoo nodtan na dogad ey si Jesus, <sup>55</sup> jet nansisi-jan sota ira totoo ja dimaw nodta kedogadogad ja sha al-en sota ira emanpansekit. Jet sota shemagen

shen kad-an nen Jesus, si-katoy pengidawan sha ni toon emanpansekit. <sup>56</sup> Angken toway dawan nen Jesus nontan — shi siyodad, shi baryo, ono shi angken nganton kawad-an ni too — wáren kenshat i emaysespa ja totoon emansekit, jet kinshaw sha ni olay son si-kato ey no mebedin, angken sota kajaran ni baro to i pishaten sha say onmapteng ira. Jet emin sota ira emirat son si-kato, mimapteng ira.

## 7

*Inkowan nen Jesus i ngaaw wa aramid nonta ira Parisiyo*

<sup>1</sup> Sota ira Parisiyo tan sota eshom so nonta ira mamaistoro ni dinteg ni Hodiyo ja edapod Jerusalem, ira nay-aspol son Jesus.

<sup>2</sup> Inon-an sha sota eshom so nonta too nen Jesus ja ireka mengan ey eg ira nin nanbolo, jet shaka paninemnem ey edogit mala iren too.

<sup>3</sup> Tep emin na Hodiyo — agdalo iray Parisiyo — ampet manbodo ira nin asan ireka mangan, tep shaka patkin pasiya sota ogadin inbangon ni apo sha nonta bayag da. <sup>4</sup> No mepewil ired malkaro, ampet odsan shay bakdang sha asan ireka mangan, ta shaka ibilang ey waray edogit ta naypeket son si-kara alid malkaro ja kawad-an ni eshakel la totoo. Eshakel pay i shaka on-onora ja ogadira: kaspangarigan sama ira maypangkep ni ki-wan ni tasa, takori, tan kambang. <sup>5</sup> Isonga inbag-an ira nonta Parisiyo tan mamaistoro ni dinteg si Jesus, ja kowan sha ey, “Apay nga sama ira toom ket eg sha patien sota sigod ja ogadi nonta bayag da? Ireka mengan ey eg ira nin manbodo.”

<sup>6</sup> Si Jesus, sinongbatan to ira ja kowan to ey, “Si-kayo ngon toon kowan to ey wara son Apo Shiyos ni emin na poso to nem waray pangkep jon ngaaw! Agpayso ey

si-kayo sota kaytoshongan nonta padto nen Isaias nonta bayag da ja esel nen Apo Shiyos met laeng, ja kowan to ey,

‘Sajay iren too, shi bongot bengat i engintegan ni shaka panshedjaw son si-kak, nem shi nemnem sha, arawi son si-kak. <sup>7</sup> Enshiy silbi ni shaka panshedjaw son si-kak, tep say shaka itodtoro ni olay, sota edapo met laeng shi nemnem ni si-karen too, asan sha mango ikowan ey bilin kono nen Apo Shiyos.’ Kowan ni esel nen Apo Shiyos ja naypadto.

<sup>8</sup> “Jet si-kayo, joka ibiyang sota koston bilin ja edapo son Apo Shiyos, ey joka et ngo mowan nemnemnema i ogadi ni too!”

<sup>9</sup> Inkowan pay nen Jesus son si-kara ey, “Kayoka takal ja mengibiyang ni koston bilin ja edapo son Apo Shiyos, say kowan jo ey ki-detan joy ogadiyo! <sup>10</sup> Kaspangarigan say sakey ya bilin nen Apo Shiyos ja joka ibiyang, sota kowan to ey, ‘Shayaw mo si amam tan si inam’, tan sota kowan to pay ey, ‘Sota toon ngaaw i toka ikokowan so nen ameto ono si ineto, kenshat ta mebono.’ <sup>11</sup> Nem si-kayo, say joka itoro, kowan jo ey mesepol la ibiyang ni too si ameto ono ineto, no ikowan to ma son si-kara ey, ‘Sota istay i-akan ko son si-kayo ja panbiyag jo koma, si-kato ma niman sota kowan sha ey Korban, tep indasin kon maytodong shi Timplo.’ <sup>12</sup> No sotan i ikowan ni too son ameto ono si ineto, joka iparit i penodong to ma son si-kara. <sup>13</sup> Isonga sajay ya joka pengonod ni ogadiyon joka itoro, inpaskit jo nodta koston bilin nen Apo Shiyos, ja singa enshiy silbi to. Jet aliwen sajay bengat, no diket eshakil i kait niyay ya ngaaw wa joka dagdag-a ni olay!”

<sup>14</sup> Jet si Jesus, tina-wal to ira sota totoo ey ondaw ira di son si-kato jet kowan to son si-kara ey, “Itnengi jon emin iyay ya ikowan ko son si-kayo jet awatiyo.

<sup>15</sup> Kowan ira nonta Parisiyo ey basol kono no eg kito manbodo asan mangan, ja si-katoy ondogit so ni nemnem. Nem aliwen sota ikem-ot jod bongot ja tetdenen jo i ondogit son si-kayo, no diket say ondogit so ni too, sota esel ton emedepo did poso to tan nemnem to. <sup>16</sup> Niman i waray waya jon mengitneng niyay ya naka panikowan, isonga singpet jon itenengan.”

<sup>17</sup> Idi bintawan nen Jesus sota eshakil la totoo, ja simekep nodta baley, insho-pet nonta ira too to no ngarantoy olog nonta arig ga inkowan to la.

<sup>18</sup> Jet si Jesus simongbat ja kowan to ey, “Apay angken si-kayo, eg kayo maka-aw-awat? Apay eg jo amta ey sota maykem-ot shi bongot ket eg mebedin na si-katoy ondogit so ni nemnem ni too? <sup>19</sup> Tep eg met manshedan shi poso, no diket say dawān to, shi ekes, jet onbo-day met laeng.” (Say sakey ya kaytoshongan niyay den inkowan nen Jesus, eg mesepol la mengidin i angken nganton mekan.)

<sup>20</sup> Jet intoloy nen Jesus ey, “Say agpayson kaondogit ni too, sota esel ton emedepo did poso to tan nemnem to. <sup>21</sup> Ta say kedepo-i ni ngaaw wa pangkep ni too, shi nemnem to. Isonga waray ememii tan emekileki, <sup>22</sup> waray emengibot, waray ememono, waray emengamkam ni kompormi, tan waray toon maledamsis. Isonga wara pay iray emenaol ni kait to, waray toon enshiy baing ton mandeka ni angken nganto, waray ma-epal, waray emenomang ni kait to, waray edastog, tan wara pay iray

eshom ma mandeka ni ekalkalasin dokodokon aramid. <sup>23</sup> Emin ira jay ya ngaaw, nankedapod nemnem ni too jet sotan iray kaondogit ni too ja mankebol ni panbesolan to.” Kowan nen Jesus.

*Sota kaba-deg ni pamati ni sakey ya biin aliwen Hodiyo*

<sup>24</sup> Nontan ma si Jesus, indokas to sotan na dogad jet dimaw shi sakey ya dogad ja nay-esop shi siyodad ni Tira. Kowan to ey manpokok nin shi sakey ya baley shiman, nem eg mebedin. Inamta-an shagos ni totoo nodtan ey wares Jesus, <sup>25-26</sup> jet wares shagos i simabi alin bii ja aliwen Hodiyo ja poli nonta sigod ja too nodtan na dogad. Sajay ya bii, waray anak ton bii ja pingketan ni dimonyo; isonga idi shinemag to ey wares Jesus, dimaw ali et nantalimokod shi sango-an nen Jesus et ekika-kaasi son Jesus ey pebtik to sota dimonyon pimeket nodta anak to.

<sup>27</sup> Say songbat nen Jesus son si-kato, in-aknan to ni arig, ja kowan to ey, “Mepekan koma nin i a-anak. Aliwen nebeng ja nak pekewas sota istay para a-anak ja i-akan ko so ni aso.”

<sup>28</sup> Nem inewatan nonta bii sota arig to, jet kowan to ey, “Owen niti apo, amtak ita kowan mo. Nem angken sota ira aso shima naydoong ni damisaan, mebedin met ja manbiyag ira nonta emakas shi damisaan na kepengani ni a-anak!”

<sup>29</sup> Simongbat si Jesus so nonta bii ja kowan to ey, “Kostoy songbat mo. Angken on-akad ka ma niman, tep himetik mala sota dimonyo ja pimeket nodta anak mo.”

<sup>30</sup> Jet idi mimotok sota bii shi baley to, simbi to sota anak ton emansheshokol shi katiri ja mimapteng ma. Namtik da sota

dimonyon istay pimeket son si-kato.

*Inpamapteng nen Jesus sota toon omel*

<sup>31</sup> Idi nan-oli si Jesus ja edapo did ma dogad ja kasekopian ni Tira, shindan toy Sidon asan ma manshalan nodta naykawa ni dogad ja kowan sha ey Dikapolis, ingkato nodta baybay shi Galilia.

<sup>32</sup> Jet in-ilaw ni too son si-kato i sakey ya toon etoleng tan eg metongolan na polos i esel to. Jet shinewat sha son Jesus ey pishaten to kono say onmapteng.

<sup>33</sup> Si Jesus, to indasin sota etoleng nga too, ja bintangawan sha sota eshakil la too, jet idi showa bengat ira, indolot nen Jesus i kalomot to shi showen tangida nonta etoleng. Timopsha si Jesus et pinishat toy shila nonta etoleng, <sup>34</sup> asan ma ketangkak shi naykayang. Ngimedesas si Jesus jet kowan to so nonta etoleng, ni esel shen Hodiyo ey, “Ipata!” (Say olog nonta inkowan nen Jesus, “Kalokati ka!”) <sup>35</sup> Sotan ey mebedin men mantetneng sota istay etoleng, jet kasta met sota toka pandikat ja on-esel: mapoot may toka pan-a-sel.

<sup>36</sup> Jet kowan ma nen Jesus so nonta ira totoo ey, “Karejo ikokowan iyay so ni angken sipa.”

Nem angken intalengteng nen Jesus i bilin son si-kara, ey eg sha pa-amta shi eshom, mas pay et ja inshamashamag sha sota kaskasshaaw wa dingka to. <sup>37</sup> Jet nasshaaw wa pasiya sota ira totoo, jet kowan sha ey, “Emin na kedagdag-a nen Jesus, mapteng. Angken sota ira nanketoleng, toka pantetneng, tan sota nanka-omel, toka pa-sel.”

## 8

*Sota maykepinshowen inparakelan nen Jesus ni ootik ka mekan*

<sup>1</sup> Nontan na timpo, esinop mowan i eshakil la totoo, jet nabosan ira ni kenen sha. Tina-wal nen Jesus ira sota too to jet kowan to son si-kara ey, <sup>2</sup> “Naka kaasi-ira ja totoo, ta tedon akew sha niman ja wared jay son si-kak jet enshi may kenen sha. <sup>3</sup> Jet no pa-ekad ko ira ja eg nin mengan, baka onkapoy ira shi shalan.”

<sup>4</sup> Jet sota ira too nen Jesus, kowan sha ey, “Toway en pengalan ni maypekan so iren ja eshakil la totoo? Enshi met i baley shiyay ya dogad.”

<sup>5</sup> Jet si Jesus, kowan to son si-kara ey, “Pigen boknol la tinapay sota wára son si-kayo?”

Simongbat ira ja kowan sha ey, “Pito.”

<sup>6</sup> Jet si Jesus, inkowan to so nonta ira totoo ey ontongaw ira nodta bo-day. Inda to sota piton boknol la tinapay et naniyaman so nen Apo Shiyos asan toka showashowa-a. In-akan to so nonta ira too to say si-karay mengiweshis so nonta ira totoo, jet tinongpal sha. <sup>7</sup> Jet wára pay i piskaw, nem aliwén eshakil. Naniyaman mowan si Jesus son Apo Shiyos, jet inkowan to so ira nonta too to ey iwáris sha ngo sota piskaw so ira nonta eshakil la totoo. <sup>8</sup> Jet emin ira sota eshakil la totoo, engan ira et napsel iren emin. Jet idi naksheng ira, sinanop sha sota ebay-an ja eg sha kinan et ondaw wa piton basket. <sup>9</sup> Sota engan nontan, ondaw wa epat ta dibo.

Jet nontan ma, inpa-ekad to ira sota totoo. <sup>10</sup> Jet si Jesus, pati sota ira too to, ira nandogan shagos nodta bangka jet dimaw ired ma dogad ja sakop ni Dalmanota.

*Piyan nen Jesus ja eg onoran nonta ira too to sota ira Parisiyo*

<sup>11</sup> Sota ira Parisiyo, dimaw ira so nen Jesus ja sha peshasen ni

dedamsis sha. Isonga kowan sha son si-kato ey mandeka ni milagro ja kowan sha ey asanan sha so no podnon inbetkag ali nen Apo Shiyos.

<sup>12</sup> Nem si Jesus, ngimed-as sa pasiya, asan toka ikowan ey, “Apay nga sajay ira maramen too niman ket shaka pan-ibaga sota kowan sha ey asanan sha so no si Apo Shiyos i podnon engibetkag son si-kak ali? Agpayso iya ikowan ko son si-kayo. Enshiy milagro ja en maypa-sas son si-kayo niman.”

<sup>13</sup> Sajay i kowan nen Jesus asan toka ira ilekjas. Nandogan mowan shi bangka et dima-jat iren ondaw nodta shemang ni baybay. <sup>14</sup> Nem dinibkan sha gayam ja engita-jon ni balon sha. Say intakin sha bengat nodta bangka ket sakey ya boknol la tinapay.

<sup>15</sup> Jet si Jesus, binidin to ira ja kowan to ey, “Tanshaaniyo sota singa para debag ni tinapay ja wára so nonta ira Parisiyo tan so nen Ari Hirodis.”

<sup>16</sup> Nem sota ira too nen Jesus, ireka mansosongbat bengat, ja kowan sha ey, “Dinibkan tayo eshan ja engita-jon ni balon tayon tinapay.”

<sup>17</sup> Si Jesus, indasin to ey sotan i shaka pansosongbati et kowan to son si-kara ey, “Apay nga kayoka mansosongbat ni ka-enshi ni balon jo? Apay eg jo pay laeng ewatan aya? Apay etangken pay laeng i nemnem jo? <sup>18</sup> Itan i matejo; apay nga eg jo asen? Itan i tangidayo; apay eg kayo aya onte-neng? Dinibkan jo aya? <sup>19</sup> Nonta inosal ko sota dimen boknol la tinapay ni inpamakan ko nonta ira dimen dibon too, pigen basket ja nankepno i sina-nop jo ja binayan sha?”

Kowan sha ey, “Sawal ni showa.”



<sup>20</sup> Kowan pay nen Jesus ey, “Jet nonta inosal ko sota piton boknol la tinapay ni inpamakan ko nonta ira epat ta dibon too, pigen baskit ja nankepno i sina-nop jo ja binayan sha?”

Kowan sha ey, “Pito.”

<sup>21</sup> Jet kowan nen Jesus ey, “Jet eg jo pay laeng ewatan?”

*Inpamapteng nen Jesus i toon ekorab shi Bitsaida*

<sup>22</sup> Mimotok ira maled Bitsaida et shiman, in-ilaw ni tood man i toon ekorab son Jesus jet inshawat sha son Jesus ey pishaten to kono say ma-kal sota korab to. <sup>23</sup> Shinewat nen Jesus sota ekorab et inshalan to led naydasin nodtan na kawadan ni totoo. Tinopsha-an toy mata nonta ekorab, asan toka isakpal i takday to so nonta ekorab. Jet inbag-an to nem waray toka ishemang.

<sup>24</sup> Idi bikaten nonta ekorab i mateto, kowan to ey, “Owen — waray naka ishemang nga too, nem singa kiyew i naka pengesas son si-kara. Nem eman-ekad.”

<sup>25</sup> Pinishat nen Jesus mowan i mata nonta ekorab, jet idi onmorag sota ekorab, na-kal la pasiya sota korab to et mapoot i toka pengesas. <sup>26</sup> Jet inpa-ekad nen Jesus sota istay ekorab, ja kowan to ey, “Eg ka nin on-oli shima edapo-an ta di.”

*Inbolikas nen Pedro ey si Jesus i inbetkag ali nen Apo Shiyos*

<sup>27</sup> Si Jesus tan sota ira too to, dimaw ira nodta sakop ni Sisaria Pilipos, jet idi wara ired shalan, inbag-an to ira sota too to, ja kowan to ey, “Ngarantoy kaikowan ira ni totoo ni maypangkep son si-kak? Eg sha aya pantatabalan nem sipa-ak?”

<sup>28</sup> Jet sota ira too to, simongbat ira ja kowan sha ey, “Eg met nan-inges i shaka ikowan. Say kowan ni eshom, si-kam kono si Juan ja para bonjag ja etey da, nem sota

ira eshom, kowan sha ey si-kam si Elias ono sakey so nonta ira eshom ma para padto nonta bayag da ja nan-ongal mowan ali.”

<sup>29</sup> Jet si Jesus, inbag-an to mowan ira ja kowan to ey, “Jet si-kayo ngay? Ngaranto ngoy kowan jo ni maypangkep son si-kak?”

Simongbat si Pedro ja kowan to ey, “Si-kam sota inpadtora nonta bayag da ey ibetkag ali nen Apo Shiyos ja mengisedakan.”

<sup>30</sup> Jet si Jesus, binidin to iren pasiya ey eg sha ikokowan ni angken sipa ey si-kato sota naypadto nonta bayag da ja mengisedakan.

*Pan-idawag nen Jesus sota pandikat to di*

<sup>31</sup> Jet manshoki ma nontan, kaipinpinshowa nen Jesus so nonta ira too to ey siyen si-kato sota naypadton Anak ni Too, nem mesepol met laeng nga manda-kam ni eshakil la digat, ta sota ira pangolo ni Hodiyo, tan sota ira apo ni papashi, tan mamaistoro ni dinteg, bedawen sha kono, jet anongosto ma ey bono-en sha. Nem kowan to ey no maykatdon akew, manbiyag mowan. <sup>32</sup> Indiritso ton inkowan na emin ira jay; enshiy polibas to.

Jet nontan ma, si Pedro, to indasin si Jesus et inseg-ang to tep inkowan to ey mebono.

<sup>33</sup> Nem nanposipos si Jesus et insi-ning to iray too to, asan toka ngo iseg-ang si Pedro, ja kowan to ey, “Betawimak, si-kam ma Satanas! Say nemnem mo, aliwen sota plano ja nemnem nen Apo Shiyos, no diket sota etoo-an na nemnem.”

*Edigat i pengonod son Jesus, nem epateg i mekon-od ali shi kanoran*

<sup>34</sup> Tina-wal to ira sota eshakil la totoo, pati sota ira too to, jet inkowan to son si-kara ey, “No

sipay makapiyan ja on-onod son si-kak ja manbedin ni took ni olay, mesepol la si-kak bengat i nemnemnemen to, ja ibiyang ton emin i kompormi. Tan mesepol la enosan to pay ya angken may-bebaing ono mebono ja inges to sota toon emasan ni koros ja kaydansa-an to shorog. <sup>35</sup> Sota toon entapi toy biyag to ja kowan to ey ensikshal la metey maypangkep son si-kak, si-kato et ngo mowan i mepokaw i biyag to. Nem sota toon eg to kawanan i bakdang to maypangkep son si-kak, ono sota mapteng nga shamag ja maypangkep son si-kak, si-kato et ngo mowan i i-aknan nen Apo Shiyos ni biyag ja enshiy to engintegan. <sup>36</sup> No kaspangarigan ey kinokowa ni sakey ya too i emin na wared ja dobong, enshiy silbi nontan na kinokowa to, no eg to kon-oren sota biyag ja enshiy to engintegan. <sup>37</sup> Enshiy silbi nontan na inpasing to, ta sotan na biyag i epateg ga pasiya, ja enshiy to kaysa-datan na angken nganto. <sup>38</sup> No sota toon embaing nga mengikowan ey si-kato ket took, ono embaing nga mengikowan ni esel ko no maydaok shi totoon eg mannemnem so nen Apo Shiyos tan toon mabesol, ibaing ko ngo sotan na too no ondawak alin mantoshay. Agpayson si-kak sota kowan nonta para padto nonta bayag da ey Anak ni Too, jet sotan alin idaw ko mowan, say kasesaad ko, inges ko met laeng i kasesaad nen Apo Shiyos. Tan may-odop ali sota ira anghil to son si-kak.”

## 9

<sup>1</sup> Jet kowan pay nen Jesus ey, “Agpayson wáray eshom son si-kayod jay ja eg metey ingkatod asen sha sota pantoshayan nen Apo Shiyos, jet ebadeg ga pasiya aliy panakabalin nen Apo Shiyos no timpo alin ketongpalan to.”

*Nanbalin ni emenenili i bakdang nen Jesus nodta shontog*

<sup>2</sup> Idi wáray enem ma akew ja edabas da ni engikowanan nen Jesus niyay, inodop to si Pedro, si Santiago, tan si Juan, jet timiyed ira ni a-abos sha shima shontog ga ekayang. Jet idi mimotok ira nodtan, inon-an shen nanbaliw i itsora to ja emenenili. <sup>3</sup> Jet sota baro to, emandinging nga pasiya, tan empotin pasiya, ja enshiy to kay-ingesan na kapoti-an na baro shiya dobong ja inapoti ni too. <sup>4</sup> Jet nanpa-sas ma si Elias nen Moises, jet ireka mekitabtabal so nen Jesus.

<sup>5</sup> Jet si Pedro, kowan to son Jesus ey, “Apo, mapteng i kawasha tayod jay. Kosto gayam nem mengemag kami ni tedon kampod jay: sota sakey para son si-kam, sota sakey para son Moises, tan sota sakey para so nen Elias.” <sup>6</sup> (Sajay i inkowan nen Pedro tep eg to am-amtay ikowan to; ta epaladoy takot ira nonta tedon too nen Jesus ja inodop to.)

<sup>7</sup> Jet nontan, dimespag aliy kolpot jet dinikopan nonta kolpot ira. Jet wáray esel ja edapo nodtan na kolpot ja intenengan sha, ja kowan to ey, “Sajay i Anak ko jet ensemek ko. Isonga patiyon emin i ikowan to.”

<sup>8</sup> Jet idi ireka manmodimodi, enshiy met i eshom ma wára nodtan, no diket si Jesus bengat i kait sha nodta shontog.

<sup>9</sup> Jet idi ireka manshedong ja edapo nodta shontog, binidin nen Jesus ira sotan na tedon too to ey eg sha ikokowan so ni eshom, ja angken sipa, sota inon-an sha nonta wára ired ma shontog. Jet inkowan to ey asan shaka ikowan iyay nem man-ongal ma ali sota kowan sha ey Anak ni Too. <sup>10</sup> Jet sotan iren too to, pinatira iyay ya inbilin nen Jesus, nem shaka met laeng tabtabala shorog nem

ngarantoy piyan nen Jesus ja a-selen nonta inkowan ton “pan-ongal ma ali”.

<sup>11</sup> Jet sota ira too to, inkowan sha son Jesus ey, “Say toro nonta mamaistoro ni dinteg, kowan sha ey mepangdo alis Elias asan ma sota naypadto nonta bayag da ey ibetkag ali nen Apo Shiyos ja mengisedakan. Jet ngantoy ya sajay?”

<sup>12</sup> Simongbat si Jesus, ja kowan to ey, “Owen, agpayso ja si Elias nin aliy mepangdo jet si-katoy mengi-odi nonta kimapoy ya pama-ti ni totoo say onkedsang ma. Nem ima pay i sakey ya padto maypangkep nonta kowan sha ey Anak ni Too: mesepol konon dakaman toy eshake! la digat tan dedamsis ni totoo. <sup>13</sup> Nem iyay i ikowan ko son si-kayo maypangkep mowan nonta inbaga jo. Si Elias, naksheng alin dimaw, jet dingkara son si-kato i kompormin kedsel la ninemnem sha. Tep sotan met laeng i naypadto nonta bayag da ja mepesamak son si-kato.”

*Inpamapteng nen Jesus sota nga-ngen mankelshas ja waray dimonyon pimeket son si-kato*

<sup>14</sup> Idi mimotok shi Jesus ja edapo ali nodta shontog, simbira sota ira too ton tinaynan sha, ja dinikmot gayam ni eshake! la totoo. Tan waray mamaistoro ni dinteg ja emekisongsongbat son si-kara. <sup>15</sup> Dimibag ira sota eshake! la too ni in-asas sha so nen Jesus ja emanmotok. Nan-odop da iren en mengaspol son Jesus, jet inkowan sha ey ebadeg i imdeng sha ni inmotok to.

<sup>16</sup> Inbag-an nen Jesus ira, ja kowan to ey, “Ngantoy joka pansongsongbati nonta ekay?”

<sup>17</sup> Imesel may sakey ya toon wara nodtan na karakdan, ja kowan to ey, “Apo, in-ilaw ko ali

son si-kam iya anak kon daki, ta waray dimonyon kaonsabi son si-kato ni olay et si-katoy kabol la eg to pan-a-selan. <sup>18</sup> No onsabi sota dimonyo, toka bigla-en to-dangen shi bo-day, jet eman-o-osab i bongot to, ey toka panngedetngat i sangi to, tan kaonkenkenteg. Inkowan ko so nita toom ey pebtik sha sota dimonyo, nem eg sha met binaalan.”

<sup>19</sup> Jet si Jesus, kowan to ey, “Enshiy pamatiyo eshan! Ebayagak met shiyay ja eman-enos son si-kayo, nem eg jo pay laeng patien i panakabalin nen Apo Shiyos! Ilaw jo did jay son si-kak sota nga-nga.”

<sup>20</sup> In-ilaw sha sota nga-nga son Jesus et idi inon-an nonta dimonyon pimeket nodta nga-nga si Jesus, inpankenkenteg to sota nga-nga. Jet eto-dang sota nga-nga, ja emanpodipodig, ey eman-o-osab i bongot to.

<sup>21</sup> Inbag-an nen Jesus sota ama ni nga-nga, ja kowan to ey, “Pigan i nanshogi-an niyay?”

Simongbat sota ameto, ja kowan to ey, “Nanshogi nonta ka-ootik to pay laeng. <sup>22</sup> Eminpigen kepe-shasa nonta dimonyo ja bonoen: toka ikespig shi apoy ono shi shanom. Nem no baalan mo iyay, kaasi-i jokami et tolongi jokami.”

<sup>23</sup> Kowan nen Jesus ey, “Singa kowan mo ey ekak emo baalan? Sota toon ememati son Apo Shiyos, kabedinan ton emin i angken nganto.”

<sup>24</sup> Sotan ma ey inkedsang nonta ama ni nga-nga i esel to, ja kowan to ey, “Naka memati, nem tolongimak shi naka pankodangi!”

<sup>25</sup> Idi inon-an nen Jesus ja emankai-sop sota eshake! la totoo son si-kato, sinelkag to sota dimonyo, ja kowan to ey, “Si-kam ma dimonyo ja kabol la eg pantetnengan tan eg pan-a-selan niya nga-nga, ikowan ko son si-

kam, betik ked ta nga-nga, jet kareka ma on-oli-oli son si-kato!”

<sup>26</sup> Kimeljaw sota dimonyo, asan toka pankenkenteg mowan sota nga-nga, asan kabetik mala. Jet singa etey i inpangidmang nonta totoo so nonta nga-nga. Isonga kowan ni karakdan son si-kara ey, “Ayshi — etey da.”

<sup>27</sup> Nem shinewat nen Jesus et inpa-tan to. Jet imetan nga agpayso sota nga-nga.

<sup>28</sup> Idi onsekep da si Jesus nodta baley, ey abos sha mala shi nay-daem, inbag-an ira nonta too to, ja kowan sha ey, “Apay nga eg mi binaalan na inpabtik nontan sota dimonyo so nontan na nga-nga?”

<sup>29</sup> Kowan to son si-kara ey, “Eg mebedin na pebtik ira jay ya kalasin dimonyo nem eg kita nin manshewat ni tolong so nen Apo Shiyos.”

*Inpa-amta mowan nen Jesus sota ketey to di*

<sup>30</sup> Indekjas sha ma sotan na dogad ja kawad-an sha, jet nanshalan ira shi Galilia. Eg piyan nen Jesus ja amta-an ni totood man ey ondabas ira, <sup>31</sup> tep waray toka pan-itoro nontan so nonta ira too to, ja kowan to ey, “Si-kak sota kowan ni para padto nonta bayag da ey Anak ni Too, nem may-ewatak so nonta ira toon makakontra son si-kak, jet si-karay memono son si-kak. Nem no maykatdon akew ni ibono sha-ak so, manbiyagak met laeng.”

<sup>32</sup> Nem eg sha inewatan iyay ya kowan nen Jesus. Piyan shen ibaga nem ngarantoy olog niyay ya inkowan to, nem embaing iren mengibeka.

*Sota mengibeba ni bakdang to, si-kato et ngo mowan i mayngeto*

<sup>33</sup> Idi mimotok ira shi Kapir-naom, dimaw ira shima baley ya shaka pan-iyani. Jet inbag-an nen Jesus sota ira too to, ja kowan to

ey, “Ngaran nonta joka pantabtabala shi shalan ali?”

<sup>34</sup> Nem eg sha sinongbatan, tep say tabtabal sha ni shaka pan-ekad ket ireka mansosongbat no sipa son si-kara i kangeto-an.

<sup>35</sup> Timongaw si Jesus et tina-wal to ira sota sampolo tan showa ja apostol to, jet kowan to son si-kara ey, “No sipay too ja piyan ton si-katoy mandesin ni shayaw, mesepol la panbedin toy bakdang to ja kabeba-an tan man-obda ni pansigshan ni kait to.”

<sup>36</sup> Jet ena-wal si Jesus ni sakey ya nga-nga jet inpaledjat to nodta nankinaw-an ira nonta too to, jet idi inakwal to sota nga-nga, kowan to so nonta too to ey, <sup>37</sup> “No sipa ken too ja mapteng i pesing mo so ni inges niyay ya nga-nga maypangkep ni semek mo son si-kak, si-kak met laeng i tinoshong nonta inpasing mo. Jet no si-kak i pesingan mo so ni mapteng, say toshongen nonta dingkam, si Amak ja engibetkag son si-kak ali.”

*“Sota aliwen makakontra son si-katejo, si-katoy kait tayo”*

<sup>38</sup> Kowan nen Juan ey, “Apo, waray inon-an min too ja emengosal ni ngaran mo say onbetik iray dimonyo ja pimeket shi totoo. Jet inpasalsheng mi tep aliwen kait tayo.”

<sup>39</sup> Nem kowan nen Jesus ey, “Karejo iparit i i-osal to so ni ngaran ko. Ta no i-esel towak ni sakey ya too, ey metongpal i milagron dag-en to, enshiy pesing ton onsomang son si-kak nem sakey ya akew. <sup>40</sup> No sipa sota eg makakontra son si-katejo, si-katoy kait tayo.

<sup>41</sup> “Agpayso iyay ya ikowan ko son si-kayo. Sota toon mengi-kan son si-kayo ni angen santasen shanom ja inomen jo, ta amta to ey si-kak i makatoo son si-

kayo, sotan na toon mengi-kan ni shanom, sigoradon wáray konoren to ali ja i-akan nen Apo Shiyos son si-kato.

<sup>42</sup> “Nem sota istay mengi-kan ni panbesolan ira niya nankebabem emati son si-kak, say panmaptengan nontan na too ket ma-ononan koma ni ebadeg ga bato et en mayteb-ok shima debeng nga baybay. Sotan i panmaptengan to ta engka-jas sotan na keshosa to nem say sota penosa nen Apo Shiyos son si-kato ja pengikesho to no istay itoloy ton panbesol sota kait to.

<sup>43</sup> “Isonga no bilang ey sota sakey ya takday mo ket si-katoy mengi-kan ni panbesolan mo, potol mo. Ta no pa-onong mo, si-katoy kaypedawan mod impiyarno ja kawad-an ni apoy ya eg ma-ma-shep ingkatod ingka. Mapmapteng sota ka-enshi ni sakey ya takday mo, no sotan i kesalbaran mo. <sup>44</sup> (Shima impiyarno, eg metmetey sota ira bigis ja emengan so ni tootod man, tan eg ma-ma-shep sota apoy.) <sup>45</sup> Jet no sota sakey ya sedim ket si-katoy mengi-kan ni panbesolan mo, potol mo. Ta no pa-onong mo, si-katoy kayteknalan mod impiyarno. Mapmapteng sota ka-enshi ni sakey ya sedim, no sotan i kesalbaran mo. <sup>46</sup> (Shima impiyarno, eg metmetey sota ira bigis ja emengan so ni tootod man, tan eg ma-ma-shep sota apoy.) <sup>47</sup> Kasta met sota sakey ya matam: no si-katoy mengi-kan ni panbesolan mo, okit mo et ibong mo. Ta no pa-onong mo, si-katoy kayteknalan mod impiyarno. Mapmapteng sota ka-enshi ni sakey ya matam, no si-katoy kayda-kaman mod pantoshayan nen Apo Shiyos. <sup>48</sup> Shima impiyarno, eg metmetey sota ira bigis ja emengan so ni tootod man, tan eg ma-ma-shep sota apoy.

<sup>49</sup> “Ta emin na totoo, ma-esinan ira ni apoy.

<sup>50</sup> “Isonga iyay i ibanshaan ko son si-kayo. Say asin, mapteng. Nem no ma-enshiy pait to, ja entemnay ma, eg jo mebedin na imowan i pait to.

“Epateg ga pasiya i pan-i-inawatan jon took; isonga mesepol la ma-esinan kayo ni olay.”

## 10

*Sota inpangitoto nen Jesus maypangkep ni pengisi-jan ni asewa*

<sup>1</sup> Indekjas nen Jesus i Kapirnaom et dimaw nodta sakop ni Jodia ja wáred baliw ni ebadeg ga pa-dok ja kowan sha ey Jordan. Jet nontan, eshakel mowan na pasiya i totoo ja esa-nop son si-kato, jet intod-an to ira, tep si-katoy toka pesing ni olay.

<sup>2</sup> Nontan, wára ngo aliy dimaw son si-kato ja Parisiyo, jet kowan sha ni dedamsis sha ey peshasen sha si Jesus. Isonga kowan sha ey, “Ngantoy moka pengi-odog ni dinteg tayon Hodiyo maypangkep ni pengisi-jan ni asewa? Bolos aya i pengisi-jan ni daki so ni asewa to?”

<sup>3</sup> Simongbat si Jesus, ja kowan to ey, “Ngaran ni inbilin nen Moises son si-kayo ja koston dag-en jo?”

<sup>4</sup> Kowan sha ey, “Intolok nen Moises i pengisi-jan ni daki so ni asewa to. Basta i-amagan tos asewa to ni solat ja isepa to son si-kato asan toka tayni.”

<sup>5</sup> Nem si Jesus, kowan to son sikara ey, “Say kabol la sotan i insolat nen Moises, etangkem i nem-nem jo. <sup>6</sup> Nem aliwen satan nonta pinalsowa nen Apo Shiyos i too, tep say naysolat nonta bayag da maypangkep niyay, kowan to ey, ‘Manshoki nonta pilmiro, pinalsowa nen Apo Shiyos i daki tan bii.’ <sup>7</sup> Jet inbilin to, ja kowan to ey, ‘Ma-alsa sota daki so nen

ameto tan ineto et may-a-shom so nen asewa to. <sup>8</sup> Jet sota showne bakdang, may-eshig ma ey nansaksakey.' Sajay i bilin nen Apo Shiyos. <sup>9</sup> Inpansaksakey nen Apo Shiyos i san-asewa; isonga enshiy nebeng ni toon mengisi-jan ni asewa to." Kowan nen Jesus.

<sup>10</sup> Idi simekep da si Jesus nodta baley, inbag-an mowan ira nonta too to ni maypangkep ni si-jan.

<sup>11</sup> Jet simongbat si Jesus, ja kowan to ey, "No sipay daki ja mengisi-jan ni asewa to, ey mengesawa mowan ni apil la bii, nanbasol nodta epangdon asewa to ja inges to sota emii. <sup>12</sup> Tan kasta met sota bii: no isi-jan to sota asewa to ngon daki, ey mengesawa mowan ni apil la daki, nanbasol met laeng ja inges to sota ekileki."

*Inpalobos nen Jesus ja ondaw ira di sota a-anak son si-kato*

<sup>13</sup> Sota eshom iren too, indaw shay angken na nga-nga son Jesus, ta kowan sha ey say pishaten ton bindisiyonan ira. Nem sota ira too nen Jesus, inseg-ang sha ira sota engidaw ali so nonta a-anak.

<sup>14</sup> Nem idi inon-an nen Jesus iyay, ngaaw i dekna to, jet inkowan to son si-kara ey, "Baybay-iyo ira di sota a-anak ja ondaw ali son si-kak; eg jo iparit. Tep inges iren jay ya a-anak bengat ja ekombaba i mayda-kam shi pantoshayan nen Apo Shiyos. <sup>15</sup> Podno iya ikowan ko son si-kayo. No eg kayo mengewat ni pantoshayan nen Apo Shiyos ja inges toy kepengewat ni a-anak, eg kayo mayda-kam ja onsekep shi pantoshayan nen Apo Shiyos." Kowan nen Jesus.

<sup>16</sup> Jet inakwal nen Jesus sota ira a-anak, jet binindisiyonan to ira ni insakpalan to so ni takday to.

*Si Jesus tan sota baknang*

<sup>17</sup> Idi emanda-jat si Jesus ja ondaw shi dawán to, nanbetik aliy sakey ya too ja nantalimokod shi sango-an nen Jesus, ja kowan to ey, "Maistoro, mapteng ken too. Isonga ikowan mo ga no ngaran-toy dag-en ko say mewad-anak ni biyag ja enshiy to engintegan."

<sup>18</sup> Simongbat si Jesus ja kowan to ey, "Ngantoy mosoka ikowani so ey maptengak? Abos nen Apo Shiyos ja mapteng. <sup>19</sup> Nem no maypangkep nonta biyag ja enshiy to engintegan ja inbagam, amtam sota ira bilin nen Apo Shiyos: 'kareka memono, kareka memii ono mekileki, kareka mengibot, aliwen mo ba-ngaten ja man-a-sel ni aliwen kosto, kareka menaol ni kait mo; tan shayaw mos inam tan amam.' "

<sup>20</sup> Kowan nonta too ey, "Apo, nontan pay laeng nga-nga-ak ingkato niman, inonod kon emin itan na bilin nen Apo Shiyos."

<sup>21</sup> Jet si Jesus, insi-ning to sota too jet nasmekan so nen si-kato, jet kowan to ey, "Wara pay laeng i sakey ya kolang mo. Daw ka, mo ilekon emin sota kokowam et sota dako to, iweshis mo so nonta ira nankebiteg. No sajay i pesing mo, maytedo shi dangit i kabaknang mo. Jet no meksheng nga sotan i pesing mo, kay-eshom ka di so ira niya took!"

<sup>22</sup> Nem idi intenengan nonta too iyay ya inkowan nen Jesus, na-josan na pasiya jet namtik ja ensakit i nemnem to, tep toka tepia i kabaknang ton pasiya.

<sup>23</sup> Jet si Jesus, inpan-eta-etan toy mateto so ira nonta too to et kowan to son si-kara ey, "Edigat ja onsekep i baknang shi pantoshayan nen Apo Shiyos!"

<sup>24</sup> Nasshaaw ira sota too to ni inkowanan to so niyay. Nem inpinshowa nen Jesus mowan, ja kowan to ey, "Si-kayon naka ikarin singa annak ko, emandikat

ta kenshat i angken sipen too ja onsekep shi pantoshayan nen Apo Shiyos — nem mas edigidat pay so ni baknang. <sup>25</sup> Sota animal la kowan sha ey camel, no kas-anoy kalikat to ja on-osok shi ebote ni shakom, mas edigidat pay ya onsekep i bebaknang shi pantoshayan nen Apo Shiyos!”

<sup>26</sup> Jet nasshaaw iren pasiya jet kowan sha son Jesus ey, “No kasta, enshi ngarod i maysedakan?”

<sup>27</sup> Simongbat si Jesus ja kowan to ey, “Agpayson eg kabaalan ni toon mengisedakan ni bakdang to shorong, nem mebedinan nen Apo Shiyos. Tep si Apo Shiyos, kabaalan ton emin.”

<sup>28</sup> Idi inkowan nen Jesus iyay, imesel ma si Pedro, ja kowan to ey, “Karam ngo dibdibkan ey si-kami ket indekjas min emin i kokowa mi nonta nanbalinan mi ni toom!”

<sup>29</sup> Jet si Jesus, kowan to ey, “Podno iya ikowan ko son si-kayo. No sipay engilekjas ni baley to, a-aki to, annak to, bo-day to, ono sota maka-anak son si-kato, kabol ni inpamati to ni bilin ko ono kabol ni pengitoshho to so nonta mapteng nga shamag may-pangkep son si-kak, <sup>30</sup> ebadbadeg ga pasiya i ewaten to: angken niman na kawasha tod ja dobong, manbedin ni sandasos i baley to, a-aki to, ineto, annak to, bo-day to. Tan no man-onod alin akew, kon-oren to pay i biyag ja enshiy to engintegan. Nem pedigaten ngoreshan ni toon eg makakosto son si-kak ni saja maramen biyag niman. <sup>31</sup> Nem eshakey ira sota kowan sha ey si-karay mandesin i ewaten sha, ja kina-agpayso to ket ootik kari. Wara et ngo mowan i kowan ni karakdan ey ootik i ewaten sha, nem eshakey kari.” Kowan nen Jesus.

*Sota maykatdon engikowanan nen Jesus ni maypangkep ni ketey*

*to*

<sup>32</sup> Idi nonta eman-ekad si Jesus tan sota ira too to, ja ondaw shi Jerusalem, epangdo ni ootik si Jesus. Jet sota ira kaon-onod son si-kato, naykel-ewan ira; entakot ira tep ireka mantoshong shi Jerusalem. Inpata-nil nen Jesus ira sota sampolo tan showa ja apostol to et a-abos sha ma. Jet insigod ton inkowan son si-kara i mepesamak ali son si-kato, <sup>33</sup> ja kowan to ey, “Itnengi jo iya ikowan ko son si-kayo. Agpayson si-kak sota kowan ira nonta para padto nonta bayag da ey Anak ni Too. Nem no onmotok kitod Jerusalem, may-ewatak ma so nonta ira apo ni papashi tan ma- maistoro ni dinteg ja makakontra son si-kak. Jet sotan may timpo ja pengikowanan sha ey mebono-ak koma. I-awat sha-ak so nonta ira too ja aliwen kait tayon Hodiyo. <sup>34</sup> Jet si-karay memebaing son si-kak; toptopsha-an sha-ak pay et sepsepdaten sha-ak, asan sha-ak ma bono-a. Nem no maykatdon akew, pan-ongal towak met laeng nen Apo Shiyos.”

*Inshawat nen Santiago nen Juan i pekitoshay sha son Jesus*

<sup>35</sup> Jet nontan, si Santiago nen Juan, ja san-agin anak nen Sibidi, dimaw ira son Jesus, jet inkowan sha son si-kato ey, “Apo, iyay i kekshawen mi son si-kam.”

<sup>36</sup> Jet si Jesus, kowan to son si-kara ey, “Ngantoy piyan jon dagen ko para son si-kayo?”

<sup>37</sup> Kowan sha ey, “No mantoshay ka di, piyan min mekitoshay ngo son si-kam. Itodok mokami ja ontongaw i sakey shi petek ni kanawan mo et sota sakey, ontongaw shi petek ni kanigid mo.”

<sup>38</sup> Kowan nen Jesus ey, “Joka bangatay baga ey eg jo nin nemnemen. Wara aliy tasen napno ni digat jet mesepol la nak inomen.

Kabaalan jo ayen mengenos ja meki-inom nontan? Wara aliy bonjag ja onsabi son si-kak ja epaladon pasiya; kabaalan jo ayen mengenos ja mekibonjag son si-kak?"

<sup>39</sup> Simongbat ira ja kowan sha ey, "Mebedin na enosan mi."

Jet kowan ma nen Jesus ey, "Agpayson mekila-kam kayo ni da-kaman ko di. <sup>40</sup> Nem sota itongaw jo shi petek ni kanawan ko, tan kanigid ko, aliwen si-kak i mengigsheng so. Sajay, para so nonta ira sigod ja insagana-an so nen Amak."

<sup>41</sup> Idi intenengan ira nonta kait shen sampolo ja apostol nen Jesus iyay ya keshaw, ngaaw i deknara son si-kara.

<sup>42</sup> Nem si Jesus, tina-wal to ira jet kowan to son si-kara ey, "Amtayo met i kepesing ira nonta toon emaybidang ey toray ni kompormin ili, tan sota eshom ma toon nankengatoy saad sha. Shaka ipakat i saad sha, ni shaka pengitoshay met laeng so ni sinekopan sha. <sup>43</sup> Nem no si-kayo, aliwen inges nontan i pesing jo so ni sakey tan sakey son si-kayo. Sota kowan to ey si-katoy kangeto-an son si-kayo, mesepol la si-kato et ngo mowan i mengibeba ni bakdang ton man-obda ni pansigshan ni kait to. <sup>44</sup> Jet sota piyan ton si-katoy mandesin son si-kayo, mesepol la panbedin toy bakdang to ni baga-en jon emin. <sup>45</sup> Ta kinapodno to, angken si-kak ja naypadto nonta bayag da ey Anak ni Too, ekak dimaw ali ja pansilbi-an ni karakdan, no diket dimawak ali say mansilbiak son si-kara. Tan say sakey pay ya dinawan ko di, say itolok koy bakdang kon metey, tep si-katoy kaysedakanan ni eshakil la totoo."

*Inpan-asas nen Jesus i toon ekorab shi Jiriko*

<sup>46</sup> Mimotok ira shi Jiriko, jet idi nonta shaka pan-idekjias i Jiriko, eshakil la pasiya sota tootoon imonod son si-kato tan sota ira too to. Jet nodta kalsara, waray toon timongaw nodta naykilig ja emankekkekshaw. Say ngaran to, si Bartimeo ja anak nen Timeo. <sup>47</sup> Idi intenengan to sota kowan ni totoo ey si Jesus ja i-Nasarit i ondabas ali, inkedsang toy esel to, ja kowan to ey, "Jesus! Kaasi-imak, si-kam ma mengibengon son Ari David nonta bayag da!"

<sup>48</sup> Nem sinelkag nonta eshakil la too, ja kowan sha ey, "Eka-eket ka!"

Nem mina-ma to et ja inkedsang toy keljaw to, ja kowan to mowan ey, "Kaasi-imak, si-kam ma mengibengon son Ari David nonta bayag da!"

<sup>49</sup> Kimi-neng si Jesus et kowan to ey, "Tawal jo alid jay."

Jet tina-wal sha sota ekorab, ja kowan sha ey, "Pan-imdeng ka, ta tokaka panta-wala. Etan ka."

<sup>50</sup> Inwalsis nonta ekorab sota insala-waki ton baro to et dinektit toy etan, jet dimaw so nen Jesus.

<sup>51</sup> Jet inbag-an nen Jesus, ja kowan to ey, "Ngarantoy piyan mon itolong ko son si-kam?"

Kowan nonta ekorab ey, "Apo, pan-asas mowak, say man-esasak mowan."

<sup>52</sup> Kowan ma nen Jesus son si-kato ey, "Sota pamatim son si-kak, si-katoy kabol la pan-esasan mo. Angken on-akad ka ma."

Jet nontan, nan-asas sa shagos sota ekorab, jet nay-eshom ma son Jesus ded kalsara.

## 11

*Edadsak i totoo nonta mimotok si Jesus shi Jerusalem*

<sup>1</sup> Nonta nay-esop ma shi Jesus shi Jerusalem ja wara ira shima dogad ja kowan sha ey Bitpag tan Bitania, ja osshong ni shontog



ga kowan sha ey Olibas, engi-betkag si Jesus ni showen too ton mepangdo, <sup>2</sup> jet inbilin to son si-kara ey, “Daw kayod ma dogad ja naysongbob et no onmotok kayo, wáren shagos i asen jon kilaw ni animal la donkey, ja naypagod. Sajay ya kilaw, eg pay laeng ek-abkabajo-an. Okasiyo et alejo did jay. <sup>3</sup> No wáray mengibeka son si-kayo no ngantoy joka pan-okasi so, ikowan jo ey, ‘Si Apo Jesus, mesepol to jet pai-odi to met laeng alin shagos.’ Satan da i ikowan jo son si-kara.”

<sup>4</sup> Jet siya, dimaw ira sota shadwá et simbira nga agpayso sota donkey ja naypagod shi kalsara ja nay-askang shi sakepan ni sakey ya baley, jet inokasan sha. <sup>5</sup> Jet naytompong nga wáray too nodtan et kowan sha so nonta shadwén too nen Jesus ey, “Ngantoy? Joka pan-okasi ita kilaw?”

<sup>6</sup> Jet insongbat sha sota inbilin nen Jesus ey isongbat sha, jet intolok ira nonta engibeka son si-kara i i-ala sha so nonta kilaw. <sup>7</sup> Jet indaw sha sota kilaw son Jesus et sota ta-kep ni baro sha, in-ap-ap sha nodta beneg ni donkey et nankabajo si Jesus. <sup>8</sup> Sota ira ngo eshakil la totoo, in-ap-ap sha ngoy baro sha nodta kalsaren panshalnan nen Jesus. Sota ira eshom, ira engala ngo ni emolong nga panga ni kadasan et in-ap-ap sha nodta kalsara. <sup>9</sup> Sota ira totoo ja epangdo ey si Jesus, tan sota ira na-onod, ireka onkanel-jaw, ja kowan sha ey, “Salamat son Apo Shiyos tep inbetkag to di iya toon mengisedakan! Bindisiyonan to koma! <sup>10</sup> Iyay ali sota toon naypadto nonta bayag da ey mengibengon ni inpantoray nen Ari David ja apo tayo da! Bindisiyonan nen Apo Shiyos i pantoshay to di! Salamat son Apo Shiyos ja Kangeto-an!”

<sup>11</sup> Idi mimotok si Jesus shi

Jerusalem, simekep nodta Timplo, jet idi naksheng nga inon-an ton emin i wared bo-dayan ni Timplo, nan-o-odop si Jesus tan sota ira sampolo tan showen apostol to, jet dimaw ired Bitania, tep edabi ma.

*Sota inpasing nen Jesus so nonta kadasan na eg ondames*

<sup>12</sup> Idi agsapa, ja eman-ekad si Jesus ja edapo ali shi Bitania, naytompong nga na-agang nontan. <sup>13</sup> Inon-an tod naybetaw i kadasan na emolong. Dimaw say to on-an nem wáray sepolen ton dames to, nem idi onsabi, enshi gayam i dames to; bolong bengat i wára. Tep aliwén timpon idames to. <sup>14</sup> Jet kowan to ey, “Sikam ma kadasan, manipod niman ingkatod ingka, polos sa enshiy en namtan ni too ja dames mo!” Jet intenengan ira nonta too to iyay ya inkowan to.

*Shinagshag nen Jesus ira sota emandeko nodta Timplo*

<sup>15</sup> Nay-oli ired Jerusalem et dimaw mowan si Jesus nodta Timplo. Jet emin ira sota emandeko nodtan, tan emenongkal, shinagshag to iren inpabo-day. Jet tino-to-dang to pay ira sota damisaan ira nonta emena-dat ni pilak, tan sota tongawan ira nonta emandeko ni kalopati. <sup>16</sup> Jet eg to intolok i pengegshi ni kompormin dako shi bo-dayan ni Timplo. <sup>17</sup> Jet intod-an to ira ja kowan to ey, “Say kowan nonta esel nen Apo Shiyos ja naysolat nonta bayag da, kowan to ey sajay ya baley nen Apo Shiyos, nayngadnan ey si-katoy panshewatan ni emin na totoo son si-kato, nem inpanbalin jo et ni singa amotan ni tolisan!”

<sup>18</sup> Shinemag ira nonta apo ni papashi ni Hodiyo tan mamais-toro ni dinteg ni Hodiyo iyay et pineshas shen enganap ni pesing shen memono son Jesus, tep ireka manshanag ey si Jesus i kabol

ni eg sha ma so ira pati-an ni karakdan kabol ni na-awisan sha nonta toka pan-itoro.

<sup>19</sup> Idi shanshani men medebi, si Jesus tan sota ira too to, bintikan shay siyodad ni Jerusalem.

*Say kasapolan na pasiya, sota pamati son Apo Shiyos*

<sup>20</sup> Idi nonta agsapa mowan ja shaka pankedabasi nodta kadasan na enshiy dames to, inon-an shen nakkit ta emin sota kadasan, pati damot to. <sup>21</sup> Ninemnem nen Pedro sota inkowan da nen Jesus so nonta kadasan et kowan to son Jesus ey, “Apo, asas mo kari! Nakkit sota kadasan na in-abigan mo.”

<sup>22</sup> Simongbat si Jesus ja kowan to ey, “Pamati kayo son Apo Shiyos. <sup>23</sup> Agpayso iya ikowan ko son si-kayo. Angken sipen too, no memati son Apo Shiyos ey tongpalen to sota ishawat to son si-kato, ja enshiy showashowa to, sigoradon eg nagshengan i mebedin ton dag-en. Mebedin na ikowan to niyay ya shon-tog ey ma-tan shorog ja ondaw shima baybay et mayto-to-wen medeka. <sup>24</sup> No ngantoy ibaga jo so nen Apo Shiyos, ewaten jo, no enshiy showashowa jo nonta panakabalin ton mengi-kan son si-kayo.

<sup>25</sup> “Jet no maramen kayoka manshewat son Apo Shiyos, ey waray nemnemen jon eg jo kosto ja inpasing ni eshom son si-kayo, mesepol la pekawanan jo sotan na too, say si Apo Shiyos ja Amejo shi dangit, pekawanan to ngoy nanbasolan jo. <sup>26</sup> Nem no eg jo pekawanan ira sota toon waray nanbasolan sha son si-kayo, si Apo Shiyos ja Amejon wared dangit, eg tokejo ngo pekawanan ni nanbasolan jo.”

*Sinongbatan nen Jesus sota ira eg makakosto ni dingdingka tod Jerusalem*

<sup>27</sup> Idi mimotok ma ira mowan shi Jerusalem, dimaw shima Timplo, jet idi emanpasiyal si Jesus shima bo-dayan ni Timplo, en simbi nonta ira apo ni papashi tan sota mamaistoro ni dinteg tan sota ira eshom ma pangolo ni Hodiyo. <sup>28</sup> Kowan sha son si-kato ey, “Sipay engikowan ey dag-en mo ira ta moka dagdag-a shiya Jerusalem? Sipay engibetkag son si-kam?”

<sup>29</sup> Simongbat si Jesus ja kowan to ey, “Ibag-an takejo nin, jet no songbatan jo ni kosto iya salad-sod ko, mebedin na ikowan ko son si-kayo no sipay engibetkag ali son si-kak ja mandeka niyay. <sup>30</sup> Ikowan jo son si-kak nem sipay engibetkag so nen Juan ja en memonjag nontan — nemnem to ngo shorog, ono inbetkag ali nen Apo Shiyos? Songbati jowak ka.”

<sup>31</sup> Nem sota ira pangolo ni Hodiyo, nantatabtabal ira ja kowan sha ey, “No ikowan tayo ey si Apo Shiyos, mesampolo kito tep ikowan to ey, ‘No kasta, apay nga eg jo ngarod pinati si Juan?’ <sup>32</sup> Nem no isongbat tayo ey nemnem ngo nen Juan, ngaranto ma?” (Ta sota ira pangolo ni Hodiyo, entakot sha ira sota karakdan na totoo tep shaka pati-en pasiya ey si Juan ket podnon inbetkag ali nen Apo Shiyos ja para padto.) <sup>33</sup> Jet say songbat sha so nen Jesus, kowan sha ey, “Tawey, eg mi amta no sipay engibetkag so nen Juan ja memonjag.”

Jet kowan ma nen Jesus ngo son si-kara ey, “Angken si-kak ngo, ekak ikowan son si-kayo no sipay engibetkag son si-kak ja mandeka niya naka dagdag-a niman.”

## 12

*In-arig pay nen Jesus sota makedsel la inpangajowan ni makabo-day*

<sup>1</sup> Si Jesus, in-arigan to sota ira totoo, ja kowan to ey, “Waray toon nanmola ni obas shi embanaw wa gardin to; inedad to, tan engaot ni kaysespa-an nonta shapidan ni obas, tan engitowen pay ni baley ya kowadja-an. Inpa-ajowan to so ni eshom et dimaw ma shi arawin ili. <sup>2</sup> Idi simabi sota timpon pekibingay to nonta obas, engibetkag ni baga-en ton en mengeda nonta bingay to so nonta ira engajowan. <sup>3</sup> Nem sota engajowan, sinepsepdad sha et sota baga-en na inbetkag nonta makakokowa nonta bo-day, tan inpa-odiren enshiy sha in-akan. <sup>4</sup> Sota makabo-day, engibetkag mowan ni sakey ya baga-en to, nem pineg-as shay toktok to, asan shaka bebaingi pay. <sup>5</sup> Engibetkag sota makabo-day ni baga-en to mowan, nem saja inbetkag ton maykepintedo, binonora. Inpantated nonta makabo-day i eshakil la inbetkag to, nem sinepdat shay eshom, ey binonoray eshom. <sup>6</sup> Idi anongosto ma, sakey bengat ma i ebay-an na ibetkag to, ja anak ton mismo, ja ensemek ton pasiya, jet si-kato may inbetkag to, ja kowan to ey, ‘Mebedin emon ibaingan sha iya anak ko.’ <sup>7</sup> Nem idi mimotok sota inbetkag to ja mismon anak to, kowan et nonta ira engajowan ni tabtabal sha ey, ‘Sajay met sota anak nonta makakokowa niya gardin na tayoka pan-obda-i. Bono-en tayo et say saja bo-day ya tewiren to koma, kokowa-en tayo ma.’ <sup>8</sup> Binonora nga agpayso sota anak nonta makabo-day nontan et inbo-day sha nodta alad nonta gardin.” Kowan nen Jesus ni arig to.

<sup>9</sup> Jet nontan ma, kowan nen Jesus ey, “Nganto emoy pesing

nonta makakokowa nontan na bo-day so nonta ira toon inpangajowan to? Simpri ondaw ali et bono-en to ira jay ya too ngo, jet ipiyal to sota bo-day to so ni eshom ma mengajowan so. <sup>10</sup> Eg jo amten mengi-odog aya nonta esel nen Apo Shiyos ja naysolat nonta bayag da? Kowan to met ey,

‘Sota baton binedaw ira nonta para amag ni baley, ja kowan sha ey enshiy silbi to, si-kato et ngo mowan gayam i epateg ga bato so ni emin. <sup>11</sup> Si Apo Shiyos i makabaal niyay ya edaga jet kaskasshaaw i tayosoka pengid-mang.’ ”

<sup>12</sup> Edawag ey sota makakontra son Jesus, si-karay naytorongan nonta arig ga inkowan nen Jesus. Isonga kowan sha ey seskelen sha si Jesus, nem entakot sha ira sota eshakil la totoo.

*Pineshas shen saolen si Jesus maypangkep nonta bayad ni bowis*

<sup>13</sup> Say inpasing sha, engibetkag ira ni eshom so nonta ira Parisiyo tan too nen Ari Hirodis ja en menaol son Jesus say waray ikowan ton esel ja ipangbalan sha so ey waray basol to. <sup>14</sup> Idi simabi sota inbetkag sha son Jesus, kowan sha ey, “Maistoro, amta mi ey podnon emin sota kowan mo, tan amta mi pay ey enshiy moka pabori, angken ngantoy katoo to. Sota torom ket si-katoy piyan nen Apo Shiyos ja dagen ni totoo. Isonga iyay i ibaga mi son si-kam. Maypeshit aya shi dinteg tayon Hodiyo i panbedjad ni bowis so ni gobirnod Roma, ono enshi? <sup>15</sup> Manbedjad kito ono enshi?”

Nem si Jesus, amta to ey tapang bengat iya salodsod sha jet kowan to son si-kara ey, “Ngantoy jowak-soka pansaoli so? Alekayo di ni sakey ya salepi say on-an ko.” <sup>16</sup> In-aknan sha ni sakey et kowan to ey, “Sipay makadopa niyay ya

naymalked ja pilak? Tan sipay makangaran niya naysolat?”

Simongbat ira ja kowan sha son si-kato ey, “Sota ari shi Roma.”

<sup>17</sup> Jet kowan ma nen Jesus son si-kara ey, “No kasta, sota pilak ja joka osala, edapod gobirno ni Roma, isonga mesepol met laeng nga pa-odiyo son si-kara. Sota kowan ni gobirno ey may-ekan son si-kara, mesepol la maytongpal, jet sota kowan ngo nen Apo Shiyos ey may-ekan son si-kato, mesepol ngon mepati.”

Jet ireka messhaaw wa pasiya nonta insongbat nen Jesus.

*Pineshas sha mowan si Jesus maypangkep nonta panbiyag mowan ira nonta nanketey*

<sup>18</sup> Waray Hodiyo iren kowan sha ey Sadosiyo, ja say pamatira, kowan sha ey eg kono manbiyag mowan i nanketey. Dimaw ngo ira di son Jesus i eshom son si-kara, jet sha inbag-an, ja kowan sha ey, <sup>19</sup> “Maistoro, say insolat nen Moises nonta bayag da ja dinteg tayon Hodiyo, kowan to ey no sota dakin engasewa ket metey ja enshiy potot to nodta asewa to, sota agi nonta dakin etey, si-katoy mengelbat nonta istay asewa nonta agi to, say balang nem waray enaken sha, et say sota anak sha, maybidang ey singa potot nonta etey den agi to. <sup>20</sup> Iyay i piyan min ibaga. Nontan da kono, waray piton sana-aki, jet sota pangodowan, engasewa; nem etey ya enshiy to inpotot. <sup>21</sup> Jet sota maykadwen agi to, inelbat to sota asewa nonta agi ton etey, nem etey mowan sofa daki. Kasta met sota maykatdon agi sha. Emin ira jay ya piton sana-aki ja nansasa-dat ja engasewa nontan na sesakey ya bii, etey ira ja enshiy sha inpotot. <sup>22</sup> Jet shi ka-onoran, etey kono ngo sota bii. <sup>23</sup> Sajay i piyan min ibaga son si-

kam: no bilang ey onsabi ali sota timpon pan-ongal ira ni nanketey, sipa emoy koston maka-asewa ali so nontan na bii? Ta nan-i-inelbat met ira sota piton sana-aki ja engasewa son si-kato.”

<sup>24</sup> Simongbat si Jesus ja kowan to son si-kara ey, “Esama kayo, jet say kabol, eg jo inewatan sota esel nen Apo Shiyos ja naysolat nonta bayag da, tan eg jo pay amta sota panakabalin to. <sup>25</sup> Ta sota totoon pan-ongal ali nen Apo Shiyos, eg ma ira mengesawa, ta ingesen sha ira sota anghil. <sup>26</sup> Nem sigosho eg jo pati-en ey manbiyag mowan sota nanketey. Apay eg jo aya binasa sota kowan nen Apo Shiyos son Moises ja edapo nodta emanshedang nga kadasan? Insolat nen Moises nonta bayag da i esel nen Apo Shiyos, ja kowan to ey, ‘Si-kak si Apo Shiyos, ja Shiyos shi Abraham, Isaac, tan si Jacob!’ <sup>27</sup> Say olog niyay, angken etey mangon ebayag i bakdang shi Abraham, kowan nen Apo Shiyos ey mabiday ired sango-an to. Ta no enshi koma, istay eg to inkowan ey si-katoy Shiyos sha. Esama kayon pasiya.”

<sup>28</sup> Sota sakey ya maistoro ni dinteg ni Hodiyo, imesop son Jesus tan sota ira Sadosiyo ni shaka pansongbat, jet intenengan to ja mapteng i kepenongbat nen Jesus. Isonga inbag-an to ngos Jesus, ja kowan to ey, “Towa nodta bilin nen Apo Shiyos i kapatkan so ni emin?”

<sup>29</sup> Simongbat si Jesus ja kowan to ey, “Say kapatkan so ni emin na bilin, sajay: ‘Si-kayon totood Israel, itnengiyo iyay. Si Apo Shiyos ja Shiyos tayo, si-kato bengat i podnon Shiyos, enshiy eshom. <sup>30</sup> Isonga si Apo Shiyos i topogen mon sesmeken, ja si-katoy pengitoshongan mo ni emin na wara son si-kam — emin na wared posom, emin na nemnem

mo, tan emin na kedsang mo.'  
<sup>31</sup> Jet say maykadwa, sajay: 'Semek moy kait mon too ja inges toy moka penmek ni bakdang mo.' Sajay ya showen bilin nen Apo Shiyos i kapatkan so ni emin; enshiy eshom ma bilin ja maka-inges niyay."

<sup>32</sup> Sota maistoro ni dinteg ja nansalodsod son si-kato, kowan to ma ey, "Apo, kosto ita songbat mo ey si Apo Shiyos bengat i podnon Shiyos, enshiy eshom.  
<sup>33</sup> Jet no si Apo Shiyos i topogen tayon sesmeken, ja si-katoy pengitoshongan ni emin na wared poso tayo, nemnem tayo, tan kedsang tayo, tan no sesmeken tayoy kait tayon too ja inges toy tayoka penmek ni bakdang tayo, arawin mapmapteng iyay son Apo Shiyos ey say sota pengileton ni animal son si-kato, ja angken nganton daton."

<sup>34</sup> Inon-an nen Jesus ey mapteng i songbat nonta too, isonga kowan to son si-kato ey, "Shanshanin wahren emin son si-kam i banag ja kabol ni kayda-kaman shi pantoshayan nen Apo Shiyos."

Jet manipod nontan, polos malen eg intoled ni angken sipen too ja nansalodsod son si-kato.

<sup>35</sup> Idi emantoshos si Jesus shi Timplo, inkowan to ey, "Apay ngarod nga kowan ni mamais-toro ni dinteg ey sota inkari nen Apo Shiyos ey ibetkag to din mengisedakan ket medepo bengat shi poli nen Ari David nonta bayag da?"  
<sup>36</sup> Ta angken si Ari David shorog, inkowan to ey pangolo to sota mengisedakan ali. Intorong met ni Ispirito Santo nen Apo Shiyos si David nonta engikowanan to ey,

"Si Apo Shiyos, inkowan to so nonta pangolok ey ontongaw si-kato shi apit ni kanawan to, ingkatod enshiy mebedin nonta

kabakal to, ja wara ma ired shalokap ni shapan to.'

<sup>37</sup> Jet no kowan nen Ari David ey pangolo to sota mengisedakan ali, toway inpasing to ja kowan sha ey poli ali nen Ari David?"

Eshakel i totoo nontan ja emen-gitneng ni kowan to jet pipiyan shen pasiya ja itenengan.

<sup>38</sup> Inkowan to pay ni tosoka pan-itoro ira so ey, "Tanshaaniyo ira ja mamaistoro ni dinteg ta baka ma-edinan kayo. Pipiyan shen manbesho ni nankedayag ni sha panpasiyal, tan pipiyan sha pay ya rispito-en ni totoo ira ja semsemano-an shima malkaro ja karakdan ni too, <sup>39</sup> tan shima sanopan, pipiyan sha pay ja ontongaw shima naysaganen tongawan say mebigbig ira, jet agdalo no timpo ni piyasta, sotan i shaka pesing. <sup>40</sup> Manpa-otang ira mango nonta bibiin nankeballo jet no enshiy ibayad sha, piditen shen angken sota baley sha i ibayad sha. Jet no ondaw ired ma sa-nopan, say shaka pesing nga mena-din ni kakedsel sha, shaka ishokey i shawat sha son Apo Shiyos, say ikowan ni too ey maronong ira. Nem amta nen Apo Shiyos iyay et ebadbadeg i penosa to son si-kara!"

*Epatteg sota in-akan ni ebalon bii*

<sup>41</sup> Wara nonta pinsak si Jesus shi nay-esop nodta kakon ja kay-ini ni alos shi Timplo. Sota ira bebaknang, ebadeg i pilak ja shaka i-iyen. <sup>42</sup> Nontan na oras, wara ngoy sakey ya ebalon biin ebiteg ja en engi-kas ni showen engkokonting nga siljo, ja manbenol ni sakey ya sintimos. <sup>43</sup> Tina-wal nen Jesus ira sota too to et inkowan to ey, "Ikowan ko son si-kayo, sajay ya biin eballo, ja ebiteg ga pasiya, epatpatteg sota in-akan ton alos to nem say sota ira eshom

ma engi-kan ni alos sha. <sup>44</sup> Ta sota ira eshom, sobda ni pilak sha i sha in-akan, nem sajay ya biin ebiteg, in-akan ton emin i oltimon wára son si-kato — angken sota istay panbiyag to koma.”

### 13

*Indawag nen Jesus sota may-pangkep ni pantepos ni dobong*

<sup>1</sup> Idi bimo-day si Jesus shi Timplo, imesel i sakey ya too to, ja kowan to son Jesus ey, “Apo, nankemapteng ira ja balbaley shiya nandiniked ni Timplo, tan memapteng ima engkakemba-leg ga bato ja nay-amag shiyay! On-im, apo!”

<sup>2</sup> Nem si Jesus, simongbat son si-kato, ja kowan to ey, “Owen, bisnayo niman ira ja mapteng nga baley. Tep wára aliy timpon on-sabi ja angken sakey so ira nima baton mapteng i inkay-amag to, enshiy en mebay-an shima nay-amagan to; mesheshal la emin.”

<sup>3</sup> Idi pinsak ja wáres Jesus ja timongaw shima shontog ja kowan sha ey Olibas, ja naymamang nodta Timplo, abos nen Pedro, si Santiago, si Juan, tan si Andres, jet insho-petan sha si Jesus, ja kowan sha ey, <sup>4</sup> “Piyán min amta-en no pigan ali ita kowan mo ey kesheshal niya Timplo. Tan nganto pay i amta-an mi so ey shanshanin mepesamak itan?”

<sup>5</sup> Simongbat si Jesus ja kowan to son si-kara ey, “Nemnemnem jo koma iyay. Karekayo pa-olbod so ni angken sipa, <sup>6</sup> ta eshakil aliy toon mengosal ni ngaran ko, ja ikowan sha ey si-kara si Cristo, jet eshakil noman i totoon may-owapan. <sup>7</sup> Jet wára pay i mismon mankokobat ja itenengan jo, tan wáray shemagen jon kobat shi eshom ma ili. Nem karekayo meshanagan. Tep kenshat ta mepesamak ira jay, nem aliwén sotan

i ka-amta-an to ey shanshani may pantepos ni dobong. <sup>8</sup> Angken ili tan ili, mankobat ira, jet angken pay sota ka-ili-ilin intorayan ni a-ashi, mankokobat ngo ira. Wára pay i jegjeg shi kedogadogad, tan epaladon bitil. Nem emin iyay ya mepesamak, sajay i panshoki-an bengat ni digat.

<sup>9</sup> “Pantanshaan kayo, ta wáray eshom ma totoo ja mengidaw son si-kayo shi oskaro. Tan angken shima sa-nopan sha, sepsepdaten shakejod man pay. Jet ikoyod shakejo pay shi sango-an nonta ira gobinarol, tan sango-an nonta ira ari, ta too takejo. Jet sotan i wáya jon mengiringan na mengikowan son si-kara ni maypangkep son si-kak. <sup>10</sup> Jet sota mapteng nga shamag may-pangkep ni pantoshayan nen Apo Shiyos, maypedawag shi emin na ka-ili-ili asan kesabi may pantepos ni dobong. <sup>11</sup> No ma-shel kayo ja mehistigal shi oskaro, karekayo meshanagan no ngarantoy isongbat jo son si-kara, no diket sota maypa-amta met laeng son si-kayo nontan na oras ja shakejosoka pan-ibag-i, sotan i isongbat jo. Ta aliwén si-kayon mismo i onsongbat so, no diket sota Ispirito Santo nen Apo Shiyos.

<sup>12</sup> “Jet sajay alin timpo, angken san-agin daki, ibaag nonta sakey i agi to shi eshom, ey eg et meshanagan ey bono-en sha. Inges niyay met laeng i pesing ni a-ama shi annak sha. Jet angken sota ira a-anak, kontra-en shay maka-anak son si-kara et pebonora pay ira. <sup>13</sup> Jet angken si-kayo, sota joka pemati son si-kak, si-katoy kabol la okesan shakejo so ni karakdan na too. Nem sota mengitoded ni angken nganton digat ja onsabi son si-kato, si-katoy maysedakan.

<sup>14</sup> “Jet on-an jon mepesamak sota naypadto nonta bayag da ja

kowan sha ey 'Kataktakot alin ondogit'. Jet isaad toy toray shi dogad ja enshiy kanebengan ton man-iyen. (Sota memasa niyay, ewatan to komay kaytoshongan niya kowan nen Jesus.) No on-an jo iyay, say pesing koma ira nonta naytompong nga wared Jodia, onbetik ira et ja manbakwit shi shonshontog. <sup>15</sup> Sota toon maytompong nga man-adibay shi bo-dayan, eg to koma nemnemen ja onsekep shima baley to ja en mengeda nonta kompormin wara nodta naydaem ni baley. <sup>16</sup> Kasta met sota wared payew, eg koma mesiwat ni aleto nonta insepa ton baro to. <sup>17</sup> No timpon kepesamak niyay, kakaasi ira din pasiya sota bibiin malokon, tan sota bibiin waray anak shen emenoso. <sup>18</sup> Irewat jo son Apo Shiyos ey eg koma mepesamak iyay ni timpon powek, say mariwes i pemtik jo. <sup>19</sup> Ta sotan alin digat ja onsabi, enshiy to kay-ingesan nodta ira digat ja epaspasamak, manipod nonta pinalsowa nen Apo Shiyos iya dobong ingkato niman. <sup>20</sup> No eg ninemnem nen Apo Shiyos ey tikeyen to iyay alin digat, istay angken sipen too, enshiy mebayan na mebiyag. Nem si Apo Shiyos, tikeyen to iyay ya digat, ta toka isakit ira sota too ton pinidi to, ja i-okong ton para si-kato.

<sup>21</sup> "Sotan alin akew, no waray mengikowan son si-kayo ey amtaray kad-an nen Cristo, ja kowan sha ey jo asen, karejo patpati-en. <sup>22</sup> Ta eshakil aliy toon kowan sha ey si-kara si Cristo, ono kowan sha ey si-karay para padto nen Apo Shiyos, jet eshakil i dag-en shen kaskasshaaw wa aramid ono milagro. Jet no mebedin, kowan sha pay ey i-owapan sha ira sota too nen Apo Shiyos ja pinidi to. <sup>23</sup> Nem tanshaaniyo ira jay! Naka pan-isigod iya banshaan son si-kayo say amta-en joy mepesamak

ali.

<sup>24</sup> "Jet no onsabi sotan na timpo ja kekshengan nonta digat, mashesp shagos sota niyal ni sekrit tan bolan, <sup>25</sup> jet sama talaw, mepedaspas ira, jet mebediwan i itsora nima naykayang. <sup>26</sup> No meksheng iyay, mismon asen sha-ak ni tootod dobong ja ma-odopanali ni kolpot, tan asen sha pay i itsora ni bakdang kon emenenili, tan asen sha ngo sota ebadeg ga panakabalin ko. <sup>27</sup> Jet ibetkag ko iray anghil ko ja mengolnong ira nonta pinidik ja took shi emin na sakop niya dobong, shi angken towen dogad."

<sup>28</sup> Jet si Jesus, arig mowan i inpasing ton engilewag nonta idaw to mowan ali, ja kowan to ey, "Nemnemen jo kari sota kadasan na kowan sha ey higos. Shiya kad-an tayo, no asen jon ondongkey sota panga to, asan somimit mowan i bolong to, amtayo ma ey shanshani sota timpo ni petang. <sup>29</sup> Inges niyay aliy i-olik. No asen jon emanketongpal ira ja inkowan ko la, amtayo ma ey sota timpon idaw ko ali, shanshani ma, ja singa wara-ak nodta pasbol. <sup>30</sup> Podno iyay ya ikowan ko son si-kayo. Saja ira too niman, eg ira nin metey, no diket sakopen shen emin ira jay ya mepesamak ali. <sup>31</sup> Sama naykayang tan saja dobong, mebedin na ma-enshi, nem saja esel la inkowan ko, kenshat ta metongpal, ja eg ma-enshi.

<sup>32</sup> "Nem si Apo Shiyos bengat i maka-amta no pigan i ketongpal niyay ya inkowan ko la. Angken sama anghil shi dangit, tan si-kak ja Anak nen Apo Shiyos, eg mi ngo amta. <sup>33</sup> Isonga pantanshaan kayo; mesepol la esagana kayo ni olay, mesepol la manshewat kayo ni olay son Apo Shiyos. Ta eg jo amta sotan alin timpo ja idaw ko di. <sup>34</sup> May-eshig i kasesaad

jo nodta baga-en nonta baknang. Sota baknang, wáray dáwan ton nay-arawin ili, isonga indekjas to sota baley to et sota ira baga-en toy maka-amta so. In-epeng toy obda son si-karen emin et inbilin to ey sota para dekeb ni baley, singpeten ton manbantay ni baley. <sup>35</sup> Sajay i kay-eshigan jo, isonga mesepol la esagana kayo ni olay, ta eg jo amta nem pigan aliy imotok nonta apo jo — no mama-shem, ono kawa ni dabi, ono nem ikagang ni manok ni daem, ono agsapa. Isonga pan-alisto kayo, <sup>36</sup> say no bilang ey onmotok sota Apo jo ni palibdibag, eg tokejo sa-kopan na na-ogip.

<sup>37</sup> “Saja ikowan ko son si-kayo, emin na tooy naka pengikowani so: pansagana kayo ngarod!” Sajay ya emin, inkowan nen Jesus.

## 14

*Nantatabtabalan nonta makontra son Jesus i pesing shen memono son si-kato*

<sup>1</sup> Showen akew pay et onsabi sota piyasta ni Hodiyoj ja kowan sha ey Paskowa, tan sota piyasten pengan sha ni tinapay ja enshiy daok ton para debag. Jet nontan, nantatabtabal ira sota apo ni papashi ni Hodiyoj tan mamaistoro ni dinteg no ngantoy pesing shen memono son Jesus, jet ninemnem sha ey olboren sha kono say mashel et mebono. <sup>2</sup> Mesepol la olbod i pesing sha kono; isonga kowan sha ey, “Aliwén tayo itompong no timpon piyasta, ta baka et ey mankodo ira sota eshakil la totoo.”

*Shino-jagan ni sakey ya bii i toktok nen Jesus ni emanseng-ew wa dana*

<sup>3</sup> Jet nontan na akew, wáres Jesus shi Bitania, shima baley nen Simon ja istay ebaybayang i bakdang to. Emengan si Jesus nodtan

na baley ey wára ngoy biin dimaw ali son si-kato, ja engita-jon ni danen emanseng-ew ja nay-iyen shi botilja. Sajay ya dana sota kowan sha ey nardo; epalit ta pasiya i tongkal to. Dinokatan nonta bii sota botilja et insho-jag tod toktok nen Jesus. <sup>4</sup> Nem wáray eshom ja engasas niyay et ireka mankotot, ja kowan sha ni sakey tan sakey son si-kara ey, “Ngantoy inpakewasan to so emo nima dana? <sup>5</sup> No istay indako to koma sotan na dana, mebedin na asdeg to komay may-ekan so nonta ira nankebiteg! Ta say banol nontan na kalasin dana, no maydeko ket tedon dasos.” Jet inseg-ang sha pay sota bii.

<sup>6</sup> Nem si Jesus, kowan to ey, “Baybay-iyo ita bii; karejo bedawen. Ta mapteng ita dingka to son si-kak. <sup>7</sup> Sota ira nankebiteg, wára ni olay son si-kayo, isonga no piyan jon ontolong son si-kara, mebedin; nem si-kak, eg mebed-jag i pekikadwák son si-kayo. <sup>8</sup> Saja bii, dingka toy kabaalan ton dag-en, ta saja dana ja insho-jag to son si-kak, singa toka pan-isagana i kaybebka niya bakdang ko ali. <sup>9</sup> Jet agpayso iya ikowan ko son si-kayo. Shiya intiron dobong, no maytosho sota mapteng nga shamag maypangkep son si-kak, sajay ya dingka niyay ya bii, pekipedawag sha jet eg medib-dibkan.” Kowan nen Jesus.

*Bimaki si Judas ta ekitodag so nonta ira makontra son Jesus*

<sup>10</sup> Si Judas Iskariote, ja sakey so nonta ira sampolo tan showen apostol nen Jesus, dimaw ja en ekitbal so nonta ira apo ni papashi no ngantoy pesing ton mengitoshon ni kawad-an nen Jesus say seskelen sha. <sup>11</sup> Idi intenengan sha iya kowan nen Judas, ireka manimdeng, jet inkari sha ey i-aknan sha ni pilak. Jet nontan ma, wára



ni olay shi nemnem nen Judas no toway pesing ton mengibaag so nen Jesus son si-kara.

*Sota ka-onoran na pekipengan nen Jesus so nonta ira apostol to*

<sup>12</sup> Shimanon sota pilmiron akew ni piyasta, ja shaka pengan ni tinapay ya enshiy daok ton para debag tan shaka pemalti ni kaln-iron sid-an sha nem Paskowa, isonga sota ira apostol nen Jesus, inbag-an sha, ja kowan sha ey, “Toway piyan mon dawán mi ja pengisekana-an mi ni penganan mo nem ma-shem, tep Paskowa ma?”

<sup>13</sup> Jet nontan, si Jesus, engibetkag ni showa so nonta ira apostol to, ja kowan to ey, “Daw kayod Jerusalem, jet no onmotok kayod man, waray dakin aspolen jo ja emasan ni salaw ja na-inan ni shanom. Onod jo, <sup>14</sup> jet nodta baley ja seskepan to, ikowan jo iyay so nonta makabaley: ‘Kowan ali nen Maistoro son si-kam ey towa konoy kowadton penganan to tan si-kamin too to niman na ma-shem, tep Paskowa?’ <sup>15</sup> Jet ipa-sas to son si-kayo i embanaw wa kowadto nodta naykayang, ja wara nodtan na emin i mese-pol tayo ja naysagana. Si-katoy pengisekana-an jo ni kenen tayo nem ma-shem.” Kowan nen Jesus so nonta showen inbetkag to.

<sup>16</sup> Dimaw ira sota shadwa shi Jerusalem et idi mimotok ira, siya, kosto noman na nay-agpayso sota kowan nen Jesus son si-kara. Jet insaganared man sota kenen sha nontan na ma-shem.

<sup>17</sup> Idi mama-shem mala, si Jesus tan sota sampolo tan showen apostol to, dimaw iren mengan nodtan. <sup>18</sup> Jet idi maramen ireka mengan, kowan nen Jesus ey, “Agpayso iya ikowan ko son si-kayo. Waray sakey son si-kayon ekilikob son si-kak niman ja mengibaag

son si-kak so nonta ira makakontra son si-kak!”

<sup>19</sup> Jet sota ira too to, ensakit ta pasiya i nemnem sha, jet kowan ni sakey tan sakey son Jesus ey, “Sipa? Aliwen si-kak emo?”

<sup>20</sup> Simongbat si Jesus ja kowan to ey, “Say ondaga niyay, agpayso ey sakey son si-kayon sawal ni showa. Sota nay-okob son si-kak shi sakey ya pingkan, si-kato sotan. <sup>21</sup> Si-kak sota kowan ni para padto ey Anak ni Too jet kenshat ta metongpal sota padto ja naysolat nonta bayag da ni maypangkep son si-kak. Nem kaasi met laeng sotan na toon mengibaag son si-kak, ta meshosen pasiya! No da-kaman to sotan na shosa, ikowan to shorog shi bakdang to ey, ‘Aggos et nem ekak koma nay-anak!’ ”

<sup>22</sup> Jet nontan na maramen ireka ma emengan, inda nen Jesus sota tinapay et idi naksheng nga nan-iyaman son Apo Shiyos, shinowashowa to, jet in-akan to nodta ira apostol to, ja kowan to ey, “Iya, alejo iyay. Sajay i bakdang ko.” <sup>23</sup> Jet idi naksheng, inda to sota tasa et idi nan-iyaman son Apo Shiyos, in-akan to mowan son si-kara, jet nan-inom iren emin. <sup>24</sup> Jet kowan nen Jesus ey, “Sajay i shalak ja on-ayos ali ja para pansigshan ni eshakil la totoo. Ta sota ketey ko di, si-katoy panshoki-an nonta badon pesing nen Apo Shiyos so ni totoo. <sup>25</sup> Agpayso iya ikowan ko son si-kayo. Sajay i ka-onoran na penginom ko ni shanom niya obas, jet ekak nin menginom ingkatod onsabi sota penginom ko nonta badon shanom ni obas shima pantoshayan nen Apo Shiyos.”

*Insigod nen Jesus ja inkowan sota ngaaw wa pesing id li nen Pedro*

<sup>26</sup> Nankansiyon ira ni maypangkep ni panshedjaw sha son

Apo Shiyos, jet idi naksheng, bimo-day ira nodtan na baley jet dimaw ired na shontog ga kowan sha ey Olibas.

<sup>27</sup> Jet si Jesus, kowan to so nonta ira too to ey, “Nem ekay, ibaing jowak ka emin et onbetik kayo, ta si-katoy tongpal nonta pad-ton naysolat nonta bayag da, ja kowan to ey, ‘Bono-en ko sota para bantay ni kalniro et sota eman-o-odop ja kalniro, mebodak ira.’<sup>28</sup> Nem no meksheng i pan-ongal ko, mepangdo-ak ja ondaw shi Galilia ey say si-kayo.”

<sup>29</sup> Nem si Pedro, kowan to ey, “Angken ibaing shaka ni emin na kait ko, eg taka mango ibaing!”

<sup>30</sup> Simongbat si Jesus ja kowan to ey, “Podno iya ikowan ko son si-kam Pedro: niman na dabi, isaot mowak ni memintedo ja ikowan mo ey eg mowak am-amta. Jet no meksheng iyay, onkagang ngoy kawitan ni maykepinshowa.”

<sup>31</sup> Nem si Pedro, toka pan-ipilit ta pasiya, ja kowan to ey, “Angken na pekibono sha-ak son si-kam, ekak ikowan ey eg taka am-amta!” Jet sota ira kait ton too nen Jesus, sotan ngoy inonoran shen inkowan.

<sup>32</sup> Jet dimaw ma ired ma dogad ja kowan sha ey Gitsimani, jet kowan nen Jesus son si-kara ey, “Tongaw kayod jay ta nak nin manshawát son Apo Shiyos.”

<sup>33</sup> Inodop tos Pedro, si Santi-ago, tan si Juan, jet nontan ma, simabi son si-kato i epaladon aboshiro, jet emankaikelkel-ewin pasiya. <sup>34</sup> Jet kowan to son si-kara ey, “Singa meteyak ni daringit ko! Shiyay kayo nin, karekayo ma-okip.”

<sup>35</sup> Idi naksheng nga inkowan to iyay, bintawan to ira ni ootik, jet nanshomog shi bo-day ja nanshawát son Apo Shiyos ey no mebedin koma, eg manda-kam nonta digat alin onsabi son si-

kato. <sup>36</sup> Kowan to ey, “Ama, kabedinan moy angken nganto, isonga eg mo koma ipalobos iyay ya pandikat ko di. Nem say kowan ko, sota piyan mo, si-katoy metongpal; aliwén sota kostok.”

<sup>37</sup> Idi imekwás, dimaw ja to inon-an sota too to jet simbi to iren na-ogip. Jet kowan to so nen Pedro ey, “Na-ogip ka, Simon? Apay, eg mebedin ja itoled moy jo-kew mo ni angken sakey ya oras bengat?” <sup>38</sup> Panmolakat kayo jet panshawát kayo ngo so nen Apo Shiyos ni kedsang say eg shakejo ebaken ni ngaaw wa onsabi son si-kayo. Sota nemnem jo, makedsang niman, nem baka et ey ma-ebak kayo tep ekapoy i bakdang jon ontongpal nonta wáred nemnem jo met laeng.”

<sup>39</sup> Dimaw mowan si Jesus ja en manshawát son Apo Shiyos, jet iso met laeng i inkowan to ni shawat to son Apo Shiyos. <sup>40</sup> Jet nay-oli mowan ali jet simbi to ira sota too to ja na-ogip, ta epaladoy jo-kew sha. Jet eg sha amtay isongbat sha son si-kato.

<sup>41</sup> En nanshawát si Jesus ni maykepintedo et idi nay-oli mowan ali so nonta ira too to, kowan to son si-kara ey, “Ngantoy? Piyan jon ma-okip ni olay? Nem eti, simabi ma sota timpo, jet si-kak ja kowan ni para padto ey Anak ni Too, may-ewatak ma so nonta ira toon nankekedsel. <sup>42</sup> Ondaw kito ma niman. Iyay ma ali sota mengibaag son si-kak.”

*Si Jesus, inshel ma nonta makakontra son si-kato*

<sup>43</sup> Idi maramen eman-a-sel si Jesus, si Judas Iskariote ja sakey so nonta ira sampolo tan showa ja apostol nen Jesus, engolop ali ni eshakil la totoo. Sota eshom, nan-etak ira, tan sota ira eshom, waray peg-as sha. Sajay iren too, inbetkag ira nonta apo ni papashi,

mamaistoro ni dinteg, tan pangolo ni Hodiyo. <sup>44</sup> Si Judas Iskariote, insigod ton inkowan so niya ira inodop to ey, "Say pengimatonan jo son Jesus, ongo-an ko. Tengel jo et ibtik jo; jet singpet jo men kowadja-an." <sup>45</sup> Isonga idi dimaw alis Judas shi kad-an nen Jesus, insopan to et kowan to ey, "Apo!" Jet inongo-an to ja singa agpayson ensemek to noman.

<sup>46</sup> Jet sota ira inodop ali nen Judas Iskariote, dimaw ira di et tinnel shen shagos si Jesus ja a-shelen sha ma. <sup>47</sup> Nem sota sakey ya too ja wára nodtan, inokbos ton shagos i kampilan to et kinimpas toy tangida nonta sakey ya baga-en nonta kangeto-an na pari.

<sup>48</sup> Jet kowan ma nen Jesus so nonta ira eshakil la totoo ey, "No si-kak i kowan jo ey a-shelen jo, apay nga nan-etak kayo, tan wáray peg-as jo? Apay tolisanak?" <sup>49</sup> Inakew met ja wára-ak son si-kayo shima Timplo ja emantosho, ket apay nga eg jowak inshel nontan? Nem angen, mepol la sajay i medeka say metongpal sota padton naysolat nonta bayag da." Kowan nen Jesus.

<sup>50</sup> Jet emin ira sota too to, namtik ira jet indekjas shes Jesus. <sup>51-52</sup> Sota sakey ya balodaki, ja too met laeng nen Jesus, istay peki-shel sha son Jesus, nem idi kowan sha ey seskelen sha, kimpop nodta empotin abel ja inketap to nodta bakdang to et namtik ja nandabos.

*Indaw shes Jesus nodta totoo pangolo ni Hodiyo*

<sup>53</sup> Jet si Jesus, indaw sha nodta baley ni kangeto-an na pari, jet shiman i na-olnongan ira nonta mamaistoro ni dinteg, tan sota ira eshom ma pangolo ni Hodiyo.

<sup>54</sup> Jet si Pedro, tinned to ira nem bimeta. Intoled to pay ya ekiskep nodta bo-dayan ni

kangeto-an na pari. Ekitongaw so nonta ira kowadja jet ekirangshang pay son si-kara.

<sup>55</sup> Nontan met laeng, sota ira apo ni papashi tan sota ira esanop pa toray, ireka mengenap ni ikowan shen basol nen Jesus, say wáray kabol la ikowan sha so ey si-katoy kebono-an to. Nem enahiy shaka sepolen koston basol to. <sup>56</sup> Ta eshakil sota sistigon dimaw ali ja o-owap i kowan sha, nem eg mankokompas i insodsod sha. <sup>57</sup> Anongosto ma ey wáray dimaw ali ja o-owap i insistigo sha, ja kowan sha ey, <sup>58</sup> "Intenengan min mismo i inkokowan niyay ya too; kowan to ey sheshalen to kono ima Timplo ja inemag ni too, jet i-oli to kono mowan na dag-en ni tedon akew. Nem sota dag-en to, aliwén too konoy mengemag so." <sup>59</sup> Nem eg met laeng nankompas i inkowan iren jay.

<sup>60</sup> Jet sota kangeto-an na pari, dimayat shi sango-an iren emin ja esa-nop, jet inbag-an tos Jesus ja kowan to ey, "Jet enshiy isongbat mo? Sajay met i kowan ira niya too ey basol mo!" <sup>61</sup> Nem si Jesus, imeg-eket ja enshiy to insongbat. Jet sota kangeto-an na pari, kowan to ma ey, "Ikowan mo ngo no si-kam sota Anak nen Apo Shiyos ja emeshedshedjaw! Ikowan mo no si-kam sota inkari to nonta bayag da ey ibetkag to alin mengisedakan!"

<sup>62</sup> Simongbat si Jesus ja kowan to ey, "Owen, si-kak ita kowan mo. Si-kak sota kowan ni para padto ey Anak ni Too, jet no ekay ali, on-an jowak ja timongaw nodta apit ni kanawan nen Apo Shiyos ja Manakabalin. Jet asen jowak ali mowan ja metaksholan ni kolpot."

<sup>63</sup> Jet sota kangeto-an na pari, bini-nik to sota baro to shorog ni bonget to, jet kowan to ey,

“Eg mesepol la wára pay i sistigo!  
<sup>64</sup> Intenengan jo met i inkowan to!  
 Toka pa-so-i si Apo Shiyos! Jet  
 ngarantoy piyan jon pesing son si-  
 kato?”

Jet sota kait ton toray, inkowan  
 shen emin ey anam to konon  
 mebono.

<sup>65</sup> Jet sota eshom son si-kara,  
 inshogi shay topsha son Jesus.  
 Inopop sha pay i mateto, asan  
 shaka shengpela, ja kowan sha ey,  
 “Sipay enengpel son si-kam? Tiga,  
 bisto-im ka!” Jet sota ira kowadja,  
 in-aspol shay sedpak son si-kato.

*Indibak nen Pedro ey am-amta  
 to si Jesus*

<sup>66</sup> Wara ngo pay laeng si Pedro  
 shima bo-dayan ni baley, jet di-  
 maw aliy sakey ya biin бага-en ni  
 kangeto-an na pari, <sup>67</sup> jet inon-an  
 tos Pedro ja emenangshang nodta  
 apoy. Inningning tos Pedro et  
 kowan to ey, “Angken si-kam met,  
 eki-od-odop ka so nonta i-Nasarit  
 ja si Jesus i ngaran to.”

<sup>68</sup> Nem si Pedro, indibak to, ja  
 kowan to ey, “Enshiy amtak nita  
 moka pan-ikowan! Ekak ewatan  
 itan na moka pan-ikowan!” Jet  
 dimaw si Pedro nodta pasbol.

Sotan ey onkagang i kawitan.

<sup>69</sup> Jet sota biin бага-en, inon-an  
 to mowan si Pedro nodta dinawan  
 to et kowan to so nonta ira toon  
 wára nodtan ey, “Sajay ya too,  
 si-kato met i sakey ya too nonta  
 inshel sha.”

<sup>70</sup> Nem si Pedro, indibak to  
 mowan.

Idi ekay, sota ira toon wára  
 nodtan, dimaw ira di son Pe-  
 dro jet kowan sha ey, “Ayshiy  
 showashowa! Kenshat ta si-kam  
 i sakey ya kait to, tep too ka did  
 Galilia!”

<sup>71</sup> Nem si Pedro, nansangba, ja  
 kowan to ey, “Angken shosa-en  
 towak nen Apo Shiyos no o-owap  
 iyay ya inkowan ko la! Ekak  
 am-amta itan na toon joka pan-  
 ikowan!”

<sup>72</sup> Jet idi inkowan to iyay, kima-  
 gang i kawitan ni maykepin-  
 showa. Jet idi intenengan nen  
 Pedro, ninemnem to ma sota  
 inkowan nen Jesus ey, “Isaot  
 mowak ni memintedo, ja kowan  
 mo ey eg mowak am-amta, jet  
 no meksheng iyay, onkagang ngoy  
 kawitan ni maykepinshowa.” Jet  
 idi ninemnem nen Pedro iyay,  
 nimangis sa pasiya tep naydaw-  
 an.

## 15

*In-awat sha ma si Jesus so nen  
 Gobinarol Pilato*

<sup>1</sup> Idi nonta emankewa-wa ma,  
 sota ira apo ni papashi, wama-  
 is-toro ni dinteg, tan sota ira eshom  
 ma toray ni Hodiyo, nantatabal  
 ira et say inpasing sha, binedod  
 sha si Jesus et inpaidaw sha so nen  
 Gobinarol Pilato.

<sup>2</sup> Jet si Pilato, inbag-an tos Jesus,  
 ja kowan to ey, “Jet agpayso ja si-  
 kam sota ari ni Hodiyo?”

Simongbat si Jesus ja kowan to  
 ey, “Sota inkowan mo, si-kato.”

<sup>3</sup> Jet sota ira apo ni papashi,  
 eshakil i inkowan sha so nonta  
 gobinarol ja kowan sha ey basol  
 nen Jesus, <sup>4</sup> jet si Pilato, inbag-an  
 to mowan si Jesus, ja kowan to  
 ey, “Enshiy isongbat mon dason  
 mo? Apay, eg mo aya itenengan  
 ima kowan sha ey eshakil la basol  
 mo?”

<sup>5</sup> Nem nasshaaw si Pilato, tep  
 enshi pay i insongbat nen Jesus.

<sup>6-10</sup> Indasin nen Gobinarol Pilato  
 ey apal ira nonta apo ni papashi  
 son Jesus i in-awatan sha son si-  
 kato, isonga piyan ton ibolos si  
 Jesus. No timpo ni piyasta ni  
 Paskowa, waray sakey ya piriso  
 ja kaibolos ni olay nen Pilato ja  
 piyan ira nonta totoon ibolos to.  
 Isonga idi dimaw aliy eshakil la  
 too ja en nangshaw son si-kato ey  
 ibolos to nontan i sakey ya piriso  
 son si-kara, kowan nen Pilato son

si-kara ey, “Piyan jon ibolos ko son si-kayo sota ari jon Hodiyos?”

Nem naytompong nontan ja wáray sakey ja pirison nangaran ni Barabas ja sakey so nonta eshakil la girilya ja naybalod kabol ni inpamonora ni inpamakal sha so ni gobirno. Isonga idi inbaga nen Pilato no piyan nonta totoo ja si Jesus i ibolos to, <sup>11</sup> sota ira apo ngo ni papashi, intod-an sha sota eshakil la too ey say ikowan sha so nen Pilato ja ibolos to, saja si Barabas.

<sup>12</sup> Jet si Pilato, kowan to son si-kara ey, “Jet no sotan i kowan jo, ngaran to ma i dag-en ko so niya kowan jo ey ari jon Hodiyos?”

<sup>13</sup> Jet sota ira totoo, kimiyaw ira, ja kowan sha ey, “Paidansam shi koros!”

<sup>14</sup> Kowan mowan nen Pilato son si-kara ey, “Ngantoy? Ngaran ni dingka ton ngaaw aya?”

Nem ema-ma et i keljaw sha ja kowan sha ey, “Paidansam shi koros!”

<sup>15</sup> Jet nontan ma, si Pilato, tep piyan ton mepnek sota eshakil la too, inbolos to ma si Barabas son si-kara. Nem si Jesus, inpasepdad to nin asan toka i-wát so nonta ira solsharo, ja sha idansa ma shi koros.

*Dedamsis i inaspasing ira nonta solsharo son Jesus*

<sup>16</sup> Sota ngo ira solsharo, indaw shes Jesus shima mismon balely nonta gobinarol, jet inolnong shen emin sota kait shen solsharo.

<sup>17</sup> Sina-datan shay baro to ni singa baro ni ari ni Roma, ja say kolor to, sota kowan sha ey violet. Tan say inpasing sha pay ni dedamsis sha, in-inges sha ni ari. Isonga engosikos ira ni wákal la nasbitan ja inpaidnget sha son si-kato, ja singa korona to. <sup>18</sup> Jet singa konon shaka panrispito-a, ja kowan sha ey, “Onpalapalad ka koma, ari ni Hodiyos!” <sup>19</sup> Pineg-as shay toktok

to et tinopsha-an sha, asan ma ira mantalimokod shi sango-an to ni sinan pateg sha son si-kato. <sup>20</sup> Jet idi naksheng sota inpasing shen dedamsis, dinosora sota istay inpaibaro sha, jet in-oli sha met laeng sota sigod ja baro to. Jet inbo-day sha ma ja sha idansa shi koros.

*Indansara si Jesus shi koros*

<sup>21</sup> Nonta ireka man-ekad, wáray ngoy toon inaspol sha ja ondabas koma, ja si Simon i ngaran to, ja i-Sirini. Istay ondaw koma shi siyodad, nem inasakbat sha et son si-kato sota koros ja kaydansaan nen Jesus. (Saja si Simon, ama nen Alejandro tan si Ropo.)

<sup>22</sup> Jet indaw nonta solsharo si Jesus shima dogad ja kowan sha ey Golgota. (Jet say olog niya Golgota shi esel sha, toktok.) <sup>23</sup> Idi mimotok ired man, in-aknan shes Jesus ni adak ja edaokan ni agas ja eg to so dekna-an ni ensakit. Nem eg to inewát. <sup>24</sup> Jet indansara ma shi koros. Jet idi naksheng nga indansara, nanbobonot sota ira solsharo no sipay ontompong so nonta ira baro nen Jesus, asan shaka panbibingayi.

<sup>25</sup> Say oras ni inkoros sha so nen Jesus, alas nowibi ni agsapa. <sup>26</sup> Jet wáray naysolat ja engikowan ni kabol ni naydansa-an tod koros, ja kowan to ey, “Sajay sota ari ni Hodiyos.”

<sup>27</sup> Jet wáray showen tolisan ja inpakibitay sha son si-kato shi sanseskey ya koros. Sota sakey, wára nodta petek ni kanawan nen Jesus, tan sota sakey, wára nodta petek ngo ni kanigid to. <sup>28</sup> (Sajay i nantongpalan nonta naypadto nonta bayag da, ja kowan to ey, “Maybidang ey sakey ya bimasol.”)

<sup>29</sup> Sotan ngo ira toon emandebas ja man-ekad nodtan, ngini-ngingian sha, tan inbi-bi-wisan sha

pay, ja kowan sha ey, "Towa! Kowan mo ey sheshalen moy Timplo jet bengenon mo mowan ni tedon akew! <sup>30</sup> Apay nga eg mo isalakan i bakdang mo shorog, ja ondespag alid ta koros mo?"

<sup>31</sup> Jet angken sota ira apo ni pashhi ni Hodiyo, tan sota ira mamaistoro ni dinteg, ekingi-ngo ira, ja kowan sha ni tabtabal sha ey, "Insalakan to konoy eshom, nem eg to met isalakan i bakdang to shorog! <sup>32</sup> Kowan to ey si-kato kono sota naypadton ibetkag ali nen Apo Shiyos ja mengisedakan, kowan to ey si-kato kono sota ari ni Israel. Tiga, asen tayo noman no kaba-dan ton ondespag alid ma koros to, say memati kito son si-kato!"

Jet sota kait ton showa ja in-pakibitay sha son si-kato, nan-esel ngo ira ni ngaaw so nen Jesus.

#### *Etey si Jesus*

<sup>33</sup> Idi nonta alas dosi ni kakawan, nanbolinget nodtan na dogad ingkato nonta alas tris ni mama-shem. <sup>34</sup> Jet idi nonta alas tris ni mama-shem, si Jesus, kimeljaw ni makedsang, ja kowan to ey, "Iloy, Iloy, lama sabaktani!" (Say olog niya kowan to, "Shiyos ko, Shiyos ko, ngantoy in-owayan mowak so?")

<sup>35</sup> Nem sota eshom ma toon wara nodtan, idi intenengan sha sota kowan nen Jesus, kowan sha ey, "Itnengiyoy! Toka emo panta-wala ali si Elias shi dangit!" <sup>36</sup> Jet sota sakey so nonta ira toon wara nodtan, kinano-an ton en engineng nonta singa bonot ja masbet ni shanom nodta empait ta tapey asan toka ipi-ket shi pating. Jet in-awat tod sobil nen Jesus, jet kowan to ey, "Ma-sas ka no ondaw ali si Elias ja en mengpas son si-kato alid ma koros!"

<sup>37</sup> Jet si Jesus, inkedsang toy keljaw to mowan, asan ma mabosi.

<sup>38</sup> Jet nontan ma, sota masshel la kortina ja naysa-din nodta kapatkan na kowadto shima naydaem ni Timplo, epi-kat ta nanshowa, manipod nodta naytapew ingkatod ma despag.

<sup>39</sup> Jet sota kapitan ni solsharo ja wara nodta naymamang ni kadan nen Jesus, idi inon-an toy itsora ni inkatey nen Jesus, kowan to ey, "Agpayso gayam ey sajay ya too ket anak ni Shiyos!"

<sup>40</sup> Wara ngo iray bibii nodta naybabetaw ja engikadmang niyay ya epasemak. Jet say ngaran ira nonta eshom ma bibii ja wara nodtan, sajay: si Maria Magdalena, si Salome, tan si Maria ja ina ira nonta si Jose tan si Santiago ja inbeshayan shen Orishiyon. <sup>41</sup> Sajay iren bibii, nayolop ira son Jesus nonta wara pay laeng shi Galilia jet tinodongan sha alid man. Tan wara pay nodtan i eshakil la kait shen bibii ja ekidaw son Jesus manipod Galilia ingkatod Jerusalem.

#### *Indiyang sha si Jesus*

<sup>42</sup> Say akew wa edaga-an niyay ya emin, sota kowan sha ey akew wa Pansekana ni para sota akew wa ngilin, jet no medebi, si-katoy ibilang sha ey panshoki ma nonta akew ni ngilin. <sup>43</sup> Isonga waray manngeshan ni Jose, ja toon edapo nodta ili ni Jodia ja kowan sha ey Arimatia, intoled ton dimaw so nen Pilato ja to kinshaw i bakdang nen Jesus. (Sajay ya si Jose, sakey so nonta ira toray ni Hodiyo. Jet si-kato, kaishayaw noman ni totoo. Tan sakey pay, si-katoy sakey ya emansessesked ni isabi ali ni pantoshayan nen Apo Shiyos.)

<sup>44</sup> Idi dimaw si Jose ja to kekshawen sota bakdang nen Jesus, nasshaaw si Pilato ni in-amta to so ey etey si Jesus. Isonga to inpa-odop sota apo ni solsharo et

inbag-an to no agpayson etey si Jesus. <sup>45</sup> Idi kowan nonta apo ni solsharo son Pilato ey etey nga agpayso, inpalobos tos Jose ja en mengeda nonta bakdang nen Jesus. <sup>46</sup> Enongkal si Jose ni dopot ja para dibot ni etey, jet impas to alid ma koros i bakdang nen Jesus jet dinibotan to nonta empotin dopot ja tinongkal to, jet in-ilaw to nodta baton diniyangan sha jet shiman i indiyangan to so. Jet inodin to sota ebadeg ga baton tangeb nonta diyang jet inpokit to nodta sakepan. <sup>47</sup> Jet si Maria Magdalena, tan sota sakey ya si Maria ja ina nen Jose, inon-an sha iyay ya naydiyangan nen Jesus.

## 16

### *Nan-ongal si Jesus*

<sup>1</sup> Idi mama-shem ma ja edabas da sota akew ni ngilin, si Maria Magdalena, si Salome, tan si Maria ja ina nen Santiago, enongkal ira ni danen emansengew, ja sha ipoyok koma nodta bakdang nen Jesus. <sup>2</sup> Jet idi agsapa ni Domingko, ja emanbo-day aliy sekit, dimaw ira nodta naydiyangan nen Jesus. <sup>3</sup> Say tabtabal sha, kowan sha ey, “Sipay onposin mengkal ni baton naytangeb nodta bongot ni diyang say onsekep kito?” <sup>4</sup> Nem idi onshemang ira, inon-an sha ey nakal gayam sota bato, ey ebadeg ga pasiya. <sup>5</sup> Simekep ira nodta diyang et inon-an shay balodakin nanbaro ni empoti ja edayag, ja timongaw nodta apit ni kanawan. Jet nasshaaw iren pasiya.

<sup>6</sup> Kowan nonta balodaki son si-kara ey, “Karekayo messhaaw. Amtak ey say piyan jon on-an, si Jesus ja i-Nasarit ja naydansa shi koros. Nem enshid jay, nanongal da! Asas jo kari ita istay inparokolan sha so. <sup>7</sup> Jet no asen jon enshi, daw kayo, jet jo

ikowan so nonta ira too to ey nanbiyag mowan da, agdalo son Pedro. Jet niman, ondaw da si Jesus ja mepangdo ey si-kayo shi Galilia, jet shiman i asanan jo so! Tep saman i inkowan to son si-kayo nonta aneng pay laeng i ketey to.” Kowan nonta balodaki.

<sup>8</sup> Bimo-day mala ira sota bibii ja namtik ired diyang, tep ireka manbebayedbed ni takot sha. Jet enshiy sha inkokowan so ni angken sipa nontan tep eta-kot ira.

### *Nanpa-sas si Jesus son Maria Magdalena*

<sup>9</sup> Idi naksheng nga nan-ongal si Jesus ni agsapen pasiya ni Domingko, say kapangdo-an na nanpasasan to, si Maria Magdalena. (Sajay sota si Maria ja inpabtan so nen Jesus ni piton dimonyo ja pimeket son si-kato.) <sup>10-11</sup> Jet si Maria ngo, dimaw so nonta ira too nen Jesus ja nay-olop ni olay son si-kato nontan da et sina-kop to iren esa-nop ja emandeshingit tan emannengis ni inkabono nen Jesus. Jet inkowan to son si-kara ey, “Nanbiyag mowan si Jesus! Inon-an kon mismo!”

Nem idi intenengan sha, eg sha pinati.

### *Nanpa-sas si Jesus so ni showen too to*

<sup>12</sup> Idi naksheng iyay, nanpa-sas mowan si Jesus so ni showen too to ja eman-ekad ja edapod siyodad ni Jerusalem. Jet na-apil i inpangidmang sha son si-kato. <sup>13</sup> Jet nan-oli sota shadwa, ja sha inkowan so ni eshom ma kait shen too nen Jesus, nem iso met laeng nga eg sha pinati.

### *In-awat ma nen Jesus sota ka-onoran na bilin ton epateg so nonta ira apostol to*

<sup>14</sup> Idi naksheng nga nanpa-sas si Jesus so iren jay, nanpa-sas mowan so nonta ira sawal ni

sakey ya apostol to nonta maramen ireka mengan. Jet inseg-ang to ira ni eg sha so pinati-an so nonta insodsod nonta ira engasas son si-kato ni inpan-ongal to; kowan to ey epaladoy katangken ni toktok sha.

<sup>15</sup> Jet kowan to pay son si-kara ey, “Daw kayo shi emin na sakop niya dobong jet jo ikowan so ni emin na totoo i mapteng nga shamag maypangkep son si-kak. <sup>16</sup> Sota memati tan mebon-jagan, maysedakan ira, nem sota eg memati, shosa-en ali nen Apo Shiyos.

<sup>17</sup> “Jet sota ira memati, mandeka ngo ira ni kaskasshaaw wa ewatan so ni totoo ey podnoy shaka pan-itoro. Say dag-en shen kaskasshaaw, sajay: mengipebtik ira ni dimonyon pimeket shi totoo no i-osal shay ngaran ko, man-asel ira ni eshakil la kalasin esel ja eg sha amta; <sup>18</sup> angken egni-an sha pay i oleg tan inomen shay sabis-hong ja istay keteyan sha koma, eg ira mesekitan; tan ontakal iray emanpansekit no isakpal shay tak-day sha son si-kara.”

<sup>19</sup> Jet si Apo Jesus, idi naksheng nga inkowan to iyay son si-kara, inda ma nen Apo Shiyos shi naykayang et en timongaw shi apit ni kanawan nen Apo Shiyos.

<sup>20</sup> Jet sota ira toon inbilinan to so nonta inkowan to la, nansisi-jan ira, ja sha intoro shi emin na dogad sota maypangkep son Jesus. Jet eki-obda ngo si Jesus son si-kara, isonga nayki-det sota intoro shen esel nen Jesus, tep in-aknan to pay ira ni panakabalin shen mandeka ni milagro. Siya, satan da.



## SOTA INSOLAT NEN SAN LUCAS JA MAYPANGKEP NI KABEBIYAG TAN TORO NEN JESUCRISTO

<sup>1</sup> Iyay i isolat ko son si-kam, agi Teofilo: Eshakel day engipeshas ni kabaalan shen mengisodat ni edagdaga nonta timpon emek-ibibiyag pay laeng si Apo Jesus son si-katejo, <sup>2</sup> jet inonod sha ni olay sota intoro met laeng nonta apostol nen Jesus, tep si-karay sigod ja eki-odo-odop son si-kato, si-karay engasas ni in-paspasing to, tan si-kara pay i inbetkag ton engitosh ni esel to. <sup>3</sup> Jet niman Teofilo, peshasen ko ngon isolat. Ninemnem ko ey mapteng emo nem si-kak pay i sakey ya mengisodat tep inashal kon pasiyeu emin sota edagdaga manipod nonta nanshogi-an to ingkatod ka-onoran. Isonga sin-ingpet kon insolat iyay para son si-kam, <sup>4</sup> say amta-en mo pay i eshom ma podpodno, ja toloy nonta inashal mo la.

*Sota anghil, inkowan toy kay-enak ali nen Juan*

<sup>5</sup> Nanshogi iyay ya emin nonta timpon inpantoray nen Ari Hierodis shi Jodia. Nontan da, wara ngoy parin nanggaran ni Sakarias, ja naykait so nonta gropo ni pari ja kowan sha ey Abiyas. Say ngaran ni asewen Sakarias, si Elisabet, ja poli ngo met laeng ni pari. <sup>6</sup> Sajay iren san-asewa, mapteng i ogadira, ja shaka tongpalen emin i bilin nen Apo Shiyos. <sup>7</sup> Nem enshiy anak sha tep basig si Elisabet. Eba-kol ma si Elisabet tan edakay ngo ma si Sakarias.

<sup>8-9</sup> Idi sakey ya akew, naysa-dat si Sakarias ja mansilbi son Apo

Shiyos shi Timplo, tep say ogadi ni papashi ni Hodiyos nontan da, emansasa-dat sota gropo ni pari ja mansilbi shi Timplo jet man-bobonot ira no sipay sakey son si-kara ja onsekep shi Timplon memool ni kowan sha ey insinso. Jet say epi-not, si Sakarias. <sup>10</sup> Idi maramen emankepooli sota insinso, emanshewat sota ira totoo son Apo Shiyos shi bo-dayan ni Timplo. <sup>11</sup> Si Sakarias i wared ma naydaem ni Timplo, jet nontan, nanpa-sas i anghil nen Apo Shiyos son si-kato shi apit ni kanawan nonta damisaan ja kepankepooli nonta insinso. <sup>12</sup> Idi inon-an nen Sakarias sota anghil, eg to tongolan i pesing to, ta timakot.

<sup>13</sup> Nem kowan nonta anghil son si-kato ey, "Kareka ontakot Sakarias. Si Apo Shiyos, intengan toy shawat mo et si asewam ma Elisabet, on-anak ali ni daki. Jet say ingaran mo di son si-kato, Juan. <sup>14</sup> Man-imdeng tan medadsakan ka din pasiya, tan eshakel pay aliy man-imdeng ni kay-enak to. <sup>15</sup> Bigbigen ali nen Apo Shiyos si Juan ja eshayaw. Eg ali menginom ni adak, ono ngaranton memoteng. Ishalan ali ni Ispirito Santo nen Apo Shiyos ni olay manipod kay-enak to. <sup>16</sup> Eshakel aliy tood Israel ja panodi ton memati son Apo Shiyos. <sup>17</sup> Wara son si-kato i Ispirito Santo nen Apo Shiyos ja inges tos Elias ja para padto nonta bayag da, jet say kabedinan nen Elias, inges to ngo son si-kato. Si-kato nin i mepangdon mantosho shi Israel, asan kamotok sota naypadto nonta bayag da ja ibetkag ali nen Apo Shiyos ja mengisedakan. Si-kato diy mengi-odi ni semek ni san-a-ama ja eg man-inawatan. Si-kato diy memanshaan ni toon eg memati son Apo Shiyos, say nemnemen sha mowan i kosto, say mansekana i totoo ni imotok

ali nen Apo.” Kowan nonta anghil.

<sup>18</sup> Jet inbaga nen Sakarias ey, “Toway amta-an ko so ey mepesamak iyay? Edakayak mala met, tan eba-kol ngo ma si asewak.”

<sup>19</sup> Kowan nonta anghil ey, “Sikak si Gabriel ja anghil. Naka mansilbi ni olay son Apo Shiyos et inbetkag towak ali ja mengikowan ni pansigshan mo di. <sup>20</sup> Nem si-kam, eg ka memati ni kowan ko. Nem angken eg ka memati, kenshat ta mepesamak met laeng ni koston timpo to. Isonga niman ma, eg ka maka-esel ingkatod mepesamak sota inkowan ko son si-kam.” Kowan nonta anghil.

<sup>21</sup> Naysekeshan mala sota tootod bo-dayan et kowan sha ey, “Ngantoy? Ebayag ga pasiya si Sakarias shi Timplo.”

<sup>22</sup> Idi bimo-day ali si Sakarias, eg ma maka-esel et eg mebedin na mekitbal nodta totoo. Nakol ninemnem nonta totoo ey kenshat ta waray inpa-sas nen Apo Shiyos son si-kato shi Timplo. Sininjas malay pepesing nen Sakarias ja mekitbal.

<sup>23</sup> Idi epospos may timpo ja pansilbi nen Sakarias shi Timplo, imakad si Sakarias shi baley to. <sup>24</sup> Idi enshiy bayag to, ewad-an si Elisabet ta asewa nen Sakarias et nannongew shi baley sha ni dimen bolan.

Nontan, kowan nen Elisabet ey, <sup>25</sup> “Niman ta tinodongan towak nen Apo Shiyos, malokonak ma. Isonga enshi may naka kaybebaingi shi totoo.”

*Sota kay-enak ali nen Jesus, inpa-amta ni anghil so nen Maria*

<sup>26</sup> Idi mayka-nem ma bolan ni dokon nen Elisabet, inbetkag mowan nen Apo Shiyos i anghil to ja si Gabriel shi ilin Galilia ja kowan sha ey Nasarit. <sup>27</sup> Shiman i kawad-an ni sakey ya balesang ja manngeshan ni Maria. Si Maria,

enshiy to ined-eshol la daki et sikatoy naykarin esaw-en ni sakey ya dakin manngeshan ni Jose, ja poli nen David ja ari nonta bayag da. <sup>28</sup> Si Gabriel, dimaw son Maria et to inkowan ey, “Pan-imdeng ka Maria, ta say ebadeg ga semek nen Apo Shiyos, wara son si-kam.”

<sup>29</sup> Eg amta nen Maria i pesing to nonta intenengan to sota inkowan ni anghil, tan toka en-enapa nem ngarantoy olog nonta inkowan nonta anghil.

<sup>30</sup> Nem kowan nonta anghil ey, “Kareka manshanag Maria, ta si Apo Shiyos, kinaasi-an toka. <sup>31</sup> Medokonan ka et daki aliy i-anak mo, ja panngeshan mo di ni Jesus. <sup>32</sup> Meshedjaw ali, tan mayngadnan ja Anak nen Apo Shiyos sa Kangeto-an. Jet si Apo Shiyos, pantoshay to ja inges toy inpantoray nen David ja apo to la. <sup>33</sup> Si-kato di ni olay i mengitoshay ni kait ton poli nen Jacob ingkatod ingka.”

<sup>34</sup> Say insongbat nen Maria so nonta anghil, kowan to ey, “Toway pesing nitan? Balesangak met! Enshiy nak ined-eshol la daki!”

<sup>35</sup> Kowan nonta anghil ma ey, “Sota Ispirito Santo nen Apo Shiyos i maka-amta. Sota panakabaln nen Apo Shiyos, wara di son si-kam. Isonga sajay alin nganga, esanto-an ja enshiy to di panbesolan, jet maykowan ali ey Anak nen Apo Shiyos. <sup>36</sup> Iman to pay, si Elisabet ja kasingsing mo ket iman i enem ma bolan na dokon to niman, ey eba-kol ma, kowan sha ey basig pay. <sup>37</sup> Enshi eshan i edigat so nen Apo Shiyos; kabedinan ton emin.”

<sup>38</sup> Kowan ma nen Maria ey, “Naka pati-a i kowan nen Apo Shiyos. Angka et nem mepesamak aliy kowan mo.”

Sotan ey indekjas ma nonta anghil si Maria.

*Dimaw si Maria shi Jodia ja to binisita si Elisabet*

<sup>39</sup> Idi edabas i pigen akew, nansaganes Maria et dimaw shi karonshontogan ja sakop ni ilin Jodia, <sup>40</sup> tep shiman i kawad-an nen Sakarias tan si Elisabet. Idi mimotok si Maria, imesel la shagos son Elisabet.

<sup>41-42</sup> Idi intenengan nen Elisabet sota esel nen Maria, nayinshas ngon kimeykey sota ngedekes nen Elisabet. Inkedsang nen Elisabet i esel ton intorong ni Ispirito Santo nen Apo Shiyos, ja kowan to ey, “Eshakel i bii, nem si-kam i pinidi nen Apo Shiyos ja in-aknan to ni ebadeg ga kaasi. Jet kaasi-an to pay ali ta nga-ngen i-anak mo di. <sup>43</sup> Apay sipa-ak et ngon en binisita di ni ina ni Apok! <sup>44</sup> Idi intenengan koy esel mo, nayinshas ngoy keykey niya dokon ko ni imdeng to. <sup>45</sup> Siya, pinatim sota esel nen Apo Shiyos ja inpa-anta to son si-kam, ja mepesamak ali. Isonga binindisiyonan toka.”

<sup>46</sup> Kowan nen Maria ey, “Ebadeg i shayaw ko son Apo Shiyos, <sup>47</sup> tan naka man-imdeng kabol son Apo Shiyos sa mengisedakan son si-kak. <sup>48</sup> Tep eg towak in-olay ya too ton ebaba. Niman ma, angken sipa, ikowan to ey si-kak i kagesatan. <sup>49</sup> Si Apo Shiyos ja Kangeto-an, kabedinan ton emin i piyan ton dag-en, et kinaasi-an towak. <sup>50</sup> Manipod nonta pilmiron too ingkato niman, toka kaasi-i sota toon mengiredjaw son si-kato. <sup>51</sup> Si Apo Shiyos, kaskasshaaw i obden toka dagdag-a. Angken sota nga-ngaaw wa plano ni toon etangsit, toka bediwi. <sup>52</sup> Si-kato, toka pebeba i engaton emantoshay, nem toka ingatoy nankebaba. <sup>53</sup> Toka i-akni ni mapteng nga kasapolan sota ira na-agang jet sota ira nankebak-nang, angken ma-ayshi-anan ira. <sup>54-55</sup> Eg to dibkan i kari to son

Abraham tan so ni emin na poli to, ja apo tayo da met laeng. Kaasi-an toy too ton i-Israel ingkatod ingka, jet niman, tinodongan shakito.” Sajay i iyaman nen Maria.

<sup>56</sup> Si Maria, nan-iyam nin shi baley nen Elisabet ni tedon bolan, asan ka-oli shi baley to.

*Nay-anak si Juan ja para bonjag*

<sup>57</sup> Simabi may timpon i-anak nen Elisabet et imanak ni daki. <sup>58</sup> Jet idi inamta-an nonta inaskang to tan partido to iyay ya ebadeg ga kaasi nen Apo Shiyos son si-kato, eki-imdeng ira son si-kato. <sup>59</sup> Idi maykewalon akew nonta nga-nga, dingkara sota ogadi ni Hodiyos ja shaka pesing ni dakin koyat. Sajay sota kowan sha ey kogit. Istay kowan sha ey Sakarias ngoy ingaran sha nonta nga-nga say iboloy sha met laeng so nen tatang to. <sup>60</sup> Nem kowan nen ineto ey, “Enshi, say paingeshan tayo, Juan.”

<sup>61</sup> Kowan ngo nonta ira too ey, “Nem enshi met i partidom ma nanngaran ni Juan.” <sup>62</sup> Jet sininjasan shes Sakarias ja tatang nonta nga-nga, nem sipay piyan ton ingaran nonta nga-nga. <sup>63</sup> Jet insinjas nen Sakarias ey aknan sha ni pansodatan to, say isolat toy ngaran na piyan to. Jet say insolat nen Sakarias, “Juan i ngaran to.” Nasshaaw sota ira totoo nonta binasara sota insolat to.

<sup>64</sup> Nay-inshas ngo men make-esel mowan si Sakarias et nan-iyaman son Apo Shiyos. <sup>65</sup> Jet emin ira sota inaskang sha, waray dinmoren na-ap-apil la na-amag. Jet naywaris iyay ya shamag shi emin na nanbaley shima shonshontog shi Jodia. <sup>66</sup> Emin ira sota engitneng, kowan sha ey wares Apo Shiyos so nonta nga-nga. Jet kowan sha ey, “Ngaranto emoy panbedinan ali niyay ya nga-nga?”

<sup>67</sup> Jet si Sakarias, intorong ni Ispirito Santo nen Apo Shiyos ja mengikowan ey, <sup>68</sup> “Salamat son Apo Shiyos, ja Shiyos ni Israel! Tep eg tokito binaybay-an, asan si-katoy mengisedakan son si-katejon totoo to! <sup>69</sup> Inbetkagan shakito ni makedsang nga mengisedakan ja mismon poli nen Ari David ja emepiyal la too nen Apo Shiyos nonta bayag da. <sup>70-71</sup> Nonta bayag da, say inkari to, si-katoy mengibediw son si-katejo shi emin na toon kabakal tayon makakontra son si-katejo. Sajay i inkowan ira nonta esanto-an na para padto nonta bayag da. <sup>72</sup> Say inkari to pay so nodta ap-apo tayo nonta bayag da, kowan to ey todongan to ira ni olay et kenshat ta tongpalen to iyay ya kari ja enshiy kolang to. <sup>73</sup> Say inkari to so nen Abraham ma apo tayo da, <sup>74</sup> si-katoy mengibediw son si-katejo shi kabakal tayo, say mewedja-an kito ni olay ja mansilbi son si-kato, <sup>75</sup> ingkatod ketey tayo, ja enshiy to asen na pankodangan tayo ono kebedawan tayo. <sup>76</sup> Sikam ma anak ko, no onba-deg ka di, si-kam ali sota ibetkag nen Apo Shiyos sa Kangeto-an, ja mepangdon mengikowan nodta totoo ey mansekana ira ni imotok to. <sup>77</sup> Say mo itoro so nonta totoon Apo Shiyos, ikowan mo ey maysedakan ira nem mepekawan i basol sha, <sup>78-79</sup> tep si Apo Shiyos ja tayoka shedshedjawa, ebadeg i toka pengisekit son si-katejo. Say arig ni pengisedakan to ali, singa silwan to ali sota totoon imekok shi shalan ja edabi-an, ja istay patey i toshongen sha. Jet si-kato may mengitoshon son si-katejo ni shalan ja mantoshong shi talna.” Sajay i kowan nen Sakarias.

<sup>80</sup> Sota nga-ngen si Juan, bima-deg, tan enemneman. Idi ebadeg

ma, nan-iyen ni olay si Juan shima dogad ja naybetaw shi kad-an ni too, ingkatod simabi sota akew wa pengitosho to nonta sigod ja inkowan nen Apo Shiyos ja itoro to nodta tood Israel.

## 2

### *Nay-anak si Jesus*

<sup>1</sup> Nonta timpon inkay-anak nen Juan, naytompong ngon waray inbilin nen Ari Agosto ey mesepol la emin na tood dobong, manpedista ira. <sup>2</sup> Sajay i pilmiron sinsos ja na-amag nonta timpon kagobinarol nen Kirino shi Siria. <sup>3</sup> Jet emin ira sota too, dimaw ira ja nanpalista, ja tinonton shay edapo-an ni apo sha. <sup>4-5</sup> Isonga si Jose, dima-jat ngo shi baley tod Nasarit ja ilin Galilia et dimaw shi Bitlihim ma ilin Jodia, ja kawad-an nen Ari David nonta bayag da. Shiman i dinawan nen Jose ja nanpalista-an tep poli nen Ari David. Nan-olop ira nen Maria, ja naykarin esaw-en to et naytompong ngon malokon nontan si Maria. <sup>6</sup> Jet nonta wara ira med Bitlihim, simabi sota timpo malen i-anak nen Maria. <sup>7</sup> Jet say in-anak to, daki, ja si-katoy besag. Dinampinan to et inparokol tod panganan ni animal. Sinodngan to iyay tep enshiy mebedin na k-okipan sha nodta baley ya koston shiwesan.

<sup>8</sup> Nontan na dabi, wara iray emanbantay ni kalniro shi bodosan ja nay-esop shi Bitlihim. <sup>9</sup> Jet nontan, nanpa-sas i sakey ya anghil nen Apo Shiyos son si-kara. Jet sota niyal ja edapo son Apo Shiyos, sinilwan to ira et etakot iren pasiya. <sup>10</sup> Nem kowan nonta anghil ey, “Karekayo ontakot! Dimawak alin mengikowan ni mapteng nga shamag son si-kayo, jet saja ikowan ko, pan-imdengan ni emin na totoo. <sup>11</sup> Niman na dabi, nay-anak sota Apo tayon

inkari nen Apo Shiyos nonta bayag da ja en ali mengisedakan son si-kayo. Say nay-anakan to, shi Bitlihim ja ili da nen Ari David. <sup>12</sup> Say pengimatonan jo so, edampinan sota nga-nga, ja nayparokol shi panganan ni animal.” Kowan nonta anghil.

<sup>13</sup> Idi naksheng nga inkowan to iyay, shimakel i anghil shi naykayang ja emengikankansiyon ni shayaw sha son Apo Shiyos, ja kowan sha ey, <sup>14</sup> “Si Apo Shiyos ja wared dangit i mayshedjaw! Jet niman, iyed jay i mengi-kan ni talna shiya dobong so nonta ira toon kinosto-an to.”

<sup>15</sup> Idi imoli ira sota anghil shi dangit, nantatabal ira sota emanpastol ni kalniro, ja kowan sha ey, “Ondaw kito ka ngarod shi Bitlihim, tayo asen sota nay-anak ka nga-nga ja inpa-amta nen Apo Shiyos son si-katejo.”

<sup>16</sup> Kinano-an shen dimaw shi Bitlihim et simbira si Maria tan si Jose et inon-an sha sota ngangen inparokol shed panganan ni animal. <sup>17</sup> Idi inon-an nonta emanpastol ni kalniro sota nga-nga, inkowan sha son Maria nen Jose sota inkowan ni anghil maypangkep niyay ya nga-nga. <sup>18</sup> Jet emin ali ira sota engitneng ni inkowan nonta emanpastol ni kalniro, nasshaaw iren pasiya. <sup>19</sup> Nem si Maria, eg to dibkan iyay ya epalabas, no diket ninemnemnem to ni olay.

<sup>20</sup> Imoli ira sota emanpastol ni kalniro, ja ebadeg i iyaman sha so nen Apo Shiyos maypangkep nonta emin na intenengan sha, tan inon-an sha, tep etongpal sota inkowan ni anghil son si-kara.

### *Indaw sha si Jesus shi Timplo*

<sup>21</sup> Idi edabas i wálon akew ni inkay-anak nen Jesus, dingkara sota ogadi ni Hodiyo ja shaka pesing ni may-enak ka daki, ja

kowan sha ey kogit. Jet inpanngaran sha ni Jesus, tep nonta eg pay naydokon sota nga-nga, inkowan nonta anghil ey Jesus i ingaran sha so nonta nga-nga.

<sup>22</sup> Nonta shimanon sota timpon penongpalan shi Jose nen Maria nonta dinteg nen Moises maypangkep ni biin ipan-anak to, ja kowan sha ey purification, indaw sha iyay ya nga-nga shi Jerusalem say maybidang ey i-awat shay biyag to son Apo Shiyos. <sup>23</sup> Sajay i inpasing sha tep say naysolat shi dinteg nen Apo Shiyos, “Emin na anak ni Hodiyo ja pangodowan na daki, mesepol la maybidang nga para son Apo Shiyos.” <sup>24</sup> Si Maria tan si Jose, ira engi-kan ni daton sha tep say kowan ni bilin nen Apo Shiyos, mesepol la mengi-kan ira ni daton shen sanparis ja kalopati.

<sup>25</sup> Jet nontan, wáray tood man ja si Simeon i ngaran to ja nanbaley shi Jerusalem. Makedsang i pamati to son Apo Shiyos, tan eshayaw ey mapteng nga too. Jet toka sesseskera i ketongpal nonta kari nen Apo Shiyos ey wáray ibetkag ton mengisedakan ni tood Israel. Jet say Ispirito Santo nen Apo Shiyos, wára son si-kato. <sup>26</sup> Sota Ispirito Santo nen Apo Shiyos, si-katoy engi-kan ni namnama to ey eg nin metey ingkatod on-an to sota naypadto nonta bayag da ey ibetkag ali nen Apo Shiyos ja mengisedakan. <sup>27</sup> Intorong ni Ispirito Santo si Simeon shi Timplo et nontan na akew, indaw ngo nen Maria tan si Jose sota anak sha shi Timplo say dag-en sha sota kowan ni bilin nen Apo Shiyos. <sup>28</sup> Jet si Simeon, inakwál to sota nga-nga asan eman-iyaman so nen Apo Shiyos ja kowan to ey, <sup>29</sup> “Niman Apo Shiyos, tinongpal moy karim et wára ma son si-kak i talna. Si-

kak ja baga-en mo, palobosimak ja metey ma, <sup>30</sup> tep inon-an niya showen matak ma i inkowan mon mengisedakan ali, <sup>31</sup> ja si-katoy insaganam ma para so ni emin na totoo et si-katoy pengamta-an sha ni pesing shen maysedakan. <sup>32</sup> Si-katoy may-eshig ga silew ja ondawag ni toon eg maka-amta son si-kam Apo Shiyos, tan si-katoy mengi-kan ni kayshedjawan ni toom ja Israel.” Sajay i iyaman nen Simeon.

<sup>33</sup> Sota ama tan ina nonta nga-nga, nasshaaw ira nonta inkowan nen Simeon ni maypangkep niyay ya nga-nga. <sup>34-35</sup> Jet kowan pay nen Simeon ey, “Si Apo Shiyos i onbindisiyon son si-kayo. Jet iyay i ikowan ko son si-kam ja ina niya nga-nga. Sajay ya nga-nga, shinotokan nen Apo Shiyos et si-katoy panshoki-an ni pandilinasin ira ni tood Israel. Eshakel i mengokes son si-kato, tan eshakel ngoy memati son si-kato ni pansigshan sha, tep idawdawag toy ngaaw wa nemnem ni eshakel la too. Maydesin ey wara son si-kato si Apo Shiyos, nem bedawen ni eshom. Jet si-kam ja ineto, sajay ya ibalaw sha di son si-kato, si-katoy kesekitan ni posom.”

<sup>36-38</sup> Waray biin para padto ja eba-kol ja si Ana i ngaran to. Anak nen Panoil, ja poli nen Asir. Nontan met laeng nga oras, mimotok sota eba-kol nodta kawadan sha et nan-iyaman so nen Apo Shiyos maypangkep nonta nga-nga, jet to inkowan i maypangkep nontan na nga-nga so ira nonta kait ton emansessesked so nonta ibetkag ali nen Apo Shiyos ja mengisedakan ni tood Jerusalem. Saja eba-kol, piton tawen na ekibiyag son asewa to da nonta kamashikit to et niman, eballo. Nantawen ni walon polo tan epat. Wara ni olay shima Timplo; inakew tan dinedabin toka ibiyang i

pangan to ni toka panshewat son Apo Shiyos.

<sup>39</sup> Idi naksheng nga tinongpal shen emin sota kowan ni bilin nen Apo Shiyos ey dag-en sha, imoli ira shi Galilia, shi baley shed Nasarit. <sup>40</sup> Sota nga-nga, bima-deg, tan kimedasang. Enemne-man ma, tep tinodongan nen Apo Shiyos.

*Ekitongaw si Jesus so nonta ira mamaistoro shima Timplo*

<sup>41</sup> Tinaw-en ja sota ama tan ina nen Jesus, ireka ondaw shi Jerusalem ni timpon piyasta ni Hodiyos ja kowan sha ey Paskowa. <sup>42</sup> Nonta nantawen si Jesus ni sampolo tan showa, dimaw ira mowan shi Jerusalem ni timpon piyasta. <sup>43</sup> Idi naksheng sota piyasta, dima-jat iren on-akad shi baley sha ma, nem eg amta nen Maria tan si Jose ey edekjas si Jesus shi Jerusalem. <sup>44</sup> San-akew ja nan-akad ira ja eg sha dindinmo ey ayshi si Jesus. Kowan sha nem eki-odop nodta kagait sha, nem idi sha inena-enap nodta kad-an ni kagajem sha tan partido sha, ayshi gayam. <sup>45</sup> Jet idi eg sha simpol, nay-oli ired Jerusalem et sha in-enap. <sup>46</sup> Idi maykatdon akew, simbira shi Timplo, ja ekitongaw so nonta ira mamaistoro ni Timplo. Toka itentenengiy kowan sha et nansalodsod ngo son si-kara. <sup>47</sup> Jet emin ira sota engitneng ni daing ton onsongbat so nonta ira mamaistoro, nasshaaw iren pasiya.

<sup>48</sup> Si Maria tan si Jose, nasshaaw ngo ira ni in-asas sha so et kowan nen ineto ey, “Anak ko, apay nga dingkam iyay son si-kami? Si amam tan si-kak, eshanagan kamin pasiya ni ana-anap mi son si-kam.”

<sup>49</sup> Kowan nen Jesus son si-kara ey, “Dimaw kayo gayam ali ja jowak kepan-enapa? Eg jo aya

amta ey mesepol la man-iyanak shi baley nen Amak?”

<sup>50</sup> Nem eg sha inewatan sota kowan to son si-kara.

<sup>51</sup> Jet si Jesus, ekidaw son si-kara ja imakad shi Nasarit, ja toka patien emin i kowan sha son si-kato. Si ineto, emin iyay ya banag, toka nemnemnema shi poso to.

<sup>52</sup> Si Jesus, bima-deg, maked-sang, tan enemneman tep si Apo Shiyos, wara son si-kato, jet eshakil i toon makapiyan son si-kato.

### 3

*Si Juan ja para bonjag, inshogitoy obda to*

<sup>1-3</sup> Idi kinsin tawen ja nantoray si Ari Tibirio shi Roma, waray inkowan nen Apo Shiyos ja bilin to so nen Juan ja anak nen Sakarias. Wara nontan si Juan shima dogad ja nay-arawid kadan ni too. Jet winaswas ton emin i dogad shima kilig nonta ebadeg ga pa-dok ja kowan sha ey Jordan, ja to intod-an iray totoo. Jet say kowan to, “Mesepol la manbebawi kayo, asan kayoka manpabonjag, say pekawanan nen Apo Shiyos i basol jo.”

Nontan ngon timpo, si Poncio Pilato i gobinarol shi Jodia, si Hirodis ngod Galilia, tan si Felipe ja agi nen Hirodis shi Itoria tan shi Trakoniti. Asan si Lisania i toray shi Abilini. Say kangeto-an nontan ja pari, si Anas nen Kaipas.

<sup>4</sup> Sota inpantoro nen Juan, sikatoy nantongpalan nonta padto nen Isaias nonta bayag da, ja kowan to ey wara aliy toon ikeljaw toy esel to shima dogad ja ikowan to ey, “Pansagana kayo ni para imotok ali nen Apo! Singpet joy shalan na pan-akshan to! <sup>5</sup> No nankinayang i shalan shi shonshontog, simpayoy. No kolkolba ja shalan, mesepol ja maydelteg, tan

sota ngaaw ngon shalan, mesepol la medimpiyo. <sup>6</sup> Jet emin na too, asen shay mengisedakan ja medepo ali son Apo Shiyos.”

<sup>7-8</sup> Say kowan nen Juan so nonta ira toon dimaw son si-kato, ja kowan sha ey ira manpabonjag, kowan to ey, “Si-kayo, singa oleg i ogadiyo! Say kowan jo, mebedin na disi-an jon eg meshosa no manpabonjag kayo bengat? Enshi! Mesepol la ma-sas shi ogadiyo ey nanbebawi kayo pangkep nonta basol jo. Karejo panshindaan sota kowan jo ey si-kayo ket poli shakejo nen Abraham. Enshi, eg on-anay! Si Apo Shiyos, mebedinan ton osalen i bato ja palsowa-en na too jet kowan to ey poli nen Abraham. <sup>9</sup> Jet niman, waray naysagana ja may-eshig ey maywa-tek shi damot ni kadasan ja eg ondames ni mapteng. Emin ira jay, mebetang et maypool shi apoy.” Sajay i kowan nen Juan so ni totoon dimaw son si-kato.

<sup>10</sup> Jet sota ira totoo, nansalodsod ira ja kowan sha ey, “Ngantongarod i pesing mi?”

<sup>11</sup> Simongbat si Juan ja kowan to ey, “No showay barom, i-kan moy sakey so nonta enshiy osal to. Kasta met no waray sobdam ja mekan, i-aknim sota ira toon enshi-anan.”

<sup>12</sup> Angken sota ira para singil ni bowis, dimaw ira ngon manpabonjag, jet inbag-an sha ngo si Juan ja kowan sha ey, “Maistoro, ngaranto ngoy pesing mi?”

<sup>13</sup> Simongbat mowan si Juan ja kowan to ey, “Niman, say singilen jon bowis ira ni totoo, sota koskoston kowan ni gobirno; karejo sodokan.”

<sup>14</sup> Jet sota ira solsharo, kowan sha ngo ey, “Si-kami ngay? Ngaranto ngoy pesing mi?”

Si Juan, simongbat ja kowan to ey, “Sota sowilshoyo, sikatoy enosan jo. Ibi-jag joy joka

pesing nga mengeda ni pilak ni too ja joka ira ta-ta-kota tan joka pebesoli ira angken enshiy basol sha.”

<sup>15</sup> Sota ira totoo, idi intenengan shay kowan nen Juan, kowan shen shorog shi nemnem sha ey, “Sigosho sajay emo sota inkari nen Apo Shiyos nonta bayag da ja ibetkag to din mengisedakan.” Jet shaka sesseskeren pasiya nem ngaranto pay i ikowan to.

<sup>16</sup> Nem say kowan nen Juan son si-kara, kowan to ey, “Nem si-kak, dimawak ali ja shanom i inpamonjag ko son si-kayo. Nem waray ondaw alin maysa-dat son si-kak ja ebadbadeg i panakabalin to nem say si-kak. Jet ekak pay maykeshi ja angken baga-en to koma ja mengkal ni sapatos to. Jet sotan aliy onbonjag son si-kayo ni Ispirito Santo nen Apo Shiyos, asan pay ya apoy.” <sup>17</sup> Jet si Juan, in-arigan to ira ja kowan to ey, “Sotan aliy may-eshig ey mengisi-jan ni bekas shi taap. Sota bekas, isingpet tod tado-an, nem sota taap, ipool tod apoy ya emanshedang ni olay ja eg ma-ma-shep.”

<sup>18</sup> Sajay i inpasing nen Juan ni inpamidin to, tan na-na-jew pay i inpasing ton engikowan ni mapteng nga shamag so ira ni totoo.

<sup>19</sup> Nem say inkowan to son Hirodis ja gobinarol shi Galilia, kowan to ey, “Ngaaw i inpiliw mo so nen Hirodiyas ja asewa nen agim. Tan wara pay i eshakil la ngaaw ja aramid mo.”

<sup>20</sup> Nem si Hirodis, endedamsis to sota bilin nen Juan son si-kato; mina-ma to et i kakedsel to, ja inbalod to pay si Juan.

<sup>21</sup> Idi sakey ya akew, ja naksheng iren emin sota totoo ja nanpabonjag, nanpabonjag ngos Jesus so nen Juan. Idi naksheng, nanshawak si Jesus

son Apo Shiyos, jet idi maramen emanshewat, edo-katan i dangit. <sup>22</sup> Jet dimespag aliy Ispirito Santo nen Apo Shiyos son si-kato, ja nasas ja singa inges toy itsora ni kalopati. Jet si Apo Shiyos, imesel alid dangit ja kowan to ey, “Si-kam i Anak ko et ensemek taka, tan si-kam i naka pan-imdengi.”

*Sota ngaran ira nonta makapoli so nen Jesus*

<sup>23</sup> Si Jesus, waray tedon tawen to nonta inshogi ton engitoshos. Jet say pangkep ira ni karakdan, kowan sha ey anak nen Jose.

Iyay i ngaranganan iren makapoli so nen Jose. Say ama nen Jose, si Eli; <sup>24</sup> say ama nen Eli, si Matat; say ama nen Matat, si Levi; say ama nen Levi, si Melki; say ama nen Melki, si Yanay; say ama nen Yanay, si Jose; <sup>25</sup> say ama nen Jose, si Matatias; say ama nen Matatias, si Amos; say ama nen Amos, si Naom; say ama nen Naom, si Isli; say ama nen Isli, si Nagay; <sup>26</sup> say ama nen Nagay, si Maat; say ama nen Maat, si Matatias; say ama nen Matatias, si Simi; say ama nen Simi, si Josik; say ama nen Josik, si Joda; <sup>27</sup> say ama nen Joda, si Joanan; say ama nen Joanan, si Risa; say ama nen Risa, si Sorobabil; say ama nen Sorobabil, si Salatiil; say ama nen Salatiil, si Niri; <sup>28</sup> say ama nen Niri, si Melki; say ama nen Melki, si Adi; say ama nen Adi, si Kosam; say ama nen Kosam, si Ilmodam; say ama nen Ilmodam, si Ir; <sup>29</sup> say ama nen Ir, si Josue; say ama nen Josue, si Ilisir; say ama nen Ilisir, si Jorim; say ama nen Jorim, si Matat; say ama nen Matat, si Levi; <sup>30</sup> say ama nen Levi, si Simeon; say ama nen Simeon, si Joda; say ama nen Joda, si Jose; say ama nen Jose, si Jonan; say ama nen Jonan, si Iliakim; <sup>31</sup> say ama nen Iliakim, si Milia; say ama nen



Milia, si Mina; say ama nen Mina, si Matata; say ama nen Matata, si Natan; say ama nen Natan, si David; <sup>32</sup> say ama nen David, si Jesse; say ama nen Jesse, si Obid; say ama nen Obid, si Boos; say ama nen Boos, si Salmon; say ama nen Salmon, si Naason; <sup>33</sup> say ama nen Naason, si Aminadab; say ama nen Aminadab, si Aram; say ama nen Aram, si Arni; say ama nen Arni, si Isrom; say ama nen Isrom, si Piris; say ama nen Piris, si Joda; <sup>34</sup> say ama nen Joda, si Jacob; say ama nen Jacob, si Isaac; say ama nen Isaac, si Abraham; say ama nen Abraham, si Tari; say ama nen Tari, si Nakor; <sup>35</sup> say ama nen Nakor, si Sirog; say ama nen Sirog, si Ragaw; say ama nen Ragaw, si Pilig; say ama nen Pilig, si Ibir; say ama nen Ibir, si Sala; <sup>36</sup> say ama nen Sala, si Kainan; say ama nen Kainan, si Alpiksad; say ama nen Alpiksad, si Sim; say ama nen Sim, si Noe; say ama nen Noe, si Lamik; <sup>37</sup> say ama nen Lamik, si Matosalin; say ama nen Matosalin, si Inok; say ama nen Inok, si Jarid; say ama nen Jarid, si Makaliil; say ama nen Makaliil, si Kainan; <sup>38</sup> say ama nen Kainan, si Inos; say ama nen Inos, si Sit; say ama nen Sit, si Adan; say ama nen Adan, si Apo Shiyos.

#### 4

*Si Satanas, pineshas ton panbesol si Jesus*

<sup>1</sup> Si Jesus, nonta inpanbonjag to, wára nodta ebadeg ga pa-dok ja kowan sha ey Jordan. Napno si Jesus ni Ispirito Santo nen Apo Shiyos et idi indekjas toy Jordan, intorong ni Ispirito Santo ja ondaw shima dogad ja arawid kawad-an ni too. <sup>2</sup> Epat ta polon akew ja pineshas nen Satanas si Jesus nodtan na dogad ja dinawan to, ja piyan ton panbesol. Eg eng-

engan nontan na timpo si Jesus, jet idi epospos ma sota epat ta polon akew, na-agang.

<sup>3</sup> Jet kowan nen Satanas son si-kato ey, “No agpayson anak toka nen Apo Shiyos, ikowan mo niya bato ey manbedin ni tinapay.”

<sup>4</sup> Nem si Jesus, simongbat ja kowan to ey, “Enshi, ta say naysolat nonta bayag da ja bilin nen Apo Shiyos, kowan to ey, ‘Aliwén mekan ni abos i panbiyag ni too.’”

<sup>5</sup> Jet si Satanas, indaw to si Jesus shi ekayang nga dogad et inpa-sas ton emin iray ilid ja dobong ni sankatikan na timpo. <sup>6</sup> Kowan nen Satanas son si-kato ey, “I-akan ko son si-kam ma emin iyay ja kokowa-en mo, jet si-kam may mengitoshay ja enshiy maka-inges son si-kam. Ta nay-awat iyay ya emin son si-kak, jet i-awat ko ngo ni piyan kon pengi-kanan. <sup>7</sup> Emin ira jay, i-akan ko son si-kam no si-kak i pantedimokoshan mo ja panshedjawan.”

<sup>8</sup> Nem si Jesus simongbat ja kowan to ey, “Enshi, ta say kowan ni esel nen Apo Shiyos ja naysolat nonta bayag da, kowan to ey si-kato bengat i panshedjawan min totoo tan pansilbi-an mi.”

<sup>9</sup> Jet si Satanas, indaw tos Jesus shi Jerusalem, jet to inpatok nodta Timplo, jet kowan to son Jesus ey, “No agpayson anak toka nen Apo Shiyos, pan-ekas ken medepod jay. <sup>10</sup> Ta say kowan met ni naysolat nonta bayag da, kowan to ey, ‘Bilin nen Apo Shiyos so nonta anghil to ey ajowanan shaka.’ Isonga eg ka mesekitan. <sup>11</sup> Tan say kowan pay nonta naysolat, ‘Egni-an shaka ni takday sha, say eg mesekitan i sedim ni bato.’”

<sup>12</sup> Nem si Jesus, simongbat ja kowan to ey, “Enshi, ta say kowan mowan ni naysolat nonta bayag

da, kowan to ey eg mi pedpeshasen si Apo Shiyos ja pengasan mi nem i-agpayso to sota inkowan to.”

<sup>13</sup> Idi naksheng ja pineshas nen Satanas ja inparas ton emin i kabaalan to, ja piyan ton panbesol si Jesus, indekjas to nin.

<sup>14</sup> Jet si Jesus, nay-olid Galilia, ja wára ma son si-katoy panakabalin ni Ispirito Santo nen Apo Shiyos. Sota shamag pangkep son si-kato, naywáris shi emin na ilid man. <sup>15</sup> Jet si Jesus, nantoro shima sa-nopan ni Hodiyoos et eshakil iray engiredjaw son si-kato.

*Si Jesus, dinamsis ira nonta kaidiyan to*

<sup>16</sup> Dimaw si Jesus shi Nasarit, ja ilin bina-degan to. Ogadi ton emekisa-sa-nop so nonta ira kait ton Hodiyoos shima balej ja sa-nopan sha no akew ja kepanngidin ni Hodiyoos. Isonga idi shimanon sota akew ni ngilin, dimayat nodta sa-nopan ja ibasa toy sakey so nonta inpaisolat nen Apo Shiyos nonta bayag da. <sup>17</sup> Jet say in-awat shen ibasa to, sota naysolatan ni padto nen Isaias. Binitdag to et simbi to sota naysolatan ni padton kowan to ey,

<sup>18</sup> “Sota Ispirito Santo nen Apo Shiyos, wára son si-kak. Shinotokan towak ja mengitosho ni mapteng nga shamag so ni nankebiteg. Inbetkag towak alin mengipedawag ni kaybososan ira ni ebalod, say manesas iray nankekorab, tan inbetkag towak alin mengikan ni pannam-ayan ira ni toon kepedigata ni kait sha, <sup>19</sup> tan en mengipedawag nem pigan aliy timpon kaysedakan ni totoo nen Apo.”

<sup>20</sup> Idi naksheng nga inbasa nen Jesus iyay, kinopikop to sota papil la naysolatan to, jet in-oli to ja inakan so nonta para tolong nodta

sa-nopan ni Hodiyoos. Timongaw ja mengitosho et emin ira sota too, shaka iningning ni shaka pansesked ni ikowan to pay. <sup>21</sup> Jet kowan to son si-kara ey, “Sajay ya padto nen Isaias nonta bayag da ja inbasak son si-kayo, nayto-to-wa ma niman.” Kowan nen Jesus.

<sup>22</sup> Jet sota toon engitneng, shaka kosto-is Jesus, nem nasshaaw iren emin nonta kalaing ton man-a-sel, ja kowan sha ey, “Aliwén sajay aya sota anak nen Jose?”

<sup>23</sup> Jet kowan nen Jesus ey, “Am-tak ey endedamsis jo iya naka dagdag-a, ja ikowan jo son si-kak sota arig ga kowan to ey, ‘Doktor, agasim koma nin shorog i bakdang mo.’ Asan ikowan jo pay son si-kak ey, ‘Dagam nin shiya ilim i kaskasshaaw wa milagro, no agpayso sota shinemag min inpasing mod Kapirnaom.’ <sup>24</sup> Nem iyay i ikowan ko son si-kayo. Sota toon mengikowan ni esel nen Apo Shiyos, enshiy shayaw tod ili ton mismo. <sup>25</sup> Singa inges to nonta timpon Elias nonta bayag da, ja eg to inpan-oran ni tedon tawen tan enem ma bolan. Paladoy bitil shi emin na dogad shi Israel. Jet nontan, eshakil la agpayso i ebaloshiya Israel, <sup>26</sup> nem eg dimaw si Elias so ni angken sakey koma son si-kara. Say dina-wan to et ngo mowan, sota ebaloshiya ja i-Siripta, ja nanbaley shi sakop ni Sidon. <sup>27</sup> Asan sakey pay, eshakil iray ebaybayang nga emin i bakdang to ja wára shi Israel nonta timpon Ilisio ja para padto, nem angken sakey son si-kara, enshiy en-agasan. Nem say na-agasan et ngo mowan, si Naaman bengat ja i-Siria.” Kowan nen Jesus.

<sup>28</sup> Jet emin ira sota toon wára nodta balej ja sa-nopan ni Hodiyoos nontan, ireka onbanonget ni inteneng sha so niyay. <sup>29</sup> Jet ebigen singkel sha

et inkoyod shen inpa-kal nodta ili sha et indaw sha nodta toktok ni shontog ja nanbaljan sha, ja kowan sha ey sha i-ekas nodta shepdas. <sup>30</sup> Nem nan-akad si Jesus shi kawa ira nonta eshakil la totoo et indekjas to ira.

*Inpabtik nen Jesus i dimonyo ja wára nodta toon eman-engaw*

<sup>31</sup> Dimaw si Jesus shi Kapir-naom ja ili ni Galilia, jet toka itod-i ira ma totood man nem akew ja kepanngidin ni Hodiyo. <sup>32</sup> Emesshaaw sota totood man ni toka pengitoshu tep agpayson waray pateg ni toka ikowan.

<sup>33</sup> Jet nonta wares Jesus nodta balej ja sa-nopan, wára ngoy sakey ya toon eman-engaw ja pingketan ni dimonyo. Jet inked-sang nontan i keljaw to, ja kowan to ey, <sup>34</sup> “A! Ngantoy! Dimaw ka di ja en meneshal son si-kami? Enshiy kaybiyangan mo son si-kami, Jesus ja i-Nasarit. Amtak nem sipa ka: si-kam sota shinotokan nen Apo Shiyos ja inbetkag to di!”

<sup>35</sup> Si Jesus, sinelkag to sota dimonyo, ja kowan to ey, “Eka-eket ka! Ilekjas mo ita too!”

Jet sota dimonyo, inbes-ig to sota too nodta naykawa ira nonta totoo jet indekjas to sota too. Nem pesed da, eg to sinekitan. <sup>36</sup> Nasshaaw iren emin sota toon engasas, jet kowan sha ni sakey tan sakey son si-kara ey, “Epateg ga emin i banag ni toka ikowan! Kabaalan ton pemapteng i nem-nem ni eman-engaw! No ikowan to ey onbetik i dimonyo son si-kara, ireka onbetik ka agpayso!”

<sup>37</sup> Jet sajay ya shamag pangkep so nen Jesus, naywáris shi emin na dogad ja nay-esop shiman.

*Inpamapteng nen Jesus ira sota tootoon emansekit*

<sup>38</sup> Indekjas nen Jesus sota balej ja kesa-nopi ni Hodiyo et dimaw shi balej nen Simon Pedro. Sota

ineno nen Simon ja bii, emansekit, ja epaladoy petang ni bakdang to. Jet inpa-amtara son Jesus ey emansekit. <sup>39</sup> Si Jesus, dimaw, ja to inon-an nodta katiri to, jet inkowan to nonta sakit ey makal et na-kal la agpayso. Jet bimangon na shagos sota bii et inkamakaman to ira.

<sup>40</sup> Idi mama-shem mala, emin ira sota wáray kajem to ja emansekit ni ekalkalasin sakit, indaw sha ira son Jesus. Insakpal nen Jesus i takday to so ni sakey tan sakey son si-kara et mimapteng iren emin. <sup>41</sup> Angken sota ira dimonyon pimeket shi totoo, bimetik ira, ja kaonkaneljaw, ja kowan sha ey, “Si-kam sota Anak nen Apo Shiyos!” Nem si Jesus, sinelkag to ira tep amtara ey si-kato sota inkari nen Apo Shiyos nonta bayag da ja inbetkag to di.

<sup>42</sup> Idi palbangon ma, indekjas nen Jesus sotan na dogad jet dimaw shi naydasin na dogad ja enshiy totoo. Nem emin ira sota totoo, dimaw iren sha inenap et idi simpol sha, inparas shen inpeked. <sup>43</sup> Nem kowan to son si-kara ey, “Mesepol ja nak ikowan shi eshom ma dogad ngo sota mapteng nga shamag maypangkep ni pantoshayan nen Apo Shiyos, ta sikatoy obdak ja inbetkagan towak so nen Apo Shiyos.”

<sup>44</sup> Jet nantoro shima balebaley ja sa-nopan ni Hodiyo shi ka-ili-ili ni Jodia.

## 5

*Kaskasshaaw ja inpangadara ni eshakil la nigay*

<sup>1</sup> Idi sakey ya akew, wára si Jesus nodta kilig ni baybay ni Ginasarit et sota ira totoo, insopan shen pasiya, ja inedibongbongan sha. Shaka pan-itenengin pasiya sota toka pan-ikowan ja esel nen Apo Shiyos, <sup>2</sup> jey on-an to i showen

bangka shima kilig ni baybay ja naytangkag. Sajay ya bangka, indekjias ira nonta emannikay tep shaka pan-idaba sota embanaw wa balshew sha. <sup>3</sup> Si Jesus, en nandogan nodta bangka nen Simon et inkowan to son Simon ey itolshon to sota bangka say onbetaw ni otik shima kilig ni baybay. Timongaw si Jesus nodta bangka et tinod-an to ira sota eshakil la totoo.

<sup>4</sup> Idi naksheng nga nan-esel si Jesus, inkowan to so nen Simon ey, "Igewam iya bangka shima debeng nga shanom et si-kam tan sama kait mo, i-kas jo ira ta balshew jo say waray mekna."

<sup>5</sup> Kowan nen Simon ey, "Apo, nan-obda kamin pasiya ni sandabi, nem enshin polos i mi kinna. Nem no si-katoy kowan mo, iparas kon i-ekas."

<sup>6</sup> Idi in-ekas sha sota embanaw wa balshew sha, nakna iray eshakil la nigay. Istay pay ya mebinik sota balshew. <sup>7</sup> Isonga tinaway sha sota kait sha ja wara nodta sakey ya bangka ja on-atang pay son si-kara. Dimaw ira di et pinnora sota showen bangka ni nigay, jet istay pay ya ondened ira. <sup>8</sup> Idi inon-an nen Simon Pedro iyay, nantalimokod shi sango-an nen Jesus, jet kowan to ey, "Ilekjas mowak Apo, ta si-kak, eshakil i basol kon too!" <sup>9</sup> Si Simon tan sota ira emin na kait to, nasshaaw ira nonta eshakil la ninikay sha. <sup>10</sup> Eshakil i kait nen Simon nontan et say showa son si-kara, si Santiago nen Juan, ja san-agin anak nen Sibidi, ja sigod ja ka-od-odop nen Pedro ni olay.

Kowan nen Jesus so nen Simon ey, "Kareka ontakot; manshoki ma niman, aliwa men nigay i obdam, no diket mengolnong ka ma ni too ja itod-an mo para son si-kak."

<sup>11</sup> Idi inkowan nen Jesus iyay, inkoyod sha sota bangkara shima kilig ni baybay. Indekjas sha sota

ira bangkara, tan angken pay sota emin na kokowa sha, jet nay-olop ira son Jesus ja nanbalin iren too to.

*Inpamapteng nen Jesus i bakdang nonta toon ebayabayang*

<sup>12</sup> Idi pinsak, wara si Jesus nodta sakey ya ili ja kawad-an ni toon ebayabayang i bakdang to. Idi inon-an tos Jesus, injokmos toy dopa tod bo-day ja simango son Jesus, ja kowan to ey, "Apo, no piyan mo, pamapteng mo iya bakdang ko, say eg sha-ak seskigen ni totoo."

<sup>13</sup> Jet si Jesus, inojad toy takday to et pinishat to sotan na too. Jet kowan nen Jesus son si-kato ey, "Siya, piyan kon onmapteng ka."

Jet nay-inshas ngon na-omas sota bayang nonta too. <sup>14</sup> Jet si Jesus, binidin to sotan na too, ja kowan to ey, "Karam ikokowan iyay so ni eshom, no diket pandiritso ka et ja ondaw shima pari. Ipa-sas mo ita bakdang mo son si-kato, ja mimapteng ma. Jet pangidaton ka nonta kowan nen Moises shi dinteg ey maydeton son Apo Shiyos, say amta-en ni karakdan ey si-kam, enshi may bayang mo." Kowan nen Jesus son si-kato.

<sup>15</sup> Nem sota shamag may-pangkep so nen Jesus, asdeg ton naywaris pay shima angken arawin dogad jet sota ira eshakil la totoo, dimaw iren en nanteneng ni kowan to, tan sha inpa-ekas i sakit sha. <sup>16</sup> Nem indekjias to sota eshakil la totoo et dimaw shima dogad ja nay-arawid kawad-an ni totoo, ja en nanshawat so nen Apo Shiyos.

*Inpamapteng nen Jesus sota toon eg maka-akad*

<sup>17</sup> Idi sakey ya akew, eman-tosho si Jesus, jet wara ira sota Parisiyo tan mamaistoro ni dinteg ni Hodiyoys ja timanongaw. Edapo

ired ma emin na ili ni Galilia, Jodia, tan shi Jerusalem. Sota panakabalin nen Apo Shiyos ja mengkal ni sakit, wára son Jesus.

<sup>18</sup> Jet nontan, wára ngo diy totoo ja emangtal ni toon eg on-keykey i bakdang to, ja idaw sha son Jesus. Inparas shen isekep nodta baley ja kowan sha ey sha peshokol koma shi kad-an nen Jesus. <sup>19</sup> Nem eposek et enshiy pesing shen mengiskep. Say inpasing sha ma, inkalab sha nodta atep ni baley ja nanshekdan et binotbotan sha sota atep, asan shaka oy-oya sota toon shimokol shi amaka. Jet insepara nodta kawa ira ni totoo, ja kad-an nen Jesus.

<sup>20</sup> Idi inon-an nen Jesus i ebadeg ga pamatira, kowan to nonta toon inoy-oy sha ey, “Kajem ko, sota basol mo, epakawan.”

<sup>21</sup> Sota ira mamaistoro ni dinteg ni Hodiyo, tan sota ira Parisiyo, ja wára nodtan, kowan shed nemnem sha ey, “Sipa iyay ya toon toka pa-so-is Apo Shiyos! Kowan to ey ememekawan ni basol, ey enshi met i eshom ma memekawan ni basol, nem eg si Apo Shiyos bengat!”

<sup>22</sup> Nem si Jesus, amta toy wáred nemnem sha et kowan to son si-kara ey, “Apay nga joka sopingiled poso jo iyay ya kowan ko?”

<sup>23</sup> Say kowan jo, inba-ngat kon memekawan ni emin na basol niyay ya too ey ekak kabaalan? Nem iyay i dag-en kon pati-an jo so. Ikowan ko niyay ya too ey man-ekad, <sup>24</sup> jet no man-ekad, amta-en jo ey si-kak sota inpadtora nonta bayag da ey Anak ni Too. Amta-en jo pay ey wáray kalinteg kod ja dabaw ni shaga ja memekawan ni basol ni too.” Jet si Jesus, inkowan to nonta toon eg man-ekad ey, “Ikowan ko son si-kam, alam ita amakam, jet akad ka.”

<sup>25</sup> Sota too, bimangon na shagos et inda to sota amaka ton toka shokoli, ja inon-an ira nonta eshakil la too. Jet nontan ma ey imakad sota toon inpamapteng nen Jesus ja eman-iyaman son Apo Shiyos. <sup>26</sup> Emin ira sota totoo, nasshaaw ira tan naykel-éwan ira, nem inshayaw sha met laeng si Apo Shiyos, ja kowan sha ey, “Kaskasshaaw iyay ya inon-an tayo niman.”

*Inodop nen Jesus si Levi jet nanbalin ni too to*

<sup>27</sup> Idi naksheng iyay, si Jesus, bimo-day et inon-an to sota para singil ni bowis ja nanngaran ni Levi, ja eman-obded opisina to. Kowan nen Jesus son si-kato ey, “Kala, kay-olop ka son si-kak et marbedin ka ni took.”

<sup>28</sup> Jet si Levi, indekjas ton emin et nay-olop son Jesus ja nanbalin ni too to.

<sup>29</sup> Si Levi, nanpiyasta ni ebadeg shi baley to para son Jesus et eshakil iray kait ton para singil ni bowis tan wára pay i eshom ma totoo ja inewis ton ekipangan nontan na piyasta to.

<sup>30</sup> Nem sota ira eshom ma Parisiyo, tan sota mamaistoro ni dinteg ni Hodiyo ja kait sha, inriri sha so nonta ira too nen Jesus ey, “Apay nga kayoka emekipangan tan emeki-inom so ira nima para singil ni bowis tan sama eshom ma toon enshiy kenshat sha, ja eshakil i basol sha?”

<sup>31-32</sup> Nem idi intenengan nen Jesus iyay ya kowan sha, simongbat son si-kara, ja kowan to ey, “Ékak ali dimaw ja mengewis ni toon maronong, nem dimawak ali ja mengewis ira nonta toon eshakil i basol sha, say manbebawi koma ira. Mebedin na may-eshigak shi doktor. Eg bisita-en ni doktor i enshiy sakit to, no diket sota wáray sakit to bengat i bisita-en to.”

*Inbag-an shes Jesus pangkep nonta too ton eg mengibiyang ni pangan*

<sup>33</sup> Kowan ira nonta totoo son Jesus ey, “Sota too nen Juan ja para bonjag, kanayon na shaka ibiyang i pangan nem manngidin ira, tan ireka manshewat pay, tan angken pay ira ja too ni Parisiyo, inges to ngoy shaka pesing. Nem apay nga sama ira toom ket ireka mengan tan eman-inom ja eg ira ngo manngidin?”

<sup>34</sup> Say songbat nen Jesus son si-kara, in-arig toy bakdang to shi dakin engasewa. Isonga kowan to ey, “Piyan jon ikowan ey mepidit sota ira bisita shi kasal ja eg ira mengan angken wara sota dakin engasewa? Enshi, kenshat ta mengan ira. <sup>35</sup> Nem wara et mangoy timpon onmotok ali ja ma-enshi son si-kara sota dakin engasewa, jet si-katoy timpon ibiyang sha so ni pangan sha may-pangkep ni daringit sha.”

<sup>36</sup> Si Jesus, inkowan to mowan i sakey ya arig son si-kara, ja kowan to ey, “Na-alas no pi-katen i badon baro ja isakab shi shaan na baro. Ta no sajay i pesing jo, mesepol la sheshalen jo sota badon baro, jet sota badon sakab, no isakab jo nodta shaan, eg may-enam. <sup>37</sup> Tan na-alas no may-iyen i badon adak shi na-osal la inemag shen katat ja ijanan ni adak, ja kowan sha ey ‘wineskin’. No sotan i pesing jo, pepetjag nonta badon adak sota nay-iyenan to et onkawas sota adak. Tan angken pay sota nay-iyenan to, mepilshi. <sup>38</sup> Mesepol ja no badon adak, bado ngoy kayinan to. <sup>39</sup> Nem sota ira toon naydowam ja enginom ni shaan na adak, eg sha nin piyan sota bado tep kowan sha ey, ‘Mapteng met sota shaan.’ ”

## 6

*Nanriri sota ira Parisiyo ni*

*maypangkep nonta dingka ni too nen Jesus*

<sup>1</sup> Nonta akew ni ngilin ni Hodiyo, nanshalan si Jesus shi oma ja emola-an, jet sota ira too nen Jesus, ematod ira nonta nay-mola jet kinotim shen kinan. <sup>2</sup> Jet sota eshom iren Parisiyo, kowan sha son si-kara ey, “Apay nga joka dagdag-a itan ey kaiparit ni dinteg tayon Hodiyo i mengetod no akew ni ngilin?”

<sup>3</sup> Si Jesus, simongbat ja kowan to ey, “Arig to ngo sota inpasing nen Ari David nonta bayag da ni inka-ekang to, tan sota ira too to. Apay eg jo aya amtay dingka to? <sup>4</sup> Dimaw shima tolshen baley ya para son Apo Shiyos et inda to sota tinapay ya naydaton son Apo Shiyos, jet kinan to. Jet in-aknan to pay ira sota too to. Sajay i dingka to anta nga nayparit son si-kato tan sota ira kait to i pangan sha nontan na tinapay ya naydaton son Apo Shiyos. Ta sota pari bengat i palobos sa mengan nontan na tinapay.” <sup>5</sup> Tan kowan pay nen Jesus ey, “Si-kak ja kowan nonta para padto nonta bayag da ey Anak ni Too, si-kak i mengikowan no ngantoy mebedin na dag-en no akew ni ngilin.”

*Inpamapteng nen Jesus sota toon eki-ngoy*

<sup>6</sup> Idi sakey mowan na akew ni ngilin, dimaw si Jesus shi sanopan ni Hodiyo ja en nantoro. Jet nontan, naytompong ja wara nodtan i toon eki-ngoy i kanawan na takday to. <sup>7</sup> Sota mamaistoro ni dinteg ni Hodiyo tan Parisiyo, shaka si-siimi no waray ekasan to nontan na akew, tep kowan sha ey balang nem waray dag-en to ja ikowan sha so ey nanbasolan to. Ta nayparit kono shi dinteg sha i pengekas no akew ni ngilin.

<sup>8</sup> Nem si Jesus, amta toy wared nemnem sha, jet say kowan to

nonta toon eki-ngoy i takday to, “Dayat ka et daw ka did ja sango.” Jet sota too, dimayat et dimaw nodtan.

<sup>9</sup> Jet kowan nen Jesus so nonta ira emeniim son si-kato ey, “Nemnem jo kari iyay. Ngaaw aya i pandeka ni mapteng, ono pemiayag ni too, no timpon ngilin? Enshi: say ngaaw ja kaiparit ni dinteg tayo, sota pandeka ni ngaaw tan pemono.” <sup>10</sup> Insi-ning to iren emin, asan to ikowan nonta toon eki-ngoy i takday to ey, “Oyad mo ita takday mo.”

Pinati to sota kowan nen Jesus et mimapteng mowan na agpayso sota takday to. <sup>11</sup> Nem sota ira Parisiyo, ireka onbanonget et nantatabal ira nem ngantoy pesing sha son Jesus.

*Pinidi nen Jesus sota sampolo tan showa ja apostol to*

<sup>12</sup> Nontan na timpo, dimaw si Jesus shi shontog ja en nanshawit ni sandabi son Apo Shiyos. <sup>13</sup> Idi na-akew, sina-nop to ali ira sota too to et pinispis toy sampolo tan showa son si-kara. Jet inngadnan to ira ja sampolo tan showa ni apostol to. <sup>14</sup> Sajay iray ngaran sha: si Simon ja inngadnan ton Pedro, tan si agin Pedro ja si Andres; tan say kait sha pay ja apostol, si Santiago, Juan, Felipe, Bartolome, <sup>15</sup> Mateo, Tomas, Santiago ja anak nen Alpio, si Simon ja bitirano, <sup>16</sup> si Judas ja anak nen Santiago mowan i ngaran to, tan si Judas Iskariote ja mengileko ali son Jesus shi anongosto.

*Si Jesus, eshakil i intod-an ton too*

<sup>17</sup> Si Jesus, shimalong ja nayolop so nonta apostol to et simalsheng ira nodta eshekdanan. Jet wara ngo ira nodtan i eshakil la too to, tan eshakil pay iray totoon edapod ili ni Jodia, Jerusalem, tan shi kilig ni baybay ja siyodad

ja kowan sha ey Tira tan Sidon. <sup>18</sup> Dimaw iren en nanteneng ni kowan nen Jesus tan sha pay inpa-ekas i sakit sha. Angken sota ira toon pingketan ni dimonyo, dimaw ngo iren nanpa-ekas jet mimapteng ma ira. <sup>19</sup> Emin ira sota too, piyan shen pishaten si Jesus, ta makedsang nontan i panakabalin ton mengkal ni sakit, jet mimapteng iren emin.

<sup>20</sup> Jet si Jesus, insi-ning to ira sota too ton eshakil et kowan to ey, “Si-kayon nankebiteg, bindisiyonan shakejo nen Apo Shiyos, ta mayda-kam kayod pantoshayan to! <sup>21</sup> Mebindisiyonan kayon nanka-agang niman, ta mepnek kayo di! Mebindisiyonan kayon emannengis niman ni daringit jo, ta mandadsak kayo di! <sup>22</sup> Mebindisiyonan kayo no okesen shakejo ono eg sha ikarin kait shakejo, ono bebaingan shakejo, ono ikowan sha ey ngaaw kayo tep too takejo. <sup>23</sup> Pan-imdeng kayo no sajay i mepesamak son si-kayo, ta ebadeg i naytalo shi dangit ja kon-oren jo ali. Mayinges kayo nodta ira para padto nen Apo Shiyos nonta bayag da, ja pinedigat ngo ni too nontan da.

<sup>24</sup> “Nem kakaasi kayon pasiya ja toon say kawad-an ni dadsak jo ket etopog shima kokowayo. Namay i joka panbiyag! <sup>25</sup> Kayoka emepmepsel niman, nem wara diy timpon ma-ekang kayo! Kayoka mandaddadsak niman, nem wara diy timpon inangis joy daringit jo!

<sup>26</sup> “Kakaasi kayo di no shakejoka i-et-etek tan ishayaw ni karakdan. Tep sota karakdan, enshiy semek sha so nonta ira toon Apo Shiyos. Angken nonta bayag da, sota ira sinan para padto ja oowap i kowan sha, si-kara et ngo mowan i in-etek ni karakdan, jey

aliwén sota koston inbetkag nen Apo Shiyos.

<sup>27</sup> “Nem iyay i ikowan ko son si-kayon emengitneng son si-kak. Sota makakontra son si-kayo, semek jo mango tan dagejoy mapteng so ira nonta mengokes son si-kayo. <sup>28</sup> No wáray mengi-ebig son si-kayo, ikowan jo ey, ‘Si Apo Shiyos komay ontolong son si-kam.’ Irewati jo son Apo Shiyos ira sota ememedigat son si-kayo. <sup>29</sup> No wáray menengpel ni tamil mo, itodok mo pay ya angken pinshowa-en tod piig. No wáray mendeda ni jakit mo, itodok mo pay ya angken al-en toy barom. <sup>30</sup> No wáray manbeka son si-kam, i-kan mo son si-kara i piyan sha. Tan no wáray indaren kokowam, angken eg mo en odi-en. <sup>31</sup> Sota piyan jon pesing ni eshom son si-kayo, si-kato ngoy pesing jo son si-kara.

<sup>32</sup> “No say ensemek jo bengat ket sota toon ensemek shakejo ngo, eg shakejo i-etek nen Apo Shiyos. Ta sotan met laeng i kepesing ira nonta enshiy pamatira son Apo Shiyos. <sup>33</sup> No say dag-anan mo so bengat ni mapteng ket sota ira toon mapteng i shaka pesing son si-kayo ngo, eg shakejo i-etek nen Apo Shiyos. Ta angken sota ira enshiy pamatira son Apo Shiyos, mapteng i shaka pesing so ni kait sha. <sup>34</sup> Tan no say pebodoran jo bengat ket sota joka namnama ey i-oli to, eg shakejo i-etek nen Apo Shiyos. Ta angken sota ira enshiy pamatira, ireka emanbibinodod, jet odi-en sha met laeng sota kabebilang to! <sup>35</sup> No wáray kowan to ey memodod son si-kayo, pabodori jo ira, angken eg to i-oli. Semek joy makakontra son si-kayo, tan mapteng koma mangoy pesing jo son si-kara. Ta no satan i pesing jo, joka pan-ipa-sas ey annak shakejo nen Apo Shiyos ja Kangeto-an. Ebadeg i kon-oren

jon isobadit nen Apo Shiyos tep si Apo Shiyos, mapteng i toka pesing ni emin na too, angken sota eg man-iyaman son si-kato tan sota makedsel. <sup>36</sup> Kaasi-i joy eshom ja inges toy kepesing nen Apo Shiyos!

<sup>37</sup> “Karejo nemnemen i nanka-mali-an ni eshom ja si-katoy pengikowanan jo ma ey ngaaw ira, say eg ngo ikowan nen Apo Shiyos ey ngaaw kayo. <sup>38</sup> I-akniyo iray eshom et si Apo Shiyos i mengi-kan ngo son si-kayo. Sota karakel ni joka i-akan, si-kato ngoy karakel ni i-akan nen Apo Shiyos son si-kayo. Nem i-aknan tokejo ni sobda, ja angken iteded jo tan itelneg jo, onja-bis pay ali shi sango jo.”

<sup>39</sup> Si Jesus, in-arigan to ira, ja kowan to ey, “Say toon eko-rab, mebedin ayen mengibalnay ni kait ton korab? Eg ira aya makas sa showa shi pel-og? <sup>40</sup> Waray nandasinan nonta maistoro nem say sota man-ashal, jet sota man-ashal, toka onoray kaitoro ni maistoro. Jet no meksheng may ashal to, man-inges ira ma nonta maistoro.”

<sup>41</sup> In-arigan to pay ira ja kowan to ey, “Apay nga sota ootik ka naybosi shi mata ni kait mo i moka iningning, ey si-kam ma mismo ket eg mo nemnemen ey ebadeg i naypadkal shi matam? <sup>42</sup> Na-alas ja mo ikowan so ni kait mo ey a-kalen mo sota naybosi shi mateto, ey si-kam ket ebadeg i naypadkal shi matam ma shorog. Ngaaw ita moka pesing ja moka idibak i ngaaw wa nemnem mo! Ekal mo nin sota mismon naypadkal shi matam say kosto may pan-esas mo, et say asen mo men pasiya sota a-kalen mon naybosi shi mata ni kait mo.

<sup>43</sup> “Sota molen ngaaw, eg on-dames ni mapteng, nem say mapteng nga mola, mapteng ngoy



dames to. Jet sota ngaaw wa mola, ngaaw ngoy dames to. <sup>44</sup> Emin na mola, ma-amta-an i kalasi to no ondames. Sota kowan sha ey higos, say dames to ngo, higos; aliwen medepod sebit. Tan eg meboshas i kowan sha ey obas shi kompormi. <sup>45</sup> Sota mapteng nga too, mapteng ngoy wared poso to jet si-kato ngoy toka dagdaga. Nem say toon ngaaw, ngaaw ngoy wared poso to et ngaaw ngoy aramid to. Ta sota wared nemnem ni too ni olay, si-kato ngoy onbo-day shi bongot to ja esel.

<sup>46</sup> “Apay nga kayoka mengewag ey apo jowak, nem sota naka ikowan ket eg jo met tongpalen? <sup>47</sup> Emin ira sota ondaw alin piyan ton manbedin ni took, no itenengan toy esel ko, tan pati-en to, <sup>48</sup> may-eshig shi toon engitowen ni baley tod naypilmin bato. Ki-naotan toy naydeshek et intowen toy tokod to nodtan na naypilmin bato. Idi nandayos ali ni maked-sang, nanshalan nodta baley, nem eg to tinowang, tep na-det i nay-towenan nonta tokod to. <sup>49</sup> Nem sota toon intenengan toy kowan ko, nem eg to pati-en, may-eshig shi toon engitowen ni baley tod bo-day ja enshiy naytowanen ni tokod ton na-det ta bato. Idi nandayos ali, nanshalan nodta baley i shanom jet shinepos ton shagos jet kolpin epilshi sota baley.”

## 7

*Inpamapteng nen Jesus sota emansekit ja baga-en ni solsharo*

<sup>1</sup> Idi naksheng nga inkowan nen Jesus iyay ya emin so nonta ira too, dimaw shi Kapirnaom. <sup>2</sup> Jet nodtan, waray baga-en ni kapitan ni solsharo ni Roma, ja ngannganin metey ni sakit to. Sajay ya baga-en, ensemek nonta apo to. <sup>3</sup> Isonga idi shinemag nonta kapitan i maypangkep son

Jesus, engibetkag ni pangolo ira ni Hodiyo ja mengodop son Jesus, ja en mengekas nonta baga-en ton emansekit. <sup>4-5</sup> Dimaw ira son Jesus ja sha inkowan ey, “Sajay ya kapitan, ensemek tokitejon Hodiyo. Nankasto noman ja nanpa-emag shorog ni baley ya sa-nopan ni. Isonga pangaasim koma apo, mesepol ja todongan mo ngo.”

<sup>6</sup> Jet si Jesus, ekidaw son si-kara, jet idi nay-esop mes Jesus nodta baley, engibetkag sota kapitan ni kagajem ton en mengi-aspol ni kowan to. Kowan ira nonta inbetkag to ey, “Apo, angken eg ka ontoloy kono shi baley to, ta eg kono maykeshi ja ondaw ka shi baley to, <sup>7</sup> tan embaing konon manpeshang son si-kam. Angken on-anay kono sota esel la ikowan mo et onmapteng ma ima baga-en to. <sup>8</sup> Amta to ta paras to ey angken esel bengat, kaon-anay. Ta si-kato waray apo to, jet wara ngoy solsharo ja intorayan to. No ikowan to nonta sakey ey ondaw, pati-en to, jet no tewalen to sota sakey, ondaw ali. Kasta met sota baga-en to, no ikowan to son si-kato ey, ‘Obdam iyay’, dag-en to.” Kowan ira nonta inbetkag ni kapitan.

<sup>9</sup> Idi intenengan nen Jesus iyay ya kowan nonta kapitan ey sota esel nen Jesus i on-anay, nasshaaw wa pasiya si Jesus. Nanposipos et kowan to so nonta eshakil la toon imonod son si-kato ey, “Istay sota Hodiyo koma i makedsang i pamatira son Apo Shiyos, nem enshi et ngo mowan i nak inon-an son si-kara ja makalinges ni pamati niyay ya aliwen Hodiyo!”

<sup>10</sup> Sota ira inbetkag nonta kapitan, nay-oli ired baley to et simbira sota baga-en ja pimesed ma.

*Sota etey ya anak ni ebalon bii, inpanbiyag mowan nen Jesus*

<sup>11</sup> Idi maykadwén akew, dimaw si Jesus shi siyodad ja kowan sha ey Nain. Sota eshakil la toon imonod son si-kato, tan sota ira too to, nay-olop ira son si-kato.

<sup>12</sup> Idi nay-esop ma ira nodta siyodad, wara iray toon edapo nodtan na siyodad ja en mengiponpon ni etey. Sota dakin etey, si-kato bengat i anak nonta biin eballo. Wara sota bii ja nay-olop, tan eshakil pay iray toon eki-odop son si-kato. <sup>13</sup> Idi inon-an nen Apo Jesus sota bii, naysemekan et kowan to so nonta bii ey, “Kareka onnangis.”

<sup>14</sup> Dimaw et to pinishat sota inosal shen inpamantag nonta etey, jet sota toon emantag, simalsheng ira. Jet kowan nen Jesus ey, “Si-kam balodaki, bangon ka!” <sup>15</sup> Jet sota etey ja too, ebiyag mowan! Bimangon et imesel, jet say kowan nen Jesus so nonta ineto, “Olop mo iya anak mo.”

<sup>16</sup> Emin ira sota engasas, nasshaaw ira, tan inshayaw shes Apo Shiyos ja kowan sha ey, “Niman wara may engaton para padto ja naydaok son si-katejo!” Tan kowan sha pay ey, “Si Apo Shiyos, dimaw alin mengisedakan ni too to!”

<sup>17</sup> Sajay ya shamag ja may-pangkep son Jesus, naywaris shi emin na ili ni Jodia tan shima dogad ja nay-esop shiman.

*Si Juan, engibetkag ni en mengiro-pet so nen Jesus*

<sup>18</sup> Sota too nen Juan, shinemag sha ngo sota emin na inpasing nen Jesus et inkowan sha son Juan. <sup>19</sup> Jet tinewal nen Juan i showa son si-kara et inbetkag ton en mengibeka son Jesus nem si-kato sota inkari nen Apo Shiyos nonta bayag da ey ibetkag to di ja mengisedakan, ono waray apil la seskeshen sha.

<sup>20</sup> Isonga idi dimaw ira son Jesus, kowan sha ey, “Si Juan ja para bonjag, inbetkag shakami ja en mengibeka nem si-kam sota inkari nen Apo Shiyos nonta bayag da ey ibetkag to di ja mengisedakan. Si-kam, ono waray apil alin seskeshen mi?”

<sup>21</sup> Nontan na oras, si Jesus eshakil iray inpamapteng ton emanpansekit, inpan-asas to iray nankekorab, tan angken sota toon pingketan ira ni dimonyo, inpamapteng to ira. <sup>22</sup> Isonga say songbat nen Jesus so nonta ira toon inbetkag nen Juan, kowan to ey, “Kay-oli kayo jet ikowan jo so nen Juan sota inon-an jo tan intenengan jo ni kawasha jod jay. Ikowan jo ey sota ira nankekorab nan-asas ira, sota ira nankepilay nan-akad ira, sota nankebayang i bakdang sha mimapteng ira, sota ira nanketoleng nanteneng, sota eshom ma nanketey nanpawil ira, tan sota ira nankebiteg naytoro son si-kara i mapteng nga shamag maypangkep son Apo Shiyos. <sup>23</sup> Si Apo Shiyos i onbindisiyon so nonta enshiy showashowa to son si-kak.” Kowan nen Jesus so nonta inbetkag nen Juan.

<sup>24-26</sup> Idi nay-oli ira da sota inbetkag nen Juan, inkowan ma nen Jesus so nonta ira totoo i may-pangkep so nen Juan, ja kowan to ey, “Nonta dimaw kayo so nen Juan shima dogad ja kadan ton nay-arawi shi ili, amtayo ey si-kato ket para padto nen Apo Shiyos. Isonga dimaw kayod man ja en mengesas ni toon para padto nen Apo Shiyos, aliwen say kayo mengesas ni toon ekapoy ja singa bolong ni edet ja enamay ya iwagas ni shagem. Aliwa ngon say dinawan jod man ket say kayo mengesas ni toon nanbaro ni mapteng, ta say ka-asan ira niyay ket shi siyodad ja engkakembaleg

i baley sha, ja nam-ay i biyag sha. Dimaw kayon en mengesas ni para padto et siya, inon-an joy toon engatngato pay nem say sota eshom ma para padto nen Apo Shiyos. <sup>27</sup> Ta si Juan sota kaytoshongan nonta esel nen Apo Shiyos ja naysolat nonta bayag da, ja kowan to ey, ‘Waray ibetkag ko ja mepangdo ey say si-kam, jet to isagana ira sota totoo.’ Sajay i padto nonta bayag ja timorong son Juan. <sup>28</sup> Ikowan ko et son si-kayo: Podno ey si Juan, enshiy to kay-ingesan so ni emin na toon nay-anak, angken sipa. Nem say sakey ya toon kabeba-an shi pantoshayan nen Apo Shiyos, si-katoy engatngato nem say si Juan.”

<sup>29</sup> Inkowan pay nen Jesus ey, “Sota ira para singil ni bowis, tan sota ira eshom ma too, intenengan shay kowan nen Juan et si-karay emati ni kowan nen Apo Shiyos, jet binonjagan ira nen Juan. <sup>30</sup> Nem sota ira Parisiyo tan mamaistoro ni dinteg tayon Hodiyo, dinamsis shay kepanikowan nen Juan ja planon Apo Shiyos maypangkep son si-kara, jet ensikshal iren manpabonjag.

<sup>31-32</sup> “Ara kayon too niman! Sota pemedaw bengat i amtayo. Ikowan koy joka kay-eshigi. Singa a-anak kayon wared ma malkaro, ja ensikshal la meki-asil. Kowan ira nonta eshom ma a-anak ja ka-asil jo ey, ‘Nanmosiko kami para son si-kayo, nem eg kayo met edadsakan! Insa-dat min nimangis, nem eg kayo met ekinengis!’ <sup>33</sup> Nonta timpon inpangitoro nen Juan ja para bonjag, nagshengan i toka kena, eg menginom ni adak, jet kowan jo ey eman-engaw. <sup>34</sup> Jet si-kak niman na indaw ko di, enganak ni inges toy joka kena, tan enginomak, nem binedaw jowak met laeng, ja kowan jo ey, ‘Asas jo kari iman na too: makibel, ma-

inom ni adak, tan say kajem to pay, sota ira para singil ni bowis, tan angken pay sota ira eshom ma toon enshiy kenshat sha, ja eshakil i basol sha.’ Sotan i kowan jo maypangkep son si-kak, <sup>35</sup> nem sota ira emati son Juan, tan emati son si-kak, si-karay ka-asan to ey say plano nen Apo Shiyos, podnon mapteng ni olay.” Kowan nen Jesus.

### *Si Jesus, engan shi baley nonta Parisiyo*

<sup>36</sup> Sota sakey ya Parisiyo, inewis tos Jesus ja en mekipengan shi baley to et si Jesus, dimaw et naydikob son si-kara. <sup>37</sup> Wara ngoy bii nodtan na dogad ja eshakil i basol to. Shinemag to ey si Jesus, wara nodta baley ni Parisiyo et dimaw ja engita-jon ni botiljen napno ni emanseng-ew ja dana. <sup>38</sup> En nantalimokod shi kadan nen Jesus ja nannanginangis. Sota sayeto, dimbeng toy sedi nen Jesus et sota bowek to, si-katoy inponas to nodta sedi nen Jesus, tan inongo-an to pay sota sedi to, asan toka iro-jag sota dana nodta sedi to. <sup>39</sup> Sota Parisiyo ja engawis son Jesus, inon-an to iyay et kowan to shorog shi nemnem to ey, “No podnon inbetkag nen Apo Shiyos iyay ya too, istay amta to koma iyay ya biin emirat son si-kato, tan istay amta to komay ogadi ton ngaaw.”

<sup>40</sup> Si Jesus, kowan to son si-kato ey, “Simon, waray ikowan ko son si-kam.”

Kowan nonta Parisiyo ey, “Ngantoy ikowan mo apo?”

<sup>41</sup> Jet inkowan nen Jesus i sakey ya arig, ja kowan to ey, “Waray showen too ja engotang nodta baknang. Sota sakey, dimen dasos i inotang to, jet sota sakey, dimen polo ngoy inotang to. <sup>42</sup> Idi enshin polos i ibayad shen showa nodta baknang, kinaasi-an nonta

baknang ira. Simon, ikowan mo son si-kak nem sipa son si-karay nandasin i semek to so nonta baknang?”

<sup>43</sup> Kowan nonta Parisiyo ni songbat to ey, “Say kowan ko, sota ebadeg i otang ton epakawanan, si-kato ngoy nandasin i semek to.”

Kowan nen Jesus ey, “Kostoy songbat mo.”

<sup>44</sup> Insi-ning nen Jesus sota bii et kowan to son Simon ey, “Moka asa iyay ya bii? Iyayak niman shiya baley mo, nem enshiy mo in-akan na shanom ja pengoshas ko ni sedik, nem si-kato, inodsan toy sedik ni sayeto, tan pinonasan to pay i sedik ni bowek to. <sup>45</sup> Si-kam, enshiy koston rispito son si-kak, nem si-kato, inpa-sas toy rispito to ni injo-kot to so ni ongo ni sedik — manshoki ni inmotok to ingkato niman. <sup>46</sup> Eg mo dinena-an i toktok ko ni angken na edaken dana koma, nem si-kato, insho-jag tod sedik i emansengew ja danen palit. <sup>47</sup> Ta sota eshakil la basol to, binigbig to ey epakawanan; isonga sajay i inpasing to. Si-katoy ka-asan to ey ebadeg i semek to son si-kak. Nem sota toon kowan to ey ootik i basol ton epakawanan, ootik ngoy semek to.”

<sup>48</sup> Jet kowan nen Jesus so nonta bii ey, “Sota ira basol mo, epakawanan.”

<sup>49</sup> Idi intenengan nonta eshom ma ekilikob son si-kato, kowan shen shorog shi bakdang sha ey, “Sipa iyay ya toon nayda-kad i toka ikowan? Angken basol, pekawanan to!”

<sup>50</sup> Nem kowan nen Jesus so nonta bii ey, “Sota pamatim son si-kak i naysalakanan mo. Daw ka ja wara may talna son si-kam.”

## 8

*Tinodongan nonta bibii si Jesus*

<sup>1</sup> Enshiy bayag to, en nansipiyal si Jesus shi emin na ili tan shima ira baryo, ja en nantoro ni mapteng nga shamag maypangkep ni pantoshayan nen Apo Shiyos. Sota sampolo tan showen too to, ekidaw ira son si-kato. <sup>2</sup> Tan ekidaw pay ira sota istay kawad-an ni dimonyo, ja bibiin mimapteng, tan angken pay sota eshom ma bibiin na-kal i sakit sha. Jet sajay i ngaran ira nonta bibii: si Maria Magdalena ja bintikan ni piton dimonyo, <sup>3</sup> si Juana ja asewa nen Shosa ja emengimanshal shi baley nen Ari Hirodis, tan si Susana. Tan eshakil pay ira sota eshom ma bibiin timolong son Jesus tan sota ira too to ni kasapolan sha, ja engi-kan ni wara son si-kara.

*In-arig nen Jesus sota kalasin bo-day ja naysepa-an ni botil*

<sup>4</sup> Idi na-olnong son Jesus iray eshakil la totoo, ja edapod emin na ili ni Jodia, inkowan nen Jesus iyay ya arig son si-kara, ja kowan to ey, <sup>5</sup> “Waray too ja dimaw wa en nanbangkag shi oma. Idi toka pan-iwaris sota botil, sota eshom, nayponta shi shalan, jet inkatin ni too, tan kinan ira ni titit. <sup>6</sup> Sota eshom ma botil, nayponta ired kabato-an et idi timemel sota botil, nakkit tep emag-anan sota bo-day. <sup>7</sup> Sota eshom ngon botil, nayponta ira shima similja ni sebit, jet idi bimengis iren showa, nabak sota temel ni mola et eg timoloy. <sup>8</sup> Sota eshom ngon botil, nayponta ira shima mapteng nga bo-day. Timemel asan himadeg, jet sajay ira, nandames ni sandedasos.” Tan kowan pay nen Jesus ey, “Niman i waray waya jon mengitneng niyay ya naka pan-ikowan, isonga singpet jon itenengan.”

<sup>9</sup> Sota ira too nen Jesus, inbag-an sha no ngarantoy olog niyay ya

arig ja inkowan to.

<sup>10</sup> Si Jesus, simongbat son si-kara, ja kowan to ey, “Si-kayo nin i naypalobos ja on-awat so ni maypangkep nonta pantoshayan nen Apo Shiyos, nem sota ira eshom, arig bengat i pengitoshok son si-kara, say no angken isi-ning sha, eg sha imatonan, jet angken itenengan sha, eg sha amtay olog to.

<sup>11</sup> “Say olog nonta arig ja inkowan ko la ey toon engiweshis ni botil shi oma, sajay. Sota botil, may-eshig ey esel nen Apo Shiyos. <sup>12</sup> Sota nayponta-an ni botil ja shalan, si-katoy kay-eshigan nonta ira toon engitneng ni esel nen Apo Shiyos, nem ondaw ali si Satanas ja to dingdingen sota esel ja intenengan sha, say eg sha patien, tan say eg ira maysedakan. <sup>13</sup> Jet sota nayponta-an ni botil la kabato-an, si-katoy kay-eshigan nonta ira toon mengitneng ni esel nen Apo Shiyos. No itenengan sha, wara shagos i imdeng shen mengewat, nem eg may-a-det shi nemnem sha. Memati ni sankatikan, nem ibi-jag shen shagos no onmotok i shaka kedigdikati. <sup>14</sup> Sota nayponta-an ni botil ja similja ni sebit, si-katoy kay-eshigan nonta ira toon mengitneng ni esel nen Apo Shiyos, nem say shaka nemnemnema, sota pesing shen manbiyag, sota pandadsakan sha, tan sota ekanas sa biyag ni baknang. Jet anongosto ma ey ma-abak. Isonga enshiy ka-asan ma ni shaka pemat. <sup>15</sup> Sota nayponta-an ni botil ja mapteng nga bo-day, si-katoy kay-eshigan nonta ira toon mengitneng ni esel nen Apo Shiyos. Pati-en sha tep mapteng i wared nemnem sha. Pa-jan na medigdikat, enosan sha et waray panpa-no-an ni pamatira.”

*In-arig nen Jesus sota kingki ja eg koma mesa-keban*

<sup>16</sup> Si Jesus, in-arigan to ira, ja kowan to ey, “Kaspangarigan ey sota kingki ja inparedang jo, simpri eg mesa-keban, ono may-amot shi doong ni katiri, no diket ipa-tok jo shi ekayang, say sota ira toon onsekep ali, asen shay seskepan sha. <sup>17</sup> Sota nay-emot niman ja eg ma-on-an, ma-on-an ali nem ekay, tan sota eg ma-amta-an niman, ma-amta-an ali nem ekay. <sup>18</sup> Singpet jon itenengan, tep sota toon mengitneng tan memati, metod-an pay. Nem sota toon endedamsis to, ja eg memati, angken sota ootik ja kowan to ey amta to, ma-enshi pay.” Kowan nen Jesus.

*Naysabi si ina nen Jesus tan sota ira a-aki to*

<sup>19</sup> Sota ina nen Jesus tan sota ira a-aki to, dimaw ira son si-kato, nem eg mebedin na a-sopan sha ta eshakil iray totoo. <sup>20</sup> Isonga waray engikowan son Jesus ey, “Si inam tan sota ira a-akim, iman ired bo-dayan ja emansessesked son si-kam.” <sup>21</sup> Nem kowan nen Jesus son si-karen emin ey, “Say naka ikarin inak tan a-akik, sota ira emengitneng tan ememati ni esel nen Apo Shiyos.”

*Inpasalsheng nen Jesus i makedsang nga shagem man makedsang nga shadoyon*

<sup>22</sup> Idi sakey ya akew, si Jesus, en nandogan shi bangsa, pati sota ira too to, jet kowan to son si-kara ey, “Ondaw kitejo shima piig niya baybay.”

Jet dima-jat ira. <sup>23</sup> Idi maramen ireka emanbediw, si Jesus, en na-ogip. Idi na-ogip, ebigen kimesdang i shagem nodta baybay et eshogi-an ja emankepno sota bangsa ni shanom. Jet dilikaro may biyag sha. <sup>24</sup> Dimaw ira son Jesus, sha binengon jet kowan sha ey, “Apo! Apo! Shanshani kito men metey!”

Si Jesus, bimangon et inkowan to so nonta shagem tan maked-sang nga shadoyon ni baybay ey onsalsheng et simalsheng nga ag-payso, tan timalna ma. <sup>25</sup> Jet kowan to so ira nonta too to ey, “Apay nga kolang i pamatiyo?”

Nem nasshaaw ira, tan entakot ira, jet kowan sha ni sakey tan sakey son si-kara ey, “Sipa emo iyay ya too? Toka pesalsheng iray shagem tan shadoyon ni baybay et shaka pati-a!”

*Inpabtik nen Jesus sota ira dimonyo nodta toon eman-engaw ja i-Girgasa*

<sup>26</sup> Intoloy shen bimaliw et mimotok ira shi dogad ja sakop ni Girgasa. Say Girgasa tan Galilia, nanmamangan shay baybay. <sup>27-29</sup> Shima Girgasa, waray toon eman-engaw ja pingketan ni eshakil la dimonyo. Sajay ya too, shaka bedora ni kolkolong, tan kebantayi ni too. Nem kanayon ja kesebi-a ni dimonyo et si-kato ngoy timpon toka iketdang so ni kolkolong, jet kaidaw ni dimonyo shi shontog. Eg man-iyay shi baley, nem eg shima kamposanto i toka pan-iyayin ebayag, ja nandabos.

Idi simekbit si Jesus shi kilig ni baybay, inaspol nontan na toon eman-engaw. Idi inon-an tos Jesus, pimekis et en nanshomog shi sango-an nen Jesus. Si Jesus inkowan to so nonta dimonyo ey idekjas sha sota too et sota too, inkedsang toy keljaw to, ja kowan to ey, “Jesus! Anak nen Apo Shiyos sa Kangeto-an! Ngantoy pesing mo ma son si-kak? Panggaasim, karamak shosa-en!”

<sup>30</sup> Si Jesus, inbag-an to, ja kowan to ey, “Sipay ngaran mo?”

Kowan nonta too ey, “Say ngaran ko, si Dinibo.” Tep dinibo i dimonyon pimeket son si-kato.

<sup>31-32</sup> Nontan met laeng, wara iray eshakil la keshel la naybolos nodtan na shontog. Jet sota ira dimonyo, ireka mekikaasi son Jesus ey eg to ira pedaw shima dogad ja shosa-an ira ni dimonyo, nem say piyan sha koma, onsekep ira nodta keshel la naybolos. Jet inpalobos nen Jesus. <sup>33</sup> Jet sota ira dimonyo, bimetik ira nodta too et pimeket ira nodta eshakil la keshel. Jet sota ira keshel, namtik iren nan-ekas shima shepdas et dimened ira shi baybay.

<sup>34</sup> Sota ira toon istay emanbantay ira niyay ya keshel, inon-an shay epasamak et kinano-an shen inshamag shi siyodad tan shima eshom ma kait sha. <sup>35</sup> Sota ira toon engitneng niyay ya shamag, dimaw ira, sha inon-an sota epasamak. Jet simbires Jesus, tan sota toon bintikan ira ni dimonyo, ja mapteng may nemnem to. Timongaw ja nay-askang son Jesus ja nanbaro ma. Sajay iren dimaw ja en engasas so niyay, timakot iren emin. <sup>36</sup> Jet sota ira para bantay ni keshel ja engasas ni inpanetan ni dimonyo, inkowan shay inpasing nen Jesus ja inpabtik so ni dimonyo. <sup>37</sup> Jet emin ira sota i-Girgasa, kowan sha son Jesus ey no mebedin koma, idekjas to ira, ta epaladoy takot sha. Isonga si Jesus, nandogan shi bangsa ja ondat ma. <sup>38</sup> Nem sota toon bintikan ira ni dimonyo, inbag-an tos Jesus nem mebedin na mekidaw son si-kato nodta bangsa.

Nem si Jesus, inbetkag to, ja kowan to ey, <sup>39</sup> “Akad ka, mo ikowan i mapteng nga inpasing nen Apo Shiyos son si-kam.”

Jet sota toon mimapteng, imakad ja nanshalan nodta ira balebaley et to insodsod so ni totooy i kaskasshaaw wa dingka nen Jesus son si-kato.

*Emati ira sota showen too son Jesus et kinaasi-an to ira*

<sup>40</sup> Idi mimotok si Jesus nodta piig ni baybay, sota ira eshakel la totoo, ireka man-imdeng ni inmotok to tep shaka ngo eshan sesseskera.

<sup>41</sup> Jet nontan, wára ngoy mimotok alin too ja si Jairo i ngaran to, ja pangolo ni baley ya sa-nopan ni Hodiyo. Nantalimokod shi sango-an nen Jesus, ja kowan to ey, “No mebedin koma, kay-olop ka son si-kak shi baley ko, <sup>42</sup> ta sota sesakey ya anak kon bii, emanpatpatey.” (Sajay ya anak ton bii, sampolo tan showa i tawen to.)

Nonta eman-ekad si Jesus ja ondaw shi baley nonta pangolo, eshakel iray totoo ja engigéwa son si-kato ni shaka pan-ekad. <sup>43</sup> Nodta eshakel la toon imonod son Jesus, wára ngoy sakey ya biin naydaok ja nanshala ni sampolo tan showen tawen. Kinastos ton emin i kokowa to shi doktor, nem enshiy makabaal ja engagas niyay ya sakit to. <sup>44</sup> Ekisikil la imonod son Jesus et pinishat toy kajaran ni baro nen Jesus. Jet nay-inshas ngon simalsheng sota ebayag ga toka pansheda.

<sup>45</sup> Si Jesus, kowan to ey, “Sipay emirat son si-kak?”

Nem emin ira sota too, kowan sha ey, “Aliwen si-kak.”

Jet si Pedro, kowan to ey, “Apo, eshakel met ita toon shakaka pantikshona?”

<sup>46</sup> Nem kowan nen Jesus ey, “Wara met i dinmok shiyay ja sakey ya toon na-aganan ja emirat son si-kak.”

<sup>47</sup> Sota bii, idi inamta-an to ey amta gayam nen Jesus, dimaw son Jesus ja emanbeyedbed ja en nantalimokod shi sango-an to. Jet inkowan to shi sango-an nonta ira eshakel la totoo nem ngantoy kabol la pinishatan to son Jesus, tan inkowan to ey na-aganan shagos nonta inpirat to so.

<sup>48</sup> Jet kowan ma nen Jesus son si-kato ey, “Anak ko, say minaptingan mo, sota pamatim son si-kak. Daw ka ja wára may talna son si-kam.”

<sup>49</sup> Nonta marama ja pan-ikowan nen Jesus iyay, wára diy inbetkag shen edapo nodta baley nonta pangolo ja emansekit i anak to, jet kowan to son si-kato ey, “Kosto. Angken eg mo odopen ita mais-toro. Enshi met laeng i silbi ni idaw to tep etey sota anak mo.”

<sup>50</sup> Nem si Jesus, intenengan to et kowan to son Jairo ey, “Kareka manshanag; pamati ka ni abos et onpesed sota anak mo.”

<sup>51</sup> Idi onmotok ira nodta baley nonta pangolo, say inpalobos ton mekiskep son si-kato bengat, si Pedro, si Juan, si Santi-ago, tan sota ama tan ina nonta nga-nga. <sup>52</sup> Emin ira sota wára nodta bo-dayan, ireka onnanangis ni daringit sha nonta nga-nga. Nem kowan nen Jesus son si-kara ey, “Karekayo onnangis: eg etey itan na nga-nga, na-ogip bengat.” <sup>53</sup> Nem sota ira totoo, inbi-wisan sha si Jesus tep amtara ey etey da sota nga-nga.

<sup>54</sup> Idi simekep si Jesus, inegnian toy takday nonta nga-nga et inkedsang toy esel to, ja kowan to ey, “Bangon ka anak!” <sup>55</sup> Nay-oliy jasjas mowan nonta nga-nga et bimangon na shagos. Jet inkowan nen Jesus son si-kara ey, “I-akniyo ni kenen to.”

<sup>56</sup> Sota ama tan ina nonta nga-nga, nasshaaw ira. Jet kowan nen Jesus son si-kara ey, “Karejo ikokowan shi eshom iyay ya edaga niman.”

## 9

*Inbetkag nen Jesus sota sampolo tan showen apostol to shi eshom ma ili*

<sup>1-2</sup> Si Jesus, sina-nop to ira sota shinotokan ton sawal ni showen

apostol to et inkowan to ey ondaw ira ja sha ikowan i maypangkep ni pantoshayan nen Apo Shiyos, tan pemapang sha pay i sakit ira ni totoo. Jet kowan to pay son si-kara ey, "Ipiyal ko son si-kayo ey angken sama ira dimonyo ja pimeket shi totoo, mebedin na pebtik jo. Tan sota ira waray sakit to, mebedin ngon pemapang jo ira. <sup>3</sup> Angken enshiy jo ita-jon na kompormin mesepol jo shima dawán jo. Eg mesepol la mengita-jon kayo ni sowan, bayong, mekan, pilak, ono baron pansadatan. <sup>4</sup> No sipay mengewis son si-kayo, si-katoy pan-inan jo ingkatod eg jo pay laeng idekjas sotan na dogad. <sup>5</sup> Nem no ondaw kayo nodta dogad ja eg shakejo ewaten ira nonta too, sota depok ja naypeket shi sediy, pokpok jo nin asan joka ilekjas sotan na ili. Ta si-katoy pengamta-an sha so ey enshi may biyang jo son si-kara." Kowan nen Jesus so ni apostol to.

<sup>6</sup> Jet sota ira too to, inekad shay eshakil la dogad ja sha intoro i esel nen Jesus, tan inpamapteng sha iray toon emanpansekit.

*Eg tongolan nen Ari Hirodis no sipa si Jesus*

<sup>7</sup> Si Hirodis ja engitoshay ni Galilia, idi shinemag to sota maypangkep ni emin na dingdingka nen Jesus, eg to tetongolan nem sipay koston katoo nen Jesus. Ta say kowan ni eshom, si-katos Juan ja para bonjag ja nanbiyag mowan. <sup>8</sup> Say kowan ni eshom, si-katos Elias ja para padto nonta bayag da ja dimaw ali mowan. Tan sota ira eshom pay, say kowan sha, si-katoy sakey so nonta ira para padto nonta bayag da ja nanbiyag mowan. <sup>9</sup> Nem kowan nen Hirodis ey, "Pinotolan koy toktok met nen Juan. Sipa ngata iyay ja toon eshakil i naka itenengin

maypangkep son si-kato?" Jet piyan ton pasiya ja asen si Jesus.

*Pinekan nen Jesus sota dimen dibon totoo ja imonod son si-kato*

<sup>10</sup> Sota ira apostol nen Jesus ja inbetkag to, imoli ira di jet inkowan sha son Jesus i emin na dingdingkara nodta dinedawan sha. Jet inodop to iren abos sha ja ondaw shi siyodad ja kowan sha ey Bitsaida. <sup>11</sup> Nem idi inamta-an nonta eshakil la too i tinoshong nen Jesus, inonod sha, jet si Jesus inewat to ira. Jet inkowan to son si-kara i maypangkep ni pantoshayan nen Apo Shiyos, tan inpamapteng to sota ira emanpansekit.

<sup>12</sup> Idi enaswil malay akew, sota apostol ton sampolo tan showa, dimaw ira di son si-kato et kowan sha ey, "Apo, pansisi-jan mo ira jay ya totoo say ira di koma mengenap ni kenen sha tan kaokipan sha shima balebaley ja nay-askang shiyay, tep arawi met iyay ya dogad shi kebalebaley."

<sup>13</sup> Nem kowan nen Jesus son si-kara ey, "I-akniyo et ira ni kenen sha."

Jet kowan sha ey, "Eshakil met ira. Piyan mon kami menongkal ni kenen sha? Saja wara bengat shiyay, dimen boknol la tinapay tan showen piskaw." <sup>14</sup> Tep wara nodtan i ondaw wa dimen dibon daleki, tan wara pay i bibii.

Kowan nen Jesus ey, "Patongaw jo ira ja totoo ja sandi-men poloy sakey ya gropo."

<sup>15</sup> Jet sota too to, inpatongaw sha ira sota eshakil la totoo. <sup>16</sup> Jet si Jesus, inda to sota tinapay tan sota showen piskaw, intangkak tod naykayang jet nan-iyaman son Apo Shiyos. Idi naksheng nga nan-iyaman, shinowashowa to asan toka i-kan so nonta ira too to, ja si-karay mengiweshis so nonta ira eshakil la totoo. <sup>17</sup> Sota ira totoo, engan ira et napsel iren



emin. Idi naksheng ira, inolnong ira nonta too nen Jesus sota ebay-an ja eg kinan ira nonta totoo jet say na-olnong, sampolo tan showen basket.

*Inbolikas nen Pedro ey si Jesus i inbetkag ali nen Apo Shiyos*

<sup>18</sup> Nonta sakey ya akew, dimaw sota too nen Jesus son si-kato nonta toka panshéwat son Apo Shiyos, ni abos to. Jet inbag-an to ira, ja kowan to ey, “Ngarantoy kaikowan ira ni totoo ni may-pangkep son si-kak? Eg sha aya tabtabalen nem sipa-ak?”

<sup>19</sup> Jet sota ira too to, simongbat ira ja kowan sha ey, “Eg met nani-inges i shaka ikowan. Say kowan ni eshom, si-kam kono si Juan ja para bonjag ja etey da, nem sota ira eshom, kowan sha ey si-kam si Elias ono sakey so nonta ira eshom ma para padto nonta bayag da ja nanbiyag mowan ali shi patey.”

<sup>20</sup> Jet si Jesus, inbag-an to ngo ira sota too to, ja kowan to ey, “Jet si-kayo ngay? Ngaranto ngoy kowan jo ni maypangkep son si-kak?”

Simongbat si Pedro ja kowan to ey, “Si-kam sota inpadtora nonta bayag da ey ibetkag ali nen Apo Shiyos ja mengisedakan so ni totoo.”

<sup>21</sup> Jet si Jesus, binidin to iren pasiya ey eg sha ikokowan ni angken sipa i maypangkep nonta inkowan nen Pedro.

<sup>22</sup> Tan inkowan to pay ey, “Si-kak sota kowan ni padto nonta bayag da ey Anak ni Too. Nem mesepol la manda-kamak ni eshakil la digat, ta sota ira pangolo ni Hodiyo, tan sota apo ni papashi, tan mamaistoro ni dinteg, bedawen sha-ak et anongosto ma ey bono-en sha-ak. Nem no maykatdon akew, man-ongalak met laeng.”

<sup>23</sup> Jet say kowan to son si-karen emin, “No sipay makapiyan ja

on-onod son si-kak ja took ni olay, mesepol la si-kak bengat i nemnememen to, ja ibiyang ton emin i kompormi. Tan mesepol la enosan to pay ya angken maybebaing ono mebono ja inges to sota toon emasan ni koros ja kaydansan to met laeng. Tan mesepol pay ya si-kak i pansilbi-an to ni olay.

<sup>24</sup> Sota toon entapi to i biyag to ja kowan to ey ensikshal la metey maypangkep son si-kak, si-kato et ngo mowan i mepokaw i biyag to. Nem sota toon eg to kawanan i bakdang to ni maypangkep son si-kak ja angken metey ni toka pansilbi, si-kato et ngo mowan i i-aknan nen Apo Shiyos ni biyag ja enshiy to engintegan. <sup>25</sup> No kas-pangarigan ey kinokowa ni sakey ya too i emin na wared ja dobong, enshiy silbi nontan na kinokowa to, no eg to kon-oren sota biyag ja enshiy to engintegan. <sup>26</sup> No sota toon embaing nga mengikowan ey si-kato ket took, ono embaing nga mengikowan ni esel ko, ibaing ko ngo sotan na too nem ondawak alin mantoshay. Agpayson si-kak sota kowan nonta para padto nonta bayag da ey Anak ni Too, jet sotan alin idaw ko, say kasesaad ko, inges ko met laeng i kasesaad nen Apo Shiyos. Tan may-odop ali sota ira anghil to son si-kak. <sup>27</sup> Jet agpayson waray eshom son si-kayod jay ja eg metey ingkatod asen sha sota pantoshayan nen Apo Shiyos.” Kowan nen Jesus.

*Nanbaliw ni emenenili i bakdang nen Jesus nodta shontog*

<sup>28</sup> Waray makadomingko ja edabas da ni inkowanan to so niyay, jet si Jesus, inodop tos Pedro, Juan, tan si Santiago, jet dimaw iren timiyed shi shontog ja en manshéwat son Apo Shiyos. <sup>29</sup> Idi maramen emanshéwat si Jesus, nanbaliw i itsora ni dopa to. Angken pay sota baro to, nanbalin

ni empotin pasiya ja emenenili.  
<sup>30</sup> Jet ebigen wáray shownen too ja emekitbal son si-kato, ja si Moises nen Elias. <sup>31</sup> Emanniyal i shamangan sha et say tinabtabal sha nen Jesus, sota maypangkep ni ikesheng to so ni obda nen Apo Shiyos ni ketey tod Jerusalem. <sup>32</sup> Si Pedro tan sota ira kait to, en-amis i ogip sha, nem ebangon ira et inon-an shay inniyal nen Jesus, tan sota shownen too ja toka pantabtabala.

<sup>33</sup> Idi emanda-jat da si Moises nen Elias ja idekjas sha si Jesus, si Pedro, kowan to son Jesus ey, “Apo, mapteng i kawasha tayod jay. Kosto gayam nem mengemag kami ni tedon kampod jay: sota sakey para son si-kam, sota sakey para so nen Moises, tan sota sakey para so nen Elias.” Nem si Pedro, eg to amtay toka pan-a-sela.

<sup>34</sup> Nonta marama pay laeng ja eman-a-sel si Pedro, dimespag aliy kolpot jet dinikopan to ira. Jet si Pedro tan sota kait to, timakot ira ta dinikopan ira nonta kolpot. <sup>35</sup> Jet wáray esel ja edapo nodta kolpot ja kowan to ey, “Sajay i Anak ko. Si-katoy shinotokan kon mengisedakan so ni totoo. Isonga patiyon emin i ikowan to.”

<sup>36</sup> Idi enshi la sota esel, si Jesus met ni abos i wára.

Jet sota ira too to, enshin polos nin nontan na timpo i sha inkokowan so ni angken sipen too ni maypangkep nonta inon-an sha nodta shontog.

*Inpamapteng nen Jesus sota nga-ngen pingketan ni dimonyo*

<sup>37</sup> Nonta inkawa-wa to, shimalong iren edapod shontog. Jet eshakel iray totoon nay-aspol son Jesus. <sup>38</sup> Jet wáray sakey ya toon naydaok nodta eshakel la totoo ja inkedsang toy esel to, ja kowan to ey, “Apo! Kaasi-im iya anak ko, tep saksakey to bengat ja anak ko!

<sup>39</sup> Waray dimonyon kaonsabi son si-kato et no onsabi, toka pekelkel-jaw, tan toka pankenkenteg, jet eman-o-osab i bongot to. Emebed-jag asan toka ilekjas; toka pedigata nin na pasiya. <sup>40</sup> Inkowan ko nonta ira toom ey pebtik sha sota dimonyo, nem eg sha met binaalan.”

<sup>41</sup> Simongbat si Jesus ja kowan to ey, “Enshiy pamatiyo eshan, ap-apil kayon too! Ebayagak met shiyay ja eman-enos son si-kayo, nem eg jo pay laeng patien i panakabalin nen Apo Shiyos! Ilaw mo did jay sota anak mo!”

<sup>42</sup> Idi eman-ekad sota nga-nga ja to sebi-en si Jesus, sota dimonyo, inbes-ig tod bo-day, tan inpankenkenteg to. Si Jesus, inkowan to so nonta dimonyo ey, “Betik ked ta nga-nga!” Jet bimetik nga agpayso. Jet mimapteng sota nga-nga. Kowan nen Jesus so nonta ama nonta nga-nga ey, “Iya, i-ekad mo iya anak mo.”

<sup>43</sup> Emin ira sota too, nasshaaw ira ja kowan sha ey, “Sajay i ka-asan ni panakabalin nen Apo Shiyos!”

*Inkowan mowan nen Jesus i mepesamak ali met laeng son si-kato*

Maramen sajay i pan-ikowan ira nonta totoo pangkep nonta dingka nen Jesus ey ikowan to ngo so nonta too to ey, <sup>44</sup> “Karejo dibdibkan koma iya ikowan ko son si-kayo, ta aliwén kanayon iyay ya pengiredjaw sha. Si-kak sota kowan ni para padto nonta bayag da ey Anak ni Too, nem may-ewatak so nonta ira toon makakontra son si-kak.”

<sup>45</sup> Nem nay-emot son si-karay piyan ton ikowan, jet eg sha inewatan. Piyan shen ibaga nem ngarantoy olog to, nem embaing iren mengibeka.

*Sota mengibeba ni bakdang to, si-kato et ngo mowan i mayngeto*

<sup>46</sup> Nansosongbat ira sota too to nem sipa son si-karay mandesin koma ni shayaw. <sup>47</sup> Si Jesus, amta toy wared nemnem sha et say inpasing to, ena-wal ni nga-nga ja inpaledjat tod abay to. <sup>48</sup> Jet kowan to so nonta ira too to ey, “No sipa ken too ja mapteng i pesing mo so niyay ya nga-nga maypangkep ni semek mo son si-kak, si-kak met laeng i tinoshong nonta inpasing mo. Jet no si-kak i pesingan mo so ni mapteng, say toshongen nonta dingkam, si Amak ja engibekag son si-kak ali. Sota mengibeba ni bakdang to shorog, si-katoy mandesin koma ni shayaw son si-kayon emin.” Kowan nen Jesus.

*“Sota aliwen makakontra son si-kayo, si-katoy kait jo”*

<sup>49</sup> Kowan nen Juan ey, “Apo, waray inon-an min too ja emengosal ni ngaran mo say onbetik iray dimonyo ja pimeket shi totoo. Jet inpasalsheng mi tep eg naykait son si-kamin toom.”

<sup>50</sup> Nem kowan nen Jesus ey, “Karejo iparit. No sipa sota eg makakontra son si-kayo, kait jo.”

*Sota ira i-Samaria, eg sha inewat si Jesus*

<sup>51</sup> Idi nay-esop ma sota timpon i-oli nen Jesus shi dangit, ninemnemnem to ey kenshat ta ondaw shi Jerusalem. <sup>52</sup> Isonga engibekag ni toon mepangdo ja ondaw shi sakey ya ili ni Samaria say ira mengisekana ni mesepol to, tep manshedan nodtan. <sup>53</sup> Nem sota ira too nodtan, ensikshal ira, ja kowan sha ey, “Enshi, eg ali ondaw shiyay tep ondaw met shi Jerusalem.”

<sup>54</sup> Idi inamta-an nonta too nen Jesus ja si Santiago nen Juan iyay, kowan sha son Jesus ey, “Apo, piyan mon angken pa-oshan mi

ali ni apoy ja medepod dangit say mepoolan ira ja eg mengewat son si-kam?”

<sup>55</sup> Nem si Jesus, nanposipos et sinelkag to ira. <sup>56</sup> Jet dimaw ira shi eshom ma baryo.

*Sota ira toon kowan sha ey may-odop ira son Jesus ni olay*

<sup>57</sup> Idi ireka man-ekad, waray toon kowan to son Jesus ey, “Angken toway dawán mo, meki-dawak son si-kam.”

<sup>58</sup> Jet si Jesus, simongbat ja kowan to son si-kato ey, “Pannemnem ka nin, ta saja obdak, edigat. Onito pay sota atap pa animal, tan titit, ta waray koston shaka pan-iyani. Nem si-kak enshiy koston baley ko ja pansalshengan ko.”

<sup>59</sup> Kowan mowan nen Jesus so nonta sakey ya too ey, “Kay-olop ka son si-kak ni olay.”

Nem kowan to ey, “Kanin Apo, ta nak nin isingpet si amak.”

<sup>60</sup> Si Jesus, simongbat ja kowan to ey, “Olay ngo ira sota toon eg sha amtes Apo Shiyos ja mengisingpet nonta etey. Maybidang ey etey ira, jet anam shen mengibka ni etey ya too. Nem si-kam, daw ka et, mo ikowan i maypangkep ni pantoshayan nen Apo Shiyos.”

<sup>61</sup> Kowan ngo nonta sakey ya too ey, “May-odopak son si-kam Apo, nem ondawak nin, nak sodsoran i pamiljak.”

<sup>62</sup> Kowan nen Jesus son si-kato ey, “No sota toon engirokin mengesharo, nem kewingi ni olay shi engiroki-an to, aliwen mapteng nga para arasho. Inges to sota toon istay nay-olop son si-kak, nem emesiwat ni kompormi, enshiy silbi to shi pantoshayan nen Apo Shiyos.”

## 10

*Inbetkag nen Jesus sota piton polo tan showa ja too to*

<sup>1</sup> Idi naksheng iyay, si Apo Jesus, shinotokan toy piton polo tan showa so nonta ira too to, jet inbetkag to iren sanshedwa ja en mengitosho shima emin na dogad ja kowan to ey dawán to met laeng. <sup>2</sup> Jet say kowan to son si-kara, “Eshakel iray toon may-eshig ey ma-epit nem kolang iray man-obda. Si Apo Shiyos i mengibetkag ni toon mengepit, isonga si-kato ngoy pengshawan jo say mengibetkag ali ni on-atang son si-kayo. <sup>3</sup> Daw kayo ma, nem tanshaaniyo ta ibetkag takejo ja singa kalniron naydaok shima atap pa aso. <sup>4</sup> Angken eg kayo mengita-jon ni pilak, ono bayong, ono sapatos. Pandiritso kayod dawán jo; karekayo mesiwat ni tabtabal shi shalan nem waray aspolen jo. <sup>5</sup> No onmotok kayo nodta balebaley, say pilmiron pesing jo, ikowan jo ey, ‘Bindisiyonan koma nen Apo Shiyos i nanbaley shiyay ya baley.’ <sup>6</sup> Jet no maronong sotan na toon nanbaley nodtan, ja anam ton mebindisiyonan, ontoloy sota inkowan jon bindisiyon nen Apo Shiyos son si-kato. <sup>7</sup> Topog joy baley ya pan-inan jo, karekayo man-a-atan. Jet sota wáren isango sha son si-kayo ja kenen jo, si-katoy singa dagboyo. Ta sota man-obda, nebeng ton may-aknan ni kom-pormin mesepol to. <sup>8</sup> No ondaw kayo nodta ili et ewáten shakejod man, kan jo sota wáren isango sha son si-kayo. <sup>9</sup> Pamapteng joy emansekit ta totoo nodtan na dogad, jet say ikowan jo so nonta ira totoo, ‘Sota pantoshayan nen Apo Shiyos, dimaw ali ma ja nay-esop son si-kayo.’ <sup>10</sup> Nem no sota dogad ja motoken jo ket, eg shakejo ewáten, daw kayod ma kabalkan na kalsara say on-an shakejo et ikowan jo ey, <sup>11</sup> ‘Ayshi may biyang mi son si-kayo! Angken saja depok ja naypekot shi sedi mi,

pokpoken mi. Nem karejo dib-dibkan ey sota pantoshayan nen Apo Shiyos ket dimaw alin nay-esop son si-kayo ja istay onsabi son si-kayo.’ ” <sup>12</sup> Jet intobtob nen Jesus ey, “Iyay pay i ikowan ko. No onmotok ali sota akew ja pengigsheng nen Apo Shiyos no sipay maysedakan, say podnon mepesamak so nonta too nodtan na dogad, mas embel-at i keshosara nem say sota tood Sodoma.” Inkowan nen Jesus iyay ya emin so nonta ira too ton inbetkag to.

<sup>13</sup> Wara pay i inkowan nen Jesus ja kowan to ey, “Kakaasi kayo di ja toon i-Korasin, tan si-kayon tood Bitsaida. Eshakel i dingkak ka milagro shi ili jo jet inon-an jo, nem eg kayo nanbebawi maypangkep ni basol jo. No sajay komen milagro ja inpa-sas ko son si-kayo ket inon-an ni tood Tira, tan tood Sidon, angken aliwén too ira nen Apo Shiyos, sigoradon nanbebawi ira maypangkep ni basol sha nonta mismon inon-an sha sota milagro, tan wara pay i ka-on-anan to ey ireka mandeshingit maypangkep ni basol sha. <sup>14</sup> Nem ikowan ko son si-kayo, no onsabi ali sota timpon pengigsheng nen Apo Shiyos no sipay maysedakan, embel-at i keshosayo nem say sota tood Tira tan tood Sidon. <sup>15</sup> Tan si-kayo ngon tood Kapirnaom, kowan jo ey ikayang jon shorog i bakdang jo ingkatod dangit, nem ayshi, eg mebedin! Maybeka kayod impiyarno.”

<sup>16</sup> Jet kowan nen Jesus so nonta ira ibetkag to ey, “No sipay mengitneng son si-kayo, si-kak i maybidang ey intenengan to. Tan no sipay ondamsis son si-kayo, si-kak i maybidang ey dinamsis to, tan no sipay ondamsis son si-kak, maybidang ey dinamsis tos Amak ja engibetkag ali son si-kak.”

*Imoli ali ira sota piton polo tan showa ja too ton inbetkag to*

<sup>17</sup> Idi nay-oli ira di, sota piton polo tan shownen inbetkag nen Jesus, ireka man- imdeng nga pasiya, ja kowan sha son Jesus ey, “Apo, angken sota ira dimonyo, shakamika pati-a no osalen miy ngaran mo.”

<sup>18</sup> Si Jesus, kowan to son si-kara ey, “Owen, amtak ey si Satanas, sankakemjat i toka ka-ebak ja singa bagidat alid naykayang.

<sup>19</sup> Si-kak i engibetkag son si-kayo et angken manshedan kayod dilikaron dogad, enshiy mepesamak son si-kayo. Mebedin jon ebaken i kabakal jon si Satanas, jet eg kayo ma-an-ano. <sup>20</sup> Nem aliwén sota inpanagshag jo bengat ni dimonyo i pan-imdengan jo. Nem say pan-imdengan jo komen pasiya, sota inkaydista ni ngaran jod dangit.”

<sup>21</sup> Jet nontan met laeng nga oras, sota Ispirito Santo nen Apo Shiyos, inpan-imdeng to si Jesus. Isonga kowan to son Apo Shiyos ey, “Ama, apo ni dangit tan saja dobong, man-iyamanak son si-kam, tep say inpa-amtanan mo so ni maypangkep ni pantoshayan mo ket sota ira toon mapiyan na metod-an. Nem sota ira toon kowan shed nemnem sha ey waray amtara, eg mo ipalobos sa amta-an sha sota maypangkep ni pantoshayan mo. Owen Ama, edaga iyay tep si-katoy piyan mon medeka.” Sajay i iyaman nen Jesus son Apo Shiyos.

<sup>22</sup> Jet inkowan to pay ey, “Si-kak bengat i inpiyalan so nen Amak ni emin. Si-kak bengat i makamta ni emin na maypangkep son si-kato, tan si-kato ngo bengat i makamta son si-kak ka Anak to. Isonga sota piyan kon pengitoshonan ni maypangkep ni pantoshayan nen Apo Shiyos, si-katoy itoro-an ko so.”

<sup>23</sup> Si Jesus, sinengo to sota ira too to et kowan to son si-kara ni abos sha ey, “Ekasat kayo, ta inonan jo ira jay ya naka dagdag-a. <sup>24</sup> Agpayso iya ikowan ko son si-kayo. Eshakel ira sota para padtonen Apo Shiyos tan a-ashi nonta bayag da ja piyan shen on-an koma iyay ya inon-an jo niman na timpo, tan piyan shen itenengan koma iyay ya intenengan jo, nem eg sha sina-kop.”

*In-arig nen Jesus sota i-Samaria ja amta ton mengaasi*

<sup>25</sup> Waray sakey ya maistoro ni dinteg ni Hodiyo; dimaw son Jesus sa kowan to ey peshasen to no kas-anoy katekal nen Jesus. Kowan to son Jesus ey, “Maistoro, ngantoy kowan mo ja dag-en ko say ewaten koy biyag ja enshiy to engintegan?”

<sup>26</sup> Simongbat si Jesus ja kowan to ey, “Ngarantoy naysolat nodta bilin nen Apo Shiyos nonta bayag da? Jet nganto mangoy moka pengodog?”

<sup>27</sup> Sota maistoron ememeshas son Jesus, simongbat ja kowan to ey, “Say kowan to, ‘Semek mos Apo Shiyos ja si-katoy pengitoshongan mo ni emin na wara son si-kam — emin na wared posom, emin na kedsang mo, tan emin na nemnem mo.’ Tan kowan to pay ey, ‘Semek moy kait mon too ja inges toy moka penmek so ni bakdang mo.’ ”

<sup>28</sup> Kowan nen Jesus ey, “Kostoy songbat mo. Jet no onoren mo iyay, ja dag-en mo, ewaten mo sotan na biyag ja insalodsod mo.”

<sup>29</sup> Nem sota maistoro ni dinteg ni Hodiyo, emandeson. Isonga kowan to son Jesus ey, “Jet sipa ngarod i kowan mo ey kait kon sesmeken ko?”

<sup>30</sup> Sinongbatan nen Jesus ni arig, ja kowan to ey, “Waray sakey ya too; emanshedong ja edapod Jerusalem ja ondaw shi

Jiriko. Nem sota ira tolisan, tinodisan sha et indaray angken baro to. Pinegpeg-as sha et indekjas shen nalpeng. <sup>31</sup> Sotan ma ey naytompong ngon wáray pari ni Hodiyoj ja emanshedong nodtan na kalsara. Idi inon-an to sota toon naypolay, dinigdig to ja nanshalan shi naykilig. <sup>32</sup> Idi naksheng iyay, wára mowan i Hodiyoj sa para tolong met laeng ni pari ja nanshalan nodtan, nem inges to met laeng i inpasing to. Idi inon-an to sota toon tinodisan sha, nanshalan nodta naykilig. <sup>33</sup> Nem idi nanshalan aliy sakey ya toon i-Samaria nodtan, ja aliwén kait nonta Hodiyoj sa tinodisan sha, inon-an to et naysemekan nodta too. <sup>34</sup> Dimaw, to simbi et to inekasan sota ira sogat to ni danen edaokan ni adak, asan toka bedbeshi. Jet inpankabajo to nodta kabajo to et indaw to nodta baley ya shiwésan et inajowanan tod man. <sup>35</sup> Idi ewa-wa, inbo-day toy pilak to et in-akan to nodta emanbantay nonta baley ya shiwésan, ja kowan to ey, 'Ajowaním iyay ya too et no on-oli-ak ali, manshedanak alid jay et bayshan taka no pigay kasto-en mon para son si-kato.'

<sup>36</sup> Jet si Jesus, inbaga to so nonta maistoro ni dinteg ey, "Jet saja tedon too ja nanshalan nodta kadan ni toon etolisan, sipa son si-kara i kowan mo ey kait to?"

<sup>37</sup> Sota maistoro ni dinteg ja nansalodsod, simongbat ja kowan to ey, "Simpri sota engaasi son si-kato."

Jet si Jesus, kowan to ey, "Owen et sajay ngoy pesing mo so ni eshom."

*En binisita nen Jesus si Maria nen Marta*

<sup>38</sup> Idi eman-ekad si Jesus tan sota ira too to, simbiray dogad ja kawad-an ni biin manngeshan ni Marta, jet inewis to si Jesus shi

baley to. <sup>39</sup> Si Marta, wáray agi ton si Maria i ngaran to. Sajay ya agi to, timongaw wa eman-tetneng ni kepan-itoro nen Jesus. <sup>40</sup> Nem si Marta, ngaaw i dekna to ta sakey ton emengisekana ni kenen sha. Dimaw son Jesus et kowan to ey, "Apo, baybay-an mo aya ita agik ka indekjas towak ka sakey kon emanposposipos sa man-obda? Ikowan mo son si-kato ey ondaw ali et todongan towak."

<sup>41</sup> Nem si Apo Jesus, kowan to ey, "Marta, Marta, ngantoy? Kaka emanshanag ni moka pan-inolin eman-obda? <sup>42</sup> Sakey bengat i kasapolan jet si Maria, amta toy mesepol et pinidi toy mapteng nga eg mebedin na ma-kal son si-kato."

## 11

*Intoro nen Jesus i pesing nga manshewat son Apo Shiyos*

<sup>1</sup> Nonta sakey ya akew, eman-shewat si Jesus so nen Apo Shiyos et idi naksheng, kowan nonta sakey ya too to son si-kato ey, "Apo, itod-iyokami ni pesing min manshewat son Apo Shiyos, ja inges toy inpangitoro nen Juan so ira ni too to."

<sup>2</sup> Jet si Jesus, inkowan to son si-kara ey, "No manshewat kayo son Apo Shiyos, sajay komay ikowan jo: 'Ama, si-kam koma i mayshed-jaw ni olay. Sota pantoshayan mo, pasebim koma ali. <sup>3</sup> I-kan mo koma sota kenen mi ni inakew. <sup>4</sup> Si-kam i memekawan son si-kami ni nanbasolan mi, tep mika ngo pekawani sota ira nanbasol son si-kami. Karam itolok koma ja manbesol kami, no diket si-kam i mengiredan son si-kami say eg kami manbesol.'"

<sup>5</sup> Si Jesus, in-arigan to ira say eg ira koma on-ekdas ja manshewat son Apo Shiyos; kowan to ey, "No kaspangarigan ey ondaw ka shi baley ni kajem mo ni kawa

ni dabi ja ikowan mo son si-kato ey, 'Kajem, pabodorimak ka ni tedon boknol la tinapay, <sup>6</sup> ta waray kajem kon mimotok shi baley ko et enshiy nak ipakan son si-kato.' <sup>7</sup> Nem sotan na kajem mon wara nodta naydaem ni baley to, onsongbat ja kowan to ey, 'Karamak distolbo-en! Nanbagat kami mala, tan saja ira annak ko tan si-kak, shimokol kami ma. Ekak mebedin men onbangon ja mengi-kan ni mesepol mo.' <sup>8</sup> Jet ngaranto ma? Angken na enasneng nga onbangon ja mengi-kan ni kasapolan mo tep sankajem kayo, kenshat ta mepidit ta onbangon no memasig ka ni baga. Jet i-akan toy mesepol mo. <sup>9</sup> Inges niyay i pesing nga manshewat son Apo Shiyos. No kanayon na manbeka kayo son si-kato, i-akan toy kekshawen jo. No eg kayo onekdas sa manshewat son si-kato, ewaten joy mesepol jo. Panogtog kayo nin et idokatan tokejo. <sup>10</sup> Ta emin ira sota manbeka, ono manshewat son Apo Shiyos, si-karay mengewat ni mesepol sha. Tan emin ngo iray menogtog, si-karay maydokatan. <sup>11</sup> Arig toy san-ama. Wara ayay inon-an jon nga-nga ja no manbeka so nen ameto ni piskaw ket oleg i i-akan nen ameto? <sup>12</sup> Ono kaspangarigan ey sota anak to ket manbeka ni ikdog, apay kamajan ayay i-akan to? Enshi, no diket say i-akan to so nonta anak to, sota mapteng nga ibaga ni anak to. <sup>13</sup> Si-kayo, angken ngaaw i aramid jo, amtayo met ja mengi-kan ni mapteng nga ibaga ni anak jo. No satan i wara son si-kayo, mas pay ya amta nen Apo Shiyos ja Amejod dangit ja mengi-kan ni mapteng nga banag so nonta emengshaw son si-kato ni kasapolan to. I-akan toy Ispirito Santo to so ira nonta manbeka son si-kato."

*Inpan-esel nen Jesus sota dakin eg maka-esel*

<sup>14</sup> Waray sakey ya toon eg maka-esel jet say kabol la eg to aselan, waray dimonyo ja pimeket son si-kato. Si Jesus, inpabtik to sota dimonyo nodtan na too jet sota too, nan-esel ma. Jet sota ira eshakil la too, nasshaaw iren pasiya. <sup>15</sup> Nem sota ira eshom, endedamsis sha, ja kowan sha ey, "O-owap to kari ey wares Apo Shiyos son si-kato. Say toka osala ja pebtik so ni dimonyon pimeket shi totoo ket sota apo met laeng ni dimonyo ja si Bilsibol."

<sup>16</sup> Sota ira eshom, piyan shen peshasen si Jesus, isonga inkowan sha ey mandeka ni milagro ja asanan sha so kono no podnon inbetkag ali nen Apo Shiyos.

<sup>17</sup> Nem si Jesus, amta toy wared nemnem sha, isonga kowan to son si-kara ey, "Dokodoko tan na inkowan jo. Apay nga inkowan jo ey sota apo ni dimonyo i naka osala? Eg towak todongan na pebtik so ni kait to met laeng, ta amta to ey sajay, arig toy ilin nanshowa. No manshowa shorog i sakey ya ili asan ireka mankobat, kenshat ta mepilshi sotan na ili. Kasta met sota pamilja ja manshowa, mansisi-jan ira sota totoo. <sup>18</sup> Eg mebedin na si Satanas, pebtik to met laeng i kait to, tep amta to ey no dag-en to iyay, eg onbayag i pansaad to. Kowan jo ey naka pebtik iray dimonyo tep si Bilsibol i emenodtodong son si-kak? <sup>19</sup> No kasta, kowan jo ey si-kato ngarod i ka-osala ni too jo ni shaka pengipebtik ngo ni dimonyo? No sotan i kowan jo, angken sota too jo, bedawen sha ita kowan jo ey sota apo ni dimonyo i ema-osal ni pebtik so ni kait ton dimonyo. <sup>20</sup> Nankamali kayo. Si Apo Shiyos i kaontolong son si-kak ja pebtik so ira ni dimonyo. Jet sotan i amta-

an jo so ey say pantoshayan nen Apo Shiyos, wára ma son si-kayo.

<sup>21</sup> “Say arig ni naka pesing so ni dimonyo, sajay. No sota toon wáray almas to ja matekal la mekigobat, enshiy en mengibot ni kokowa to no bantayan to ni olay sota baley to. <sup>22</sup> Nem no ebaken ni sakey ya toon mas matekal ey say sota wáray almas to, al-en nonta mas matekal la emin da sota almas ton toka panshindi et ibingbingay toy kokowa nonta nabak.

<sup>23</sup> “Sota toon eg on-onod son si-kak, wára ira son Satanas, ja sha-akka kontra-a. Jet sota eg on-tolong son si-kak ja mengolnong ni too, singa shaka pansisi-jan ira sota totoo.

<sup>24</sup> “Kaspangarigan ey sota toon istay imonod son si-kak nem eg to intoloy, mema-ma et ngo mowan i kasesaad to. Sajay, may-eshig nodta toon bintikan ni dimonyo. No sota dimonyo ket onbetik shi too, eman-eka-ekad shima kamagan ja eman-ena-enap ni pansalshengan to, nem enshiy to se-polen. Isonga nemnemenen to ey on-oli mowan shima toon istay kawad-an to. <sup>25</sup> Jet no may-odi, sebi-en ton mimapteng ma jet ikowan to ey, ‘Siya, edinisan ma iya baley ko.’ <sup>26</sup> Say pesing to, ondaw ja en mengodop ali ni piton kait to ja nankekedsel nem say si-kato, jet onsekep iren man-iyen nodtan na too. Jet sotan na too, mema-may kasesaad to ey say nonta pilmiro.”

<sup>27</sup> Idi naksheng nga inkowan nen Jesus iyay, wáray biin inked-sang toy esel to ja naydaok so ira nonta eshakel la too, ja kowan to son Jesus ey, “Si Apo Shiyos i emindisiyon so nonta biin enginak son si-kam!”

<sup>28</sup> Nem kowan nen Jesus ey, “Ebadbadeg i bindisiyon pay nen

Apo Shiyos so nonta ira mengit-neng ni esel to tan memati ni kowan to!”

*Pan-ibaga ira nonta eshom ma too ey mandeka si Jesus ni milagro*

<sup>29</sup> Kanayon na manka-shomi sota ira too ja mantetneng son Jesus. Jet nontan, inkowan to ey, “Ngaaw iray aramid ni too ma niman! Say shaka pan-ibaga, sota milagro, ta kowan sha ey si-katoy asanan sha so no agpayson si Apo Shiyos i engibetkag son si-kak. Nem enshiy milagro ja en maypa-sas son si-kara niman! Say pengamta-an jo ey inbetkag towak nen Apo Shiyos, no onsabi son si-kak sota inges toy epase-mak so nen Jonas nonta bayag da. <sup>30</sup> Tep si Jonas, nonta inmotok tod Niniba, si-katoy mismon engamta-an sha nontan na timpo ey si Apo Shiyos i engibetkag son si-kato. Inges towak ja kowan sha ey Anak ni Too, wáray pengamta-an ni too nem ekay ey si-kak i inbetkag nen Apo Shiyos.

<sup>31</sup> “No timpo alin pengigsheng nen Apo Shiyos no sipay maysedakan, ondayat sota arin bii ja edapod ma pesaw, jet ikowan to ey kenshat ta meshosa kayo. Tep si-kato, edapod arawin dogad ni indaw ton to itenengan i kalaing nen Ari Solomon ni toka pantosho. Jet niman, asas jo ta wared jay i engatngato ey say si Ari Solomon, jet eg jo pinati. <sup>32</sup> Say sakey pay, sota totoo Niniba ja intod-an nen Jonas. Ondayat ira di no timpon pengigsheng nen Apo Shiyos no sipay maysedakan jet ikowan sha ey kenshat ta meshosa kayo. Tep si-kara, nanbebawi ira nonta inteneng shay esel nen Apo Shiyos ja inkowan nen Jonas son si-kara. Jet niman, asas jo ta iyay shiyay niman i engatngato nem say si Jonas, jet eg jo mowan pinati.



<sup>33</sup> “No bilang ey wáray kingki ja inparedang mo shi naydaem ni baley, simpri eg mesa-keban, no diket maypa-tok shi ekayang, say sota ira toon onsekep ali, asen shay seskepan sha.

<sup>34</sup> “Sota matam, si-katoy may-eshig ey silew ni bakdang. Jet no mapteng i toka pengesas ni eshom, sota bakdang mo, may-eshig ey napno ni dawag. Nem no sota matam ket ngaaw i toka pengesas ni eshom, may-eshig ey emin na parti ni bakdang mo ket wáred embolinet. <sup>35</sup> Isonga pantanshaan ka, ta no ma-enshiy istay dawag ni nemnem mo, may-eshig ey embolinet ngon emin i kawad-an mo. <sup>36</sup> Isonga no napno i emin na parti ni bakdang mo ni dawag, ja enshiy parti ton embolinet, napno ka ngo ni kinamapteng, ja singa inges toy silew ja sinilwan toka.”

*Inkowan nen Jesus sota basol ira nonta Parisiyo man sota basol ni kait sha*

<sup>37</sup> Idi naksheng si Jesus ja nan-esel, sota Parisiyo, inewis tos Jesus ja en mekipengan shi baley to, jet dimaw si Jesus ja en ekilikob son si-kato. <sup>38</sup> Sota Parisiyo, nasshaaw nonta dinmo ton eg nanbolo nin si Jesus ni inpangan to.

<sup>39</sup> Kowan nen Apo Jesus son si-kato ey, “Si-kayon Parisiyo, say itsora ni ogadiyo, singa sota tasa ono malokong ja showal to bengat i eki-wanan, nem sota dikong to, edogit ta pasiya. Sotan i kay-eshigan jo tep say joka ipasas shi karakdan, singa maronong kayo, nem say joka dagdag-a, sota pengamkamkam ni kompormi tan sota eshom ma ngaaw. <sup>40</sup> Enshiy am-amtayo! Si Apo Shiyos, piyan ton mapteng koma i wáred poso jo, ja inges toy mapteng nga joka pesing shi sango-an ni totoo. <sup>41</sup> No shi ebiteg komay joka pengi-kani

ni wára son si-kayo, mapteng may emin na wáred poso jo.

<sup>42</sup> “Kaasi kayo di, si-kayon Parisiyo! Ta joka tongtongpala sota bilin na ootik i pateg to, nem joka et ngo mowan ibiyang sota bilin na epateg ga pasiya! Kaspangarigan, joka idaton so nen Apo Shiyos ja singa bingay to sota maykesampolo nodta emin na apit jo, angken pay sota molejo ja para seng-ew ni sira. Nem joka diwáyi sota koston pesing shi kait jon too tan sota penmek jo son Apo Shiyos. Sajay ya joka pesing nga mengi-kan ni singa bingay nen Apo Shiyos, mapteng; nem mesepol la eg jo diwáyan iya wá-wá-shen piyan nen Apo Shiyos.

<sup>43</sup> “Kaasi kayo di, si-kayon Parisiyo! Ta pipiyan jon ontongaw shima naysaganen tongawan say mebigbig kayo, tan pipiyan jo pay ya rispito-en shakejo ni totoo, ja semsemano-an shakejo shima malkaro ja karakdan ni too. <sup>44</sup> Kaasi kayo din pasiya! Ta may-eshig kayon singa naybeka-an ni too ja enshiy malka to, ja eg idasin ni toon man-ekad.”

<sup>45</sup> Sota sakey ya maistoro ni dinteg ni Hodiyos, kowan to son Jesus ey, “Maistoro, idi inkowan mo iyay, singa inda-kam mokamin maistoro ni dinteg et ebebaingan kami ngo!”

<sup>46</sup> Simongbat si Jesus ja kowan to ey, “Angken si-kayo ngon ma-maistoro ni dinteg, kaasi kayo di! Ta joka ida-kariy too ni embel-at ta bilin jon eg sha iposi. May-eshig ey joka ira bel-ati ni kalka ja eg sha iposi, nem si-kayon mismo ket eg jo pay peshasen na angken sakey ya kalomot joy mandi-bit.

<sup>47</sup> “Kaasi kayo di! Ta si-kayo i nandaga ni monyominto ira nonta para padto nen Apo Shiyos nonta bayag da ja binbinno ni ap-apo jo

la nontan da. <sup>48</sup> Sata ira monyominto ja inemag jo, si-katoy kasaan to ey joka aporbali sota inpamono nonta ira apo jo la so nonta ira para padto nen Apo Shiyos nonta bayag da. Sota ap-apo jo i emono et si-kayo ngoy engamag ni monyomintora. <sup>49</sup> Nay-eshom kayo nodta aramid da nonta ap-apo jo, isonga agpayso noman sota kowan nen Apo Shiyos ey, 'Mengibetkagak da ngo son si-kara ni totoon para padto tan sota eshom ma totoo ja mengikowan ni esel ko. Nem bono-en sha sota ira eshom, tan pedigaten shay eshom.' Sajay i inkowan nen Apo Shiyos tep amta to ey tima-nil kayo ja en-oges joy toka ibetkag ali son si-kayo. <sup>50</sup> Isonga si-kayon too niman na timpo, meshosa kayo di ja ikaro jo sota inpamono ni ap-apo jo so nonta ira inbetkag nen Apo Shiyos, manshoki nonta inkapalsowa niya dobong ingkato niman. <sup>51</sup> Say pilmiron ebono nontan da bayag, si Abel, jet say ka-onoran, si Sakarias, ja binono ni too nonta bayag da shima naydaem ni Timplo, ja nay-esop shima kowan sha ey altar. Owen, ikowan ko ey emin iyay, si-kayon too niman i mengikesho.

<sup>52</sup> "Kaasi kayo di, si-kayon ma-istoro ni dinteg! Ta si-kayo i kabol la eg so amta-an ni totoo ni maypangkep so nen Apo Shiyos. Si-kayon shorog, eg jo koston amta-an, jet si-kayo i timiped so ira nonta toon makapiyan na mengamta." Kowan nen Jesus.

<sup>53-54</sup> Idi naksheng nga inkowan to iyay, bimo-day si Jesus nodtan na baley. Nem sota mamaistoro ni dinteg ni Hodiyo tan sota ira Parisiyo, empait shen pasiya sota inkowan to; isonga manshoki nontan, pineshas shen pasiya i kabaalan shen menaol son si-kato. Say inpassing sha, eshakil i inbagabaga sha son si-kato ni may-

pangkep ni ka-iri-irin, ta kowan sha ey balang nem waray pankamali-an ton isongbat, ja pebesolan sha son si-kato.

## 12

*Si Apo Shiyos bengat i mesepol la metekotan, nem ebadeg ngoy semek to*

<sup>1</sup> Nontan, shimakel la pasiyay totoon emay-odo-odop son Jesus, ja shaka pay pan-ikatin i sedi ni eshom. Jet nontan, waray inkowan nen Jesus, nem wa-wa-shen sota too to i toka panikowani so; kowan to ey, "Tanshaaniyo iray Parisiyo, tep singa mapteng ira nem o-owap gayam i kamapteng sha. Baka ma-edinan kayo ni ngaaw wa ogadira, ja singa inges toy para debag ni tinapay ja toka edinay kaydaokan to. <sup>2</sup> Kowan sha emo ey enshiy maka-amta ni ogadira, nem kenshat ta ma-amta-an. Emin na ngaaw wa aramid ni too ja shaka i-emot, ma-amta-an ngoreshan. <sup>3</sup> Emin na esel la sikrito, ma-amta-an shi karakdan, tan emin na esel la maytetobo shi naydekeb ba kowadto, maykeljaw ngod karakdan. <sup>4</sup> Kagajem ko, iyay i kowan ko son si-kayo. Karekayo ontakot so nonta ira makakontra son si-katejo, tep bakdang bengat i kabaalan shen bono-en. <sup>5</sup> Nem say mesepol la metekotan koma, si Apo Shiyos, ta waray kabedinan ton mengipedaw son si-kayo shi impiyarno nem meksheng kayon metey. Owen, mesepol la si-katoy tekotan jo!

<sup>6</sup> "Nem wara ngoy ebadeg ga semek nen Apo Shiyos. Nemnem jo kari sota titit. Enshiy banol ni titit, nem eg to ira ibiyang. No waray menongkal ni titit, angken showen santimos i dima, nem angken sakey so nonta ira titit, enshiy en dinibkan nen Apo Shiyos. <sup>7</sup> Angken pay sota bowek ni toktok

jo, amta nen Apo Shiyos i kabebilang to. Isonga karekayo ontakot tep nandasin i semek to son si-kayo nem say sota eshaket la titit.

<sup>8</sup> “Iyay pay i ikowan ko son si-kayo. Sota toon mengikowan so ni too ey wára son si-kak, si-kak ja kowan sha ey Anak ni Too, ikowan ko ngo shi sango-an ira ni anghil nen Apo Shiyos shi dangit ey sotan na too ket took ka emepiyal. <sup>9</sup> Nem sota toon mengikowan so ni too ey eg towak amta, ibiyang ko ngo shi sango-an ira nonta anghil nen Apo Shiyos shi dangit.

<sup>10</sup> “Angken sipen too ja ngaaw i toka ikokowan maypangkep nonta kowan sha ey Anak ni Too, mebedin na mepekawanan. Nem sota ngaaw i toka ikokowan maypangkep nonta Ispirito Santo nen Apo Shiyos, eg mebedin na mepekawanan.

<sup>11</sup> “No idaw shakejon mebistigal shi sango-an ni toray ni Hodiyo, ono shima engaton toray, karekayo meshanagan no ngarantoy isongbat jo ono ngarantoy ikowan jo son si-kara, <sup>12</sup> ta sota isongbat jo, ipa-amta met laeng ni Ispirito Santo nen Apo Shiyos son si-kayo nontan na oras ja shakejosoka pan-ibag-i.” Kowan nen Jesus.

*Intoro nen Jesus ey sota pengamkam ni asdeg ton kokowa, enshiy silbi to*

<sup>13</sup> Waray toon naydaok nodtan na eshaket la totoo ja kowan to ey, “Maistoro, ikowan mo son agik ey panbingay mi sota tawid ja minosan to.”

<sup>14</sup> Nem si Jesus, kowan to ey, “Kajem ko, aliwén si-kak i mengigsheng nita tawid jon kowan mo ey panbingay jon sanagi.”

<sup>15</sup> Jet intoloy ton wáray inkowan to so nonta totoon

eshaket ey, “Pantanshaan kayo ta baka wáray pengamkam jo ni kompormi, ono apal jo ni kokowa ni eshom, ono ma-isew kayo. Say biyag ni too, aliwén shi kokowa toy toka pandepo-i, no diket si Apo Shiyos i nanngel, angken ngantoy kabaknang to.”

<sup>16</sup> Jet si Jesus, in-arigan to ira ja kowan to ey, “Waray baknang ja asdeg toy toka epita nodta bo-day to. <sup>17</sup> Say kowan to shorog ni bakdang to, ‘Enshiy pengitdo-an ko nima eshaket la apit ko. Ngantoy pesing ko aya?’

<sup>18</sup> Nannemnemnem, jet say kowan to shorog shi bakdang to, ‘Sajay gayam i dag-en ko. Bagbagen ko ima sigod ja naka pengitdo-i et mengemagak ni ebadbadeg, jet si-katoy pengitdo-an ko ni emin na apit ko, tan sama eshom pay ya kokowak. <sup>19</sup> Jet say wára med nemnem ko, ekak ma manshanag tep wáren emin i mesepol ko ni pigen tawen. Angken ekak ma man-obda! Menganak tan menginomak bengat. Dadsak may dagdag-en ko!’ <sup>20</sup> Nem say kowan nen Apo Shiyos so nontan na baknang, kowan to ey, ‘Dokodoko tan na nemnem mo! Niman na dabi, odi-en koy biyag mo! Jet eg mo kenasen ita emin na kokowam ma inolnong mo!’”

<sup>21</sup> Kowan pay nen Jesus ey, “Say pengidmang nen Apo Shiyos so ni toon baknangan to bengat i toka nemnemnema, ebadeg i nankolongan to. Say mepesamak ali son si-kato, inges to sota epesamak so nonta baknang shiyay den istoriya.”

*Si Apo Shiyos i mengajowan son si-katejo*

<sup>22</sup> Si Jesus, kowan to so nonta too to ey, “Isonga say kowan ko son si-kayo, aliwén kayo meshanagan ni panbiyag jo: no ngarantoy kenen jo ono ibaro

jo. <sup>23</sup> Ta say biyag tan bakdang, epateg nem say mekan tan baro. Si Apo Shiyos i engi-kan ni biyag tan bakdang et si-kato ngoy mengi-kan ni kasapolan to. <sup>24</sup> Idmang jo kari ira ja kawang ono owak: eg ira manmoda ono mengepit; enshiy shaka pengitdo-i ja sarosal sha. Nem si Apo Shiyos i ememekan son si-kara! Jet arawin nandasin i semek to son si-kayo nem say sota ira titit. <sup>25</sup> Sota joka panshananag, eg to met peshokey i biyag jo ni angken ootik bengat. <sup>26</sup> No sota shanag jo ket eg to posi-en iyay ya ootik ka banag, apay nga sota panbiyagan joy joka panshanagi pay laeng? <sup>27</sup> Asas jo kari ira sota sabsabong shima shontog; nem-nem jo kari no toway toka pesing nga manbiyag. Eg met man-obda ono mengebel ni baro, nem iyay i ikowan ko son si-kayo. Angken si Ari Solomon ja kabaknangan nonta bayag da, emin sota osal ton nankemapteng, eg sha pay ingesen i kamapteng ira nima sabsabong. <sup>28</sup> Sota sabsabong, maganoy ka-enshi to: emansebong niman et no mewá-wá, maypool shi apoy. Nem si Apo Shiyos ket eg to i-oway. Sinto pay kayo mangon too to ja to i-oway! Isonga eg tokejo baybay-an. Si-kayo, ootik eshan i pamatiyo, isonga kayoka meshanagin pasiya. <sup>29</sup> Tan aliwén sota kenen jo tan inomen joy jo nemnemnen. Karekayo manshanag, <sup>30</sup> tep si Amejon wáred naykayang, amta toy emin na mesepol jo. Sota ira toon enshiy pamatira son Apo Shiyos, anam shen manshanag ni panbiyagan sha, aliwén si-kayo. <sup>31</sup> Nem say epateg komen nemnemen jo, sota pantoshayan nen Apo Shiyos. No sajay i pesing jo, emin na banag ja kasapolan jo, i-eshom nen Apo Shiyos ja i-akan son si-kayo.

<sup>32</sup> “Si-kayon took ja naka banbantayi, karekayo ontakot. Angken ootik kayo, si Amejon wáred naykayang, eman-imdeng nga pasiya ja si-kayoy mayda-kam shi pantoshayan to. <sup>33</sup> Ilekoyoy kokowayo et sota pandeko-an jo, i-kan jo so nonta totoon makasapol. Sotan i koston pesing nga mengolnong ni kokowa shi dangit ja eg mepilshi. Shiman, enshiy mengibot so, tan angken sota baro, enshiy bigis sa onsharal so. <sup>34</sup> Shi dangit komay wá-wá-shen pengolnongan jo ni kokowayo, ta sota kawad-an ni kokowayo, si-katoy wáred nemnen jo ni olay.

*Kowan nen Jesus ey mesepol la esagana ni olay ira sota too to*

<sup>35-36</sup> “Mesepol la esagana kayo ni olay ja enshiy ontiped ni pansilbiyo son si-kak. Mesepol la ingesen joy kepansesked ni baga-en shiyay ya istoriya. Waray toon dimaw ja eki-atindar ni kasal et sota ira baga-en to, kanayon na ireka mansessesked ali ni imotok to. Wara ni olay i silew sha, say no menogtog si apo sha, idokatan shen shagos. <sup>37-38</sup> Ta no onmotok ali, ja angken kawa ni dabi ono palbangon, sota ira baga-en ton sebi-en ton eg na-ogip, bindisiy-onan nonta apo sha. Man-imdeng ira tep sota apo sha, petongaw to ira jet si-kato et ngo mowan i mengi-kan ni kenen sha. <sup>39-40</sup> Jet angken si-kayo, pansagana kayo, ta say imotok ko ali, kompormin oras ja inges toy kaidaw ali nonta mengibot shi baley. No sota makabaley ket amta to koma no ngaranton oras ni edabi i idaw ali nonta mengibot, kenshat ta mansekana, eg to itolok ka onsekep sota mengibot shi baley to. Jet angken si-kayo, mesepol la esagana kayo ni olay.” Kowan nen Jesus.

<sup>41</sup> Jet kowan nen Pedro ey, “Apo, si-kamin toom i inkowanan mo so niyay ya arig, ono angken pay sota karakdan?”

<sup>42</sup> Si Apo Jesus, simongbat ja kowan to ey, “Sota baga-en ja emepiyal, ja amta toy toka dagdag-a, si-katoy piyalen nonta apo ton mengimanshal ni kokowa to, tan si-katoy mepiyal la mengi-kan ni dasjon ira nonta kait ton baga-en no timpo to. <sup>43</sup> Jet no sotan na baga-en ket maramen eman-obda ey onmotok ali sota apo to, mapteng i konkona ton i-akan nonta apo to. <sup>44</sup> Agpayso iya ikowan ko son si-kayo. Sotan na baga-en, no sebi-en nen apo ton eman-obda, si-katoy piyalen nen apo to ja en mengimanshal nonta emin na kokowa to. <sup>45</sup> Nem sota sakey ya baga-en, ja kowan to ey, ‘Angkena tep si apok, metaktak alin onmotok’, kakaasi sotan. Ishogi ton sepseptaten ira sota kait ton baga-en, ja daleki man tan bibii, tan mesiwat ni dadsak ton pengan tan penguinom ingkatod keboteng to. <sup>46</sup> Kakaasi sotan na baga-en tep sota apo to, on-oli ali jet ondibag tep eg to amta sotan na i-oli ali nonta apo to. Jet sotan na baga-en, pekishosa to so nonta ira kait ton baga-en ja eg mepiyal.

<sup>47</sup> “Sota baga-en ja amta toy piyan nonta apo ton dag-en to, nem eg to pati-en, embel-at i shosa to. <sup>48</sup> Nem sota baga-en ja eg to amtay piyan nonta apo ton dag-en to, jet waray dag-en ton panbesolan to, engka-jas i shosa to. Iyay i nemnemen jo koma. Sota toon wa-wa-shay nay-akan son si-kato, asdeg toy namnama-en ni apo ton obda-en to. Tan sota toon ebadbadeg i may-ewat son si-kato, ebadbadeg ngoy songbatan to.

<sup>49</sup> “Dimawak alin mengidaw ni singa apoy shiya dobong et sapay koma ta wara ma niman.

<sup>50</sup> Waray bonjag alin mepesamak son si-kak et enshiy talnak ingkatod meksheng. <sup>51</sup> Aliwen jo ipangkep ey dimawak alin mengi-kan ni olnos shiya dobong. Aliwen sota maypangkep ni olnos i dinawan ko di, no diket say panbenagan ali ni indaw ko di, eg man-i-inawatan i totoo. <sup>52</sup> Manshoki niman, eg man-i-inawatan i angken toon sanpamilja. No kaspangarigan waray nampamilja ni dima, manshowa jet sota tedo, kabakal toy showa, tan sota showa, kabakal toy tedo. <sup>53</sup> Angken sota a-ama, kabakal sha aliy annak sha. Kasta met iray i-ina tan annak shen bibii, manbekal ira. Angken sota bibiin san-inepo, manbekal ngo ira.”

*“Apay nga eg jo ewatan i kay-odogan nonta emin na emepespesamak niman na timpo?”*

<sup>54</sup> Kowan nen Jesus so nonta ira eshakil la totoo ey, “No asen jo aliy kolpot ja medepod baybay, amtayo ey kenshat alin onoran. <sup>55</sup> Jet no dekna-en jon emankedapo aliy shagem shi dogad ja kaptangan, amtayo ey kenshat ta onpetang ma diy timpo. Jet siya, kaonpetang i timpo. <sup>56</sup> Joka ewatiny timpo alin onsabi no asen joy emankepasamak shi naykayang ono shiya dobong, nem apay nga eg jo ewatan ey emin sota emepespesamak niman na timpon kawashak son si-kayo, asdeg to met i kay-odogan to! Ma-o-owap kayon too!

<sup>57</sup> “Apay nga eg jo idasin i koston pansigshan jo? <sup>58</sup> Niman na waray waya jo pay laeng, panbebawo kayo ni eg jowak so pinatian. Ta say arig ni kasesaad jo, inges toy toon emankaikoyod shi oskaro maypangkep ni otang to. Isonga dagam i kabaalan mon mekikajem ma shagos son si-kato no maramen tokaka pan-i-ilaw

shima oskaro, say eg toka i-awat nodta kowadja ja mengibedod son si-kam. <sup>59</sup> Ta say kowan ko son si-kam, no wára ka ma shima badoran, eg ka onbo-day ingkatod bayshan moy oltimon sintimos ja inotang mo.”

### 13

*Inkowan nen Jesus ey mesepol la ibebawi shay basol sha*

<sup>1</sup> Nontan na timpo, wáray mi-motok alin totoo et inkowan sha son Jesus ey, “Wara kono iray i-Galilia ja binono nen Gobinarol Pilato nonta maramen ireka emengi-kan ni daton sha son Apo Shiyos shi Timplo.”

<sup>2</sup> Si Jesus, simongbat ja kowan to ey, “No kasta, say kowan jo emo, ‘Isonga binonora ira ta ebadeg i basol sha nem say sota eshom ma tood Galilia; inkaro sha emo.’ <sup>3</sup> Nem say ikowan ko son si-kayo, enshi. Jet angken si-kayo, no eg jo ibebawiy basol jo, metey kayon emin ja inges toy inkatey sha. <sup>4</sup> Asan say sakey pay, ngan-toy kowan jo nonta sampolo tan wálon edisgrasiya shi Siloam ja etedteshan ja etey? Kowan jo mowan ey si-katoy ka-asan to ey ebadeg i basol sha nem say sota eshom ma tood Jerusalem? <sup>5</sup> Enshi. Jet say ikowan ko son si-kayo, no eg jo ibebawiy basol jo, metey kayon emin ja inges sha.” Kowan nen Jesus.

<sup>6</sup> Jet si Jesus, inkowan toy arig son si-kara, ja kowan to ey, “Waray inmola ni too ja kowan sha ey higos. Idi bima-deg sota mola, dimaw iyay ya too, to inonan nem wáray dames to. Nem enshin polos i dames to. <sup>7</sup> Isonga say kowan to nonta toon toka panbantay ni bo-day to, ‘Idmang mo kari. Tedon tawen na kanayonak alid jay ya mengesas nem wáray dames niyay ya mola, nem enshin polos ni olay, angken sakey.

Batang mo et; pekéwas to et iya bo-day ja naymola-an to.’ <sup>8</sup> Nem say kowan nonta toon emanbantay, kowan to ey, ‘Bay-im nin apo, ni angken makatawen bengat. Iparas kon sedaro-an tan ebono-an. <sup>9</sup> Balang nem ondames alin sakey ya tawen. Nem no enshi, angken pebetang mo.’ ”

*Inpamapteng nen Jesus sota bii ni timpon ngilin ni Hodiyo*

<sup>10</sup> Idi sakey ya akew wa ngilin ni Hodiyo, emantosho si Jesus shi baley ya sa-nopan ni Hodiyo.

<sup>11</sup> Jet wára nodtan i biin pingketan ni dimonyo. Sotan na dimonyo, inpansakit to sota bii ni sampolo tan wálon tawen. Napkoy beneg to jet eg mebedin na on-ekwas.

<sup>12</sup> Idi inon-an nen Jesus iyay ya bii, tinewal to ja kowan to ey, “Niman, ma-kal ma sota sakit mo.”

<sup>13</sup> Inkepap toy takday to so nonta bii et nay-inshas ngon mimapteng i bakdang to, jet imekwás ma. Jet ebadeg i iyaman nonta bii son Apo Shiyos.

<sup>14</sup> Nem sota pangolo nodtan na sa-nopan, bimongget tep inpamapteng nen Jesus sota bii nontan na akew ja timpon ngilin. Jet say inkowan to so nonta ira totoo, kowan to ey, “Enem ma akew i koston timpo ja pan-obdayo, jet sikato ngo diy idaw jon en manpakas, aliwen niman na timpon akew ni ngilin!” Kowan nonta pangolo.

<sup>15</sup> Nem si Jesus, simongbat ja kowan to ey, “Si-kayon ma-owap! Aliwen emin kayo ket joka ibolos i nowang jo ono kabajoyo no akew ni ngilin, say en maninom? <sup>16</sup> Say kowan jo, ngaawak tep inbolos ko iya biin poli nen Abraham ja singa binedod nen Satanas ni sampolo tan wálon tawen. Say kowan ko, mesepol la ma-ekasan, angken akew ni ngilin.” Kowan nen Jesus.

<sup>17</sup> Jet emin sota toon makakontra son si-kato, ebebaingan ira nonta esel ja inkowan nen Jesus, nem sota eshom ma tooto, ireka man-imdeng nonta inon-an shen kaskasshaaw ja dingka to.

*In-arig nen Jesus sota botil ni mola tan sota para debag ni tinapay*

<sup>18</sup> Intoloy nen Jesus ey, “It-nengiyo iya ikowan kon pengingesan ni pantoshayan nen Apo Shiyos. <sup>19</sup> Say pantoshayan nen Apo Shiyos, may-eshig nodta botil ni sakey ya kalasin mola, ja ootilik. Sajay ya botil, inda ni too et in-esek tod bo-day to. Idi bima-deg sota mola, nanbalin ni ebadeg ga kadasan, jet sota ira titit, nan-obong ira shima pangpanga to.”

<sup>20</sup> Asan kowan pay nen Jesus ey, “Iyay pay i i-arigan ko so ni pantoshayan nen Apo Shiyos. <sup>21</sup> May-eshig nodta para debag ni tinapay ja inda ni bii, ja to indaok nodta eshakil la arina ingkatod inedinan ton emin.”

*In-arig nen Jesus sota edipit ta sakepan*

<sup>22</sup> Si Jesus, nantoro shi emin na dogad ja shindan to nonta dimaw shi Jerusalem. <sup>23</sup> Nodta sakey ya dogad, waray toon nansalodsod son Jesus ja kowan to ey, “Apo, ootik ngatay maysedakan?”

Simongbat si Jesus ja kowan to ey, <sup>24</sup> “Dagejoy kabaalan jon pasiya say si-kayoy sakey. Ta say sakepan ja ondaw shi kaysedakan, may-eshig ey edipit. Ikowan ko son si-kayo, eshakil i totoon mengipeshas ja onsekep no on-sabi sotan alin akew, nem eg mebedin. <sup>25</sup> Ta no meksheng nga idekeb nonta makakokowa, angken pigay togtog jo, kenshat ta wara kayo med showal. Angken kowan jo ey, ‘Apo, ilokati jokami!’, eg ma mebedin. No diket say isongbat to, ‘Eg takejo am-amta. Toway

edapo-an jo?’ <sup>26</sup> Jet ikowan jo ngo ni songbat jo ey, ‘Ekipengan kami met tan eki-inom kami son si-kam! Nantoro ka pay met shi ili mi!’ <sup>27</sup> Nem say isongbat to son si-kayo, ‘Ekak met amtay edapo-an jo! Ki-nan kayod jay! Ta si-kayo, ngaaw i aramid jo nontan.’ <sup>28</sup> No timpo alin pantoshay nen Apo Shiyos, asen jos Abraham, Isaac, si Jacob, tan sota ira emin na para padto nen Apo Shiyos nonta bayag da, ja wara ira nodtan, nem si-kayo, maydesin kayod showal. Jet shiman, nangis bengat i dagdag-en jo, tan panggedetngget joy sangi jo ni daringit jo. <sup>29</sup> Eshakil aliy medepod emin na sakop niya dobong, ja angken aliwen Hodiyo, jet si-karay ontongaw wa mekilikob shima pantoshayan ali nen Apo Shiyos. <sup>30</sup> Jet sota eshom ma toon kowan sha ey si-karay mepangdon onsekep, si-kara et ngo mowan i man-onod, jey sota eshom ja nan-onod niman, si-kara et ngo mowan i mepangdo.” Kowan nen Jesus.

<sup>31</sup> Nontan met laeng nga oras, wara iray Parisiyo ja dimaw son Jesus jet sha inkowan ey, “Betik ka niman shiyay, daw ked eshom ma dogad. Ta si Ari Hirodis, piyan ton bono-en toka.”

<sup>32</sup> Nem simongbat si Jesus ja kowan to ey, “Jo ikowan so nita sinan arin masikap ey ekak idekjas nin iyay ya dogad to. Niman tan kabasan, naka panpebtik iray dimonyo shi tooto, tan naka panpemapfeng sota totoon emanpansekit. No bowas to, meksheng may obdak shiyay. <sup>33</sup> Nem siya, angken wara-ak shiya sinekopan to ingkatod bowas to, itoloy ko met laeng ja ondaw shi Jerusalem. Tan sakey pay, eg mebedin na mebono-ak shiyay. Tep say kebono-i ni toon inbetkag ali nen Apo Shiyos, shi Jerusalem, jet nalas no waray mebono shi apil la

dogad!”

<sup>34</sup> Jet si Jesus, idi ninemnem toy kakedsel ni tood Jerusalem, dinekna toy toka pengisekit son si-kara, jet kowan to ey, “Si-kayon tood Jerusalem! Manshoki nonta bayag da ingkato niman, joka bono-a ni olay ja kespigan ni bato iray inbetkag nen Apo Shiyos son si-kayo, pati sota ira para padto. Ara, piga mangoy pesing ko son si-kayo! Eminshakel la piyan kon i-okong takejon i-Jerusalem ja inges to sota kepengi-okong ni manok ira ni kipkip to. Nem en-asneng kayo! <sup>35</sup> Niman ma, olay to kayo ngo, tep enshis Apo Shiyos shi Timplojo ja mengibediw son si-kayo. Jet ikowan ko ey si-kayon i-Jerusalem, waray timpon imotok ko son si-kayo ja asen jowak et ikowan jo ey, ‘Bindisiyonan koma nen Apo Shiyos iya toon inbetkag to di!’ ”

## 14

*Ekipengan si Jesus shi baley nonta Parisiyo*

<sup>1</sup> Nonta sakey ya akew ja timpon ngilin ni Hodiyo, dimaw si Jesus ja en mekipengan shi baley nonta sakey ya pangolo ni Parisiyo. Jet sota ira makakontra son Jesus, shaka si-siimi no ngarantoy dagen to. <sup>2</sup> Jet naytompong nontan ja waray dimaw son Jesus ja toon dimarag iray sedi to tan takday to. <sup>3</sup> Si Jesus, inbag-an to sota ira mamaistoro ni dinteg ni Hodiyo tan sota ira Parisiyo ja wara nodtan, ja kowan to ey, “Ngantoy kowan jo? Kaiparit aya ni dinteg tayon Hodiyo i pemapteng so ni toon emansekit ni akew ja timpon ngilin, ono enshi?”

<sup>4</sup> Nem enshiy shaka isongbat. Jet si Jesus, kimpap to sota too et na-kal sota darag ni sedi to tan takday to. Jet kowan ma nen Jesus son si-kato ey, “Siya, daw ka.”

<sup>5</sup> Jet kowan nen Jesus so nonta emeni-siim son si-kato ey, “No kaspangarigan sota sakey son si-kayo ket ma-kas i anak to ono baketo shi pel-og ey naytompong nga akew ni ngilin nontan, eg jo aya kano-an ja en al-en nontan met laeng nga akew?”

<sup>6</sup> Nem nasdengan ira, ja enshiy sha isongbat ni maypangkep niya inkowan to.

<sup>7</sup> Inon-an nen Jesus ey sota ira eshom ma bisita, ireka manpidi ni mapteng nga dogad ja tongawan. Isonga inkowan to iyay ya arig son si-karen emin, ja kowan to ey, <sup>8</sup> “No waray mengewis son si-kam shi kasal, kareka ontongaw shima kamaptengan, ta eg mo amta no waray eshom ma toon epateg pay ey si-kam ja na-awis nodtan na kasal. <sup>9</sup> No iba-ngat moy tongaw nodta kamaptengan, baka ondaw ali sota engawis son si-kayon showa et ikowan to son si-kam ey, ‘Dayat ka, aliwen si-kam i ontongaw shiyay; saja opisiyal.’ Jet nakol ni si-kam i mebebaingan ja en ontongaw nodta kawad-an ni nankebaban too. <sup>10</sup> Say mapteng nga pesing mo no mawis ka, tongaw ka shima kawad-an ni nankebaban too, say no asen toka nonta engawis son si-kam, ondaw ali ja to ikowan son si-kam ey, ‘Kajem, kaled ja kad-an ni nankengaton too.’ Jet sajay i kayshedjawan mo shi sango-an ira nonta emin na eshom ma bisita. <sup>11</sup> Sota mengingeto shorong ni bakdang to, maybeba et ngo mowan. Jet sota mengibeba ni bakdang to, si-katoy mayngeto.”

<sup>12</sup> Jet kowan nen Jesus so nonta Parisiyo ja engawis son si-kato ey, “No nemnemen mon memekan ni eshakel la totoo, aliwen sota kagajem mo komay ewisen mo, ono sota a-akim, ono partidom, ono sota ira bebaknang ja inaskang mo, ta mebedin na



i-inges sha ngoy inpasing mo, ja ewisen shaka ngo, jet mesobal-itan sota mapteng nga inpasing mo son si-kara. <sup>13</sup> No kaspan-garigan ey manpiyasta ka, say ewisen mo komen en mekikan, sota ira nankebiteg, nankepilay, nankeki-ngoy i takday sha, tan sota nankekorab. No satan i pesing mo, <sup>14</sup> kosto may imdeng mo. Tep sajay ira, eg sha kabaalan na onsobadit son si-kam ni inges nonta inpasing mo, isonga si Apo Shiyos i onsobadit son si-kam no timpo alin panbiyag mowan nonta ira totoon emati nonta bilin nen Apo Shiyos nontan den wara ired biyag pay laeng.”

<sup>15</sup> Waray sakey so ira nonta naydikob son Jesus; inteneng to sota inkowan nen Jesus sa “panbiyag mowan” et kowan to son Jesus ey, “Magesat ira di sota waren mek-likob nem timpon pantoshayan nen Apo Shiyos.”

<sup>16</sup> Say songbat nen Jesus so nontan na too, inalaw to shi sajay ya istoriya, ja kowan to ey, “Waray toon nanpiyasta ni ebadeg et engawis ni eshakil la totoo. <sup>17</sup> Nonta shanshani sota piyasta, engibetkag ni baga-en ton en mengikowan ira nonta na-awis sa bisita ey naysaganen emin, isonga angken ondaw da ira. <sup>18</sup> Nem emin ira sota na-awis, nanpangbal ira. Sota pilmiro, kowan to nodta inbetkag ni manpiyasta ey, ‘Waray tinongkal kon payew. Mesepol la ondawak, nak asen. Pangpangaasim, pasin-siya-imak.’ <sup>19</sup> Kowan ngo nonta sakey ey, ‘Enongkalak ni dimen paris sa bomalon nowang. Mesepol la ondawak, nak bisna-en. Pangpangaasim, pasin-siya-imak.’ <sup>20</sup> Jet sota sakey, kowan to ngo ey, ‘Ikaypangasawak, isonga ekak maka-edaw.’ <sup>21</sup> Sota baga-en, nay-oli et inkowan ton emin sota dason nonta ira istay to

odopen so nonta apo to. Jet sota apo to, bimonget et kowan to ey, ‘Kano-im, daw ka shima kalkalsara ni siyodad ja kesanopi ni totoo, jet angken sota ira nankebiteg, nankeki-ngoy i takday sha, nankekorab, tan nankepilay, olop mo di ira.’ <sup>22</sup> Simongbat sota baga-en ja kowan to ey, ‘Apo, tinongpal ko sota inkowan mo, nem ewaya pay laeng, angken eshakil pay aliy ondaw.’ <sup>23</sup> Jet kowan nonta apo to ey, ‘No kasta, daw ka shima dogad ja eg sinekapan ni siyodad, jet angken sota totoon asen mod shalan, pilit mon ewisen ira say ondaw ali ira et mepno iya baley ko. <sup>24</sup> Nem sota ira et ngo mowan na na-awis sa sigod, angken sakey son si-kara, enshiy mayda-kam ja mekikan.’ ”

*Kowan nen Jesus ey mannem-nem nin ira asan ireka onod son si-kato*

<sup>25</sup> Nontan, eshakil la pasiya i totoon emay-odo-odop son Jesus shi shalan. Nanposipos si Jesus et kowan to son si-kara ey, <sup>26</sup> “Sota toon ondaw ali ja kowan to ey manbedin ni took, mesepol la si-kak i wa-wa-shen patkan to, ja aliwen si ameto, ineto, asewa to, annak to, a-aki to, ono sota bakdang to shorog. No sota eshom i wa-wa-shen patkan to, eg maykeshin took. <sup>27</sup> Jet sota toon eg to enosan i kaybebaing to ono kebitay to maypangkep son si-kak, eg mebedin na manbedin ni took. <sup>28</sup> Mesepol la nemnemen to nin i pandikat to ali maypangkep son si-kak, asan ka-onod. Arig toy pannemnem ni toon mandeka ni baley. Simpri ontongaw nin jet kowinta-en to nem pigay kasto-en to, say amta-en to nem on-anay sota pilak to ingkatod meksheng sota baley. <sup>29</sup> Ta no iba-ngat toy towen ey enshiy on-anay ya kasto-en to, eg mebedin na meksheng sota baley. Kekshengan ni

itowen to so ira ni tokod, eg to ma itoloy. Jet emin ira sota menges-sas, damsisen sha, <sup>30</sup> ja kowan sha ey, ‘Sajay ya too, inshogi ton mengitakshel ni baley to, nem eg to posi-en na kekshengen.’ <sup>31</sup> Arig to mowan sota sakey ya ari ja sampolon diboy solsharo to. No sota kabakal ton ari, showen polon diboy solsharo to, simpri ontongaw nin ja kowinta-en to no on-anay i kedsang ni too ton onsango. <sup>32</sup> Jet no kowinta-en to ey eg mebedin na ebaken to sota sakey ya ari, mengibetkag ni mepangdo ja en mekitongtong, sakbay ya eg nayshogi nin i kobat. <sup>33</sup> Sajay i arig ni toon kowan to ey manbedin ni took. No waray banag ja wa-wa-sha son si-kato, ja aliwen si-kak i toka patki et ngo mowan, eg maykeshin took.

<sup>34</sup> “Isonga iyay i ibanshaan ko son si-kayo. Say asin, mapteng. Nem no ma-enshi i pait ni asin, ja entamnay ma, eg maymowan. <sup>35</sup> Enshiy to ka-osalan: ngaaw wa para bo-day tan eg maydaok shi abono. Kenshat ta may-ibong. Niman i waray waya jon mengit-neng niya banshaan ko. Isonga singpet jon itenengan.”

## 15

*In-arigan nen Jesus ira ni shownen arig pay say balang nem manbebawi ira ni basol sha*

<sup>1</sup> Idi sakey ya timpo, eshakil iray dimaw alin para singil ni bowis, tan sota eshom iren in-biyang ni karakdan tep kowan sha ey managbasol; dimaw ira son Jesus ja en nanteneng ni kowan to. <sup>2</sup> Jet sota ira Parisiyo tan mamaistoro ni dinteg ni Hodiyo, inkotot sha si Jesus, ja kowan sha ey, “Sajay ya too, inewat to ira sota totoon eshakil i basol sha, tan ekipangan pay son si-kara!”

<sup>3</sup> Jet si Jesus, in-arigan to ira, ja kowan to ey, <sup>4</sup> “Kaspangarigan ey waray nankalniro son si-kayo ni sandasos, nem ma-etiw i sakey, ngantoy pesing jo? Eg jo aya idekjas nin sota siyam ma polo tan siyam ja kalniro nodta pastolan et jo enapen sota sakey ya kalniron na-atiw, ingkatod sepolen jo? <sup>5</sup> Jet no sepolen jo, sakbaten jon i-akad et man-imdeng kayo ma. <sup>6</sup> Jet no i-akad jod baley jo, ta-walen jo ira sota kagajem jo tan inaskang jo, ja kowan jo ey, ‘Mandaladsak kito, ta simpol ko sota kalnirok ka na-atiw!’ <sup>7</sup> Say kowan ko son si-kayo, inges niyay i pandadsak nonta anghil shi dangit no manbebawi i sakey ya toon eshakil i basol to, nem say sota siyam ma polo tan siyam ja maronong, ja eg mesepol la manbebawi.

<sup>8</sup> “Kaspangarigan mowan ey waray bii ja waray sampolon palata to jet ma-etiw i sakey, ngantoy pesing to? Eg to aya enapen ja silwan shima emin na shogo? Si-si-an to pay i baley to, jet singpeten toy anap ingkatod sepolen to. <sup>9</sup> Jet no simpol to, ta-walen to iray kagajem to tan inas-askang to et ikowan to ey, ‘Mandaladsak kito, ta simpol ko sota palatak ja na-atiw!’ <sup>10</sup> Inges niyay i pandadsak nonta ira anghil nen Apo Shiyos no manbebawi i sakey ya toon eshakil i basol to.”

*In-arigan ira nen Jesus ni arig ja sota ama, kinaasi-an to sota anak ton naynemneman*

<sup>11</sup> Si Jesus, intoloy to, ja kowan to ey, “Waray sakey ya too ja waray showen dakin potot to. <sup>12</sup> Sota orishiyan, kowan to so nen amesha ey, ‘Tatang, al-en ko sota tawid kon ibingay mo son si-kak.’ Jet sota amesha, timolok, jet inpanbingay to sota tawid so nonta ira shownen potot to. <sup>13</sup> Idi

edabas i pigen akew, sota orishiyaw, indako to sota tawid to et dimaw shi arawin ili. Nem sota pilak to, kinasto to ni kaloko-an.<sup>14</sup> Binolbol ton emin sota oltimon pilak to, ey onsabi i bitil nodtan na ili ja dina'wan to.<sup>15</sup> Jet sinodngan ton en eki-iyaw shi sakey ya too nodtan na ili et inbetkag shen para pakan ni keshel.<sup>16</sup> Singa piyan to ngon mekikan ira nodta keshel, ta enshiy emengi-kan son si-kato ni kenen to.<sup>17</sup> Jet idi anon-gosto ma, naynemneman sotan na balodaki jet kowan ton shorog shi bakdang to ey, 'Si amak, eshakil i toka pandagbo-in too et sobday shaka pankena. Nganto emoy naka ka-eg-ekangid jay!<sup>18</sup> Agpos et ngo ey on-oli-ak shi kadnan nen amak et nak manpasinsiya son si-kato. Ikowan ko ey nanbasolak son Apo Shiyos tan son si-kato.<sup>19</sup> Ikowan ko ey ekak maykeshin anak to; no diket angken ibilang towak ka sakey ya baga-en to.' Kowan tod nemnem to.<sup>20</sup> Jet siya, dima-jat et on-akad ma ja on-oli son ameto. Nem idi nonta arawi pay laeng nodta baley sha, inimatonan nen ameton shagos et naysmekan. Kinano-an ton to inaspol et to inakdop et inongo-an to pay.<sup>21</sup> Kowan nonta anak to ey, 'Tatang, nanbasolak son Apo Shiyos tan son si-kam. Ekak ma maykeshin anak mowak.'<sup>22</sup> Nem say inpasing nonta ameto, kowan to so nonta baga-en to ey, 'Kano-iyoy, alejo di sota kamaptengan na baro et paibeshoyo! Singsingi jo pay, tan sapatosi jo!<sup>23</sup> Daw kayo, jo di shonshon sota kilaw wa baken inpatebayoy et paltiyo! Piyasta-en tayoy inmotok ni anak ko!<sup>24</sup> Sajay ya anak ko, kowan ko nem etey, nem iyay gayam ma sibibiyag. Istay ya nan-atiw, nem iyay ya nay-oli di!' Kowan nen ameto. Jet nayshogi may piyasta.

<sup>25</sup> "Nontan na oras, wara sota

pangodowan shi payew. Jet idi imesop med baley sha ni in-akad to, inteneng toy mosiko tan toon emandaladsak nodta naydaem ni baley.<sup>26</sup> Jet tine'wal to sota sakey ya baga-en sha, ja kowan to ey, 'Nganto ayay emankepasemak shi naydaem?'<sup>27</sup> Kowan nonta baga-en ey, 'Mimotok ali sota agim! Jet si tatang jo, inpalti-an to ni mateben baken kilaw, tep imoli alin sibibiyag.'<sup>28</sup> Nem epaladoy bonget nonta pangodowan jet enasneng nga onsekep. Sota amesha, bimo-day ali ja to inadok sota pangodowan ja onsekep ngon mekiladsak.<sup>29</sup> Nem sinongbatan to et si ameto, ja kowan to ey, 'On-im kari mango! Pigen tawen na nan-ob-obda-ak ja singa baga-en mo! Enshi pay i taka sinopngilan! Jet ngarantoy in-akan mo son si-kak? Angken komen kekanshing, say wara koma ngoy pandadadsakan mi ni kagajem ko, nem enshi met!<sup>30</sup> Nem satan na potot mo, inomas toy kameng mo shi dinedokon aramid, asan may-oli di, jet niman, inpalti-an mo mango ni mateben kilaw!'<sup>31</sup> Jet kowan nonta amesha ey, 'Anak ko, wara ka son si-kak ni olay shiya baley jet emin na wara son si-kak, singa kowinta ey kokowam.'<sup>32</sup> Mesepol la dag-en tayo iyay; pandadsak ka et, tep si agim, kowan ko nem etey, nem wara gayam ja sibibiyag. Istay nan-atiw, nem imoli di.' "

## 16

*Inkowan nen Jesus i pesing nga mengasto ni pilak shi mapteng nga banag*

<sup>1</sup> Wara pay i inkowan nen Jesus, ja kowan to so nonta ira too to ey, "Waray toon baknang; engala ni sakey ya mengimanshal ni obda to, nem idi sakey

ya akew, shinemag ton toka pangawngawa sota kokowa nonta baknang. <sup>2</sup> Inpa-odop to sota toon emengimanshal et inbag-an to, ja kowan to ey, 'Iyay i shamag ko pangkep son si-kam. I-odim alin emin sota inpiyal ko son si-kam; a-kalen taka med jay tep eg ka mepiyal.' Kowan nonta baknang. <sup>3</sup> Idi intenengan nonta toon emengimanshal, bimo-day et kowan to so ni bakdang to ey, 'Shanshanin a-kalen towak nonta apok shiya obdak. Ngaranto emoy pesing ko nem bilang ey makalak, ta ekak met onposin man-obda shi bo-day, tan embaingak ja mankekekshaw? <sup>4</sup> Ay, wára gayam i ninemnem kon pesing ko! No metongpal, eshakel ira sota kagajem ko et no ma-kalak shiya obdak, odopen sha-ak shi baley sha.' <sup>5</sup> Say inpasing to, inpa-odop to ira sota toon wáray otang sha so nen apo to et kowan to so nonta pilmiro ey, 'Pigay otang mo son apok?' <sup>6</sup> Kowan to ey, 'Say otang ko son apom, sandasos sa dineten daneb.' Kowan nonta emengimanshal ey, 'Iyay i disibom. Nem tongaw ken shagos et sa-datim ni dimen polo sota sandasos ja otang mo.' <sup>7</sup> Kowan to so nonta maykadwa ey, 'Si-kam ngay, pigay otang mo?' Kowan to ngo ey, 'Sandasos ja kaban na bekas.' Kowan nonta emengimanshal ey, 'Iyay i disibom et sa-datim ni wálon polon kaban.' <sup>8</sup> Sota emengimanshal la ma-owap, inetek nonta apo to ni katekal to.

"Sajay iren tood dobong ja eg emati son Apo Shiyos, edaing iren mengemag ni pamosposan nem say sota ira emati. <sup>9</sup> Osal joy wáren kokowayo ja onto-long ira niya toon maligdigat niman na timpo et no ma-bosan kayo, si Apo Shiyos i onsobadit son si-kayo shi dangit. <sup>10</sup> Sota toon emepiyal shi ootik ka banag,

mepiyal ngo shi ebadeg ga banag. Sota man-olbod shi ootik ka banag, ekarkaron man-olbod ngo shi ebadeg ga banag. <sup>11</sup> No eg kayo mepiyal la mengosal ni kokowa shiya dobong, eg ngo ipiyal nen Apo Shiyos son si-kayo i podnon kokowa to ja eg mepokaw. <sup>12</sup> No eg jo amten mengisingpet ni kokowa ni eshom ja naypiyal son si-kayo, eg jo namnama-en ey wáray ewaten jon sobadit jod dangit ja medepo son Apo Shiyos.

<sup>13</sup> "Say too, eg mebedin na showay pansilbi-an to. No ensemek to sota sakey, okesen to sota maykadwa; no ishayaw to sota sakey, bedawen to sota maykadwa. Isonga eg kayo mebedin na mansilbi son Apo Shiyos no pilak i wa-wa-sha son si-kayo." Kowan nen Jesus.

<sup>14</sup> Sota Parisiyo, epateg i pilak son si-kara; isonga idi intenengan sha iyay ya inkowan nen Jesus, inbi-wisan sha.

<sup>15</sup> Inkowan nen Jesus son si-kara ey, "Si-kayoy emengikokowan ey mapteng kayo et say i-etek shakayo ni totoo. Nem si Apo Shiyos, amta toy wáred nemnem jo, jet sota toon mengiredjaw ni bakdang to shorog, en-oges nen Apo Shiyos ja ishemshemang.

<sup>16</sup> "Sota bilin na insolat nen Moises, tan sota insolat ni para padto nonta bayag da, makedsang ingkato nonta timpo nen Juan ja para bonjag, jet niman men kawashak, say emaytoso, sota maypangkep ni pantoshayan nen Apo Shiyos, jet eshakel i masi-met ta on-awat so. <sup>17</sup> Nem enshiy mepokaw wa bilin nen Moises. No wára pay laeng iya dangit tan dobong, eg mepokaw i angken sakey ya naysolat ta bilin nonta bayag da.

<sup>18</sup> "Say sakey ya bilin nen Moises ja eg mebedin na mebediwan, kowan to ey say dakin mengisi-

jan ni asewa to, ja meki-esawa mowan, bimasol ja inges to sota emii. Inges to ngo met laeng, no sipa ngoy mengesawa nonta biin insi-jan sha, bimasol ja inges to sota emii.

<sup>19</sup> “Waray toon baknang; ebanol i baro to, tan en-amis i sira to ni inakew. <sup>20</sup> Wara ngoy toon ebiteg ja ebayabayang i bakdang to ja nanngaran ni Lazaro. Emante-tongaw ni olay iya ebiteg nodta sakepan nonta baknang, ja mengshaw. <sup>21</sup> Piyen to komen angken sota mogay mango koma ja makas shi damisaan nonta baknang, si-katoy kenen to. Jet sota ira aso, shaka jepojepoti sota bayang to. <sup>22</sup> Enshiy ebayag, etey iya ebiteg et indaw ira nonta anghil shi dangit ja kawad-an nen Abraham. Etey ngo iyay ya baknang et inbekara. <sup>23</sup> Dimaw shima kalikatan ja kowan sha ey Hadis. Idi ontangkak, inon-an tos Abraham shi arawin dogad, jet wara ngo si Lazaro. <sup>24</sup> Jet kimeljaw, ja kowan to ey, ‘Ama Abraham! Kaasi-imak, ibetkag mo di si Lazaro. I-eneng to diy angken sakey ya kalomot tod shanom, ta emag-anan i shilak ka pasiya! Naka mandikat ta pasiya shiya apoy!’ <sup>25</sup> Nem kowan nen Abraham ey, ‘Anak ko, nemnem mo kari iyay. Nonta wara ked biyag, wara son si-kam ma emin nontan i mesepol mo et kinenkenas mo. Nem si Lazaro nontan, enshin polos i mebedin to, jet kakaasin pasiya. Nem niman ngo, iyay shiya mapteng nga dogad ja emannam-ay, jet si-kam ngoy emandikat. <sup>26</sup> Tan sakey pay, iyay i naydeshek tan embanaw wa ejaokan; isonga eg mebedin na onbaliw kayo did jay, tan angken si-kami ngo, eg mebedin na ondaw kamid tan.’ Kowan nen Abraham. <sup>27</sup> Jet kowan nonta baknang ey, ‘Ama Abraham, kekshawen ko ngarod son si-kam ey

ibetkag mo ga si Lazaro shi baley nen amak. <sup>28</sup> Ta waray agik ka dima et to ira banshaanan, say eg sha ngo peshasan iya digat shiya kawad-an ko niman.’ <sup>29</sup> Nem kowan nen Abraham ey, ‘Sota akim, wara sota bilin nen Moises ja emankaitoro son si-kara, tan wara ira sota esel ni para padto. Sotan i onbanshaan son si-kara.’ <sup>30</sup> Kowan mowan nonta baknang ey, ‘Eg on-anay, Ama Abraham! Nem no waray manpewil la etey et ondaw son si-kara, mepnek ma ira ja manbebawi.’ <sup>31</sup> Nem kowan mowan nen Abraham ey, ‘No eg sha pati-en sota bilin nen Moises, tan sota ira esel ni para padto, angken waray manpewil la etey, eg sha met laeng pati-en.’ ”

## 17

*Basol i pengewis ni eshom ja manbesol*

<sup>1</sup> Kowan nen Jesus so nonta too to ey, “Waren kenshat i on-sabin panbesolan ni too, nem kakaasi sota toon mengi-kan ni panbesolan ni kait to. <sup>2</sup> Say pansigshan nontan na too ket, maono-an koma ni ebadeg ga bato et en mayteb-ok shima baybay. Pansigshan to ta engka-jas sotan na keshosa to nem say sota penosa nen Apo Shiyos son si-kato ja pengikesho to nontan na basol to, no istay engi-kan koma ni nanbasolan ira niya nankebabem emati son si-kak. <sup>3</sup> Isonga tanshaaniyon shorog i bakdang jo.

*Mesepol la pekawanan ira sota nanbasol son si-katejo*

“No sota kait mo ket, nanbasol son si-kam, bilin mo jet no itenengan toka ja manbebawi, pasinsiya-im. <sup>4</sup> Ket no manbesol son si-kam ni meminpito ni sanakew et sinshon manbesol son si-kam, ondaw alin en manpasinsiya ni meminpito, ja kowan to ey

manbebawi ni ngaaw wa dingka to, mesepol la pasinsiya-an mo.” Kowan nen Jesus.

*Epatag i pamati son Apo Shiyos*

<sup>5</sup> Idi sakey ya akew, kowan nonta ira apostol to ey, “Paba-deg moy pamati mi.”

<sup>6</sup> Simongbat si Apo Jesus ja kowan to ey, “No say kaba-deg ni pamatiyo ket may-eshig shi botil la ootilek, mebedin na ibetkag jo sota ebadeg ga kiyew ey, ‘Kagabot ka et kaymola ken shorog shima baybay!’, jet may-agpayso ja patien toy kowan jo.

*Sota mapteng nga nemnem nonta emansilbi so nen Apo*

<sup>7</sup> “Kaspangarigan ey waray baga-en ja inpangesharo ni apo to, ono inpanbantay to ni kalniro, ja imakad alin edapod obda to, aliwen ogadi tayo ey si-katoy mepangdon mengan nem say apo to. <sup>8</sup> Nem say ikowan jo son si-kato, ‘Ikamakamimak ni kenen ko tan inomen ko asan ka ngo mangan.’ <sup>9</sup> Jet sota baga-en, eg mesepol la pan-iyamanan mo i obden kinsheng to, ta si-katoy obda to. <sup>10</sup> Inges to ngo son si-kayo. No kinsheng jon emin i kowan nen Apo Shiyos ey dagen jo, eg jo koma nemnemen ey waray otang nen Apo Shiyos son si-kayo, no diket say ikowan jo koma, ‘Baga-en mokami bengat, Apo Shiyos. Saja dingka mi bengat, sota inkowan mo, enshiy eshom.’ ”

*Inpamapteng nen Jesus sota ira sampolon ebayabayang*

<sup>11</sup> Idi emandaw si Jesus shi Jerusalem, nanshalan shi nankinaw-an ni Samaria tan Galilia. <sup>12</sup> Nodtan na minotok ton dogad, waray sampolon too ja ebayabayang i bakdang sha. Sha inaspol si Jesus, nem naybetaw ira. <sup>13</sup> Isonga kimeljaw ira ja

kowan sha ey, “Jesus! Apo! Kaasi jokami!”

<sup>14</sup> Inon-an nen Jesus ira et kowan to ey, “Daw kayo, jo pa-sas i bakdang jo so nonta pari.”

Jet nonta wara pay laeng ired shalan ja ireka emandaw shi kadan ni pari, na-omas ma sota bayang sha. <sup>15</sup> Jet sota sakey son si-kara, idi inon-an ton mimapteng ma, nay-oli din epaladoy dadsak to son Apo Shiyos. <sup>16</sup> Dimaw ja en nantalimokod shi sango-an nen Jesus ni iyaman to. Sajay ya too ket, i-Samaria.

<sup>17</sup> Si Jesus, kowan to ey, “Aliwa ayen sampolo kayon mimapteng? Towa da ira sota siyam? <sup>18</sup> Apay eg mebedin ngo aya ja on-oli ira di ja en man-iyaman son Apo Shiyos? Saja aliwa et ngo mowan na kait tayon Hodiyos, si-kato bengat i nay-oli di.” <sup>19</sup> Jet say kowan nen Jesus son si-kato, “Dayat ka et angken ondaw ka. Sota pamatim, si-katoy minaptengan mo.”

*Sota itsora ni imotok mowan alin Jesucristo*

<sup>20</sup> Sota ira Parisiyo, inbag-an shes Jesus nem pigan aliy panshoki ni pantoshayan nen Apo Shiyos. Nem say insongbat nen Jesus son si-kara, kowan to ey, “Aliwen en ondaw alin waray amta-an jo so. <sup>21</sup> Enshiy en mengikowan ey ‘Asas mo! Iyay shiyay i pantoshayan nen Apo Shiyos!’ Tan enshiy en mengikowan ey ‘Imed man!’ Ta wara son si-kayo niman.”

<sup>22</sup> Kowan nen Jesus so nonta ira too to ey, “Waray timpon onsabi ali ja pandikat jo, jet piyan jon asen i angken san-akew wa pantoshay ko di. Nem eg mebedin. <sup>23</sup> Wara iray toon mengikowan son si-kayo ey, ‘Wares Cristo! Jo on-id man!’ Ono ikowan sha ey, ‘Iyed jay!’ Nem karejo patpati-en. <sup>24</sup> Ta say itsora ni idaw ali mowan

nonta kowan ni para padto ey Anak ni Too, ja mantoshay, inges toy bagidat ja silwan ton shagos i emin na naykayang. <sup>25</sup> Nem say pilmiro, mesepol la mandikatak nin ja pasiya, ta sota toon sina-kop kod ja dobong niman, eg sha-ak pati-en; ikowan sha et ey enshiy kenkenshat ko.

<sup>26</sup> “Say arig ni timpon idaw mowan ali nonta naypadton Anak ni Too, inges toy timpo nen Noe. Ta sota aramid ni totoo nontan den timpo to, inges to met laeng i aramid ali ni totoo ni idaw ko mowan ali, jet inges to mowan i idibag ni totoo. <sup>27</sup> Ta nonta aneng pay laeng sota dayos, enshiy shaka panshanagi ni inakew: ireka mengan, ireka menginom, ireka man-a-asawa — ingkato nonta simabi sota timpon simekep si Noe nodta barko to. Jet idi simabi ma sota dayos, etey iren emin. <sup>28</sup> Arig to pay sota tootod Sodoma nonta timpo nen Lot. Esiwat ira nontan da ni pangan sha tan inom sha; esiwat ira ni tongkal sha tan dako sha; esiwat ira ni mola tan amag ni baley. <sup>29</sup> Nem nontan na akew ja indekjas nen Lot i Sodoma, imoran alid naykayang ni apoy tan asopri jet binono ton emin ira sota tootod man. <sup>30</sup> Inges niyay met laeng aliy imotok nonta Anak ni Too ja palibidibag.

<sup>31</sup> “No onsabi sotan alin akew, sota toon naytompong nga mandibay shi bo-dayan, eg to koma nemnemen sota kokowa ton wared naydaem ni baley; eg koma onsekep ja en mengeda ni kompormin wara nodta naydaem ni baley to. Kasta met sota wared payew, eg to koma nemnemen ja on-oli nin shi baley to. <sup>32</sup> Nemnem jo kari sota epasemak so nonta asewa nen Lot nonta winingi to bengat sota ili ton Sodoma ja shaka pan-idekjas. <sup>33</sup> Sota toon

entapi toy biyag to ja kowan to ey ensikshal la metey, si-kato et ngo mowan i mepokaw i biyag to. Nem sota toon itolok toy bakdang ton metey, odi-en to met laeng sotan na biyag to ingkatod ingka.

<sup>34</sup> “Ikowan ko iyay son si-kayo. No sotan alin akew, odopen koy eshom ma too, nem sota eshom, bay-an ko. Jet no kaspangarigan ey kalebi-an, ket sota showen too i naytompong nga nan-arol shi sakey ya katiri, sota sakey, may-odop son si-kak, nem sota sakey, mebay-an. <sup>35</sup> Angken ngon sota showen biin maytompong nga emengiding, sota sakey, may-odop son si-kak, nem sota sakey, mebay-an. <sup>36</sup> Sota showa ngon daki ja maytompong nga wared payew, sota sakey, may-odop son si-kak, nem sota sakey, mebay-an.”

<sup>37</sup> Sota ira too to, inbaga sha ey, “Towen dogad Apo?”

Jet simongbat si Jesus ja kowan to ey, “No toway kad-an ni bangkay ni etey, si-kato ngoy kesanonpan ira ni kawang.”

## 18

*In-arig nen Jesus sota kowis ja enshiy kaasi to*

<sup>1</sup> Si Jesus, waray inkowan ton arig son si-kara say eg ira medismayen manshewat son Apo Shiyos, no diket manshewat ira son si-kato ni olay. Iyay sotan na arig; <sup>2</sup> “Wara konoy kowis shi sakey ya ili ja endedamsis tos Apo Shiyos, tan kasta met sota kaikowan ni kait ton too. <sup>3</sup> Jet wara ngoy ebalon bii nodtan na ili, ja kanayon na kaondaw son si-kato ja mengshaw ni kaasi, ja kowan to ey, ‘Apo, ibediwimak ka ta iman i kowan to ey memidiw ni kokowak.’ <sup>4</sup> Nem ebayag malen timpo, eg sinintil niyay ya kowis i shawat nonta biin eballo. Nem

idi emasig sota bii ni shawat to ni tolong, kowan nonta kowis shorog so ni bakdang to ey, 'Angken bilang ey endedamsis kos Apo Shiyos tan totoo, <sup>5</sup> ibaliwán kos iyay say ibi-jag ton ondaw ali ni olay, say eg towak ma notengen.' ” <sup>6</sup> Jet si Apo Jesus, intoloy to ey, “Nemnem jo iyay ya inpasing niyay ya kowis. Enshiy kaasi to, nem ibaliwán to ja biin emasig ni shawat to ni kaasi. <sup>7</sup> Jet si Apo Shiyos, mas pay todongan toy too ton memasig ja mengshaw son si-kato ni inakew tan dinadabi. Say kowan jo emo, eg to itenengan shagos aya i shawat jo? ” <sup>8</sup> Say kowan ko son si-kayo, si Apo Shiyos, aliston mengibediw so ni too to; isonga eg kayo koma medisdismaya. Enshiy showashowa maypangkep son Apo Shiyos, nem si-kayo mangon too, piga emoy memati pay laeng son si-kak ingkatod i-olik mowan ali?”

*In-arig nen Jesus sota shownen nanshawwat son Apo Shiyos*

<sup>9</sup> In-arigan nen Jesus ira sota toon kowan sha ey si-kara i sig-oradon mapteng mangoy aramid sha, jet kowan sha ey sota eshom, ayshi konoy kenkenshat sha. Jet kowan nen Jesus ey, <sup>10</sup> “Waray shownen too ja nan-inshas ja dimaw shi Timplo ja manshewat son Apo Shiyos. Sota sakey, Parisiyo; sota sakey, para singil ni bowis. <sup>11</sup> Dimayat sota Parisiyo jet kowan to shorog shi bakdang to ni shawat to ey, ‘Salamat Apo Shiyos, tep aliwén inges ko iya para singil ni bowis ja enshiy kenkenshat to. Selamat tep aliwén mapidiwak, aliwén malokdoko-ak, aliwén mabii-ak, ja inges toy aramid ni eshom. <sup>12</sup> Naka ngidinay meminshowa ni makadomingko ja naka ibiyang i pangan, tan emin na naka epita,

naka idaton pay i ikasampolo son si-kam.’ Kowan nonta Parisiyo ni shawat to. <sup>13</sup> Nem sota para singil ni bowis, dimayat shi naybetaw, ja embaing pay ya ontangkak shi dangit. Toka pay panpagpaga i pagew to ni toka panbebawi, jet kowan to ni shawat to ey, ‘Apo Shiyos, kaasi-imak ta eshakil i basol ko.’ ” <sup>14</sup> Jet intoloy nen Jesus ey, “Ikowan ko son si-kayo, sajay ya para singil ni bowis, si-katoy kinosto-an nen Apo Shiyos asan ka-akad shi baley to; nem sota Parisiyo, eg to kinosto-an. Sota toon mengingeto ni bakdang to shorog, si-kato et ngo mowan i maybeba; jet sota toon toka ibaba shorog i bakdang to, si-katoy mayshedjaw.” Kowan nen Jesus.

*Inpalobos nen Jesus ja ondaw ira di sota a-anak son si-kato*

<sup>15</sup> Sota eshom iren too, indaw shay angken nga-nga son Jesus, ta kowan sha ey say pishaten ton bindisiyonan ira. Nem idi inonan ira nonta too nen Jesus iyay, inseg-ang sha ira sota engidaw ali nonta a-anak. <sup>16</sup> Nem si Jesus, tina-wal to sota ira a-anak ja ondaw ali son si-kato jet kowan to so nonta ira too to ey, “Baybay-iyoy ira di sota a-anak ja ondaw ali son si-kak; eg jo iparit. Tep inges iren jay ya a-anak bengat ja ekombaba i mayda-kam shi pantoshayan nen Apo Shiyos. <sup>17</sup> Podno iya ikowan ko son si-kayo. No eg kayo mengewat ni pantoshayan nen Apo Shiyos ja inges toy kepengewat ni a-anak, eg kayo mayda-kam ja onsekep shi pantoshayan nen Apo Shiyos.” Kowan nen Jesus.

*Si Jesus tan sota baknang*

<sup>18</sup> Waray pangolo ni Hodiyo; inbag-an tos Jesus ja kowan to ey, “Maistoro, mapteng ken too. Ikowan mo ga no ngarantoy dag-



en ko say mewad-anak ni biyag ja enshiy to engintegan.”

<sup>19</sup> Simongbat si Jesus ja kowan to ey, “Ngantoy mosoka ikowani so ey maptengak? Abos nen Apo Shiyos ja mapteng. <sup>20</sup> Nem no maypangkep nonta biyag ja enshiy to engintegan ja inkowan mo, amtam sota ira bilin nen Apo Shiyos: ‘kareka memii ono mekileki, kareka memono, kareka mengibot, aliwen mo ba-ngaten ja man-a-sel ni aliwen kosto; tan shayaw mos inam tan si amam.’”

<sup>21</sup> Kowan nonta too ey, “Nontan pay laeng nga-nga-ak ingkato niman, inonod kon emin itan na bilin nen Apo Shiyos.”

<sup>22</sup> Idi intenengan nen Jesus iyay, kowan to ey, “Wara pay laeng i sakey ya kolang mo. Ilekong ira sota kokowam et sota dako to, iweshis mo so nonta ira nankebiteg. No sajay i pesing mo, say kawad-an ni kabaknang mo ma, naytalo shi dangit. Jet no meksheng nga sotan i pesing mo, kay-eshom ka di so ira niya took!”

<sup>23</sup> Nem idi intenengan nonta too iyay ya inkowan nen Jesus, ensakit ta pasiya i nemnem to, tep toka tepi-a i kabaknang ton pasiya.

<sup>24</sup> Inningning nen Jesus iyay ya too et kowan to ey, “Edigat ja onsekep i baknang shi pantoshayan nen Apo Shiyos! <sup>25</sup> Sota animal ja kowan sha ey camel, no kas-anoy kalikat to ja on-osok shi ebot ni shakom, mas edigdigat pay ya onsekep i babaknang shi pantoshayan nen Apo Shiyos!”

<sup>26</sup> Sota totoon engitneng niyay ya kowan nen Jesus, kowan sha ey, “No kasta, enshi ngarod i maysedakan?”

<sup>27</sup> Nem simongbat si Jesus ja kowan to ey, “Agpayson eg kabaalan ni toon mengisedakan ni bakdang to shorog, nem sota eg mebedinan ni toon dag-en,

mebedin na dag-en nen Apo Shiyos.”

<sup>28</sup> Kowan nen Pedro ey, “Karam ngo dibdibkan ey si-kami, indeks min emin i kokowa mi nonta nanbalinan min toom.”

<sup>29</sup> Jet si Jesus, kowan to son si-kayo. No sipay engilekjas ni baley to, asewa to, a-aki to, annak to, ono sota maka-anak son si-kato, maypangkep ni pantoshayan nen Apo Shiyos, <sup>30</sup> ebadbadeg ga pasiyay ewaten to niman na kawasha tod ja dobong, tan no man-onod alin akew, kon-oren to pay i biyag ja enshiy to engintegan.”

*Dinem-at mowan nen Jesus i mepesamak ali son si-kato*

<sup>31</sup> Inpata-nil nen Jesus ira sota sampolo tan showa ja apostol to et a-abos sha ma. Jet kowan to son si-kara ey, “Itnengi jo iya ikowan ko son si-kayo. Ondaw kito shi Jerusalem et emin sota insolat ira nonta para padto nen Apo Shiyos nonta bayag da maypangkep nonta kowan sha ey Anak ni Too, metongpal son si-kak. <sup>32</sup> Tep may-ewatak so nonta ira aliwen kait tayon Hodiyo. Sengsengkiten sha-ak, bebaingan sha-ak, toptopsha-an sha-ak. <sup>33</sup> Sepsepdaten sha-ak pay, asan sha-ak bono-a. Nem no maykatdon akew, manbiyagak mowan.”

<sup>34</sup> Nem sota ira too to, eg sha inewatan iyay, ta nay-emot i olog nontan na inkowan nen Jesus son si-kara. Eg sha amta nem ngantoy olog nonta inkowan nen Jesus.

*Inpan-asas nen Jesus sota toon ekorab ja i-jiriko*

<sup>35</sup> Idi nay-esop ma si Jesus shi Jiriko, wara ngoy toon ekorab ja timongaw nodta naykilig ni kalsara, ja emankekkekshaw.

36 Idi intenengan ton waray eshakil la toon eman-ekad shi kalsara, inbaga to, ja kowan to ey, “Ngaran ira niyay?”

37 Kowan sha son si-kato ey, “Si Jesus ja i-Nasarit, ondabas alid jay.”

38 Idi intenengan to iyay, kimel-jaw ja kowan to ey, “Jesus! Kaasimak, si-kam ma mengibengon son Ari David nonta bayag da!”

39 Sota toon epangdo ey si Jesus, inseg-ang sha sota ekorab, ja kowan sha son si-kato ey on-eket. Nem mina-ma to et ja inkedsang toy keljaw to, ja kowan to mowan ey, “Kaasi-imak, si-kam ma mengibengon son Ari David nonta bayag da!”

40 Kimi-neng si Jesus et kowan to ey, “Shawat jo did jay.” Jet idi navesop ma sota ekorab, inbag-an to, 41 “Ngarantoy piyan mon itolong ko son si-kam?”

Kowan nonta ekorab ey, “Apo, pan-asas mowak, say man-esasak mowan.”

42 Kowan nen Jesus son si-kato ey, “Mebedin na man-esas ka ma. Sota pamatim son si-kak, si-katoy kabol la pan-esasan mo.”

43 Jet nontan, nan-asas shagos, jet nay-eshom ma son Jesus. Jet idi inon-an ira nonta eshakil la totoo, inshayaw sha ngos Apo Shiyos.

## 19

*Binisita nen Jesus si Sakio ja para singil ni bowis*

1 Nanshalan shi Jesus shi Jiriko.

2 Waray baknang nodtan na siyodad ja apo ira nonta para singil ni bowis; say ngaran to, si Sakio.

3 Piyan ton asen nem sipa si Jesus, nem sina-dinan ira nonta eshakil la totoo, ta si Sakio, entikey ya too. 4 Isonga say inpasing to, nanbetik ja epangdo nodta shalan ey say sota ira totoo, jet kimalab shi kiyew wa kowan sha

ey sycamore, say asen tos Jesus

nem manshedan ali nodtan. 5 Idi pintek nen Jesus sota kadnan nen Sakio, tinangkak to jet kowan to ey, “Sakio, kano-im, japas ka di! Ta mesepol la ondawak shi baley mo, taka bisita-en niman.”

6 Kinano-an nen Sakio ja jimpas et eman-imdeng nga engolop son Jesus shi baley to.

7 Nem emin ira sota toon engasas son Jesus ni indaw tod baley nen Sakio, ireka onwanadegweg ja kowan sha ey, “Ngantoy dawán tod man aya? Dimaw wa en memisita nima toon enshiy kenkenshat to!”

8 Nem say kowan nen Sakio son Jesus, kowan to ey, “Apo, ninem-nem koy pesing ko niman! I-akan koy kagashowa ni kokowak shi nankebiteg, tan no sipa ira sota inda-karan ko ni singil ni bowis, bayshan ko ira ni memin-epat.”

9 Kowan nen Jesus so nen Sakio ey, “Say kaysedakan, simabi niman shiyay ya pamilja, ta saja inpasing mo, si-katoy ka-asan to ey si-kam ket agpayson anak shaka nen Abraham. 10 Si-kak sota kowan ni para padto nonta bayag da ey Anak ni Too, jet say kabol la inbetkagan towak so nen Apo Shiyos, say mengewisak nonta ira toon emantoshong shi keshosa-an sha say maysedakan ngo ira.”

*In-arig nan Jesus sota baknang ja inwaris toy pilak to so nonta ira бага-en to*

11 Nonta wares Jesus shi Jiriko ja nay-esop shi Jerusalem, kowan ira nonta karakdan na tootoon emengitneng son si-kato ey no onmotok si Jesus shi Jerusalem, mayshoki ma sota pantoshayan nen Apo Shiyos.

Nem say kowan to son si-kara, eg nin metongpal sota namnama sha. In-arigan to ira, ja kowan to ey, 12 “Waray baknang; ninemnem to ey ondaw shi arawin ili, ja shiman i ewatan to so ni kina-

ari to, asan ka-oli din on-akad, ja si-kato may mantoshay. <sup>13</sup> Idi shanshanin ondaw, inpa-odop to ira sota sampolon baga-en to ja pinispis to, jet inwárisan to ira ni sandedasos sa pilak ja ibiyakira ingkatod on-oli ali. <sup>14</sup> Nem sota ira totoo nodtan na dogad ja edapotan to, eg sha koston si-katoy mengitoshay koma son si-kara; isonga engibetkag ira ni en manriri nodta kowan to ey dawán to ja ewátan to so ni kina-ari to, ja kowan sha ey, 'Eg mi koston si-katoy mengitoshay son si-kami.' <sup>15</sup> Nem inpan-ari sha met laeng. Nay-olin imakad jet idi mimotok, inpa-odop ton shagos sota baga-en ton inwárisan to ni pilak, say asen to nem pigay kinanansiya shen inbiyaki-an. <sup>16</sup> Sota pilmiro, dimaw alin nanparang et kowan to ey, 'Apo, sota sandasos sa inpiyal mo son si-kak, nanbalin ni sandibo.' <sup>17</sup> Kowan nonta ari ey, 'Siya, mapteng i dingkam; mapteng ken baga-en ko. Kaka mepiyal la mengimanshal ni otik ka banag, isonga niman, panbedin taken mengitoshay ni sampolon siyodad.' <sup>18</sup> Sota maykadwén baga-en to, dimaw ngo alin nanparang et kowan to ey, 'Apo, sota inpiyal mo son si-kak ka sandasos, nanbalin ni dimen dasos.' <sup>19</sup> Kowan nonta ari ey, 'Manbedin ka ngon mengitoshay ni dimen siyodad.' <sup>20</sup> Nem sota sakey, nanparang ngo ali, jet kowan to ey, 'Apo, iyay sota sandasos sa inpiyal mo son si-kak. Dinibotan ko ni panjo et insingpet kon intalok. <sup>21</sup> Entakotak son si-kam tep palado ken too. Moka pan-al-a pay i aliwén kokowam, tan angken sota aliwén molam, moka pan-epita.' <sup>22</sup> Kowan nonta ari ni songbat to ey, 'Si-kam, eg ka mepiyal la baga-en ko! Sota inkowan mo, si-katoy kaybetayan ni keshosam! Amtam gayam ey palado-ak ka too, amtam ey naka

pan-epitay angken aliwén molak, amtam ey naka pan-al-ay aliwén kokowak. <sup>23</sup> Apay ngarod nga intalom i pilak ko? Angken koma, no inbebangkom, say niman alin inmotok ko, waray ewáten kon patang to!' <sup>24</sup> Jet kowan nonta ari so nonta ira too ton wara nodtan ey, 'Alejo ima pilak ka wara son si-kato et i-kan jo so nima baga-en kon sandiboy insapolan to!' <sup>25</sup> Nem kowan sha ey, 'Apo, wara met i sandibon pilak son si-kato.' <sup>26</sup> Kowan nonta ari ey, 'Ikowan ko son si-kayo, sota ira wa-wa-sha-anan, may-aknan pay. Nem sota ootik-anan, angken sota oltimon wara son si-kato, ma-da pay. <sup>27</sup> Jet niman, shosa-en ko ngo sota totoon simopngil son si-kak ja kowan sha ey eg sha koston si-kak i ari sha. Alejo did jay ira et bono jo ira! Asen koy kebonora.' "

<sup>28</sup> Sajay i arig ga inkowan nen Jesus son si-kara, asan ka-edaw shi Jerusalem, ja epangdo ey say si-kara.

*Edadsakan i totoo nonta mimotok si Jesus shi Jerusalem*

<sup>29</sup> Idi nay-esop ma shi Jesus shima dogad ja kowan sha ey Bitpag tan Bitania, ja osshong ni shontog ga kowan sha ey Olibas, engibetkag ni shownen too ton mepangdo. <sup>30</sup> Jet say inbilin to son si-kara, kowan to ey, "Daw kayod ma dogad ja naysongbob et no onmotok kayo, waray asen jon kilaw ni animal la donkey, ja naypagod. Sajay ya kilaw, eg pay laeng ekabkabajo-an. Okasiyo et alejo did jay. <sup>31</sup> No waray mengibeka son si-kayo no ngantoy joka pan-okasi so, ikowan jo ey, 'Si Apo Jesus, mesepol to.' "

<sup>32</sup> Jet siya, dimaw ira sota shadwa et simbira sota donkey ja inkowan nen Jesus son si-kara. <sup>33</sup> Idi shaka pan-okasi sota kilaw, kowan ira nonta makakokowa ey,

“Ngantoy joka pan-okasi so nita kilaw?”

<sup>34</sup> Kowan sha ey, “Si Apo Jesus, mesepol to.”

<sup>35</sup> Jet indara sota kilaw et indaw sha son Jesus. Jet sota ta-kep ni baro sha, in-ap-ap sha nodta beneg ni kilaw et inatngan shes Jesus sa mankebayo. <sup>36</sup> Dima-jat si Jesus et sota ira totoo, in-ap-ap sha ngoy baro sha nodta kalsaren panshalnan ali nen Jesus.

<sup>37</sup> Idi nay-esop ma si Jesus shi Jerusalem, nodta kalsaren onshalong shi shontog ga kowan sha ey Olibas, sota ira eshakil la too to, ireka man-imdeng nga pasiya, jet nan-iyaman ira son Apo Shiyos maypangkep nonta kaskasshaaw wa milagron dingdingka nen Jesus ja inon-an sha. Inkedsang shay keljaw sha, <sup>38</sup> ja kowan sha ey, “Bindisiyonan koma nen Apo Shiyos iya arin inbetkag to di. Sikatoy en ali mengi-kan ni talna ja edapo son Apo Shiyos! Shayaw son Apo Shiyos ja Kangeto-an!”

<sup>39</sup> Nem sota ira eshom ma Parisiyo ja naydaok nodta eshakil la totoo, kowan sha son Jesus ey, “Maistoro, selkag mo ira ta toom! Angsan i shayaw sha!”

<sup>40</sup> Simongbat si Jesus ja kowan to ey, “Mesepol la waray manshedjaw niman. No on-eket ira ja too, maysa-dat i baton onkeljaw ja manshedjaw!”

<sup>41</sup> Nay-esop ma shi Jerusalem si Jesus jet idi osshongan to, inangis toy toka pengisakit so ni totood man, ja kowan to ey, <sup>42</sup> “Sikayon tood Jerusalem, amtayo komay kasapolan jo say may-aknan kayo ni talna! Nem ayshi met, eg mebedin na amta-an jo! <sup>43</sup> Wara aliy timpon pandikat jo. Sota ira kabakal jo, diktoben shakejo ni mebedjag jet enshiy delstotan jo. <sup>44</sup> Sheshalen shen oltimoy siyodad jon Jerusalem, tan angken si-kayo ngon too ja wared jay. Angken

sakey ya bato, eg sha bay-an na on-onong shi sigod ja nay-aman to. Emin iyay, mepesamak son si-kayo tep eg jo indasin iya timpon kowan nen Apo Shiyos ja kaysedakan jo!”

*Shinagshag nen Jesus ira sota emandeko nodta Timplo*

<sup>45</sup> Idi mimotok ma si Jesus, simekep shi Timplo et shinagshag ton inpabo-day ira sota emandeko nodtan. <sup>46</sup> Kowan to son si-kara ey, “Say kowan ni esel nen Apo Shiyos ja naysolat nonta bayag da, kowan to ey sajay ya baley nen Apo Shiyos, pankekshawan ni totoo son si-kato. Nem inpanbalin jo et ni singa amotan ni tolisan!”

<sup>47</sup> Si Jesus, nantoro ni inakew shi Timplo. Nem sota ira apo ni papashi, mamaistoro ni dinteg ni Hodiyo, tan sota eshom iren pangolo ni Hodiyo, piyan shen pasiya ja bono-en si Jesus. <sup>48</sup> Nem enshiy shaka nemnemen pesing sha, tep eshakil i totoon na-awis, ja pipiyan shen mantetneng ni emin na ikowan nen Jesus.

## 20

*Sinongbatan nen Jesus ira sota eg makakosto ni dingdingka tod Jerusalem*

<sup>1</sup> Idi sakey ya akew, si Jesus, emantosho shi Timplo, tan emengikowan ni mapteng nga shamag ja toka itodtoro ni olay so nonta ira totoo. Jet nontan, sota apo ni papashi, mamaistoro ni dinteg ni Hodiyo, tan sota ira eshom ma pangolo ni Hodiyo, dimaw ngo ira di. <sup>2</sup> Jet kowan sha son Jesus ey, “Sipay engikowan ey dag-en mo ira ta moka dagdag-a shiya Jerusalem? Sipay engibetkag son si-kam?”

<sup>3-4</sup> Simongbat si Jesus ja kowan to ey, “Ibag-an takejo ngo nin. Ikowan jo son si-kak nem sipay engibetkag so nen Juan ja en

memonjag nontan — nemnem to ngo shorog, ono si Apo Shiyos?”

<sup>5</sup> Nem sota ira pangolo ni Hodiyo, nantatabtabal ira ja kowan sha ey, “No ikowan tayo ey si Apo Shiyos, mesampolo kito tep ikowan to ey, ‘No kasta, apay nga eg jo ngarod pinati si Juan?’” <sup>6</sup>Nem no isongbat tayo ey nemnem ngo nen Juan, saja ira eshakil la too, batoy pemonora son si-katejo, ta shaka pati-a ey si Juan, podnon inbetkag ali nen Apo Shiyos.” <sup>7</sup>Jet say songbat sha so nen Jesus, kowan sha ey, “Tawey, eg mi amta no sipay engibetkag so nen Juan ja emonjag.”

<sup>8</sup> Jet kowan ngo ma nen Jesus son si-kara ey, “Angken ngon sikak, ekak ikowan son si-kayo no sipay engibetkag son si-kak ja mandeka niya naka dagdag-a niman.”

*In-arig nen Jesus sota makedsel la inpangajowan ni makabo-day*

<sup>9</sup> Si Jesus, in-arigan to sota ira totoo, ja kowan to ey, “Waray toon nanmola ni obas shi embanaw wa gardin to. Inpa-ajowan to so ni eshom et dimaw ma shi arawin ili.” <sup>10</sup> Idi simabi sota timpon pekibingay to nonta obas, engibetkag ni baga-en ton en mengeda nonta bingay to so nonta ira engajowan. Nem sota engajowan, sinepseptat sha sota baga-en na inbetkag nonta makakokowa, tan inpa-odiren enshiy sha in-akan. <sup>11</sup> Sota makabo-day, engibetkag mowan ni eshom ma baga-en to, nem inges to met laeng nga sinepseptat nonta engajowan nonta gardin, tan binebaingan sha pay. Inpa-odiren enshiy sha in-akan. <sup>12</sup> Engibetkag sota makabo-day ni baga-en to nonta maykepintedo, nem iso met laeng nga sinokat sha, asan shaka shagshaga. <sup>13</sup> Anongosto ma ey sota makabo-day, kowan to ey,

‘Ngarantoy pesing ko aya? Ense-mek ko iya anak ko, nem ibetkag ko ga, tep mebedin emon ibaingan sha.’ <sup>14</sup> Nem idi inon-an ira nonta engajowan sota mismom anak nonta makabo-day, nantatabtabal ira ja kowan sha ey, ‘Sajay sota anak nonta makakokowa niya gardin na tayoka pan-obda-i. Bono-en tayo et say saja bo-day ya tawid to koma, kokowa-en tayo ma.’ <sup>15</sup> Inkoyod sha nga agpayso sota anak nonta makabo-day nontan et inbo-day sha nodta alad et binonora.” Kowan nen Jesus ni arig to.

Jet nontan ma, kowan nen Jesus ey, “Nganto emoy pesing nonta makakokowa nontan na bo-day so nonta ira toon inpangajowan to? <sup>16</sup> Simpri ondaw ali et bono-en to ira jay ya too ngo, jet ipiyal to sota bo-day so ni eshom ma mengajowan so.”

Nem sota totoon in-arigan nen Jesus, idi intenengan sha iyay, kowan sha ey, “Enshi! Eg dag-en nen Apo Shiyos itan!”

<sup>17</sup> Nem si Jesus, inningning to ira asan toka ibeka ey, “No kowan jo ey eg dag-en nen Apo Shiyos itan, ngarantoy joka pengiodog ngarod nonta naysolat nonta bayag da, ja kowan to ey, ‘Sota baton binedaw ira nonta para amag ni baley, ja kowan sha ey enshiy silbi to, si-kato et ngo mowan gayam i epateg ga bato so ni emin?’” <sup>18</sup> Jet angken sipen too ja maysokbab nodtan na bato, mekosot; tan no sipay tedteshan to, memisit.”

<sup>19</sup> Edawag ey sota mamaistoro ni dinteg ni Hodiyo tan sota ira apo ni papashi, si-karay naytorongan nonta arig ga kowan nen Jesus. Isonga kowan sha ey eskelen sha si Jesus nontan na oras, nem entakot sha ira sota totoo.

*Pineshas shen saolen si Jesus maypangkep nonta bayad ni bowis*

<sup>20</sup> Piyan shen timpo-an na sesken, isonga engibetkag ira ni toon meniim son si-kato ja kowan sha ey, “Daw kayo, ja singa podnoy jo ibaga son si-kato. Balang nem waray ikowan ton kabol la pengidawan tayo son gobinarol.”

<sup>21</sup> Jet sota emeni-siim son Jesus, kowan sha ey, “Maistoro, amta mi ey podno sota moka ikokowan tan moka itoro. Amta mi pay ey enshiy moka pabori, angken ngantoy katoo to, tan say moka itoro ni olay, sota podnon piyan nen Apo Shiyos ja dag-en ni totoo. <sup>22</sup> Jet ikowan mo ga no maypeshit shi dinteg tayon Hodiyois i panbedjad tayo ni bowis so ni gobirnod Roma, ono enshi.”

<sup>23</sup> Nem si Jesus, amta to ey olbod sha iyay, isonga kowan to son si-kara ey, <sup>24</sup> “Ipa-sasimak ni salepi. Sipay makadopa niya naymalked ja pilak? Tan sipay makangaran niya naysolat?”

Simongbat ira ja kowan sha ey, “Sota ari shi Roma.”

<sup>25</sup> Jet kowan ma nen Jesus son si-kara ey, “No kasta, sota pilak ja joka osala, edapod gobirno ni Roma, isonga mesepol met laeng nga pa-odiyo son si-kara. Sota kowan ni gobirno ey may-ekan son si-kara, mesepol la maytongpal, jet sota kowan ngo nen Apo Shiyos ey may-ekan son si-kato, mesepol ngon mepati.”

<sup>26</sup> Piyan shen waray pankamalian tod sango-an ira nonta karakdan, nem enshi. Ireka messhaaw nonta songbat to, jet inbi-jag sha may bagabaga son si-kato.

*Pineshas sha mowan si Jesus maypangkep nonta panbiyag mowan ira nonta nanketey*

<sup>27</sup> Waray Hodiyois iren kowan sha ey Sadosiyo, ja say pamatira, kowan sha ey eg kono manbiyag

mowan i nanketey. Dimaw ngo ira di son Jesus jet sha inbag-an ja kowan sha ey, <sup>28</sup> “Maistoro, say insolat nen Moises nonta bayag da ja dinteg tayon Hodiyois, kowan to ey no sota dakin engasewa ket metey ja enshiy potot to nodta asewa to, sota agi nontan na dakin etey, si-katoy mengelbat nonta istay asewa to say balang nem waray enaken sha. Jet sota anak sha, maybidang ey singa potot nonta etey den agi to. <sup>29</sup> Iyay i piyan min ibaga. Nontan da kono, waray piton san-a-aki, jet sota pangodowan, engasewa; nem etey ya enshiy to inpotot. <sup>30</sup> Jet sota maykadwen agi to, inelbat to sota asewa nonta agi ton etey, nem etey mowan sofa daki. <sup>31</sup> Kasta met sota maykatdon dakin agi sha, si-kato ngoy engelbat mowan, nem iso met laeng nga etey mowan ja enshiy to inpotot nodta bii. Jet emin ira jay ya piton san-a-aki ja nansasa-dat ja engasewa nontan na bii, etey ira ja enshiy sha inpotot. <sup>32</sup> Jet shi ka-onoran, etey kono ngo sota bii. <sup>33</sup> Sajay i piyan min ibaga son si-kam, ta no bilang ey onsabi ali sota timpon pan-ongal ira ni nanketey, sipa emoy koston makasewa ali so nontan na bii? Ta nan-i-inelbat met ira sota piton san-a-aki ja engasewa son si-kato.”

<sup>34</sup> Simongbat si Jesus ja kowan to ey, “Sota daleki tan bibii shiya dobong, ireka emengesawa. <sup>35</sup> Nem sota totoon ikari nen Apo Shiyos ja pan-ongal to, ja maniyanyan ali shi dangit, eg ira mengesawa nontan alin timpo. <sup>36</sup> Eg ira ma metey shiman, tep inges shay anghil nen Apo Shiyos. Annak ira nen Apo Shiyos tep nan-ongal ira. <sup>37</sup> Nem sigosho eg jo pati-en ey manbiyag mowan i nanketey. Angken si Moises nonta bayag da, toka penekneki ey say toon etey, manbiyag mowan. Nonta bayag

da, insolat toy mismon intenengan to ja esel nen Apo Shiyos ja edapo nodta emanshedang nga kadasan, ja kowan to ey, 'Si-kak si Apo Shiyos ja Shiyos shi Abraham, Isaac, tan si Jacob.' <sup>38</sup> Piyon ton aselen ngarod ey angken etey mangon ebayag i bakdang shi Abraham, kowan nen Apo Shiyos ey mabiday ired sango-an to. Ta no enshi koma, istay eg to inkowan ey si-katoy Shiyos sha. Emin na too — angken sota ira nanketey — kaibilang nen Apo Shiyos ey wára pay laeng ired biyag."

<sup>39</sup> Sota eshom ma maistoro ni dinteg ni Hodiyo, kowan sha ma ni abos ey, "Mapteng itan na insongbat mo, Maistoro." <sup>40</sup> Jet polos malen eg sha intoled ja nansalodsod mowan son si-kato.

<sup>41</sup> Kowan nen Jesus son si-kara ey, "Apay ngarod nga kowan sha ey sota inkari nen Apo Shiyos ey ibetkag to din mengisedakan ket medepo bengat shi poli nen Ari David nonta bayag da? <sup>42</sup> Ta angken si Ari David shorog, inkowan tod dibsho ni Salmo ey,

'Si Apo Shiyos, inkowan to so nonta pangolok ey ontongaw si-kato shi apit ni kanawan to, <sup>43</sup> ingkatod enshiy mebedin nonta kabakal to, ja wára ma ired shalokap ni shapan to.'

<sup>44</sup> Jet no kowan nen Ari David ey pangolo to sota mengisedakan, toway inpasing to ja kowan sha ey poli ali nen Ari David?"

<sup>45</sup> Idi maramen emantetneng ira sota eshakil la totoo son si-kato, kowan nen Jesus so nonta ira too to ey, <sup>46</sup> "Tanshaaniyo ira ja mamaistoro ni dinteg ta baka ma-edinan kayo. Pipiyon shen manbesho ni nankedayag ni sha panpasiyal, tan pipiyon sha pay ja rispito-en ni totoo ira ja semsemano-an shima malkaro ja karakdan ni too, tan shima sa-

nopan, pipiyon sha pay ja ontongaw shima naysaganen tongawan say mebigbig ira, tan agdalo no timpo ni piyasta, sotan i shaka pesing. <sup>47</sup> Manpa-otang ira mango nonta bibiin nankeballo jet no enshiy ibayad sha, piditen shen angken sota baley sha i ibayad sha. Jet no ondaw ired sa-nopan, say shaka pesing nga menadin ni kakedsel sha, shaka ishokey i shawat sha son Apo Shiyos, say ikowan ni too ey maronong ira. Nem amta nen Apo Shiyos et ebadbadeg i penosa to son si-kara!"

## 21

*Epateg sota in-akan ni ebalon bii*

<sup>1</sup> Nonta wára shi Jesus shi Timplo, inon-an to ira sota toon babaknang ja en engi-kas ni pilak sha nodta kakon ja kay-ini ni alos shi Timplo. <sup>2</sup> Jet wára ngoy sakey ya ebalon biin ebiteg ja en engi-kas ni showen sintimos. <sup>3</sup> Jet kowan nen Jesus so nonta ira too to ey, "Ikowan ko son si-kayo, sajay ya biin eballo, ja ebiteg ga pasiya, epatpatag sota in-akan ton alos to nem say sota eshom. <sup>4</sup> Ta sota ira eshom, sobda ni pilak sha i sha in-akan, nem sajay ya biin ebiteg, in-akan ton emin i oltimon wára son si-kato — angken sota istay panbiyag to koma."

*Indawag nen Jesus sota may-pangkep ni pantepos ni dobong*

<sup>5</sup> Sota ira eshom ma too to, ireka emantatababal pangkep nonta Timplo, ja kowan sha ey, "Mapteng nga pasiya i boya ni Timplo. Angken sota ira bato, mapateng i inkay-amag to, tan kasta met sota nay-amag nodtan ja in-akan ni too nontan da."

Nem si Jesus, kowan to son si-kara ey, <sup>6</sup> "Sajay ya Timplon joka pan-ishemang niman, wára

aliy timpon kesheshal to. Angken sakey so ira nima baton mapteng i inkay-amag to, enshiy en mebay-an shima nay-amagan to; meshe-shal la emin.”

<sup>7</sup> Jet inbaga sha ey, “Apo, pigan ali ita kowan mo? Jet nganto pay i amta-an mi so no shanshanin mepesamak itan?”

<sup>8</sup> Simongbat si Jesus ja kowan to son si-kara ey, “Nemnemnemen jo koma iyay. Karekayo pa-olbod so ni angken sipa, ta eshakil aliy toon mengosal ni ngaran ko, ja kowan sha ey si-kara si Cristo, ono kowan sha ey shanshaniy pantepos ni dobong. Nem karejo patpati-en. <sup>9</sup> No waray kobat tan kolo ja shemagen jo, karekayo onkel-ew. Tep kenshat ta mepesamak ira jay, nem aliwen sotan i ka-amta-an to ey shanshani may pantepos ni dobong.” Kowan nen Jesus.

<sup>10</sup> Jet intoloy ton kowan to pay ey, “Angken ili tan ili, mankokobat ira, tan angken pay sota ka-ili-ilin intorayan ni a-ashi, mankokobat ngo ira. <sup>11</sup> Wara pay ali i nankekedsang nga jegjeg, tan epalado aliy bitil tan manpansekit i totoo shi kedogadogad. Waray katetakot ta asen jon mepesamak shi naykayang, jet saja eshom ma mepesamak, waray isinjas to di.

<sup>12</sup> “Nem pedigaten shakejo nin ni totoo. Seskelen shakejo et i-ilaw shakejod baley ja kesa-nopi ni Hodiyo jet bistigalen shakejod man, jet ibalod shakejo pay. Jet ikoyod shakejo pay shi sango-an nonta ira ari, tan sango-an nonta ira gobinarol, ta too takejo. <sup>13</sup> Sotan i waya jon mengiringan na mengikowan son si-kara ni maypangkep son si-kak. <sup>14</sup> Karejo nemnemen ja mengisekana shagos ni isongbat jo son si-kara, <sup>15</sup> tep si-kak met laeng i mengikan son si-kayo ni koston isongbat jo tan daing jon man-a-sel.

Isonga sota makakontra son si-kayo, enshi son si-kara i makabaal ja mengebak son si-kayo; mesampolo et ira. <sup>16</sup> Sota ira a-akiyo, partido jo, kajem jo, tan angken pay sota ira maka-anak son si-kayo, si-kara met laeng i mengibaag son si-kayo so nonta ira makakontra son si-kayo say seskelen shakejo, jet sota eshom son si-kayo, bonoen sha. <sup>17</sup> Sota joka pemati son si-kak, si-katoy kabol la okesan shakejo so ni karakdan na too. <sup>18-19</sup> Nem anosiyoy, ta sota anos joy kaysedakan jo. Sigoradon eg kayo mepokaw ingkatod ingka.

<sup>20</sup> “No asen jon pandiktoba ni solsharo i Jerusalem, amtayo ma ey kenshat ta sheshalen sha i Jerusalem. <sup>21</sup> No mepesamak iyay, say pesing koma nonta ira wared Jodia ket onbetik ira et ja manbakwit shi shonshontog. Sota ira wared siyodad ni Jerusalem, manbakwit ngo ira, tan sota ira toon wara nodta aliwen sakop ni Jerusalem, eg sha koma nemnemen ja ondaw shiman. <sup>22</sup> Ta sajay alin akew, si-katoy ketongpal ni emin na insolat ni para padto nen Apo Shiyos nonta bayag da, ja inpactoren timpo ja penosa nen Apo Shiyos. <sup>23</sup> Sajay alin mepesamak, kakaasi ira din pasiya sota bibiin malokon, tan sota bibiin waray anak shen emenoso, tep digat ta pasiya i onmotok alid jay ya dogad! Si-kato aliy epaladon keshosa ni Hodiyo, ja totoo shiyay ya dogad. <sup>24</sup> Say eshom son si-kara, bonoen ni kabakal sha ni kumpulan, tan sota ira ebay-an, alen sha iren maybedod shi emin na ka-ili-ili. Jet sota toon aliwen Hodiyo, si-karay onkatin so ni Jerusalem, ingkatod kepospos ni timpon inkesheng nen Apo Shiyos ja penosara so ni Israel.

<sup>25</sup> “Waray katetakot ja mepesamak nima sekit, nima bolan, tan



sama talaw ira. Shiya dobong, emin na tood ka-ili-ili, onkel-ew ira; messhaaw iren pasiya tep makedsang i bongog ni baybay, tan kakembaleg i shadoyon to.<sup>26</sup> Onkapoy iray totoo ni takot sha ni shaka pansessesked no ngarantoy mepesamak shiya dobong, tep angken sota naykayang, mebediwan i itsora to.<sup>27</sup> Sajay nin i mepesamak, asan edaw ali sota Anak ni Too. Mismon asen sha-ak ni totoo ja madopan ali ni kolpot, tan asen sha pay i itsora ni bakdang kon emenenilin pasiya, tan asen sha ngo sota podnon panakabalin ko.<sup>28</sup> Isonga no asen jon emankepese-mak iyay ya inkowan ko, panimdeng kayo! Tangkak jo, tep shanshanin maywekas i digat jo.” Kowan nen Jesus iyay ya emin.

<sup>29</sup> Jet in-arigan to ira, ja kowan to ey, “Nemnem jo kari sota kadasan na kowan sha ey higos, tan angken pay sama ira eshom ma kait ton kadasan.<sup>30</sup> Shiya kad-an tayo, no asen jon emansimit i bolong to, amtayo ma ey shanshani sota timpo ni petang.<sup>31</sup> Say olog niyay, no asen jon meshoki-an na emanketongpal ira ja inkowan ko la, amtayo ma ey shanshani may pantoshayan nen Apo Shiyos.<sup>32</sup> Podno iyay ya ikowan ko son si-kayo. Saja ira too niman, eg ira nin metey, no diket sa-kopen shen emin ira jay ya mepesamak ali.<sup>33</sup> Sama naykayang tan saja dobong, mebedin na ma-enshi, nem saja esel la inkowan ko, kenshat ta metongpal, ja eg ma-enshi.”

<sup>34-35</sup> Jet si Jesus, binanshaanan to ma ira, ja kowan to ey, “Pantanshaan kayo. Karekayo mesiwat ni paspasiyal tan inom ni adak, ono mesiwat ni nemnemnem jo nem ngarantoy pesing jon manbiyag. Baka ondibag kayo ni imotok ko

di, tep mebiglen pasiya, ja inges toy kebkas ni katig. Messhaaw wa emin i tootoon wared ja dobong.<sup>36</sup> Isonga say kowan ko son si-kayo, mese-pol la esagana kayo ni olay. Panshawwat kayo son Apo Shiyos ni kedsang, say idasat jo iyay alin mepesamak, say manpeshang kayo ni anongosto son sikak ja kowan sha ey Anak ni Too.” Kowan nen Jesus.

<sup>37-38</sup> Si Jesus, no ka-akawan, kanayon na emantosho shi Timplo, tep kaonbowas iray tootoon en mantetneng son si-kato. Jet no mama-shem mala, kaon-oli ni olay shi shontog ga kowan sha ey Olibas, jet shiman i pandebi-an to.

## 22

*Bimaki si Judas ta ekitodag so nodta makakontra son Jesus*

<sup>1</sup> Shanshani nontan sota timpo ni piyasta ni Hodiyo ja kowan sha ey Paskowa.<sup>2</sup> Sota apo ira ni papashi ni Hodiyo tan mamaistoro ni dinteg ni Hodiyo, piyan shen pasiya ja bono-en si Jesus, nem entakot ira nonta tootoon eshakel ja na-awis son si-kato. Isonga ireka mengenap nontan ni pesing shen memono son si-kato.

<sup>3</sup> Si Satanas, sinairo tos Judas Iskariote ja sakey so nonta ira sampolo tan showne apostol nen Jesus.<sup>4</sup> Si Judas, dimaw ja en ekitbal so nonta ira apo ni papashi tan kowadja ni Timplo no ngarantoy pesing ton mengitosho ni kawad-an nen Jesus say seskelen sha.<sup>5</sup> Jet ireka manimdeng, tan shaka pan-akni ni pilak ja dagbo to.<sup>6</sup> Jet si Judas, ekitodag ey itoro to son si-karay kad-an nen Jesus nem saman na enshiy eshakel la totoo, say enshi komay kolo. Jet manshoki nontan, wara ni olay shi nemnem nen Judas Iskariote no toway pesing ton mengibaag so nen Jesus son si-kara.

*Sota ka-onoran na pekipengan nen Jesus so nonta ira apostol to*

<sup>7</sup> Shimanon sota akew wa shaka pengan ni tinapay ya enshiy daok ton para debag tan shaka pemalti ni kalniron sid-an sha nem Paskowa. <sup>8</sup> Jet nontan, si Jesus, inbetkag tos Pedro nen Juan, ja kowan to ey, “Daw kayo, jo isekana i penganan tayo nem ma-shem tep Paskowa ma.”

<sup>9</sup> Kowan sha ey, “Toway dawán min en pengisekana-an ni penganan tayo?”

<sup>10</sup> Kowan nen Jesus ey, “It-nengiyon pasiya iyay. No ons-abi kayod Jerusalem, waray dakin aspolen jo ja emasan ni salaw ja na-inan ni shanom. Onod jo nodta baley ya seskepan to, <sup>11</sup> jet ikowan jo iyay so nonta makabaley: ‘Kowan ali nen Maistoro ey towa konoy kowadton penganan to tan si-kamin too to niman na ma-shem, tep Paskowa?’ <sup>12</sup> Jet ipa-sas to son si-kayo i embanaw wa kowadto nodta naykayang, ja wara nodtan na emin i mesepol tayo. Si-katoy pengisekana-an jo ni kenen tayo nem ma-shem.” Kowan nen Jesus.

<sup>13</sup> Dimaw ira sota shadwa shi Jerusalem et siya, kosto noman na nay-agpayso sota kowan nen Jesus son si-kara. Jet insaganared man sota kenen sha nontan na ma-shem.

<sup>14</sup> Idi mama-shem mala, si Jesus tan sota sampolo tan showne apostol to, dimaw iren mengan nodtan. Timongaw ira, <sup>15</sup> jet si Jesus, kowan to son si-kara ey, “Piyán kon pasiya ja mekipengan nin son si-kayo niman na Paskowa, asan naka mandikat!

<sup>16</sup> Ikowan ko iyay son si-kayo. Sajay i ka-onoran na Paskowa ja pekipenganan ko. Enshi ma nin ingkatod metongpal i podnon olog ni Paskowa shi pantoshayan nen Apo Shiyos.”

<sup>17</sup> Inda nen Jesus sota tasa et nan-iyaman son Apo Shiyos, asan kowan to ey, “Iya, ko-ko-tik jon inomen iyay. <sup>18</sup> Ikowan ko iyay son si-kayo. Sajay i ka-onoran na penguinom ko ni shanom ni obas, jet ekak nin menginom ingkatod metongpal aliy pantoshayan nen Apo Shiyos.”

<sup>19</sup> Inda to sota tinapay et nan-iyaman son Apo Shiyos, asan toka showashowa-a. Jet in-akan to nodta ira apostol to, ja kowan to ey, “Sajay i bakdang kon itolok kon bono-en sha; si-katoy kaysedakan jon took. Si-kayo, itodtodyon jon mandilikob ja menowashowa ni tinapay, ja si-katoy penguineman jo son si-kak.”

<sup>20</sup> Jet idi naksheng iren engan, inda to sota tasa jet kowan to ey, “Manshoki ma niman, badoy pesing nen Apo Shiyos ja mengisedakan ni totoo, jet saja inomen jon wared tasa, si-katoy pengiroki to, ta sajay i shalak ka on-ayos ali nem meteyak. Sajay i on-ayos say maysedakan kayo.”

<sup>21</sup> Jet intoloy ton kowan to ey, “Nem niman, wáren ekilikob son si-katejo sota mengibaag son si-kak so nonta ira makakontra son si-kak! <sup>22</sup> Si-kak sota kowan ni para padto nonta bayag da ey Anak ni Too, jet sigod ja inkesheng nen Apo Shiyos ey mesepol la meteyak. Nem kaasi met laeng sotan na toon mengibaag son si-kak, ta meshosen pasiya!”

<sup>23</sup> Idi inkowan nen Jesus iyay, sota ira apostol to, nanbibinaga ira nem sipa son si-kara i ondaga so nonta kowan nen Jesus.

<sup>24</sup> Nansosongbat pay ira nem sipa aliy ibilang nen Jesus ey kangeto-an.

<sup>25</sup> Jet kowan nen Jesus son si-kara ey, “Say ogadi ira nonta mantoshay shima kompormin ili,

tan sota eshom ma toon nanken-gatoy saad sha, shaka ipakat i saad sha ni shaka pengitoshay met laeng so ni sinekohan sha. <sup>26</sup> Nem no si-kayo, aliwén inges nontan i pesing jo so ni sakey tan sakey son si-kayo. Sota pangolon kangeto-an son si-kayo, si-kato komay singa orishiyan ja ekom-baben man-obda ni pansigshan ni kait to. <sup>27</sup> Nemnem jo kari iyay. Si-pay engatngato — sota timongaw ja emengan, ono sota emengi-kan ni kenen to? Simpri sota toon timongaw wa emengan. Nem angken apo jowak, naka man-obda ni olay ni pansigshan jo.

<sup>28</sup> “Angken eshakil i digat ko, mapiyan kayon on-ono-onod son si-kak. <sup>29</sup> Si Apo Shiyos ja Amak, inkesheng to ey si-kak i mantoshay ni ka-onoran alin akew, jet si-kak ngoy mengigsheng ey mekitoshay kayo ali. <sup>30</sup> Mekiladsak kayo son si-kak ni pantoshay ko, tan ontongaw kayo pay ja mengigsheng ni panbenagan ni emin na Hodiyo ja poli nonta sampolo tan showa ja annak nen Israel.” Kowan nen Jesus.

<sup>31</sup> Jet waray inkowan to son Pedro ey, “Simon, Simon, iyay i ikowan ko son si-kam. Si Satanas, waray parang to ey pandikat shakejo, balang kono nem ma-adilaw kayo, say mansisijan kayon singa tineg-ap ni emenaap. <sup>32</sup> Mebedin na ma-adilaw ka Simon, ni sankan-atkan, nem inshawat ko son Apo Shiyos ey eg mekolpin onkapoy i pamatim. Jet no may-odi mowan i pamatim son si-kak, si-kam ngoy pekedsang so ni kait mo.”

<sup>33</sup> Simongbat si Pedro ja kowan to ey, “Apo, eg mebedin! Angken ibalod sha-ak, angken bono-en sha-ak, esagana-ak ja kadwa-en taka ni olay!”

<sup>34</sup> Kowan nen Jesus ey, “Ikowan ko iyay son si-kam Pedro: niman

na dabi, isaot mowak ni memintedo ja ikowan mo ey eg mowak am-amta, asan waray ontekok ja kawitan.”

<sup>35</sup> Jet kowan nen Jesus son si-karen emin ey, “Nonta inbetkag takejon enshiy jo inta-jon na pilak ono bayong ono sapatos, waray kolang ja kasapolan jo nontan?”

Simongbat ira ja kowan sha ey, “Enshi, waren emin.”

<sup>36-37</sup> Kowan ma nen Jesus ey, “Eg kayo nankolang nontan tep ensemek sha-ak nodta dinawan jo, isonga in-aknan shakejo. Nem niman, apil ma. Ta say nemnem ira ni totoo son si-kak niman, kowan sha ey sakeyak kono ngon enshiy kenkenshat to. Ta mesepol la metongpal son si-kak sota padto nonta bayag da ja kowan to ey, ‘Maybidang ey sakey ya bimasol.’ Isonga manshoki ma niman, no sipa son si-kayo i waray pilak to ono bayong to, ita-jon to koma. Tan no sipa son si-kayo i enshiy kampilan to, idako to komay baro to et menongkal ni sakey.”

<sup>38</sup> Jet kowan nonta ira apostol to ey, “Apo, asas mo! Iyay i showen kampilan!”

Kowan nen Jesus ey, “Kosto ma, enog.”

*Nanshawati si Jesus shi shontog ga kowan sha ey Olibas*

<sup>39</sup> Kanajon na kaondaw si Jesus shima shontog ga kowan sha ey Olibas jet idi bimo-day ira nodta baley ya enganan sha, inodop to ira sota apostol to et dimaw ira nodtan na shontog. <sup>40</sup> Idi mimotok ira nodta dogad ja kanajon na toka panshawati, kowan to son si-kara ey, “Panshawati kayo son Apo Shiyos ni kedsang say eg shakejo ebaken ali ni digat ja onsabi son si-kayo.”

<sup>41</sup> Idi inkowan to iyay, bintawan to ira ni ootik et nantalimokod ja nanshawati son Apo Shiyos, <sup>42</sup> ja

kowan to ey, “Ama, no mebedin koma, eg mo ipalobos iyay ya pandikat ko di. Nem say kowan ko, sota piyan mo, si-katoy metongpal, aliwén sota kostok.”

<sup>43</sup> Waray anghil ja edapod dangit jet to tinodongan si Jesus say onkedsang. <sup>44</sup> Emandikat si Jesus sa pasiya, isonga mas pay ya nanshawat ta pasiya son Apo Shiyos. Naydi-di-ngetan ja singa shalay toka pantedted.

<sup>45</sup> Idi imekwas ni toka panshewat, dimaw et to inon-an sota ira too to, jet simbi to iren na-ogip. Nabdey ira ni nemnemnem sha ni shaka pandeshingit. <sup>46</sup> Jet kowan to son si-kara ey, “Ngantoy? Na-ogip kayo? Bangon kayo, jet panshawat kayo son Apo Shiyos say eg shakejo ebaken ali ni digat ja onsabi son si-kayo.”

*Si Jesus, inshel ma nonta ira makontra son si-kato*

<sup>47</sup> Maramen eman-a-sel si Jesus ey onmotok aliy eshakil la totoo. Si Judas Iskariote, ja sakey so nonta ira sampolo tan showa ja apostol nen Jesus, si-katoy engibalnay so ira nonta eshakil la totoo. Insopan nen Judas si Jesus, ja kowan to ey to ongo-an.

<sup>48</sup> Nem kowan nen Jesus son Judas ey, “Ongo gayam i pengitoshom so nen si-kak so nita ira makontra son si-kak? Amtam met ey si-kak sota kowan ni padto nonta bayag da ey Anak ni Too!”

<sup>49</sup> Idi inamta-an nonta eshom ma too nen Jesus i mepesamak ali, kowan sha son Jesus ey, “Apo, palobosim kamin mengibediw son si-kam! Iyay ngoy kampilan mi!” <sup>50</sup> Jet sota sakey so nonta ira too nen Jesus, kinimpas toy kanawan na tangida nonta sakey ya бага-en ni kangeto-an na pari.

<sup>51</sup> Nem imesel si Jesus ey, “Kosto, enog!” Jet in-oli nen Jesus

sota tangida nonta too et nay-olin mimapteng ma sota tangida.

<sup>52</sup> Kowan ma nen Jesus so nonta ira apo ni papashi tan kowadja ni Timplo, tan sota eshom iren pangolo ni Hodiyoş ja en mengshel son si-kato ey, “Apay nga nan-etak kayo di tan waray pegas jo? Apay tolisan i kowan jo ey a-shelen jod jay?” <sup>53</sup> Inakew met ja wara-ak shima Timplo, ket apay nga eg jowak inshel nontan? Nem niman na kalebi-an met kitdi i timpoyo, tep si-katoy pan-obda nen Satanas!”

*Indibak nen Pedro ey am-amta to si Jesus*

<sup>54</sup> Singkel shes Jesus et indaw sha led baley ni kangeto-an na pari. Jet si Pedro, tinned to ira nem bimetaw. <sup>55</sup> Waray emenangshang nodta bo-dayan, jet nay-eshom ngos Pedro. <sup>56</sup> Nem idi on-an nonta sakey ya biin бага-en ni kangeto-an na pari si Pedro, inningning toy dopa ton esilwan nonta apoy et kowan to ey, “Angken si iyay met, kait nonta inshel sha.”

<sup>57</sup> Nem nandibak si Pedro, ja kowan to ey, “Keba-ba-ngata niyay ya bii! Apay am-amtak sotan na kowan mo!”

<sup>58</sup> Enshiy bayag to, wara mowan i daki ja engimatón son Pedro et kowan to ey, “Si-kam met i sakey ya too nontan na too.”

Nem kowan nen Pedro ey, “Moka ba-ba-ngatay esel! Apil, aliwén si-kak!”

<sup>59</sup> Idi epalabas i sakey ya oras, wara mowan i sakey ya toon emengipidit ja shinoyshoy to pay si Pedro, ja kowan to ey, “Ayshiy showashowa! Kenshat ta si-katoy sakey ya kait to did Galilia, tep si-katoy kait ton i-Galilia!”

<sup>60</sup> Simongbat si Pedro ja kowan to ey, “Enshiy amtak nita moka pan-ikowan!”

Jet idi maramen eman-a-sel pay laeng si Pedro, timekok i kawitan. <sup>61</sup> Jet nontan wimingi si Jesus et inshemang tos Pedro. Jet ninem-nem ma nen Pedro sota inkowan nen Jesus ey, “Isaot mowak ni memintedo, ja kowan mo ey eg mowak am-amta, jet no meksheng, wára ngoy ontekok ja kawitan.” <sup>62</sup> Jet si Pedro, dimaw shima powisha ja epaladoy nangis to tep naydaw-an.

*Si Jesus, binistigal ira nonta makakontra son si-kato*

<sup>63-64</sup> Sota ira emanbantay so nen Jesus, shaka sengsengkita: inopopan shay mateto, asan shaka shengshengpela, jet kowan sha ey, “Sipay enengpel son si-kam? Tiga, ipadtom ka!” <sup>65</sup> Tan eshaket pay i inkowan shen ngaaw son si-kato.

<sup>66</sup> Idi ewá-wá, esa-nop sota ira pangolo ni Hodiyo, pati sota ira apo ni papashi, tan sota ira mamaistoro ni dinteg ni Hodiyo. Jet insekep shes Jesus et insango sha son si-kara met laeng. Jet inbag-an sha, ja kowan sha ey, <sup>67</sup> “Ipodnom no agpayson si-kam sota inkari nen Apo Shiyos nonta bayag da ey ibetkag to alin mengisedakan!”

Nem simongbat si Jesus ja kowan to ey, “No ikowan ko, eg jo met laeng pati-en. <sup>68</sup> Jet no ibagan takejo ngo, eg jowak met songbatan. <sup>69</sup> Nem iyay i ikowan ko son si-kayo. Si-kak sota inpadtora nonta bayag da ey Anak ni Too et shanshani men mekitongawak son Apo Shiyos ja Manakabalin, ja nak ngo mantoshay.”

<sup>70</sup> Jet kowan sha ma ey, “No kasta ngarod, kowan mo ey si-kam i Anak nen Apo Shiyos?”

Simongbat si Jesus ja kowan to ey, “Sota inkowan jo, si-kato.”

<sup>71</sup> Kowan sha ma ey, “Eg mese-pol la wára pay i sistigo! Intenen-gan tayon mismoy kowan to!”

## 23

*Binistigal nen Gobinarol Pilato si Jesus*

<sup>1</sup> Jet emin sota ira esa-nop pa toray, intolod shes Jesus shi kadan nen Gobinarol Pilato, <sup>2</sup> jet insodsod sha son Pilato sota kowan sha ey basol nen Jesus, ja kowan sha ey, “Sinokalan mi iyay ya too, ja toka pan-ewisen emin i too mi ey angken eg ira manbedjad ni bowis so ni gobirnoyod Roma, tan kowan to pay ey si-kato sota arin inbetkag ali nen Apo Shiyos ja mengisedakan kono son si-kamin Hodiyo.”

<sup>3</sup> Inbag-an nen Pilato si Jesus ja kowan to ey, “Jet si-kam sota ari ni Hodiyo?”

Simongbat si Jesus ja kowan to ey, “Sota inkowan mo, si-kato.”

<sup>4</sup> Jet kowan nen Pilato so ira nonta apo ni papashi tan sota kait shen eshaket ey, “Enshi met i sinepolan kon ngaaw wa aramid niyay ya too.”

<sup>5</sup> Nem ema-ma et ja shaka panipilit, ja kowan sha ey, “Si-katoy emengi-kan ni kolo, manipod shi Galilia tan intiron Jodia ingkato did jay!”

<sup>6</sup> Idi itenengan nen Pilato iyay, inbaga to nem agpayson i-Galilia si Jesus. <sup>7</sup> Jet idi inamta-an to ey edapos Jesus shi Galilia ja sakop ni intorayan nen Hirodis, inpaitolod to son Hirodis, tep naytompong ngon wáred Jerusalem nontan na akew si Hirodis.

<sup>8</sup> Si Hirodis, eman-imdeng nga pasiya ni in-oney to son Jesus, ta ebayag ga shinemag toy may-pangkep son si-kato, jet piyan ton pasiya ja asen, balang nem wáray dag-en ngo nen Jesus ja milagro. <sup>9</sup> Jet eshaket i salodsod nen Hirodis son si-kato, nem eg sinongsongbatan nen Jesus.

<sup>10</sup> Jet sota apo ira ni papashitan sota mamaistoro ni dinteg ni

Hodiyos, kimedsang iren shaka panpebesolis Jesus. <sup>11</sup> Angken si Hirodis tan sota ira solsharo to, sinengsengkit sha si Jesus, ja dingkaren emin i piyan sha son si-kato. Jet say inpasing sha pay ni dedamsis sha, binesho-an sha ni mapteng nga singa baro ni ari, asan shaka pa-odi so nen Pilato. <sup>12</sup> Jet nontan na akew, nankajem si Hirodis nen Pilato ey istay ya kabakal ira da nontan.

<sup>13</sup> Idi mimotok ira shi kad-an nen Pilato, sina-nop to iray apo ni papashi, tan sota eshom iren toray ni ili, tan sota karakdan na totoo, <sup>14</sup> jet kowan to son si-kara ey, “Saja toon in-ilaw jo did jay, ja kowan jo ey pan-ewisay totoon eg memati ni bilin min i-Roma, binistigal ko shi sango-an jo et enshi met i emesokalin kowan jo ey ngaaw wa aramid to. <sup>15</sup> Angken si Hirodis, enshiy to sinokalan na basol to, isonga inpa-odi to di son si-kami. Edawag ey enshiy basol niyay ya toon to kebono-an. <sup>16</sup> Pesepdat ko bengat et maybodos ma.” Kowan nen Pilato. <sup>17</sup> (Inkowan to ey ibolos to, ta no sinshon piyasta ni Paskowa, waren kenshat i sakey ya pirison ibolos to so nonta ira totoo.)

<sup>18</sup> Nem emin ira sota eshakil la totoo, eg sha kosto. Shaka pan-ikeljaw ey, “Enshi! Bono jo iyay ya too! Ibodos jo dis Barabas son si-kami!” <sup>19</sup> (Saja si Barabas, naybalod ni dinodokon dingka ton maykontra shi gobirno, tan bi-mono pay.)

<sup>20</sup> Si Pilato, piyan ton istay si Jesus komay maybodos, isonga in-bag-an to mowan i totoo no piyan sha.

<sup>21</sup> Nem shaka et pan-ikeljaw ey, “Paidansam et shi koros! Paidansam et shi koros!”

<sup>22</sup> Jet kowan nen Pilato ni maykepintedo ey, “Ngantoy? Ngaran ni dingka ton ngaaw aya? Enshi met i sinepolan kon basol

ton kebono-an to. Pesepdat ko bengat et maybodos ma.”

<sup>23</sup> Nem ema-ma-ma et ja pilmiy keljaw ni totoo ja kowan sha ey, “Paidansam shi koros!”

Anongosto ma ey engabak i kelkeljaw nonta totoon eshakil: <sup>24</sup> si Pilato, inkowan to ey metong-pal sota kowan sha. <sup>25</sup> Inbolos tos Barabas ja naybalod maypangkep ni dinodokon dingka ton maykontra shi gobirno tan sota inpamono to. Tan in-awat tos Jesus so nonta totoo say dag-en shay pipiyan shen dag-en son si-kato.

### *Indansara si Jesus shi koros*

<sup>26</sup> Indara si Jesus et idi ireka man-ekad ja ondaw nodta kaydansa-an tod koros, inaspol sha sota toon si Simon i ngaran to, ja i-Sirini. Istay ondaw koma shi siyodad, nem inpasakbat sha et son si-kato sota koros, ja in-onod to son Jesus ni shaka pan-ekad.

<sup>27</sup> Jet eshakil iray totoon nay-olop son Jesus, tan waray eshom ma bibiin ekidaw ja epaladoy shaka pannengis ni darin-git sha son si-kato. <sup>28</sup> Winingi nen Jesus ira et kowan to ey, “Si-kayon bibiid Jerusalem, kare-jowak nengisan. Nangisi jo et i bakdang jo shorog tan sota ira annak jo! <sup>29</sup> Ta iyay aliy timpon pandikat ni totoo. Sotan alin timpo ja onsabi, ikowan ni totoo ey magesat iray bibiin enshiy anak sha, ja enshiy sha inpanoso. <sup>30</sup> Sotan alin timpo, manseskang i totoo, ja ikowan sha ey, ‘Si-kam ma shontog, karalshal ka di et taboki jokami!’ <sup>31</sup> Ta no medeka iyay shi embasen kiyew, ngantoy pesingan sha so ni emag-an? No sajay i dag-en sha son si-kak ka enshiy basol to, ngaranto emo ali ngoy mepesamak son si-kayo tan sota ira annak jo?” Kowan nen Jesus.

<sup>32</sup> Waray showen too ja inpaki-olop sha son Jesus ja sha pekibitay son si-kato, ta makedsel iren showa.

<sup>33</sup> Idi mimotok ired ma dogad ja kowan sha ey Toktok, indansara mes Jesus, tan sota showen makedsel, shi sanseskey ya koros. Sota sakey, wára nodta apit ni kanawan nen Jesus, tan sota sakey, wared apit ni kanigid to ngo.

<sup>34</sup> Kowan nen Jesus son Apo Shiyos ey, “Ama, pakawanim ira ja nandaga niya ngaaw son si-kak, ta eg sha amtay shaka pandag-a.”

Sota ira engilansa son Jesus, nanbobonot ira no sipay ontompong so nonta baro nen Jesus, asan shaka panbibingayi.

<sup>35</sup> Sota ira totoo, imalekey iren shaka panboja-a si Jesus ja naykoros. Jet sota ira toray ni Hodiyo, shaka sengengkita, ja kowan sha ey, “Insalakan to konoy eshom; tiga nem isalakan to ngoy bakdang to shorog! Kabedinan to no podnon si-kato sota shinotokan nen Apo Shiyos ja inbetkag to din mengisedakan!”

<sup>36-37</sup> Angken sota ira solsharo ja kowadja nodtan, shaka sengengkita, ja kowan sha ey, “Isedakan moy bakdang mo no agpayson si-kam i ari ni Hodiyo!” Jet shaka i-ang-angit ja i-aknan ni adak.  
<sup>38</sup> Tan wáray naysolat nodta koros to shi petek ni toktok to ja kowan to ey, “Sajay sota ari ni Hodiyo.”

<sup>39</sup> Sota sakey ya naykoros shi askang nen Jesus ja makedsel, ngaaw met laeng i inkokowan to son Jesus, ja kowan to ey, “Aliwen si-kam aya sota inbetkag ali nen Apo Shiyos ja mengisedakan? Isedakan mo shorog i bakdang mo — tan angken si-kami!”

<sup>40</sup> Nem sota sakey ya naykoros, inseng-ang to sota kadwa to ey, “Enshiy takot mo ni Shiyos? Kitejoka manketey ya tedo,

<sup>41</sup> nem kanebengan ta mangon mengikesho ni dingdingka ten ngaaw; si-kato, enshiy basol to!”

<sup>42</sup> Jet kowan niyay son Jesus ey, “Jesus, nemnem mowak nem manbedin ken ari!”

<sup>43</sup> Kowan ngo nen Jesus son si-kato ey, “Podno iya ikowan ko son si-kam: niman na akew, maydakam ken mandadsak son si-kak shi dangit.”

### *Etey si Jesus*

<sup>44</sup> Idi nonta alas dosi ni kakawan, nanbolinget nodtan na dogad ingkato nonta alas tris ni mama-shem, tep kolpin esa-dinan i sekit. <sup>45</sup> Jet sota masshel la kortina ja naysa-din nodta Kapatkan na kowadto shima naydaem ni Timplo, epi-kat ja nanshowa.

<sup>46</sup> Jet si Jesus, inkeljaw ton kowan to son Apo Shiyos ey, “Ama, ipiyal ko son si-kam i ispir-itok!”

Inkowan to iyay asan ma mbosi.

<sup>47</sup> Sota kapitan ni solsharo, inon-an ton emin iya epasemak et nanshayaw son Apo Shiyos ja kowan to ey, “Agpayso gayam ma maronong iyay ya too!”

<sup>48</sup> Sotan ira totoon dimaw ali ja nanboya ni inkatey nen Jesus, idi inon-an shen emin i epasemak, imakad iren shaka panpagpaggay pagew sha ni shaka pandeshingit. <sup>49</sup> Nem emin ira sota maka-amten mismo son Jesus, pati sota ira bibiin nay-olop son si-kato alid Galilia, ebay-an ira nodta naybabetaw, ta piyan shen on-an pay i mepesamak ali.

### *Indiyang sha si Jesus*

<sup>50-51</sup> Waray toon nanngaran ni Jose ja edapod ili ni Jodia ja kowan sha ey Arimatia. Mapteng i ogadi niyay ya too, tan si-katoy sakey ya emansesked ni isabi ali ni pantoshayan nen Apo Shiyos. Kaishayaw ni totoo ey mapteng

iyay ya too. Si-kato pay i sakey so nonta ira toray ni Hodiyo, nem eg to inonod i kowan nonta kait ton toray, ja dingdingkara son Jesus. <sup>52</sup> Dimaw si iya Jose so nen Pilato ja to kinshaw i bakdang nen Jesus. <sup>53</sup> Jet idi impas nen Jose sota bakdang nen Jesus nodta koros, dinibotan to ni empotin dopot jet in-ilaw to nodta baton diniyangan sha ja eg pay laeng na-osal, jet shiman i indiyangan to so. <sup>54</sup> Shanshani men mama-shem nontan, ja si-katoy panshoki ni akew wa panngidin ni Hodiyo.

<sup>55</sup> Sota ira bibiin nay-olop son Jesus alid Galilia, timened ira so nen Jose et inon-an shay naydiyangan ni bakdang nen Jesus tan sota itsora ni inkaysepa to. <sup>56</sup> Jet imakad ma ira ja ira mansekana ni emanseng-ew wa dana ja kowan sha ey ipoyok sha nodta bakdang nen Jesus. Idi ewa-wa, nan-inana ira tep si-katoy akew wa ngilin ni Hodiyo.

## 24

### *Nan-ongal si Jesus*

<sup>1</sup> Idi agsapen pasiya ni Domingko ja maykatdon akew, dimaw ira sota bibii nodta naydiyangan ni bakdang nen Jesus, jet engita-jon ira nonta insaganaren emanseng-ew wa dana. <sup>2</sup> Jet idi mimotok ira, inon-an shen epolig ja ima-adaw sota baton ebadeg ja istay naydekeb nodta diyang nga naydiyangan nen Jesus. <sup>3</sup> Simekep ira nodta diyang, nem enshiy sha simbin bakdang nen Apo Jesus. <sup>4</sup> Jet idi ireka manmodimodi bengat nodtan, ebiglen nanpa-sas i showen anghil ja singa too i itsora sha nem emeneniliy baro sha. <sup>5</sup> Sota ira bibii, injokmos shay dopara shi bo-day ta etakot iren pasiya. Nem kowan nonta showen anghil son si-kara ey, “Apay nga joka pan-enaped ja

kad-an ni etey i toon mabiday? <sup>6</sup> Enshi led jay, nan-ongal da! Nemnem jo kari: inkowan to met nonta wara kayo pay laeng shi Galilia; kowan to nontan ey, <sup>7</sup> ‘Si-kak sota kowan ira nonta para padto nonta bayag da ey Anak ni Too, nem mesepol la may-ewatak ma so nonta ira toon nankekedsel et bono-en sha-ak ja maydansa shi koros. Nem no maykatdon akew, man-ongalak met laeng.’ ”

<sup>8</sup> Ninemnem ma ira nonta bibii sota inkowan nen Jesus nontan da. <sup>9</sup> Indekjas sha sota diyang et nay-oli ired Jerusalem ja sha inkowan so nonta ira sawal ni sakey ya apostol nen Jesus tan so nonta eshom i emin na epasemak shi diyang. <sup>10</sup> (Say ngaran ira nonta bibiin en engikowan so nonta ira apostol nen Jesus, sa-jay: si Maria Magdalena, si Joana, tan si Maria ja ina nen Santiago, tan wara pay i eshom ma kait sha.) <sup>11</sup> Nem sota sodsod ira ni bibii, kowan nonta apostol ey notnotnot sha bengat et eg sha pinati. <sup>12</sup> Nem si Pedro, dimayat et bintik to lay diyang nga naydiyangan nen Jesus, jet idi ninggil to, sota naydibot shi bakdang nen Jesus bengat i wara. Jet nay-olin imakad ja toka nemnemema ja emin sota epasemak.

### *Nanpa-sas si Jesus so nonta showen too shi shalan*

<sup>13</sup> Nontan met laeng nga akew, waray showen too nen Jesus ja eman-ekad ja ondaw ired ma kowan sha ey Imaos. Sampolo tan showen kilometro i kabtaw tod Jerusalem. <sup>14</sup> Shaka pantabtabala i emin na epasemak nontan den akew. <sup>15</sup> Jet nonta maramen ireka mantabtabal, imesop si Jesus et nay-olop son si-kara. <sup>16</sup> Inon-an sha nem eg sha inimatonan.

<sup>17</sup> Imesel si Jesus ja kowan to ey, “Ngaran ni joka pantabtabala aya ni joka pan-ekad?”



Kimi-neng sota shadwá et masas shi dopara ey enshiy imdeng sha. <sup>18</sup> Jet sota sakey, ja nangaran ni Kliopas, kowan to ey, “Wara ka gayam shi Jerusalem niman ey eg mo amtay epasemek da nonta sajay den edabas sa akew?”

<sup>19</sup> Jet inbag-an ira nen Jesus ja kowan sha ey, “Ngarantoy epasemek?”

Simongbat ira ey, “Waray toon inbetkag ali nen Apo Shiyos: si Jesus i ngaran to ja i-Nasarit. Emin na totoo, kowan sha ey enshiy maka-inges son si-kato ni toka itoro tan toka dagdag-a. Angken si Apo Shiyos, inges to emo ngoy kowan to pangkep son si-kato. <sup>20</sup> Nem sota ira apo ni papashi tayo, tan sota ira eshom ma toray ni ili, in-awat sha so nonta ira toon i-Roma say mebono koma et binonora ja indansara shi koros. <sup>21</sup> Si-kato komay namnama min mengisedakan ni Israel, nem binonora met. Jet maykatdon akew to niman. <sup>22</sup> Nem iyay pay i badon shamag: wara konoy kait min bibii ja bimowas den dimaw nodta naydiyangan ni bakdang nen Jesus, <sup>23</sup> jet eg sha kono simbiy bakdang to. Nay-oli kono ira di et kowan sha ey inon-an shay anghil ja engikowan son si-kara ey nanbiyag mowan si Jesus. <sup>24</sup> Jet sota eshom ma kait mi, dimaw ira ngo ja sha inon-an, jet agpayso noman i inkowan nonta bibii. Nem eg sha inon-an si Jesus.”

<sup>25</sup> Kowan nen Jesus son si-kara ey, “Apay nganto et ngoy eg jo so pati-an na shagos ni emin na inkowan ni para padto nonta bayag da? <sup>26</sup> Say inpadtora, mesepol la da-kaman nonta ibetkag nen Apo Shiyos ja mengisedakan i digat ja inges nonta inkowan jo, asan ma mayshayaw shi dangit.” <sup>27</sup> Jet si Jesus, in-olog ton emin son si-kara sota naysolat nonta bayag

da maypangkep son si-kato, manshoki shi dibsho ira nen Moises tan emin na insolat ni para padto nen Apo Shiyos nonta bayag da.

<sup>28</sup> Idi imesop ira ma nodta dogad ja dawán nonta showa, si Jesus, istay emankaisi-jan ja singa wara pay i dawán to. <sup>29</sup> Nem inpeked sha ja kowan sha ey, “Ka-okip ked jay, ta mama-shem malen emankedabi ma.”

Jet inonod toy kowan sha. <sup>30</sup> Ekisengo si Jesus son si-kara shi damisaan, jet nontan, say inpasing to, inda to sota tinapay et nan-iyaman son Apo Shiyos et pinet-ing to, asan toka i-wat son si-kara. <sup>31</sup> Jet idi pineting to sota tinapay, binigbig sha ma ey si-kato gayam si Jesus! Nem nan-omas shi sango-an sha. <sup>32</sup> Kowan shen showa ey, “Aliwá aya ja singa waray dinekna ten singa apoy shi poso ta nonta tokitaka pantabtabala shi shalan, tan nonta toka pengi-odog ni naypadto nontan da?”

<sup>33</sup> Inedisto-an shen nay-oli shi Jerusalem et simbira sota sawal ni sakey ya apostol nen Jesus ja esa-nop, tan wara pay i eshom. <sup>34</sup> Jet idi onsekep ira, kowan nonta esa-nop pa too son si-kara ey, “Agpayso gayam ma nanbiyag si Apo Jesus! Nanpa-sas son Simon!”

<sup>35</sup> Jet insodsod ngo nonta showa i emin na epasemek nonta inkayolop nen Jesus son si-kara shi shalan, tan kowan sha ey, “Jet inimatonan min pasiya nonta pineting to sota tinapay!”

*Nanpa-sas ma si Jesus son si-kara*

<sup>36</sup> Idi maramen shaka panisodsod i epasemek son si-kara, ngaran ni wara gayam si Jesus shi nankawa-an sha! Kowan to son si-kara ey, “Talna i mewesha son si-kayo!”

<sup>37</sup> Etakot iren pasiya ta say wared nemnem sha, kowan sha ey banig i inon-an sha.

<sup>38</sup> Nem kowan nen Jesus son si-kara ey, "Apay nga kayoka manshagan, ja itan pay i showashowa ni nemnem jo?" <sup>39</sup> On-iyo iya takday ko tan sedik. Eg jo aya idasin ey si-kak? Pirat jowak say pati-en jo ey aliwen banigak. Ta say banig, enshiy daman to tan pokel to, nem si-kak, wara."

<sup>40</sup> Idi inkowan to iyay, inpaoney to son si-karay takday to tan sedi to. <sup>41</sup> Jet na-imdengan ira, nem singa eg sha pay laeng patien ey agpayson si-kato. Eg ira pay mepnek, isonga inbaga nen Jesus ey, "Waray mebedin na mekan shiyay?"

<sup>42</sup> Jet in-aknan sha ni ootik ka edoton piskaw ja sid-an to. <sup>43</sup> Innda to et kinan to say on-an sha. <sup>44</sup> Jet kowan to son si-kara ey, "Say inkowan ko nonta wara-ak pay laeng son si-kayo, emin sota naysolat ja maypangkep son si-kak nonta bayag da shi bilin nen Moises tan shi solat ira nonta para padto, tan shi dibsho pay ni Salmo, mesepol la metongpal."

<sup>45</sup> Jet dinewagan toy nemnem sha say ewatan shen emin i inpaisolat nen Apo Shiyos nonta bayag da. <sup>46</sup> Jet kowan to son si-kara ey, "Say insolat nonta ira para padto nen Apo Shiyos nonta bayag da, kowan sha ey sota ibetkag ali nen Apo Shiyos ja mengisedakan, mesepol la da-kaman toy digat asan matey, nem no maykatdon akew, manbiyag mowan. <sup>47-48</sup> Tan say inpadtora pay, kowan sha ey maytosho shi emin na ka-ili-ilin sakop niya dobong ey mesepol la manbebawi komay totoo ni basol sha say pekawanan ira nen Apo Shiyos. Inpadtora pay ey say mengitoshosho, si-kayon mengi-edagey son si-kak, jet ishogi jo konod

Jerusalem. Si-kayoy ondaga so niyay tep misonon inon-an jo iya epasamak son si-kak niman na timpo. <sup>49</sup> Jet iyay pay: ibetkag ko sota Ispirito Santo nen Apo Shiyos ja Amak ja inkari ton pan-iyann to son si-kayo. Nem panseked kayo nin shiya Jerusalem ingkatod ewaten jo sota panakabalin nonta Ispirito Santo ja edapod dangit." Kowan nen Jesus.

*Dimaw si Jesus shi dangit*

<sup>50</sup> Inbalnay to ira ingkatod ma dogad ja nay-esop shi Bitania. Jet inkayang toy takday to ja binindisiyonan to ira. <sup>51</sup> Jet idi maramen toka panbindisiyoni ira, indekjas to iren kimayang mala shi dangit. <sup>52</sup> Jet nantalimokod ira sota apostol ja nanshayaw son si-kato, asan ireka oli maled Jerusalem ma epaladoy imdeng sha. <sup>53</sup> Jet kanajon ma ired Timplo ja emanshedjaw tan emaniyaman son Apo Shiyos.

## SOTA INSOLAT NEN SAN JUAN JA MAYPANGKEP NI KABEBIYAG TAN TORO NEN JESUCRISTO

<sup>1</sup> Nonta eg pay laeng epalsowa iya dobong, wara ngo eshan i kadwa nen Apo Shiyos, jet sotan na kadwa toy engipa-amta alid ja dobong ni maypangkep son Apo Shiyos. Jet si-kato met laeng si Apo Shiyos. <sup>2</sup> Sigod sotan ja wara ngo eshan son Apo Shiyos. <sup>3</sup> Jet si-katoy kabol la edaga-an ni emin na angken nganto. No enshi sotan, enshi ngoy epalsowen angken nganto. <sup>4</sup> Si-katoy engikan ni biyag jet sota biyag ja inakan to, si-katoy dimawag so ni nemnem ni totoo. <sup>5</sup> Emansidew sotan shi embolinget, jet sota embolinget, eg to mebedin na ebaken sota silew.

<sup>6</sup> Si Apo Shiyos, waray inbetkag ton too ja si Juan i ngaran to. <sup>7</sup> Sajay ya too, si-katoy inbetkag nen Apo Shiyos ja en mengikowan so ni totoo maypangkep nonta ondaw alin toon may-eshig ey emansidew shi embolinget ja ondawag ni nemnem ni totoo, say emin na mengitneng ni kowan nen Juan, memati ira nonta toon ondaw ali. <sup>8</sup> Si Juan, si-katoy en engikowan bengat ni maypangkep nonta ondaw alin ondawag ni nemnem ni totoo; aliwen si-kato sotan na ondaw ali.

<sup>9</sup> Sajay ya dimaw alid ja dobong, si-katoy podnon kaondawag ni nemnem ni emin na totoo. <sup>10</sup> Si-katoy kabol la epalsowa-an ni dobong, nem idi dimaw ali, eg binigbig ni tood ja dobong ey si-kato sotan. <sup>11</sup> Dimaw pay shi mismon ili to, nem sota kaidiyan tod man, eg sha inewat. <sup>12</sup> Nem sota emin na too ja engawat son

si-kato, ono emati son si-kato, inkowan to ey nebeng shen maybidang ey annak ma nen Apo Shiyos. <sup>13</sup> Say itsora ni kaybidangan ni totoo ey annak nen Apo Shiyos ket kabol nonta panakabalin nen Apo Shiyos; aliwen inges toy itsora ni kay-enak ni too so ni maka-anak so, tep say too, waray nemnem sha ey man-enak koma ira, tan sakey pay, shaka i-onod i dekna ni bakdang sha; isonga sotan i kabol la kay-enaki ni too.

<sup>14</sup> Sotan na sigod ja wara son Apo Shiyos, ja engipa-amta ali ni maypangkep son Apo Shiyos, nanbalin ni too, jet eki-iyen son si-katejon too. Inon-an min mis-moy kina-Shiyos to — sota kina-Shiyos ja in-akan nen Ameto ta si-kato bengat i Anak to. Emin na inon-an min dingka to, masas ni olay ey ebadeg i semek to tan podnon emin i kowan to. <sup>15</sup> Si-kato sota torong nonta kowan nen Juan nonta inkeljaw to ey, “Sajay sota inkowan ko ey ondaw ali ja maysa-dat son si-kak. Sajay, engatngatoy saad to ey say si-kak tep sigod ja wara ngo eshan iyay nonta ekak pay laeng nay-anak.” Sotan i inpaneknek nen Juan. <sup>16</sup> Saja dimaw ali son si-katejo, ebadeg ga pasiyay semek to, jet engikan ni nansigshan tayon emin. <sup>17</sup> Siya, si-kato si Jesucristo et inpawasha toy semek shiya dobong. Jet si Moises ngo nonta bayag da, inpawasha to sota sigod ja bilin nen Apo Shiyos, nem si Jesucristo i engitoshon ni podnon olog nontan na bilin. <sup>18</sup> Angken sipa, enshiy en engasas son Apo Shiyos, nem eg sota sesakey bengat ja Anak to. Sajay ya Anak to pay i engipa-amta ni maypangkep son Apo Shiyos ja Ameto.

*Si Juan ja para bonjag, inpaneknek toy maypangkep son Je-*

sus

<sup>19</sup> Sota ira pangolo ni Hodiyos shi Jerusalem, engibetkag ira ni papashi tan sota ira kaontolong so nonta papashi, ja en mengiro-pet son Juan nem ngarantoy koston saad to. <sup>20</sup> Jet inkowan nen Juan i agpayso son si-kara, ja kowan to ey, "Aliwén si-kak sota naypadto nonta bayag da ey ibetkag ali nen Apo Shiyos ja mengisedakan."

<sup>21</sup> Insho-petan sha pay ja kowan sha ey, "Jet sipa ka ngarod? Sikam sota naypadton ondaw ali ja maykadwén idaw ali nen Elias?"

Say songbat nen Juan, "Enshi, aliwén si-kak."

Jet kowan sha mowan son si-kato ey, "No kasta, si-kam ali sota para padton tayoka sesseskeren ibetkag ali nen Apo Shiyos?"

Simongbat si Juan ja kowan to mowan ey, "Aliwén si-kak."

<sup>22</sup> Jet inbag-an sha mowan ja kowan sha ey, "Ikowan mo ga no sipa ka, say waray ikowan mi so nonta ira engibetkag son si-kami. Jet sipa ka ngarod?"

<sup>23</sup> Si Juan, simongbat ja kowan to ey, "Si-kak i kaytoshongan nonta padto nen Isaias nonta bayag da ja kowan to ey wára aliy toon ikeljaw toy esel to shima dogad ja nay-arawi shi ili, ja kowan to ey, 'Pandeteg joy shalan na panakshan nen Apo!'"

<sup>24</sup> Jet sajay iren inbetkag ni Parisiyo, <sup>25</sup> kowan sha pay so nen Juan ey, "Apay ngarod nga kaka memonjag, no aliwén si-kam sota naypadton ibetkag ali nen Apo Shiyos, ono sota mengibengon son Elias, ono sota para padton tayoka sesseskera ja ondaw ali?"

<sup>26</sup> Jet si Juan, simongbat son si-kara ja kowan to ey, "Shanom i naka osala ni naka memonjag so ni totoo, nem wára son si-kayoy naydaok ja eg jo amta, <sup>27</sup> jet si-kato aliy maysa-dat son si-kak. Ebadbadeg i panakabalin to ey say

si-kak, jet ekak pay maykeshi ja angken baga-en to komen-gokas ni kalot ni sapatos to."

<sup>28</sup> Emin iyay, edaga shi Bitania, ja baliw nonta pa-dok ja kowan sha ey Jordan, ja emonjagan nen Juan.

*Pineneknekan nen Juan ey si Jesus i may-eshig ey kalniro nen Apo Shiyos*

<sup>29</sup> Idi nonta ewa-wa, si Juan, inon-an tos Jesus ja emandaw son si-kato, jet kowan to ey, "Sajay sota mengikesho ni basol ni totoo dobong ni ketey to di. Si-katoy may-eshig ey singa kalniron inakan nen Apo Shiyos ja maydeton.

<sup>30</sup> Sajay sota inkowan ko son si-kayo ey ondaw ali, ja maysa-dat son si-kak. Sajay, engatngato i saad to ey say si-kak, ta sigod ja wára ngo eshan nonta ekak pay laeng nay-anak. <sup>31</sup> Jet angken si-kak, istay ya ekak amta no sipay toshongen nonta naypadto

nonta bayag da ey ondaw ali, nem say kawashak niman shiyay ja emengosal ni shanom ni naka memonjag ket say amta-an ni tood Israel nem sipa sota naypadton ondaw ali. <sup>32</sup> Jet amtak ma tep inon-an koy Ispirito Santo nen Apo Shiyos alid dangit ja emandaw

ni kalopati. Simepa et imonong son si-kato. <sup>33</sup> Istay ekak pay laeng amta ey si-kato sota kaytoshongan nonta padto, nem si

Apo Shiyos, ja engibetkag son si-kak ja memonjag ja shanom i osalen ko, inkowan to pay ey sota

asen ko ja despagan ni Ispirito Santo to ja pan-iyanan to, si-kato sotan na too ja say memonjag to di ket Ispirito Santo. <sup>34</sup> Jet sajay ya

naka pan-ikowan na inon-an ko, sajay sota Anak nen Apo Shiyos." Kowan nen Juan.

*Sota pilmiron totoo ja nanbalin ni too nen Jesus*

<sup>35</sup> Idi ewa-wa mowan, kadwa nen Juan sota showen too to. <sup>36</sup> Inon-an tos Jesus ja eman-ekad, jet kowan nen Juan ey, “Sajay sota may-eshig ey kalniron in-akan nen Apo Shiyos ja maydeton.”

<sup>37</sup> Jet sota showen too nen Juan, intenengan sha iya inkowan nen Juan jet imonod ira so nen Jesus.

<sup>38</sup> Si Jesus, wíningi to ira ja eman-onod ali son si-kato, jet kowan to ey, “Ngarantoy ibaga jo?”

Jet kowan sha son si-kato ey, “Maistoro, toway moka pan-iyani?”

<sup>39</sup> Si Jesus, kowan to ey, “Kalejo say jo asen.”

Ekidaw ira son Jesus jet inon-an sha i toka pan-iyani. Jet nontan na akew, sota ira showen too, eki-yan ira nin son Jesus, ta mama-shem mala ja oras ni alas kowatro. <sup>40</sup> Say sakey so nonta engitneng ni inkowan nen Juan pangkep so nen Jesus, si Andres ja agi nen Simon Pedro.

<sup>41</sup> Si Andres, dimaw wa shagos, ja to simbi si Simon ja agi to, jet kowan to son si-kato ey, “Simbi mi sota tayoka sesseskeshen ibetkag ali nen Apo Shiyos!” (Say piyan ton a-seden, simbira sota nay-padton ibetkag nen Apo Shiyos ja mengisedakan.)

<sup>42</sup> Si Andres, inodop to si Simon ja dimaw ira son Jesus, jet si Jesus, iningning tos Simon jet kowan to son si-kato ey, “Si-kam si Simon ja anak nen Juan. Jet say ingaran ko ma son si-kam niman, si Cipas, ono Pedro.” (Nan-inges i olog niya showen ingaran to son Simon, ja say piyan ton a-seden, bato.)

<sup>43-44</sup> Idi ewa-wa mowan, si Jesus, ninemnem ton ondaw shi Galilia, jet simbi to si Felipe shiman ja kaidiyan nen Andres nen Pedro ja i-Bitsaida. Kowan nen

Jesus son Felipe ey, “Kala, kay-olop ka son si-kak say manbedin ka men took.”

<sup>45</sup> Jet si Felipe, simbi tos Natanael, jet inkowan nen Felipe son si-kato ey, “Wara ma niman sota inpadto nen Moises ja insolat tod dinteg tan insolat nonta ira para padto. Jet inaspol mi! Say ngaran to, Jesus. Si-kato ket i-Nasarit ja potot nen Jose.”

<sup>46</sup> Jet si Natanael, simongbat ja kowan to ey, “Apay wara ayay mapteng nga mandepod Nasarit?”

Jet kowan ngo nen Felipe ey, “Eti, mo asas.”

<sup>47</sup> Jet si Jesus inon-an to alis Natanael, ja emandaw son si-kato, jet kowan to ey, “Iyay ali i podnon i-Israel. Emin na wara son si-kato, agpayso.”

<sup>48</sup> Jet si Natanael, inbag-an tos Jesus ja kowan to ey, “Ita et mangon amtamak?”

Si Jesus, simongbat ja kowan to ey, “Nonta wara ka pay laeng ja nansirom shi kadasan, ja eg toka pay laeng inodop nen Felipe, inon-an taka.”

<sup>49</sup> Jet si Natanael, simongbat ja kowan to ey, “Maistoro, amtak ma ey si-kam sota Anak nen Apo Shiyos! Si-kam i Ari ni tood Israel!”

<sup>50</sup> Jet si Jesus, simongbat ja kowan to ey, “Kaka memati ta inkowan ko ey inon-an taka ja nansirom shi kadasan. Jet mas wara pay i asen mo ali ja kaskasshaaw ey say sajay. <sup>51</sup> Kinapodpodno to iya ikowan ko son si-kam. Asen jo i dangit ja medo-katan, jet asen jon waray anghil nen Apo Shiyos ja ondespag ali son si-kak jet on-oli mowan shi dangit, ta si-kak sota kowan sha ey Anak ni Too.”

## 2

*Sota milagron dingka nen Jesus shi Kana nonta kasal*

<sup>1</sup> Nonta maykatdon akew, waray nankasal shi Kana, ja sakop ni Galilia, jet si Maria ja ina nen Jesus, dimaw nodtan na kasal. <sup>2</sup> Jet si Jesus tan sota ira too to, inewis sha ira nodtan na kasal. <sup>3</sup> Nodta kasal kimolang i inom, jet sota ina nen Jesus, inkowan to son Jesus ey, “Na-bos gayam day inomen ni too.”

<sup>4</sup> Jet si Jesus, kowan to ey, “Nanang, eg mesepol la ikowan mo son si-kak i dag-en ko. Aneng nin i pandekak ni obden in-akan nen Apo Shiyos.”

<sup>5</sup> Jet si Maria ja ina nen Jesus, inkowan to so nonta ira emanke-makam nodta kasal ey, “No ngan-toy ikowan nen Jesus, patiyoy.”

<sup>6</sup> Jet nodtan, waray enem ma salaw ja epat ono dimen daten shanom i ka-iyana ni sakey. Sajay i shaka pan-oshasi ni shaka pengonod ni ogadira ja shaka pesing nin asan ireka mangan. <sup>7</sup> Jet si Jesus, inkowan to nonta ira emanke-makam ey, “Penoyo ni shanom sota ira salaw.”

Jet sota ira emanke-makam, pin-nora sota ira salaw.

<sup>8</sup> Jet si Jesus, inkowan to ey, “Panaol kayo ma shita salaw jet pangdoyo nin ja itagajan sota emengimanshal ni kasal.”

Enaol ira et sha in-aknan sota emengimanshal ni kasal. <sup>9</sup> Jet sota emengimanshal ni kasal, niman-tan to sota in-akan sha ja nanbalin ma ni inom, nem eg to amtay edapo-an to. (Nem sota ira emanke-makam shi kasal ja enaol, amtara mango.) Jet sota emengimanshal ni kasal, tina-wal to ali sota dakin engasewa, <sup>10</sup> jet kowan to son si-kato ey, “Say amtak ka ogadi tayo, shaka nin pangdo-a sota en-amis sa inom, jet no asdeg to malay ininom nonta ira totoo, angken sota endamsis malen inom i itagay sha. Nem si-kam, iyay gayam i in-emot mon

mas en-am-amis ja inpan-onod mon itagay.”

<sup>11</sup> Sajay ya dingka nen Jesus shi Kana, si-katoy pilmiron dingka ton milagro. Inpa-sas toy kina-Shiyos to et sota ira too to, emati ma iren koskosto son si-kato.

<sup>12</sup> Jet idi enaksheng iyay, si Jesus, dimaw shi Kapirnaom, jet ekidaw si ineto, sota a-aki to, tan sota ira too to. Nan-iyay nin ired man ni pigen akew.

### *Si Jesus, dimaw shima Timplo*

<sup>13</sup> Nontan na timpo, shanshani ma sota piyasta ni Hodiyoys ja kowan sha ey Paskowa, jet si Jesus, dimaw shi Jerusalem. <sup>14</sup> Jet shima Timplo, simbi to ired man sota emandeko ni baka, kalniro, kalopati, tan wara pay iray toon timanongaw ja emena-dat ni pilak. <sup>15</sup> Si Jesus, engamag ni baras ja wanet jet shinagshag to iren emin, pati sota kalniro, tan sota baka, ja inpabo-day to ira nodta Timplo, jet angken sota pilak nonta timongaw wa emena-dat, intikbo to, jet tino-to-dang to pay sota ira damisaan sha. <sup>16</sup> Jet inkowan nen Jesus so nonta ira emandeko ni kalopati ey, “Ekal jon emin iya wared jay! Aliwen jo panbedin iya baley nen Amak ni dako-an!”

<sup>17</sup> Jet sota ira too to, ninemnem sha nontan sota padton naysolat nonta bayag da ey, “Apo Shiyos, sota naka pengisekit ni baley mo, si-kato met laeng i onsharal son si-kak.”

<sup>18</sup> Jet sota ira pangolo ni Hodiyoys, kowan sha son si-kato ey, “Ngaranton milagro i ipa-sas mo son si-kami ja amta-an mi so ey si-kam ket podnon inbetkag ali nen Apo Shiyos? No wara, siya, memati kami ey waray kalintegan mon dimaga so niyay.”

<sup>19</sup> Si Jesus, simongbat ja kowan to ey, “Sharal jo iyay ya timplo,

jet no maykatdon akew, i-olik met laeng ja dag-en.”

<sup>20</sup> Jet sota ira Hodiyo, kowan sha ey, “Epat ta polo tan enem ma tawen i indaga sha so niyay ya Timplo, ey tedon akew bengat i i-olim so no mesheshal?”

<sup>21</sup> (Nem say piyan nen Jesus ja aseden niya timplon kowan to ket aliwen sota Timplon to-to-wa, no diket sota ketey ni bakdang to tan sota pan-ongal to nem maykatdon akew. <sup>22</sup> Isonga nonta inpan-ongal nen Jesus nonta maykatdon akew ni inkatey to, ninemnem nonta ira too to sotan na inkowan to, jet sajay i kabol la pinati-an sha so ni emin na inpasodat nen Apo Shiyos nonta bayag da, tan sota emin na inkowan nen Jesus.)

<sup>23</sup> Jet nontan na timpo ni piyasta ni Hodiyo ja kowan sha ey Paskowa, eshakil i emati son Jesus shi Jerusalem, ni in-asas sha so nonta kaskasshaaw ja dingka to. <sup>24</sup> Nem si Jesus, eg to ira piyalen; isonga eg to inpodno nontan i emin na maypangkep son si-kato, <sup>25</sup> ta amta ton emin i itsora ni too, jet eg mesepol la waray mengikowan son si-kato ni maypangkep ni too, ta amta to i wared nemnem sha.

### 3

*Si Nikodimo, to inon-an si Jesus*

<sup>1</sup> Waray Parisiyo ja manngeshan ni Nikodimo, ja sakey ya pangolo ni Hodiyo. <sup>2</sup> Sajay ya too, dimaw son Jesus ni edabi, jet kowan to ey, “Maistoro, si-kam, amta mi ey inbetkag token Apo Shiyos ja menosho son si-kami, ta angken sipa, enshiy ondaga so nonta dingkam ma kaskasshaaw, no enshis Apo Shiyos son si-kato.”

<sup>3</sup> Jet si Jesus, simongbat ja kowan to ey, “Kinapodpodno iya ikowan ko son si-kam. Angken

sipa, eg mebedin na asen toy pantoshayan nen Apo Shiyos, no eg may-enak mowan.”

<sup>4</sup> Jet si Nikodimo, simongbat ja kowan to ey, “Toway pesing ni toon may-enak mowan ey bima-deg ma? Apay mebedin aya, ja on-oli mowan shi anakan nen ineto jet asan may-anak mowan?”

<sup>5</sup> Si Jesus simongbat, ja kowan to ey, “Kinapodpodno iya ikowan ko son si-kam. Angken sipa, eg mebedin na mayda-kam shi pantoshayan nen Apo Shiyos, no eg may-enak mowan, ta say kedepo-i niya biyag, shanom tan Ispirito Santo nen Apo Shiyos. <sup>6</sup> Sota i-anak ni too, etoo-an i ogadi to, nem sota toon kawad-an ni Ispirito Santo nen Apo Shiyos, ja singa nay-anak mowan, say ogadi to, inges to ngoy Ispirito Santo.

<sup>7</sup> Kareka messhaaw niya inkowan ko ey si-kayon too, mesepol la may-enak kayo mowan. <sup>8</sup> Say kayeshigan ni Ispirito Santo nen Apo Shiyos, saja shagem. Say shagem, sota piyan ton toshongen, si-kato. Moka itenengi i bongog to, nem eg mo amtay edapo-an to, ono dawen to. Sajay i kay-eshigan nonta may-enak mowan ja kawad-an ni Ispirito Santo.” Kowan nen Jesus.

<sup>9</sup> Jet si Nikodimo, simongbat ja kowan to ey, “Toway pesing niyay ya inkowan mo?”

<sup>10</sup> Si Jesus, simongbat mowan na kowan to ey, “Eg mo gayam amta iyay, ey eshayaw ka pay ya maistoro ni pamati tayon Hodiyo?”

<sup>11</sup> Kinapodpodno iya ikowan ko son si-kayo. Say mika panikowan, sota amta mi, tan say mika penekneki, sota inon-an mi. Nem si-kayo, eg jo pati-en i kowan mi. <sup>12</sup> Inkowan ko son si-kayo i maypangkep ni saja dobong jet eg jo pinati. Ma-ma ton eg jo pati-en no ikowan ko son si-kayo i maypangkep ni dangit. <sup>13</sup> Angken

sipen too, enshiy en dimaw shi dangit, nem eg si-kak bengat, ja kowan sha ey Anak ni Too; shiman aliy edapo-an ko. <sup>14</sup> Si Moises, indansa tod kiyew sota sinan oleg ja boronsi, asan toka ikedjang nonta bayag da, ja kawashared ma nan-ak-akshan shen enshiy koston pan-iyanan sha. Jet si-kak ja kowan sha ey Anak ni Too, inges niyay ngoy pesing sha son si-kak, <sup>15</sup> jet sota emin na memati son si-kak, may-aknan ni biyag ja enshiy to pengintegan.

<sup>16</sup> “Ta si Apo Shiyos, ensemblek ton pasiya i totood ja dobong; isonga in-akan to ali sota saksakey bengat ta Anak to, say sota emin na memati so nontan na Anak to, eg meshosa ni ingkatod ingka, no diket may-aknan ira ni biyag ja enshiy to engintegan. <sup>17</sup> Ta si Apo Shiyos, aliwen inbetkag to ali sota Anak tod ja dobong ja si-katoy mengigsheng ey meshosa iray totoo, no diket say isalakan to koma ira. <sup>18</sup> Isonga sota memati son si-kato, eg meshosa, nem sota eg memati son si-kato, kenshat ta meshosa iren ingkatod ingka, ta eg memati nodta saksakey bengat ta Anak nen Apo Shiyos. <sup>19</sup> Jet say kabol la keshosa-an sha, sota eg sha kosto-an so nonta inbetkag ali nen Apo Shiyos ja ondawag so ni nemnem sha. Say piniyan ni too et ngo mowan, sota pandegdeka ni ngaaw, ja angken eg medewagan i nemnem sha. <sup>20</sup> Jet sota ira ngaaw i aramid sha, shaka a-dema ja on-esop son si-kak ta entakot ira ey dewagan koy aramid shen ngaaw. <sup>21</sup> Nem sota toon podnoy toka dagdag-a, si-karay kaon-es-esop son si-kak, say medewagan ey si Apo Shiyos i edapo-an ni mapteng nga aramid sha.”

*Nansalodsod ira son Juan ni maypangkep son Jesus*

<sup>22</sup> Idi enaksheng iyay, si Jesus tan sota ira too to, dimaw ired sakop ni Jodia. Jet si Jesus, eki-yan nin shiman tep emonbonjag nin. <sup>23</sup> Si Juan ja para bonjag, wara ngo shi Inon, ja nay-esop shi Salim. Shiman i toka pemonjagi, tep eshakil shiman i shanom. Jet sota ira totoo, dimaw ired man na en nanpabonjag. <sup>24</sup> Tep nontan na timpo, aneng nin i kaybedod nen Juan.

<sup>25</sup> Sota too ira nen Juan, tan sota sakey met laeng nga Hodiyo, waray eg sha nan-inawatan pangkep ni pemonjag. <sup>26</sup> Jet sota too nen Juan, dimaw ira son si-kato, jet kowan sha ey, “Maistoro, moka tanshaani sota kadwam nontan shi baliw ni pa-dok ka Jordan? Sotan met sota toon intorom son si-kami ja maysa-dat son si-kam. Niman, ememonjag kono met, jet eshakil i toon emandaw son si-kato.”

<sup>27</sup> Simongbat si Juan ja kowan to ey, “No si-kak, ekak ma-epal nonta eshakil la emandaw son si-kato, ta emin na too, say kedepo-i ni saad sha, si Apo Shiyos. <sup>28</sup> Intenengan jon mismo i inkowan ko, ey si-kak ket aliwen si-kak sota inbetkag ali nen Apo Shiyos ja mengisedakan, no diket si-kak, epangdo-ak bengat ali ja en mengikowan ni totoo say mesekana iren memati son si-kato. <sup>29</sup> Say kay-eshigan to, singa si-kak i mengisekana ni mesepol nonta kajem kon mengesawa. Jet niman, en simbi nonta daki sota esaw-en ton bii, jet naka man-imdeng men pasiya, ta si-katoy talaken on-asewa nontan na bii; isonga ekak ma-epal. Niman, ta intenengan koy esel to, mas naka man-imdeng. <sup>30</sup> Mesepol la si-kato may tangkaken ni totoo, nem si-kak, nebeng ngon mekodangan sota sigod ja inpanangkak ni too son si-kak. <sup>31</sup> Ta sota edapo alid



naykayang, si-kato ngo eshan i kangeto-an ni emin. Si-kak, ta edapo-ak shiya dobong, say amtak ngo, ono naka ikowan, sota may-pangkep ni saja dobong. Jet si-kato, ja edapod dangit, <sup>32</sup> say toka pan-ikowan, sota maypangkep ni inon-an to tan sota intenengan to shi dangit. Emin na too, istay memati ira koma, nem ootik met i memati ni toka pan-ikowan. <sup>33</sup> Nem sota toon ememati ni toka pan-ikowan, si-karay ememati ngo ey podnon emin i kaikowan nen Apo Shiyos. <sup>34</sup> Ta sota mismon inbetkag nen Apo Shiyos, say toka ikowan, sota mismon esel nen Apo Shiyos, ta eg nagshengan i panakabalin ni Ispirito Santo ja in-akan nen Apo Shiyos son si-kato. <sup>35</sup> Si Apo Shiyos, ensemblek to sota Anak to, isonga emin na banag, in-awat to so nonta Anak to. <sup>36</sup> Sota toon memati so nonta Anak nen Apo Shiyos, may-aknan ni biyag ja enshiy to engintegan, nem sota eg memati so nonta Anak nen Apo Shiyos, eg may-aknan nonta biyag ja enshiy to engintegan, no diket emansessesked son si-kato sota penosa nen Apo Shiyos ja shosen ingkatod ingka.”

## 4

### *Si Jesus tan sota biin i-Samaria*

<sup>1-2</sup> Sota ira Parisiyo, shinemag sha ey eshakil konoy panbonjagi nen Jesus ja manbedin ni too to, jet ootik malay emandaw so nen Juan. (Nem aliwen agpayso sotan na shamag sha. Enshiy en binonjagan nen Jesus; no diket say ememonjag, sota ira too to.) Idi inamta-an nen Jesus iyay ya shamag, <sup>3</sup> indekjas shay Jodia et nay-oli ired Galilia, <sup>4</sup> jet nanshalan ired Samaria ni indaw shed man, ta si-katoy nay-esop pa shalan.

<sup>5</sup> Jet nontan na inpanshalan shed man, minotok shay Sikar

ja sakop met laeng ni Samaria. Sotan na dogad, nay-esop nodta bo-day nen Jacob nonta bayag da, ja in-akan to so nen Jose ja anak to. <sup>6</sup> Jet nodtan na dogad, si-katoy kawad-an nonta ba-wék ja asolan nen Jacob nontan da.

Si Jesus, ta enabdey ni inpan-akad sha ali, en timongaw nodta nay-esop shi asolan na ba-wék. Say oras nontan, alas dosi ni kakawan.

<sup>7-8</sup> Jet emin sota too nen Jesus, dimaw ired siyodad ja en menongkal ni kenen sha. Jet si Jesus ngo nontan, ka-onong nga wara nodta nay-esop shi ba-wék. Naytompong nga waray biin i-Samaria ja dimaw alin en man-esol nodtan. Jet si Jesus, inkowan to so nonta bii ey, “I-aknimak ka di ni shanom ma inomen ko.”

<sup>9</sup> Sota bii, nasshaaw jet kowan to ey, “Ita et mangon kaka manbeka son si-kak ni shanom ma inomen mo ket i-Samaria-ak, ey si-kam, Hodiyo ka?” (Sajay i inkowan nonta biin i-Samaria, ta say Hodiyo, ensekig shay i-Samaria.)

<sup>10</sup> Jet si Jesus, simongbat ja kowan to ey, “No amtam koma sota pan-i-akan nen Apo Shiyos, ono amtam koma sota emanbeka son si-kam niman ni shanom, istay ibag-an mowak koma, jet i-aknan taka ni shanom ma mengikan ni biyag.”

<sup>11</sup> Jet sota bii, simongbat ja kowan to ey, “Apo, enshi met i taol mo ja penaol. Ta sama asolan, naydeshek; toway pengal-an mo ni shanom ma mengikan ni biyag? <sup>12</sup> Say kimaot so niyay ya asolan, si Jacob ja makapoli son si-katejo, jet sajay ya ba-wék i toka pan-esoli da nontan, tan shiyay pay i pan-esoli ira nonta annak to, tan pan-inomi ira nonta animal to. Apay engatngato ka aya ey say si Jacob da?”

13 Jet si Jesus, simongbat ja kowan to ey, “Sota menginom niyay ya shanom, messho, ono ma-kew mowan. 14 Nem sota shanom ma naka pan-i-akan, si-kato sota biyag ja enshiy to eng-integan, jet sota on-inom so, eg mowan messho, ono ma-kew, ta wara ni olay son si-kato, ja singa inges to sota temtem ja eg ma-ma-ti-an.”

15 Jet sota biin i-Samaria, kowan to ey, “Apo, i-aknimak nita shanom ma kowan mo, say ekak ma messho, tan say ekak meb-mebdey alin en man-esol.”

16 Jet si Jesus kowan to son si-kato ey, “Daw ka, mo di olop si asewam.”

17 Sota bii, simongbat ja kowan to ey, “Enshiy asewak.”

Jet si Jesus, kowan to ey, “Kostoy insongbat mo, ja kowan mo ey enshiy asewam, 18 ta dimen daki i engasewa son si-kam, jet sota dakin kadwam niman, aliwen si-katoy asewam; isonga naka pati-a ita kowan mo ey enshiy asewam.”

19 Jet sota bii, kowan to ey, “Apo, naka ewati ma ey si-kam, para padto ka gayam nen Apo Shiyos.

20 Isonga niman, iyay i piyan kon ibaga son si-kam. Sota appo mi da, inkowan sha ey sota shontog shiyay ya dogad i panshedjawan mi son Apo Shiyos. Nem si-kayon Hodiyo, say kowan jo kono ngo, shi Jerusalem i koston en panshedjawan ni emin na too son Apo Shiyos.”

21 Jet si Jesus kowan to so nonta bii ey, “Patim iya naka pan-ikowan. Waray timpon onsabi ali ja say panshedjaw son Apo Shiyos, aliwen sota idaw nodta shontog shiyay, ono shi Jerusalem.

22 Si-kayon i-Samaria, eg jo amtay Shiyos ja joka panshedjawa, nem si-kamin Hodiyo, amta miy mika panshedjawa, ta si-kamiy kedepo-an nonta toon mengisedakan ali.

23 Jet niman, simabi ma sota timpo, ja say koston panshedjaw son Apo Shiyos ja Ama, mesepol la sota podno ja mandepod poso, tep si Apo Shiyos ja Ametayo, sajay i piyan ton pesing nga manshedjaw son si-kato. 24 Si Apo Shiyos, Man-akabalin; angken toway dawán mo, wara ngo eshan si Apo Shiyos. Isonga sota toon manshedjaw son si-kato, mesepol la podnoy panshedjaw to ja medepod poso to, ta sotan i piyan nen Apo Shiyos.”

25 Jet sota bii, kowan to son Jesus ey, “Wara konoy ibetkag ali nen Apo Shiyos ja mengisedakan jet ma-ewagan kono alin Cristo, jet no ondaw ali, idawag to konon emin i angken nganto.”

26 Si Jesus, simongbat jet kowan to so nonta bii ey, “Si-kak ja katabatal mo niman, si-kak sotan na mismo.”

27 Jet nontan na maramen emekitbal si Jesus so nonta biin i-Samaria, mimotok sota ira too nen Jesus ja en enongkal ni mekan shi siyodad, jet nasshaaw iren pasiya ta waray biin toka pantatabala. Nem angken sakey nodta too nen Jesus, enshiy en engibeka son Jesus, no ngarantoy mesepol nonta bii, ono apay nga emekitbal so nonta bii.

28 Sota bii, indekjas to sota in-asol to, jet nay-olid siyodad, jet to inkowan so nonta ira totoo man, 29 ja kowan to ey, “Kalejo, jo asas kari sota tood man. Sajay ya too, amta ton emin sota dingdingkak nontan da, jet inkowan to son si-kak. Sigosho, sajay sota kowan sha ey ibetkag ali nen Apo Shiyos ja mengisedakan.”

30 Jet nontan ma, sota emin na totoo nodta siyodad, dimaw ira ja sha inon-an si Jesus nodta kad-an to.

31 Idi enshi mala sota bii, inkowan ngo nonta ira too nen

Jesus son si-kato ey, “Apo, pangan ka!”

<sup>32</sup> Nem si Jesus, simongbat ja kowan to ey, “Waray naka kena, ja eg jo amta.”

<sup>33</sup> Jet sota ira too to, nanbibinaga ira ja kowan sha ey, “Sigosho waray engi-kan ali ni kinan to?”

<sup>34</sup> Si Jesus kowan to son si-kara ey, “Say singa naka kena, ja emengi-kan ni kedsang ko, sota pandekak ni piyan nen Apo Shiyos ja engibetkag son si-kak; sota obden inpiyal to son si-kak i dagen ko ingkatod meksheng. <sup>35</sup> Si-kayo, wára met sota joka ikowan no mantatababal kayo, ja kowan jo ey, ‘Ondabas pay i epat ta bolan, asan timpo ma ni ani.’ Nem no si-kak, niman i timpo ni ani. Idmang jo kari ira ja totoo. Sota timpon pematira son si-kak, shan-shani ma; may-eshig shi edowem men pagey ja mebedin na ma-eni.

<sup>36</sup> Isonga si-kayo, mesepol la alisto kayon ondaw ta si-kayoy may-eshig ey en man-eni, jet sota toon mengitoshon ni esel ko shi kait ton totoo say memati ira son si-kak, si-kak i mengi-kan ni konkona to. Jet man-imdeng sotan na toon pasiya, ta eshakel i toon engawat ni biyag ja enshiy to engintegan. Isonga man-imdeng sota mengitoshon niman ja singa man-eni, jet man-imdeng ngo sota epangdon engitoshon ja singa nan-esek. <sup>37</sup> Agpayso sota kowan ira nonta too nonta bayag da ey, ‘Apil i man-a-sek, jet apil ngoy mengepit nonta dames ni nay-esek.’ <sup>38</sup> Isonga si-kayo, si-kayoy ibetkag ko, ja singa en mengepit nonta dames ni in-esek ni eshom, angken na aliwen si-kayoy nandigat.” Sajay i kowan nen Jesus so nonta ira too to.

<sup>39</sup> Jet sota ira tood Samaria, ja i-Sikar, eshakel iray emati son Jesus, pangkep nonta inkowan nonta bii ey, “Emin sota dingdingkak nontan da, amta

nontan na too, jet inkowan to son si-kak.” <sup>40</sup> Jet nontan ma, sota ira i-Samaria, pinidit sha ey meki-yan nin si Jesus son si-kara. Jet si Jesus, eki-yan shiman son si-kara ni showen akew. <sup>41</sup> Jet sota inpan-yan tod man, mas eshakel pay i emati son si-kato, ta intenengan shen mismo i toro to.

<sup>42</sup> Sota ira totoo, kowan sha so nonta bii ey, “Nonta pilmiro, emati kami son Jesus kabol nonta inkowan mo, nem niman, mas pay ya emati kami ma son si-kato, ta mismon intenengan miy inkowan to, jet amta mi ma i maypangkep son si-kato, ey si-kato sota mengisedakan ni tood ja dobong.”

*Si Jesus, inpamapteng to sota emansekit ja anak nonta toray*

<sup>43</sup> Idi maykatdon akew, si Jesus tan sota ira kait to, indekjas shay Sikar jet dimaw ired Galilia.

<sup>44</sup> Nonta epangdo len akew, waray inkowan nen Jesus ey, “Sota toon inbetkag ali nen Apo Shiyos, enshiy shayaw tod ili ton mismo.”

<sup>45</sup> Nem idi dimaw shi Galilia ja ili to, sota ira tood man, ireka man-imdeng ja mengewat son si-kato, ta sajay iren too, inon-an shay dingka nen Jesus shi Jerusalem nonta timpon piyasta ni Paskowa. Ta dimaw ngo ired man nonta timpo ni piyasta.

<sup>46</sup> Jet idi enaksheng iyay, si Jesus, dimaw shi Kana, ja sakop met laeng ni Galilia. Shiyay ya dogad sota dingka-an son Jesus ni milagro, ja sota shanom, inpanbalin to ni inom. Jet nonta wares Jesus shiman, waray i-Kapirnaom ja emansekit i anak ton daki. Sajay ya too, ekayang i toray to. <sup>47</sup> Idi shinemag to ey wares Jesus shi Kana ja edapo alid Jodia, dimaw iyay ya toray ja to simbi si Jesus. Jet sajay ya toray, to inbag-an si Jesus no mebedin na odopen tod

Kapirnaom ja to pemapteng sota emansekit ja anak to, ta epaladoy sakit to, ja shanshanin metey.

<sup>48</sup> Jet si Jesus kowan to so nonta toray ey, “No enshiy mo asen na dag-en kon kaskasshaaw, ono milagro, eg ka memati?”

<sup>49</sup> Sota toray, simongbat ja kowan to ey, “Apo, no eg ka meki-daw son si-kak, kenshat ta metey sota anak ko!”

<sup>50</sup> Si Jesus, kowan to so nonta toray ey, “Akad ka, sota anak mo, onmapteng ma.”

Sota toray, pinati to sota inkowan nen Jesus, jet dima-jat ja on-akad. <sup>51</sup> Nonta ewa-wa, en nay-aspol shi shalan sota ira baga-en nonta toray son si-kato, jet inkowan sha son si-kato ey, “Sota anak mon emansekit, mapteng ma!”

<sup>52</sup> Jet sota toray, inbag-an to sota ira baga-en to ey, “Nganton oras i nayshogi-an ni inmapteng to?”

Jet kowan sha ey, “Oras ni ala ona ni mama-shem nonta nashem.”

<sup>53</sup> Jet ninemnem ton shagos ey oras ni ala ona nonta inkowan nen Jesus ey, “Sota anak mo, onmapteng.” Jet manipod nontan ma, si-kato tan sota emin na wared baley to, emati ira son Jesus.

<sup>54</sup> Sajay i maykadwa ja kaskasshaaw wa dingka nen Jesus shi Galilia, jet dingka to iyay nonta edapo alid Jodia.

## 5

*Si Jesus, inpamapteng to sota toon eg makakeykey i bakdang to nonta akew wa ngilin ni Hodiyos*

<sup>1</sup> Idi enshiy bayag to, waray piyasta ni Hodiyos, jet si Jesus, dimaw shi Jerusalem.

<sup>2</sup> Shi Jerusalem, waray shanom ma binneng sha ja kowan sha ey Bitisda shi esel ni Hodiyos. Sajay ya nabneng, nay-esop nodta

sakepan ni kalniro shi siyodad ja pasbol. Waray dimen sishoman ja nay-esop nodta nabneng, <sup>3</sup> jet eshakel nodtan i nansirom ma ekalkalasiy sakit sha: waray eko-rab, waray epilay, tan wara pay iray eg makakeykey i bakdang sha. Sajay iren emanpansekit, shaka segsegshay ikeykey nonta shanom, <sup>4</sup> ta waray timpo ja kaidaw ali nonta anghil nen Apo Shiyos jet to pekeykey sota nabneng nga shanom, jet sota mepangdon too ja manteb-ok nodta shanom ni timpon toka ikeykey, angken ngantoy sakit to, ma-ekasan.

<sup>5</sup> Wara nodtan i sakey ya toon nansakit ni tedon polo tan walon tawen. <sup>6</sup> Si Jesus, inon-an to iyay ya too, jet amta to ey ebayag ga emansekit ja emansessesked nodtan. Inbag-an to ja kowan to ey, “Piyan mon onmapteng?”

<sup>7</sup> Sotan na too, simongbat ja kowan to ey, “Owen Apo, nem no timpon ikeykey nima shanom, enshiy kaontolong son si-kak ja manteb-ok shima shanom. No shanshanin on-esopak shima kilig nima nabneng, wara day emepangdo ey say si-kak.”

<sup>8</sup> Jet si Jesus, kowan to so nontan na too ey, “Dayat ka, isingpet mo ita shokolan mo et pan-akad ka.”

<sup>9</sup> Jet mimapteng nga shagos sotan na too, jet insingpet to sota shokolan to, jet nan-akad.

Epasemak iyay nonta timpo ni akew wa ngilin ni Hodiyos, <sup>10</sup> isonga sota ira pangolo ni Hodiyos, inkowan sha so nonta toon mimapteng ey, “Apay nga pinesan mo ita shokolan mo, ket maypeshit shi dinteg tayo ita inpasing mo no akew wa ngilin tayan Hodiyos?”

<sup>11</sup> Nem sajay ya too, simongbat ja kowan to ey, “Sota inpamapteng son si-kak, si-katoy

engikowan ey al-en ko sota shi-nokolan ko, jet inkowan to pay ey man-ekarak.”

<sup>12</sup> Jet sota ira pangolo ni Hodiyo, inbag-an sha iyay ya too, ja kowan sha ey, “Sipay engikowan son si-kam ey al-en moy shokolan mo et man-ekad ka pay?”

<sup>13</sup> Nem sajay ya toon mimapteng, eg to amta sotan na toon inpamapteng son si-kato, ta si Jesus, indekjas ton shagos, ta eshakil la pasiya sota too nodta kilig ni nabneng.

<sup>14</sup> Idi enshiy biyag to, simbi nen Jesus iyay ya too shima Timplo, jet kowan to son si-kato ey, “Niman, ta mapteng ka ma, tanshaanim; aliwén ka mowan manbesol, ta amangan no ekarkaro aliy da-kaman mon digat ey say sota epangdon dina-kaman mo la.”

<sup>15</sup> Jet sajay ya toon mimapteng, bimo-day jet to inkowan no nonta ira pangolo ni Hodiyo ey say inpamapteng son si-kato, si Jesus gayam. <sup>16</sup> Sajay i kabol la kinontra-an ira nonta Hodiyo son Jesus, ta inpamapteng to iya toon istay emansekit nonta akew wa ngilin sha.

<sup>17</sup> Jet si Jesus, inkowan to son si-kara ey, “Say kowan jo, no timpo ni ngilin tayon Hodiyo, eg kita man-obda. Nem si Apo Shiyos ja Amak, eg onsalsheng i obda ton mengaasi ni too; isonga mesepol la si-kato ngoy dag-en ko.”

<sup>18</sup> Idi intenengan sha iyay ya inkowan nen Jesus, ema-ma et ta piyan shen bono-en. Aliwén sota eg to inpangonod ni dinteg bengat i inokesan sha son si-kato, no diket in-inges to pay i bakdang to son Apo Shiyos ja kowan to ey Ameto.

<sup>19</sup> Jet si Jesus, kowan to so nonta ira Hodiyo ey, “Kinapodpodno iya ikowan ko son si-kayo. Si-kak ja Anak to, enshiy kabedinan kon mandeka ni angken nganto, no a-

abos ko bengat; jet say mebedin bengat ja dag-en ko, sota inon-an ko ja obda nen Amak. Sota obdak, inges toy obda nen Amak. <sup>20</sup> Ta si Amak, ensemek towak; isonga emin na obda to, inpa-amta so son si-kak. Jet no ma-onod alin timpo, waray obden pedeka to son si-kak, jet mas kaskasshaw wa pasiya nem say sota dingkak niman, jet si-kayo, messhaw kayo. <sup>21</sup> Si Amak, si-katoy ememiyag nonta nanketey, jet angken si-kak ja Anak to, mengi-kanak ni biyag so nonta toon piyan kon pengi-kanan. <sup>22</sup> Si Amak, aliwén si-katoy mengigsheng no sipay maysedakan, no diket in-akan ton emin son si-kak i kanebengan kon mengigsheng ni panbenagan ni emin na too ingkatod ingka, <sup>23</sup> say emin na too, si-kak i shedjawen sha ja inges toy shaka pengiredjaw son Amak. Sota eg mengiredjaw son si-kak, eg sha ngo ishayaw si Amak, ta si-kak sota inbetkag to di. <sup>24</sup> Kinapodpodno iya ikowan ko son si-kayo. Sota memati nonta ikowan ko tan memati son Amak ja engibetkag ali son si-kak, si-katoy ewad-an ni biyag ja enshiy to engintegan, jet eg to da-kaman na meshosa, ta wara son si-kato sota biyag ja edapo son Apo Shiyos.

<sup>25</sup> “Kinapodpodno iya ikowan ko son si-kayo. Say too, singa may-eshig ey etey pangkep ni basol, nem no itenengan sha niman sota ikowan ko, may-aknan ira ni biyag, ta si-kak sota Anak nen Apo Shiyos. <sup>26</sup> Ta si Amak, si-katoy kedepo-i ni biyag, jet si-kak ja Anak to, in-aknan towak ni kanebengan kon mengi-kan ni biyag, <sup>27</sup> tan in-aknan towak pay ni kanebengan kon mengigsheng no sipay maysedakan, tep si-kak, nanbalinak ni too. <sup>28</sup> Karekayo messhaw ni sajay ya inkowan ko la, ta waray onsabi alin timpo,

ja sota ira nanketey, itenengan shay esel ko, <sup>29</sup> jet onbangan ira di. Jet sota mapteng i aramid to nonta mabiday pay laeng, may-aknan ira ni biyag ja enshiy to engintegangan, nem sota nankeked-sel, manbiyag met laeng ira, nem meshosa ira.”

<sup>30</sup> Jet si Jesus intoloy to sota kowan to ey, “Si-kak, aliwén nak iba-ngat ja dag-en i piyan ko, no diket sota ikowan nen Amak son si-kak, si-katoy dag-en ko. Isonga say naka pengigsheng, aliwén o-owap, ta aliwén sota piyan koy dag-en ko, no diket sota piyan nen Amak ja engibetkag son si-kak. <sup>31</sup> No si-kak met laeng i mengikowan ni pangkep son si-kak, singa enshiy kowinta to. <sup>32</sup> Nem wáres Amak ja kaon-paneknek son si-kak, jet amtak ey sotan na paneknek to pangkep son si-kak, podno. <sup>33</sup> Si-kayo, engibetkag kayo ni en mantetneng so nen Juan jet inkowan to son si-kayo i podno, ey si-kak sota ondaw ali ja maysa-dat son si-kato. <sup>34</sup> Nem si-kak, eg mesepol iya paneknek ni too ta pineneknekan towak nen Amak. Say kabol ni inkowanan ko so nonta inkowan nen Juan nontan da, say memati kayo et say maysedakan kayo. <sup>35</sup> Si Juan, may-eshig ey si-kato sota singa silew wa maredang, ta si-katoy ondawag so ni nem-nem ni too, jet kayoka man-im-deng ja mengewat son si-kato; nem sankatikan bengat. <sup>36</sup> Si Juan, inkowan to i maypangkep son si-kak, nem sota mismon dingdingkak, sotan i epateg ja kamta-an to ey inbetkag towak ali nen Amak, ta si-kak i shinotokan ton ondaga so ni obda to. <sup>37</sup> Jet si Amak, ja engibetkag son si-kak, si-kato met laeng i engipa-amta ni maypangkep son si-kak. Nem no waray piyan ton pa-amta, eg jo koston itenengan, eg jo koston on-

an, <sup>38</sup> eg jo nemnemnemen sota esel to ja inkowan to. Say kasaan to ket eg jowak pati-en ja inbetkag ali nen Amak. <sup>39</sup> Si-kayo, joka ad-ashala sota esel nen Apo Shiyos ja naysolat nonta bayag da, ta say pangkep jo, kowan jo emo ey sepolan jo nodtan sota biyag ga enshiy to engintegangan. Nem si-kak i kaytoshongan nonta ira naysolat nodtan na dibsho ja joka ad-ashala, <sup>40</sup> ey si-kayo, eg jo kosto ja memati son si-kak, say may-aknan kayo koma ni biyag ja enshiy to engintegangan. <sup>41</sup> Si-kak, aliwén sota shayaw ni tooy naka en-enapa, <sup>42</sup> tep amtak i nemnem jo: enshiy semek jo son Apo Shiyos. <sup>43</sup> Si-kak, dimawak alid jay ya in-aknan nen Amak ni kanebengan ko, nem eg jowak inewat. Nem amtak ka no wára et ngo mowan i ondaw ali son si-kayo, ja ka-way ton enshiy en engibetkag son si-kato, si-kato et ngo mowan i ewaten jo. <sup>44</sup> Isonga eg kayo emati son si-kak, ta say pipiyan jo, sota shayaw ni kait jon too, ey aliwá et ta sota koston shakejo so nen Apo Shiyos, ja istay topogen jo komen panshedjawan. <sup>45</sup> Aliwén jo ipangkep ey si-kak i mengireshom son si-kayo so nen Amak, ta say podnon mengireshom son si-kayo so nen Amak, si Moises, ja joka panshindi. Tep eg jo met laeng pinatit bilin to. <sup>46</sup> Si-kayo, no agpayson emati kayo son Moises, istay memati kayo koma ngo son si-kak, tep sota insolat nen Moises ket maypangkep son si-kak met laeng. <sup>47</sup> No eg jo pati-en sota insolat nen Moises, toway pesing jon memati ngarod nonta naka pan-ikowan?”

## 6

*Si Jesus, pinekan to sota dimen dibon too*

<sup>1</sup> Idi enshiy bayag to, si Jesus, bimaliw shima baybay shi Galilia, ono sota kowan sha ey Tibirias, jet dimaw nodta shemang to. <sup>2</sup> Jet eshakil la pasiyay toon imonod son si-kato, ta inon-an sha sota kaskasshaaw wa dingka to, ni in-mapteng ira nonta emanpansekit. <sup>3</sup> Si Jesus, inodop to iray too to, jet timiyed ira shima shontog, ja kowan to ey itod-an to ired man. <sup>4</sup> Nontan na timpo, shanshani ma sota piyasta ni Hodiyoj ja kowan sha ey Paskowa.

<sup>5</sup> Idi wímingi si Jesus, inon-an to ali ira sota eshakil la toon emandaw son si-kato, jet kowan to ey, “Felipe, toway pengal-an ni mekan ja on-anay ya kenen ira niman na totoo?” <sup>6</sup> (Si Jesus, piyan ton peshasen bengat si Felipe, no ngantoy isongbat to, isonga inkowan to iyay. Nem si Jesus, amta to mangon shagos i pesing ton memekan nonta ira totoo.)

<sup>7</sup> Jet si Felipe, simongbat ja kowan to ey, “Sajay ya karakel sha, angken pigen dasos i itongkal tayo ni tinapay, eg pay on-anay son si-kara, angken ko-ko-tiken tayo.”

<sup>8</sup> Waray sakey nodta too nen Jesus ja si Andres i ngaran to ja agi nen Simon Pedro; kowan to ey, <sup>9</sup> “Waray sakey shiyay ya balodaki so nonta ira totoo, ja nanbalon ni dimen boknol la tinapay, tan showen piskaw. Nem enshi met i silbi to, ta eg met laeng on-anay so ira niya eshakil la totoo.”

<sup>10</sup> Jet si Jesus, inkowan to so nonta ira too to ey, “Patongaw jo ira ja totoo.”

Jet sota ira totoo, timanongaw ira nodta paway, jet say kabebilang ira nonta daleki, dimen dibo, powiray bibii tan a-anak. <sup>11</sup> Jet nontan ma, si Jesus inda to sota tinapay tan sota piskaw wa balon nonta balodaki jet nan-iyaman

son Apo Shiyos, asan toka paiweshis sota mekan na shimakel so nonta ira totoo ja timanongaw. Jet sota ira totoo, engan ira ingkatod enapsel iren kosto.

<sup>12</sup> Idi enaksheng ma ira sota totoo ja engan, inkowan nen Jesus so nonta ira too to ey, “Sa-nop jo sota ira sobden tinapay, say enshiy en onkawas.”

<sup>13</sup> Jet sina-nop sha sota ebay-an na eg sha kinan nodta dimen tinapay ja inpara-kel nen Jesus. Jet say na-olnongan nonta sobdara, sampolo tan showen baskit ja nankepno.

<sup>14</sup> Sota ira totoo, idi inon-an sha iyay ya dingka nen Jesus, ja inpara-kel to sota mekan, nasshaaw ira, jet kowan sha ey, “Kinapodpodno to ey sajay sota para padto ja inpadora nonta bayag da ey ondaw alid ja dobong.”

<sup>15</sup> Si Jesus, amta toy wáred nem-nem ira niyay ya too, ey piditen shen si-katoy panbedin shen ari sha; isonga si Jesus, indekjas to ira, jet dimaw ja abos to nodta nayda-med den shontog.

### *Nan-akad si Jesus nodta tapew ni shanom*

<sup>16</sup> Idi mama-shem mala, sota ira too nen Jesus, enalong ira nodta kad-an da ni baybay, <sup>17</sup> jet ira nandogan shi bangka, ta on-oli ired Kapirnaom. Nem edabi mala ey eg pay laeng simabi si Jesus shi kadnan sha. <sup>18</sup> Jet nontan, sota shadoyon ni baybay, makedsang nga pasiya tep emansheshagem ma pasiya. <sup>19</sup> Idi waray enem emon kilomiro ja nan-akshan da nonta bangka ja nandogan nonta ira too nen Jesus, inon-an sha si Jesus ja eman-ekad ali nodta naytapew ni shanom ja eman-a-sop son si-kara, jet naykel-ewan iren pasiya. <sup>20</sup> Nem si Jesus, kowan to son si-kara

ey, “Karekayo ontakot, tep si-kak iyay!”

<sup>21</sup> Jet nay-imdengan ira sota too to, jet in pandogan sha si Jesus nodta bangka. Jet mimotok iren shagos nodta dogad ja dawān sha.

*Sota ira totoo, sha inenap si Jesus*

<sup>22-24</sup> Nonta na mama-shem, sota ira eshakil la totoo, inon-an shay inda-jat nonta ira too nen Jesus jet inon-an shen enshis Jesus ja ekilokan nodtan. Isonga singked sha si Jesus nodta kawad-an shen nay-esop nodta enganan sha ni tinapay nonta naksheng nga nan-iyaman si Jesus son Apo Shiyos. Kowan sha ey wāres Jesus pay laeng nodtan na dogad, ta sakey bengat nonta bangka ja nandoganan ni too nen Jesus, enshiy eshom. Nem idi ewa-wa, enshi met gayam si Jesus. Isonga idi wāra iray simalsheng nga bangken edapod Tibirias nodta kad-an sha, nandogan ngo ira ja en mengenap son Jesus shi Kapirnaom.

*Si Jesus, si-kato sota may-eshig ey tinapay ya mengi-kan ni biyag*

<sup>25</sup> Jet sota ira totoo, simbira si Jesus nodta naybaliw jet kowan sha ey, “Apo, pigan aliy indaw mod jay?”

<sup>26</sup> Si Jesus, simongbat ja kowan to ey, “Kinapodpodno iya ikowan ko son si-kayo. Amtak ey jowakka en-enapa ta engan kayo nontan ni tinapay, jet nanpesel kayon kosto; aliwen sota kaskasshaaw wa dingkak i jowaksoka en-enapi so. <sup>27</sup> Aliwā komen sota mekan i jo kamkamkaman, ta say mekan, ema-bos. Isonga say kamkaman jo koma ja jo enapen, sota may-eshig ey mekan ja mengi-kan ni biyag ja enshiy to engintegan. Sajay ya mekan na naka pan-ikowan, sota kowan sha ey Anak ni Too, si-kato i mengi-kan son si-kayo. Say ka-amta-an to ey wāray in-akan

nen Apo Shiyos ja kanebengan kon mengi-kan ket inpa-sas to ey towakka kosto-i.”

<sup>28</sup> Jet sota ira totoo, kowan sha son Jesus ey, “Ngarantoy kowan mo ey pesing mi ja mandeka ni kekosto-i nen Apo Shiyos?”

<sup>29</sup> Si Jesus, simongbat ja kowan to ey, “Sajay i piyan nen Apo Shiyos ja dag-en jo: pamati kayo son si-kak, ta si-kak i inbetkag to ali.”

<sup>30</sup> Nem sota ira totoo, kowan sha ey, “Ngaranto ngarod i ipa-sas mo pay son si-kami, say patien mika? Ngantoy dag-en mo ja inges toy dingka nen Moises nonta bayag da? <sup>31</sup> Ta sota ira appo tayo da, engan ira nonta tinapay ya kowan sha ey mana ja edapod dangit nonta wāra ira nodta dogad ja nan-ak-akshan sha ja enshiy balbaley. Sajay i kowan nonta esel nen Apo Shiyos ja naysolat, ja kowan to ey, ‘Inaknan nen Moises ira ni tinapay ja edapod dangit.’ ”

<sup>32</sup> Si Jesus, simongbat ja kowan to ey, “Kinapodpodno iya ikowan ko son si-kayo. Sota tinapay ya kinan sha, ja edapod dangit, si Apo Shiyos ja Amak i engi-kan son si-kara; aliwen si Moises. Jet si Amak met laeng i emengi-kan ni koston tinapay son si-kayo ja medepod dangit. <sup>33</sup> Sota tinapay ya edapod dangit, ja in-akan nen Apo Shiyos, si-katoy emengi-kan ni biyag ni tood ja dobong.”

<sup>34</sup> Jet sota ira totoo, kowan sha ey, “Apo, aknim kami niman nita tinapay ya eg ma-ma-bos ingkatod ingka!”

<sup>35</sup> Si Jesus, simongbat ja kowan to ey, “Si-kak sota may-eshig ey singa tinapay ya emengi-kan ni biyag, jet sota ondaw ali son si-kak ja memati, eg ma-ekang, tan eg ma ma-kew ni shanom. <sup>36</sup> Nem si-kayo, angken inon-an joy dingkak, eg kayo memati son si-kak. Sajay,



inkowan ko son si-kayo nontan et inpinshowak mowan. <sup>37</sup> Sota ira i-awat nen Amak son si-kak, si-karay memati son si-kak, jet sajay ira ja ondaw ali son si-kak, man-imdengak ja mengewat son si-kara. <sup>38</sup> Ta si-kak, edapo-ak alid dangit, jet say obda-en ko bengat, sota piyan nonta engibetkag son si-kak; aliwén sota piyan ko. <sup>39</sup> Jet say piyan nonta engibetkag son si-kak ja dag-en ko, emin ira sota toon in-awat to son si-kak, ja emati, isingpet ko iren emin, jet shi ka-onoran alin akew, panbiyag ko ali ira shi patey. <sup>40</sup> Say piyan pay nen Amak, emin ira sota toon ewatan toy maypangkep son si-kak, jet memati, may-aknan ira ni biyag ja enshiy to engintegan, tan panbiyag ko ira di shi ka-onoran na akew.” Kowan nen Jesus.

<sup>41</sup> Waray eshom nodta Hodiyo ja eg makakosto son Jesus; idi inteneng sha sota kowan nen Jesus ey si-kato sota tinapay ja edapod dangit, ireka mankotot, <sup>42</sup> ja kowan sha ey, “Sajay met si Jesus; amta tayo met iray maka-anak son si-kato! Angsan i to ikowan ey si-kato ket edapod dangit.”

<sup>43</sup> Jet si Jesus, kowan to son si-kara ey, “Aliwén kayo koma onkotot ni maypangkep niya inkowan ko la. <sup>44</sup> Angken sipa, enshiy en ondaw ali son si-kak ja memati, no si Amak ja engibetkag son si-kak ket eg to pannemnem sotan na too ja ondaw ali son si-kak ja memati. Jet sota toon memati son si-kak, panbiyag ko ali shi patey shi ka-onoran na akew. <sup>45</sup> Jet angken nonta bayag da, waray naysolat ja inkowan ira nonta para padto, ja kowan sha ey, ‘Emin na too, tod-an ira nen Apo Shiyos.’ Sajay i inkowan ni para padto, jet sota metod-an tan mengitneng son Amak, si-karay ondaw ali ja memati son si-kak.

<sup>46</sup> Angken sipa, enshiy engasas son Apo Shiyos ja Amak, no diket si-kak bengat, ta si-kak, say edapod an ko, si-kato; isonga inon-an ko. <sup>47</sup> Kinapodpodno iya inkowan ko son si-kayo. Sota memati son si-kak, may-aknan ni biyag ja enshiy to engintegan. <sup>48</sup> Si-kak sota may-eshig ey tinapay ya mengi-kan ni biyag. <sup>49</sup> Agpayso ita kowan jo ey sota appoyo da, engan ira nonta tinapay ya kowan sha ey mana shima dogad ja nan-ak-akshan sha ja ayshiy balbaley. Nem iso met laeng nga etey ira. <sup>50</sup> Nem saja tinapay ya naka pan-ikowan son si-kayo niman, mismon edapo alid dangit, jet sota ira mengan so niyay, eg ira metey ingkatod ingka. <sup>51</sup> Si-kak sota mismon tinapay ya sibibiyag ja edapod dangit, jet sota mengan so niyay ya tinapay, may-aknan ni biyag ja enshiy to engintegan. Jet sota kowan ko ey tinapay, si-kato iya bakdang ko ja i-akan ko para so ni tootod ja dobong say mewad-an ira ni biyag.” Sajay i kowan nen Jesus.

<sup>52</sup> Nonta intenengan shay inkowan nen Jesus, nansosongbat ira sota kimotot nonta ekay da, ja kowan sha ey, “Toway pesing to konon mengi-kan ni bakdang to son si-katejo, ja kenen tayo?”

<sup>53</sup> Isonga si Jesus, kowan to son si-kara ey, “Kinapodpodno iya ikowan ko son si-kayo. No eg jo kenen iya bakdang ko, tan eg jo inomen sota shalak, enshi son si-kayo i biyag. <sup>54</sup> Jet sota mengan niya daman ko, tan menginom niya shalak, si-karay may-aknan ni biyag ja enshiy to engintegan, jet panbiyag ko ira di shi ka-onoran alin akew. <sup>55</sup> Ta saja daman ko, tan saja shalak, si-katoy agpayson emengi-kan ni biyag ni too. <sup>56</sup> Jet sota mengan niya daman ko, tan menginom niya

shalak, si-karay wára son si-kak, jet si-kak, wára-ak ngo ni olay son si-kara. <sup>57</sup> Si Amak ja engibetkag son si-kak, si-katoy kedepo-i ni biyag; isonga wára ngo son si-kak i biyag. Jet sota mengan ni daman ko, i-aknan ko ngo ni biyag. <sup>58</sup> Si-kak sota tinapay ya mismon edapod dangit, jet si-kak, aliwén inges ko sota tinapay ya kinan ira nonta appo tayo da shima dogad ja nan-ak-akshan sha ja enshiy balbaley, ta etey met laeng ira. Nem sota mengan niya tinapay ya naka pan-ikowan niman, ja si-kato iya bakdang ko, si-karay may-aknan ni biyag ja enshiy to engintegan.” <sup>59</sup> Sajay i inkowan nen Jesus nonta inpantoro to shima sa-nopan ira ni Hodiyoos shi Kapirnaom.

<sup>60</sup> Jet eshakel so nonta ira too nen Jesus i eg makakosto niyay. Idi itenengan sha iyay ya toro to, kowan sha ey, “Polibas ira jay ya toro to. Enshiy emoy makabaal la on-awat so!”

<sup>61</sup> Enshiy engikowan son Jesus ey sajay i shaka pankototi, nem amta toy wáred nemnem sha; isonga inkowan to ey, “Sota inkowan ko la, si-katoy kabol ni eg jo ma pati-an son si-kak? <sup>62</sup> No bilang ey asen jowakka emanked-jang ja on-olid dangit, ikotot jowak pay laeng ngata? <sup>63</sup> Say emengikan ni biyag ni bakdang, sota jasjas to. No eg onjasjas, enshiy silbi ni bakdang. Sajay i kay-eshigan ni inkowan ko, ta emengi-kan ngo ni biyag. <sup>64</sup> Nem amtak ey wára son si-kayoy eg memati son si-kak.” Kowan nen Jesus. (Sajay i inkowan nen Jesus, ta sigod ja amta to sota ira totoon eg memati, tan amta to sota toon mengibaag son si-kato ali so nonta toon makakontra son si-kato.) <sup>65</sup> Tan say kowan to pay, “Isonga inkowan ko son si-kayo ey, angken sipa, enshiy en ondaw ali son si-kak ja memati,

no si Apo Shiyos ja Amak ket eg to pannemnem ira ja ondaw ali son si-kak.”

<sup>66</sup> Idi naksheng ma ja inkowan nen Jesus iyay, eshakel nodta ira istay too to i eg timoloy ja meki-odo-odop son si-kato.

<sup>67</sup> Jet si Jesus, kowan to so nonta ira sampolo tan showa ja apostol to ey, “Si-kayo ngay? Piyan jo ngon maysi-jan son si-kak?”

<sup>68</sup> Jet si Simon Pedro, simongbat ja kowan to ey, “Sipa ngay i dawán min eshom no aliwén si-kam? Ket si-kam bengat i kawad-an ni esel ja emengi-kan ni biyag ja enshiy to engintegan, <sup>69</sup> jet kamika memati son si-kam, ta amta mi ey si-kam sota shinotokan nen Apo Shiyos ja inbetkag to did ja dobong.”

<sup>70</sup> Jet si Jesus, simongbat ja kowan to ey, “Say pinidik, sampolo tan showa, nem waray sakey son si-kayo ja dimonyo.” <sup>71</sup> (Sajay i inkowan nen Jesus, ta si Judas ja anak nen Simon Iskariote ja sakey nodta sampolo tan showen apostol to, si-kato aliy mengibaag son Jesus so nonta ira toon makakontra son Jesus.)

## 7

*Si Jesus, tan sota ira a-aki to, ira ekipiyasta*

<sup>1</sup> Idi enshiy bayag to, shi Galilia bengat i nan-ak-akshan nen Jesus, ta eg to kosto ja manshedan shi Jodia, ta sota ira pangolo ni Hodiyoos shiman, piyan shen bono-en si Jesus. <sup>2</sup> Jet nontan na timpo, shan-shani ma sota piyasta ni Hodiyoos ja kowan sha ey piyasta ni Kampo. <sup>3</sup> Jet sota a-aki nen Jesus, kowan sha son si-kato ey, “Ilekjas mo iyay ya dogad, jet daw ka shi Jodia, say asen ira nonta emati son si-kam shiman sota ira moka dagdag-a ja kaskasshaaw. <sup>4</sup> Say too, ja piyan ton amta-en ni karakdan, aliwén to en i-emot i dag-en to, no diket

dag-en tod karakdan ni too, say asen ni emin na tood ja dobong.”<sup>5</sup> (Sajay i inkowan ira nonta a-aki to, tep nontan, angken si-kara, eg sha nin pinati si Jesus.)

<sup>6</sup> Jet si Jesus, simongbat ja kowan to son si-kara ey, “Si-kak, aneng nin sota timpon pengipasas ko ni maypangkep son si-kak. Nem si-kayo, angken bina-ngatan mangoy dag-anan jo so ni piyan jon dag-en, angken ngaranton akew.”<sup>7</sup> Si-kayo, aliwen kontra shakejo niya tood ja dobong, nem si-kak, kontra sha-ak, tep naka pan-ikowan son si-kara sota ngaaw wa aramid sha.<sup>8</sup> Daw kayo mango shima piyasta, nem si-kak, ekak nin ondaw ta aneng sota koston timpok.”<sup>9</sup> Sajay i inkowan nen Jesus son si-kara, jet ebay-an mango nin shi Galilia; eg ekidaw son si-kara.

<sup>10</sup> Idi enaksheng den dimaw ira sota a-aki to nodta piyasta, timened si Jesus son si-kara ni abos to, ja enshiy maka-ama.<sup>11</sup> Jet nonta marama sota piyasta, pan-enapa ira nonta pangolo ni Hodiyoos si Jesus, jet shaka ibagabaga nem waray engasas son si-kato.

<sup>12</sup> Jet nontan na timpon piyasta, waray toon na-olnong, jet say kowan ira nonta eshom, kowan sha ey, “Mapteng i ogadi nen Jesus.”

Nem sota ira eshom son si-kara, kowan sha ey, “Enshi, si-katoy kaon-awis so ni toon mandeka ni ngaaw.”

<sup>13</sup> Nem sajay iren too, eg sha inkowan shi karakdan i maypangkep son Jesus, tep entakot ira so nonta pangolo ni Hodiyoos.

#### *Nantoro si Jesus shima Timplo*

<sup>14</sup> Idi nankawa ma sota piyasta, dimaw si Jesus shima Timplo jet en nantoro so nonta ira totoo,<sup>15</sup> jet sota ira eshom ma pangolo ni Hodiyoos, ja engitneng ni inkowan

nen Jesus, ireka messhaaw, jet kowan sha ey, “Toway inpasing niyay ya toon dimaing, ey ootik met i ashal to?”

<sup>16</sup> Idi intenengan nen Jesus iyay ya inkowan ira nonta pangolo ni Hodiyoos, simongbat ja kowan to ey, “Saja naka pan-itoro, aliwen na mismon edapod nemnem ko, no diket sajay i kowan nonta engibetkag son si-kak.”<sup>17</sup> Jet sota toon piyan ton onoren i kowan nen Apo Shiyos, idasin to no sipay edapo-an niyay ya naka pan-ikowan — no nemnem ko, ono si Apo Shiyos i edapo-an to.<sup>18</sup> Sota toon say toka pan-itoro ket sota maypangkep met laeng ni bakdang to, say wared nemnem to bengat, sota kayshedjaw to shorog. Nem sota toon say wara son si-kato ket sota kayshedjawan nen Apo Shiyos ja engibetkag son si-kato, enshiy kolang ni toka ikowan; podnon emin.” Kowan nen Jesus.

<sup>19</sup> Idi enaksheng iyay ya inkowan nen Jesus, kowan to so nonta ira pangolo ni Hodiyoos ey, “Sota dinteg nen Moises, wara son si-kayo ja joka ad-ashala, nem angken sakey son si-kayo, enshiy emati nontan na dinteg nen Moises, ta no wara koma, apay nga kowan jo ey bono-en jowak?”

<sup>20</sup> Jet sota ira totoo, simongbat ira ja kowan sha ey, “Kaka man-engaw! Sipay engikowan ey bono-en shaka?”

<sup>21</sup> Jet si Jesus, simongbat ja kowan to ey, “Nonta pinsak, waray inpamapteng kon emansekit nonta akew ni ngilin, jet nontan, kayoka emesshaaw, no apay nga dingkak sotan.”<sup>22</sup> Say sakey ya dinteg ja in-akan nen Moises, ja tinewid to so nonta appo to la, sota kowan tayo ey kogit, jet sajay, angken na akew ni ngilin, joka pandag-a say

metongpal sotan na dinteg. <sup>23</sup> Jet no timpo ni ngilin joka pandaga iyay ya kogit, say eg koma mesheshal i dinteg pangkep ni kogit, apay nga no wára mangoy dag-en ko ja panmaptengan ni toon emansekit ni akew ni ngilin ket kayoka onbonget? <sup>24</sup> Aliwén jo iba-ngat ey ngaawak pangkep nonta inon-an jon dingkak, no diket nemnem jo koma sota dingkak ja panmaptengan ni too.”

*Pantatabali nonta ira totoo no si Jesus sota naypadton mengisedakan ali*

<sup>25</sup> Sota eshom ma tood Jerusalem, idi intenengan sha iyay ya inkowan nen Jesus, kowan sha ey, “Sajay met sota toon kowan ira nonta pangolo tayo ey bononen sha ja shaka en-enapa? <sup>26</sup> Iyay met gayam shiyay ya emantoshoshi karakdan ni too, jet apay nga eg sha met a-degken? Sigosho ireka emo memati ma ey si-kato sota naypadton mengisedakan ali ja ibetkag nen Apo Shiyos. <sup>27</sup> Nem say naypadto met ket sota toon ibetkag ali nen Apo Shiyos, angken sipa, enshiy maka-amta ni kedepo-an to. Nem sajay ya too, amta tayo met i edapo-an to.”

<sup>28</sup> Isonga si Jesus, nonta wáred ma Timplo ja emantoshoshi, inkedsang toy esel to ja kowan to ey, “Say kowan jo, amtayowak, tan amtayoy edapo-an ko. Nem aliwén nemnem koy dinawan ko did jay, no diket wáray engibetkag son si-kak, ja si Apo Shiyos ja kedepo-i ni podno. Jet eg jo amtes Apo Shiyos. <sup>29</sup> Nem si-kak, amtak ta edapo-ak son si-kato, jet sikatoy engibetkag ali son si-kak ja ondaw alid ja dobong.”

<sup>30</sup> Idi enaksheng nga inkowan to iyay son si-kara, piyan sha ma ja a-shelen si Jesus, nem enshiy angken sakey ya engitoday, ta

aneng nin sota timpon naykesheng nga pandikat to.

<sup>31</sup> Nem sota eshakil la too, wára ngoy eshakil la emati so nen Jesus, jet say kowan sha, “Enshiy eshom ma toon tayoka sesseskesha ja ibetkag ali nen Apo Shiyos. Si-kato iyay ya too, ta no bilang ey wáray ondaw ali ja eshom, eg to ingesen i dingdingka niyay ya too.”

*Sota ira kowadja, dimaw ira ja istay mengshel son Jesus*

<sup>32</sup> Sota ira Parisiyo, intenengan sha iyay ya inkowan ira nonta totoo pangkep son Jesus jet sajay iren Parisiyo, tan sota ira apo ni papashi, engibetkag ira ni kowadja ja en mengshel so nen Jesus. <sup>33</sup> Nem si Jesus, amta toy wáred nemnem sha, jet kowan to so nonta ira toon eshakil ja esa-nop ey, “Say kawashak son si-kayo, entikey ya timpo. On-oli-ak ka shagos so nonta engibetkag son si-kak alid ja dobong. <sup>34</sup> Jet enenapen jowak no toway dinawan ko, nem eg jowak sepolen. Jet shima dáwan ko, eg mebedin na on-onod kayo son si-kak.”

<sup>35</sup> Jet sota pangolo ni Hodiyo, idi intenengan sha iyay ya inkowan nen Jesus, kowan sha ey, “Towa konoy dogad ja dáwan to? Ampet siya ey, ondaw shima dogad ja nay-arawi ja naywarisan ira nonta kait tayon Hodiyo, jet mengitoshod man so nonta ira aliwén Hodiyo. Jet mebedin noman na eg tayo ma on-an. <sup>36</sup> Apay nga kowan to ey tayo enenapen nem eg tayo sepolen? Tan shima dáwan to kono, eg tayo mebedin na onoren. Ngaranto emoy piyan ton a-selen?”

*Si Jesus, wáray inkowan to nonta ka-onoran na akew ni piyasta*

<sup>37</sup> Sota ka-onoran na akew ni piyasta ni Hodiyo, si-katoy kap-atkan son si-kara, jet nontan na akew, imetan si Jesus shi sangon ira nonta eshakel la too jet inkedsang toy esel to ja kowan to ey, “No sipa ira sota na-kew ni shanom, ondaw ira di son si-kak jet man-inom ira. <sup>38</sup> Ta say kowan ni esel nen Apo Shiyos ja naysolat nonta bayag da, kowan to ey, ‘Sota memati son si-kak, may-eshig ey wara ni olay son si-kato sota shanom ja singa temtem ja eg mati-an.’” <sup>39</sup> (Sajay ya inkowan nen Jesus, piyan ton ikowan ey si-katoy kedepo-an nonta Ispirito Santo nen Apo Shiyos ja ewaten ira di nonta memati son si-kato. Nem aneng nin, ta mesepol la metey si Jesus, jet manbiyag mowan. Ondaw pay shi dangit, asan toka i-ewat ma sota Ispirito Santo.)

*Sota ira totoo, nanshowa ira ja eg man-inawatan*

<sup>40</sup> Idi intenengan ira nonta totoo iyay ya inkowan nen Jesus, kowan ira nonta eshom ey, “Siya, sajay nga agpayso sota para padto ja tayoka sesseskesha.” <sup>41</sup> Jet angken sota ira eshom, kowan sha ey, “Sajay nga agpayso sota naypadton mengisedakan ja ibetkag ali nen Apo Shiyos.”

Nem sota ira eshom, kowan sha ey, “No si-kato sota naypadton mengisedakan ja ibetkag ali nen Apo Shiyos ket aliwen shi Galilia komay edapo-an to, <sup>42</sup> ta say kowan ni para padto nonta bayag da, sota mengisedakan ja ibetkag ali nen Apo Shiyos ket mandepo kono shi poli nen Ari David, tan shi Bitlihim kono pay i kedepo-an to, ta si-katoy ili nen Ari David.” (Sajay i kowan sha ta say pangkep sha, nay-anak si Jesus shi Galilia.)

<sup>43</sup> Isonga nontan ma, eg nan-inges i kowan ni totoo. <sup>44</sup> Jet sota ira eshom, piyan shen a-shelen si

Jesus, nem enshiy mengshel son si-kato.

*Sota ira pangolo ni Hodiyo, eg ira memati son Jesus*

<sup>45</sup> Sota kowadja ja istay en mengshel son Jesus, nay-oli ira so nonta engibetkag son si-kara ja Parisiyo, tan apo ni papashi, jet kowan ira niyay so nonta ira kowadja ey, “Apay nga eg jo di inshel?”

<sup>46</sup> Sota ira kowadja, simongbat ira ja kowan sha ey, “Angken sipen too, enshiy mi inon-an ja inges toy kepantosho niyay ya too.”

<sup>47</sup> Jet sota ira Parisiyo, kowan sha ey, “No kasta, angken si-kayo, imonod kayo so nonta kowan to ja o-owap?” <sup>48</sup> Emin na pangolo jo, tan angken si-kamin Parisiyo, angken sakey son si-kami, enshiy en imonod son si-kato. <sup>49</sup> Sota ira toon imonod son si-kato, eg sha amtay dinteg nen Moises, nem angkena, ta meshosa met laeng ira.”

<sup>50-51</sup> Jet si Nikodimo, sakey so ira nonta Parisiyo nodtan. Si-kato sota dimaw son Jesus nontan da; isonga si-katoy simongbat ja kowan to ey, “Say wared dinteg tayo, eg mebedin na maybangat i pengigsheng no nanbasol i sakey ya too ono enshi, no eg nin mebigtal no ngantoy basol to.”

<sup>52</sup> Nem sinongbatan sha et si Nikodimo ja kowan sha ey, “Apay nga moka pan-ibaliwi? Sakey ka gayam ma kaidiyan ton i-Galilia? Basam kari sota inpaisolat nen Apo Shiyos nonta bayag da: amta-en mo ey enshiy para padton mandepod Galilia.” Sajay i inkowan sha son Nikodimo.

<sup>53</sup> Jet sajay iren esa-nop, nansisijan iren imakad shi baley sha.

## 8

*Kowan sha ey bono-en sha sota biin sinokalan shen ekileki*

<sup>1</sup> Nem si Jesus, dimaw nodta shontog ja kowan sha ey Olibas. <sup>2</sup> Jet idi ewa-wa, bimowas sa pasiya ja dimaw mowan shima Timplo. Eshakel ira sota totoon esa-nop son si-kato, jet si Jesus, timongaw ja nantoro son si-kara. <sup>3</sup> Jet idi maramen emantosho si Jesus, sota mamaistoro ni dinteg ni Hodiyo tan sota ira Parisiyo, indaw sha ali sota biin sinokalan sha ja ekileki, jet insango sha so nonta ira totoo. <sup>4</sup> Kowan sha son Jesus ey, "Maistoro, sajay ya bii, inon-an min mismo ja ekileki, <sup>5</sup> jet say kowan ni dinteg ja in-akan nen Moises son si-katejo, kowan to ey sota biin mandeka ni sajay ya aramid, kenshat ta mebono ja mekespigan ni bato. Jet nganto ma i ikowan mo maypangkep son si-kato?" <sup>6</sup> (Sajay i inkowan sha, tep kowan sha ey balang nem waray pankamali-an nen Jesus ni esel to ja ikowanan sha so ey nanbasol.)

Nem si Jesus, jimemeg jet inpan-solat toy kalomot tod bo-day. <sup>7</sup> Jet nonta nanjemeg si Jesus shi bo-day, ememasig ira sota Parisiyo ni salodsod son si-kato. Jet si Jesus imekwás jet kowan to son si-kara ey, "No sipa son si-kayo i polos sa eg nanbasbasol, si-katoy mengirokin mengespig nita bii." <sup>8</sup> Jet jimemeg mowan si Jesus shi bo-day ja intoloy ton inpan-solat i kalomot to.

<sup>9</sup> Jet sota toon mamaistoro ni dinteg ni Hodiyo tan sota ira Parisiyo, idi intenengan sha sota inkowan nen Jesus, esa-sa-key iren engilekjas so nonta esa-nop pa totoo, nanshogi nodta pangolo sha, jet say ebay-an nodtan, si Jesus tan sota bii bengat.

<sup>10</sup> Timangkak si Jesus jet kowan to so nonta bii ey, "Towa ira da sota kowan sha ey mengespig son si-kam ni bato? Enshiy engitodoy?"

<sup>11</sup> Sota bii, simongbat ja kowan to ey, "Angken sakey son si-kara met ket enshiy engitodoy."

Jet si Jesus, kowan to so nonta bii ey, "Angken si-kak, aliwa ngon kowan ko ey meshosa ka. Nem akad ka jet bi-jagim sota ngaaw wa aramid mo."

*May-eshig si Jesus ey silew ni dobong*

<sup>12</sup> Si Jesus, intoloy ton nantoro so nonta ira totoo ja kowan to ey, "Si-kak i silew wa ondawag so ni nemnem ni tood ja dobong. Sota memati ja on-onod son si-kak, may-eshig ey enshi ired embolinget, ta edawagan may nemnem sha; isonga waray biyag son si-kara."

<sup>13</sup> Nem sota ira eshom ma Parisiyo, kowan sha ey, "Sata kowan mo, eg mepati, ta say moka pan-ikowan ket sota maypangkep met ni bakdang mo shorog!"

<sup>14</sup> Sinongbatan ira nen Jesus, ja kowan to ey, "Angken bilang ey say naka pan-ikowan ket sota maypangkep met laeng son si-kak, saja inkowan ko, agpayso, ta amtak i edapo-an ko, tan dawán ko. Nem si-kayo, eg jo amtay edapo-an ko, ono dawán ko. <sup>15</sup> Say joka pengilesini ey mapteng ono ngaaw i aramid ni sakey ya too ket sota wared nemnem jo. Nem si-kak, aliwen satan i naka pesing. <sup>16</sup> Nem angken bilang ey waray ikowan ko ey mapteng ono ngaaw, aliwen abos kon mengigsheng so, no diket waray kadwak; aliwen nak iba-ba-ngat. Jet say kadwak, si Amak ja engibetkag ali son si-kak. <sup>17</sup> Jet angken sota dinteg jo, say kowan to, no nan-inges i kowan nonta showne sistigo, si-katoy mepati ey agpayso. <sup>18</sup> Say pilmiron onsistigo ni maypangkep son si-kak, si-kak ka shorog, jet

say maykadwa, si Amak, ja engibetkag ali son si-kak shiyay.” Kowan nen Jesus.

<sup>19</sup> Jet sota ira Parisiyo, kowan sha son Jesus ey, “Toway kad-an nen amam?”

Si Jesus, simongbat ja kowan to son si-kara ey, “Si-kayo, eg jowak amta, isonga angken si Amak, eg jo ngo amta. No amtayowak koma, istay amtayo koma ngo si Amak.”

<sup>20</sup> Sajay i inkowan nen Jesus so nonta ira totoo nonta inpantoro to nodta nay-esop shima tado-an ni pilak ka shaka idaton son Apo Shiyos shi Timplo. Jet nontan, enshiy nangshel son si-kato, ta aneng nin sota timpon naykesheng ja pandikat to.

<sup>21</sup> Jet si Jesus, nantoro pay son si-kara ja kowan to ey, “Waray timpon idekjas takejo, jet enenapen jowak, nem si-kayo, metey kayo ey eg epakawanan i basol jo. Jet eg mebedin na on-onod kayo son si-kak shima dogad ja dawán ko.”

<sup>22</sup> Sota ira pangolo ni Hodiyo, kowan sha ey, “Sigosho manbono emo, isonga kowan to ey eg mebedin na on-onod kito shima dogad ja dawán to.”

<sup>23</sup> Jet si Jesus, simongbat ja kowan to ey, “Si-kayo, too kayod ja dobong, isonga say emin na wared ta nemnem jo, sota maypangkep ngo niya dobong. Nem si-kak, say edapo-an ko, shi dangit, isonga say wared nemnem ko, aliwen inges toy nemnem jo. <sup>24</sup> Isonga binanshaanan takejo nonta pilmiro ja kowan ko ey metey kayo ey eg epakawanan i basol jo. Ampet memati kayo ey si-kak sota naypadton mengisedakan ja ibetkag ali nen Apo Shiyos, asan mapakawani i basol jo.”

<sup>25</sup> Nem sota ira Parisiyo, inbag-an sha ja kowan sha ey, “Jet sipa ka?”

Simongbat si Jesus ja kowan to ey, “Inkowan ko met son si-kayo nonta pilmiro no sipa-ak jet ingkato niman si-kato pay laeng iya naka pan-ikowan son si-kayo. <sup>26</sup> Jet no sota maypangkep son si-kayo, eshakil pay i naka bedawa; isonga eshakil i piyan kon ikowan son si-kayo ja inkowan nonta engibetkag ali son si-kak, jet emin na kowan to, agpayso. Jet sajay i naka panpa-amta so ni tood ja dobong, ta si-katoy intenengan ko son si-kato.”

<sup>27</sup> Nem sota ira totoo, eg sha ewatan iya inkowan nen Jesus son si-kara, ey sota mismon toka pan-ikowan ket sota maypangkep so nen Apo Shiyos ja Ameto. <sup>28</sup> Isonga si Jesus, wára pay i inkowan to son si-kara, ja kowan to ey, “No onsabi sota timpo ja ikayang jo sota Anak ni Too ja idansa, amta-an jo ma ey si-kak sota naypadton mengisedakan ja ibetkag ali nen Apo Shiyos. Tan amta-an jo pay ey emin na maramen naka pan-ikowan niman ket aliwen na edapod nemnem ko, no diket sotan i inkowan nen Amak son si-kak. <sup>29</sup> Sota engibetkag son si-kak, wára son si-kak, jet eg towak baybay-an ni abos ko, ta say piyan ton dag-en ko, si-kato iya naka dagdag-a ni olay.” Kowan nen Jesus.

<sup>30</sup> Jet sota eshom so nonta ira totoo, eshakil i emati son Jesus nonta intenengan sha sota inkowan to.

<sup>31</sup> Jet si Jesus, kowan to so nonta ira Hodiyo ja emati ey, “No sota intorok son si-kayo ket si-katoy nemnemnem jo, si-kayoy podnon took. <sup>32</sup> Tan amta-en jo pay i eshom ma podno ja maypangkep so nen Apo Shiyos, jet sotan na podno, si-katoy mengibodos son

si-kayo, jet aliwa men baga-en kayo.”

<sup>33</sup> Idi enaksheng nga inkowan nen Jesus iyay, simongbat sota ira Hodiyo, ja kowan sha ey, “Si-kami, poli shakami nen Abraham, jet angken nontan da, enshiy amta mi ja makabaga-en son si-kami; eg kami nanbalin na baga-en, angken na pinsak bengat. Jet apay nga ikowan mo ey maybodos kami ja aliwen baga-en ma?”

<sup>34</sup> Jet si Jesus, simongbat ja kowan to ey, “Kinapodpodno iya ikowan ko son si-kayo. Sota toon ngaaw i aramid to, may-eshig ey baga-en ni basol. <sup>35</sup> Jet say it-sora ni baga-en, aliwen sigoradon man-iyani ni olay nodta baley ya toka pan-iyani, nem sota anak ni makabaley, eg may-inges nodta baga-en; wara mangoy kanebengan ton man-iyani ni olay nodta baley. <sup>36</sup> Isonga si-kak ja Anak nen Apo Shiyos, no ikowan ko ey maybodos kayo, ja aliwen baga-en ma, mayto-to-wa ja mebodos kayo. <sup>37</sup> Amtak ey poli shakejo nen Abraham, nem wara ira met son si-kayoy piyan shen onbono son si-kak, ta eg jo pati-en sota inkowan ko son si-kayo. <sup>38</sup> Say naka pan-ikowan, sota inon-an ko so nen Amak, jet angken si-kayo, say joka dagdag-a, sota inon-an jo ngo so nen amejo.” Kowan nen Jesus.

<sup>39</sup> Sota ira Hodiyo, simongbat ira ja kowan sha ey, “Si Abraham i amemi.”

Nem si Jesus, kowan to ey, “No si Abraham i amejo, istay say dag-en jo koma ket inges to sota dingka nen Abraham. <sup>40</sup> Nem si-kayo, piyan jon bono-en jowak niman, ta inkowan ko son si-kayo sota podno ja inkowan nen Apo Shiyos son si-kak. Nem si Abraham, enshiy to dingka ja inges toy aramid jon ngaaw. <sup>41</sup> Si-kayo, say

joka dagdag-a, inges to sota ngaaw wa aramid nen amejo.”

Jet sota ira Hodiyo, bimonget ira ja kowan sha ey, “Singa moka pan-ikowan ey aliwen si Abraham i makapoli son si-kami, ja inges mi sota totoon eshakil i shiyos sha. Nem ayshi! Say kina-agpayso to, saksakey i Amemi, ja si Apo Shiyos bengat!”

<sup>42</sup> Jet si Jesus, kowan to son si-kara ey, “No si Apo Shiyos i Amejo, istay ensemek jowak koma, ta say edapo-an ko, si Apo Shiyos. Jet aliwen nemnem ko shorog ga dimaw alid jay, no diket si-katoy engibetkag ali son si-kak. <sup>43</sup> Si-kayo, eg jo ewatan, ta eg jo koston itenengan iya naka pan-ikowan. <sup>44</sup> Inges jo eshan i ogadi nen Satanas ja amejo. Say pipiyan jon onoran na dag-en, sota piyan nen Satanas. Nonta pilmiro, si-katoy engipangdon bimono. Enshin polos son si-katoy podno, no diket say pipiyan ton dag-en, sota pan-o-owap. No waray ikowan to, o-owap pa emin, ta si-katoy ogadi to. Jet si-katoy amejo; isonga say joka pati-a ket sota o-owap. <sup>45</sup> Say kabol la eg jowak so pati-anan so ket sota naka pengikowan ni podno son si-kayo. <sup>46</sup> Jet si-kak, enshiy basol ko; isonga enshiy en mengikowan ey waray basol ko. No ikowan ko son si-kayoy podno, apay nga eg jowak pati-en? <sup>47</sup> Sota ira annak nen Apo Shiyos, pati-en sha sota kowan nen Apo Shiyos. Nem si-kayo, eg jo met pati-en sota kowan nen Apo Shiyos, ta aliwen annak shakejo.”

*Sota ira Hodiyo, si-kara met laeng i eg man-i-inawatan*

<sup>48</sup> Jet idi intenengan nonta ira Hodiyo iyay ya inkowan nen Jesus, kowan sha ey, “Agpayso gayam sota kowan mi ey i-Samaria ka ja makakontra son si-kamin Hodiyo. Tan agpayso



gayam sota kowan mi ey wára son si-kam i dimonyo.”

<sup>49</sup> Jet si Jesus, simongbat ja kowan to ey, “Arawi ita kowan jo. Enshi son si-kak i dimonyo. Say naka panshedjawi, si Apo Shiyos ja Amak. Nem si-kayo, ngaaw i joka ikokowan pangkep son si-kak. <sup>50</sup> Si-kak, aliwa met kitdin sota pengiredjaw ni tooy naka kamkamkami. Nem si Apo Shiyos, si-katoy kaonnemnemnem son si-kak, jet si-kato aliy mengigsheng ey maptengak. <sup>51</sup> Kinapodpodno iya ikowan ko son si-kayo. Sota memati niya naka pan-ikowan, eg sha da-kaman i patey, no diket waray biyag sha ingkatod ingka.”

<sup>52</sup> Jet sota ira Hodiyo, kowan sha son Jesus ey, “Niman amta mi ma ey agpayson waray dimonyo son si-kam. Toway inpasing nitan? Si Abraham ket etey met da; angken pay sota ira para padto, etey da ngo ira. Nem si-kam, say kowan mo, sota memati ni esel mo, eg metey? <sup>53</sup> Si Abraham ja ametayo ket etey met, tan pati pay sota ira para padto nen Apo Shiyos nonta bayag da. Apay engatngato ka aya ey say si Abraham? Apay sipa ka aya ja satan i nemnem mo?”

<sup>54</sup> Nem si Jesus, simongbat ja kowan to ey, “No say naka panishayaw ket saja bakdang ko, enshiy silbi to. Say emengiredjaw son si-kak, si Amak ja kowan jo ey Shiyos jo. <sup>55</sup> Nem si-kayo, aliwen agpayso ja amtayo si Amak. Nem si-kak, amtak si Apo Shiyos; isonga eg mebedin na ikowan ko ey ekak amta, ta aliwen inges takejon ma-owap. Am-amtak si Apo Shiyos et naka pati-a i kowan to. <sup>56</sup> Nontan da, si Abraham, ja amejo, eman-imdeng ta namnama to ey asen toy akew wa ibetkagan towak so nen Apo Shiyos alid ja dobong, jet eman-

imdeng nga pasiya niman ta inonan to.”

<sup>57</sup> Jet sota ira Hodiyo, kowan sha ey, “Toway inpasing mon engasas son Abraham ey si-kam ket enshi pay met i dimen polon tawen mo?”

<sup>58</sup> Simongbat si Jesus ja kowan to ey, “Kinapodpodno iya ikowan ko son si-kayo. Nonta eg pay laeng nay-anak si Abraham, sigod ja wára-ak ngoreshan.”

<sup>59</sup> Idi enaksheng nga inkowan nen Jesus iyay, sota ira Hodiyo, engala ira ni bato, jet kowan sha ey kespigan sha si Jesus. Nem en eki-shom si Jesus nodta eshakil la totoo say eg maydesin jet indekjas to sota Timplo ja kawad-an sha.

## 9

*Inpan-asas nen Jesus sota toon ekorab*

<sup>1</sup> Idi nonta eman-ekad si Jesus, waray inon-an ton too ja sigod ja ekorab ni inkay-anak to. <sup>2</sup> Jet sota ira too nen Jesus, kowan sha son si-kato ey, “Maistoro, nganto ngatay ekoraban niyay ya too? Sigosho waray basol to, ono basol ni maka-anak son si-kato?”

<sup>3</sup> Si Jesus, simongbat ja kowan to ey, “Aliwen sota basol niyay ya too, ono sota basol ni maka-anak i ekoraban to, no diket inpalobos nen Apo Shiyos, say si-kato met laeng i mengekas son si-kato, say amta-en ni totoo ey ebadeg i panakabalin to. <sup>4</sup> Niman ta wára kito pay laeng shi biyag, mesepol la dag-en tayo sota obda ja piyan nonta engibetkag son si-kak, ta no onsabi sota timpon ketey tayo, ibi-jag tayo ma ja man-obda. <sup>5</sup> Niman ta wára-ak pay laeng shiya dobong, si-kak i mayeshig ey silew wa ondawag so ni nemnem ni tood ja dobong.”

<sup>6</sup> Idi enaksheng nga inkowan nen Jesus iyay, tinopsha-an to sota bo-day jet pingkel to, asan toka

ipakpak nodta mata nonta toon ekorab, <sup>7</sup> jet kowan to son si-kato ey, “Daw ka, ka pansha-dop shima nabneng nga shanom shi Siloam.” (Say olog ni esel la Siloam, nay-betkag.) Jet sota ekorab, dimaw wa en nansha-dop, jet idi imoli di, eman-esas ma.

<sup>8</sup> Jet sota ira inaskang to, tan sota ira eshom ma toon maka-amta son si-kato ni toka pankekkekshaw nontan da, kowan sha ey, “Apay aliwen sajay aya sota toon emantetongaw ni olay ja emankekkekshaw?”

<sup>9</sup> Sota ira eshom, kowan sha ey si-kato, nem sota ira eshom, kowan sha ey, “Apil — kalopdopa to bengat sotan.”

Jet sota toon istay ekorab, kowan to ey, “Owen, si-kak sotan na too.”

<sup>10</sup> Idi inkowan to ey owen, inbag-an sha et mowan, ja kowan sha ey, “Toway inpasing mon nan-asas ey istay ekorab ka met?”

<sup>11</sup> Simongbat iya toon istay ekorab, ja kowan to ey, “Sota toon kowan sha ey si Jesus, engala nonta bo-day ya tinopsha-an to, jet inpakpak tod matak jet inbetkag towak ka ondaw shi Siloam ja en mansha-dop. Idi mansha-dopak, maka-asasak ma.”

<sup>12</sup> Jet inbag-an sha mowan ja kowan sha ey, “Toway kad-an nontan den too?”

Simongbat sota toon istay ekorab ja kowan to ey, “Tawey, ekak amtay dinawan to la.”

<sup>13</sup> Jet sajay ya toon istay ekorab, indaw sha so nonta ira Parisiyo.

<sup>14</sup> Say indaga so nen Jesus niyay ya milagro, nonta timpo ni ngilin ni Hodiyo; <sup>15</sup> isonga sota ira Parisiyo, inbag-an sha ngo sota toon istay ekorab, no toway inpasing ton nan-asas. Jet sota toon istay ekorab, inistoriya toy inpasing nen Jesus.

<sup>16</sup> Jet sota ira eshom ma Parisiyo, kowan sha ey, “Sotan na

too, aliwen si Apo Shiyos i edaponan to, ta no si Apo Shiyos komay edapo-an to, apay nga eg to met onoren sota kowan ni dinteg tayo, pangkep ni akew ni ngilin?”

Nem sota ira eshom ma Parisiyo, kowan sha ey, “Enshi. Sota ngaaw wa too, eg mebedin na todongan nen Apo Shiyos sa dag-en toy kaskasshaaw, ja inges niya dingka niyay ya too.” Nontan ma, sajay iren too, nanshowa ira ja eg man-inawatan.

<sup>17</sup> Isonga sota ira Parisiyo, inbag-an sha mowan iya toon istay ekorab, ja kowan sha ey, “Si-kam ma istay ekorab, ngantoy moka pannemnem pangkep son si-kato? Tep si-katoy inpan-asas son si-kam.”

Simongbat iya toon istay ekorab, ja kowan to ey, “Sotan na too, say kowan ko, para padto nen Apo Shiyos.”

<sup>18</sup> Nem sota ira pangolo ni Hodiyo, eg sha pati-en ey sigod ja ekorab iyay ya too nonta inkay-anak to. Isonga sha inpa-odop sota maka-anak son si-kato, ta piyan shen ibag-an, asan shaka pati-a. <sup>19</sup> Jet sota ira pangolo ni Hodiyo, inbag-an sha sota maka-anak ja kowan sha ey, “To-to-wen sajay sota anak jo? Sigod ja ekorab iyay nonta inkay-anak to? Jet no agpayso, ngantoy inpasing ton nan-asas niman?”

<sup>20</sup> Sota maka-anak son si-kato, simongbat ira ja kowan sha ey, “Agpayson anak mi noman itan na too, jet sigod ja ekorab nonta inkay-anak to. <sup>21</sup> Nem no sota maypangkep ni toka pan-esas niman, ono sipay timolong son sikaton nan-asas, eg mi amta. Sikatoy ibag-an jo ta na-ama met; mebedin na ikowan to son sikayo.” <sup>22</sup> (Sajay i insongbat sha, ta entakot ira so nonta pangolo ni Hodiyo, ta say nantotodagan ira nonta pangolo ni Hodiyo,

kowan sha ey no sipay too ja mengikowan ey si Jesus sota naypadton mengisedakan ja ibetkag ali nen Apo Shiyos, a-kalen sha shima sa-nopan ira ni Hodiyo ja eg ma mebedin na mekisa-sanop son si-kara. <sup>23</sup> Isonga sajay i inkowan nonta maka-anak, ey sota anak shen istay ekorab ket si-katoy ibag-an sha.)

<sup>24</sup> Jet sota ira Parisiyo, inpadodop sha mowan sota toon istay ekorab, jet kowan sha son si-kato ey, “Si Apo Shiyos komay pan-iyamanan mo ni maypangkep nita edaga son si-kam, aliwen sota toon kowan mo ey enolong son si-kam. Ta amta mi ey sajay ya too ket mabesol.”

<sup>25</sup> Sota toon istay ekorab, simongbat ja kowan to ey, “No si-kak, ekak amtay aramid to, no ngaaw ono mapteng, nem say sakey bengat ja amtak: nontan, ekorabak, nem niman, maka-asasak ma.”

<sup>26</sup> Jet inbag-an sha mowan na kowan sha ey, “Ngantoy dingka to son si-kam? Ngantoy inpasing ton inpan-asas son si-kam?”

<sup>27</sup> Simongbat sotan ja kowan to ey, “Inkowan ko met da son si-kayo. Nganto pay laeng i ipinpin-show-an ko so, no eg jo met laeng pati-en? Apay piyan jo mowan na itenengan aya? No kasta, piyan jon manbedin ni too to?”

<sup>28</sup> Sota ira Parisiyo, nan-es-es-dan sha sota toon istay ekorab asan shaka ma ikowan ey, “Si-kam a! Too toka! Nem si-kami, too shakami nen Moises. <sup>29</sup> Ta amta mi ey si Moises, tinabtabal nen Apo Shiyos, nem eg mi pay amta no toway edapo-an nita kowan mo ey enolong son si-kam!”

<sup>30</sup> Jet sota toon istay ekorab, simongbat ja kowan to ey, “Kaskasshaaw itan na kowan jo! Sotan na too, inpan-asas towak, nem say kowan jo, eg jo pati-

en ey si Apo Shiyos i edapo-an to. <sup>31</sup> Amta ni emin na too, ey say toon ngaaw i aramid to, eg todongan nen Apo Shiyos. Nem sota toon mengiredjaw son Apo Shiyos, tan mandeka ni piyan to, si-katoy todongan nen Apo Shiyos. <sup>32</sup> Angken nonta ikaypalsowa niya dobong ingkato niman, enshiy en naytenengan ja inges niyay ya too, ja inpan-asas toy toon sigod ja nay-anak ka ekorab. <sup>33</sup> No sotan na too ket aliwen si Apo Shiyos i edapo-an to, istay eg to koma mebedinan na pan-esas i toon ekorab.”

<sup>34</sup> Jet sota ira pangolo ni Hodiyo, kowan sha ey, “Sesi-kam, kowan mo ey tod-an mokamin maka-amta ni dinteg, ey inba-deg may basol!”

Idi enaksheng iyay ya inkowan sha, ingkal sha nodta sa-nopan ja kowan sha ey eg ma mekisa-sanop.

<sup>35</sup> Idi shinemag nen Jesus ey ingkal sha nodta sa-nopan sota toon istay ekorab, dimaw, ja to simbi jet to inbag-an ja kowan to ey, “Agpayson kaka memati nonta naypadton Anak ni Too?”

<sup>36</sup> Sota toon istay ekorab, simongbat ja kowan to ey, “Apo, ikowan mo no sipa sotan na too, say pati-en ko.”

<sup>37</sup> Si Jesus, simongbat ja kowan to ey, “Inon-an mo met sotan na too. Jet si-kak sotan, ja mismon emekitbal son si-kam niman.”

<sup>38</sup> Sota toon istay ekorab, simongbat ja kowan to ey, “Apo, naka memati son si-kam.” Jet sotan ma ey nantalimokod ja nanshayaw son Jesus.

<sup>39</sup> Jet si Jesus, intoloy ton kowan to ey, “Say kabol la dinawan ko did ja dobong, say mandinasin i toon memati tan toon eg memati. Dimawak ali say sota singa ekorab, maka-asas, nem sota toon kowan to ey eman-esas, si-kara

et ngo mowan i may-eshig ey ekorab.”

<sup>40</sup> Sota ira Parisiyo ja nay-esop son Jesus, intenengan sha iyay ya inkowan to, jet kowan sha ey, “Say piyan mon a-seden, angken si-kami, ekorab kami?”

<sup>41</sup> Si Jesus, simongbat ja kowan to ey, “Enshi. No ekorab kayo koma, istay mebedin na mepesin-siya-an kayo. Nem kowan jo ey maka-asas kayo, ja joka idastog sota kowan jo ey abos jon maka-amta ni podno. Isonga kaonong son si-kayo i basol jo; eg epakawanan.”

## 10

*Si Jesus sota may-eshig ey mapteng nga emengajowan ni kalniro*

<sup>1</sup> Si Jesus, intod-an to ira ni arig ja kowan to ey, “Kinapodpodno iya ikowan ko son si-kayo. Waray koral ni kalniro, jet sota toon onkalab shi alad, ja eg manshedan shi pasbol, si-kato sota tolisan, ono makibot. <sup>2</sup> Nem sota toon agpayson emengajowan nonta kalniro, manshedan nodta mismon sakepan, <sup>3</sup> jet si-katoy idokatan nonta emanbantay nodta sakepan nonta koral ni kalniro. Onsekep, jet sota kalniro, amtaray esel to ja shaka imatoni. Jet sa-sa-keyen ton ingadnan i ngaran nonta kalniro to, jet iboday to ira. <sup>4</sup> Jet no iboday to ira, si-katoy mepangdo jet on-onod sota ira kalniro, ta amtaray esel to. <sup>5</sup> No waray eshom ma toon ondaw son si-kara, eg sha iba-ngat i onod so nontan na too. Idekjas sha et, ta shaka imatoni ey apil i esel to.”

<sup>6</sup> Sajay i inkowan nen Jesus ja arig son si-kara, nem eg sha inewatan. <sup>7</sup> Isonga si Jesus, inkowan to may olog nonta arig son si-kara, ja kowan to ey, “Kinapodpodno iya ikowan ko son si-kayo, ey say kay-eshigan nonta

sakepan, si-kak. <sup>8</sup> Sota ira engikowan nontan da ey si-karay mengipangolo nonta ira took, si-karay kay-eshigan nonta eg nanshalan nodta sakepan; isonga may-eshig ey si-kara ket tolisan ira, ono makibot. Nem sota ira kalniro, eg sha ira inkaskaso. <sup>9</sup> Sota sakepan ni koral ni kalniro, may-eshig ey si-kak sotan. Isonga sota toon ondaw ali son si-kak, isalakan ko, jet si-karay kay-eshigan nonta kalniro ja ewaya menonsekep tan onbo-day ya menengan ni siked ja edet ja kenen sha.

<sup>10</sup> “Sota tolisan, ondaw bengat ali ja mengibot, memono, ono meneshal. Nem si-kak, say dinawan ko ali, nak mengikan ni biyag ni too, jet sotan na biyag ja i-akan ko, mas mapmapteng pay ey say sota maramen biyag sha.

<sup>11</sup> Si-kak sota mapteng nga emengajowan ni kalniro, jet si-kak, ja makakokowa nonta kalniro, naka isakit ira ja angken si-karay kabol la keteyan ko. <sup>12</sup> Sota toon emanbantay bengat nonta kalniro ja dinagbo-an, no waray atap pa animal ja ondaw ali, onbetik ja idekjas to ira, jet mebokal ira, jet sota atap pa animal, elbaten toy eshom. <sup>13</sup> Sotan na emanbantay, idekjas to ira sota kalniro ta dinagbo-an bengat; eg to ira isakit.

<sup>14</sup> Nem si-kak sota mapteng nga emengajowan nonta kalniro. Jet amtak ira sota kokowak, jet sota ira kokowak, am-amtara-ak ngo, <sup>15</sup> jet kasta met so nen Amak, amta towak, jet si-kak ja Anak to, amtak ngo si Amak. Jet sota ira may-eshig ey kalnirok, si-karay kabol ni keteyan ko. <sup>16</sup> Waray eshom ma kalnirok ja apil i naykoralan sha, jet mesepol la si-kak met laeng i mengikasakey son si-kara so nonta sigod ja kalnirok. No itenengan shay esel ko, ondaw ira di jet maykasakey ma ira, jet sota mengajowan son si-kara, sakey

ngo bengat ma. <sup>17</sup> Si Amak, ensemek towak ta itolok koy biyag ko ja angken metey. Itolok ko, say odi-en ko met laeng. <sup>18</sup> Angken sipen too, enshiy kabaalan ton onbono son si-kak no ekak itolok i bakdang ko, ta si-kak met laeng i maka-amta ni biyag ko, no piyan kon metey ono enshi. Mebedin na itolok ko iya biyag ko ja metey, jet mebedin met laeng nga odi-en ko ja manbiyag mowan, ta si-katoy inbilin nen Amak son si-kak.”

<sup>19</sup> Idi enaksheng nga inkowan nen Jesus iyay, sota ira Hodiyo, eg ira man-i-inawatan jet nan-showa ira kabol nonta inkowan nen Jesus. <sup>20</sup> Sota ira karakdan na Hodiyo, kowan sha ey, “Inpan-angaw ni dimonyo itan na too. Ngantoy itenenganan jo so nita toka pan-ikowan?” <sup>21</sup> Nem sota ira eshom ma Hodiyo, kowan sha ey, “Aliwén sotan i itsoren kepan-a-sel ni toon inpan-angaw ni dimonyo. No waray dimonyon pimeket son si-kato, mebedin ayen pan-esas toy ekorab?”

*Si Jesus, eg inewat ira nonta Hodiyo*

<sup>22</sup> Nontan na timpo, simabi ma sota timpon piyasta ni Hodiyo shi Jerusalem ja shaka penginemnemi nonta Timplo nen Apo Shiyos, jet sajay ya piyasta ni Hodiyo, emaytompong shi timpo ni teg-in. <sup>23</sup> Jet si Jesus, dimaw nontan shima Timplo, jet nan-akad nodta kowan sha ey Sishoman nen Solomon, ja naysilpo nodta Timplo.

<sup>24</sup> Jet sota ira pangolo ni Hodiyo, binongolan shes Jesus, jet kowan sha ey, “Apay mebedjag pay aya i pengikowanan mo son si-kami, no si-kam sota naypadton mengisedakan ja ibetkag ali nen Apo Shiyos? No si-kam sotan, ikowan mo son si-kami say amta-en mi.”

<sup>25</sup> Jet si Jesus, simongbat ja kowan to ey, “Inkowan ko la son si-kayo i maypangkep son si-kak, nem eg kayo memati. Sota kowan nen Amak ey dag-en ko, dingkak da, jet sotan met laeng koma i amta-an jo so ma no si-kak sota naypadto ono apil. <sup>26</sup> Nem si-kayo, eg kayo memati ta aliwén kalniro takejo, <sup>27</sup> ta no kalniro takejo koma, istay pati-en joy esel ko, ja inges to sota kalniro ja shaka onora i esel nonta makakalniro son si-kara. Amtak i kokowak jet sota kokowak, sha-akka ononora. <sup>28</sup> Jet sotan iren kokowak, naka akni ira ni biyag ja enshiy to engintegan, jet eg sha ma dakaman i shosa ingkatod ingka, jet enshiy makabaal ja onpiliw son si-kak ni angken sakey son si-kara. <sup>29</sup> Si Apo Shiyos ja Amak, si-katoy Kangeto-an ni emin. Isonga sota in-awat to son si-kak, angken sota, enshiy en onpiliw so, ta si Amak i emengajowan son si-kara. <sup>30</sup> Si-kamin Amak, saksakey kami.”

<sup>31</sup> Idi intenengan ira nonta Hodiyo iyay, engala ira ni bato ja kowan sha ey kespigan sha si Jesus.

<sup>32</sup> Jet si Jesus kowan to son si-kara ey, “Eshakel i mapteng nga dingkak ja obda nen Amak ja kowan to ey dag-en ko. Jet towa nodtan na mapteng nga dingkak i kabol la kowan jo ey kespigan jowak so ni bato?”

<sup>33</sup> Sota ira Hodiyo, simongbat ira ja kowan sha ey, “Aliwén sota obden mapteng i kespigan mika so, no diket sota moka pengikokowani so ey si-kam ket inges mos Apo Shiyos, ey anta nga too ka ngo met bengat ja inges mi. Satan i ebadeg ga basol mo.”

<sup>34</sup> Simongbat si Jesus ja kowan to ey, “Wara met i naysolat shi dinteg tayo ja kowan nen Apo Shiyos pangkep so nonta ira pangolo nonta bayag da, ja kowan

to ey si-kara, singa shiyos ngo ira. <sup>35</sup> Sotan na inkowan nen Apo Shiyos ja naysolat, eg mebedin na mesa-datan ta si Apo Shiyos i engikowan. No inkowan nen Apo Shiyos nonta bayag da ey singa shiyos ngo ira sotan na inkowanan to so, <sup>36</sup> apay nga kowan jo ey basol ko no ikowan ko ey Anak towak nen Apo Shiyos, ey agpayso met ja si-katoy mismon shimotok son si-kak, jet inkowan to ey ondawak alid ja dobong? <sup>37</sup> No say naka pandag-a ket aliwen sota piyan nen Amak, mebedin na angen eg jowak patien. <sup>38</sup> Nem no eg jowak pati-en, istay sota obden naka dagdag-a, si-kato koma mangoy pati-en jo, ta sotan na dingkak, si Apo Shiyos i edapo-an to, jet si-katoy amtan jo so koma ey si-kak, wara-ak son Apo Shiyos ja Amak, jet si Apo Shiyos, wara ngo son si-kak." Kowan nen Jesus.

<sup>39</sup> Jet sota ira Hodiyo, piyan sha mowan na a-shelen si Jesus, nem bimetik si Jesus; isonga eg sha inshel.

<sup>40</sup> Jet si Jesus, bimaliw shima padok ka kowan sha ey Jordan et dimaw shima dogad ja emonjagan nen Juan nonta pilmiro. Jet nan-iyani nin si Jesus shiman.

<sup>41</sup> Jet nonta wares Jesus shiman, eshakil iray totoon dimaw son si-kato jet say kowan sha ni tabtabal sha, kowan sha ey, "Si Juan, enshiy to dingken milagro ja inges to jay, nem emin sota inkowan to ni maypangkep niyay ya too, nay-agpayso." <sup>42</sup> Jet nontan, sota eshakil la toon dimaw son Jesus shiman, eshakil son si-karay emati.

## 11

*Etey si Lazaro, nem inpanbiyag nen Jesus*

<sup>1-2</sup> Wara iray san-a-aki ja nanbaley shi Bitania, jet say ngaran sha,

si Maria, si Marta, tan si Lazaro. Jet si Lazaro, ja agi sha, nansakit. (Si Maria, si-kato sota mengiro-jag ali ni emanseng-ew wa dana shi sedi nen Jesus, asan toka ponasi ni bowek to.) <sup>3</sup> Si Maria nen Marta, engibetkag ira ni en mengikowan son Jesus ey, "Apo, si Lazaron ensemek mo ket emansekit."

<sup>4</sup> Idi inamta-an nen Jesus ey emansekit si Lazaro, kowan to ey, "Sotan na sakit, eg ipatey nen Lazaro, no diket si-katoy kayshed-jawan nen Apo Shiyos, tep si-katoy ka-asan ni kina-Shiyos ni Anak to."

<sup>5</sup> Si Jesus, ebadeg i semek to so ira niyay ya san-a-aki. <sup>6</sup> Nem nonta inamta-an to ey emansekit si Lazaro, nan-iyani nin shima toka pan-iyani ni showen akew pay. <sup>7</sup> Idi edabas sota showen akew, inkowan nen Jesus so nonta ira too to ey, "Eti, ondaw kito mowan shi Jodia."

<sup>8</sup> Jet kowan nonta ira too to ey, "Apo, ngantoy dawán tayo mowan shi Jodia ey nonta pinsak ka dinawan tayod man ket piyan ira nonta pangolo ni Hodiyo shiman na kespigan shaka ni bato say mebono ka?"

<sup>9</sup> Si Jesus, simongbat ja kowan to ey, "No ka-akawan i pan-ekad, eg kita maysokbab, ta aliwen embolinet. Wara met i sampolo tan showen oras ja ka-akawan; isonga no oras ni ka-akawan i pan-ekad, eg kita maysokbab ta ma-esas i shalan ja pan-akshan, tep sinilwan ni sekit. <sup>10</sup> Nem sota man-ekad ni medebi, mebedin na maysokbab, ta eg to asen i panshandan to, tep enshiy onsilew son si-kato." <sup>11</sup> Jet si Jesus, intoloy ton kowan to ey, "Si Lazaro ja kajem tayo, na-ogip mala, jet ondawak ta nak bengonen."

<sup>12</sup> Jet kowan nonta ira too to son si-kato ey, "Apo, mapteng no na-ogip, say onpesed." <sup>13</sup> (Sajay

i insongbat sha tep kowan sha ey kenshat ta na-ogip bengat si Lazaro, nem say piyan na a-sellen nen Jesus gayam, etey da si Lazaro.)

<sup>14</sup> Idi inamta-an nen Jesus ey eg inewatan nonta ira too to sota inkowan to, indiritso ton inkowan ey etey da si Lazaro. <sup>15</sup> Jet say kowan to pay, “Ebadeg i imdeng ko ta enshi-ak shiman nonta inkatey nen Lazaro. Sajay ya edaga son si-kato, panmaptengan jo, tep onba-deg i pamatiyo son si-kak. Jet niman, eti, ondaw kito shi kawad-an to.”

<sup>16</sup> Si Tomas, ja kowan sha ey Epin, ja sakey so ira nonta too nen Jesus, kowan to so ni kait to ey, “Mekidaw kito son Apo Jesus, jet angken metey kito ja may-a-shom son si-kato no bono-en sha!”

<sup>17</sup> Idi mimotok ma si Jesus shi Bitania, epat ta akew malen naydiyangan si Lazaro. <sup>18</sup> Saja dogad ja Bitania, say ka-ashawi to shi Jerusalem, tedon kilomitro bengat; <sup>19</sup> isonga nonta etey ma si Lazaro, eshaket iray Hodiyo ja edapod Jerusalem ja en nanbisita so nen Maria nen Marta ja emandiwiwa son si-kara. <sup>20</sup> Idi inamta-an nen Marta ey emanmotok si Jesus, bimo-day jet to inaspol si Jesus, nem si Maria, si-katoy ebay-an shima baley. <sup>21</sup> Jet kowan nen Marta so nen Jesus ey, “Apo, no wára ka komed jay nonta kepansekit nen agik, istay eg etey koma. <sup>22</sup> Nem amtak ey angken niman, no ngantoy kekshawen mo so nen Apo Shiyos, i-akan to son si-kam.”

<sup>23</sup> Simongbat si Jesus ja kowan to ey, “Si agim da, manbiyag mowan.”

<sup>24</sup> Jet si Marta, simongbat ja kowan to ey, “Amtak ey no timpo ali ni panbiyag mowan ni nanketey, manbiyag ngo si Lazaro.”

<sup>25</sup> Simongbat si Jesus mowan, ja kowan to ey, “Si-kak i panbiyag so ira nonta nanketey, tan mengi-kan ni biyag sha; isonga sota memati son si-kak, angken na metey, manbiyag met laeng. <sup>26</sup> Jet angken sota ira too niman ja eg pay laeng etey, no memati ira son si-kak, i-aknan ko ira ni biyag ja enshiy to engintegan. Jet si-kam, moka pati-a iya inkowan ko la?”

<sup>27</sup> Si Marta, simongbat ja kowan to ey, “Naka memati ey si-kam sota naypadton mengisedakan ja Anak nen Apo Shiyos ja ibetkag to alid ja dobong!”

<sup>28</sup> Idi enaksheng iyay ya inpantabtabal nen Jesus nen Marta, nay-oli si Marta shima baley jet idi naydasin ira nen Maria nodta eshaket la too, inkowan to son si-kato ey, “Wara sota Maistoro jet tokaka pan-ibaga.”

<sup>29</sup> Idi inkowan nen Marta iyay son Maria, dimayat ta shagos jet dimaw shima kawad-an nen Jesus. <sup>30</sup> Si Jesus, eg pay laeng simabi nodta kawad-an ni baley nen Maria, no diket wára pay laeng nodta dogad ja en inaspolan so nen Marta. <sup>31</sup> Jet sota ira Hodiyo ja bisita ja wára nodta baley ja emandiwiwa son Maria, idi inon-an sha ja kinano-an nen Maria ja bimo-day, inonod sha, ta say wáred nemnem sha, kowan sha ey baka ondaw si Maria shima naydiyangan nen Lazaro ja en onnangis shiman.

<sup>32</sup> Si Maria, idi mimotok shima kad-an nen Jesus, nanshomog nodta sango-an nen Jesus jet kowan to ey, “Apo, no wára ka komed jay nonta kepansekit nen agik, istay eg etey koma.”

<sup>33</sup> Jet si Jesus, inon-an to ja emannengis si Maria, tan angken pay sota ira Hodiyo ja ekidaw ali son Maria, ireka onnanengis ngo, jet si Jesus, ngimed-as. <sup>34</sup> Jet

inbag-an to ira ja kowan to ey, "Toway indiyangan jo so nen Lazaro?"

Simongbat ira ja kowan sha ey, "Kala Apo. Mo asas i indiyangan mi so."

<sup>35</sup> Jet si Jesus, nimangis ngo ma.

<sup>36</sup> Jet sota ira Hodiyo, kowan sha ey, "Asas jo kari, ensemek ton pasiya si Lazaro." <sup>37</sup> Nem sota ira eshom ma Hodiyo ngo, kowan sha ey, "No agpayson inpan-asas to sota ekorab, apay ngarod nga enshiy to dingka say eg etey si Lazaro?"

<sup>38</sup> Jet si Jesus, mas pay ya ngimed-as, jet dimaw nodta diyang nga naydiyangan nen Lazaro. Sota diyang, epokit ni bato; <sup>39</sup> isonga si Jesus, inbilin to ey a-kalen sha sota bato ja naypokit nodta bongot ni diyang.

Nem si Marta, ja agi nonta etey, kowan to ey, "Apo, epat ta akew to niman na naydiyangan. Sigoradon eman-ekob mala niman na pasiya!"

<sup>40</sup> Jet si Jesus, simongbat ja kowan to ey, "Apay ekak aya inkowan nontan son si-kam ey no memati ka, asen moy obdak ja kayshedjawan nen Apo Shiyos?"

<sup>41</sup> Jet sota bato ja naypokit nodta diyang, ingkal sha. Jet si Jesus, timangkak ja kowan to ey, "Naka man-iyaman son si-kam Ama, ta moka i-akan no waray kekshawen ko son si-kam. <sup>42</sup> Amtak ey moka itenengi ni olay i naka ishawat son si-kam, nem say engibolikan ko so niyay ya shawat son si-kam, say itenengan ira niya toon wared jay niman, say memati ira ey agpayso ja si-kam i engibetkag son si-kak shiya dobong."

<sup>43</sup> Idi enaksheng nga inkowan nen Jesus iyay, kimeljaw ja kowan to ey, "Lazaro, bo-day ka di!"

<sup>44</sup> Jet si Lazaro, bimo-day ali, ja ebedbeshan i takday to tan sedi to, tan edibotan i dopa to ni dopot

ta shaka idibot ni etey. Jet si Jesus, kowan to so nonta ira toon wara nodtan ey obaren sha sota naybedbed say ka-way ton man-ekad.

*Sota ira Hodiyo, nantotodag ira ey bono-en sha si Jesus*

<sup>45</sup> Sota ira Hodiyo ja bisita nen Marta nen Maria, inon-an sha sota inpasing nen Jesus ja emiyag son Lazaro, isonga eshakil son si-karay emati son Jesus. <sup>46</sup> Nem sota eshom ja Hodiyo, dimaw ira so nonta ira Parisiyo, jet sha inkowan i dingka nen Jesus. <sup>47</sup> Jet nontan ma, sota ira Parisiyo, tan sota apo ira ni papashi, nanmimiting ira nonta toray ni Timplo, jet kowan sha ey, "Ngantoy pesing tayo aya so nen Jesus? Eshakil ma i dingdingka to ja kaskashaaw.

<sup>48</sup> No itolok tayo ja sotan ni olay i pesing to, eshakil malay ma-ewis ja memati son si-kato, jet ondaw ma aliy i-Roma ja meneshal niya Timplo tayo, tan saja ili tayo."

<sup>49</sup> Nem sota kangeto-an na pari nontan na tawen, ja si Kaipas i ngaran to, kowan to ey, "Enshi gayam i amtayo. <sup>50</sup> Eg jo gayam amtay panmaptengan jo. Agpos et ey metey iya sakey ya too, say eg meshosa i tootod ja ili tayan Israel." <sup>51</sup> (Sajay ya inkowan nen Kaipas, aliwen edapod nem-nem to, no diket inpaipadto nen Apo Shiyos, ta si-kato nontan i kangeto-an na pari. Jet sajay ya inkowan to, pinonta-an to nga agpayso ey si Jesus, metey say eg meshosa i tootod Israel, <sup>52</sup> jet aliwen si-kara bengat, no diket angken pay sota ira emin na annak nen Apo Shiyos ja naywaris shi intiron dobong, say manseksekey ira ja memati son Jesus.)

<sup>53</sup> Jet nontan ma, waray plano iren ja esa-nop ey bono-en sha si Jesus. <sup>54</sup> Isonga nontan ngo ma, eg manpa-sas si Jesus shi karakdan



shi Jodia, no diket inpa-agpos ton dimaw shima dogad ja kowan sha ey Ipraim ja nay-esop shima shonshontog ja enshiy balbaley, jet ekiyian nin shiman so nonta ira too to.

<sup>55</sup> Shanshani ma sota timpo ni piyasta ni Hodiyoş ja kowan sha ey Paskowa jet eshakil iray toon dimaw shi Jerusalem ja edapod dogadogad ja nay-esop shiman, say sha dag-en sota sigod ja ogadi ni Hodiyoş ja shaka dagdag-a asan ireka makipiyasta. <sup>56</sup> Jet sota ira eshakil la totoo nodta Timplo, shaka pan-enapa no wares Jesus, nem enshi. Jet nanbibinaga ira sota totoo, ja kowan sha ey, “Nganto ngatay namnama jo: ondaw ngata di, ono enshi?”

<sup>57</sup> Nontan, sota ira apo ni papashi, tan sota ira Parisiyo, inkowan sha so nonta ira totoo ey no sipa son si-kara i maka-amta ni kawad-an nen Jesus, ikowan sha son si-kara say sha a-shelen.

## 12

*Si Jesus, waray engiro-jag ni emanseng-ew wa dana shi sedi to*

<sup>1</sup> Waray enem ma akew pay nin asan kesabi sota piyasta ni Hodiyoş ja kowan sha ey Paskowa, jet dimaw si Jesus shi Bitania ja nanbaljan nen Lazaro ja istay etey nem inpanbiyag nen Jesus.

<sup>2</sup> Jet si Jesus, ekipengan shiman ni mama-shem tep inpalti-an sha. Si Marta, timolong nga nankamakam, jet si Lazaro, si-katoy sakey ya ekilikob son Jesus. <sup>3</sup> Jet nontan, si Maria, engala ni poron danen emanseng-ew ja kowan sha ey naldo, jet to insho-jag shi sedi nen Jesus asan toka ponasi ni bowek to shorog, jet sota baley ya kawad-an sha, enapno ni seng-ew nonta dana. Sajay ya insho-jag nen Maria shi sedi nen Jesus, epalit jet wara emoy midjen kilo ja insho-jag to.

<sup>4</sup> Jet si Judas Iskariote ja sakey so nonta ira too nen Jesus, ja mengibaag ali so nen Jesus so nonta ira makakontra son si-kato, kowan to ey, <sup>5</sup> “Kimawas iman na dana! Apay nga eg to et indako, say sota dako to, may-ekan na tolong so nonta ira nankebiteg? Say banol nontan na kalasin dana, no maydeko, tedon dasos.” Kowan nen Judas Iskariote. <sup>6</sup> Nem kekaskasin waray kepengisekit nen Judas; nem enshi kari i toka pengisekit ni nankebiteg. Si-katoy para egshi ni pilak nonta totoo nen Jesus, jet sota eshom ma pilak ja wara nodta ijanan, toka pankibota.

<sup>7</sup> Jet si Jesus, simongbat ja kowan to ey, “Baybay-im si Maria, ta satan na danen intalo to, para so niya bakdang kon maybebka ali. <sup>8</sup> Sota ira nankebiteg, wara ni olay son si-kayo, isonga mebedin na todongan jo ira; nem si-kak, eg mebedjag i pekikadwak son si-kayo.” Kowan nen Jesus.

<sup>9</sup> Jet nontan met laeng, shinemag ira nonta eshakil la Hodiyoş ey wara si Jesus shi Bitania, isonga dimaw ired man. Aliwen si Jesus bengat i piyan shen on-an, no diket piyan sha pay ja asen ngo si Lazaro ja inpanbiyag nen Jesus. <sup>10</sup> Isonga sota ira apo ni papashi, waray pangkep sha pay ya bono-en si Lazaro, <sup>11</sup> ta eshakil iray Hodiyoş ja emati son Jesus nonta inon-an sha ja inpanbiyag to si Lazaro, jet eshakil malay eg memati so nonta ira papashi.

*Edadsak i totoo nonta mimotok si Jesus shi Jerusalem*

<sup>12</sup> Nonta maykadwen akew, sota eshakil la toon dimaw nodta piyasta shi Jerusalem, shinemag sha ey ondaw alis Jesus nodtan na piyasta. <sup>13</sup> Jet engala ira ni bolong nonta niyog, jet sha inapol si Jesus ja ireka onkaneljaw ni

iyaman sha son Apo Shiyos, ja kowan sha ey, “Salamat son Apo Shiyos! Bindisiyonan to koma iya toon inbetkag to di, ja ari tayon i-Israel!”

<sup>14</sup> Si Jesus, wáray simbi ton kilaw ni kowan sha ey donkey, jet si-katoy nankabajo-an to. Sajay i kaytoshongan nonta padto ja naysolat nonta bayag da ja kowan to ey, <sup>15</sup> “Si-kayon i-Jerusalem, karekayo ontakot, ta sota ari jo, ondaw da son si-kayo ja mengikan ni talna; isonga mankebayo shi kilaw ni donkey.”

<sup>16</sup> Sajay ya padto, eg nin inewatan nonta iratoo nen Jesus i olog to nonta pilmiro. Nem idi etey si Jesus et nanbiyag mowan asan ka-oli mowan da shi dangit, ninemnem sha ma ey sajay ya padto ket si-kato gayam i naytorongan nonta padto et etongpal.

<sup>17-18</sup> Sota ira eshakil la too ja engasas ni inpanbiyag son Jesus so nen Lazaro nodta diyang, si-karay engikowan so ni eshom ma totoo; isonga eshakil aliy dimaw ja en nay-aspol so nen Jesus. <sup>19</sup> Isonga sota ira Parisiyo, kowan sha ni tabtabal sha ey, “Asas jo kari, enshi may pesing tayo, ta emin malen too ket imonod ira son si-kato!”

*Inkowan nen Jesus i may-pangkep ni ketey to ali*

<sup>20</sup> Angken sota ira aliwén Hodiyo, wáray eshom ma dimaw shi Jerusalem ja en manshedjaw son Apo Shiyos nonta timpo ni piyasta ni Hodiyo ja Paskowa. <sup>21</sup> Jet sajay iren totoo, dimaw ira so nen Felipe ja i-Bitsaida ja sakop ni Galilia, jet kowan sha ey, “Apo, piyan min asen si Jesus.”

<sup>22</sup> Jet si Felipe, to inkowan so nen Andres, jet nan-olop ira ja sha inkowan so nen Jesus ey, “Wara iray toon makapiyan ja mengesas son si-kam.”

<sup>23</sup> Jet si Jesus, simongbat ja kowan to ey, “Sota timpon i-olik shi dangit, simabi ma, ta si-kak sota Anak ni Too. <sup>24</sup> Kinapodpodno iya ikowan ko son si-kayo. Say kay-eshigan ko, sota ilik ni pagey. Sota ilik ni pagey, no mebaybay-an ja eg may-a-sek shi bo-day, eg ma onshakel. Nem no sotan na ilik ket maymoda shi bo-day, onshakel ma. <sup>25</sup> Sota toon toka kawani i biyag to, mepokaw et ngo mowan; nem sota toon eg to kawanan i biyag to shiya dobong pangkep son si-kak, mewad-an ni biyag ja enshiy to engintegan. <sup>26</sup> Sota toon makapiyan ja mansilbi son si-kak, mesepol la si-kak i onoren to. No toway kad-an ko, si-kato ngoy kawad-an to, jet sota ira toon emati ja emansilbi son si-kak, i-aknan nen Amak ni shayaw sotan na too.”

<sup>27</sup> “Niman, simabi ja naka emankaikelkel-ewi, jet nganto emoy ishawat ko son Amak? Ikowan ko ngata son Amak ey idisi towak niya digat ja emansessesked son si-kak? Nem enshi, ta sajay i kabol la dinawan ko did jay. Isonga enosan koy digat.” <sup>28</sup> Jet si Jesus, nanshawit son Apo Shiyos ja kowan to ey, “Ama, si-kam i mengipa-sas met laeng ni kayshedjawan mo.”

Idi enakhsheng iya shawat nen Jesus, wára aliy esel ja edapod dangit, ja kowan to ey, “Inpa-sas koy kayshedjawan ko, pangkep nonta kaskasshaaw ja dingkam, nem pinshowa-en kon ipa-sas pay i kayshedjawan ko, pangkep nita dag-en mo di.”

<sup>29</sup> Jet sota eshom ma totoon nay-esop son Jesus, kowan sha ey kimirol, nem sota eshom, kowan sha ey, “Waray inkowan ni anghil son Jesus.”

<sup>30</sup> Nem si Jesus, say kowan to so nonta totoo, kowan to ey,

“Sota esel ja intenengan jo nonta ekay da, aliwen panmaptengan ko, nem eg panmaptengan jo, tep kabol nontan na esel ket memati kayo koma.<sup>31</sup> Niman ma i panshoki ni keshosa ni tood ja dobong, tan niman i keshagshag nonta emengitoshay niya dobong ja si Satanas.<sup>32</sup> No meksheng nga maykedjangak ja maydansa, si-kak met laeng i mengewis ni toon ondaw ali son si-kak ja memati.”

<sup>33</sup> Sajay i inkowan nen Jesus ta piyan ton say ewatan koma ira nonta totoo i itsora ni ketey to.<sup>34</sup> Nem sota ira totoo, simongbat ira ja kowan sha ey, “Say intenengan mi met ja kowan ira ni dinteg ket sota naypadton mengisedakan ja ibetkag ali nen Apo Shiyos ket eg kono metmetey ingkatod ingka. Ngantoy pesing nita kowan mo ey maykedjang ka ja maydansa? Kowan mi nem si-kam sota naypadton Anak ni Too! No aliwen si-kam, sipa ngarod ngay i kaytoshongan nonta naypadton ibetkag ali nen Apo Shiyos?”

<sup>35</sup> Simongbat si Jesus, ja kowan to son si-kara ey, “Sota may-eshig ey silew ja ondawag ni nemnem jo, entikey ya timpoy kawasha to son si-kayo. Isonga niman ta wara pay laeng son si-kayo, iringan jon man-ekad; ta no medebian kayo, eg jo amtay toshongen jo.<sup>36</sup> Isonga niman ta wara pay laeng son si-kayo sota silew wa ondawag so ni nemnem jo, pamati kayo ma son si-kato, say waray kay-ingesan jo son si-kato.” Kowan nen Jesus.

Idi naksheng nga inkowan nen Jesus iyay, indekjas to ira, jet dimaw nodta dogad ja eg onoran so ira niyay ya totoo.

*Angken nankemapteng i intoro nen Jesus, eg ngoreshan emati iray karakdan na Hodiyo*

<sup>37</sup> Eshakel i kaskasshaaw wa dingka nen Jesus, nem eg patpatien ira nonta totoo.<sup>38</sup> Sajay i kaytoshongan nonta naysolat ja kowan nen Isaias ja para padto nonta bayag da ey, “Apo, enshiy ememati nonta mika pan-ikowan son si-kara, jet enshi emo may engipa-sasan nen Apo Shiyos ni panakabalin to.”

<sup>39-41</sup> Isonga eg mebedin na memati ira. Si Isaias, inon-an toy kina-Shiyos nen Cristo tep mismon inpa-sas nen Apo Shiyos son si-kato. Isonga waray inpadto to ja kowan to ey, “Si Apo Shiyos, si-kato met laeng i singa kimorab son si-kara, tan inpatangken so ni nemnem sha, say eg asen ni matesha tan eg sha ewatan, say eg ira di ondaw son si-kak ja manpakas.”

<sup>42</sup> Nem eshakel met laeng iray toray ja emati son Jesus, nem sajay iren emati, eg sha ipa-sas ey emati ira, ta entakot sha iray Parisiyo ey a-kalen sha ira shima sa-nopan ni Hodiyo, ja eg ma ira mebedin na mekisa-sa-nop.<sup>43</sup> Eg sha ipa-sas ey ireka memati tep say pipiyan sha, sota kosto-an so ni too son si-kara, ey aliwa et ta sota kosto-an so nen Apo Shiyos son si-kara.

<sup>44</sup> Iyay iray epangdon inkowan nen Jesus pangkep niyay: kowan tod karakdan ni too ey, “Sota ira memati son si-kak, aliwen si-kak bengat i pinatira, no diket emati ngo ira so nen Amak ja engibetkag ali son si-kak.<sup>45</sup> Tan sota ira engasas son si-kak, amtara may itsora nen Amak ja engibetkag son si-kak.<sup>46</sup> Dimawak alid jay ya may-eshig ey silew ni tood ja dobong, say medewagan i nemnem sha. Jet sota ira memati son si-kak, may-eshig ey enshi ma ira shi embolinet.<sup>47</sup> Sota ira toon mengiteng ni ikowan ko, nem eg sha pati-en, aliwen si-kak

i mengigsheng ni keshosara, ta aliwén sotan i dinawan ko did jay, ta say podnon dinawan ko did jay, nak koma isalakan ira ja tood ja dobong. <sup>48</sup> Sota ira eg memati son si-kak, ono eg mengewat nonta ikowan ko, meshosa ira ali, jet say kaybetayan ali ni keshosaran sha shi ka-onoran na akew, sota intorok ja intenengan sha. <sup>49</sup> Ta sotan na inkowan ko, aliwén si-kak i makanemnem, no diket sotan i inkowan nen Amak ja engibetkag alid jay son si-kak. <sup>50</sup> Jet amtak ey sota inkowan nen Amak ja itorok so ni totoo, sotan i mengi-kan ni biyag ja enshiy to engintegan; isonga emin sotan na inkowan nen Amak son si-kak, si-kato ngoy naka itoro ni olay son si-kara.”

### 13

*Si Jesus, inodsan toy sedi ira nonta too to*

<sup>1</sup> Shanshani ja manshoki sota piyasta ni Hodiyo ja kowan sha ey Paskowa, jet si Jesus, amta to ey sotan may timpo ja idekjasan to so niya dobong, ja on-oli ma so nen Ameto shi dangit. Nontan na timpo i pengipa-sas to ey enshiy kolang ni semek to so ni totoo ton wared ja dobong, ta sigod ja ensemek to ngoreshan ira.

<sup>2-3</sup> Jet si Satanas, inpannemnem tos Judas Iskariote ja anak nen Simon, ey to ibaag si Jesus so nonta makakontra son si-kato. Nem si Jesus, amta to ey in-akan nen Ameton emin i panakabalin son si-kato. Tan amta to ey say edaponan to shorog ket si Apo Shiyos, jet si Apo Shiyos met laeng i odian to. Isonga nonta mama-shem ja nandilikob ira sota apostol ton emengan, pati si-kato, <sup>4</sup> dimayat si Jesus jet ingkal to sota nayta-kep shi baro to, jet inda to sota towalja asan toka ibalkes. <sup>5</sup> Engala ni shanom jet insho-jag to nodta

palangkana jet inshogi ton sina-sa-key ja odsan i sedi nonta ira apostol to, asan toka ponasi nonta towalja ja inbalkes to.

<sup>6</sup> Idi onsabi so nen Simon Pedro, kowan nen Pedro ey, “Apo, apay, odsan mo ngoy sedik?”

<sup>7</sup> Jet si Jesus, simongbat ja kowan to ey, “Eg mo nin ewatan iyay ya naka pandag-a, nem no ekay amta-en moy olog to.”

<sup>8</sup> Si Pedro, kowan to ey, “Ekak itolok ja odsan moy sedik.”

Jet si Jesus, kowan to ey, “No ekak odsan i sedim, enshi may biyang mo son si-kak.”

<sup>9</sup> Jet si Simon Pedro, timolok ja kowan to ey, “No kasta Apo, aliwén saja sedik bengat i odsan mo, no diket pati saja takday ko, tan saja toktok ko.”

<sup>10</sup> Si Jesus, simongbat ja kowan to ey, “Say toon naksheng nga nan-emes, edinis sa emin i bakdang to, jet say mesepol la ma-odsan bengat, sota sedi to. Jet emin kayo, maybidang ey edinis kayo, nem waray sakey bengat son si-kayo ja aliwén edinis.” Kowan nen Jesus. <sup>11</sup> (Ta amta ton sigod no sipa nodta too to sota mengibaag son si-kato so nonta ira toon makakontra son si-kato; isonga inkowan to ey waray sakey so nodta too to i aliwén edinis.)

<sup>12</sup> Idi naksheng nga inodsan nen Jesus i sedira, inbaro to mowan sota ta-kep ni baro to, jet imolin timongaw nodta sigod ja tinongawan to ja kad-an ni damisaan jet kowan to ey, “Joka ewati iyay ya dingkak son si-kayo? <sup>13</sup> Sota awag jo son si-kak ja kowan jo ey Maistoro tan Apo jo ket agpayso; jet anam to ta agpayson si-kak sotan. <sup>14</sup> Nem asas jo kari; si-kak et ngo mowan i engoras ni sediyoy, ey si-kak pay i apo jo tan maistoro jo. Isonga pandaga kayo ngo ni pansigshan ni sakey tan sakey son si-kayo, ja angken mengoshas

kayo ngo ni sedi ni kait jo. <sup>15</sup> Sajay i dingkak, say wáray onoran jo. <sup>16</sup> Kinapodpodno iya ikowan ko son si-kayo. Sota baga-en, aliwén si-kato et ngo mowan i ibaingan ni totoo ey say sota apo to. Jet inges niyay sota emaybetkag. Sota emaybetkag, aliwén engatngato ey say sota emengibetkag son si-kato. <sup>17</sup> Niman, amtayo ma ira ja inkowan ko la, jet si-kato komay onoran jo ja dag-en. Jet say pan-benagan to, man-imdeng kayo.

<sup>18</sup> “Sajay ya naka pan-ikowan, aliwén na para son si-kayon emin, ta amtak i itsora jon apostol ko ja pinidik. Nem mesepol la metongpal sota padto nonta bayag da ja naysolat ja kowan to ey, ‘Sota pinekan ko, si-kato et ngo mowan i nanbalin na makakontra son si-kak.’ <sup>19</sup> Insigod ko ja inkowan son si-kayo niman iyay ta no onsabi sota timpo ja medeka son si-kak iyay, piyan kon memati kayo ey si-kak sota naypadton mengisedakan ja inbetkag nen Apo Shiyos alid ja dobong. <sup>20</sup> Nem kinapodpodno iya ikowan ko ni maypangkep son si-kayon mebay-an ja ibetkag ko. Sota mengewát son si-kayo, may-eshig ey si-kak i inewát to, jet sota mengewát son si-kak, may-eshig ey si Amak ja engibetkag son si-kak i inewát to.”

<sup>21</sup> Idi enaksheng nga inkowan nen Jesus iyay, naykel-ewan et kowan to so nonta ira apostol to ey, “Kinapodpodno iya ikowan ko son si-kayo. Waray sakey son si-kayo ja si-katoy mengibaag son si-kak so nonta ira toon makakontra son si-kak.”

<sup>22</sup> Jet sota apostol to, nansisinining bengat ira, ta eg sha amta no sipa sotan na too ja toka pan-ikowan son si-kara. <sup>23</sup> Waray sakey so nonta ira apostol nen Jesus ja ensemek ton pasiya; timongaw shi nay-askang son Jesus. <sup>24</sup> Si Simon, sininjasan to sotan na

nay-askang son Jesus, ja kowan to ey, “Ibag-im ka no sipay kay-toshongan nonta inkowan to la.”

<sup>25</sup> Imiral sotan na too son Jesus jet inbag-an to ja kowan to ey, “Sipa ta kowan mo ey mengibaag son si-kam?”

<sup>26</sup> Jet si Jesus, simongbat ja kowan to ey, “Sota pengi-kanan ko nonta tinapay ya i-eneng ko, si-kato sotan na too.”

Jet si Jesus, engala ni tinapay jet in-eneng to, asan toka i-kan so nen Judas Iskariote. <sup>27</sup> Idi enaksheng nga inewát nen Judas Iskariote sotan na tinapay, simekep ma si Satanas son si-kato. Jet si Jesus, kowan to so nen Judas ey, “Kano-im, dagam ma sota dag-en mo.”

<sup>28</sup> Jet sota eshom ma apostol nen Jesus, ja nandilikob, eg sha inewatan iya inkowan nen Jesus so nen Judas. <sup>29</sup> Say wáred nemnem ni eshom, kowan sha ey inbetkag nen Jesus si Judas ja en menongkal ni mesepol sha ta timpo ni piyasta, ono inbetkag to ja en mengi-kan ni pilak so nonta ira nankebiteg. Ta si Judas i para egshi nonta pilak sha. <sup>30</sup> Jet idi enaksheng nga inewát nen Judas Iskariote sota tinapay son Jesus, bimo-day nodta baley ya kad-an sha. Jet nontan na inbo-day to, edabi.

<sup>31</sup> Idi bimo-day mala, kowan nen Jesus ey, “Niman ma sota timpo ja kayshedjaw ko, ja naypadton Anak ni Too, tan kayshedjaw nen Apo Shiyos pangkep nonta dag-en ko ali. <sup>32</sup> No si Apo Shiyos ket sota dag-en ko i kayda-kaman to ni shayaw, si-kato ngoy mengiredjaw son si-kak. Jet sajay, medeka son si-kak ka shagos. <sup>33</sup> Si-kayon took ja naka ikari ey annak ko, aliwén enshokey ya timpoy kawashak son si-kayo. Jet niman, ipinshowak sota inkowan ko so nonta ira toray ni Hodiyo, ey wáray timpon onsabi ja en-

enapen jowak, nem shima dawán ko, eg mebedin na on-onod kayo. <sup>34</sup> Niman, iyay pay i ikowan ko son si-kayo, ja badon bilin. Mesepol la wáray semek jo so ni sakey tan sakey son si-kayo, ja inges toy semek ko son si-kayo. <sup>35</sup> Ta sajay i amta-an so ni totoo ey si-kayo ket agpayson too takejo.”

*Naysigod ja inkowan nen Jesus sota ngaaw wa pesing ali nen Pedro*

<sup>36</sup> Inkowan nen Simon Pedro ey, “Apo, toway kowan mo ey dawán mo?”

Simongbat si Jesus ja kowan to ey, “Eg mebedin na on-onod ka niman son si-kak, nem wára diy timpon onoren mowak.”

<sup>37</sup> Si Pedro, kowan to mowan son Jesus ey, “Apay eg mebedin aya ja on-onoshak niman shi dawán mo? Ta si-kak, esagana-ak, ja angken meteyak ja mengibediw son si-kam.”

<sup>38</sup> Nem si Jesus, simongbat ja kowan to ey, “Jet agpayson angken metey ka ja mengibediw son si-kak? Ikowan koy podno son si-kam: memintedo ja ikowan mo ey eg mowak am-amta asan ketekok sota kawitan.” Sajay i kowan nen Jesus son Pedro.

## 14

*Si Jesus, kowan to ey si-kato sota may-eshig ey shalan ja ondaw so nen Ameto*

<sup>1</sup> Jet kowan pay nen Jesus ey, “Karekayo meshanagan; pamati kayo et son Apo Shiyos, tan pamati kayo ngo son si-kak. <sup>2</sup> Shima dogad ja kad-an nen Amak, eshakil i pan-iyanan, jet ondawak ja en mengisekana ni pan-iyanan jo. No sajay ya inkowan ko ket, aliwén agpayso, istay ekak koma ikowan son si-kayo. <sup>3</sup> No meksheng nga isaganak sotan na dogad ja pan-iyanan jo, on-oli-

ak ali et al-en takejo, ta piyan kon shima kad-an ko ket si-kato ngoy pan-iyanan jo. <sup>4</sup> Jet amtayo i shalan ja ondaw shima dogad ja dawán ko.” Kowan nen Jesus.

<sup>5</sup> Si Tomas, kowan to ey, “Apo, eg mi amtay dawán mo; isonga eg mi amtay shalan.”

<sup>6</sup> Jet si Jesus, simongbat ja kowan to ey, “Si-kak i may-eshig ja shalan, si-kak i podno, si-kak i mengi-kan ni biyag. Enshiy angken sipa ja maka-edaw so nen Amak, no eg nin manshedan son si-kak. <sup>7</sup> No amtayo koma no sipa-ak, istay angken si Amak, amtayo koma ngo. Jet manipod ma niman, amtayo ma si Amak ta singa inon-an jo.”

<sup>8</sup> Si Felipe, kowan to ey, “Apo, ipa-sas mo son si-kami si Ama say mepnek kami.”

<sup>9</sup> Si Jesus, simongbat ja kowan to ey, “Felipe, ebayag ga naykadwa-ak met son si-kayo, ket eg mowak pay laeng gayam amta? Sota engasas son si-kak, amtara may itsora nen Amak. Apay nga ikowan mo ey ipa-sas kos Amak son si-kayo? <sup>10</sup> Apay eg kayo memati aya ey si-kak, wára-ak so nen Amak, jet si Amak wára ngo son si-kak? Emin sota inkowan ko la son si-kayo, aliwén edapo shi nemnem ko, no diket sotan i inkowan nen Amak son si-kak. Jet emin sota dingkak, si-katoy inbilin to. Si Amak, wára ni olay son si-kak. <sup>11</sup> Patiyo ey si-kak ket wára-ak so nen Amak, jet si Amak, wára ngo son si-kak. Nem no eg jo pay laeng pati-en, patiyowak koma mango ta inon-an joy dingdingkak.

<sup>12</sup> “Kinapodpodno iya ikowan ko son si-kayo. Sota memati son si-kak, dag-en to ngoy inges ni dingdingkak ja kaskasshaaw. Jet sotan na dag-en to, ebadbadeg ey say sota dingkak, ta si-kak, on-oli-ak son Amak. <sup>13</sup> No ngarrantoy

shewaten jo son Amak pangkep ni joka pengi-edagey son si-kak, i-akan ko son si-kayo, say si Amak i mayshedjaw. <sup>14</sup> No waray ibaga jo pangkep ni joka pengi-edagey son si-kak, i-akan ko.

*Sota Ispirito Santo nen Apo Shiyos ja inkari nen Jesus*

<sup>15</sup> “Jet no ensemek jowak, say pati-en jo, sota bilin ko. <sup>16-17</sup> Ikowan ko son Amak ey pan-iyen to ali sota Ispirito Santo to son si-kayo, jet si-katoy ontolong son si-kayo ingkatod ingka, ja si-katoy mengiredan son si-kayo shi podno. Saja tood ja dobong ja eg emati son si-kak, eg mebedin na man-iyen son si-kara i Ispirito Santo nen Apo Shiyos, ta eg sha am-amta, tan eg sha indasin. Nem si-kayo, amtayo mango, ta wara son si-kayo ja man-iyen ni olay.

<sup>18</sup> “Idekjas takejo niman, nem eg takejo baybay-an, ta on-oli-ak mowan ali son si-kayo. <sup>19</sup> Niman, entikey ya timpoy i-asas sha-ak so ira niya tood ja dobong ja eg emati, nem si-kayo, asen jowak mowan tep manbiyagak mowan ali. Jet angken si-kayo, manbiyag kayo ngo ali. <sup>20</sup> No onsabi ali sota timpo ja panbiyag ko mowan, si-katoy amta-anan jo so ey ag-payson si Amak ket wara son si-kak, jet angken si-kayo ngo, wara kayo son si-kak, tan si-kak, wara-ak son si-kayo. <sup>21</sup> Sota etod-an ni bilin ko, ja mengonod so, si-kak i ensemek to, jet sota waray semek to son si-kak, ensemek ngo nen Amak, jet angken si-kak, ensemek ko ngo. Jet wara pay i pa-amtak so nontan na too say amta-en towak ka pasiya.” Kowan nen Jesus.

<sup>22</sup> Si Judas (aliwen si Judas Iskariote iyay, apil ngo), kowan to

ey, “Apo, apay nga si-kami ben-gat i ipa-amta-an mo so ni may-pangkep son si-kam, ey aliwen sota toon emin shiya dobong?”

<sup>23</sup> Jet si Jesus, simongbat ja kowan to ey, “Sota toon waray semek to son si-kak, pati-en to sota ikowan ko son si-kato, jet si Amak, ensemek to ngo sotan na too. Jet si-kak tan si Amak, man-iyen kami son si-kato. <sup>24</sup> Sota toon enshiy semek to son si-kak, eg to pati-en i naka ikowan. Sota inkowan ko la son si-kayo, aliwen edapod nem-nem ko, nem eg mismon inkowan nen Amak ja engibetkag alid jay son si-kak.

<sup>25</sup> “Inkowan ko la iyay son si-kayo, ta wara-ak pay laeng nin son si-kayo. <sup>26</sup> Sota Ispirito Santo, si-katoy ibetkag ali nen Amak son si-kayo ja ontolong son si-kayo, tep naykasakey kayo son si-kak, say eg jo dibkan sota emin na inkokowan ko la son si-kayo. Jet sotan i mengitosho son si-kayo ni emin. <sup>27</sup> Idekjas takejo ma, nem sota talna ja enshiy maka-inges so, ja medepo son si-kak, si-katoy isepak son si-kayo. Sajay ya talna ja i-akan ko son si-kayo, aliwen inges to sota talna ja kai-akan niya dobong. Karekayo man-shanag, ono karekayo ontakot. <sup>28</sup> Intenengan jo met sota inkowan ko la ey angken idekjas takejo, on-oli-ak mowan ali son si-kayo. No wara komay semek jo son si-kak, istay nan-imdeng kayo koma, ta si Amak ja dawán ko, engatngato ngo eshan ey say si-kak. <sup>29</sup> Insigod kon inkowan son si-kayo iyay, ta no onsabi ma sota timpo ja medeka son si-kak iya inkowan ko la, piyan kon memati kayo son si-kak. <sup>30</sup> Enshi may enshokey ya timpok ja mekitbal son si-kayo, ta sota engitoshay niyay ya dobong, ja si Satanas, iyay aliy intorong to; nem aliwen si-katoy engitoshay son si-kak. <sup>31</sup> Dag-en ko ngo eshan

sota inbilin nen Amak ja obda-en ko, say amta-en ni tood ja dobong ey ensemek ko si Amak.”

Idi enaksheng nga inkowan nen Jesus iyay, kowan to son si-kara ey, “Eti ondaw kito; idekjas tayo iyay ya dogad.”

## 15

*Si Jesus i podnon may-eshig ey sengeg ni mola*

<sup>1</sup> “Si-kak i koskoston may-eshig ey sengeg ni mola, jet si Amak i emengajowan nontan na mola.

<sup>2</sup> Jet no sotan na mola ket waray pangeto ja eg ondames, a-kalen to sotan na panga. Nem sota panga ja mandemes, shedosan to, say mas ondames pay. <sup>3</sup> Si-kayo, may-eshig ey eshalosan kayo ma, ta inkowan ko la sota esel nen Apo Shiyos son si-kayo. <sup>4</sup> Si-kak i pati-en jo ni olay, say wara-ak ngo ni olay son si-kayo. Sota panga, no abos to, eg mebedin na ondames; mesepol la wara ni olay nodta makapanga so. Sajay i kay-eshigan jo; isonga mesepol la si-kak ni olay i nemnemnemen jo.

<sup>5</sup> Si-kak sota may-eshig ey sengeg ni mola, jet si-kayo sota may-eshig ey panga, jet sota on-onong ja memati son si-kak, wara-ak ngo ni olay son si-kato jet si-kato sota asdeg toy panbenagan ton mapteng. Nem sota toon enshi-ak son si-kato, enshiy to panbenagan. <sup>6</sup> Isonga sota eg on-onong ja memati son si-kak, may-ibong ja singa inges to sota panga ja epotol nodta makapanga so. Jet sotan na panga, mekkit; jet olnongen shen maypool shi apoy.

<sup>7</sup> No si-kak ni olay i pati-en jo, ja onoren jo ni olay sota inkowan ko, i-akan koy ibaga jo son si-kak.

<sup>8</sup> Ta say kayshedjawan nen Amak, sota panbenagan ni pamatiyo. Jet sajay pay i amta-an sha so ey too takejo. <sup>9</sup> Sota semek ko son si-

kayo, inges toy kaba-deg ni semek nen Amak son si-kak. Isonga itodoy jon memati son si-kak, say wara ni olay son si-kayo sota semek ko. <sup>10</sup> No say nemnemnemen jo ket sota inkowan ko la son si-kayo ja bilin, wara ni olay son si-kayo sota semek ko. Ta si-kak ngo, naka pati-a i bilin nen Amak, jet wara ni olay son si-kak sota semek to. <sup>11</sup> Sajay i kowan ko son si-kayo, say mayda-kam kayo nodta imdeng ja wara ngo son si-kak, jet mas pay ya man-imdeng kayon pasiya.

<sup>12</sup> “Iyay pay i piyan kon ikowan son si-kayo ja bilin. Mesepol la ensemek joy sakey tan sakey son si-kayo ja inges toy itsora ni semek ko son si-kayo. <sup>13</sup> Say ka-asan ni ebadeg ga semek ni sakey ya too, sota pengitodok to ni bakdang to ja angken metey para so nonta kagajem to. Sajay i oltimon ka-asan ni kaba-deg ni semek. <sup>14</sup> Jet niman ma, si-kayoy kagajem ko, no sota ikowan ko ket si-katoy pati-en jo. <sup>15</sup> Aliwen baga-en may pengibidang ko son si-kayo, ta say baga-en, eg ikowan nonta apo to son si-kato i emin na toka dagdaga. Isonga say awag ko son si-kayo, kagajem takejo, ta emin sota inkowan nen Amak son si-kak, inpa-amtak son si-kayo. <sup>16</sup> Aliwen si-kayoy emili son si-kak ja maistoro jo, nem si-kak i emili son si-kayo. Jet ibetkag takejo so ni totoo ja en mengikowan ni maypangkep son si-kak, jet sota dag-en jo, ebadeg i panbenagan to, ja eg mepokaw. Jet no ngantoy shewaten jo son Amak, pangkep ni joka pengi-edagey son si-kak, i-akan to son si-kayo. <sup>17</sup> Say bilin ko son si-kayo, mesepol la waray semek jo so ni sakey tan sakey son si-kayo.

<sup>18</sup> “No saja tood ja dobong nga eg emati ket okesen shakejo kabol



ni pamatiyo son si-kak, karekayo messhaaw, ta amtayo met ey si-kak i epangdon inokes sha. <sup>19</sup> No si-kayo ket inges jo ira ja tood ja dobong ja eg emati, istay ensemekek shakejo koma. Nem si-kayo, aliwen inges jo ira, ta pinidi takejo ja maydesin son si-kara; isonga en-oges shakejo. <sup>20</sup> Karejo dibdibkan sota inkowan ko la son si-kayo, ey say baga-en, aliwen sikato et ngo mowan i ibaingan ni totoo ey say sota apo to. Jet si-kak ja apo jo, pedikaten sha-ak; isonga angken si-kayo, sigoradon pedigaten shakejo ngo ali pangkep ni pamatiyo son si-kak. Nem no pinatiray esel ko, pati-en sha ngoy ikowan jo. <sup>21</sup> Eshakel aliy digat ja dag-en sha son si-kayo pangkep ni pamatiyo son si-kak, ta sota engibetkag son si-kak, eg sha pati-en. <sup>22</sup> No ekak ali dimaw ja engitosho son si-kara, istay mebedin na ikowan sha ey enshiy basol sha, nem niman, enshiy pangbal sha ja mengikowan ey enshiy basol sha. <sup>23</sup> Jet sota toon makakontra son si-kak, kontra sha ngo si Amak. <sup>24</sup> No eg sha inonan i dingkak ja kaskasshaaw, ja eg mebedin na dag-en ni angken sipa, istay mebedin na ikowan sha ey enshiy basol sha. Nem angken na inon-an sha iyay ya dingkak, iso met laeng nga kontra sha-ak, tan kontra sha pay si Amak. <sup>25</sup> Nem sajay i ketongpalan nonta naysolat shi dinteg sha, ja kowan to ey, 'Kinontra sha-ak ey enshiy kabol.' <sup>26</sup> Sota Ispirito Santo ja mandepo so nen Amak, si-katoy ontolong son si-kayo say ewatan joy podno. Ibetkag ko di ja man-iyen son si-kayo, jet si-kato met laeng i mengipaneknek ni maypangkep son si-kak. <sup>27</sup> Jet si-kayo pay i mengikowan ni maypangkep son si-kak, ta si-kayo, naysigod ja naykadwa kayo son si-kak, nonta

ikayshogik so pay laeng nonta obdak shiya dobong."

## 16

<sup>1</sup> Wara pay i inkowan nen Jesus son si-kara ja kowan to ey, "Insigod kon inkowan iyay son si-kayo, say eg medingding i pamatiyo son si-kak. <sup>2</sup> Ta a-kalen shakejo pay shima dogad ja sanopan ni Hodiyos, ja eg shakejo ma ipalobos ja mekisa-sa-nop son si-kara. Aliwen sotan bengat: sota pay ira memono son si-kayo, say wared nemnem sha, kowan sha ey sotan na dag-en sha, aliwen basol, no diket shaka pandag-a ja para son Apo Shiyos. <sup>3</sup> Jet sajay i dag-en sha son si-kayo, ta eg sha-ak amta, tan eg sha pay amta si Amak. <sup>4</sup> Insigod ko iyay ya inkowan son si-kayo say no onsabi sotan na digat ja dag-en sha son si-kayo, eg kayo messhaaw, no diket nemnemen jo iyay ya inkowan ko son si-kayo.

*Sota panbenagan ni obda ni Ispirito Santo nen Apo Shiyos*

"Ekak inkowan iyay son si-kayo nonta pilmiro ta wara-ak nin son si-kayo. <sup>5</sup> Niman, ikowan ko ma son si-kayo ta on-oli-ak ma so nen Amak ja engibetkag alid jay son si-kak. Nem angken sakey son si-kayo, enshiy en engibegka son si-kak no ngantoy panbenagan ni idaw kod ma dawen ko. <sup>6</sup> Jet niman ta inkowan ko iyay son si-kayo, kayoka mandeshingit ta pasiya. <sup>7</sup> Ikowan ko son si-kayoy podno: sota pengilekjas ko son si-kayo ni i-olik so nen Amak, panmaptengan jo. Ta no ekak ondaw, sota Ispirito Santo nen Amak, ja ontolong son si-kayo, eg ngo ali ondaw ja man-iyen son si-kayo. Nem no on-oli-ak so nen Amak, sota Ispirito Santo to, ibetkag ko ali ja man-iyen son si-kayo. <sup>8</sup> No sota Ispirito Santo nen Amak aliy

maysa-dat son si-kak, ipa-amta toy pati-an so ni tootod dobong ja eg emati ey wáray basol sha, tan ipa-amta to pay son si-kara no sipay kinosto-an nen Apo Shiyos. Tan ipa-amta to pay i pesing nen Apo Shiyos ja menosa. <sup>9</sup> Say pengamta-an sha ey wáray basol sha, eg sha-ak pinati. <sup>10</sup> Say pengamta-an sha ey si-kak i kinosto-an nen Apo Shiyos, on-oli-ak son Amak. Jet eg jowak ma on-on-an. <sup>11</sup> Say pengamta-an sha ni pesing nen Apo Shiyos ja menosa, si Satanas ja engitoshay niyay ya dobong, kenshat ta meshosa.

<sup>12</sup> “Eshakel pay iya piyan kon ikowan son si-kayo, nem niman, eg jo pay nin kabaalan na ewatan. <sup>13</sup> Nem no man-iyán ali son si-kayo sota inkowan ko la ey Ispirito, si-katoy mengitoshon son si-kayo nonta maypangkep ni podno. Jet sotan na itoro to, aliwén sota mandepod nemnem to, no diket sota itenengan to ja ikowan nen Apo Shiyos. Tan ipa-amta to pay sota medeka ali son si-kayo. <sup>14</sup> Ishayaw towak, ta si-katoy mengiranon ni piyan kon ikowan son si-kayo. <sup>15</sup> Sota wára son Amak, wára ngo son si-kak; isonga sajay i inkowan ko ta sota Ispirito Santo nen Amak ja maysa-dat ali son si-kak, si-katoy mengiranon ni piyan kon ikowan son si-kayo.

*Mandeshingit ira sota apostol ni idekjasan so ira nen Jesus nem manbedin met laeng ni dadsak*

<sup>16</sup> “Nem ekay, eg jowak ma nin asen ni sanká-atikan, nem asen jowak met laeng nga shagos.” Sajay i inkowan nen Jesus.

<sup>17</sup> Jet sota ira apostol nen Jesus, nanbibinaga ira ey, “Ngaranto emoy olog nonta kowan to ey, ‘Nem ekay, eg jowak ma nin asen ni sanká-atikan, nem asen jowak met laeng nga shagos?’

Asan ngaranto pay emoy olog nonta kowan to ey, ‘Ondawak so nen Amak?’” <sup>18</sup> Agdalon nanbibinaga ira no ngarantoy olog nonta kowan to ey “nem ekay”, ta eg sha amta.

<sup>19</sup> Nem si Jesus, amta to ey piyan nonta ira apostol ton ibaga i olog nonta inkowan to, isonga kowan to son si-kara ey, “Jet kayoka manbibinaga no ngantoy olog da nonta inkowan ko ey eg jowak ma nin asen ni sanká-atikan, nem asen jowak met laeng nga shagos?” <sup>20</sup> Kinapodpodno iya ikowan ko son si-kayo. Saja ira tood ja dobong nga eg emati son si-kak, man-imdeng ira; nem si-kayo, mandeshingit kayon pasiya. Nem sota daringit jo, mesa-datan met laeng ali ni imdeng. <sup>21</sup> Say i-arigan ko son si-kayo, sajay. Sota bii, no shanshanin on-anak, mandeshingit nin, ta simabi ma sota timpo ja pandikat to. Nem no naksheng ma ja imanak, man-imdeng ma ta wáray in-anak ton too shiya dobong, jet dibkan to sotan na daringit. <sup>22</sup> Sajay i kayeshigan jo. Niman, kayoka mandeshingit, ta idekjas takejo, nem asen takejo met laeng nga shagos, jet man-imdeng kayo mowan na pasiya ma. Jet sotan na imdeng jo, enshiy en ondingding so, angen sipa. <sup>23</sup> No onsabi sotan alin akew, aliwén si-kak may panshewatan jo, no diket si Amak. Jet no wáray shewaten jo son si-kato, pangkep ni joka pengi-edagey son si-kak, i-akan to son si-kayo. <sup>24</sup> Enshi pay nin i jo shinewat son si-kato ni pangkep ni sajay. Panshawát kayo niman son si-kato, jet i-akan to son si-kayo i shewaten jo, say mepno kayo ni imdeng.

<sup>25</sup> “Nontan da, say naka pengitoshon son si-kayo, arig ni olay; nem wáray timpon onsabi ja aliwá men arig i pengitoshok, no diket idiritsok ma ja ikowan son

si-kayo i maypangkep son Amak.<sup>26</sup> No onsabi sotan na timpo, si Apo Shiyos ja Amak i mismon panshewatan jo ta si-kayoy mengi-edagey son si-kak. Aliwén si-kak may mengshaw para son si-kayo,<sup>27</sup> ta si Amak, mismon ensemeke tokejo, ta ensemeke jowak ngo, tan joka pati-a ey si-kak ket edapo-ak son si-kato.<sup>28</sup> Si Amak ka wáred dangit i edapo-an ko di, jet niman si-kato met laeng i odian ko.” Sajay i inkowan nen Jesus.

<sup>29</sup> Jet sota ira apostol to, kowan sha ey, “Siya, edawag may moka ikowan jet mika ewáti ma! Aliwén inges to nonta pilmiro ja poro arig i moka pantosho.<sup>30</sup> Jet niman, amta mi ma ey si-kam, amtam ma emin, angken saja wáred nemnem mi. Angken eg kami mansedodsod, ta amtam; isonga kamika memati ey si Apo Shiyos i edapo-an mo.”

<sup>31</sup> Jet si Jesus, simongbat ja kowan to ey, “Jet niman, kayoka mala ememati son si-kak?<sup>32</sup> Nem simabi ma sota timpon kebodak jo, jet emin kayo, sakey ey onakad shi baley to. Si-kayo, bay-an jowak, nem aliwén sak-sakey kon mebay-an, ta si Amak, wára son si-kak.<sup>33</sup> Insigod kon inkowan iyay son si-kayo, say mewad-an kayo nonta talna ja edapo son si-kak. Shiya dobong, pedigaten shakejo, nem karekayo manshanag, ta si-kak ngoreshan i emengebak ni olay, aliwén sota toon eg memati son si-kak!”

## 17

*Si Jesus, inshawatan to sota ira too to so nen Apo Shiyos*

<sup>1</sup> Idi naksheng nga inkowan nen Jesus iyay, timangkak shi dangit ja kowan to ey, “Ama, simabi ma sota timpo ja si-kam met laeng i mengi-kan ni kayshedjawan ko, say si-kak ngoy mengi-

kan ni kayshedjawan mo.<sup>2</sup> Ta si-kam Ama i engi-kan son si-kak ni panakabalin na mengitoshay so ni emin na too, jet si-kak i mengi-kan ni biyag ja enshiy to engintegan so nonta totoon piyan mon mewad-an ni biyag.<sup>3</sup> Jet no mewad-an ma ira ni biyag ja enshiy to engintegan, si-kato may amta-an sha son si-kam, ey si-kam i podnon Shiyos ja enshiy eshom, tan si-kato ngoy amta-an sha son si-kak, ey si-kak si Jesucristo ja inbetkag mo alid ja dobong.<sup>4</sup> Sota obda ja inkowan mo son si-kak ey dag-en ko shiya dobong, kinsheng ko jet si-katoy nayshayawan mo.<sup>5</sup> Jet niman Ama, si-kam i mengi-odi nonta sigod ja shyaw ko ngo eshan nonta wára-ak shi kad-an mo, nonta eg pay laeng epalsowa iya dobong.

<sup>6</sup> “Sota toom ja wáred ja dobong ja in-awat mo son si-kak, inpa-amtak son si-kara sota maypangkep son si-kam, jet pinatiray esel mo.<sup>7</sup> Jet niman amtara ma ey emin na wára son si-kak ket si-kam i edapo-an to, ja in-akan mo son si-kak.<sup>8</sup> Ta inkowan ko son si-kara sota inkowan mo son si-kak jet inewat sha, jet amtara ma ey podno ja si-kam i edapo-an ko, tan si-kam i engibetkag ali son si-kak shiya dobong.

<sup>9</sup> “Ama, aliwén sota eg emati i naka pan-ishawati, no diket saja toon kokowam ja in-awat mo son si-kak ja emati son si-kak.<sup>10</sup> Emin sota took, si-kam ngoy makakokowa, jet angken sota ira toom, si-kak ngoy makakokowa, jet si-karay kayshedjawan ko.<sup>11</sup> Niman, idekjas ko iya dobong, jet on-oli-ak da son si-kam. Nem saja ira took ja in-awat mo son si-kak, mebay-an nin ira shiya dobong, jet si-kam Ama, i maka-amta ja mengajowan son si-kara. Si-kam i napno-an ni emin na kinamapteng; isonga i-

osal moy panakabalin mo, say manseksekey ira ja inges toy inpansaksakey ta. <sup>12</sup> Nonta wára-ak son si-kara, inajowan ko ira iya in-awat mo son si-kak, jet inosal koy panakabalin mo. Ekak ira in-oway, jet enshiy en epokaw son si-kara, malaksig bengat sota sakey ya si Judas. Sajay ya too, kenshat ta epokaw, ta mesepol la metongpal sota naysolat ja esel mo nonta bayag da.

<sup>13</sup> “Jet niman, shanshani mala sota i-olik son si-kam, nem ikowan ko iyy son si-kara ta wára-ak nin shiya dobong, say mepno ngo ira nonta imdeng ja wára son si-kak. <sup>14</sup> Sota inkowan mo son si-kak, inkowan ko ngo son si-kara, jet sajay iren too, emati ira son si-kak. Jet sota tood ja dobong ja eg emati, kontra sha ira ja took, ta eg nay-inges i ogadira so nodta ira eg emati. <sup>15</sup> Say shawat ko para son si-kara, aliwén naka pan-ishawat ey a-kalen mo ired ja dobong, no diket ajowanim ira koma, say eg sheshalen ira nen Satanas. <sup>16</sup> Si-kak, aliwén inges ko iya tood ja dobong ja eg emati, jet saja took, inges sha-ak ja aliwén tood ja dobong. <sup>17</sup> Sota esel mo, si-katoy podno, jet si-katoy osalen mon mengilesin son si-kara para son si-kam bengat. <sup>18</sup> Si-kam i engibetkag son si-kak shiya dobong, jet inges to ngon ibetkag ko ira shiya emin na sakop niya dobong. <sup>19</sup> Jet saja bakdang ko, itolok kon metey pangkep son si-kara, say agpayson maydesin ira para son si-kam.

<sup>20</sup> “Aliwén saja ira took bengat i naka pan-ishawati son si-kam, no diket angken pay sota ira toon memati ali son si-kak, ja pengikowanan ira niya took ni esel mo. <sup>21</sup> Tan say shawat ko pay son si-kam Ama, manseksekey koma iren emin, ja inges toy kawashak son si-kam, tan

kawasham ngo son si-kak, say maykasakey ira son si-kata, say pati-en ira nonta tood ja dobong ey agpayson si-kam i engibetkag ali son si-kak shiyay. <sup>22</sup> Sota shyaw ja in-akan mo son si-kak, inges to met laeng i in-akan ko son si-kara, say manseksekey ira ja inges toy inpansaksakey ta. <sup>23</sup> Wára-ak ja ontolong son si-kara, tan wára ka ja ontolong son si-kak, say enshiy pankodangan ni panseksekey sha, tan say pati-en ira niya tood ja dobong ey si-kam i engibetkag son si-kak ali et pati-en sha pay ey ensemek mo ira ja inges toy semek mo son si-kak. <sup>24</sup> Ama, si-kam i engiwat ira niyay ya too son si-kak, jet say piyan ko, ondaw ngo ira shi dangit ja dawán ko, say asen sha sota shyaw ja in-akan mo son si-kak, nonta pilmiro ja eg pay laeng epalsowa iya dobong. Sajay i inpasing mo nontan da ta ensemek mowak ngoreshan. <sup>25</sup> Si-kam ja Amak, amtak ey enshiy moka pankodangi. Saja tood ja dobong, eg shaka amta; nem si-kak, amta taka. Jet sajay iren took, amtara ey si-kam i engibetkag ali son si-kak. <sup>26</sup> Inpa-amtak son si-kara sota maypangkep son si-kam, jet itoloy kon ipa-amta iyy son si-kara, say mayda-kam ngo ira nodta semek mo ja wára son si-kak, say si-kak, wára-ak ngo son si-kara, ja ontolong.” Sajay i shawat nen Jesus so nen Ameto.

## 18

*Si Jesus, inshel ma nonta ira makakontra son si-kato*

<sup>1</sup> Idi naksheng sota inpanshawat nen Jesus so nen Apo Shiyos, indekjas toy Jerusalem, jet eki-odop sota ira too to son si-kato, jet bimaliw ira nodta epel-ogan ja kowan sha ey Kidron. Nodtan na

dogad, waray gardin ja emola-an jet si-katoy dinawan sha.

<sup>2</sup> Si Judas Iskariote, ja engibaag son Jesus so nonta ira makakontra son si-kato, amta to iyay ya dogad, ta eminshakel la ekidaw nontan son Jesus, tep shiman i sigod ja kesa-sa-nopi nen Jesus tan sota ira too to. <sup>3</sup> Jet si Judas Iskariote, en engolop ni eshakel la solsharo tan kowadja ni Timplo, ja inbetkag ira nonta apo ni papashi tan sota ira Parisiyo, jet dimaw ira shima gardin ja kawad-an nen Jesus. Sajay iren totoo, nansilew ira di, tan nanpan-almas ira.

<sup>4</sup> Si Jesus, amta ton sigod i mepesamak son si-kato; isonga to inaspol ira jay ya totoo, jet kowan to son si-kara ey, “Sipay joka pan-enapa?”

<sup>5</sup> Simongbat ira ja kowan sha ey, “Si Jesus ja i-Nasarit.”

Jet si Jesus, kowan to ey, “Si-kak sotan na too.”

(Wara nontan na mismo si Judas ja engibaag son Jesus, ja eki-odop son si-kara.) <sup>6</sup> Idi naksheng nga inkowan nen Jesus ey si-kato sota shaka pan-enapa, sajay iren too, simoled ira jet eto-dang ired bo-day.

<sup>7</sup> Jet si Jesus, inpinshowa to ja kowan to ey, “Sipay joka pan-enapa?”

Jet kowan sha mowan ey, “Si Jesus ja i-Nasarit.”

<sup>8</sup> Jet si Jesus, kowan to mowan ey, “Inkowan ko met son si-kayo ey si-kak sotan, jet no si-kak i joka pan-enapa, baybay-iyo mango ira ja took. Jet angken ondaw ira.” <sup>9</sup> (Sajay ya inkowan nen Jesus, si-katoy ketongpalan met laeng nonta inkowan to nonta epangdo len akew, ja kowan to ey, “Sota toon in-awat mo son si-kak, angken sakey son si-kara, enshiy en epokaw.”)

<sup>10</sup> Jet si Simon Pedro, inokbos to sota kampilan to nodta atip

to, jet kinimpas to sota kanawan na tangida nen Malko, ja baga-en nonta kangeto-an na pari.

<sup>11</sup> Jet si Jesus, kowan to so nen Pedro ey, “I-odim ita kampilan mo shita atip to. Kowan mo emo ey ekak enosan i digat ja piyan nen Amak ja da-kaman ko?”

*Sota inpangidaw sha son Jesus so nen Anas asan so nen Kaipas, tan sota in pandibak nen Pedro*

<sup>12</sup> Jet inshel ma ira nonta solsharo, pati sota apo sha, tan sota kowadja ni Timplo si Jesus, jet binedod sha. <sup>13</sup> In-ilaw sha nin shi baley nen Anas, ta si-kato sota inepo nen Kaipas ja kangeto-an na pari nontan na tawen. <sup>14</sup> (Si Kaipas sota engikowan so nonta ira toray ni Hodiyo ey mapmapteng no metey sota sakey ya too, say eg meshosa i totoo Israel.)

<sup>15</sup> Jet si Pedro, tan sota sakey ya too nen Jesus, imonod ira so nonta ira nangshel so nen Jesus, jet sota sakey, am-amta nonta kangeto-an na pari, jet si-katoy ekiskep. <sup>16</sup> Nem si Pedro, ebay-an nin nodta pasbol nonta baley ni kangeto-an na pari, isonga sota sakey ya too nen Jesus, ekitbal so nonta biin emanbantay nonta pasbol no mebedin na onsekep ngo ali si Pedro. Jet inpaskep to.

<sup>17</sup> Nem sota biin emanbantay nodta pasbol, inbag-an tos Pedro ja kowan to ey, “Angken si-kam emo met, aliwa ayen too toka nonta inshel sha?”

Simongbat si Pedro ja kowan to ey, “Enshi, aliwen too towak.”

<sup>18</sup> Nodtan na bo-dayan, nanapoy ira sota baga-en, tan sota ira kowadja, ta teg-in nontan, jet ediktob ira ja emenangshang. Jet si Pedro, en nay-eshom son si-kara ja mekirangshang.

<sup>19</sup> Nem si Jesus, marama ja panbistigala nonta kangeto-an na

pari, pangkep nonta too to, tan sota pangkep ni toka pan-itoro.

<sup>20</sup> Jet si Jesus, simongbat ja kowan to ey, “No maypangkep ni naka pantosho, naypalantaro — shima baley ya sa-nopan, ono shima Timplo i naka pantosho-i ni olay, tep shiman i kesa-sa-nopi ni kait tayon Hodiyo. Enshiy nak nantoro-an shima nay-emot, nem eg shima karakdan ni too ni olay i naka pantosho-i. <sup>21</sup> Aliwén si-kak i ibag-an mo. Sama ira totoo, ta intenengan sha sota intorok, isonga amtaren emin i inkowan ko.”

<sup>22</sup> Idi naksheng nga inkowan nen Jesus iyay, sota sakey so nonta ira kowadja, sinedpak to si Jesus ja kowan to ey, “Apay nga satan i moka pesing nga menongbat so nita kangeto-an na pari?”

<sup>23</sup> Simongbat si Jesus, ja kowan to ey, “No wáray ngaaw ja inkowan ko, pa-amtam so ira niya totoo ja wára niman shiyay, no ngaran nontan na ngaaw wa inkowan ko. Nem no say inkowan ko ket podno, apay nga sedpaken mowak?”

<sup>24</sup> Idi naksheng nga binistigal sha si Jesus, inpaitolod nen Anas si Jesus so nen Kaipas ja kangeto-an na pari nontan na tawen. Jet inpaonong to sota balod shi takday nen Jesus.

<sup>25</sup> Si Pedro, wára pay laeng nga emenangshang nodta kad-an ni apoy jet sota ira totoon kait ton emenangshang, inbag-an sha si Pedro ja kowan sha ey, “Aliwá ayen sakey ka nodta too nima inshel sha?”

Si Pedro, nandibak, ja kowan to ey, “Apil, aliwén si-kak.”

<sup>26</sup> Nem sota partido nonta baga-en ja kinimpas nen Pedro i tangida to, ja baga-en met laeng, kowan to ey, “Inon-an taka met nontan shima gardin ja kadwá nen Jesus.”

<sup>27</sup> Nem indibak nen Pedro ngoreshan, ja kowan to ey, “Apil, aliwén si-kak sotan!”

Nontan na inkowanan so nen Pedro niyay, kimagang nga shagos sota kawitan.

*Binistigal nen Gobinarol Pilato si Jesus*

<sup>28</sup> Nonta palbangon ma, indara si Jesus shima baley nen Kaipas, jet indaw sha so nen Gobinarol Pilato shima baley to. Nem sota ira Hodiyo, eg ira simekep shima naydaem ni baley, ta say ninem-nem sha, kowan sha ey say eg ira seskigen ni kait shen Hodiyo, ta no onsekep i Hodiyo shi baley ni aliwén Hodiyo, maypeshit may pekipengan sha nonta naysagana ja mekan no timpo ni piyasta ni Paskowa.

<sup>29</sup> Isonga si Pilato ja gobinarol, bimo-day ali jet kowan to so ira nonta Hodiyo ey, “Ngantoy kowan jo ey basol niyay ya too?”

<sup>30</sup> Jet sota ira Hodiyo, simongbat ira ja kowan sha ey, “No enshi komay ebadeg ga basol to, istay eg mi di koma indaw son si-kam.”

<sup>31</sup> Jet si Pilato, kowan to son si-kara ey, “No sajay ya too ket nanbasol, alejo et tongtong jo ngo shi dinteg jo.”

Nem sota ira Hodiyo, simongbat ira ja kowan sha ey, “Eg met maypedobos shi dinteg jon i-Roma ey onbono kami; isonga eg mebedin.” <sup>32</sup> (Sajay i ketongpalan nonta inkowan met laeng nen Jesus pangkep son si-kato shorog ey say itsora ni ketey to ket maydanced koros.)

<sup>33</sup> Si Pilato, nay-oli shima naydaem ni baley to jet inpaskep to ali si Jesus, jet inbag-an to ja kowan to ey, “Jet agpayso ja si-kam ket ari ni Hodiyo?”

<sup>34</sup> Si Jesus, simongbat ja kowan to ey, “Eadapod nemnem mo itan na inkowan mo, ono wáray engikowan son si-kam?”

<sup>35</sup> Sinongbatan nen Pilato, ja kowan to ey, “Si-kak, aliwén Hodi Yosak, jet sota engi-wat ali son si-kam shiyay, sota ira kait mo, tan sota ira apo ni papashiyon Hodi Yos. Apay nganto aya i dingkam ja kowan sha ey basol mo?”

<sup>36</sup> Si Jesus, simongbat ja kowan to ey, “Say pantoshayan ko, aliwén shiya dobong, ta no shiya dobong, sota ira took, istay mekibekal koma ira; eg sha itolok ja may-ewatak so nonta ira Hodi Yos. Nem aliwén shiyay i pantoshayan ko.”

<sup>37</sup> Jet si Pilato, inbag-an to pay mowan si Jesus, ja kowan to ey, “Jet ari ka ngarod?”

Simongbat si Jesus ja kowan to ey, “Si-katoy inkowan mo, ey ari-ak. Si-kak, dimawak alid ja dobong ja nay-anak, say nak ali ikowan i maypangkep ni podno. Jet emin ira sota makakosto ni podno, shaka patia i naka ikowan.”

<sup>38</sup> Jet si Pilato, kowan to ey, “Jet ngarantoy piyan mon a-selen ni engikowanan mo ni podno?”

Idi naksheng nga inkowan nen Pilato iyay, bimo-day mowan ali jet kowan to so nonta ira pangolo ni Hodi Yos ey, “Enshi met i naka sokali ja basol niyay ya too ja to kebono-an. <sup>39</sup> Nem say ogadiyo, no timpo ni sajay ya piyasta ni Paskowa, waray naka ibolos ni olay ya balod son si-kayo. Jet ngantoy piyan jo? Saja ari jon Hodi Yos i paibodos ko son si-kayo?”

<sup>40</sup> Sota ira Hodi Yos, inkeljaw sha et ey, “Enshi! Aliwén si-katoy piyan mi ja ibolos mo! Si Barabas, si-katoy maybodos!” (Si iya Barabas, tolisan.)

## 19

*Inshogi shen pedigaten si Jesus*

<sup>1</sup> Jet nontan ma, in-awat nen Pilato si Jesus so nonta ira solsharo et sinepseptat sha. <sup>2</sup> Jet sota ira solsharo, engosikos ira ni wakal la nasbitan asan shaka paidngget son Jesus, ja singa korona to. Tan binesho-an sha pay nonta dopot ja violet i kolor to, ja singa baro ni ari. <sup>3</sup> Jet imesop ira son si-kato ja kowan sha ni dedamsis sha ey, “Onpalapalad ka koma, ari ni Hodi Yos!” Asan shaka sedpaka.

<sup>4</sup> Jet si Pilato, bimo-day ali mowan jet kowan to so nonta ira Hodi Yos ey, “Enshi met i nak dinoktalan na to nanbasolan, ja si-katoy kabol la to keshosa-an; ekak itoloy ya bistigalen. Isonga niman, pebo-day ko di say asen jo, say mepnek kayo ni epalikatan to la.”

<sup>5</sup> Jet si Jesus, inpabo-day sha ali ja inpa-onong sha sota shenget ton sebit tan sota baro ton violet, jet si Pilato, kowan to ey, “Asas jo, sajay sota too!”

<sup>6</sup> Idi inon-an nonta ira apo ni papashi, tan sota ira kowadja ni Timplo, kimeljaw ira ja kowan sha ey, “Paidansam shi koros! Paidansam shi koros!”

Nem si Pilato, simongbat ja kowan to son si-kara ey, “Si-kayo ngoy mengilansa son si-kato shi koros tep enshi met i nak dinoktalan na to nanbasolan!”

<sup>7</sup> Jet sota ira toray ni Hodi Yos, simongbat ira ja kowan sha ey, “Waray dinteg min Hodi Yos ey sota toon mengikowan ey si-kato ket Anak kono nen Apo Shiyos, mesepol la mebono, jet satan na too, si-katoy inkowan to.”

<sup>8</sup> Idi intenengan nen Pilato iyay ya inkowan ira nonta toray ni Hodi Yos, ema-ma et i takot to. <sup>9</sup> Isonga insekep to mowan nodta naydaem da jet inbag-an to si Jesus ja kowan to ey, “Apay toway edapo-an mo aya?”

Nem si Jesus, eg to sinongbatan.

<sup>10</sup> Si Pilato, kowan to ey, “Apay nga eg mowak songbatan? Eg mo aya amta ey wáray kanebengan ko ja mengibodos son si-kam no piyan ko, ono mengilansa son si-kam shi koros?”

<sup>11</sup> Simongbat si Jesus, ja kowan to ey, “Si-kam, enshiy nebeng mo son si-kak, no si Apo Shiyos ket eg to itolok ja may-ewatak son si-kam. Isonga sota toon engilaw son si-kak alid jay son si-kam, mas ebadbadeg i basol to, ey say si-kam.”

<sup>12</sup> Idi intenengan nen Pilato iyay ya inkowan nen Jesus son si-kato, piyan ton pasiya ja ibolos, nem sota ira toray ni Hodiyo, emama et i keljaw sha ja kowan sha ey, “No ibolos mo itan na too, aliwén kajem toka ma nonta ari jod Roma, ta sota toon kowan to shorog ey si-kato ket ari, si-katoy makakontra so nonta ari shi Roma.”

<sup>13</sup> Si Pilato, inbo-day to mowan ali si Jesus ta intenengan to sota kowan ira nonta toray ni Hodiyo, jet en timongaw nodta dogad ja shaka pengigshengi ni wáray basol to, ja minetalan sha ni bato, ja kowan sha ni esel ni Hodiyo ey Gabata. <sup>14</sup> Nontan na akew, si-katoy pansekana ni Hodiyo, ta no mewá-wá, piyasta ma ni Hodiyo ja Paskowa. Jet idi nonta nankawa may akew, kowan nen Pilato son si-kara ey, “Iyay sota ari jo. Pan-ala jo ngo tep ari jo.”

<sup>15</sup> Sota ira Hodiyo, kimeljaw mowan ira ja kowan sha ey, “Bonom! Bonom! Paidansam et shi koros!”

Jet si Pilato, kowan to son si-kara ey, “Jet piyan jon angken paidansak iya ari jod koros?”

Sota ira apo ni papashi, simongbat ira ja kowan sha ey, “Enshiy eshom ma ari mi; sota ari bengat shi Roma!”

<sup>16</sup> Jet si Pilato, in-awat to ma si Jesus son si-kara ja maydansa shi koros.

*Si Jesus, indansara shi koros*

<sup>17</sup> Jet sota ira Hodiyo, indara ma si Jesus jet inbo-day sha jet inpasakbat sha son si-kato sota koros to, jet indaw sha nodta dogad ja kowan sha ey Toktok, ja no shi esel ni Hodiyo, kowan sha ey Golgota. <sup>18</sup> Jet shiman, indansara nodta koros to. Tan wára pay i showa ja in-inshas sha ja indansa ngo shi sanseskey ya koros: sota sakey, indansara shi apit ni kanigid nen Jesus, jet sota sakey, nodta apit ni kanawan to ngo.

<sup>19</sup> Jet si Pilato, wáray inpaisolat to ja kowan to ey, “Sajay si Jesus, ja i-Nasarit, ja ari ni Hodiyo.” Sajay ya inpaisolat to, sha inpakpak shima koros nen Jesus. <sup>20</sup> Sajay ya inpaisolat nen Pilato, eshaket i Hodiyo ja bimasa so, ta sota dogad ja indansa-an sha so nen Jesus, nay-esop shi ili. Say inpangisolat nen Pilato, ekalkalasin esel — esel ni Hodiyo, esel ni i-Roma, tan sota esel ni Grigo ja si-katoy shaka pan-i-inawatid man na dogad.

<sup>21</sup> Sota ira apo ni papashi ni Hodiyo, kowan sha so nen Pilato ey, “Karam koma paisolat ey ari ni Hodiyo, no diket say paisolat mo, sajay: ‘Inkowan to shorog ey si-kato konoy ari ni Hodiyo.’”

<sup>22</sup> Simongbat si Pilato, ja kowan to ey, “Sota insolat ko, si-kato; eg mesepol la mesa-datan.”

<sup>23</sup> Idi naksheng ma ja indansa ira nonta solsharo si Jesus shi koros, indara sota baro to, jet biningbingay sha ja inpan-epat sha son si-karen solsharo. Tan indara pay sota baro to ja toka ita-kep ja emongsan ja inebel, ja enshiy to eshaitan. <sup>24</sup> Jet sota ira solsharo, nantatabalan sha ey eg



sha pi-pi-katen, no diket manbibinonot ira, no sipay ontompong so. Jet sajay ya inpasing sha, sajay i tongpal nonta naysolat ja kowan to ey, “Sota barok, bingbingayen sha, tan sota dopot ja naka ita-kep, panbibinonotan sha.”

<sup>25</sup> Jet nontan na maramen sajay i kepandag-a ira nonta solsharo so nen Jesus, wára ngo si Maria ja ina nen Jesus, ja dimayat nodtan ja nay-esop shi koros nen Jesus; wára pay sota agi met laeng nen Maria, sota si Maria ja asewa nen Kliopas, tan wára pay sota sakey ya si Maria Magdalena.

<sup>26</sup> Jet si Jesus, idi inon-an to ja dimayat nodta nay-esop son si-kato sota sakey ya apostol ton ensemek ton pasiya, tan inon-an to ja wára si ineto, kowan to ey, “Nanang, si iyay may ibilang mon anak mo!” <sup>27</sup> Jet inkowan to ngo so nonta apostol ey, “Si-kato may inam!”

Jet nontan ma ja akew, inodop nonta apostol sota ina nen Jesus shi baley to ja meki-iyen ma shiman.

#### *Etey si Jesus*

<sup>28</sup> Jet nontan ma, amta nen Jesus ey nontan ma i kepospos nonta obda to, jet inkowan to ey, “Nakewak ni shanom.” Ta piyan ton metongpal sota inkowan ni padto ja naysolat nonta bayag da ja pangkep son si-kato.

<sup>29</sup> Waray salaw wa nay-esop nodtan na enapno ni empait ta tapey, jet sota sakey ya solsharo, to in-aneng sota singa bonot ja masbet ni shanom, jet inpi-ket to nodta ngoro ni pating nga kowan sha ey hisopo, asan toka iga-wat shi bongot nen Jesus. <sup>30</sup> Jet idi ninamtan nen Jesus sota tapey ya inka-wat nonta solsharo shi bongot to, kowan nen Jesus ey, “Naksheng ma.” Jet nanjokmos, asan ma ma-bosi.

#### *Timbek sha ni kayang i tagdang nen Jesus*

<sup>31</sup> Sota ira Hodiyo, dimaw ira so nen Pilato jet sha inbag-an ey, “No mebedin, pagetdom i sedi nonta ira naydanced koros, say metey iren shagos. Tan mesepol pay ya pa-kal mo ira, ta shanshani ma sota kapatkan na akew son sikamin Hodiyo, jet na-alas no ononong ira shima koros.”

<sup>32</sup> Jet sota ira solsharo nen Pilato, sha kinetdo i sedi nonta ira showen too ja naydansa shi apit ni kanawan tan kanigid nen Jesus. <sup>33</sup> Nem idi onsabi ira sota solsharo so nen Jesus, inon-an sha ja etey ma si Jesus; isonga binayan sha ja eg sha kinetdoy sedi to. <sup>34</sup> Nem sota sakey ya solsharo, intebek toy kayang to shi tagdang nen Jesus, jet imayos alin shagos i shala, tan shanom. <sup>35</sup> (Sota mison engasas niyay ya edaga so nen Jesus, insodsod to la iyay say memati kayon memasa niyay. Sigoradon eg panshowashowa-an ta amta to ey podno ni olay i toka ikowan.) <sup>36</sup> Eg kinetdo ira nonta solsharo i sedi nen Jesus, ta naypadto nonta bayag da ey angken sakey ya pokel to ket enshiy en ma-an-ano. <sup>37</sup> Tan wára pay i naysolat ta naypadto nontan da, ja kowan to ey, “Asen sha met laeng sota toon timbek sha.”

#### *Indiyang sha si Jesus*

<sup>38</sup> Idi naksheng ma ja dingka ira nonta solsharo son Jesus iyay, si Jose ja i-Arimatia, dimaw ngo so nen Pilato, jet to inbag-an no mebedin na a-den toy bakdang nen Jesus nodta koros. Jet intolok nen Pilato. Jet si Jose, impas to sota bakdang nen Jesus shi koros. Sajay ya too, emati son Jesus, nem eg to ipa-sas so nonta ira toray ni Hodiyo i inpamati to, ta entakot to ira. <sup>39</sup> Jet dimaw ngo ali si

Nikodimo ja engidaw ali ni es-hakel la kilo nonta emanseng-ew wa nandaok ni kowan sha ey mira tan alo. (Si Nikodimo, si-kato sota dimaw so nen Jesus ni edabi nonta ikayshogshogi nen Jesus ja mengitosh.)<sup>40</sup> Inda nen Nikodimo tan si Jose sota bakdang nen Jesus jet dinibotan sha nonta empotin dopot, jet inpakidibot sha sota emanseng-ew, ta si-katoy ogadi ni Hodiyo no waray ibekara ja etey.<sup>41</sup> Nodta dogad ja inkorosan sha so nen Jesus, waray gardin ja nay-esop, jet nodtan, waray diniyangan sha ja kaybebka-an ni metey ja eg pay laeng na-ososal.<sup>42</sup> Nodtan i indawan sha so ni bakdang nen Jesus ta sotan i nay-esop, tep shanshanin manshoki ma sota akew wa ngilin ni Hodiyo.

## 20

### *Nan-ongal si Jesus*

<sup>1</sup> Nonta daem ni Domingko, si Maria Magdalena, dimaw shima naydiyangan ni bakdang nen Jesus. Idi mimotok nodtan, inon-an ton imadaw sota baton naypokit nodta bongot ni diyang ja naydiyangan nen Jesus, isonga edo-katan sota diyang.<sup>2</sup> Jet si Maria Magdalena, nanbetik ja to inkowan so nonta sakey ya apostol ja ensemek ka pasiya nen Jesus, tan to inkowan so nen Simon Pedro ey, “Indara da sota bakdang nen Apo Jesus shima naydiyangan to! Eg mi amta no toway indawan sha so.”

<sup>3-4</sup> Jet nanbetik da ira ja timorong nodta diyang, nem epangdon mimotok nodta diyang sota sakey ya apostol,<sup>5</sup> jet niningil to sota diyang, jet say inon-an to, sota dopot ja empoti bengat, nem eg simekep nodta diyang.<sup>6</sup> Idi mimotok ngo si Pedro, diritson simekep nodta diyang, jet inon-an to ngo sota empotin dopot ja naypokay.<sup>7</sup> Sota dopot ja istay naydibot shi

toktok nen Jesus, inon-an ton ekopikop ja eg nay-eshom nodta empotin dopot.<sup>8</sup> Jet sota sakey ya apostol ja epangdon mimotok, tinned tos Pedro ja simekep ngo jet inon-an ton enshi nga agpayso sota bakdang nen Jesus. Jet emati ma ey si Jesus ket, nanbiyag mowan nga agpayso.<sup>9</sup> Ta nontan, eg nin inewatan nonta ira apostol la pasiya sota naysolat ja padto nonta bayag da ey manbiyag ngoreshan si Jesus shi patey.<sup>10</sup> Jet idi naksheng nga inon-an sha iyay, imakad ired baley sha.

### *Nanpa-sas si Jesus so nen Maria Magdalena*

<sup>11</sup> Nem si Maria Magdalena, ebay-an nodtan ja kaonnangnangis, jet nonta maramen emanengis, niningil to sota diyang.<sup>12</sup> Jet waray inon-an to ja showen anghil ja nanbaro ni empoti ja timongaw nodta istay naysepa-an ni bakdang nen Jesus: sota sakey ya anghil, timongaw nodta istay petek ni toktok nen Jesus, jet sota sakey ngo, timongaw nodta istay petek ni sedi to.<sup>13</sup> Jet sajay iren anghil, imesel ira ja kowan sha son Maria Magdalena ey, “Ngantoy moka pannengisi?”

Jet si Maria Magdalena, simongbat ja kowan to ey, “Naka manengis ta indara da sota bakdang nen Apok ja naydiyang shiyay, jet ekak da amta no toway indawan sha so.”

<sup>14</sup> Idi naksheng nga inkowan nen Maria Magdalena iyay, wimingi jet waray inon-an ton too ja nay-askang son si-kato ja dimayat, nem eg to inimatonan ey si Jesus sotan na imaskang son si-kato.

<sup>15</sup> Jet si Jesus, imesel ja kowan to son Maria Magdalena ey, “Ngantoy moka pannengisi? Sipay moka pan-enapa?”

Si Maria Magdalena, say wáred nemnem to, kowan to ey sota dakin emengajowan nonta mola nodtan sota dakin imaskang son si-kato. Isonga kowan to ey, “Apo, no si-kam i engala nonta bakdang nen Jesus, ikowan mo no toway indawan mo la so, say nak al-en.”

<sup>16</sup> Jet si Jesus, inngadnan toy ngaran nen Maria, jet si Maria, timangkak ta inimatonan toy esel, ey si Jesus sotan, jet kowan to ma ey, “Raboni.” (Say olog ni Raboni shi esel ni Hodiyo, Maistoro.)

<sup>17</sup> Nem si Jesus kowan to ey, “Karamak egni-an, ta ekak pay laeng dimaw ja nay-oli so nen Amak shi dangit. Daw ka, mo ikowan so nonta ira a-akik ey on-dawak ma ja on-oli so nen Amak ja Shiyos ko, ja si-katoy Shiyos jo tan Amejo ngo.”

<sup>18</sup> Jet si Maria Magdalena, dimaw ja to inkowan so nonta ira too nen Jesus ey inon-an tos Apo Jesus, jet insodsod to pay sota inkowan nen Jesus son si-kato.

*Nanpa-sas si Jesus so nonta ira too to*

<sup>19</sup> Jet nontan na mama-shem ni Domingko, sota ira too nen Jesus, na-olnong ira, jet nanbagat ira tep entakot ira so nonta ira pangolo ni Hodiyo. Jet nontan na inka-olnong sha, ebigla ja dimaw alis Jesus jet dimayat shi sango-an sha; jet kowan to son si-kara ey, “Sapay koma ta sota talna ket si-katoy mewesha son si-kayo.”

<sup>20</sup> Idi naksheng nga inkowan nen Jesus iyay, inpa-sas to sota takday to son si-kara ja kawad-an ni sogat nonta indansara so shi koros, tan sota tagdang ton natbek. Jet nontan ma, ireka man-imdeng nga pasiya tep inon-an shen mismo si Apo Jesus. <sup>21</sup> Jet si Jesus, inpinshowa to mowan ja kowan to ey, “Sapay koma ta sota talna ket, si-katoy mewesha

son si-kayo.” Tan kowan to pay ey, “Ibetkag takejo, ja inges toy inpangibetkag nen Amak son si-kak.” <sup>22</sup> Sajay i inkowan nen Jesus, asan toka ira si-boka, ja kowan to ey, “Awat joy Ispirito Santo. <sup>23</sup> Jet manshoki ma niman, no pekawanan joy basol ni too, si Apo Shiyos, pekawanan to ngo sotan na too. Nem no eg jo pekawanan, si-kato ngoy pesing nen Apo Shiyos son si-kato.”

*Sota eg nin inpamati nen Tomas ey nan-ongal si Jesus*

<sup>24</sup> Sota sakey so nonta ira apostol nen Jesus, ja si Tomas i ngaran to, naytompong nga enshi nonta indaw nen Jesus nodta na-olnongan shen too to ni mama-shem ni Domingko. (Si Tomas, waray ngaran ton sakey, ja kowan sha ey Epin.) <sup>25</sup> Isonga sota kait ton apostol, inkowan sha so nen Tomas ey, “Inon-an mi si Apo Jesus!”

Nem si Tomas, kowan to ey, “Ampet ta asen ko nin sota shindan ni dansa shi takday to, asan isho-dog ko pay i kalomot ko, tan isho-dog ko pay i takday ko nodta tagdang ton natbek, asan naka mamati.”

<sup>26</sup> Idi edabas day makadomingko, na-olnong mowan sota ira too nen Jesus, ja nanbagat, jet wara ma nodtan si Tomas. Jet si Jesus, ebigla ja nanpa-sas mowan son si-kara. Dimayat shi sango-an sha, ja kowan to ey, “Sapay koma ta sota talna ket si-katoy mewesha son si-kayo.” <sup>27</sup> Jet kowan to ma so nen Tomas ey, “Asas mo iya takday kon imbot ni dansa, jet iga-wat mo diy kalomot mo. Tan iga-wim pay ali ita takday mo jet iro-dog mod ja tagdang kon esogat. Kareka manshowashowa, no diket pamati ka et.”

<sup>28</sup> Si Tomas, simongbat ja kowan to ey, “Si-kam i Apok tan Shiyos ko!”

<sup>29</sup> Simongbat si Jesus, ja kowan to ey, “Kaka ma memati ta inon-an mowak? Sota toon eg engasas son si-kak, ey ireka pay laeng ememati, mas pay ya si Apo Shiyos i onbindisiyon son si-kara.”

*Sota kabol la naysolatan niyay shi dibsho*

<sup>30</sup> No sota maypangkep ni dingka nen Jesus, eshakil i dingka ton kaskasshaaw wa mismon inon-an nonta ira too to, nem ekak insolat ta emin shiyay ya dibsho. <sup>31</sup> Nem saja insolat kod jay ya dibsho, insolat ko say memati kayo ey si Jesus ket si-kato sota naypadton mengisedakan ja ibetkag ali nen Apo Shiyos, tan say memati kayo ey si-kato sota Anak nen Apo Shiyos. Jet say sakey pay ja insolatan ko so niyay, say no memati kayo, mewad-an kayo ni biyag ja enshiy to engintegan.

## 21

*Si Jesus, nanpa-sas so nonta ira piton emati son si-kato*

<sup>1</sup> Idi edabas i pigen akew, nanpa-sas mowan si Jesus so nonta ira too to shima kilig ni baybay shi Galilia. Jet say inpassing nen Jesus ja nanpa-sas son si-kara, iyay i istoriya to. <sup>2</sup> Si Simon Pedro, si Tomas ja inbeshay sha ey Epin, si Natanael ja i-Kana ja sakop ni Galilia, tan sota san-agin potot nen Sibidi, nan-odop ira, pati sota showen too met laeng nen Jesus. <sup>3</sup> Ta si Simon Pedro, kowan to son si-kara ey, “Nak mannikay.” Jet kowan sha son si-kato ey mekidaw ira ngon mekinikay. Nandogan ira nodta bangka, jet indabbira ja nannigay ingkato nonta palbangon, nem angken sakey, enshiy sha ninikay.

<sup>4</sup> Idi na-akew ma, ja emanbo-day i sekit, dimayat si Jesus nodta kilig ni baybay, nem eg sha inimatonan ey si-kato. <sup>5</sup> Jet kowan

to son si-kara ey, “Towa? Waray kinnayo?”

Simongbat ira ja kowan sha ey, “Enshi.”

<sup>6</sup> Jet kowan to ma son si-kara ey, “I-kas jo ita balshew shita apit ni kanawan nita bangka, say waray kekna-en jo.”

In-ekas sha nga agpayso nodta kanawan ni bangka, jet idi natnaten sha ma sota balshew, eg ira makakoyod, ta eshakil i enakna.

<sup>7</sup> Jet sota sakey ya apostol ja ensemek nen Jesus, inimatonan to ey si Jesus sota imesel, jet kowan to ey, “Si Apo Jesus met iman!”

Idi intenengan nen Simon Pedro sota kowan to, insikkot to sota baro tod bakdang to, tep nandabos ni toka pannikay, jet imabtok da shima shanom ja nimangoy.

<sup>8</sup> Nem sota eshom, nandogan ira nodta bangka, ingkato da nodta naykilig, jet inkoyod sha ma sota balshew ja enapno ni nigay. Say ka-ashawi sha nodta kilig ni baybay, ondaw wa sandasos sa mitoro.

<sup>9</sup> Idi simabi ira ma nodta kilig ni baybay, waray inon-an shen emankedoton nigay ya naykedot nodta ngalab, jet wara pay i tinapay ja naysaganen kaytaksholan to. <sup>10</sup> Jet si Jesus, kowan to son si-kara ey, “Alekayo di nita nigay ya kinnayo.”

<sup>11</sup> Jet si Simon Pedro, dimaw nodta bangka jet to inkoyod ali nodta naykilig sota nigay ja enakna ja kakembaleg, jet say bilang nonta nigay, sandasos tan dimen polo, tan tedo. Enapno sota balshew, nem mapteng ta eg epikat. <sup>12</sup> Jet si Jesus, tinewal to ira ja kowan to ey, “Kalejo, mengan.”

Jet nontan, angken sakey, enshiy engitoded son si-kara ja engibeka son Jesus no sipa si-kato, ta amtara ey si-kato si Apo Jesus. <sup>13</sup> Jet si Jesus, inda to sota tinapay, jet shinowashowa to asan toka i-

ekan son si-kara, asan ma sota naykedot ta nigay.

<sup>14</sup> Sajay i maykatdon inpanpasas nen Jesus so nonta ira too to, manipod nonta inpan-ongal to.

*Sota inpantabtabal nen Jesus tan si Pedro*

<sup>15</sup> Idi enaksheng nga engan ira, inbag-an nen Jesus si Simon Pedro, ja kowan to ey, “Wa-wa-sha ngatay semek mo son si-kak ey say sota semek ira niya kait mo?”

Jet si Simon Pedro, simongbat ja kowan to ey, “Owen Apo, amtam met ey ensemek taka.”

Jet si Jesus, kowan to son si-kato ey, “Ajowanim ira sota emati son si-kak, ta si-kara, may-eshig ey singa kalnirok.”

<sup>16</sup> Pininshowa to mowan ja kowan to ey, “Simon, ja anak nen Juan, waray semek mo son si-kak?”

Simongbat si Pedro ja kowan to ey, “Owen Apo, amtam met ey ensemek taka.”

Jet si Jesus, kowan to mowan son si-kato ey, “Singpet mo ira sota emati son si-kak, ta si-kara, may-eshig ey singa kalnirok.”

<sup>17</sup> Jet nonta maykepintedo, kowan nen Jesus mowan so nen Pedro ey, “Simon, ja anak nen Juan, waray semek mo son si-kak?”

Si Pedro, nandaringit ma, ta emintedo ja inbaga nen Jesus iyay son si-kato, jet si Pedro, simongbat ja kowan to ey, “Apo, amtam ma emin, angken nganto. Amtam ey ensemek taka.”

Jet si Jesus, kowan to ma son Pedro ey, “Ajowanim sota ira emati son si-kak ta si-kara, may-eshig ey singa kalnirok. <sup>18</sup> Ikowan ko son si-kam i kinapodpodno. Nonta nga-nga ka, si-kam ngoy emengimag shorog ni balkes mo, jet sota piyan mon dawán, si-katoy toshongen mo. Nem no ma-ema ka ali, apil ngo. Onshepa ka jet

bedoren shaka, asan idaw shaka shima dogad ja eg mo koston dawán.” <sup>19</sup> (Sajay i inkowan nen Jesus, ta piyan ton ewátan koma nen Pedro i itsora ni ketey to ali, ja si-katoy kayshedjawan nen Apo Shiyos.) Jet si Jesus, kowan to pay so nen Pedro ey, “Onod mowak.”

<sup>20-21</sup> Jet si Pedro, wimingi jet inon-an to sota sakey ya apostol la ensemek nen Jesus ja timened son si-kara, jet kowan to son Jesus ey, “Apo, jet si iyay ngay? Eg ngo mepesamak son si-kato?” (Sajay sota sakey ya apostol ja nayaskang son Jesus nonta ka-onoran na inpandilikob sha, tan si-katoy engikowan ey, “Sipa ta kowan mo ey mengibaag son si-kam?”)

<sup>22</sup> Jet si Jesus, simongbat ja kowan to son Pedro ey, “Kaspangarigan ey piyan kon si-katoy manbiyag ingkato alid imotok ko mowan, enshiy mo naybiyangan. Si-kak i onoren mo.”

<sup>23</sup> Jet sajay ya inkowan nen Jesus pangkep so nonta sakey ya apostol, shinemag ira nonta eshom ma emati, jet say wared nemnem sha, kowan sha ey eg metmetey sota sakey ya apostol. Nem si Jesus, aliwén sotan i olog nonta inkowan to, no diket say inkowan to, no bilang ey piyan ton manbiyag sotan na apostol ingkatod imotok to mowan ali, enshiy naybiyangan nen Pedro.

<sup>24</sup> Si-kak sota sakey ya apostol. Jet emin iyay ya insolat ko, inon-an kon mismo. Jet agpayson emin iya insolat ko; enshiy showashowa to.

<sup>25</sup> Nem eshakel pay i dingdingka nen Jesus ja ekak insolat shiyay, ta no sa-sa-keyen kon isolat ja emin shi kedibdibsho, eg emo on-anay iya dobong ja kaytedo-an sha.

## SOTA INPASPASING IRA NONTA APOSTOL

<sup>1</sup> Agi Teopilo, sota epangdon dibshok, insolat koy emin na dingka nen Jesus tan intoro to, <sup>2</sup> ingkato nonta akew wa indaw to la shi dangit. Nonta aneng nin i idaw to led dangit, inshalan ni Ispirito Santo jet inkowan toy pesing ira nonta pinidi ton too to ja apostol. <sup>3</sup> Idi naksheng nga nanbiyag shi patey, eminshakel la nanpa-sas son si-kara ni oneg ni epat ta polon akew, say patien sha ey agpayson wára ma shi biyag. Jet nantatabtabalan sha mowan i maypangkep ni pantoshayan nen Apo Shiyos. <sup>4</sup> Idi nonta esa-nop ira son si-kato, inkowan to son si-kara ey, “Karejo nin idekjas i Jerusalem, no diket seked jo nin sota Ispirito Santo nen Apo Shiyos ja inkari to, ja pan-iyaw to so ni totoo. Inkowan ko met iyay nontan. <sup>5</sup> Shanom bengat i inosal nen Juan ni inpa-monjag to, nem say pemonjag nen Apo Shiyos son si-kayo, Ispirito Santo. Eg medebas i eshakel la akew manipod niman et mebon-jagan kayo ma ni Ispirito Santo.”

*Kimayang da si Jesus shi dangit ja edapo-an to*

<sup>6</sup> Jet nonta esa-nop ira sota apostol, inbag-an sha si Jesus ja kowan sha ey, “Apo, aliwén niman ayay pengisaad mo so ni epokaw den gobirno ni Israel?”

<sup>7</sup> Simongbat si Jesus ja kowan to ey, “Eg mesepol la amta-an joy akew ono timpo, no pigan ali. Sota piyan nen Apo Shiyos ja Amak ni itongpal to so, si-kato. <sup>8</sup> Nem iyay i ikowan ko son si-kayo. Sota Ispirito Santo nen Apo Shiyos, man-iyaw so ni sakey tan sakey son

si-kayo say wáray panakabalin jon mengikowan ni maypangkep son si-kak shi totoo, manshoki shi Jerusalem, Jodia, Samaria, tan shi emin na sakop niya dobong.”

<sup>9</sup> Idi enaksheng nga inkowan to iyay, kimayang ja indekjas to ira et dimaw shi dangit, jet binoja nonta ira apostol to i toka panked-jang ingkatod eg ma mayshed-mang, ta dinikopan ni kolpot.

<sup>10</sup> Jet idi maramen shaka pan-ishemang i edimosan tod dangit, ebiglen wáray showen anghil ja nanbaro ni empoti ja nanpa-sas son si-kara. Sajay iren anghil, enshiy kaydesinan sha shi too. <sup>11</sup> Kowan nonta anghil son si-kara ey, “Daleki ja i-Galilia, ngantoy tinangkakan jo pay laeng shi dangit? Sajay ya si Jesus ja engilekjas son si-kayo ni indaw to la shi dangit ja nay-olop shi kolpot, inges niyay met laeng aliy i-oli to.”

*Waray epilin maysa-dat so nen Judas ja istay apostol nen Jesus*

<sup>12</sup> Jet sota ira apostol, edapo ira nodta shontog ga kowan sha ey Olibas jet imoli ira shi Jerusalem. (Say ka-ashawi nonta Olibas shi Jerusalem, sakey ya kilomitro.)

<sup>13</sup> Idi mimotok ira shi Jerusalem, dimaw ira nodta naykayang nga kowadto ni baley ya shaka pan-iyani. Jet iyay i ngaranganan ira nonta apostol nen Jesus: si Pedro, Juan, Santiago, Andres, Felipe, Tomas, Bartolomeo, Mateo, sota sakey ya si Santiago ja anak nen Alpio, si Simon ja bitirano, tan si Judas ja anak ni apil mowan na Santiago. <sup>14</sup> Emin ira jay, tan sota ira bibii, pati si Maria ja ina nen Jesus tan sota ira a-aki nen Jesus, ireka mesa-sa-nop ni olay ja manshewat son Apo Shiyos.

<sup>15</sup> Idi edabas i pigen akew, wáray esa-nop pa sandasos tan showen polo ja emati son Jesus. Jet nontan, dimayat si Pedro shi

sango-an sha jet nan-esel, <sup>16-17</sup> ja kowan to ey, “A-akik shi pamati, sota insolat nen Ari David nonta bayag da ja inshalan ni Ispirito Santo nen Apo Shiyos, etongpal da nonta inpangdo nen Judas Iskariote sota ira makakontra son Jesus ni in-eshel sha so. Jet sajay ya si Judas i istay sakey son si-kamin pinidi nen Jesus ja meki-obda son si-kamin apostol to nontan. Sajay i edaga ta mesepol la metongpal sota naypadto.

<sup>18</sup> “Nem si Judas, nanbono, nakas et pimetnak i ekes to, jet bimo-day ya emin i sosot to. Sota pilak ka inda to ni inbaag to so nen Jesus, intongkal sha ni bo-day. <sup>19</sup> Inamta-an ni emin na totoo shi Jerusalem iyay ya inpanbono nen Judas; isonga sajay ya bo-day, inpanngaran sha ni Akildama, ja say olog to, ‘Baley ni shala.’

<sup>20</sup> “Nonta bayag da, waray naysolat shi dibsho ni Salmo ja kowan to ey, ‘Kari, manbedin i baley to ni diyasang jet ensi may man-iyay.’ Tan waray naysolat pay ey, ‘Sota istay obda to, elbaten ni eshom.’ <sup>21-22</sup> Isonga mesepol la waray maysa-dat son Judas, say onkostoy bilang min apostol, ja mengikowan ni inpanbiyag nen Jesus shi patey. Nem say maysa-dat son si-kato ja may-a-shom son si-kami, sota sakey ja eki-ododop ni olay son si-katejo manshoki nonta kepemonjag nen Juan inkato nonta akew wa indekjas shakito so nen Jesus ni indaw to la shi dangit.” Kowan nen Pedro.

<sup>23</sup> Jet showen too i nanpili-an sha: si Jose Barsabas, ja Justo met laeng i ngaran to, tan si Matias. <sup>24-25</sup> Nanshawit nin ira son Apo Shiyos ja kowan sha ey, “Apo ja maka-amta ni nemnem ni too, itoshom son si-kami nem sipa so ira niya showa i on-elbat so ni obda nen Judas Iskariote ja istay apostol, ja dimaw shi anam ton

dinawan.” <sup>26</sup> Jet nanpipini-not ira jet say bimo-day, si Matias, jet sikato may nay-eshom so nonta ira sampolo tan sakey ja apostol.

## 2

*Sota Ispirito Santo nen Apo Shiyos, dimespag ali ja nan-iyay so ni emati*

<sup>1</sup> Idi simabi sota akew wa timpon piyasta ni Hodiyoj ja kowan sha ey Pintikostis, emin ira sota emati, esa-nop ira shi sakey ja kowadto. <sup>2</sup> Jet ebigla ja waray emanbongog alid dangit ja singa shagem, jet pinno ton emin sota baley ya kawad-an sha ja shaka pantetongawi. <sup>3</sup> Jet waray inon-an shen nay-epeng nga simepa son si-karen emin, ja apoy ja singa shila i itsora to. <sup>4</sup> Jet nontan ma, enapno ira ni Ispirito Santo nen Apo Shiyos, jet nan-esel ira ni ekalkalasin esel ja aliwen sigod ja esel sha. Nan-esel ira ni apil ngon esel tep inshalan ira ni Ispirito Santo.

<sup>5</sup> Naytompong nontan ja wara iray Hodiyoj ja edapod ka-ili-ildid ja dobong ja eman-iyay nin shi Jerusalem ja makedsang i pamatira son Apo Shiyos. <sup>6</sup> Idi itenengan ira nonta totoo sota emanbongog ja edapo alid naykayang, dimaw ira ja sha inon-an, jet enasshaaw iren pasiya ta idi itenengan sha sota esel ira nonta emati, sota mismom esel ni sakey tan sakey son si-kara i bolikas nontan na esel. <sup>7</sup> Jet sota ira totoo, ireka emesshaaw, ta eg sha ewatan no ngantoy inpasing niyay, jet kowan sha ey, “Apay sajay iren emin na eman-a-sel ket, i-Galilia met ira? <sup>8</sup> Ngaranto ayay inpasing niyay? Amtara met ja man-a-sel ni esel shi dogad ja nay-anakan tayo, ket aliwen esel sha? <sup>9</sup> Edapo kito met ali shi Partia, Midia, Ilam, Misopotamia, Jodia, Kapadosia, Ponto, Asia, <sup>10</sup> Prigia,

Pampilia, Egypt, tan sakop ni Libya ja naysakop ngo shi Sirini. Wara pay i eshom son si-katejo ja bisita alid Roma, ja Hodiyo i eshom, tan sota ira eshom, aliwen Hodiyo ja etod-an ja manshedjaw son Apo Shiyos. <sup>11</sup> Sota ira eshom, edapo ired Crete tan shi Arabia!” Jet sajay iren totoo ja edapod ja kalkalasin dogad, kowan sha ey, “Amta met iren jay i esel tayon kalkalasi. Si-katoy shaka pan-a-sel ni maypangkep ni kaskasshaaw wa inpasasing nen Apo Shiyos.”

<sup>12</sup> Jet emin ira, ireka messhaaw ta eg sha ewatan iyay, jet kowan sha ey, “Ngaranto emo iya emankepasemek niman?”

<sup>13</sup> Nem sota ira eshom, endedamsis sha, ja kowan sha et ey, “Enshi — eboteng ira tan ni adak!”

*Indawag nen Pedro ey sajay i tongpal nonta padto nonta bayag da*

<sup>14</sup> Sota sampolo tan showa ja apostol, si Pedro i tima-shel son si-kara ja nan-esel, jet inkedsang toy esel to ja kowan to ey, “Si-kayon totoo ja i-Jodia, tan si-kayon emin na eman-iyang shiya Jerusalem, mesepol la amta-an jo iyay! Itnengi jon pasiya iya ikowan ko son si-kayo! <sup>15</sup> Sajay iren kait ko, aliwen eboteng ira ja si-katoy pangkep jo; ta alas nowibi pay laeng ni agsapa! <sup>16</sup> Sajay sota tongpal ni inpadto nen Joel nonta bayag da, <sup>17</sup> ja esel met laeng nen Apo Shiyos, ja kowan to ey,

“Shi ka-onoran alin timpo, sajay i pesing ko: pan-iyang ko i Ispiritok so ni emin na totoo jet sota ira annak sha, mengipadto ira ni maypangkep son si-kak, jet waray pa-amtak so ni bedoleki tan nankedakay shi kokokip sha. <sup>18</sup> Owen, angken sota ira daleki tan bibii ja mansilbi son si-kak ni sajay

alin timpo, pan-iyang koy Ispir-itok son si-kara, jet si-karay mengikowan ni ipa-amtak son si-kara. <sup>19</sup> Waray ipa-sas ko so ni totoo ja medeka shi naykayang nga kaskashaaw, tan angken shiya dobong, waray ipa-sas ko son si-kara ja panakabalin ko: waray maybokbok ka shala tan waray apoy ya eposkol i dowet to. <sup>20</sup> Ma-shep i sekit, tan onbalenga i bolan ja singa shala, jet no meksheg nga mepesamak iyay, si-kato ma diy idaw ko. Sajay alin akew, kaskasshaaw wa enshiy to kay-ingsan. <sup>21</sup> Jet sajay alin timpo, sota ira manbeka son si-kak ni kaasi, kaasi-an kon isalakan.’

Sajay day padto nen Joel.

<sup>22</sup> “Si-kayon kait kon Hodiyo, itnengi jo iya ikowan ko son si-kayo! Si Jesus ja i-Nasarit, inpadaga nen Apo Shiyos ni kaskasshaaw wa milagro, ja inon-an jon mismo, jet si-katoy pengamta-an jo ey si-katoy inbetkag nen Apo Shiyos. Amtayon emin iyay. <sup>23</sup> Sigod ja amta nen Apo Shiyos i mepesamak ali son Jesus shiya dobong tep plano to ngoreshan na sigod. Jet siya, intolok ton metey si Jesus. Nem si-kayon Hodiyo i mismo emono son si-kato! Inpabonoyo so nonta ira i-Roma ja nankekedsel jet indansara shi koros. <sup>24</sup> Nem si Apo Shiyos, eg to intolok ja on-onong si Jesus ja metey; isonga inpanbiyag to, ta say patey, enshiy panakabalin ton mengipked son Jesus. <sup>25</sup> Si-kato sota nantongpalaan nonta padto nen Ari David nonta bayag da, ja kowan to ey,

“Si Apo Shiyos, wara ni olay son si-kak, wara ni olay shi apit ni kanawan ko, say ekak ontakot. <sup>26</sup> Isonga naka man-imdeng tan naka man-iyaman, jet angken saja bakdang ko, sig-



oradoy namnama to, <sup>27</sup> ta eg mowak baybay-an shi dogad ja kawad-an ni etey. Jet eg mo ipalobos ey saja bakdang ko ket mebojok, ta ensemek mowak. <sup>28</sup> Inpa-amtam i shalan son si-kak ja ontorong shi biyag, jet enapno-ak ni imdeng ta wára ka son si-kak.'

Kowan ni padto nen Ari David."

<sup>29</sup> Jet si Pedro, intoloy to ja kowan to so nonta totoo ey, "A-akik, idawag ko son si-kayoy olog nonta padto nen Ari David ja makapoli son si-katejo. Etey si David jet naybeka, jet sota dobok to, wára shiya kad-an tayo ingkato niman. <sup>30</sup> Isonga aliwén si-katon shorog i kaytoshongan nonta inpadto to, no diket inpadto to bengat. Amta to sota kari nen Apo Shiyos son si-kato ja kowan to ey, 'Wara aliy sakey so nonta polim ja panbedin kon ari ja inges mo jet si-katoy on-elbat so ni intorayan mo.' <sup>31</sup> Si Ari David, amta toy plano nen Apo Shiyos; isonga inpadto toy maypangkep so nonta amta ton ibetkag ali nen Apo Shiyos ja mengisedakan nonta inkowan to ey, 'Eg mowak baybay-an shi dogad ja kawad-an ni etey', tan nonta inkowan to ey, 'Eg mebojok iya bakdang ko.' <sup>32</sup> Si Apo Shiyos, inpanbiyag to si Cristo shi patey, jet inonan min mismoy bakdang to alid patey! <sup>33</sup> Jet niman, wáred apit ni kanawan nen Apo Shiyos; isonga in-akan nen Ameto sota Ispirito Santo son si-kato ja inkari to, jet sajay ya Ispirito Santo iya intenengan jo niman tan inon-an jo ja inawat ngo nen Jesus son si-kami. <sup>34</sup> Jet angken si Ari David nonta bayag da, eg dimaw shi dangit, nem si Cristo, si-katoy dimaw shi dangit; isonga inkowan nen David ey, 'Kowan nen Apo Shiyos so nonta apok ey ontongaw shi apit

ni kanawan to, jet pan-eshi to, <sup>35</sup> jet sota kabakal to, panbedin to ja panpetokan ni sedi to.'

<sup>36</sup> "Isonga si-kayon emin ja kait kon Hodiyo, mesepol la amtaan jon pasiya ey si Jesus ja inpaidansayo shi koros, si-kato sota inpanbalin nen Apo Shiyos ni Apo tayon emin! Si-kato sota singsingked tayon inkari nen Apo Shiyos ey ibetkag to din mengisedakan!" Sajay i kowan nen Pedro.

<sup>37</sup> Jet idi intenengan sha iyay, nandaringit ira, ja kowan sha so nen Pedro tan sota eshom ma apostol ey, "A-aki, ngaranto ngarod i pesing mi?"

<sup>38</sup> Si Pedro, simongbat ja kowan to ey, "Panbebawi kayo et emin kayo, panpabonjag kayo ja si Jesus Cristo i toshongen jon pati-en ni olay, say mepekawanan i basol jo. Jet ewaten jo sota Ispirito Santo nen Apo Shiyos ja i-akan to. <sup>39</sup> Ta sota Ispirito Santo ja inkari nen Apo Shiyos, para so ni emin na toon pinidi ton manbedin na too to, jet mayda-kam kayo, pati sota ira annak jo, tan angken pay sota ira toon aliwén kait tayon Hodiyo."

<sup>40</sup> Jet si Pedro, eshakel pay i adok to so nonta totoo, ja kowan to ey, "Mesepol la itolok jon si Apo Shiyos i mengisedakan son si-kayo, say eg tokejo pekishosa so ira niya toon ngaaw i aramid sha."

<sup>41</sup> Jet sota emati ni inkowan nen Pedro, binonjagan sha ira, jet say kabebilang sha ja nay-eshom so nonta sigod ja emati son Jesus nontan na akew, tedon dibo. <sup>42</sup> Jet sajay ira, intoloy sha ja tinod-an ira nonta apostol. Nontan ma, ireka mesa-sa-nop ni olay ja manshedjaw tan manshewat son Apo Jesus, jet ireka pay mandilikob ja mengan.

*Sota itsora ni biyag ira nonta emati*

<sup>43</sup> Jet sota ira apostol, eshakel i kaskasshaaw wa dingkara jet nontan, emin ira sota totoo, etakot ira tep inewatan sha ey panakabalin gayam nen Apo Shiyos iyay. <sup>44</sup> Emin ira sota emati, saksakey i wared nemnem sha, jet emin sota kokowa ni sakey tan sakey son si-kara, kokowaren emin. <sup>45</sup> Jet indako shay bo-day sha, angken pay sota ira kompormin kokowara, jet inwaris sha sota nandakonan sha so nonta ira makasapol. <sup>46</sup> Inakew ja ireka ondaw shi Timplo, jet shima balebaley sha, ireka mandilikob, jet ebadeg i imdeng sha ni shaka pangan, ta saksakey i nemnem sha son Jesucristo. <sup>47</sup> Si Apo Shiyos ni olay i shaka ishaysayaw, jet angken sota emin na totoo, kowan sha ey mapteng ira sota emati. Jet si Apo Shiyos, inakew ja waray toka ishom son si-kara ja maysedakan.

### 3

*Inpamapteng nonta apostol sota dakin epilay*

<sup>1</sup> Nonta sakey ya akew, si Pedro nen Juan, dimaw ira shi Timplo ni oras ni alas tris ni mama-shem ta si-katoy oras sa kepanshewat ni Hodiyos son Apo Shiyos. <sup>2</sup> Nodta sakepan shi Timplo ja kowan sha ey Memapteng nga Sakepan, waray toon emankekekshaw ni pilak so nonta toon emanseskep. Sajay ya too, nay-anak ka epilay ja eg maka-akad, jet inakew wa shaka idaw nodtan. <sup>3</sup> Idi inon-an tos Pedro nen Juan ja onsekep shi Timplo, emengshaw ni pilak son si-kara.

<sup>4</sup> Nem si Pedro nen Juan, intekel sha iyay ya too, jet si Pedro, imesel ja kowan to ey, "Idmang mokami."

<sup>5</sup> Jet sajay ya toon epilay, inshemang to ira ja kowan to emo

ey waray i-akan sha son si-katon pilak.

<sup>6</sup> Nem si Pedro, kowan to ey, "Enshiy pilak ko, nem waray itolong ko son si-kam ja medepo so nen Jesucristo ja i-Nasarit. Isonga niman, pan-akad ka!"

<sup>7</sup> Jet si Pedro, shinewat toy kanawan na takday nonta epilay jet inpaledjat to. Jet sota sedi nonta epilay, kimedsang nga shagos. <sup>8</sup> Imabtok jet nan-akad ja ekiskep so nen Pedro nen Juan shi Timplo, jet eman-eka-ekad tan eman-ab-abtok ni iyaman to son Apo Shiyos. <sup>9</sup> Jet emin ira sota totoo, inon-an sha i toka pan-ekad ma tan toka pan-iyaman son Apo Shiyos. <sup>10</sup> Inimatonan sha ey si-kato sota kaontongtongaw ni olay shima Memapteng nga Sakepan ni Timplo ja emankekeshaw ni pilak, jet enasshaaw iren pasiya ta eg sha ewatan no ngarantoy edaga son si-kato.

*Waray intoro nen Pedro nontan shima Timplo*

<sup>11</sup> Isonga sota ira totoo, inedibongbongan sha si Pedro nen Juan, shima kowan sha ey Sishoman nen Solomon, ja naysilpo nodta Timplo, jet sota toon epilay ja eman-ekad ma, pimeket son Pedro nen Juan. <sup>12</sup> Jet idi asen nen Pedro ey eshakel aliy toon emankesanop ali son si-kara, kowan to so nonta totoo ey, "Si-kayon kait kon Hodiyos, apay nga kayoka messhaaw niyay ya banag? Apay nga jokamika iningning? Karejo ipangkep ey waray panakabalin mi, ono eshiyosan kami, ja si-katoy kabol la nan-akashan niyay ya too. <sup>13</sup> Enshi! Si Apo Shiyos ja Shiyos nen Abraham, Isaac, tan si Jacob ja ap-apo tayo da nonta bayag, si-kato i inpan-akad so niyay ya epilay, say ma-amta-an i kina-Shiyos nen Jesus, ja Anak

to. Saja si Jesus, si-kato sota inawat jo shi toray say mebono. Jet si Gobinarol Pilato, piyan ton ibolos koma, nem emasig kayon kowan jo ey eg jo kosto. <sup>14</sup> Si-kayo, binedaw jo iyay ya toon mapteng nga enshiy basol to, ey sota toon bimonon, si-kato et ngo mowan i kinshaw jo so nen Pilato ja ibolos to para son si-kayo. <sup>15</sup> Jet si Jesus ja kepandepo-i ni biyag, inpabonoyo! Nem si Apo Shiyos, inpanbiyag to mowan. Jet si-kami i mismon engasas ni bakdang to nonta nanbiyag mowan.

<sup>16</sup> “Si-kami, pinati mi ey waray panakabalin ni ngaran nen Jesus; isonga si-katoy kinedsangan niya epilay. Am-amtayo iyay ya too, joka on-on-i ni inakew, jet niman, mismon iyed jay ja kimedasang!

<sup>17</sup> “Jet niman, si-kayon a-akik, amtak ey si-kayo, tan sota ira toray jo, eg jo amtay kina-Shiyos nen Jesus nonta inpabonoyo. <sup>18</sup> Nem sajay i ketongpal nonta inpaipadto nen Apo Shiyos nonta bayag da, ey sota inkari to ja ibetkag to alin mengisedakan, da-kaman toy digat ni ketey to. <sup>19</sup> Isonga panbehawi kayo ni ngaaw wa aramid jo, jet si Apo Shiyos i toshongen jo say omasen toy basol jo, <sup>20</sup> say mewad-an kayo ni mapteng nga dekna ja medepo son si-kato. Jet ibetkag to mowan ali si Jesucristo ja shinotokan to. <sup>21</sup> Nem si Jesus, mesepol la on-onong nin shi dangit ingkatod metongpal la emin sota inpaipadto nen Apo Shiyos ja bado-an to iya dobong, ta sajay i inpadto nonta eshiyosan na para padto nonta bayag da. <sup>22</sup> Jet angken si Moises, inkowan to ey si Apo Shiyos, mengibetkag ali ni para padto ja inges toy in pangibetkag nen Apo Shiyos son si-kato, jet kowan to ey sajay, mandepo shi kait tayo, jet kowan

to pay ey mesepol la pati-en tayan emin i ikowan nonta ibetkag ali nen Apo Shiyos. <sup>23</sup> Jet kowan pay nen Moises ey no sipa iray toon eg memati ni ikowan niyay alin para padto ja ibetkag nen Apo Shiyos, meshosa ja maysijan so ni too nen Apo Shiyos. Sajay i inkowan nen Moises. <sup>24</sup> Jet emin sota inkowan ni para padto, manshoki son Samuel, ingkato so nonta ira emin na naysa-dat, nani-inges i inpadtora pangkep ni saja emankedaga niman. <sup>25</sup> Sota inkari nen Apo Shiyos ja inkowan ni para padto, si-kayo i naykarian to, jet mayda-kam kayo pay mowan nodta kari to so nonta apo jo la, ta inkowan to son Abraham ey, ‘Mapteng aliy panpa-no-an ni totood emin na ka-ili-ili, jet sota polim Abraham i kabol la kayda-kaman sha.’ <sup>26</sup> Si-katejon Hodiyos i epangdon inbetkagan so nen Apo Shiyos so ni Anak to, ja si Jesus, say panbehawi shakito nonta kakedsel tayo, jet siya, nansigshan tayo!” Sajay day inkowan nen Pedro.

## 4

*Binistigal nonta pangolo ni Hodiyos si Pedro nen Juan*

<sup>1</sup> Nonta maramen eman-a-sel si Pedro nen Juan so nonta totoo, dimaw ira di sota papashi ni Hodiyos, apo ni kowadja nodta Timplo, tan sota ira kowan sha ey Sadosiyo, <sup>2</sup> ja ireka onbanonet. Ta si Pedro nen Juan, intoro sha so nonta totoo ey si Jesus, nangingal jet si-katoy inbasalan sha so ey angken sota ira eshom ma nanketey, manbiyag ngo ira ali. <sup>3</sup> Jet inshel sha si Pedro nen Juan ja sha ira pebistigal. Nem nontan, ta mankedabi, enshiy pesing shen memistigal son si-kara; isonga inbalod sha nin ira.

<sup>4</sup> Nem eshakil mala iray toon emati nonta inteneng sha sota

inkowan nen Pedro nen Juan pangkep so nen Jesus, jet say kabebalang ira nonta ematin daleki, dimen dibo.

<sup>5</sup> Nonta e'wa-wa, sota ira toray ni Hodiyo, tan sota eshom ma pangolo sha, pati sota ira mamais-toro ni dinteg ni Hodiyo, w'ara iren esa-nop shi Jerusalem. <sup>6</sup> Jet angken sota kangeto-an na pari ja si Anas, tan shi ira Kaipas, si Juan, si Alejandro, tan sota emin na partido nen Anas, ekisa-nop ira. <sup>7</sup> Sha inda ali si Pedro nen Juan jet inpa-adagey sha ira nodta nankinaw-an sha, jet inbag-an sha ira no ngarantoy inpamaal shen inpakedsang nonta toon epilay. Kowan sha ey, "Sipen ngaran i inngadnan jo nontan?"

<sup>8</sup> Jet si Pedro, ja inshalan ni Ispirito Santo, simongbat ja kowan to ey, "Si-kayon toray tan pangolo ni Israel, <sup>9</sup> jokamika panbistigala niman ni maypangkep ni mapteng nga dingka mi ni inpanakad mi so niya toon epilay. Jet no piyan jon amta-an i inpasing ton mimapteng, <sup>10</sup> pa-amta mi son si-kayo, pati pay sota eshom ma totoon Hodiyo, ey si Jesucristo ja i-Nasarit ja binonoyon indansa shi koros, inpanbiyag mowan nen Apo Shiyos, jet si-katoy kabol la minaptengan niyay ya toon istay epilay ja w'ara niman shi sango-an jo. <sup>11</sup> Si Jesus i kaytoshongan nonta inkowan nonta naysolat ja kowan to ey, 'Sota baton binedaw jon para amag ni baley, ja kowan jo ey enshiy silbi to, si-kato et ngo mowan sota epateg ga mesepol jon pasiya.' <sup>12</sup> Enshiy eshom ma tood ja dobong nga inbetkag ali nen Apo Shiyos ja mengisedakan, nem eg si Jesus bengat." Kowan nen Pedro.

<sup>13</sup> Jet idi inon-an sha ey etoled si Pedro nen Juan ja man-a-sel, nasshaaw iren pasiya ta amtara ey sajay iren too, ootik i ashal sha.

Nem ninemnem sha ey si-kara gayam sota eki-odo-odop so nen Jesus. <sup>14</sup> Jet sota ira toray tan sota ira pangolo ni Hodiyo, enshiy pesing shen mengipidit ni piyan sha, ta sota toon istay epilay, mismon w'ara nodtan ja kadwa nen Pedro nen Juan. <sup>15</sup> Jet say inpasing sha, inpabo-day sha nin si Pedro nen Juan, jet nantatabtabal ira sota toray, <sup>16</sup> ja kowan sha ey, "Ngantoy pesing tayo aya son si-kara, ket sota kaskasshaaw wa dingkara ket amta ni emin na tood Jerusalem, jet eg tayo mebedin na isaot." <sup>17</sup> Idi anongosto ma, ninemnem shay pesing sha, ja kowan sha ey, "Say pesing tayo, say eg amta-an pay ni totoo, ikowan tayo son si-kara ey kenshat ta ibi-jag shen mengitoshoshi totoo ni maypangkep nonta shaka itorotoro."

<sup>18</sup> Jet tina-wal shes Pedro nen Juan et inkowan sha son si-kara ey, "Niman ma, kenshat ta ibi-jag jon mengitoshosho ono mengikowan shi totoo ni maypangkep nonta joka itorotoro!"

<sup>19</sup> Nem si Pedro nen Juan, simongbat ira ja kowan sha ey, "Nemnem jo kari, no sipay piyan nen Apo Shiyos ja pati-en mi — sota kowan to ono sota kowan jo? <sup>20</sup> Sota inon-an mi tan intenengan mi son Jesus, kenshat ta eg mebedin na isalsheng min mengikowan shi totoo."

<sup>21</sup> Jet sota ira toray, kini-det shen binidin ira, asan shaka ibodos ira ta enshiy basol sha ja sha so ira shosa-an. Tan sakey pay ja inbolosan sha so ira, sota emin na totoo, ireka man-iyaman son Apo Shiyos ni inmapteng nonta toon epilay. <sup>22</sup> Saja toon istay epilay ya kaskasshaaw i inmapteng to, esolok ka epat ta polo i tawen to.

*Sota emati, kini-det sha ja nansawat so nen Apo Shiyos*

<sup>23</sup> Jet nonta ebolos si Pedro nen Juan, imoli iren shagos shima kadan ni kagajem sha jet inkowan sha son si-kara i emin na dingka ira nonta apo ni papashi tan sota eshom ma pangolo ni Hodiyo son si-kara. <sup>24</sup> Idi intenengan sha iya inkowan nen Pedro nen Juan, nansaksakey ira ja nanshawar son Apo Shiyos, ja kowan sha ey, “Apo Shiyos ja emalsowa ni dangit, dobong, baybay, tan emin na wara so iren jay, <sup>25</sup> angken si David ja toom, ja apo mi la nonta bayag, inshalan ni Ispirito Santo, jet insolat to ey,

‘Apay nga emanbonget iray toon eg emati? Apay nga eshakel i piyan ni tood ja Israel ja dag-en nem enshiy tongpal to? <sup>26</sup> Nansaganay arin emin shiya dobong, pati sota ira toray, nalong ira ja memekal son Apo Shiyos tan memekal so nonta shinotokan to ja mengisedakan ali.’

Sajay i kowan nen David, <sup>27</sup> jet say kina-agpayso to, si Ari Hirodis, tan si Poncio Pilato, tan sota ira toon eg emati ja aliwen Hodiyo, tan angken sota ira tood Israel, nantotodag ira ja maykontra son Jesus ja Anak mon shinotokan mo. <sup>28</sup> Nansaksakey ira ja ondaga ni piyan sha. Sajay ngoreshan i planom et dingkara shi timpon inkesheng mo. <sup>29</sup> Niman Apo Shiyos, on-im ima ngaaw wa planora ja kowan sha ey dagen sha son si-kami, jet si-kamin toom, akniyokami ni kedsang min mengitosho ni esel mo shi totoo.

<sup>30</sup> Ipedobos mo son si-kami ja maknan ni panakabalin nen Jesus ja Anak mon shinotokan mo, say mengekas kami ni emansekit, tan mandeka kami ni milagro, ta sikatoy pengamta-an sha ey si-kami i makapanakabalin.” Kowan sha ni shawat sha.

<sup>31</sup> Jet idi naksheng nga nan-

shawar ira son Apo Shiyos, kimiwed sota baley ya esa-nopan sha, jet emin ira, enapno ira ni Ispirito Santo jet etoled ma ira ja mengikowan ni esel nen Apo Shiyos.

*Sota ira emati, inpansaksakey sha i kokowara*

<sup>32</sup> Jet emin ira sota emati, nansaksakey i pangkep sha tan nemnem sha, ja ayshiy kowan ni sakey tan sakey son si-kara ey sota kokowa to, mos-an to, no diket kokowaren emin. <sup>33</sup> Jet nontan, sota ira apostol, mas kimesang iren mengitosho ni maypangkep son Apo Jesus, jey naniyag mowan shi patey, jet si Apo Shiyos, ebadeg i kaasi to son sikaren emin. <sup>34</sup> Emin ira sota emati, enshiy nankolang son si-kara ni mesepol sha, ta sota ira waray bo-day to, ono baley to, indako sha, <sup>35</sup> jet sota nandakonan sha, in-awat sha so nonta ira apostol ja si-karay maka-amta ja mengiweshis nonta pilak so nonta ira makasapol.

<sup>36</sup> Jet nontan, waray sakey son si-kara ja emati ja si Jose i ngaran to. Sota ira apostol, inbeshayan sha ni Bernabe, ta say olog to, “mengi-kan ni pansimetan”. Sajay ya too, nay-anak shi Cyprus, nem Hodiyo met laeng ja para tolong ni pari. <sup>37</sup> Waray indakoton eshom ma bo-day to, jet sota nandakonan to, in-awat to so nonta ira apostol.

## 5

*Sota maypangkep so nen Ananias tan si Sapira, ja sanasewa*

<sup>1</sup> Wara ngoy dakin manngeshan ni Ananias, jet asewa to si Sapira. Nandako ira ni eshom ma bo-day sha, <sup>2</sup> jet nantolagan sha ey sota eshom ma pilak ja tongkal nontan na bo-day, i-akan sha ni apostol, nem sota eshom, isaot sha et italo

sha. <sup>3</sup> Nem si Pedro, kowan to son Ananias ey, “Ananias, apay nga intolok mo ja si Satanas i engitoshay son si-kam? Nakol ni nan-o-owap ka so ni Ispirito Santo nen Apo Shiyos. Isonga intalom i eshom ma dako nonta bo-day. <sup>4</sup> Sotan na bo-day, kokowam met, jet olay toka ngo no idakom ono enshi. Isonga sota dako to ngo, enshiy ememidit ey i-akan mo. Nemnem mo ngon mengi-kan ali. Nem ngantoy kabol la engisaotan mo so ni koskoston tongkal to? Kowan mo emo ey too i i-owapan mo, nem si Apo Shiyos i inbanganan jo!”

<sup>5</sup> Idi intenengan nen Ananias iyay den inkowan nen Pedro son si-kato, ebiglen eto-dang et etey. Jet emin sota enamag niyay ya epasamak, timakot iren pasiya. <sup>6</sup> Sota ira bedoleki, dimaw ira di ja sha dinibotan i bakdang nen Ananias, jet sha inbeka.

<sup>7</sup> Idi waray tedon oras ja dimabas, mimotok ngo ali si Sapira ja asewa nen Ananias, nem eg to amta ey etey si asewa to. <sup>8</sup> Jet si Pedro, inbag-an to si Sapira no sota pilak ja in-akan sha ni apostol ket, sotan i koskoston tongkal nonta bo-day sha. Jet si Sapira, kowan to ey sotan bengat.

<sup>9</sup> Jet kowan ma nen Pedro son si-kato ey, “Ngantoy ninemneman jo so niyay? Apay nga nantolagan jon peshasen i Ispirito Santo nen Apo Shiyos no amta to, ono enshi, sota basol jon i-emet jo? Asas mo ita bedoleki ja engibka son asewam; itan ira niman shita sakepan jet angken si-kam, shaka ngo di en ibeka.”

<sup>10</sup> Jet si Sapira, eto-dang ngon bigla et etey shi sango-an nen Pedro. Jet idi simekep ira di sota bedoleki, inon-an shen etey si Sapira et binangtal sha jet sha inbeka nodta askang ni naybekan nen asewa to. <sup>11</sup> Emin ira sota

emati son Jesus, tan sota eshom ja engitneng niyay ya banag, eta-kot iren pasiya.

*Sota milagro tan kaskasshaaw wa dingka ira nonta apostol*

<sup>12</sup> Sota ira apostol, eshakel i kaskasshaaw wa dingkara ja inon-an ira nonta totoo. Jet emin ira sota emati, ireka mesa-nop ni olay ma nodta nay-askang shi Timplo ja kowan sha ey Sishoman nen Solomon. <sup>13</sup> Jet sota eshom ma eg emati, entakot shen may-a-shom so nonta ira emati, nem wára mangoy shaka pengiredjaw son si-kara. <sup>14</sup> Nem asdeg to ngoy daleki tan bibii ja nay-eshom so nonta ira sigod ja emati, jet mas shimakel ira. <sup>15</sup> Jet sota ira emanpansekit, in-ilaw sha ali ira nodta kalsara ja imonong ira nodta shinokolan sha, jet kowan sha ey no ondabas alis Pedro, balang nem dabsan ni adirong to ira, say ma-kal i sakit sha. <sup>16</sup> Jet angken sota ira dogad ja nay-esop shi Jerusalem, ireka emengidaw ni emanpansekit son si-kara, jet angken sota ira toon kawad-an ni dimonyo, indaw sha ira di, jet mimapteng ira.

*Sota ira apostol, dina-kaman shay digat*

<sup>17</sup> Nem sota kangeto-an na pari ni Hodiyo, tan sota ira kait ton Hodiyo ja kowan sha ey Sadosiyo, ireka emanbonget, tep ma-epal ira so nonta apostol. <sup>18</sup> Jet say inpasing sha ma son si-kara, inshel sha jet inbalod sha ira. <sup>19</sup> Nem nonta edabi, sota anghil nen Apo Shiyos, to dino-katan ira sota sakepan ni badoran, jet inpangdo to iren bimo-day. Jet say kowan nonta anghil son si-kara, kowan to ey, <sup>20</sup> “Daw kayo shima Timplo, jet jo itosho so ira nima totoo i maypangkep son Jesucristo, ey si-katoy kedepo-i nonta biyag ja inkari nen Apo Shiyos.” <sup>21</sup> Jet sota ira apostol, pinatira sota inkowan

nonta anghil, jet dimaw ira nonta agsapen pasiya shi Timplo ja sha intoro i maypangkep son Jesus.

Jet nontan na agsapa met laeng, sota kangeto-an na pari, tan sota ira kait to, sina-nop sha iren emin sota pangolo ni Hodiyo, jet engibetkag ira ni en mengodop nonta apostol shi badoran.<sup>22</sup> Nem idi onmotok sota inbetkag sha ja en mengodop so nonta ira apostol nodta badoran, enshi la ira gayam. Jet sota istay en mengodop, nay-oli ira,<sup>23</sup> jet sha inkowan ey, “Enshi met da ira sota kowan jo ey mi odopen shi badoran. Sota sakepan ni badoran, naytolbek met, tan angken sota ira kowadja, wára met ira nodta pasbol ja emanbantay; nem idi dokatan mi sota badoran, enshiy mi simbi! Angken sakey son si-kara ket enshi nodta naydaem!”

<sup>24</sup> Jet idi intenengan nonta apo ni kowadja ni Timplo tan sota apo ni papashi sota kowan sha, nasshaaw iren pasiya, tan ireka emanshanag no ngarantoy panpapa-no-an niyay ya epasemak.

<sup>25</sup> Jet nontan met laeng nga agsapa, wáray sakey ya toon simekep ali nodta esa-nopan ira nonta toray ni Hodiyo jet kowan to ey, “Sota toon inbalod jo, wára ired ma Timplo ja emantosho so ni totoo!”

<sup>26</sup> Jet sota apo ni solsharo, en engolop so nonta ira kapitan na too to met laeng, jet dimaw ira so nonta apostol, ja sha ira inadok ja may-odop son si-kara. Eg sha ira pinidit, ta entakot ira so nonta totoo, ta baka et ey onbonget sota totoo, nakol ni kespigan sha ira ni bato.

<sup>27</sup> Inodop sha ira sota apostol jet insekep sha ira nodta esa-nopan ni toray, jet sota kangeto-an na pari, kowan to son si-kara ey,<sup>28</sup> “Apay nga eg jokami pati-en? Inkowan mi met son si-kayo ey

kenshat ta ibi-jag joy joka pengitosho ni maypangkep so nonta joka itorotoro, nem niman, joka et ma-ma-a, nakol ni inamta-an ni emin na totoo shi Jerusalem! Say piyan jo, si-kamiy pebesolan sha ni inkabono nonta toon joka ingadngadni?”

<sup>29</sup> Nem si Pedro tan sota eshom ma apostol, simongbat ira ja kowan sha ey, “Mesepol la si Apo Shiyos i pati-en mi; aliwen sota kowan ni too.”<sup>30</sup> Tan kowan pay nen Pedro ey, “Si Apo Shiyos ja pinati ira nonta ametayo da nonta bayag, inpan-ongal to si Jesus, ja binonoyon indansa shi koros.<sup>31</sup> Si Apo Shiyos, inpanbiyag tos Jesus, jet niman, inpansaad to; isonga wára shi apit ni kanawan nen Apo Shiyos, ja si-katoy Pangolo tan Mengisedakan. Jet in-aknan toy tood Israel ni waya sha ja manbebawi, say omasen nen Apo Shiyos i basol sha.<sup>32</sup> Jet niman, si-kami i mismon engasas ni maypangkep niyay ya banag; isonga peneknekan mi. Jet wára pay i onpaneknek so ja Ispirito Santo nen Apo Shiyos, ja in-akan to ja man-iyen so nonta ira toon emati son si-kato.” Sajay i insongbat nen Pedro so nonta kangeto-an na pari.

<sup>33</sup> Jet idi intenengan ira nonta toray ni Hodiyo iyay ya inkowan nen Pedro, epaladoy bonget sha so nonta ira apostol, ja piyan sha iren bono-en.

<sup>34</sup> Nem wáray sakey son si-kara ja Parisiyo ja manngeshan ni Gamaliel ja maistoro ni dinteg ni Hodiyo, ja shaka ibaingi. Dimayat shi sango-an sha jet kowan to ey, “Pabo-day jo nin ira.” Jet idi inpabo-day sha nin ira sota apostol,<sup>35</sup> kowan to so nonta kait ton toray ey, “Si-kayon kait kon Hodiyo, karejo iba-ngat ja dag-en i piyan jon dag-en son si-kara.<sup>36</sup> Ta nonta bayag da, wáray

edaga ja inges niyay. Si Tiyyodas ja kowan to ey matekal ja mengi-ibong ni gobirno, wáray epat ta dasos ja toon imonod son si-kato. Nem sajay ya too, binonora, jet idi etey sota pangolo sha, nansisi-jan ira sota totoo to, jet eg timoloy sota pangkep sha. <sup>37</sup> Idi enshiy bayag to, wára mowan i i-Galilia nonta timpo ni sinsos ja si Judas i ngaran to. Eshakel mowan i imonod son si-kato, nem binonora met laeng, jet sota imonod son si-kato, nansisi-jan met laeng ira. <sup>38</sup> Isonga no sota maypangkep ni sajay ya banag niman, bay-iyó ira ngo, angken itoloy sha sota shaka dagdag-a. Ta no sajay ya pangkep sha, ono shaka pandag-a ket tooy edapo-an to, eg onbayag, no diket ma-omas sa shagos. <sup>39</sup> Nem no si Apo Shiyos i edapo-an to, eg mebedin na ebaken jo ira, no diket si-kayo et ngo mowan i ememekal son Apo Shiyos.”

Jet sota inkowan nen Gamaliel, pinati ira nonta toray. <sup>40</sup> Inpaskep sha mowan sota apostol, jet in-pasepdát sha nin ira asan shaka ikowan son si-kara ey kenshat ta eg sha ma itorotoro i maypangkep son Jesus shi totoo, asan shaka ma ira ibodos.

<sup>41</sup> Jet sota ira apostol, indekjas sha ira sota esa-nop pa toray ja ireka eman-imdeng nga pasiya tep si Jesus i kabol ni ebebaingan sha. Ninemnem sha ey sajay i ka-asan to ey kinosto-an ira nen Apo Shiyos. <sup>42</sup> Jet nontan ma, intoloy shen en nantoro ni inakew ni maypangkep son Jesus shima Timplo tan shima kebale-baley. Kowan sha ey si Jesus, si-katoy ketongpalan nonta kowan nen Apo Shiyos nonta bayag da ey ibetkag to di ja mengisedakan.

## 6

*Waray piton daleki ja es-hotokan*

<sup>1</sup> Idi emanshekel la pasiya sota ira emati, kepan-ikotot nonta ira sa-bon Hodiyos ja Grigo i esel sha sota ira koston Hodiyos. Ta sota ira Grigoy esel sha, kowan sha ey sota nankebaló son si-kara, ediwayan ja eg ira nay-aknan nonta mekan ja emankaiweshis ni inakew. <sup>2</sup> Isonga sota ira apostol, sina-nop shen emin sota emati jet say kowan sha son si-kara, kowan sha ey, “Say obda mi, sota mengitoshó ni esel nen Apo Shiyos pangkep so nen Jesus, isonga aliwén mapteng no ibiyang mi iyay ya obda mi ja si-kamiy mengiweshis ni mekan. <sup>3</sup> Isonga si-kayon a-aki mi shi pamati, pamidi kayo ni piton daleki son si-kayo ja sajay i wára son si-kara: wáray amtara, mapteng i shamag sha shi karakdan, tan inshalan ira ni Ispirito Santo. Jet si-kara i maka-amta ja mengiweshis ni mekan ni inakew. <sup>4</sup> Jet say metopog ga dag-en mi ngo ni olay ja apostol, sota manshéwat, tan en mengitoshó nonta esel nen Apo Shiyos maypangkep so nen Jesus.”

<sup>5</sup> Jet sota ira esa-nop ja emati, piyan sha sotan ja inkowan ira nonta apostol. Jet say pinidira, si Esteban ja inshalan ni Ispirito Santo ja makedsang i pamati to, tan say eshom, si Felipe, si Prokoro, si Nikanor, si Timon, si Parminas, tan si Nicolas. Saja si Nicolas, edapod Antiok, ja aliwén nay-anak ka Hodiyos, nem etod-an ja manshedjaw son Apo Shiyos. <sup>6</sup> Jet sota esa-nop pa emati, inparang sha ira ja piton pinidira so nonta apostol. Jet sota ira apostol, nanshawát ira son Apo Shiyos, asan shaka isakpal i takday sha son si-kara, jet sotan i ka-amta-an to ey nay-awat sotan na obdara.

<sup>7</sup> Jet nontan ma, emankaiweshis sota esel nen Apo Shiyos may-



pangkep son Jesus shi eshom ngon dogad, jet angken shi Jerusalem met laeng, wára ni olay i emankai-shom ja emati so nonta ira sigod ja emati. Tan wára pay i eshakel la papashi ni Hodiyo ja emati.

*Si Esteban, inshel nonta ira makakontra ni toro pangkep son Jesus*

<sup>8</sup> Si Esteban, eshakel la banag i dingdingka to ja kaskasshaaw wa inon-an ni totoo, ta wares Apo Shiyos son si-kato ja engi-kan ni panakabalin to. <sup>9</sup> Nem nontan, wára iray emekisongbati son si-kato ja Hodiyo ja i-Sirini i eshom, tan i-Alejandria. Saja ira ekisongbat so nen Esteban, Hodiyo ira ja emekisa-nop nodta sa-nopan ni totoon istay бага-en. Wára pay iray Hodiyo ja i-Silisia tan i-Asiya, ja nay-eshom ira ngon emekisongbat son Esteban. <sup>10</sup> Nem eg sha posi-en na songbatan sota panikowan nen Esteban tep inshalan ni Ispirito Santo nen Apo Shiyos jet sota Ispirito Santo i engi-kan ni daing ton onsongbat son si-kara. <sup>11</sup> Jet say inpasing sha, nandagbo ira ni toon mengikowan ni aliwen podno. Jet sotan na toon dinagbo-an sha, inkowan sha ey, “Intenengan mi i inkowan nen Esteban, jet emaykontra i toka ikowan shi dnteg nen Moises, tan emaykontra pay so nen Apo Shiyos!” <sup>12</sup> Sajay i kabol la binongetan ira nonta karakdan na totoo, pati sota ira pangolo ni Hodiyo, tan sota mamaistoro ni dnteg ni Hodiyo. Dimaw ira so nen Esteban, jet inshel sha, jet inodop shen in-ilaw so nonta ira toray ni Hodiyo. <sup>13</sup> Jet indara di sota toon sistigo ja o-owap i kowan sha maypangkep so nen Esteban, jet si-karay engikowan ey, “Sajay ya too, emaykontra ni olay i toka ikokowan maypangkep niya Timplo tayo, tan dnteg tayon

Hodiyo. <sup>14</sup> Sajay i intenengan min kowan to: si Jesus kono ja i-Nasarit, sheshalen to di ja Timplo, tan sa-datan to kono pay ya emin i ogadi tayon tinewid tayo so nen Moises!”

<sup>15</sup> Jet emin ira sota esa-nop ja timanongaw nodta shaka pemistigali, intekel sha si Esteban et say inpangasas sha ni dopa to, singa dopa ni anghil.

## 7

*Si Esteban, inta-shelan toy bakdang to shorog*

<sup>1</sup> Sota kangeto-an na pari, inbagan tos Esteban ja kowan to ey, “Jet agpayso noman ja inkowan mo iyay?”

<sup>2</sup> Nem si Esteban, eg to sinongbatan sota salodsod, no diket say inkowan to son si-kara, kowan to ey, “A-akik, a-amak, nemnem jo kari iya inpaspasing nen Apo Shiyos son si-katejon Hodiyo manipod nonta timpon Abraham ingkato niman. Si Apo Shiyos ja Kangeto-an, nanpa-sas son Abraham ja apo tayo, nonta wára pay laeng shi Misopotamia ni eg to nin indaw shi Haran. <sup>3</sup> Say kowan nen Apo Shiyos son si-kato, idekjas toy pamilja to tan ili to jet ondaw shima dogad ja itorongan to so. <sup>4</sup> Jet si Abraham, indekjas to nga agpayso sota ili ton Kaldia jet dimaw ja nanbaley shi Haran. Jet idi enaksheng ja etey si ameto, inpalaw nen Apo Shiyos si Abraham shiyay ya ilin kawad-an jo niman. <sup>5</sup> Nem si Apo Shiyos, enshin polos i to in-akan son Abraham ja bo-day shiyay, ja angken sanshalokap. Nem inkari to iyay ya ili son si-kato, pati sota appo to di, ey enshiy pay laeng nin i potot nen Abraham nontan. <sup>6</sup> Tan wára pay i inkowan nen Apo Shiyos son Abraham, ey sota ira poli to, manbedin ira ni sa-bo shi

eshom ma ili, jet manbedin ira ni бага-en nootan. Jet pedigatan ira nonta sigod ja tood man ni epat ta dasos ja tawen. <sup>7</sup> Nem kowan nen Apo Shiyos ey shosa-en to ira sotan na toon memedigat son si-kara, jet no meksheng iyay, kowan to ey idekjas nonta poli nen Abraham sotan na ilin nandigatan sha, jet shiyay alin dogad ja kad-an tayo i dawán shen panshedjawan son Apo Shiyos. <sup>8</sup> Si Apo Shiyos, in-awat to ngo eshan so nen Abraham sota ogadi ja nayngadnan ey kogit. Sajay i penginemneman sha nonta ekitodagan nen Apo Shiyos son si-kara. Jet si Abraham, kinokit to si Isaac ja anak to nonta waray piton akew to ja nay-anak. Jet si Isaac, potot to si Jacob, jet si Jacob, sampolo tan showay potot to, jet si-karay makapoli son si-katejon Hodiyos.

<sup>9</sup> “Sajay iren san-a-akin annak nen Jacob ja daleki, inepalan sha si Jose ja agi sha jet indako sha so nonta i-Egypt. Nem si Apo Shiyos, eg to binaybay-an si Jose, <sup>10</sup> no diket tinodongan to shi emin na digat to, jet in-aknan to pay ni daing; isonga kinosto-an nen Paro ja ari shi Egypt si Jose. Jet si Paro, shinotokan to si Jose ja gobinarol shi intiron Egypt, tan si-katoy emengimanshal ni emin na wared baley nen Ari Paro. <sup>11</sup> Nontan na timpo, sota appo tayo da, ja a-aki nen Jose, wara ired Kanaan, jet edigat i pengalan shed man ni kenen sha tep maramay bitil. Bitil met laeng shi Egypt, <sup>12</sup> nem waray mekan na naytalod man. Isonga idi shinemag nen Jacob ey waray mekan shiman, inbetkag to sota annak to ja appo tayo da ey ondaw ira shi Egypt. Jet nontan i pilmiron indaw shed man. <sup>13</sup> Idi kapinshowa ja ondaw ira, inpa-anta nen Jose ja mismo son si-

kara ey si-kato si Jose ja agi sha, jet nontan ma, inamta-an nen Ari Paro i pamilja nen Jose. <sup>14</sup> Jet si Jose, inkowan to nodta a-aki to ey ondaw ali si Jacob ja amesha, angken pay sota pamilja to say manbonal ired Egypt. Jet say kabebilang sha, piton polo tan dima. <sup>15</sup> Jet si Jacob, shimalong shi Egypt, jet shiman i eteyan to, tan eteyan ira nonta annak to ja appo tayo da. <sup>16</sup> Nem sota bakdang sha, in-akad shed Sikim jet shiman i naybeka-an sha, nodta bo-day ya tinongkal da nen Abraham so nonta anak nen Hamor.

<sup>17</sup> “Nem idi shanshani ma sota timpon idaw ira nonta appo tayo da shima dogad ja inkari nen Apo Shiyos son Abraham, shimakel iren pasiya shi Egypt. <sup>18</sup> Jet nontan, wara may naysa-dat ja arin nantoray shi Egypt ja eg to amamtay mapteng den dingdingka nen Jose shi Egypt nonta epangdon akew. <sup>19</sup> Jet say inpasing to, sinaol to ira ja appo tayo da. Nangaaw i inpasing to son si-kara, ja pinidit to ira ja mengi-ibong ni annak sha say metey ya emin ira sota kenga-nga-nga. <sup>20</sup> Jet nontan na timpo, nay-anak si Moises ja memapteng nga nga-nga. Tedon bolan to bengat ja na-ajowan shi baley, <sup>21</sup> jet idi kenshat ta i-ibong sha ma, sota biin anak nen Ari Paro, tinekibi to ja inbilang to ey anak to. <sup>22</sup> Inpan-iskoida to si Moises; isonga amta ton emin i ashal shi Egypt. Edaing nga man-a-sel, tan sota obda to, wara ni olay i toka panbenagi.

<sup>23</sup> “Jet idi waray epat ta polon tawen to, ninemnem ton to asen iray kait ton i-Israel. <sup>24</sup> Jet nontan, naytompong ja waray inon-an ton i-Egypt ja epaladoy toka pesing so nonta sakey ya i-Israel. Inbaliwan nen Moises sota kait ton i-Israel, jet binono to sota i-Egypt. <sup>25</sup> Ta say wared nemnem to, kowan

to nem ewatan ira nonta kait ton i-Israel ey si-katoy osalen nen Apo Shiyos ja mengisedakan son si-kara ni shaka pandikat, nem eg sha inewatan. <sup>26</sup> Jet idi maykadwen akew, wara mowan i inon-an to ja showen i-Israel ja emanbekal, jet to pine-shas ja bineltak ira, ja kowan to ey, 'Nemnem jo kari! Apay nga manbekal kayo, ket nan-inges kayon i-Israel?' <sup>27</sup> Nem sota sakey ja engigepo ni bakal, si-katoy engitolshon son Moises ja kowan to ey, 'Sipay engikowan son si-kam ey itorayan jokami? Sipay engikowan ey si-kam i mengigsheng ni maypangkep son si-kami?' <sup>28</sup> Kowan mo ngo ey bono-en mowak ja inges toy inpasing mo so nonta toon i-Egypt nonta na-shem?' <sup>29</sup> Idi intenengan nen Moises iyay, timakot jet bintikan toy Egypt. Dimaw shi dogad ja kowan sha ey Midian, jet engasewed man jet waray showen daki ja inpotot to.

<sup>30</sup> "Jet idi edabas i epat ta polon tawen, nanpa-sas i anghil son si-kato shi emanshedang nga ootik ka kiyew shi dogad ja nay-esop shi shontog ga kowan sha ey Sinai. <sup>31</sup> Jet nasshaaw si Moises nonta inon-an to iyay. En imesop, ta piyan ton asen, jet waray esel nen Apo Shiyos ja intenengan to ja kowan to ey, <sup>32</sup> 'Si-kak si Apo Shiyos ja Shiyos nonta appom da, ja si Abraham, si Isaac tan si Jacob!' Si Moises, timakot et emanbebayedbed, isonga eg to ma itoled ja ishemang sota apoy. <sup>33</sup> Jet si Apo Shiyos, kowan to son si-kato ey, 'Ekal mo ita sapatos mo ja si-katoy panrispitom son si-kak, ta sajay ya dogad, niman na kawashak shiyay, eshiyosan! <sup>34</sup> Inon-an koy kepan dikat ira ni took shi Egypt, intenengan koy shaka pannengis; isonga di-

mawak ali ja mengisedakan son si-kara, ni shaka pandikat. Eti, ibetkag taka shi Egypt.' Kowan nen Apo Shiyos.

<sup>35</sup> "Nonta eg pay laeng namtik si Moises shi Egypt, eg inewat ni kait ton i-Israel ja inkowan sha nontan son si-kato ey, 'Sipay engikowan ey si-kam i mengitoshay son si-kami tan mengigsheng ni maypangkep son si-kami?' Nem si Apo Shiyos, si-katoy engibetkag son si-kato ja mengitoshay tan mengisedakan son si-kara shi anongosto met laeng, isonga sota anghil ja inon-an tod apoy nonta nan-esel si Apo Shiyos, si-katoy timolong son Moises, <sup>36</sup> ja mengibo-day ni i-Israel shi Egypt. Jet si Moises, eshakil i kaskasshaaw wa milagro ja dingka to shi Egypt, pati nonta binediw sha sota kowan sha ey Embalengen Baybay, tan angken pay shima dogad ja shinshindan sha ni epat ta polon tawen ja enshiy bale-baley. <sup>37</sup> Jet si-kato met laeng sota si Moises ja engipadto so ni toon i-Israel ey, 'Waray ibetkag ali nen Apo Shiyos son si-kayo ja mengikowan ni esel ton mismo, ja inges toy inpangibetkag to son si-kak. Si-katoy sakey ga poli tayo di.' <sup>38</sup> Jet saja si Moises, si-kato sota eki-od-odop so nonta i-Israel ja appo tayo da ni inpan-ak-akad sha shima shinshindan sha, tan si-kato pay i ekital so nonta anghil shi shontog ni Sinai ja engi-wat nonta naysolat ja bilin nen Apo Shiyos son si-kato say itawid to ngo son si-katejo.

<sup>39</sup> "Nem sota appo tayo da, inbiyang sha ja eg sha pinati si Moises, jet inpa-agpos sha et ja on-oli ira shi Egypt. <sup>40</sup> Isonga inkowan sha son Aaron ey mandeka et ni sinan shiyos ja mepangdo ey si-kara, ni shaka pan-ekad, ta kowan sha ey, 'Si Moises ja engibo-day

son si-katejo shi Egypt, ebayag met ded ma shontog; tawey nem toway dinawan to.’<sup>41</sup> Jet nontan ma, nandaga ira ni sinan shiyos sha, ja singa baka i it-sora to, jet si-katoy in-aknan sha so ni daton sha; nandaladsak pay ira ni shayaw sha so nontan na dingkaren sinan shiyos sha.<sup>42</sup> Nem si Apo Shiyos, binay-an to ira ja angken manshedjaw ira ni talaw. Sajay i inkowan ni padto nonta bayag da ja esel nen Apo Shiyos ey,

‘Si-kayon toon i-Israel, aliwen si-kak i in-aknan jo so nonta animal ja pinadtiyo tan eshom ma daton jo, ni kawashayo shima nan-ak-akshan jo ni epat ta polon tawen.<sup>43</sup> Sota tolsha ja kampo ni sinan shiyos jo ja kowan sha ey Molok ja joka ita-ta-jon, tan si Ripan ja sinan shiyos jo ja talaw, sajay iren dingkayo, si-katoy kabol la indawan takejo so shi arawin dogad ja dabsan jo pay i Babilonia.’

Kowan nen Apo Shiyos.

<sup>44</sup> “Idi dimabas i pigen tawen da, nandaga ira sota appo tayo da ni kampo ja tolsha ja panshedjawan sha son Apo Shiyos nonta nan-aka-akad ired ma dogad ja enshiy balebaley. Jet inonod shen dingka sota intoro nen Apo Shiyos son Moises ey dag-en sha.<sup>45</sup> Jet sota annak sha i imelbat so nontan na tolsha ja kampo, jet sinaksakbat sha ni inpakidaw sha son Josue ni inpiliw sha so nonta ili ira nonta enshiy Shiyos sha ni inshagshag so nen Apo Shiyos son si-kara. Jet sajay ya tolsha, wara ingkato nonta inpan-ari nen David.<sup>46</sup> Jet si David, kinosto-an nen Apo Shiyos, jet enangshaw son Apo Shiyos ni palobos to ja mandeka ni Timplo ja baley nen Apo Shiyos, ja Shiyos ni Israel.<sup>47</sup> Nem say dimaga niyay ya Timplo nen Apo

Shiyos, si Solomon, ja anak nen David.<sup>48</sup> Nem si Apo Shiyos ja Kangeto-an, eg man-yan shi baley ya dingka ni too, jet angken sota para padto, inkowan sha iyay ya esel nen Apo Shiyos ey,

<sup>49</sup> ‘Say dangit, si-katoy naka tongawi, jet say dobong, si-katoy kaketketini ni shapan ko; isonga angken nganton kalasin baley ya dag-en jo para son si-kak ja kowan jo ey pan-inan ko, eg mansilbi.<sup>50</sup> Ta emin ira ja wāren ma-esas, si-kak i pimal-sowa so.’

Kowan nen Apo Shiyos.”

<sup>51</sup> Jet si Esteban, intoloy to ja kowan to so ira nonta esa-nop pa toray ni Hodiyo ey, “Epalado kayo, etangken i toktok jo! En-asneng jon itenengan i bilin nen Apo Shiyos! Nay-inges kayo met laeng so ira nonta appoyo la, ja eg jo kosto ni olay ja ishalan shakejo ni Ispirito Santo!<sup>52</sup> Sipay amtayo ja para padto nen Apo Shiyos nonta bayag da ja eg pinedigat ni appoyo? Enshiy sha binaybay-an! Binonoren emin ira sota engipadto nonta bayag da ey waray ibetkag ali nen Apo Shiyos ja mengisedakan! Jet idi nay-ag-payso sota padto ni indaw ali nen Cristo, si-kato sota inpa-shel jo jet inpabonoyo, ey enshiy basol to.<sup>53</sup> Si-kayo i engawat nonta bilin nen Apo Shiyos ja in-awat ni anghil so nen Moises, nem eg jo pinati!” Sajay day inkowan nen Esteban son si-kara.

*Si Esteban, kinespigan sha ni bato et etey*

<sup>54</sup> Jet idi intenengan ira nonta toray ni Hodiyo sota inkowan nen Esteban, dimeshang ira ja emangedetnget i sangi sha ni bonget sha son si-kato.<sup>55</sup> Nem si Esteban ja inshalan ni Ispirito Santo, timangkak shi dangit jet inon-an toy emenenilin edapo

son Apo Shiyos, tan inon-an to pay si Jesucristo ja dimayat shi apit ni kanawan nen Apo Shiyos.  
<sup>56</sup> Jet kowan to ey, “Tangkak kayo! Inon-an kon edo-katan i dangit, jet sota kowan sha ey Anak ni Too, dimayat shi apit ni kanawan nen Apo Shiyos!”

<sup>57</sup> Nem sota ira toray ni Hodiyo, inopop sha et i tangidara, ja ireka mankeljaw, jet bintik shen shagos si Esteban. <sup>58</sup> Inbo-day sha nodta ili jet nan-a-atangan shen kineskespigan ni bato. Jet sota ira engikowan ni kowan sha ey basol nen Esteban, si-kara i epangdon engikespig ni bato son si-kato. Jet sota ira engespig, insepara sota ta-kep ni baro sha shi sango-an nonta balodaki ja manngeshan ni Saulo, ja kowan sha ey bantayan to.

<sup>59</sup> Nonta marama ja shaka pankespigi ni bato si Esteban, nanshawit, ja kowan to ey, “Apo Jesus, awat mo ngo iya biyag ko.”  
<sup>60</sup> Nantalimokod jet inkedsang toy shawat to ja kowan to pay ey, “Apo, pakawanim ira jay ya totoo ni sajay ya dingkara son sikak.” Sajay i shawat to asan matey mala.

## 8

<sup>1</sup> Si Saulo i sakey ya makapiyan ey angken bono-en sha si Esteban.

*Si Saulo, pinedigat to ira sota emati son Cristo*

Nontan na timpo, epaladoy shaka pesing so nonta ira emati shi Jerusalem, isonga ebokal ira ja naywaris shi emin na ili ni Jodia, tan shi Samaria, nem sota ira apostol, si-kara bengat i ebay-an ja eg nansisi-jan. <sup>2</sup> Nem waray eshom ma ebay-an ja makedsang i pamatira, jet si-kara i en engibka so nen Esteban. Epaladoy shaka pannengis ni daringit sha pangkep son si-kato.

<sup>3</sup> Jet si Saulo, pinedigat ton pasiya sota emati son Cristo; toka solsolola pay i kebalebaley ja toka pan-a-shela ira sota emati son Jesus ja daleki, angken pay sota ira bibii. Jet toka pan-ibalod ira.

*Sota mapteng nga shamag may-pangkep son Jesus, naytoro ngo shi Samaria*

<sup>4</sup> Jet sota ira emati ja naywaris, dimaw iren en mengitoshon ni esel nen Apo Shiyos ni maypangkep so nen Jesus shi emin na dinawan sha. <sup>5</sup> Jet si Felipe, dimaw shi siyodad ni Samaria ja to itoro i maypangkep so nen Jesus. In-toro to ey si Jesus sota tongpal nonta padto nonta bayag da ey mengisedakan ali. <sup>6</sup> Jet sota totoo man, nansaksakey iren dimaw so nen Felipe, ta pipiyan shen itenengan i toka pan-itoro. Tan say sakey pay ja pinati-an sha so nen Felipe, inon-an shay eshakil la dingdingka tod man ja milagro. <sup>7</sup> Angken sota ira dimonyo ja pimeket so nonta ira totoo inpan-angaw sha, bimetik ira, ja ireka pay emankeljaw. Angken sota ira toon emanpansekit ja eg makakeykey i bakdang sha, tan sota ira epilay, ja eg man-ekad, mimapteng ma ira. <sup>8</sup> Jet nontan, ebadeg i imdeng ni totoo Samaria ni sajay ya edaga son si-kara.

<sup>9</sup> Nodtan na dogad, waray toon manngeshan ni Simon ja emanmantala. Toka idastog i bakdang to ey kangeto-an, jet nasshaaw ira sota tood Samaria nonta toka dagdag-a. <sup>10</sup> Jet emin sota totoo nodtan na ili, manshoki shi kabeba-an ingkatod kangeto-an, shaka noman pati-a, jet kowan sha pay ey si-katoy in-aknan nen Apo Shiyos ni takal, jet eshamag ey asdeg toy panakabalin to. <sup>11</sup> Jet eshakil noman i istay emati son si-kato, ta inon-on-an sha ni

ebayag i toka panmantala et ireka messhaaw wa pasiya. <sup>12</sup> Nem idi emati ira sota i-Samaria nonta toro nen Felipe maypangkep ni pantoshayan nen Apo Shiyos, tan maypangkep son Jesucristo, nanpabonjag ira sota daleki tan sota ira bibii. <sup>13</sup> Jet angken si Simon ja emanmantala, emati ngo nonta toro nen Felipe, jet nanpabonjag ngo. Jet eki-od-odop ni olay so nen Felipe. Jet idi inon-an toy kaskasshaaw wa kedagdag-a nen Felipe, nasshaaw et ngo mowan na pasiya.

<sup>14</sup> Jet sota ira apostol ja wared Jerusalem, idi inamta-an sha ey inewat ni i-Samaria i esel nen Apo Shiyos maypangkep so nen Jesucristo, inbetkag sha si Pedro nen Juan shi Samaria. <sup>15</sup> Jet idi mimotok ira, inshawat sha son Apo Shiyos ey sota emati shi Samaria ket ewaten sha koma ngo i Ispirito Santo nen Apo Shiyos. <sup>16</sup> Ta nontan, enshi pay nin i Ispirito Santo ja nan-iyon so ni angken sakey son si-kara; ebonjagan bengat ira ja sikatoy ka-asan to ey too ma ira nen Apo Jesucristo. <sup>17</sup> Idi naksheng nga nanshawit si Pedro nen Juan, insakpal shay takday sha so nonta ira emati ja i-Samaria, jet inewat sha ngo sota Ispirito Santo nen Apo Shiyos ja nan-iyon son si-kara.

<sup>18</sup> Jet si Simon ja istay manmantala, idi inon-an ton inewat ira nonta emati ja i-Samaria i Ispirito Santo nen Apo Shiyos nonta insakpal nen Pedro nen Juan i takday sha son si-kara, toka pan-i-akni ira ja apostol ni pilak, <sup>19</sup> ja kowan to ey i-aknan sha ngo ni inges nonta panakabalin nen Apo Shiyos ja wara son si-kara, say no isakpal toy takday to ngo so ni angken sipa, ewaten shay Ispirito Santo.

<sup>20</sup> Nem si Pedro simongbat ja kowan to ey, "Say torong mo, impiyarno, jet angken ita-jon mo

ngo ta pilak mo! Ta intopom ita nemnem mo, ja kowan mo ey metongkal ni pilak sota panakabalin nen Apo Shiyos. <sup>21</sup> Enshiy mo kaybiyangan, ono bingay mo, shi pamati mi, ta sota wared nemnem mo, aliwen sota piyan nen Apo Shiyos. <sup>22</sup> Panbebawi ka nita kakedsel mo, panshawit ka et son Apo Shiyos; balang nem pekawanan toka nita ngaaw wa pangkep mo. <sup>23</sup> Ta naka ewati ey tinngel toka pay laeng ni basol, jet no eg ka manbebawi, da-kaman mo aliy digat ta empait."

<sup>24</sup> Jet inkowan nen Simon so nen Pedro ey, "Pangaasim, irewat mo son Apo Shiyos ey sota inkowan mo, enshi komay angken sakey ya mepesamak ali son si-kak!"

<sup>25</sup> Jet idi naksheng nga inkowan shay maypangkep so nen Jesucristo shiyay ya dogad, nay-oli mowan shi Pedro nen Juan shi Jerusalem. Jet sota mapteng nga shamag maypangkep so nen Jesucristo, intoro sha ngo shi emin na nanshandan shen dogad shi Samaria.

*Emati sota sakey ya opisiyal alid Itiopia*

<sup>26</sup> Nem si Felipe, intorong ni anghil ey pepsawen to sota kalsaren edapod Jerusalem ja menedong shi Gasa. Sajay ya kalsara, kamag-an i binedasat to, enshiy balbaley. <sup>27</sup> Jet siya, inonod ton pimesaw, jet waray simbi ton too nodtan na kalsara ja i-Itiopia. Sajay ya too, epateg ja opisiyal nonta bii ja ari ni Itiopia, ja kowan sha ey Kandis, ta sajay ya too, toka pan-imanshal sota kokowa nonta apo ton si Kandis. Edapo ali jay ya opisiyal shi Jerusalem. Shiman i to nanshayawan son Apo Shiyos, <sup>28</sup> jet on-oli ma shi ili ton Itiopia, ja nandogan shi kalisa. Naytompong nontan ja emanbasa

nodta naysolatan ni padto nen Isaias. <sup>29</sup> Jet si Felipe, inshalan ni Ispirito Santo nen Apo Shiyos ja en mekilokan son si-kato nodta kalisa. <sup>30</sup> Isonga si Felipe, kinanan ton en nay-askang nodta kalisa, jet intenengan ton panbasa-a nonta opisiyal sota padto nen Isaias. Si Felipe, inbag-an to nem toka ewati sota toka panbasa-a.

<sup>31</sup> Jet sota opisiyal, kowan to ey, “Enshi, ekak ewatan. Mesepol la waray mengi-odog son si-kak ni olog to.” Jet inewis tos Felipe ja mekilokan nodta kalisa to.

<sup>32</sup> Say toka panbasa-a nontan, sajay:

“Si-kato, may-eshig ey inges to sota kalniro ja shinonshon shen padti-en sha ja eg onpokeng; inges to pay sota kalniro toka ionod i bakdang ton pokisan sha ja eg onkenga. Apay simongbat? Enshi, angken pinsak. <sup>33</sup> Inbaba shay kasesaad ton pasiya ja eg sha in-aknan ni waya ton onsongbat ni inbistigal sha so. Si-pay makabaal la menonton ni ap-apo to ali? Kenshat ta enshi ma, tep say biyag to, enshi med ja dobong.”

Kowan nonta solat.

<sup>34</sup> Jet sota opisiyal, kowan to so nen Felipe ey, “Ikowan mo ga son si-kak no sipay kaytoshongan niya kowan ni padto — si-kato met laeng nga para padto, ono waray eshom?”

<sup>35</sup> Jet si Felipe, in-olog to iya padto nen Isaias, ey si Jesus i kaytoshongan to, tan intoro to pay son si-kato i mapteng nga shamag maypangkep so nen Jesus.

<sup>36</sup> Jet idi maramen ireka manshedong nodta kalsara, simbira sota dogad ja waray shanom, jet kowan nonta opisiyal ey, “Iyay i shanom shiyay. Mebedin ngaten mebonjaganak niman shiyay?”

<sup>37</sup> Jet si Felipe, kowan to ey, “No podnon emati ka son Jesucristo, mebedin.”

Jet sota opisiyal, kowan to son Felipe ey, “Emati-ak so nen Jesucristo ey si-katoy podnon Anak nen Apo Shiyos.” <sup>38</sup> Jet sota opisiyal, inkowan to ey pesalsheng nonta kadwa to sota kalisa ja nandoganan sha, jet dimaw iren showa nodta shanom, jet binonjagan nen Felipe sota opisiyal.

<sup>39</sup> Idi kima-jat ira nodta shanom, indaw ni Ispirito Santo nen Apo Shiyos si Felipe shi arawin dogad, jet sota opisiyal, mino-di tos Felipe ja na-enshi. Intoloy to ngo ja on-akad, ja ebadeg i imdeng to. <sup>40</sup> Nem si Felipe, wared ma dogad ja kowan sha ey Asoto. Jet emin na nanshandan nen Felipe ja dogad ingkatod inmotok to shi Sisaria, intoro toy maypangkep so nen Jesucristo.

## 9

*Angken si Saulo, emati ma so nen Jesus*

<sup>1</sup> Nontan na timpo, ngaaw ni olay i nemnem nen Saulo so nonta ira emati son Apo Jesus, ja piyan ton pasiya ja bono-en na emin ira. Isonga dimaw so nonta kangetoan na pari, <sup>2</sup> jet en engala ni palobos ton solat ja iparang to so nonta opisiyal ni sa-nopan ni Hodiyos shi Damasko. Say no waray asen ton daleki, ono bibii, ja emati so nen Jesus, mebedin men angken a-shelen to ira, jet idaw to shi Jerusalem.

<sup>3</sup> Nem idi eman-ekad nodta shalan na nay-esop shi Damasko, ebigla ja waray silew alid dangit, jet dinikmot tos Saulo. <sup>4</sup> Jet si Saulo, eto-dang shi bo-day. Jet waray intenengan ton esel ja kowan to ey, “Saulo, Saulo, apay nga mowakka pedigata?”

<sup>5</sup> Simongbat si Saulo ja kowan to ey, “Sipa ka apo?”

Jet waray esel ja simongbat mowan ja kowan to ey, “Si-kak si Jesus, ja maybidang ey moka panpedigata, ta epaladoy moka pesing so ira nonta emati son si-kak. <sup>6</sup> Nem dayat ka, jet daw ka shima ili ni Damasko. Waray mengikowan son si-kam shiman, no ngarantoy dag-en mo.”

<sup>7</sup> Sota inodop nen Saulo, kime-neng iren dimayat, ja nasden-gan, ta intenengan sha sota esel, nem enshiy sha inon-an na too. <sup>8</sup> Si Saulo ngo, bimangon, jet idi binikat toy mateto ja kowan to ey onshemang, eg mala maka-asas. Isonga say inpasing nonta inodop to, shinewat sha et indaw sha shi Damasko. <sup>9</sup> Jet idi indaw shed Damasko, tedon akew ja eg maka-asas, eg eng-engan, tan eg nan-in-inom ni shanom.

<sup>10</sup> Shima Damasko, waray emati son Cristo ja si Ananias i ngaran to. Nanpa-sas si Apo Jesus son si-kato shi kokokip to nontan, jet inngadnan tos Ananias. Jet si Ananias, simongbat ja kowan to ey, “Apo, iyayak shiyay.”

<sup>11</sup> Jet si Apo Jesus, kowan to ey, “Ananias, pansagana ka jet daw ka shima kalsara ja kowan sha ey Nandeteg, jet ibekam shima baley nen Judas sota toon manngeshan ni Saulo ja i-Tarso. Wared man na maramen emanshewat son Apo Shiyos. <sup>12</sup> Jet wara day inpa-sas nen Apo Shiyos ja singa tagtagi-nep son Saulo, ey wara aliy toon manngeshan ni Ananias, jet sotan na toon inon-an to, kowan to ey simekep alin to insakpal i tak-day to son si-kato, say man-esas mowan.” Sajay i kowan nen Apo Jesus so nen Ananias.

<sup>13</sup> Nem si Ananias, sinongbatan tos Apo Jesus ja kowan to ey, “Intenengan ko met i kowan ni karakdan ey epaladoy kepesing

nen Saulo so ni emati son si-kam shi Jerusalem. <sup>14</sup> Jet niman kono, dimaw alid jay ya engala ni palo-bos ton solat so nonta kangeto-an na pari, say a-shelen ton emin sota emati son si-kam.”

<sup>15</sup> Jet kowan mowan nen Apo Jesus son si-kato ey, “Kenshat ta ondaw ka, ta pinidik si Saulo ey si-katoy mengikowan ni may-pangkep son si-kak so ni totoo ja aliwen Hodiyo, tan sota a-ashira, tan angken so ni kait jon Hodiyo ja eg emati. <sup>16</sup> Jet niman, ipa-sas ko ngo son si-kato no kas-ano i digat alin da-kaman to ni pengikowan to ni maypangkep son si-kak.” Kowan nen Apo Jesus.

<sup>17</sup> Jet si Ananias, dimaw, ja tinongpal to sota inkowan nen Jesus. Simekep nodta kad-an nen Saulo, jet to insakpal i takday to son si-kato, jet kowan nen Ananias ey, “Agi Saulo, si Apo Jesus, ja nanpa-sas son si-kam ni indaw mo alid jay, si-kato met laeng i engibetkag ali son si-kak shiyay, say man-esas ka mowan, tan say man-iyen son si-kam i Ispirito Santo nen Apo Shiyos.” Kowan nen Ananias.

<sup>18</sup> Jet nontan, ebigla ja waray ena-kas ja edapod mata nen Saulo ja singa siksik ni nigay. Jet nontan ma, nan-asas mowan. Jet dimayat si Saulo et nanpabonjag. <sup>19</sup> Idi naksheng nga nanpabonjag, enggan et kimedasang mowan.

*Si Saulo, nantoro ni may-pangkep so nen Jesus shi Damasko et asan shi Jerusalem*

Jet nontan, eki-iyen si Saulo so nonta ira emati shi Damasko ni pigen akew. <sup>20</sup> Jet manshoki ma nontan, dimaw shima baley ya sanopan ira ni Hodiyo jet intoro toy maypangkep son Jesus, ey si-kato ket podnon Anak nen Apo Shiyos. <sup>21</sup> Sota ira toon engitneng ni inkowan to, ireka messhaaw, ja kowan sha ey, “Aliwa ayen sajay



sota toon wáred Jerusalem ja toka panbono-a sota ira emati so nen Jesus? Istay sajay met i kabol la dinawan to did jay; kowan to ey to ira a-shelen sota emati son Jesus jet idaw to ira so nonta ira apo ni papashi.”

<sup>22</sup> Nem si Saulo, mas kimed-sang i toka pengitosho ni pangkep so nen Jesus, ey si-katoy tong-pal nonta padto nonta bayag da ja wáray ibetkag ali nen Apo Shiyos ja mengisedakan. Jet sota ira Hodiyoos shi Damasko, eg ira maka-abak son si-kato ni songbat.

<sup>23</sup> Jet idi edabas i pigen akew, sota ira Hodiyoos nodtan na dogad, nantotodag ira ey bono-en sha si Saulo. <sup>24</sup> Nem si Saulo, inam-taan to sota ngaaw wa pangkep sha son si-kato ja kowan sha ey bono-en sha. Sota ira Hodiyoos, shaka sessesкера nodta pasbol ni ili ni Damasko, ni kalebi-an tan ka-akawan, ta kowan sha ey pilit ta bono-en sha. <sup>25</sup> Nem idi sakey ya dabi, inpan-iyán ira nonta kait ton emati shi baskit, jet inoy-oy sha nodta atol ja nandikmot shi ili jet sotan i inpasing ton namtik.

<sup>26</sup> Dimaw ma si Saulo shi Jerusalem jet to pineshas ja en may-a-shom so nonta ira sigod ja emati son Cristo, nem entakot sha. Ta eg sha pati-en ey inonod toy pamatira. <sup>27</sup> Nem si Bernabe, inodop to si Saulo jet indaw to so nonta ira apostol, jet inistoriya to son si-kara i itsora ni in-asa so nen Saulo son Jesucristo shi kalsara, tan inistoriya to pay sota inkowan nen Jesus son Saulo, pati sota katoded ton mengitosho ni maypangkep so nen Jesucristo shi Damasko. <sup>28</sup> Jet nontan ma, in-owen ira nonta emati ey mekid-kidaw si Saulo son si-kara shi emin na dawán shed Jerusalem. Etoled si Saulo ja mengikowan ni maypangkep so nen Jesucristo. <sup>29</sup> Emekisongbati pay so nonta ira

Hodiyoos ja Grigo i esel sha, tep piyan ton memati ngo ira. Nem sajay iren too, kowan sha ey bono-en shes Saulo. <sup>30</sup> Jet idi inamta-an ira nonta eshom ma emati iyay ya pangkep sha, inbetik sha si Saulo shi Sisaria, jet inbetkag sha ma ja on-akad shi Tarso.

<sup>31</sup> Jet nontan ma, sota ira emati shi intiron Jodia, Galilia, tan shi Samaria, eg ira medigdikatan. Jet sajay ira, kimed-sang i pamatira, tan shimakel pay ira. Nontan, si Apo Jesus ni olay i shaka nemnem-nemen panshedjawan, tan tin-odongan pay ira ni Ispirito Santo nen Apo Shiyos.

*Si Pedro, dimaw shi Lida, asan shi Jopa*

<sup>32</sup> Jet nontan ngo, si Pedro, pinasiyal ton emin ira sota emati, pati sota ira emati ja nanbaley shi Lida. <sup>33</sup> Jet si Pedro, wáray simbi tod man ja manngeshan ni Anias ja emansekit. Walon tawen to ja shimokol ni olay, tep eg makakeykey i bakdang to. <sup>34</sup> Jet si Pedro, kowan to so nen Anias ey, “Sota panakabalin nen Jesus, pemapteng toka. Bangon ka, jet isingpet mo ita shinokolan mo.” Jet ebigla ja makakeykey i bakdang ton shagos jet bimangon. <sup>35</sup> Jet emin sota nanbaley shi Lida, tan shi Saron, inon-an sha iyay, jet emati ira son Apo Jesus.

<sup>36</sup> Nontan shima Jopa, wáray biin emati ja si Tabita i ngaran to shi esel ni Hodiyoos, jet kowan sha ngod esel la Grigo ey si Dorkas, ta say olog ni ngaran to, makawas. Sajay ya bii, inosal ton emin i timpo to ni pandeka ni panmaptengan ni kait ton too, tan masdo ni olay ja ontolong ni nankebiteg. <sup>37</sup> Nontan met laeng nga timpo, nansakit iyay ya bii et etey. Inmes sha et inparokol sha nodta kowadto shi naykayang ni baley. <sup>38</sup> Saja ilin Jopa, nay-esop

shima Lida; isonga idi inamta-an ira nonta emati ey wares Pedrod man, engibetkag ira ni shownen daki ja en mengikowan son Pedro ey pangpangaasi to koma, kano-an ton ondaw ali shi Jopa. <sup>39</sup> Jet si Pedro, ekidaw so nonta ira naybetkag ja en engikowan son si-kato. Idi mimotok shi Lida, inpangdora nodta kowadto shi naykayang nonta baley ni etey, jet emin ira sota nankeballo, diniktob shes Pedro, ja ireka mannengis ni daringit sha, tan inpa-sas sha pay sota baro tan jakit ta para son si-kara ja dingka nen Dorkas nonta kabiday to. <sup>40</sup> Nem si Pedro, inpabo-day to iren emin, jet nantolimokod ja nanshawato son Apo Shiyos. Idi naksheng nga nanshawato, winingi to sota etey jet kowan to ey, “Tabita, bangon ka!” Jet sota etey, nay-agpayson binikat toy mateto. Idi inon-an tos Pedro, imekwas. <sup>41</sup> Si Pedro, shinewat tos Dorkas et inpaledjat to. Jet tina-wal to ira sota emati son Jesus nodtan, pati sota ira nankeballo, jet inparang tos Dorkas son si-kara ja mabiday.

<sup>42</sup> Sajay ya banag ga kaskasshaaw ja dingka nen Pedro, eshamag shi intiron Jopa, jet eshakele i emati son Apo Jesus. <sup>43</sup> Jet si Pedro, nan-iyannin ni ebayag shi Jopa shi baley nen Simon ja emengemag ni kolti.

## 10

*Dimaw si Pedro shi baley nen Cornelio*

<sup>1</sup> Shi siyodad ni Sisaria, waray manngeshan ni Cornelio ja kapitannin sandasos sa solsharo alid Roma ja poro tima-nil iren i-Italia. <sup>2</sup> Sajay ya kapitan, ebadeg i pamati to son Apo Shiyos, jet si-katoy toka topogen panshedjawi, jet angken pay sota ira totoon wared baley to, ireka ngo ememati son Apo Shiyos. Sajay ya kapitan,

aliwen Hodiyos, nem kanayon na emengikan ni tolong to so nonta ira nankebiteg ga Hodiyos, tan eg to diwayan na manshewat son Apo Shiyos. <sup>3</sup> Jet idi sakey ya akew ja oras ni alas tris ni mama-shem, waray inpa-sas nen Apo Shiyos son si-kato. Inon-an ton mismo i anghil nen Apo Shiyos ja dimaw son si-kato, jet inngadnan tos Cornelio. <sup>4</sup> Si Cornelio, mimorag ni takot to so nonta anghil, ja kowan to ey, “Apo, ngantoy ikowan mo son si-kak?”

Jet sota anghil, simongbat ja kowan to ey, “Si Apo Shiyos, intenengan toy shawat mo, tan amta toy mapteng nga tolong mo so nonta ira maligdigat. Isonga ninemnem toka. <sup>5</sup> Jet niman, pangibetkag ka ni ondaw shi Jopa ja en mengodop so nen Simon ja Pedro i sakey ya ngaran to. <sup>6</sup> Sajay ya si Simon, eman-iyannin shima kilig ni baybay shi baley nen boloy to, ja si Simon, ja para amag ni kolti.”

<sup>7</sup> Jet idi enaksheng nga inkowan nonta anghil iyay, indekjas nonta anghil si Cornelio. Jet si Cornelio, ena-wal nonta shownen baga-en to, tan pinidi to pay i sakey so nonta ira solsharo ton emansilbi son si-kato shi baley to, ja emati met laeng son Apo Shiyos. <sup>8</sup> Jet inistoriya to nin son si-kara sota inon-an to, asan toka ibetkag ira shi Jopa.

<sup>9</sup> Jet nonta maykadwen akew, sota inbetkag nen Cornelio, wara ired ma shalan ja shanshanin sebi-en shay Jopa. Jet nontan ngo, dimaw si Pedro nodta nanshekdan na atep ni baley ya toka pan-iyanni, say en manshewat shiman son Apo Shiyos nonta alas dosi. <sup>10</sup> Na-agang nontan, jet piyan ton mengan, nem marama ja shaka pan-isagana sota kenen to. Jet nonta wara nodta atep ni baley, waray inon-an ton inpa-sas nen

Apo Shiyos. <sup>11</sup> Inon-an toy dangit ja edo-katan, jet wára aliy ekalbot ja nay-oy-oy son si-kato, ja epat i nay-iket ta wánet nodta shogo to. <sup>12</sup> Jet nodtan, wáren emin i kalasin animal, titit, tan angken pay sota emankoshap shi bo-day. <sup>13</sup> Jet wáray intenengan ton esel la kowan to ey, “Pedro, dayat ka jet pamadti ka ni piyan mon kenen!”

<sup>14</sup> Nem si Pedro, simongbat ja kowan to ey, “Enshi Apo, ta eg mebedin ja menganak ni angken nganton kaibilang ni si-kamin Hodiyo ey ensekig!”

<sup>15</sup> Jet wáray simongbat ja kowan to ey, “Sota banag ja kowan nen Apo Shiyos ey edinis, karam ikowan ey ensekig.”

<sup>16</sup> Jet sotan na banag, emintedo ja dimespag ali so nen Pedro, ja etaksholan ni esel, asan ka-oli mowan da shi dangit.

<sup>17</sup> Jet si Pedro, toka nemnem-nemen pasiya iyay ya inon-an ton inpa-sas nen Apo Shiyos, ta eg to amta no ngarantoy olog to. Jet nontan ngo, sota ira toon inbetkag nen Cornelio, simpol sha sota baley nen Simon ja kad-an nen Pedro, jet ireka mansessesked nodta pasbol. <sup>18</sup> Jet kimeljaw ira ja inbaga sha, no wáray manngeshan ni Simon ono Pedro ja nanshiwes ja eman-iyen nodtan na baley. <sup>19</sup> Jet nontan, kenemnem-nema nen Pedro no ngantoy olog nonta inon-an ton inpa-sas nen Apo Shiyos son si-kato. Jet wáray inkowan ni Ispirito Santo nen Apo Shiyos son si-kato ey, “Asas mo, wáray tedon too ja emengenap son si-kam. <sup>20</sup> Daw ka, mo ira sabi, jet kareka manshoshowa ja mekidaw son si-kara, ta si-kak met laeng i engibetkag ali son si-kara.”

<sup>21</sup> Jet si Pedro, dimespag ali nodta atep jet to inkowan so nonta tedon toon emansessesked ey si-kato sota toon shaka pan-enapa,

jet inbag-an to ira no ngarantoy kabol la dinawan sha ali.

<sup>22</sup> Jet sota ira tedon daleki, inkowan sha son Pedro ey, “Inbetkag shakami nen Cornelio, ja kapitan ni solsharo ni gobirnod Roma, ja mika odopen. Saja si Cornelio, mapteng i ogadi to. Si Apo Shiyos bengat i toka panshed-jawi, jet angken emin na Hodiyo, shaka ikowan ey mapteng noman. Waray anghil nen Apo Shiyos ja nanpa-sas son si-kato, jet inkowan to ey pa-odop toka ja ondaw shi baley to, say itenengan toy ikowan mo son si-kato. Isonga dimaw kami ali.”

<sup>23</sup> Jet si Pedro, inewis to ira ja ma-okip ira nin ni sandabi nodta kad-an to.

Jet nonta ewa-wa, ekidaw si Pedro son si-kara, jet wára pay i eshom ma a-aki shi pamati ja i-Jopa ja ekidaw son si-kato. <sup>24</sup> Jet idi maykadwen akew, mimotok ira shi Sisaria, ja ilin kawad-an nen Cornelio. Jet si Cornelio, emansessesked son Pedro, tan wára pay ira sota partido to tan kagajem to ja inewis to ali shi baley to.

<sup>25</sup> Idi emanseskep si Pedro, en inaspol nen Cornelio jet nantalimokod shi sango-an nen Pedro, ja nanshayaw son si-kato.

<sup>26</sup> Nem si Pedro, shinewat to et inpaledjat to, asan toka ikowan ey, “Dayat ka, ta si-kak, too-ak ngo bengat ja inges mo!”

<sup>27</sup> Jet si Pedro nen Cornelio, ireka mantabtabal ey ireka emanekad, jet idi onsekep ira nodta naydaem, inon-an to ira sota eshakil la toon esa-nop. <sup>28</sup> Jet si Pedro, kowan to son si-kara ey, “Si-kayo, amtayo met ey say ogadi ni si-kamin Hodiyo ket eg mebedin na mekigajem kami ni toon aliwen Hodiyo ono ondaw shi balbaley sha. Nem si Apo Shiyos, inkowan to son si-kak ey

enshiy nak ibiyang nga too ja oke-sen ko, ja angken ngantoy katoo to. <sup>29</sup> Isonga idi onmotok da sota inbetkag mo son si-kak, enshiy showashowak ja ondaw ali. Jet niman, piyan kon ibaga son si-kam no ngantoy inpa-odopan mowak so.” Kowan nen Pedro.

<sup>30</sup> Jet si Cornelio, insodsod to ja kowan to ey, “Nonta epat den akew wa dimabas, inges niyay ya oras nonta naka manshewat son Apo Shiyos ni alas tris ni mama-shem, jet bigla ja waray toon nanbaro ni emeneni ja dimayat shi sango-an ko, <sup>31</sup> jet kowan to ey, ‘Cornelio, si Apo Shiyos, intengangan toy shawat mo, tan eg to dibkan sota mapteng nga tolong mo so ni maligdigat. <sup>32</sup> Isonga niman, pangibetkag ka shi Jopa ni en mengodop so nonta toon manngeshan ni Simon ono Pedro, ja eman-yan shima kilig ni baybay shi baley nen boloy ton si Simon, ja para amag ni kolti.’ Kowan nonta too son si-kak. <sup>33</sup> Isonga engibetkagak den shagos ni en mengodop son si-kam, jet mapteng nga pasiya i dingkam, ta dimaw ka di, jet niman, iyay kamin emin, jet amta nen Apo Shiyos ey kamika emansessesked ja mengitneng nonta ikowan mo son si-kami ja bilin nen Apo Shiyos.” Kowan nen Cornelio.

<sup>34</sup> Jet si Pedro, imesel, ja kowan to ey, “Niman, naka ma pati-a ey si Apo Shiyos, nan-i-inges i toka pesing so ni totoo. <sup>35</sup> Emin na too shiya dobong, ja emati son Apo Shiyos, tan emandeka ni mapteng, kenshat ta ewaten nen Apo Shiyos, angken ngantoy katoo to. Aliwen si-kamin Hodiyoys bengat i ewaten to. <sup>36</sup> Amtayo met ey si-kamin Hodiyoys ja i-Israel, si-kamiy inbetkagan to so nen Jesucristo say to ikowan no ngarantoy dag-en mi say kosto-an shakami nen Apo Shiyos, jet

si-kato met laeng sota Apo ni toon emin, pati si-kayon aliwen Hodiyoys. <sup>37</sup> Amtayo met pay sota edagdaga shi intiron Jodia manshoki shi Galilia nonta naksheng nga intoro nen Juan i maypangkep nonta toka pemonjag. <sup>38</sup> Jet amtayo met ey si Apo Shiyos, shinotokan tos Jesus ja i-Nasarit ja si-katoy pan-iyanan ni Ispirito Santo to, tan in-aknan to ni panakabalin to. Jet si Jesus, nan-aka-akad say en mandeka ni panmaptengan ni totoo, jet inpamapteng ton emin sota emanpansekit ja kepedigata nen Satanas, ta si Apo Shiyos, wara ni olay son si-kato. <sup>39</sup> Jet si-kami i onpaneknek so ni emin na inon-an min dingka to shi ili min Hodiyoys, pati shi Jerusalem, jet mismon inon-an mi pay ja indansara shi koros ni inbono sha so. <sup>40</sup> Nem si Apo Shiyos, inpanbiyag to nonta maykatdon akew, jet waray nanpa-sasan to. <sup>41</sup> Nem aliwen emin na too ket inon-an sha. Say engasas bengat son si-kato, si-kami ja shinotokan nen Apo Shiyos ja mengikowan ni maypangkep son si-kato. Nonta naksheng nga nanbiyag, ekipengan pay son si-kami. <sup>42</sup> Jet si-katoy mismon engibetkag son si-kami ja mengikowan shi totoo ni maypangkep son si-kato, tan mengikowan ey si-katoy pinidi nen Apo Shiyos ja mengigsheng ni panbenagan ali ni totoon wara pay laeng shi biyag tan angken sota toon nanketey da. <sup>43</sup> Jet angken sota emin na para padto nen Apo Shiyos nonta bayag da, insigod shen inkowan ey emin na toon memati son si-kato, mepekawanan i basol sha. Ta si Jesus i inpiyalan nen Apo Shiyos ja memekawan ni basol.”

*Sota ira toon aliwen Hodiyoys ja emati, inewat sha ngoy Ispirito Santo*

<sup>44</sup> Jet nonta marama ja pan-ikowan nen Pedro iyay, dimespag aliy Ispirito Santo nen Apo Shiyos so nonta ira engitneng nontan. <sup>45</sup> Jet sota ira ematin Hodiyo ja i-Jopa ja ekidaw son Pedro, ireka emesshaaw, ta sota ira toon aliwen Hodiyo, engawat ngo ira ni Ispirito Santo ja in-akan nen Apo Shiyos. <sup>46</sup> Inamta-an sha iyay tep intenengan sha shi Cornelio ja nan-esel ni ekalkalasin esel ja aliwen esel sha, tan intenengan sha pay ira ja ireka eman-iyaman son Apo Shiyos.

Jet si Pedro, kowan to ey, <sup>47</sup> “Niman, nganto may pesing so iren ja totoo ja kawad-an ma ni Ispirito Santo nen Apo Shiyos ja inges shakito? Enshi emoy mengitoded ja mengikowan ey eg ira manpabonjag.”

<sup>48</sup> Jet si Pedro, inkowan to son si-kara ey, “Panpabonjag kayo ja si Jesucristo i toshongen jon patien ni olay.”

Jet nontan, inkowan sha ey man-iyannin si Pedro son si-kara.

## 11

*Si Pedro, inistoriya to sota dingdingka nen Apo Shiyos son si-kato*

<sup>1</sup> Jet nontan, sota ira apostol tan sota ira emati ja wared Jodia, shinemag sha ey sota ira toon aliwen Hodiyo ket inewat sha ngoy esel nen Apo Shiyos nonta intoro nen Pedro. <sup>2</sup> Isonga idi nayoli si Pedro shi Jerusalem, sota ira kait ton Hodiyo ja ematid man, inseg-ang shes Pedro jet kowan sha son si-kato ey, <sup>3</sup> “Si-kam Pedro, apay nga dimaw ka shi baley ni toon aliwen Hodiyo, jet ekipengan ka pay son si-kara?”

<sup>4</sup> Nem si Pedro, siningpet ton inistoriya son si-kara sota epasemak son si-kato, ja kowan to ey, <sup>5</sup> “Nonta wارا-ak shi Jopa

ja emanshewat son Apo Shiyos, waray inpa-sas to son si-kak. Inpa-sas toy ekalbot alid dangit ja na-iktan ni wanet sota epat ta shogo to; jet dimespag ali son si-kak. <sup>6</sup> Siningpet koy bisna jet wares emin i kalasin animal nodtan, waray kalasin emankoshap shi bo-day, waray kalasin titit. <sup>7</sup> Jet waray intenengan kon esel ja kowan to ey, ‘Pedro, dayat ka, pamadti ka ni piyan mon kenen!’ <sup>8</sup> Nem say insongbat ko, kowan ko ey, ‘Enshi Apo, ta eg mebedin ja menganak ni angken nganton kaibilang ni si-kamin Hodiyo ey ensekig!’ <sup>9</sup> Nem waray songbat ja edapod dangit ja kowan to ey, ‘Sota banag ja kowan nen Apo Shiyos ey edinis, karam ikowan ey ensekig.’ <sup>10</sup> Sajay ya ekalbot, emintedo ja dimespag ali son si-kak asan ka-oli mowan da shi dangit. <sup>11</sup> Jet nontan met laeng nga oras, waray tedon too ja mimotok nodta baley ya kawad-an ko ja edapod Sisaria, ja kowan sha ey sha-ak odopen. <sup>12</sup> Jet sota Ispirito Santo nen Apo Shiyos, inkowan to son si-kak ey ekak manshowashowa ja mekidaw son si-kara. Jet siya, angken saja enem ma a-aki tayo shi pamati ja i-Jopa, ekidaw ira son si-kak, jet si-kamin emin i dimaw shi baley nen Cornelio. <sup>13</sup> Jet si Cornelio, insodsod to son si-kami sota inon-anton anghil ja dimaw shi baley to, tan insodsod to pay sota inkowan ni anghil son si-kato. Et kowan kono nonta anghil son si-kato ey mengibetkag ni en mengodop son si-kak shi baley nen Simon shi Jopa, <sup>14</sup> ta kowan to ey si-kak kono i mengikowan son si-kara ni maypangkep ni kaysedakan shen emin na sanpamilja. <sup>15</sup> Jet idi marama ja naka mantosho son si-kara, dimespag ali sota Ispirito Santo nen Apo Shiyos ja nan-iyannin son si-kara ja inges to son si-

katejo ngo nonta pilmiro. <sup>16</sup> Jet ninemnem ko sota inkowan nen Apo Jesus nontan ja kowan to ey, ‘Shanom bengat i inpamonjag nen Juan, nem say pemonjag nen Apo Shiyos son si-kayo, Ispirito Santo.’ <sup>17</sup> Si Apo Shiyos, edawag ey angken sota toon aliwén Hodiyo, in-aknan to ngo ira ni Ispirito Santo to, ja inges toy inpasing to son si-katejo, ni inpamati tayo son Apo Jesucristo. Isonga si-kak, enshiy kanebengan kon menokil ni piyan nen Apo Shiyos.” Kowan nen Pedro.

<sup>18</sup> Jet idi intenengan sha iyay, imeket ira ma sota totoon istay bimalaw so ni inpasing nen Pedro, jet say inpasing sha ma, nan-iyaman ira son Apo Shiyos, ja kowan sha ey, “No kasta, si Apo Shiyos, kinaasi-an toy toon aliwén Hodiyo et intolok ton manbebawi ira, say may-aknan ngo ira ni biyag ja enshiy to engintegan.”

### *Sota maypangkep ni emati shi Antiok*

<sup>19</sup> Nonta naksheng nga binonora si Esteban, inshogi sha men pedigaten ima eshom ma emati, jet say iren emati, ebokal ira. Simbi ni eshom i Ponisia, Cyprus tan Antiok, jet intoro shed man i mapteng nga shamag pangkep son Jesus. Nem say intod-an sha bengat shiman, sota ira Hodiyo.

<sup>20</sup> Nem sota eshom ma emati ja i-Cyprus, tan i-Sirini, dimaw ngo ired Antiok jet sha intoro so nonta ira toon aliwén Hodiyo sota mapteng nga shamag pangkep so nen Jesus. <sup>21</sup> Jet si Apo Jesus, tinodongan to ira jay jet eshakel i totoo ja emati so nen Apo Jesus, ja inbi-jag sha mala sota ogadin kinapagano.

<sup>22</sup> Jet sota ira emati ja wared Jerusalem, shinemag sha iyay ya

inpamati ni aliwén Hodiyo jet inbetkag sha ma si Bernabe shi Antiok, ja to asen sotan na epasemak. <sup>23</sup> Idi mimotok shiman, inon-an to ey kinaasi-an ngo ira nen Apo Shiyos sota aliwén Hodiyo jet ebadeg ma i imdeng to. Jet nontan, binidin to ira ey ki-deten sha sotan na pamatira son Apo Jesus. <sup>24</sup> Ta saja si Bernabe, mapteng i ogadi to, tan inshalan ni Ispirito Santo nen Apo Shiyos, tan ebadeg i pamati to. Jet nontan ma, mas eshakel pay iray emati son Apo Jesus.

<sup>25</sup> Jet si Bernabe, indekjas to ira et dimaw shi Tarso ja to enapen si Saulo shiman. <sup>26</sup> Idi simbi to si Saulo, in-ilaw tod Antiok, jet makatawen shen nantoro so nonta ira eshakel la emati. Jet shi Antiok i pilmiron nanshogi-an ni kowan sha ey Kristiyano i ngaran ni emati son Cristo.

<sup>27</sup> Jet nontan, wara iray para padto ja edapod Jerusalem ja dimaw shi Antiok. <sup>28</sup> Jet sakey son si-kara i manngeshan ni Agabo. Sajay ya too, inshalan ni Ispirito Santo nen Apo Shiyos jet inpadto to ey wara aliy bitil shi emin na sakop ni dobong. (Jet epasemak iyay nga agpayso nonta timpo ni inpantoray nen Claudio shi Roma.) <sup>29</sup> Jet nontan ma, sota ira emati, ninemnem ni sakey tan sakey son si-kara ey ipakat shay kabaalan sha ja mengikan ni tolong sha so nonta kakaasin akira shi pamati ja wared Jodia. <sup>30</sup> Jet say engi-idaw nonta inedos sha, si Bernabe nen Saulo, jet inawat sha iyay so nonta ira pangolo ni emati shi Jodia.

## 12

*Ema-ma ja emepedpedigat ira sota emati son Apo Jesus*

<sup>1</sup> Nontan na timpo epaladoy kepespesing nen Ari Hirodis so

nonta ira eshom ma emati. <sup>2</sup> Si Santiago ja agi nen Juan, inpa-okdo nen Hirodis ni kumpulan. <sup>3</sup> Jet idi inamta-an ton eman-imdeng ira sota Hodiyo ni sajay ya dingka to, mina-ma to et ja inpa-shel pay si Pedro. Sajay, naytompong nga epasemak nonta timpo ni piyasta ni Hodiyo ja kowan sha ey Paskowa ja shaka pangan ni tinapay ja eg epalwan ni para debag. <sup>4</sup> Jet idi inpa-shel nen Hirodis si Pedro, inpaibalod to asan toka pabantay so ni sampolo tan enem ma solsharo. Ta say plano nen Hirodis, no meksheg sota piyasta ja kowan sha ey Paskowa, bista-en tos Pedro shi sango-an ni karakdan. <sup>5</sup> Jet nontan ma, wares Pedro shi badoran, nem sota ira emati ja esa-nop, nanshawata ira son Apo Shiyos ja pasiya ni maypangkep son si-kato.

*Waray milagron edaga nonta inkaybolos nen Pedro*

<sup>6</sup> Jet si Pedro shima badoran, na-ogip shi nankinaw-an ira ni showen solsharo ja kowadja, ja binedod sha ni kolkolong, tan wara iray nankowadja nodta sakepan ni badoran. Jet nontan na dabi, kowan nen Hirodis ey no mewawa, ibo-day tos Pedro ja bista-en to ma. <sup>7</sup> Nem nontan na dabi, ebigla ja waray anghil ja nimiyal nodta badoran. To inkiwed si Pedro, ja kowan to ey, “Kano-im bangon ka!” Jet nayinshas ngon na-kal sota kolkolong shi takday to. <sup>8</sup> Jet sota anghil, inkowan to son Pedro ey isingpet ton emin i baro to tan kowan to ey i-amag toy sinilas to, asan kowan to pay ey ibaro toy ta-kep ni baro to, jet asan toka ikowan ey, “Kala, onod mowak.”

<sup>9</sup> Jet si Pedro, inonod to sota anghil et bimo-day ira nodta badoran. Say wared nemnem nen Pedro, kowan to ey

emankogkogip bengat, ja aliwen agpayso sota emankepasemak. <sup>10</sup> Nanshalan ira nodta kawad-an ni pilmiron kowadja, ingkato nodta maykadwa, asan ma nodta sakepan ja ontorong nodta siyodad. Jet sota danshok ka pasbol, edo-katan na shorog para son si-kara. Bimo-day ira nodtan jet nan-akad ira nin ja bintawan sha sota badoran, asan ebigla ja indekjas ma nonta anghil si Pedro. <sup>11</sup> Jet nontan ma, naynemneman si Pedro, jet kowan to ey, “Niman, amtak ey sajay ya edaga son si-kak ket podno. Si Apo Shiyos i engibetkag ni anghil to, say disian koy pedigatan towak so nen Hirodis, tan say eg mepesamak son si-kak i namnama ni Hodiyo ey dag-en sha son si-kak.” Kowan nen Pedro.

<sup>12</sup> Jet si Pedro, idi inamta-an to ey agpayso sotan na inkaybolos to, ninemnem to ey ondaw shi baley nen Maria ja ina nen Juan ja Marcos i sakey ya ngaran to. Ta nodtan na baley i esanopan ira nonta emati ja emanshawata son Apo Shiyos. <sup>13</sup> Idi simabi si Pedro nodta pasbol ni baley, tinogtog to jet en inon-an nonta bii ja katodong sha nodta baley sha, ja manngeshan ni Roda. <sup>14</sup> Inimatonan toy esel nen Pedro, nem namtik ni imdeng to ey eg to et ido-katan, jet to inkowan so nonta esa-nop ey wara si Pedro nodta pasbol.

<sup>15</sup> Nem kowan et nonta esa-nop son si-kato ey, “Ngantoy? Kaka man-engaw?” Nem idi toka ipidit ey siyen si-kato, kowan sha ey, “Apil, sota anghil emon emanbantay son Pedro.”

<sup>16</sup> Nem si Pedro, ememasig ni togtog nodta pasbol, jet idi indokatan sha, inon-an sha ey si-kato nga agpayso. Jet ireka emesshaaw. <sup>17</sup> Nem si Pedro, sininjanan to ira ey on-eg-eket ira,

jet inistoriya to sota inpasing nen Apo ja engibo-day son si-kato shi badoran. Jet inbilin to ey ikowan sha sotan na epasemak so nen Santiago, tan so nonta ira eshom ja a-akira shi pamati. Jet nontan ma, indekjas to ira ja dimaw shi apil la ili.

<sup>18</sup> Idi ewa-wa ma, sota ira kowadja nodta badoran, eg sha tongolan i dag-en sha, ta enshi la si Pedro. <sup>19</sup> Jet si Hirodis, inpa-anap to, nem eg sha simplol. Binistigal to ira sota kowadja ja nanbantay nontan na edabi et inbilin to ey mebono ira. Jet nontan ma, si Hirodis, shimalong nga dimaw shi Sisaria ja edapod Jodia, jet nan-iyen nin shiman.

#### *Etey si Hirodis*

<sup>20</sup> Nontan, kontra nen Hirodis ira sota tood Tira tan Sidon. Isonga sajay iren totoo, say inpasing sha, ekikajem ira nin so nen Blasto, ja misonon kaibetbetkag nen Hirodis, say si-katoy mengadok son Hirodis ey enshiy bakal koma, ta say kedepo-i ni kekena ira niyay ya too ket shi ili met laeng nen Hirodis.

<sup>21</sup> Idi simabi sota akew wa pana-aspol sha, sotan na akew i pinidi nen Hirodis ja osalanan to so nonta baro ton kaibaro ni ari jet timongaw shi tongawan ton mapteng, asan pay nandiskolso shi sango-an nonta totoo.

<sup>22</sup> Jet sota totoo, kimeljaw ira ni inshayaw sha son si-kato, ja kowan sha ey, "Aliwen esel ni too i esel to, no diket esel ni sakey ya shiyos!"

<sup>23</sup> Jet nontan ma, bigla ja shinoso ni anghil nen Apo Shiyos si Hirodis, ta inewat toy in-etekan so ni totoo, ey enshiy shayaw to son Apo Shiyos. Jet say shosa to, nakdang nga pasiya asan ma matey.

<sup>24</sup> Manipod ma nontan, sota esel nen Apo Shiyos, emankaiweshis

shi eshaket la dogad jet emanshaket la emanshaket i ememati so.

<sup>25</sup> Jet si Bernabe nen Saulo, nay-oli ired Antiok ja edapod Jerusalem, ta kinsheng shay obdared man, jet inodop sha si Juan ja manngeshan met laeng ni Marcos.

## 13

*Sota ira ematid Antiok, inbetkag shes Bernabe nen Saulo ja en mengitosho shi eshom ma ili*

<sup>1</sup> Shima Antiok ja kawad-an ira nonta emati, wara son si-kara sota emengipa-amta ni panpa-amta nen Apo Shiyos son si-kara, tan sota eshom ma para toro, jet sajay iray ngaran sha: si Bernabe, si Simeon ja Tolingnan i sakey ya ngaran to, si Lucio ja i-Sirini, si Manaen ja tagibi ni ama nen Hirodis ja gobinarol shi Galilia, tan wara son si-kara si Saulo. <sup>2</sup> Jet sajay iren too, nonta pinsak, inbiyang shay pangan sha ta maramen ireka emanshedjaw son Apo Shiyos. Jet inkowan ni Ispirito Santo nen Apo Shiyos son si-kara ey, "Ilesin jo si Bernabe nen Saulo, ta waray obda ja piyan kon dag-en sha para son si-kak."

<sup>3</sup> Jet idi naksheng i shaka pangngidin tan shaka panshewat son Apo Shiyos, saja ira pangolo ni emati, insakpal shay takday sha son si-karen showa nin, asan shaka ira ibetkag ja ondaw.

<sup>4</sup> Jet si Bernabe nen Saulo, ja inbetkag ni Ispirito Santo, shimalong ira shi Silosia, jet nandongan ired man shi barko ingkatod Cyprus. <sup>5</sup> Jet idi mimotok ired Salamis ja siyodad ni Cyprus, dimaw ira shima baley ya sa-nopan ni Hodiyos, jet intoro shay esel nen Apo Shiyos so ni totoo man pangkep son Jesus. Wara si Juan Marcos shiman ja eki-odop son si-kara jet timolong shiman.



<sup>6</sup> Jet idi inekad shen emin i Cyprus ingkatod Papo, wáray simbired man ja manmantala. Sajay ya too, Hodiyoos ja kowan to shorog ey para padto nen Apo Shiyos, nem enshi kari; o-owap to. Say ngaran niyay ya too, si Bar-Jesus, ja Ilimas i sakey ya ngaran to. <sup>7</sup> Jet sajay ya toon manmantala, emay-od-odop so nonta gobinarol shi Cyprus ja si Sergio Paulo. Sajay ya gobinarol, edaing; isonga to inpa-odop ali si Bernabe nen Saulo ta piyan ton itenengan i esel nen Apo Shiyos ja maypangkep son Jesus. <sup>8</sup> Nem si Ilimas, ja manmantala i olog ni ngaran to, eg to kosto si Bernabe nen Saulo, ta piyan ton say eg memati sota gobinarol son si-kara.

<sup>9</sup> Jet si Saulo, ja manngeshan met laeng ni Pablo, inshalan ni Ispirito Santo, jet intelkel ton pasiya sota manmantala. <sup>10</sup> Jet kowan nen Pablo son si-kato ey, “Si-kam, anak toka nen Satanas! Si-kam i makakontra ni emin na mapteng nga banag ja panmaptengan ni too! Wara son si-kam ma emin i itsora ni pengi-owap, tan ngaaw wa aramid. Isalsheng moy moka pemediktad ni podno ja maypangkep son Apo! <sup>11</sup> Niman, shosa-en toka nen Apo Shiyos, jet mekoshab ka ma, ja eg mo ma asen nin i sekit.”

Jet nontan ma, bigla ja wáray dinekna nonta manmantala ja naysa-din shi mateto, jet eg to ma asen i shanden to. Emanena-enap ni toon menewat son si-kato ja mengipangdo ni shanden to. <sup>12</sup> Jet sota gobinarol, idi inonan to iyay ya epasemak, emati ma son Cristo, ta emesshaaw wa pasiya ey sota toro ja pangkep son Apo Jesus, etaksholan gayam ni panakabalin.

<sup>13</sup> Jet nontan ma, si Pablo tan sota ira kait to, nandogan ired barko shi Papo jet mimotok ired

Pirgi, ja sakop ni Pampilia. Jet si Juan Marcos, indekjas to ira jet nay-oli shi Jerusalem. <sup>14</sup> Jet si Pablo nen Bernabe, manshokid Pirga, intoloy shen dimaw, jet simabi ira nodta apil ngon Antiok, ja sakop ngo ni Pisidia. Jet nonta simabi sota akew wa ngilin ni Hodiyoos, dimaw ira ja en ekitongaw so nonta ira wáred sa-nopan ni Hodiyoos shiman na ili. <sup>15</sup> Jet nonta naksheng nga engibasa ira sota pangolo ni Hodiyoos shiman nonta dinteg nen Moises, tan sota insolat ni para padto nen Apo Shiyos nonta bayag da, inkowan sha so nen Pablo nen Bernabe ey si-kara ngoy maysa-dat ja manasel, no wáray ikowan shen togon so nonta ira totoo.

<sup>16</sup> Jet dimayat si Pablo asan toka sinjasi ira ey mantetneng ira nonta ikowan to, jet kowan to ey, “Si-kayon totoo ja kait kon Hodiyoos, tan si-kayon aliwjen Hodiyoos ja etod-an ja manshedjaw son Apo Shiyos, nemnem jo iyay ya ikowan ko. <sup>17</sup> Si Apo Shiyos, ja keshedjawa ni tood Israel, si-katoy emili nonta apo tayo da, jet si-kato met laeng i engikan son si-kara ni kayshedjawan sha nonta wára pay laeng ired Egypt. Jet si Apo Shiyos met laeng i timolong son si-karen engilekjas ni Egypt. <sup>18</sup> Jet nonta naksheng nga indekjas shay Egypt, epat ta polon tawen ja inenosan nen Apo Shiyos i emin na dingdingkara nodta nan-ak-akshan shen dogad ja enshiy balebaley. <sup>19</sup> Shineshal nen Apo Shiyos sota totoo shima piton ili shima Kanaan, asan toka i-kan i Kanaan so ni appo tayo da say kokowa-en sha, jet sajay, kinokowa sha ni epat ta dasos tan dimen polon tawen. <sup>20</sup> Jet idi naksheng iyay, in-aknan to ira ni kowis ja mengipangdo son si-kara ja nansisina-dat ingkato nonta timpo nen Samuel ja para

padto. <sup>21</sup> Jet nonta nanbaga ira ni ari ja mengitoshay son si-kara, in-aknan nen Apo Shiyos ira, jet say ngaran to, si Saulo ja anak nen Kis ja poli nen Benjamin. Jet epat ta polon tawen ja si-katoy engitoshay son si-kara. <sup>22</sup> Idi ingkal nen Apo Shiyos si Saulo, insa-dat tos David ja mengitoshay son si-kara ja ari sha. Jet inkowan nen Apo Shiyos ey, 'Waray simpol kon too ja emepiyal la mandeka ni emin na piyan ko; si-katoy naka kosto-i. Jet si-kato si David ja anak nen Jesse.' Kowan nen Apo Shiyos. <sup>23</sup> Jet sajay ya si David, si-katoy makapoli nonta mengisedakan ja inkari nen Apo Shiyos son si-katejon Hodiyo, jet si Jesus sotan. <sup>24</sup> Nem nonta aneng pay laeng i ishogi son Jesus ni obda to, si Juan i epangdo nin ja engitoshon so nonta ira tood Israel ey manbebawi ira ni basol sha, asan ireka manpabonjag. <sup>25</sup> Jet idi shanshanin meksheng ma i obda nen Juan, inbag-an to ira sota totoo ja kowan to ey, 'Kowan jo emo ey si-kak sota joka sesseskeren mengisedakan. Nem apil. Wara aliy maysa-dat son si-kak jet ekak pay maykeshi ja angken baga-en to koma ja mengkal ni sapatos to.'

<sup>26</sup> "Si-kayon kait kon Hodiyo ja poli nen Abraham, tan si-kayon aliwen Hodiyo ja etod-an na manshedjaw son Apo Shiyos, naytoro son si-katejon emin sota esel nen Apo Shiyos ja si Jesus i Mengisedakan! <sup>27</sup> Say piyan kon a-seden, sajay: sota ira nanbaley shi Jerusalem, tan sota ira toray sha, eg sha inimatonan ey si Jesus sota mismon mengisedakan, tan eg sha inewatan sota naysolat ja kowan ni para padto nonta bayag da, ja shaka ibasbasa ni olay no akew wa ngilin tayon Hodiyo. Eg sha inewatan sota inkowan ni para padto ey mebono

sota mengisedakan ali, nem si-kara et i timongpal so, nonta binonora si Jesus. <sup>28</sup> Jet sotan na inpasing sha son si-kato, enshiy kabol la sha so binono-an so, nem inkowan sha et son Pilato ey pebono to. <sup>29</sup> Jet idi dingkaren emin iyay, ja etongpal sota naysolat ta padto ja maypangkep so nonta mengisedakan ali, impas sha nodta naykorosan to et sha indiyang. <sup>30</sup> Nem si Apo Shiyos, inpanbiyag to mowan. <sup>31</sup> Jet nonta inpanbiyag to ma, eminsakel la nanpa-sas so nonta ira ekidkidaw son si-kato manshodid Galilia ingkatod Jerusalem. Si-kara niman sota emengipaneknek so ni totoon Hodiyo. <sup>32</sup> Si-katoy kabol la kawasha-an mi did jay, ta ikowan mi son si-kayo i mapteng nga shamag, ey sota kari nen Apo Shiyos so nonta appo tayo da, <sup>33</sup> tinongpal to niman son si-katejo ni inpan-ongal to so nen Jesus. Sajay i kaytoshongan nonta naysolat shi maykadwen salmo ja kowan to ey, 'Si-kam i anak ko, jet niman si-kak ma i amam.' <sup>34</sup> Tan say kowan pay nen Apo Shiyos pangkep son si-kato, kowan to ey panbiyag to shi patey say sota bakdang to, eg ma mebojok. Sajay i kaytoshongan nonta esel to ja naysolat, ja kowan to ey, 'Sota podnon karik son David nontan da, tan sota bindisiyon ko son si-kato, i-akan ko son si-kayo.' <sup>35</sup> Tan wara pay shi eshom ma salmo i inkowan to ey, 'Eg mebedin na itolok mo Apo Shiyos, ja mebojok i bakdang nonta shinotokan mo.' <sup>36</sup> Sajay ya inkowan nen David, aliwen si-kato met laeng ja engikowan i kaytoshongan to, ta si David, idi enaksheng nga nansilbi son Apo Shiyos nonta wared biyag, etey ja to simbiy ap-apo to la, jet sota bakdang to, eboyok. <sup>37</sup> Nem si Jesus ja inpanbiyag nen Apo Shiyos shi patey, eg to pineshasan na eboyok

i bakdang to. <sup>38</sup> Isonga si-kayon kait ko, mesepol la amta-an jo ey, say mebedin ja memekawan ni basol, si Jesucristo, jet si-kato iya mika pan-itoro son si-kayo. <sup>39</sup> Jet emin na basol ja eg mebedinan nonta bilin ja nay-awat so nen Moises, mebedin na mepekawan shi pamati bengat son Jesucristo. <sup>40</sup> Sajay koma i nemnemen jo, ta baka et ey si-kayo i kaytoshongan nonta esel nen Apo Shiyos nonta bayag da ey, <sup>41</sup> ‘Si-kayon mabedaw, waray dag-en ko alin kesshaawan jo, jet sotan alin dag-en ko, eg jo pati-en, angen pay ya waray mengi-odog. Isonga say pantongpalan jo, mepilshi kayol!’ Sajay i banshaan nen Apo Shiyos son si-kayo.” Kowan nen Pablo.

<sup>42</sup> Idi eman-ewas si Pablo nen Bernabe nodta baley ya sa-nopan, shaka pan-evisa ey no sakey alin ngilin ni Hodiyo, ondaw ira mowan ali koma nodta sa-nopan say man-a-aspol ira mowan, jet ipinshowara kono ja ikowan sota inkowan sha la. <sup>43</sup> Jet idi bimoday ya emin sota too nodta baley ya sa-nopan ni Hodiyo, eshakil iray Hodiyo tan sota ira aliwen Hodiyo ja etod-an ja manshedjaw son Apo Shiyos, ja sha simbi si Pablo nen Bernabe. Jet si Pablo nen Bernabe, tinokon sha ira ey itoloy shen nemnemnemen sota intenengan shen pangkep ni kaasi nen Apo Shiyos.

<sup>44</sup> Jet idi nonta sakey alin akew ja ngilin ni Hodiyo, ngannganin ondaw alin emin sota too nodtan na ili shima sa-nopan ni Hodiyo ja mantetneng mowan ni ikowan sha, ja esel nen Apo Shiyos pangkep son Jesus. <sup>45</sup> Nem idi inon-an ira nonta eshom ma Hodiyo iyay ya eshakil la toon emanka-awis son Pablo, epaladoy apal sha son Pablo; isonga shaka pay pansongbati, ja ngaaw i shaka pan-ikowan son si-kato. <sup>46</sup> Nem si

Pablo nen Bernabe, mas timoled ira ja man-a-sel, jet kowan sha ey, “Mesepol la si-kayon Hodiyo nin i kaykowanen ni esel nen Apo Shiyos, nem niman ta binedaw jo, ja endedamsis jo sota biyag ja enshiy to engintegan ja eg jo koston ewaten, ondaw kami ma shi toon aliwen Hodiyo jet si-kara may pengitoshon-an mi. <sup>47</sup> Ta waray inbilin nen Apo Shiyos son si-kami, ja kowan to ey, ‘Si-kami i pedaw ko so nonta ira toon aliwen Hodiyo, jet si-kami i may-eshig ga silew ja ondawag son si-kara, say amta-an ni emin na totoo shiya kaili-ili ja sakop ni dobong i pesing shen maysedakan.’ ”

<sup>48</sup> Jet idi intenengan nonta ira toon aliwen Hodiyo iyay ya inkowan nen Pablo, ireka emansedamat son Apo Shiyos ni maypangkep nonta esel to ja inkowan nen Pablo. Jet nontan, eshakil may emati ta si-karay piyan nen Apo Shiyos ja i-aknan to ni biyag ja enshiy to engintegan. <sup>49</sup> Jet nontan ma, sota esel nen Apo Shiyos, intenengan ni emin na too nodta emin na sakop nontan na dogad. <sup>50</sup> Nem sota ira Hodiyo ja eg emati, dimaw ira so nonta bibiin bebaknang ja aliwen Hodiyo ja etod-an na manshedjaw son Apo Shiyos, tan dimaw pay ira so nonta dalekin pangolo nodtan na siyodad, jet apil i insodsod sha pangkep son Pablo nen Bernabe. Isonga inpabtik sha ma ires Pablo nen Bernabe nodtan na dogad. <sup>51</sup> Nem say inpasing nin nen Pablo nen Bernabe, pinokpok sha sota pimeket ta depok shi sedira ja sikatoy pengamta-an ni tood man ey enshi may biyang sha son si-kara. Jet dimaw ira ma shi Ikoniom.

<sup>52</sup> Jet sota ira emati shi Antiok, ja indekjas shi Pablo, ebadeg i imdeng sha jet inshalan pay ira ni

Inspirito Santo nen Apo Shiyos.

## 14

*Inpabtik mowan ni Hodiyo si Pablo shi Ikoniom*

<sup>1</sup> Idi mimotok ired Ikoniom, dimaw ira nodta baley ya sanopan ni Hodiyo shiman. Jet eshakel i toon emati nonta inkowan sha — Hodiyo man ono aliwen Hodiyo. <sup>2</sup> Nem sota ira Hodiyo ja eg memati, apil mowan i shaka isodsodsod so nonta toon aliwen Hodiyo pangkep so nen Pablo tan si Bernabe, pati sota ira badon emati, jet nakol ni ngimaaw ngo may dekna nonta ira aliwen Hodiyo son si-kara. <sup>3</sup> Jet sota ira apostol, nan-iyen ired man ni ebayag ga timpo, jet etoled ira ja mengikowan ni maypangkep so nen Apo Jesucristo. Jet si Apo, tinodongan to ira ja mandeka ni milagro tan kaskasshaaw wa banag, tep sajay i inpasing ton engipa-sas ey podno sota inkowan sha, ey ebadeg i kaasi to so ni totoo. <sup>4</sup> Nem sota too nodtan na ili, nanshowa ira: sota eshom, imonod ira so nonta Hodiyo ja eg emati, ey sota ira eshom mango, imonod ira ngo so nonta ira apostol. <sup>5</sup> Jet sota ira Hodiyo tan aliwen Hodiyo shiman ja eg emati, tan sota ira toray sha, nantotodagan sha ey pedigaten sha shi Pablo ja kespigan sha ira ni bato. <sup>6</sup> Nem idi inamta-an nen Pablo nen Bernabe sotan na planora, namtik ira, jet dimaw ira shi Listra, asan shi Dirbi ja sakop ni Likonia, jet dimaw ira pay shima dogad ja nayses nodtan. <sup>7</sup> Jet intoro shed man sota mapteng nga shamag pangkep so nen Jesus.

*Waray dingkaren milagro shi Listra, ja paganon siyodad*

<sup>8</sup> Jet nonta wara ired Listra, waray toon emantetongaw ja epilay ya sigod nonta inkaw-anak to,

jet sajay ya too, eg maka-akad. <sup>9</sup> Sajay ya toon epilay, wara nodtan na nanteneng ni pan-ikowan nen Pablo. Jet si Pablo, intelkel to iyay ya pasiya, jet idi indasin to ey kepati-a niyay i panakabalin nen Apo Shiyos ja pemapteng son si-kato, <sup>10</sup> kimeljaw si Pablo ja kowan to ey, “Dayat ka!”

Jet sajay ya too, dimayat ta shagos et nan-akad ma!

<sup>11</sup> Idi on-an ira nonta too iyay ya edaga, kimeljaw ira ja kowan sha shi esel shen i-Likonia ey, “Dimespag ali iray shiyos son si-katejo, ja nanbalin ni inges tayon too!” <sup>12</sup> Jet si Bernabe, kowan sha ey si-kato konos Zeus ja sakey ya shiyos sha, jet si Pablo, kowan sha ngo ey si-kato konos Hermes, ja shiyos sha met laeng tep si-kato ni olay i emepangdon man-a-sel. <sup>13</sup> Sota timplon shaka panshedjawi so nonta shiyos shen si Zeus, wara nodta sakepan ni ili, jet sota parin emansilbi nodtan na timplo, engala ni baka tan sabsabong ja indaw to nodta sakepan ni ili, ta piyan shen emin ja idaton iyay son Pablo nen Bernabe.

<sup>14</sup> Nem idi amta-an iren ja apostol sota kowan ira nonta totoo ey dag-en sha, pini-pi-kat shen shorog i baro sha ta eg sha koston sajay i dag-en ira nonta totoo. Kinano-an shen sha inapol sota totoo, jet kimeljaw ira ja kowan sha ey, <sup>15</sup> “Apay nga satan i pesing jo son si-kami? Si-kami, too kami bengat ja inges jo! Say dinawan mi alid jay, mi ikowan son si-kayo i mapteng nga shamag ja edapo so ni podnon Shiyos, say ibi-jag jon manshedjaw so niya enshiy silbi ton sheshijos jo, tan say amta-an joy podnon Shiyos ja sibibiyag. Si-katoy pimalsowa so ni dangit, dobong, baybay, tan sota emin na wara so iren jay. <sup>16</sup> Nonta bayag da, binaybay-an to ira sota toon aliwen Hodiyo

ja angken ngantoy dag-en sha.  
<sup>17</sup> Nem angken binaybay-an to ira, wára mangoy amta-an so ni too ni kina-Shiyos to. Isonga mapteng i dingdingka to son si-kayo: inpan-oran to ali shi dangit, jet sinibogan toy molejo; isonga engapit kayo ma ni kosto, wára may kenen jo, tan kayoka eman-imdeng ma ja pasiya.” Kowan nen Pablo.

<sup>18</sup> Sajay iren too, ireka memasig ey itoloy sha sotan na pengileton sha ni baka tan sabsabong son si-kara, nem kabol nonta inkowan da nen Pablo, na-adok ira, jet eg sha ma intoloy.

<sup>19</sup> Nem nontan met laeng, waray Hodiyo ja eg emati, ja edapod Antiok, tan edapod Ikoniom. Sajay iren too, apil i insodsod sha so nonta ira totoon i-Listra pangkep son Pablo nen Bernabe, jet sinogsogan sha sota totood Listra ey bono-en sha kono si Pablo ja kespigan sha ni bato. Jet kinespigan sha nga agpayso, asan shaka ibo-day nodta siyodad et kowan sha emo ey etey. <sup>20</sup> Nem idi dimaw ira di sota kait nen Pablo ja emati, inedibongbongan sha, jet bimangon si Pablo. Dimaw mowan nodta siyodad jet idi maykadwen akew, dimaw si Pablo nen Bernabe shi Dirbi. <sup>21</sup> Inkowan shay mapteng nga shamag pangkep so nen Jesucristo nodtan na siyodad jet eshakil i emati. Jet say inpasing sha, nay-oli ired Listra, shi Ikoniom, asan shi Antiok da. <sup>22</sup> Jet tinokon sha ira nin sota emati nodtan na dogad ja shinshindan sha, say onkedsang i pamatira. Inkowan sha pay son si-kara ey, “Karejo ibi-bi-jag i pamatiyo angken ngantoy dag-en ni apil la too son si-kayo; nemnem jo ey si-katejon maydakam shi pantoshayan nen Apo Shiyos ket kenshat ta manda-kam kito ni digat.”

<sup>23</sup> Jet nontan ma, waray shino-

tokan ira nonta apostol ja mengipangolo so nonta emati shi emin na dogad ja dinawan sha. Say inpasing sha ni olay ni inshotok sha so nonta mengipangolo, inbiyang sha nin i pangan sha, tan inshawatan sha ira, asan shaka ikowan ey, “Maka-amta ma si Apo Jesus ja manbantay son si-kayo, ta si-katoy joka pati-a.”

<sup>24</sup> Idi indekjas sha sotan iren dogad, intoloy shen dimaw ja nanshalan ired Pisidia, jet mimotok ira shi Pampilia. <sup>25</sup> Jet nontan shima sakop ni Pampilia ja Pirga, intoro shay mapteng nga shamag ja maypangkep so nen Jesus, asan ireka edaw shi Atalia. <sup>26</sup> Jet manshokid man, nandogan ired barko ja imolid Antiok, ja edapan sha nonta pilmiro, ta sota emati man, si-karay engibetkag son si-kara nontan. Inshawatan sha pay sota ira apostol nontan ey si Apo Shiyos, eg to koma ira baybay-an ni shaka pan-eka-ekad, no diket todongan to et koma ira nonta obdara. Jet niman men kinsheng sha, nay-oli ired Antiok.

<sup>27</sup> Idi mimotok ira, inolnong shen emin ira sota emati man et inkowan sha son si-kara sota dingdingka nen Apo Shiyos son si-kara nonta maramen shaka pantongpala sota obden inpiyal nen Apo Shiyos son si-kara; kowan sha ey si-katoy engipedobos ni pantoshora so nonta ira aliwen Hodiyo say memati ira ngo. <sup>28</sup> Jet sota ira apostol, eki-iyen ira ni ebayag shi Antiok so nonta emati.

## 15

*Sota inpan-a-aspol ni pangolo ni emati shi Jerusalem*

<sup>1</sup> Nem nontan, waray daleki ja edapod Jodia ja dimaw shi Antiok, jet say kowan sha so nonta ira emati man ja aliwen Hodiyo, kowan sha ey eg mebedin kono ja maysedekan ira, no eg sha onoren

sota sigod ja ogadi ni Hodiyo  
 ja tinewid sha so nen Moises, ja  
 kowan sha ey kogit. <sup>2</sup> Jet si Pablo  
 nen Bernabe, asdeg ton ekisong-  
 bat ira so niya ira toon edapod  
 Jodia pangkep ni sajay ya banag.  
 Jet nontan ma, sota ematid An-  
 tiok, ninemnem sha ey mapteng  
 emo no ibetkag shes Bernabe nen  
 Pablo ja ondaw shi Jerusalem ja  
 en mekitbal so nonta ira sigod  
 ja apostol shiman, tan mekitbal  
 so nonta ira pangolo ni ematid  
 Jerusalem, ni maypangkep nontan  
 na inkowan ni edapod Jodia. Asan  
 wara pay i eshom ja pinidiren kait  
 sha ja mekidaw son si-kara.

<sup>3</sup> Sajay iren inbetkag sha, nan-  
 shalan ira shi Ponisia, tan shima  
 Samaria, jet inistoriyara so ni to-  
 tood man i inpamati ira nonta  
 toon aliwen Hodiyo son Cristo.  
 Idi intenengan sha iyay, ebadeg i  
 imdeng ira nonta a-aki shi pamati  
 ja wara nodtan na dogad. <sup>4</sup> Jet  
 idi mimotok ma ira shi Jerusalem,  
 ebadeg i imdeng ira ngo nonta  
 emati, pati sota ira apostol, tan  
 sota ira pangolo ni ematid man.  
 Jet si Pablo nen Bernabe, inistori-  
 yaren emin i intolong nen Apo  
 Shiyos son si-kara.

<sup>5</sup> Nem sota eshom ma emati  
 ja Parisiyo met laeng, dimayat  
 ira ja kowan sha ey, "Mesepol la  
 saja ira badon emati ja aliwen  
 Hodiyo, pilit ja onoren sha sota  
 ogadi tayon kogit, asan mesepol  
 la metod-an iren mengonod nonta  
 dinteng nen Moises."

<sup>6</sup> Isonga sota ira apostol tan  
 pangolo ni emati, na-olnong ira ja  
 nantatabalan sha iyay ya banag.  
<sup>7</sup> Jet sota kowan ni eshom ey pilit  
 i pengonod ni ogadi ni Hodiyo,  
 asdeg ton nansosongbatan sha.

Idi ebayag malen ireka man-  
 sosongbat, dimayat si Pedro, jet  
 inkowan to son si-kara ey, "A-akik  
 shi pamati, amtayo met ey nonta  
 epangdon akew da, si-kak i pinidi

nen Apo Shiyos ja mengikowan ni  
 mapteng nga shamag pangkep son  
 Jesus so ni toon aliwen Hodiyo,  
 say amta-an sha, tan say memati  
 ira ngo. <sup>8</sup> Jet si Apo Shiyos ja  
 maka-amta ni nemnem ni too, si-  
 kato met laeng i engipa-sas son si-  
 katejo ey inewat toy toon aliwen  
 Hodiyo, ta inpan-iyen to i Ispirito  
 Santo to son si-kara, ja inges toy  
 inpasing to son si-katejo nonta  
 pilmiro. <sup>9</sup> Siya, nan-i-inges i toka  
 pesing so ni Hodiyo tan aliwen  
 Hodiyo: pinekawan toy basol  
 sha nonta emati ira son Cristo,  
 ja inges toy inpamakaan to son  
 si-katejo. <sup>10</sup> Jet niman, apay  
 nga eg jo pati-en iyay ya inpa-  
 sas nen Apo Shiyos son si-katejo?  
 Apay, say piyan jo, piditen jo  
 ira sota toon aliwen Hodiyo ja  
 mengonod ni sigod ja bilin nen  
 Moises nonta bayag da, angken  
 eg sha kabaalan? Sota appo tayo  
 da, tan angken si-katejo ngo, eg  
 tayo baalan na onoren na emin  
 sota kowan ni bilin. <sup>11</sup> Nem say  
 tayoka pati-a, maysedakan kito  
 ta kinaasi-an shakito nen Apo  
 Jesus, jet angken sota ira aliwen  
 Hodiyo, inges to met laeng nga  
 sotan i kaysedakan sha." Sajay i  
 inkowan nen Pedro.

<sup>12</sup> Jet sota ira totoo, imeket ira  
 ma, jet si Bernabe nen Pablo,  
 naysa-dat ira so nen Pedro ja nan-  
 esel. Jet sota totoo, siningpet shay  
 teneng nonta inistoriyara, ja mi-  
 lagro tan eshom ma kaskasshaaw  
 wa dingka nen Apo Shiyos nonta  
 nantoro ired ma paganon dogad ja  
 kad-an ni toon aliwen Hodiyo.

<sup>13</sup> Jet idi naksheng iren nan-esel,  
 naysa-dat ngos Santiago ja nan-  
 esel. Kowan to ey, "A-akik shi  
 pamati, nemnem jo kari iyay. <sup>14</sup> Si  
 Simon Pedro, inkowan to la nonta  
 ekay i inpasing nen Apo Shiyos  
 ja emili ni toon aliwen Hodiyo  
 nonta pilmiro ja manbedin ira ni  
 too to. <sup>15</sup> Sajay i ketongpalan

nonta inkowan ni para padto ja naysolat nonta bayag da, ja esel nen Apo Shiyos met laeng, ja kowan to ey,

<sup>16</sup> ‘No meksheng iyay ya banag, on-oli-ak ali, jet bengonen ko sota epilshi ja ili nen Ari David nontan da; i-olik sota esharal jet ita-shel ko mowan.

<sup>17</sup> Say sota toon aliwēn Hodiyoj ja took ma, masi-met iren pasiya ja mengamta son si-kak.’

<sup>18</sup> “Sajay, inpa-amta nen Apo Shiyos nonta bayag da; <sup>19</sup> isonga, say kowan ko, aliwēn tayo ipilit i piyan tayo so nonta ira toon aliwēn Hodiyoj ja emati, ono so nonta ira memati ali son Apo Shiyos. <sup>20</sup> Nem say isolat tayo et mango bengat son si-kara, ibilin tayo ey eg ira mengan nonta apag ni animal ja naydaton shi sinan shiyos, ta ensekig tayon Hodiyoj sotan, tan eg ira pay mengan ni animal ja epososan, ono mengan ni shala; tan isolat tayo pay ey eg ira memii ono mekileki. <sup>21</sup> Ta sota bilin ja inpatewid nen Moises son si-katejon Hodiyoj, sigod ja emaybasbasa no akew wa ngilin tayon Hodiyoj shi emin na sanopan tayod ka-ili-ili. Jet no eg onoren ni toon aliwēn Hodiyoj iyay ja inkowan ko la, kenshat ta ngaaw i dekna ira nonta Hodiyoj ja kait shen emati son Cristo.” Kowan nen Santiago.

*Sota kowan nonta solat ja ondaw so nonta ira emati ja aliwēn Hodiyoj*

<sup>22</sup> Jet nontan ma, sota ira apostol, tan sota ira pangolo ni emati, tan sota ira emin na esa-nop nontan, emili ira ni ibetkag shen ondaw shi Antiok, ja meki-odop so nen Pablo nen Bernabe. Say pinidira ja mekidaw, si Judas ja Barsabas i sakey ya ngaran to, tan si Silas, ta si-karay sakey ya pangolo nonta ira emati shi

Jerusalem. <sup>23</sup> Jet waray inpawit ni ematid Jerusalem ja solat para so ni kait shen emati ja aliwēn Hodiyoj. Say naysolat nodtan, kowan to ey, “Si-kamin apostol, tan pangolo ni emati shiya Jerusalem, si-kamiy engisodat niyay son si-kayon a-aki mi shi pamati ja aliwēn Hodiyoj shita Antiok, Siria, tan Silisia. Jet sapay koma ta mapteng kayon emin shitan. <sup>24</sup> Say kabol la nansolatan mi son si-kayo, waray shinemag mi ja toon emengikan ni kepanshowashowa-i ni nemnem jo. Edapo ired ja kad-an mi nem inba-ngat sha sota inkowan sha son si-kayo; enshiy mi inbilin son si-kara ey sajay i dag-en sha. <sup>25</sup> Isonga si-kamin esa-nop shiyay, ninemnem mi ey mapteng no memidi kami ni ibetkag mi son si-kayo, ja meki-odop son Bernabe nen Pablo ja epateg ga a-aki tayod pamati. <sup>26</sup> Sajay ira noman na too, na-anos iren mansilbi son Apo Jesucristo, ja shaka pan-iposta i biyag sha no sina-shom. <sup>27</sup> Say pinidi mi ja meki-odop son si-kara, si Judas nen Silas, jet si-karay mengikowan na mismo niya insolat mi met laeng son si-kayo. <sup>28</sup> Nantatabalan mi sota inba-ngat nonta edapod jay den inkowan jet singa mapteng so ni Ispirito Santo nen Apo Shiyos, tan kasta met son si-kami, ey enshiy eshom ma mi ibilin son si-kayo nem eg saja epateg bengat; eg mikejo piditen na mengonod ni ogadi min emin. <sup>29</sup> Jet say ikowan mi bengat son si-kayo, karejo kenen i apag ni animal ja naydaton shi sinan shiyos, karejo kenen i shala, karejo kenen i apag ni animal la epososan, tan karekayo memii ono mekileki. No sajay ya inkowan mi ket pati-en jo, mapteng i panpa-no-an jo; eg shakejo bedawen ni kait min Hodiyoj. Siya, sajay bengat da.”

Sajay i naysolat nodta solat ja dimaw so ni aliwén Hodiyo.

<sup>30</sup> Jet sota ira inbetkag sha, dimaw ira shi Antiok, jet inolnong shen emin ira sota ematid man. In-awat sha son si-kara sota solat, <sup>31</sup> jet idi binasara sota solat, ebadeg i imdeng sha so nonta naysolat ja togon. <sup>32</sup> Jet si Judas tan si Silas, ja edaing nga mengitosho ni inpa-amta nen Apo Shiyos son si-kara, eshakel i inkowan sha so nonta ira emati ja pansigshan sha. Jet mas kimesang i pamatira nonta intenen-gan sha. <sup>33</sup> Jet nontan ma, si Silas nen Judas, nan-iyan nin ira ded man. Jet idi naksheng iyay, sota ira emati nodtan na dogad, inkowan sha ey angken on-oli ma ira shi Jerusalem so nonta ira engibetkag son si-kara, ja kowan sha ni shawat sha ey, “Sapay koma ta mapteng i pan-ekad jon on-oli.” <sup>34</sup> Nem si Silas, ninemnem to ey mapteng no mebay-an ja eg ontoloy shi Jerusalem.

<sup>35</sup> Si Pablo nen Bernabe, ebay-an ngo ira shi Antiok, jet intoro shay esel nen Apo Jesus shiman, jet waray eshom ma kait shen engitosho.

*Si Pablo nen Bernabe, nansi-jan ira*

<sup>36</sup> Idi waray edabas sa pigen akew, kowan nen Pablo so nen Bernabe ey, “Eti, ondaw kita, ta asen ira sota a-aki ta shi pamati, shi emin na dogad ja engitosho-an ta nontan ni esel nen Apo Shiyos, no kas-ano da ira.”

<sup>37</sup> Timolok si Bernabe, nem piyan ton odopen sha si Juan ja manngeshan met laeng ni Marcos.

<sup>38</sup> Nem si Pablo, ninemnem to ey aliwén mapteng i i-olop sha so nen Juan, ta nonta wara ired Pampilia nontan, eg intoloy nen Juan ja ekidaw son si-kara, ja ontolong nontan na obda. <sup>39</sup> Jet nontan ma, asdeg ton sajay i eg pan-

inawatan nen Pablo nen Bernabe, jet say nantongpalan to, nansi-jan ma ira. Si Bernabe, inodop tos Marcos, jet nandogan ired barko ja dimaw ired Cyprus. <sup>40</sup> Nem si Pablo, pinidi tos Silas ngo, jet sota ira a-aki shi pamati, si-karay engibetkag son si-kara, ja kowan sha ey, “Si Apo Shiyos i maka-amta ja mengi-kan ni kaasi to son si-kayo.” <sup>41</sup> Jet si Pablo nen Silas, dimaw ira, ja nanshalan shi Siria tan shi Silisia, ja en engitosho so nonta ira emin na ematid man, say mas pay onkedsang i pamatira.

## 16

*Pinidi ngo nen Pablo si Timoteo ja mekidaw son si-kato*

<sup>1</sup> Si Pablo, dimaw shi Dirbi, asan shi Listra. Jet shi Listra, waray simbi ton daki ja emati son Cristo ja anak ni biin Hodiyo ja emati met laeng son Cristo, nem say ama niyay, aliwén Hodiyo. Jet say ngaran niyay ya anak sha, si Timoteo. <sup>2</sup> Saja si Timoteo, emin ira sota emati shi Listra tan shi Ikoniom, enshiy shaka bedawa son si-kato. <sup>3</sup> Jet si Pablo, piyan ton odopen si Timoteo shi dawdawan to, isonga kinokit to. Say dingka-an to so niyay, say eg bedawen ira nonta Hodiyo nodta dogad ja dawdawan sha, tep am-tara ey aliwén Hodiyo i ameto. <sup>4</sup> Jet emin sota dogad ja nanshandan sha ja kawad-an ni emati, inkowan sha son si-kara sota nantotodagan ira nonta apostol tan pangolo ni emati shi Jerusalem ja maypangkep ni parit ta dag-en ni aliwén Hodiyo ja memati, jet kowan sha ey sotan may pilit ta onoren sha. <sup>5</sup> Jet nontan ma, sota ira emati nodta dinawdawan sha, kimesang i pamatira, jet inakew wa waray emankai-shom son si-kara ja memati.



*Waray kinokokip nen Pablo ja i-Masidonia ja emengshaw ni tolong*

<sup>6</sup> Istay ondaw si Pablo shi Asiya, nem eg inpalobos ni Ispirito Santo nen Apo Shiyos ja sha ikowan i esel nen Apo Shiyos shiman; isonga nanshalan ira shi Prigia, tan shi Galasia. <sup>7</sup> Jet idi simbira sota eteg ni Misia tan Galasia, inparas shen ondaw shi Bitinia, nem iso met laeng nga eg inpalobos ira ni Ispirito nen Jesus, ja ondaw ira nodtan. <sup>8</sup> Isonga say inpasing sha ma, nanshalan ired Misia, jet dimaw ired siyodad ni Troas.

<sup>9</sup> Jet idi nonta edabi, waray inpa-sas nen Apo Shiyos son Pablo ja singa kokokip, ey waray dimayat ja toon i-Masidonia, ja kowan to son Pablo ey, "Kaled ja Masidonia, mokami di tolongi."

<sup>10</sup> Idi sajay i inon-an nen Pablo, nansagana kamin shagos ja ondaw shi Masidonia, ta amta mi ey sajay i piyan nen Apo Shiyos ja daw'an mi, ja mi pengitoshon an ni mapteng nga shamag pangkep son Jesus.

*Waray emati ja manngeshan ni Lydia shi Pilipos*

<sup>11</sup> Manipod shi Troas, nandogan kamid barko jet nandiritso kamin dimaw shi Samotras, jet nonta maykadwen akew, simabi kamid Niapolis, <sup>12</sup> jet asan ma shi Pilipos, ja kabalkan na siyodad shi probinsiya ni Masidonia. Sajay ya dogad ja dinawan mi, eshakel i i-Roma ja nanbaley shiman. Nan- iyan kamid man ni pigen akew. <sup>13</sup> Jet nonta akew wa ngilin ni Hodi-yos, bimo-day kamid ma siyodad jet dimaw kamid ma kilig ni pa-dok, ta waray pangkep mi ey wared man i panshewatan son Apo Shiyos. Wara nga agpayso i simbi mi nodtan na bibiin esanop, jet timongaw kamin ekitbal son si-kara. <sup>14</sup> Jet waray sakey ya bii son si-kara ja engitneng

ni inkowan mi, ja say ngaran to, si Lydia. Sajay ya si Lydia, edapod ili ni Tiyatira, ja emanbiyaki ni para kolor ni dopot. Sajay ya bii, aliwen Hodi-yos nem etod-an ja manshedjaw son Apo Shiyos. Nonta emantosho si Pablo, dinewagan nen Apo Jesus i nem-nem nen Lydia say memati. <sup>15</sup> Jet siya, emati ma, pati sota emin na eman- iyan shi baley to, jet ebonjagan iren emin. Idi naksheng ja ebonjagan ira, inewis tokami ja ondaw shi baley to, ja kowan to ey, "No agpayson joka pati-a ey naykaitak ma son si-kayo ja emati so nen Apo Jesus, ondaw kito ngarod shi baley ko, jet angken man- iyan kayod man."

Jet pinidit tokami ja ondaw.

*Naybalod si Pablo nen Silas shi Pilipos*

<sup>16</sup> Idi sakey ya akew, kamika emandaw nodta kilig ni pa-dok ja panshewatan son Apo Shiyos; waray biin baga-en ja engapol son si-kami. Sajay ya bii, waray pimeket ta dimonyo son si-kato; isonga amta ton memedad ni mepesamak ali shi totoo. Sota ira apo to, ebadeg i pilak ka shaka pan-al-a ni toka pemedad. <sup>17</sup> Imon-onod son si-kami, jet inkelkeljaw to ey, "Sajay iren too, si Apo Shiyos ja Kangeto-an i shaka pansilbi-i, jet si-karay mengikowan son si-kayo ni pesing jon maysedakan!"

<sup>18</sup> Jet sajay i toka ikelkeljaw ni pigen akew, ey kaontenetened son si-kami. Jet anongosto ma ey imekdas si Pablo, jet kowan to ey, "Si-kam ma dimonyo! Inbetkag towak nen Jesucristo, isonga ikowan ko son si-kam ey, betik ka so nita bii!"

Jet nontan met laeng nga engikowanan nen Pablo, bimetik ka shagos sota dimonyo ja pimeket so nonta bii.

19 Jet idi inamta-an nonta ira apo nonta biin baga-en ey enshi malay sha panpidakan so nontan na bii, inshel sha si Pablo nen Silas, jet inkoyod sha ja in-ilaw so nonta ira toray ni ili shima plasa. 20 Jet insharom sha ira so nonta ira toray ni ili ja shinotokan ni gobirnod Roma. Jet kowan sha ey, “Sajay iren too, Hodiyyos ira, jet si-karay emengi-kan ni kolo shiya ili tayo. 21 Ireka emengitosho ni apil la ogadi ja emaykontra shi dinteg tayo, ja eg mebedin na onoren ni si-katejon i-Roma.”

22 Jet sota ira eshakil la too, bimonget ira ngo son Pablo nen Silas. Isonga sota ira toray, bini-bi-nik shay baro nen Pablo nen Silas ni indoso sha so, asan shaka ira ma pasepdad. 23 Jet idi enaksheng nga inda-karan sha ira ni baras, indaw sha ira shima badoran jet inbilin sha so nonta apo ni kowadja ey bantayan to iren pasiya. 24 Jet idi inewat nonta apo ni kowadja iyay ya bilin, in-sekep to ira nodta nayda-med ja badoran, jet indipit toy sedira shi showen kiyew ja embel-at.

*Emati sota apo ni kowadja ni badoran*

25 Nem idi shanshanin kawa ni dabi, emanshewat si Pablo nen Silas son Apo Shiyos, tan ireka mankankansiyon pay ni shayaw sha son Apo Shiyos. Jet intengangan nonta eshom ma balod iyay. 26 Jet nontan, bigla ja waray makedsang nga jegjeg, jet sota tokod ira nonta badoran, inkiwed to, jet emin sota sakepan shi badoran, bigla ja nankedokatan. Angken pay sota emin na kolkolong shi takday ira nonta balod, nanka-okas. 27 Jet idi ebangon sota apo ni kowadja, inon-an to ey edo-katan sota sakepan ni badoran, isonga say inpasing to, inokbos toy kumpulan to ja kowan to ey manbono, ta kowan tod

nemnem to ey namtik ira da sota balod. 28 Nem si Pablo, kimeljaw ja kowan to ey, “Kareka manbono! Iyay kamin emin; enshiy namtik!”

29 Jet sota apo ni kowadja, tinawal to sota kait to ja kowan to ey idawan sha ni silew. Jet kinanonan ton simekep nodta kad-an ira ni balod, ja emanbebayedbed ni takot to. Jet nanshomog shi sangan shi Pablo nen Silas. 30 Inboday to ira ja kowan to ey, “Toway pesing kon maysedakan?”

31 Jet kowan sha ni songbat sha son si-kato ey, “Pamati ka son Apo Jesucristo jet maysedakan ka, tan angken sota ira pamiljam.” 32 Jet waray eshom ma inkowan sha son si-kato ja esel nen Apo Shiyos pangkep so nen Apo Jesus, jet inkowan sha ngo iyay so nonta ira eshom ma totoon wared baley to. 33 Jet nontan met laeng nga dabi, sota kowadja ni badoran, inodop to ira sota apostol ja to inodsan sota sogat sha. Idi naksheng sotan na dingka to, nanpabonjag iren emin ja sanpamilja. 34 Indaw to si Pablo nen Silas nodta baley to, jet pinekan to ira. Sajay ya too, ebadeg i imdeng to, pati sota ira pamilja to, ta emati ira son Apo Shiyos.

35 Nem idi nonta ewawa, inkowan ira nonta toray ni Roma so nonta ira polis ey sha ibolos si Pablo nen Silas. 36 Jet sota ira kowadja ni badoran, inkowan sha so nen Pablo nen Silas ey, “Sota ira toray, kowan sha ey mebodok kayo. Ti, daw kayo, nem eka-eket kayo.”

37 Nem si Pablo, say kowan to et son si-kara, kowan to ey, “Sinsepdat shakami met shi karakdan ni too ey enshiy bistigal, ket si-kami, too kamid Roma! Inbalod shakami pay, jet niman say piyan sha, idigod shen pebo-day shakami shiya badoran say enshiy en on-amta so? Eg mebedin! Si-

karay ondaw ali ja en mengibodos son si-kami.”

<sup>38</sup> Sota ira polis, inkowan sha iyay so nonta ira toray, jet idi inamta-an sha ey too gayam ira shi Roma, entakot ira sota toray. <sup>39</sup> Jet dimaw ira ja en nanpasinsiya son Pablo nen Silas, jet si-karay mismon engibodos son Pablo nen Silas shi badoran, jet kinshaw sha ey, “Pangaasiyo, betik kayod jay ya siyudad.”

<sup>40</sup> Jet si Pablo nen Silas, indekjas sha sota badoran jet dimaw ira shi baley nen Lydia. Inon-an shen emin ira sota a-akira shi pamati, jet tinokon sha ira, asan shaka ira ilekjas.

## 17

*Epalikat ira mowan nonta dimaw ired Tisalonika.*

<sup>1</sup> Nanshalan shi Pablo shi Ampipolis, asan shi Apolonia, jet mimotok ira shi Tisalonika, ja kawad-an ni sakey ya sanopan ni Hodiyo. <sup>2</sup> Si Pablo, say ogadi to no akew ja ngilin ni Hodiyo, ondaw shima sanopan ni Hodiyo ja mantosho ni pangkep so nen Jesus, jet say toka osala ni olay, sota inpaisolat nen Apo Shiyos nonta bayag da. Jet tedon domingkon sajay i dingdingka to. <sup>3</sup> Say inpasing to, inbasa to nin son si-kara sota inpaisolat nen Apo Shiyos nonta bayag da, asan toka ilewag ey say naypadto maypangkep so nonta ibetkag ali nen Apo Shiyos ja mengisedakan, kenshat ta pedigaten nin ni totoo asan shaka bono-a, nem manbiyag mowan. Jet intoro to pay ey, “Si Jesus ja inkowan ko son si-kayo, sikato sota naypadto ey ibetkag ali nen Apo Shiyos ja mengisedakan.”

<sup>4</sup> Jet nontan ma, wára iray nawis ja nay-eshom so nen Pablo nen Silas ja emati. Asdeg to son si-karay toon aliwen Hodiyo sa

sigod, ja etod-an ja manshedjaw son Apo Shiyos, tan eshakil pay iray ematin bebaknang nga bibii.

<sup>5</sup> Nem sota ira eshom ma Hodiyo ja eg emati, ireka emepal so nen Pablo nen Silas. Isonga say inpasing sha, engolop ira nonta toon nankekedsel ja bolakbol, asan shaka sa-nopa ira sota eshakil la totoo, jet nandaga ira ni kolo. Dimaw ira shi baley nen Jason, ja makabaley nonta pan-iyand Pablo nen Silas, jet sha kinodo, ta piyan shen ibo-day si Pablo nen Silas jet olay to ngoy pesing nonta totoo son si-kara.

<sup>6</sup> Nem idi eg sha simpol si Pablo nen Silas, si Jason i sinodngan shen inbo-day, pati sota ira eshom ma emati nodtan na baley, jet inkoyod sha iren inparang so nonta ira toray, ja kowan sha ey, “Sajay iren too ket ireka emengikan ni kolo shi emin na dogad, jet iyay ira di shiya ili tayo!” <sup>7</sup> Si iya Jason, inpan-yan to ira ja kait to shi baley to. Emin ira jay ya too, nay-eshom ira ja emaykontra ni olay shi dinteg ni ari tayod Roma. Tan say shaka itoro pay, waray apil la ari ja si Jesus i ngaran to.”

<sup>8</sup> Jet sota totoo, tan sota ira toray, idi intenengan sha iyay, ngaaw wa pasiya i nemnem sha. <sup>9</sup> Jet say inpasing sha son Jason tan sota kait to, inkowan sha ey mesepol i piyansa asan shaka ira ibodos.

*Eshakil iray emati shi Biria*

<sup>10</sup> Jet idi edabi, sota ira a-aki shi pamati shi Tisalonika, inkowan sha ey angken idekjas nen Pablo nen Silas ira ja angken ondaw ired Biria. Jet idi mimotok ired man, dimaw ira shima baley ya sanopan ni Hodiyo. <sup>11</sup> Sota ira Hodiyo shiman na dogad, mapteng i ogadira ey say sota ira Hodiyo shima Tisalonika. Ta sajay ira, pipiyan shen itenengan

sota toro nen Pablo nen Silas, ta piyan shen ewatan na pasiya. Inakew ja shaka singpeten basbasa-sota inpaisolat nen Apo Shiyos nonta bayag da, ta piyan shen amta-an no agpayso sota intoro nen Pablo nen Silas. <sup>12</sup> Jet nontan ma, say nanbanagan to, eshakil iray Hodiyo ja emati son Cristo, pati pay sota ira dalekin aliwen Hodiyo, tan eshakil ngoy bibiin bebaknang, ja aliwen Hodiyo.

<sup>13</sup> Nem sota ira Hodiyo shi Tisalonika, ja eg emati, idi inamta-an sha ey wares Pablo shi Biri ja emengitosho ni esel nen Apo Shiyos shiman, dimaw ira di ja mengewis ni totoo nodtan ja onkontra son Pablo. <sup>14</sup> Nem sota ira emati nodtan na dogad, inkowan shen shagos son Pablo ey onbetik koma shima baybay ja en mandokan shi barko. Jet si Silas tan si Timoteo, si-karay ebay-an. <sup>15</sup> Jet sota toon engitodod so nen Pablo, ekidaw ira ingkatod Atinas. Sajay iren engitodod, idi imoli ira shi edapo-an sha, inkowan sha sota inilin nen Pablo son si-kara, ey ontened ja shagos kono shi Silas nen Timoteo son si-kato.

*Sota inpantoro nen Pablo shi Atinas*

<sup>16</sup> Jet si Pablo, singked to shi Silas nen Timoteo shi Atinas, jet nonta toka pansessesked, inon-an to ey sajay ya dogad ket eshakil i dingkara ja sinan shiyos sha, isonga ngaaw ma i dekna to. <sup>17</sup> Jet nontan ma, ekisongbat si Pablo so nonta ira Hodiyo shima baley ya sa-nopan sha tan so nonta ira aliwen Hodiyo ja etod-an ja manshedjaw son Apo Shiyos. Dimaw pay shima dako-an, jet angken pay sota toon simbi tod man, ekisongbat son si-kara. Jet inakew wa sajay i dingdingka to.

<sup>18</sup> Idi sakey ya akew, waray engitneng ni toro nen Pablo ja

totoon imonod so ni toro da nen Ipikorios, tan sota eshom ma toon imonod so ni toro nen Sino. Jet kowan sha ey, "Enshi met i olog ni toka ikokowan." Jet sota ira eshom, kowan sha ey, "Singa say toka pan-itoro ket sota pamati ni tood arawin dogad." (Sajay i inkowan sha tep say inkowan nen Pablo, sota maypangkep so nen Jesus, ey etey, nem nanbiyag mowan.) <sup>19</sup> Jet sajay ira, say inpasing sha, inodop sha si Pablo shima shontog ja kowan sha ey Ariopago, ja sa-nopan ira niyay ya too, jet shiman, kowan sha son si-kato ey, "Niman, piyan min amta-en ita badon torom, ja moka pan-itoro, <sup>20</sup> ta bado itan na intenen-gan mi; isonga piyan min amta-en i olog to." Kowan sha. <sup>21</sup> (Sota ira tood ma Atinas, tan sota ira toon wared man ja edapod eshom ma dogad, say pipiyan sha ni olay, sota pekikitbal shi eshom, agdalo no waray badon itenengan sha.)

<sup>22</sup> Isonga si Pablo, dimayat nodta sa-nopan shi Ariopago, jet nan-esel ja kowan to ey, "Si-kayon daleki ja i-Atinas, naka asa ey epateg ga pasiya son si-kayo sota rilihyon jo. <sup>23</sup> Ta nampasiyalak shiya ili jo, jet waray inon-an kon kalkalasin shiyos jo ja joka panshedjawi. Nem waray sakey ya inon-an ko ja joka panshedjawi ja waray naysolat ja kowan to ey, 'Para so nonta shiyos ja eg amta.' No kasta ngarod, sota shiyos jo ja joka panshedjawi, ja kowan jo ey eg jo amta, sotan i piyan kon idawag son si-kayo, say amta-en jo. <sup>24</sup> Saja Shiyos ja ikowan ko son si-kayo, si-kato i Apo ni dangit tan dobong, jet si-kato si Apo Shiyos. Si-katoy Apo ni emin; isonga eg mebedin na man-iyen shi timplo ja dingka ni too. <sup>25</sup> Si Apo Shiyos, enshiy mesepol tod too, ono eg to mesepol i tolong ni too, ta si-katoy mismon engi-

kan ni biyag ni too tan emin na wára son si-kara, isonga ireka emanjasjas. <sup>26</sup> Say edapo-an ni emin na too, sakey bengat — sota pinalsowa nen Apo Shiyos, ja ebonat, jet si-kara iya naywáris shi intiron dobong. Jet si Apo Shiyos i engigsheng ni pan-iyanan sha tan timpora. <sup>27</sup> Sajay i dingka to, say kowan to ey balang nem amta-an ni emin na totoo si-kato ni shaka pemasigin menginem-nemnem son si-kato. Nem eg jo koma ipangkep ey edigat ta ma-amta-an si Apo Shiyos, <sup>28</sup> ta mismon si-katoy emengajowan son si-katejo ni emin na tayoka dagdaga ono tayoka nemnemnema ni timpon tayoka panbiyag. Sajay met laeng i inkowan ni sakey ya kait jon nan-ashal nonta bayag da, ja kowan to ey, ‘Si-katejo, anak shakito ni shiyos.’ Kowan to. <sup>29</sup> Niman ngarod ta annak shakito nen Apo Shiyos, aliwén tayo koma ipangkep ey si Apo Shiyos ket wáray kay-ingesan to nodta sinan shiyos jon balitok, palata, ono bato, ja mebedin na emagen ono arti-an ni toon edaing. Enshi, aliwén sotan. <sup>30</sup> Si Apo Shiyos, pinedabas ton binaybay-an sota apil la dingdingka ni too nontan, ja eg sha amtay panshedjawan sha. Nem niman, say kowan to, mesepol la emin na too ket manbebawi ira et memati ma ira son si-kato. <sup>31</sup> Si Apo Shiyos, shinotokan to sota sakey ya too ja si Jesus, jet si-katoy maka-amten mengigsheng ni koston panbenagan ni tood ja dobong ingkatod ingka, jet wáray akew ja inkesheng nen Apo Shiyos ja ketongpal to ali. Si Apo Shiyos, inpanbiyag to si Jesus shi patey; isonga amta ni emin na too ey agpayson si Jesus i shinotokan to.” Kowan nen Pablo.

<sup>32</sup> Idi intenengan sha iyay ya inkowan nen Pablo, ja maypangkep nonta panbiyag mowan

ni toon etey, sota eshom, nanesdan sha ni ngaaw, nem sota ira eshom, timekem ira, ja piyan sha pay mowan ja itenengan sota inkowan to la.

<sup>33</sup> Sotan ma ey idekjas nen Pablo ira. <sup>34</sup> Nem sota ira eshom ma too, imonod ira son si-kato, jet emati ira son Cristo. Say sakey so nonta ira na-awis sa memati ket si Dionisio, ja mimbrow nodta sanopan shi Ariopago, tan wára pay i bii ja si Damaris i ngaran to, tan wára pay i eshom.

## 18

*Nantoro si Pablo shi Korinto, nem inokes ni eshom*

<sup>1</sup> Idi naksheng nga nantoro si Pablo shi Atinas, dimaw shi Korinto. <sup>2</sup> Jet wáray inaspol tod man na Hodiyo ja dakin manngeshan ni Akila ja nay-anak shi Ponto. Jet si Priscilla i asewa to. Sajay iren san-asewa, ikaydapo sha did Italia, ta si Ari Claudio, inbilin to ey emin na Hodiyo ket idekjas shay Roma. Si Pablo, dimaw ja to ira inon-an. <sup>3</sup> Jet eki-iyán nin si Pablo son si-kara, ta nan-inges sa say obdaren tedo, ireka mengemag ni tolshen pankampoman. <sup>4</sup> Si Pablo nonta wared man, no akew wa ngilin ni Hodiyo, kaondaw shima baley ya sanopan ni Hodiyo ja mantosho son si-kara, jet toka pan-ewisa ira sota Hodiyo tan aliwén Hodiyo ja memati son Jesus.

<sup>5</sup> Idi mimotok si Silas nen Timoteo ja edapod Masidonia, tinopog ma nen Pablo ja mantosho so ira nonta Hodiyo ni maypangkep son Jesus. Sajay i intoro to: si Jesus, si-kato sota naypadton mengisedakan ja ibetkag ali nen Apo Shiyos. <sup>6</sup> Nem sota ira too nodtan, eg sha kosto ja itenengan i kowan nen Pablo, tan ngaaw pay i shaka ikokowan son si-kato. Jet say inpasing ma nen Pablo,

pinokpok to sota depok shi baro to ja si-katoy banshaan son si-kara, jet kowan to ey, “Niman, no shosaken shakejo nen Apo Shiyos, enshiy nak kaybiyangan son si-kayo! Ta eg jo kosto iya naka pan-itoro. Ondawak ma ja en mantosho so ni toon aliwén Hodiyo.” Kowan nen Pablo.

<sup>7</sup> Jet si Pablo, indekjas to ira jet dimaw shi baley nen Tisio Hosto ja nay-askang nodta baley ya sa-nopan ni Hodiyo. Sajay ya too, aliwén Hodiyo nem etod-an na manshedjaw son Apo Shiyos. <sup>8</sup> Si Krispo ja pangolo nodta baley ya sa-nopan ni Hodiyo shiman, emati son Apo Jesus, pati sota ira pamilja to, tan wára pay iray eshakel la i-Korinto ja emati, jet nanpabonjag ira.

<sup>9</sup> Idi sakey ya dabi, wáray inpasas nen Apo Shiyos son Pablo ja singa kokokip, ja kowan nen Apo Jesus ey, “Kareka ontakot Pablo, tan karam ibi-jag ja mengitoshon ni maypangkep son si-kak shiyay ya dogad. <sup>10</sup> Ta wára-ak ja maykadwa son si-kam; enshid jay i mengan-ano son si-kam, ta shiyay ya ili, eshakel i emati son si-kak.” Kowan nen Jesus.

<sup>11</sup> Jet nontan ma, nan-iyen si Pablo shiman ni makatawen tan enem ma bolan ja emantosho so nonta ira totoo, ni maypangkep ni esel nen Apo Shiyos.

<sup>12</sup> Nontan na timpo naysa-dat si Galion ja gobinarol shi Akaya ja shinotokan ni gobirnod Roma. Jet nontan, sota ira Hodiyo ja eg emati, nantotodag iren pebesolan si Pablo. Singkel sha et insharom shed oskaro, <sup>13</sup> jet kowan sha ni sharom sha ey, “Sajay ya too, si-kato i emengewis ni totoo say apil i pesing shen manshedjaw son Apo Shiyos. Emaykontra shi dinteg min Hodiyo.”

<sup>14</sup> Jet si Pablo, istay ya onsongbat, nem si Galion, imesel, ja

kowan to so nonta ira Hodiyo ey, “No maypangkep ni ngaaw wa aramid i insharoman jo son si-kato, ono wáray basol to, mebedin na itenengan ko ita kowan jo, si-kayon Hodiyo. <sup>15</sup> Nem no sota maypangkep bengat ni esel, ono maypangkep ni ngaranton nay-apilan tod dinteg jo, ja eg jo pan-inawatan, mesepol la si-kayo ngon shorog i ontongtong so; enshiy nak kaybiyangan; aliwén si-kak i en mengigsheng so.”

<sup>16</sup> Jet si Galion, inpabo-day to ira sota totoo nodta naydaem ni oskaro. <sup>17</sup> Nem sota ira too nen Galion ja aliwén Hodiyo, inbangat shay sekel so nen Sostinis ja pangolo ni sa-nopan ni Hodiyo, jet shinengshengpel sha nodta bo-dayan nonta oskaro. Nem si Galion, eg to inkaskaso iyay ya dingkara.

### *Si Pablo, nay-oli shi Antiok*

<sup>18</sup> Si Pablo, nan-iyen nin ni pigen akew shi Korinto. Jet idi naksheng iyay, si Pablo tan si Akila ja san-asewa, indekjas sha sota ira a-aki shi pamati shi Korinto jet nandogan ira shi barko jet dimaw ired Siria. Nem si Pablo nonta wared Sinkria, kinoskosan to may toktok to, ta naksheng nga dingka to sota kari to son Apo Shiyos. <sup>19</sup> Jet idi mimotok ired Ipišo, indekjas to si Priscilla nen Akila. Nem dimaw nin si Pablo, ja sakey to, shima baley ya sa-nopan ira ni Hodiyo et en nantoro so nonta ira Hodiyo. <sup>20</sup> Jet sota ira toon intod-an tod man, shaka pan-ipeked si Pablo no mebedin na mebedjag shiman ja meki-iyen son si-kara. Nem eg to kosto. <sup>21</sup> Say kowan et nen Pablo son si-kara nonta emanda-da-jat, kowan to ey, “No si-katoy piyan nen Apo Shiyos, may-odi-ak ali mowan son si-kayo.” Jet en nandogan shi barko ja indekjas toy Ipišo.

<sup>22</sup> Idi mimotok shi Sisaria, nan-shagas shi Jerusalem, jet to inonan ira sota ematid man, asan ka-edaw shi Antiok. <sup>23</sup> Jet idi wáray pigen akew tod man, indekjas to mowan ira sota ematid Antiok, jet dimaw shi Galasia asan shi Prigia. Inekad ton emin i sakop iren jay ya dogad, ja to introd-an ira sota ematid man, say onkedsang i pamatira.

*Si Apolos, nantoro shi Iviso tan shi Korinto*

<sup>24</sup> Jet nontan, wáray toon Hodiyyos ja manngeshan ni Apolos ja i-Alejandria, ja dimaw shi Iviso. Sajay ya too, asdeg ton matekal la man-a-sel, tan eshakil i amta to ja maypangkep ni esel nen Apo Shiyos ja naysolat. <sup>25</sup> Alisto pay ja mengitosho ni maypangkep son Jesus so ni totoo jet koston emin i intoro to, ta etod-an ni maypangkep so ni pamati son Apo Jesus. Nem say wá-wá-sha ja amta to, sota toro nen Juan nonta timpon toka pemonjag. <sup>26</sup> Shima baley ya sa-nopan ira ni Hodiyyos, etoled ja man-a-sel si Apolos, nem idi intenengan nen Priscilla nen Akila ja san-asewá, inewis shed baley sha jet siningpet shen inkowan son si-kato sota eg to amta maypangkep ni pengisedakan nen Apo Shiyos.

<sup>27</sup> Nontan ma, si Apolos, ninem-nem to ja ondaw shi Akaya. Idi inamta-an nonta ira a-aki shi pamati shi Iviso, kowan sha ey, “Siya, mapteng itan na planom.” Jet nansolat ira so nonta kait shen emati shi Akaya, ja kowan sha ey, “Iyay da si Apolos son si-kayo. Jet no onmotok da, awat jo.”

Jet idi mimotok si Apolos shi Akaya, ebadeg i intolong to so nonta ira ematid man ja kinaasi-an nen Apo Shiyos. <sup>28</sup> Sota ira Hodiyyos shiman ja eg emati, eg sha posi-en si Apolos ja song-batan. Angken shima sango-an

ira ni totoo, toka itoro ey si Jesus, si-katoy tinoshong nonta padto nonta bayag da ey mengisedakan ja ibetkag ali nen Apo Shiyos. Jet say inosal nen Apolos ni olay ja engitosho, sota inpaisolat nen Apo Shiyos nonta bayag da.

## 19

*Sota edagdaga nonta wáres Pablo shi Iviso*

<sup>1</sup> Nonta wáres Apolos shi Korinto, nan-akad ngo si Pablo ja edapod Prigia ingkatod Iviso. Jet nonta simabid Iviso, wáray simbi tod man ja eshom ma emati. <sup>2</sup> Jet inbag-an to ira no inewat sha i Ispirito Santo nen Apo Shiyos nonta emati ira. Nem say songbat sha, kowan sha ey, “Ayshi, niman bengat i intenengan mi so nita kowan mo ey Ispirito Santo.”

<sup>3</sup> Jet si Pablo, inbag-an to mowan ira, ja kowan to ey, “Jet ngaranton kalasin bonjag i ebonjagan jo?”

Jet kowan sha ey, “Ebonjagan kami nonta inges ni inpamonjag nen Juan nontan da.”

<sup>4</sup> Jet si Pablo, kowan to son si-kara ey, “Say intoro nen Juan nonta toka pemonjag ni totoo, kowan to ey mesepol la manbebaw i iray totoo ni basol sha. Nem intoro to pay so ni totoo ey mesepol la memati ira nonta maysa-dat ali son si-kato ja si Jesus i ngaran to.”

<sup>5</sup> Idi intenengan sha iyay, napanbonjag ira ja si Apo Jesus ma i toshongen sha ni olay ja pati-en.

<sup>6</sup> Jet si Pablo, insakpal toy takday to son si-kara, jet sota Ispirito Santo nen Apo Shiyos, nan-iyen ma son si-kara, jet nan-esel ira ni ekalkalasin esel ja aliwén sigod ja esel sha, jet wáray inpa-amta nen Apo Shiyos son si-kara ja inpa-amtara ngo shi karakdan. <sup>7</sup> Jet

say kabebalang ira niyay ya too, ondaw wa sampolo tan showa.

<sup>8</sup> Jet nontan, say kedawī nen Pablo ni oneg ni tedon bolan, shima baley ya sa-nopan ira ni Hodiyoṡ jet etoled ja mantosho son si-kara, tan mengi-adok ni maypangkep ni pantoshayan nen Apo Shiyos. <sup>9</sup> Nem sota ira toon maledamsis, eg sha pati-en, tan ngaaw pay i shaka ikokowan so ni karakdan na Hodiyoṡ ja emesa-sa-nop pangkep ni pamati son Jesus. Idi sajay i dingkara, say inpasing ma nen Pablo, inodop to ira sota emati, jet eg ira ma mekisa-sa-nop nodtan na sa-nopan ni Hodiyoṡ. Dimaw ira et shima iskowida-an ni maistoro ja si Tiranos, jet inakew ja nantorod man si Pablo. <sup>10</sup> Showen tawen ja sajay i dingdingka to, jet emin ira sota Hodiyoṡ tan aliwēn Hodiyoṡ ja nanbaley shi probinsiya ni Asiya, inteneng sha may esel nen Apo Shiyos maypangkep so nen Apo Jesus.

<sup>11</sup> Jet si Pablo, eshakil i kaskashaaw wa dingka to ni inpansilbi tod man na dogad, ja enshiy maka-inges so, ta panakabalin nen Apo Shiyos i dimaga so. <sup>12</sup> Jet sota ira totoo, indaw shay towaljara, ono panjora, ja sha inspirat shi bakdang nen Pablo, jet sotan i inpamapteng so nonta ira emanpansekit, tan mimapteng ngo sota ira toon pingketan ni dimonyo.

<sup>13</sup> Jet nontan ngo, wāra ira sota Hodiyoṡ ja eman-eka-ekad, ja say shaka dagdag-a ket sota pebtik so ni dimonyo ja pimeket shi totoo. Jet pineshas shen pebtik sota dimonyon pimeket shi totoo, ja kowan sha ey osalen shay ngaran nen Apo Jesus, ja kowan sha ey, “Ikowan ko son si-kam ma dimonyo ey, kabol ngaran nen Jesus ja kepan-itoro nen Pablo, betik ka so nita too.” <sup>14</sup> Say sakey

ya dimaga so niyay, sota piton annak nen Siba ja apo ni pari ni Hodiyoṡ. <sup>15</sup> Nem nonta pinsak ja inparas shen sajay i pesing sha, sinongbatan nonta dimonyo ira, ja kowan to ey, “Si Jesus, amtak; si Pablo, amtak; nem si-kayo, sipa kayo?” <sup>16</sup> Jet sota toon pingketan ni dimonyo, inosil to ira, jet indakaran to iren emin; enamtik ira ja indekjas sha sota baley ja kawad-an sha. Nankesogat ira, jet angken sota baro sha, nankepi-kat. <sup>17</sup> Jet sota ira emin na Hodiyoṡ tan aliwēn Hodiyoṡ, ja nanbaley shi Ipiso, shinemag sha iyay ya epesemak jet timakot ira. Jet nontan ma, sota ngaran nen Apo Jesus i shaka ma ishayaw.

<sup>18</sup> Angken sota eshom so nonta ira eshakil la emati shi Ipiso, inopdnora ey istay ireka manmantala, nem inbi-jag sha ma, <sup>19</sup> jet sajay ira, ja istay emanmantala, sininop sha ali sota dibshora ja naysolatan ni pesing shen manmantala, jet pinoolan shed sango-an ni karakdan. Kinowintara i banol nontan na dibshon pinoolan sha jet ondaw wa dimen polon dibon palata. <sup>20</sup> Jet nontan ma, sota esel nen Apo Shiyos ja pangkep so nen Apo Jesus, naywāris et eshakil men pasiya i emati so.

*Waray nankolo nonta dimaw si Pablo shi Ipiso*

<sup>21</sup> Idi naksheng sotan na pase-mak, ninemnem nen Pablo ey manshedan shi Masidonia, asan shi Akaya ni idaw tod Jerusalem, tep sotan i inpa-amta ni Ispirito Santo nen Apo Shiyos. Kowan tod nemnem to ey no meksheng nga ondaw shiman, mesepol ngon ondaw shi Roma. <sup>22</sup> Jet si Timoteo, tan si Irasto ja kaontolong son sikato, inbetkag to ira shi Masidonia, jet si Pablo, ebay-an mango nin shi Asiya.



<sup>23</sup> Jet nontan na timpo, wáray totoon kimolo ja eg makakosto ni pamati son Jesus. <sup>24</sup> Say engibalnay niyay ya kolo, si Demetrio ja emenelbit ni palata ja toka emaga ni engkokonting nga sinan timplo nen Artimis ja sinan shiyos sha. Asdeg toy toka idako, jet ebadeg i kanansiya ira nonta toka pandagbo-i. <sup>25</sup> Sajay ya toon para selbit, tinewal ton emin sota toon toka pandagbo-i, tan sota eshom ma kait ton para selbit, jet kowan to son si-kara ey, “Si-kayon kait kon para selbit, amtayo met ey sajay ya obda tayo ket si-katoy tayoka panpidaki. <sup>26</sup> Inon-an jo met tan intenengan jo ey sajay ya si Pablo ket eshakel noman i emati son si-kato. Shaka pati-a noman sota kowan to ey aliwa karin podno sota angken nganton inemag ni si-katejon too ja kowan tayo ey shiyos. Nakol ni eshakel i in-owapan nen Pablo. Jet sajay ya dingka to, aliwen shiya Ipiso bengat, no diket ngannganin emin shiya intiron probinsiya ni Asiya. <sup>27</sup> Sajay, ngaaw emo diy panbenagan to, ta saja obda tayo, ikowan ma ni totoo ey enshiy silbi to. Tan angken sota timplo nonta kakedjangan na shiyos tayo ja si Artimis, enshi malay shayaw to. No eg tayo pesalsheng si Pablo, kenshat ta enshi malay mengiredjaw son Artimis ja kaishayaw ni toon emin shiya Asiya tan shiya emin na sakop ni dobong.” Kowan nen Demetrio.

<sup>28</sup> Idi intenengan sha iyay ya inkowan nen Demetrio, ngaaw malay nemnem sha so nen Pablo, jet kimmeljaw ira ja kowan sha ey, “Si Artimis ja shiyos shiya Ipiso, sikatoy kangeto-an!”

<sup>29</sup> Jet sota ira totoo nodtan na siyodad, kimalaw ira, jet inbangat shen inshel si Gayo nen Aris-tarko, ja emay-od-odop son Pablo,

jet inkoyod sha ira da nodta baley ya boja-an.

<sup>30</sup> Jet si Pablo, piyan ton ondaw nodta kad-an ni eshakel la emankodo, nem sota ira kait ton emati, eg sha pedobosan. <sup>31</sup> Angken sota ira eshom ma kagajem nen Pablo ja opisiyal nodtan na dogad, wáray inbetkag shen en mengikowan ey eg manpa-pa-sas si Pablo nodta boja-an.

<sup>32</sup> Jet sota eshakel la totoo ja esanop ja emankodo, eg sha tongolan i dag-en sha. Nan-i-inapil i panikeljaw ni sakey ton sakey son sikaren emin, ta sota karakdan son si-kara, eg sha amtay kabol la nana-aspolan sha nodtan.

<sup>33</sup> Kowan ira nonta emankodo ey ida-kam sha sota ira Hodiyois ja i-Ipiso; isonga sota ira Hodiyois met laeng shiman, indara si Alejandro ja mengita-shel son si-kara ja onsango so nonta ira totoon emankodo. Jet si Alejandro, sinin-jasan to ira sota totoo ey on-eket ira, ta wáray piyan ton ipalewag. <sup>34</sup> Nem sota totoo, idi indasin sha ey si Alejandro ket Hodiyois, ema-ma et ja kimmelkeljaw ira ni showen oras, ja kowan sha ey, “Si Artimis ja shiyos shiya Ipiso, sikatoy kangeto-an!”

<sup>35</sup> Jet shi ka-onoran, sota pangolo ni ili shi Ipiso, inpatalna to ira sota totoo ja kaonkaniyaw, asan toka ikowan ey, “Si-kayon kait kon i-Ipiso, emin na too, sigod ja amtara ey shiya timplo ni sikatejon i-Ipiso i kawad-an nonta shiyos ja kangeto-an ja si Artimis, tan shiyay pay i kawad-an nonta baton epateg, ja na-kas ja edapo kono alid dangit. <sup>36</sup> Isonga enshiy tayo panshanagan ni ikowan ni eshom ma too ey o-owap kono iya shiyos tayo. Isonga talna kayo et; aliwen jo iba-ngat ja mandeka ni ngaaw. <sup>37</sup> Ta sajay iren too ja inkoyod jo alid jay, aliwen engibot ira shima timplo, ono wáray

inkowan sha ja emaykontra so ni shiyos tayo. <sup>38</sup> No kaspangarigan ey waray riri nen Demetrio, tan sota ira kait ton para selbit, mebedin na mansheshom ira. Waray opisiyal ja menongtong so et sikaray sha pansheshoman. <sup>39</sup> Nem no wara pay i eshom ma sharom jo, mebedin na mebista no timpon penongtong ira nonta toray ni ili. <sup>40</sup> Nem sajay ya dingkayo niman, ebadeg i songbatan tayo no isharon shakito ey si-katejoy kimolo. Ta enshi met i koskoston kabol la edaga-an niyay ya kolo.”

<sup>41</sup> Idi naksheng iyay ya inkowan to, inpabo-day to ira sota totoo nodta baley ja boja-an.

## 20

### *Dimaw si Pablo shi Masidonia tan shi Akaya*

<sup>1</sup> Idi enshi malay kolo, inolnong nen Pablo ira sota kait ton emati, jet tinokon to ira, asan toka ilekjas ira et dimaw shi Masidonia. <sup>2</sup> Shindan toy eshakel la sakop ni Masidonia, jet tinokon to ira sota ematid ma shinshindan to, ni kedsangan ni pamatira, asan ka-edaw shi Akaya. <sup>3</sup> Nan-iyen nin si Pablo shi Akaya ni tedon bolan. Istay nansagana mowan na ondaw shi Siria, nem inamta-an to ey sota ira Hodiyo ja eg emati, ireka emanseskesked nodta barkon pandokanan to ja ngaaw i pangkep sha son si-kato. Isonga ninemnem to ey may-odi ja manshedan shi Masidonia. <sup>4</sup> Say kait to nontan, si Sapatir ja anak nen Piro, ja i-Biria, si Aristarko, si Segundo ja i-Tisalonika, si Gayo ja i-Dirbi, si Timoteo, si Tikiko tan si Tropimo ja showen i-Asiya. <sup>5</sup> Sajay iray epangdo ey say si Pablo shi Troas, jet singked shakamid man. <sup>6</sup> Nem si Pablo, dimaw shi Pilipos jet nandogan kamid man shi barko nonta enaksheng sota piyasta ni

Hodiyo ja shaka pangan ni tinapay ya enshiy daok ton para debag. Idi maykedimen akew, mimotok kamid Troas jet simbi mi ira sota kait min epangdod man. Jet nan-iyen kamin emin shiman ni piton akew.

### *Siningpet nen Pablo i toro shi Troas asan ka-edaw shi Milito*

<sup>7</sup> Idi shimanon ma sota akew ja panshedjaw son Apo Jesus, na-olnong kamin nandilikob ja si-katoy pingenemnem mi son si-kato. Jet si Pablo, ta piyan ton ondajat mowan no mewawa, nan-esel shi sango-an ira nonta totoo, jet inshokey ton nandiskolso ni mama-shem ingkato nonta kawa ni dabi. <sup>8</sup> Say esa-nopan mi, nodta naykayang nga kowadto ni baley, jet eshakel nodtan i silew. <sup>9</sup> Jet nodta esa-nopan mi, waray balodaki ja manggeshan ni Yotiko ja timongaw nodta tawa ey maramen kaon-esa-esel si Pablo. Sajay ya balodaki, emanjo-kew, jet idi na-oyeng, na-kas nodta bo-day da. Jet etey ta say kakedjang nonta baley ya na-kasan to, tedon grado. Et waray en engayat; <sup>10</sup> nem si Pablo, dimaw ja to inakdop sota daki jet kowan to so nonta totoo ey, “Karekayo manshanag; mabiday pay laeng!” <sup>11</sup> Jet si Pablo, nay-oli mowan nodta naykayang ali, jet nandilikob kami nin ja engan, asan ma makitbal son sikara ingkato nonta na-akew ma, asan toka ira ilekjas. <sup>12</sup> Sota balodaki, in-akad sha ja sibibiyag, jet ebadeg ga pasiya i imdeng sha.

<sup>13</sup> Nem si-kami, epangdo kamin nandogan nodta barko ja ondaw shi Ason, ta say kowan nen Pablo, man-a-aspol kamid man. Sajay i inbilin to ey pesing mi, ta si-kato mango, piyan to konon manekad ingkatod Ason. <sup>14</sup> Jet nay-aspol nga agpayso si Pablo son sikami shi Ason, jet indogan mid

barko, jet dimaw kamid Mitilin,<sup>15</sup> asan kamika shemang shi Siyo nonta maykadwen akew. Jet nonta maykadwen akew mowan, nanshalan kamid kilig ni Samos. Jet nonta maykatdon akew, mimotok kamid Milito.<sup>16</sup> Ta si Pablo, ja ondaw shi Ason, ta say kowan nen Pablo, man-a-apol kamid man. Sajay i inbilin to ey pesing mi, ta si-kato mango, piyan to ninemnem ton dabsan i Ipiiso, say eg mebedjag shi sakop ni Asiya, ta piyan ton aboten, no mebedin, sota kaipiyasta-i ni Hodiyoos shi Jerusalem ja kowan sha ey Pintikostis.

*Si Pablo, inkowan to so nonta ira pangolo ni emati shi Ipiiso ey eg on-oli son si-kara*

<sup>17</sup> Si Pablo, nonta wared Milito, engibetkag ni en engolop nonta ira pangolo ni emati shi Ipiiso.<sup>18</sup> Jet idi mimotok ira jay ya inpa-odop nen Pablo, kowan to son si-kara ey, "Si-kayo, amtayo met i itsorak nonta wara-ak son si-kayo, manshoki nonta pilm-iron indaw ko shiya Asiya,<sup>19</sup> ja mansilbi son Apo Jesus. Naka ibaba ni olay i kasesaad kon too. Naka pay emansesaya no sinashom pangkep ni emin na digat ja kepespesing ni Hodiyoos son si-kak.<sup>20</sup> Amtayo met ey inkowan kon emin i panmaptengan jo; enshiy nak inikotan. Nantoro-ak shi karakdan ni too, tan angken shima kebalebaley.<sup>21</sup> Inkowan ko so ni Hodiyoos, tan toon aliwen Hodiyoos, ey manbebawi ira ni basol sha et si Apo Shiyos i toshongen sha, tan inkowan ko son si-kara ey pati-en sha si Jesucristo, ja Apo tayo.<sup>22</sup> Jet niman, kenshat ta ondawak shi Jerusalem ta si-katoy kowan ni Ispirito Santo nen Apo Shiyos son si-kak, jet ekak amta i mepesamak ali son si-kak shiman.<sup>23</sup> Say amtak bengat, sota inpa-amta ni Ispirito Santo nen Apo

Shiyos shi emin na ilin dinawan ko: say toka ikowan ni olay, badoran tan digat i emansessesked son si-kak.<sup>24</sup> Nem si-kak, say biyag ko, ekak ibilang ey epateg ono ebanol son si-kak. Say wared nemnem ko, piyan kon meksheng sota obda ja in-awat nen Apo Jesus son si-kak ja mengitosho ni mapteng nga shamag pangkep ni kaasi nen Apo Shiyos.

<sup>25</sup> "Jet niman, amtak ey si-kayon emin shima dogad iren dinawan ko, ja engitosho-an ko ni may-pangkep ni pantoshayan nen Apo Shiyos, eg jo ma asen i dopak, ta ekak mowan ali ondaw.<sup>26</sup> Isonga niman na akew, ikowan ko son si-kayo, no sipa son si-kayo i eg emati ja shosa-en nen Apo Shiyos, enshiy nak songbatan.<sup>27</sup> Ta enshiy nak inikotan ja ekak inkowan son si-kayo; intorok ka emin sota koston piyan nen Apo Shiyos ja amta-an ni totoo.

<sup>28</sup> "Isonga niman, si-kayon pangolo, asas joy bakdang jo shorog, tan asas jo pay sota ira emati son Apo Jesus ja inpiyal ni Ispirito Santo son si-kayo ja bantayan jo. Singpet joy bantay son si-kara ta kokowa ira nen Apo Shiyos. Nemnem jo ni olay ey kowinta ey binayshan to ira ni shala nonta Anak to ja imayos shi koros.<sup>29</sup> Amtak ey no idekjas takejo ma, wara ali y maysa-dat, ja makedsel, jet peshasen shen kolpi-en say enshiy mebay-an so nonta ira emati ja inpabantay nen Apo Shiyos son si-kayo.<sup>30</sup> Tan wara pay met laeng son si-kayoy maysi-jan ja en mengi-owap ni kait shen emati, say si-kara konoy onoren sha.<sup>31</sup> Isonga asas jo ira jay ya toon maysa-dat ali. Nemnemnem jo sota tedon tawen ja kawashak nontan son si-kayo. Kalebi-an man tan ka-akawan, binanshaanan koy sanseskey son

si-kayo; naka pay emankaisaysay-i no sina-shom.

<sup>32</sup> “Jet niman, ipiyal takejo ma son Apo Shiyos ja si-katoy mengajowan son si-kayo. Ipiyal takejo pay so nonta esel nen Apo Shiyos ja emaytosho ni olay son si-kayo, ta sotan i penemnem so ni kaasi nen Apo Shiyos. No pati-en jo, sotan i mengi-kan ni kedsang ni pamatiyo, tan sotan ma i kebin-disiyanon jo, ja inges toy kepesing nen Apo Shiyos so ni eshom ma too ton pinidi to.

<sup>33</sup> “Enshiy nak kinamkaman ja angken nganto son si-kayo — pilak man ono baro jo. <sup>34</sup> Amtayo met ey saja takday ko shorog ngoy nan-obda ni kasapolan ko, angken pay sota kasapolan ni kait ko. <sup>35</sup> Emin iyay, dingkak say waray onoran jon mapteng nga pesing, ta mesepol la man-obda kitan pasiya, say metodongan i eg maka-obda. Nemnemnem jo sota kowan nen Apo Jesus, ja kowan to ey, ‘Ebadbadeg i imdeng nonta mengi-kan ey say sota mengewat.’”

<sup>36</sup> Idi naksheng den inkowan nen Pablo iyay son si-kara, nantalimokod, jet pati sota totoo, nanshawata ira son Apo Shiyos. <sup>37</sup> Idi naksheng ja nanshawata ira, inakdop shes Pablo tan inongo-an sha pay, ey ireka mannengis sa emin. <sup>38</sup> Ireka mandeshingit ta pasiya nonta inkowan nen Pablo ey eg sha ma asen i dopa to. Jet sotan ma ey sha intolod nodta barko ja pandokanan to.

## 21

*Ondaw ma si Pablo shi Jerusalem*

<sup>1</sup> Nandogan kamid barko et indekjas mi ira. Jet sota nandoganan min barko, nandiritso shima Kos, jet nonta maykadwen akew, simabi kamid Rodas, jet intoloy mi ingkatod mimotok kamid

Patara. <sup>2</sup> Jet waray simbi mid man ja barko ja ondaw shi Ponisia, jet si-katoy nan-etanan min nandoganan. <sup>3</sup> Simabi kami nodta mebedin na mayshedmang i Cyprus, jet nanshalan kamid pesaw ni Cyprus, jet timorong kamid Siria, asan kami sabid Tira. Simalsheng sota barko shi Tira ta waray kalka ja isepa to shiman. <sup>4</sup> Jet inshingan mi ja mi inenap ira sota ematid man jet eki-iyani kami son si-kara ni piton akew. Jet sajay iren emati, inpa-amta ni Ispirito Santo son si-kara ey manda-kam si Pablo ni digat shi Jerusalem; isonga inkowan sha son si-kato ey angken eg ondaw. <sup>5</sup> Jet idi enaksheng sota akew ja pan-iyani mid man, intoloy min ondaw shi dawani mi, jet sota ira emati, pati sota asewara tan annak sha, shakami intolod ingkatod ineshawani mi sota siyodad ni indaw mi nodta kilig ni baybay. Jet nodta kilig ni baybay, nantalimokod kamin emin ja nanshawata son Apo Shiyos, asan kamika mansisinodsod ey ondaw kami mala. <sup>6</sup> Kami nandogan nodta barko ey si-kara, nay-oli ired baley sha ngo.

<sup>7</sup> Jet si-kami, manshokid Tira, intoloy mi jet mimotok kamid Tolimaida. Nonta wara kamid man, dimaw kamid ma kad-an ira nonta emati, ja mi ira inon-an, jet eki-iyani kamid man ni san-akew. <sup>8</sup> Jet nonta ewa-wa ma, indekjas mi ira jet mimotok kamid Sisaria. Idi mimotok kamid man, dimaw kamid baley nen Felipe, ja emengitosho met laeng ni maypangkep son Apo Jesus. Jet nan-iyani kami nin shi baley to. Sajay ya too, si-katoy sakey so nonta ira piton pinidi nonta ira ematid Jerusalem nontan da. <sup>9</sup> Si Felipe, waray potot ton epat ta bibiini para padto ja eg engasewa.

<sup>10</sup> Nonta inpan-iyani mid man ni

pigen akew, waray para padto ja manngeshan ni Agabo ja edapod Jodia. <sup>11</sup> Tokami simbi, jet to inda sota bilko nen Pablo, jet indibed tod takday to shorog, tan sedi to met laeng, jet kowan to ey, “Say kowan ni Ispirito Santo nen Apo Shiyos, sota makabilko niyay, sajay i pesing ira nonta Hodiyo shi Jerusalem son si-kato. Jet i-awat sha pay so nonta ira toon aliwen Hodiyo.”

<sup>12</sup> Idi intenengan mi iyay ya inkowan to, sota totoo man na mi binisita, tan si-kami met laeng, pineshas min inkowan son Pablo ey angken eg to itoloy ya ondaw shi Jerusalem.

<sup>13</sup> Nem si Pablo, say kowan to et, “Ngantoy joka pannengisi? Joka pansekiti et bengat i nemnem ko. Si-kak, aliwen na sota kaybedod ko bengat i emansessesked son si-kak, no diket esagana-ak pay ja angken metey shi Jerusalem, pangkep ni naka pansilbi son Apo Jesus.”

<sup>14</sup> Idi eg ma- adok nonta inkowan mi la, inbi-jag mi ma ja mengadok son si-kato, jet anongosto ma ey inkowan mi son si-kato ey, “Sota piyan nen Apo Jesus, si-katoy metongpal.”

*Inewat shen kosto si Pablo nonta pilmiron mimotok shi Jerusalem*

<sup>15</sup> Idi epospos sota akew wa inpan-yan mi nodtan, nansagana kami jet dima-jat kami ma ja ondaw shi Jerusalem. <sup>16</sup> Jet sota eshom ma i-Sisaria ja emati, shakami intolod shi baley nen Nason ja i-Cyprus ja kowan sha ey shi baley toy pan-iyanan mi. Sajay ya si Nason, sakey so nonta ira sigod ja emati son Jesus.

<sup>17</sup> Jet idi mimotok kamid Jerusalem, sota ira a-aki mi shi pamati, ireka eman-imdeng ja engawat son si-kami. <sup>18</sup> Nonta

maykadwen akew, nan- o- odop kamid Pablo, ja mi inon-an si Santiago. Jet emin ira sota pangolo nonta emati man, wara ira ngo. <sup>19</sup> Idi naksheng nga inkowan nen Pablo ey salamat ta mapteng sota inpan- a- aspol mi, sina-sa-key ton inistoriya ma sota emin na banag ja dingdingka nen Apo Shiyos ja nansigshan nonta ira toon aliwen Hodiyo ni inpansilbi nen Pablo son si-kara.

<sup>20</sup> Jet idi intenengan sha iyay ya inkowan nen Pablo, si Apo Shiyos i nan-iyamanan sha, jet kowan sha son Pablo ey, “Agi, amtam met ey diniboy Hodiyo ja emati son Cristo, nem sota sigod ja bilin na nay-awat son Moises i shaka on-onora pay laeng ja pasiya. <sup>21</sup> Jet shinemag sha ey say torom so nonta ira emin na Hodiyo ja naydaok shima aliwen Hodiyo ja wared nay-arawin dogad, intorom kono ey angken eg sha onoren sota sigod ja bilin nen Moises. Shinemag sha pay ey say torom kono ket angken eg mekokit sota annak sha, ono angken eg sha onoren na pasiya sota ogadi tayon Hodiyo. <sup>22</sup> Jet ngaranto may pesing? Kenshat ta amta-en sha ey wara ka. <sup>23</sup> Isonga no mebedin, onorim iya ikowan mi, say ma-kep ira. Waray epat ta tood jay son si-kami ja maramen shaka pandag-a i kari sha son Apo Shiyos. <sup>24</sup> Kay-eshom ka so ira niyay ya too. Shanshanin meksheng sota kari sha; say aneng bengat, sota ka-onoran na ogadin maybidang ey mengkal ni shaka kebedawi, tan sota pengileton sha ni animal son Apo Shiyos. Si-kam komay onbayad so ni emin na kastos sha, jet no meksheng, mebedin men pekoskos joy toktok jo. No dag-en mo iyay, si-kato may amta-an so ira nonta totoo ey sota shamag pangkep son si-kam,

o-owap kari, ta asen sha met laeng ey si-kam ket moka met onora sota sigod ja bilin nen Moises.<sup>25</sup> Nem no sota maypangkep ni toon aliwén Hodiyoş ja emati, eg mesepol la onoren sha iyay ya ogadi tayo, ta wára met i insolat min para son si-kara ja kowan mi ey eg sha kenen i apag ni animal ja naydaton shi sinan shiyos, eg sha kenen i shala, eg sha kenen i apag ni animal la epososan, tan eg ira pay memii ono mekileki.” Sajay i kowan nen Santiago tan sota ira kait to so nen Pablo.

<sup>26</sup> Jet siya, inowen nen Pablo sota kowan sha jet inodop to ira sota epat ta too. Nonta ewá-wá, dingkara sota ka-onoran na ogadi ja ka-kalan ni shaka kebedawi. Jet idi naksheng sotan, dimaw ma ira shima Timplo, say sha ipa-ama no pigan i kepospos ni kari sha, tep sotan i dag-anan sha so nonta pengileton ni sanseskey son si-kara ni animal.

*Inshel sha si Pablo et istay bono-en sha*

<sup>27</sup> Jet idi shanshanin mepospos sota piton akew ja dag-anan sha so nonta ogadira, sota ira Hodiyoş ja edapod Asiya, inon-an sha si Pablo shima Timplo, jet sinogsogan sha ma ira sota eshakil la too, jet inba-ngat shay eshel so nen Pablo.<sup>28</sup> Kimeljaw ira ja kowan sha ey, “Si-kayon kait min Hodiyoş, tolong kayo! Sajay sota too ja emaneka-ekad shi emin na dogad ja emantosho ni emaykontra son sikejyon Hodiyoş, maykontra shi dinteg tayo, tan emaykontra pay so niyay ya Timplo! Tan wára pay konoy inta-jon ton aliwén Hodiyoş shiya Timplo, jet nakol ni edo-shis ma iyay ya Timplo!”<sup>29</sup> (Sajay i inkowan sha ta inon-an sha ey si Tropimo ja i-Ipiso i kadwá nen Pablo nontan da shima siyodad ni Jerusalem; isonga say pangkep

sha, kowan sha ey inodop nen Pablo sotan na too shima Timplo.)

<sup>30</sup> Jet sota ira totoo nodta siyodad, kimalaw ira, jet bintik sha si Pablo. Inbo-day sha ali nodta Timplo jet indekeb sha shagos sota sakepan nonta Timplo.<sup>31</sup> Kowan sha ey bono-en sha si Pablo, nem inamta-an nonta apo ni solsharo ja i-Roma ey emanngedawngaw i emin na tood Jerusalem,<sup>32</sup> jet say inpasing to, ena-wál shagos ira nonta kapitan to tan solsharo to, jet dimaw iren shagos nodta kad-an ni totoon emankodo. Jet idi inon-an ira nonta totoo ira jay, inbi-jag sha may kabil so nen Pablo.<sup>33</sup> Jet sota apo ni solsharo, dimaw ali jet inelbat to si Pablo, jet inkowan to so nonta solsharo to ey bedoren sha ni showen kolkolong, asan toka ibagi ira sota totoo, ja kowan to ey, “Si-pay ngaran niya joka pankebila? Ngantoy dingka ton engipasingan jon tan?”

<sup>34</sup> Sota ira eshakil la totoo, ireka onkaneljaw, jet nan-inapil i panikeljaw ni sakey tan sakey.

Sota apo ni solsharo, eg to tongolan no ngantoy kabol, ta ireka mannoteng bengat ni keljaw sha jet say inpasing to, inkowan to so nonta solsharo to ey idaw shes Pablo shima kowartil sha.<sup>35</sup> Idi insabi shes Pablo nodta agshan ja ondaw shi kowartil, dini-bit ira nonta solsharo, ta epaladoy kepesing ira nonta totoo son sikato ja emanngedawngaw.<sup>36</sup> Jet sota ira totoo, imonod ira ja ireka onkaneljaw ja kowan sha ey, “Bono jo! Bono jo!”

*Si Pablo, inshingan ton inis-toriya i kaasi nen Apo Shiyos son si-kato*

<sup>37</sup> Idi shanshani ma ja isekep sha si Pablo nodta kowartil sha, inkowan to so nonta apo ni solsharo ey, “Mebedin na wáray ibagak son si-kam?”

Jet sota apo ni solsharo, simongbat ja kowan to ey, “Amtam gayam ma man-a-sel ni Grigo?<sup>38</sup> Kowan ko nem si-kam sota i-Egypt ja engipangdo nonta epat ta dibon tolisan ja nankolo nonta dimabas den timpo asan ireka mamtik ded ma shontog.”

<sup>39</sup> Si Pablo, simongbat ja kowan to ey, “Si-kak, Hodi Yosak; edapok shi Tarso, ja sakop ni Silisia, ja sakey ya kabalkan na siyodad. Too-ak shiman, jet no mebedin, ipedobos mo ja waray ikowan ko so ira nita totoo.”

<sup>40</sup> Sota apo ni solsharo, in-aknan to ni palobos. Dimayat si Pablo nodta agshan et sininjasan to ira sota totoo ey on-eket ira. Idi imeket ira, nan-esel si Pablo ni esel shen Hodi Yos.

## 22

<sup>1</sup> Jet kowan to ey, “A-aki, a-ama, itnengi jo iya idawag ko son si-kayol!”

<sup>2</sup> Idi intenengan sha ey esel ni Hodi Yos gayam i kepan-a-sel nen Pablo, imeket iren pasiya. Jet intoloy to ma ja nan-esel la kowan to ey,

<sup>3</sup> “Si-kak, Hodi Yosak. Nay-anakak shi Tarso ja sakop ni Silisia, nem bima-degak shi Jerusalem, ja iskowida nen Gamaliel. Etod-anak ka pasiya ja mengonod nonta dinteg ni amma tayo da nonta bayag, ta piyan kon pasiya ja onoren i podnon panshedjaw son Apo Shiyos, ja inges toy joka pesing niman. <sup>4</sup> Jet sota ira epangdon imonod ni sajay ya pamati son Jesus, pinedigat ko iren pasiya, tan wara pay i binonok son si-kara, jet sota ira eshom son si-kara, ja daleki man tan bibii, singkel ko ira et asanak ira ibedod. <sup>5</sup> Sota kangetonan na pari, tan sota ira kait ton toray, amtara iyay ya dingkak, jet mebedin na peneknekan sha

iyay, ey saja naka pan-ikowan niman ket podno. Ta si-kara pay ya mismo i engamag nonta ira solat ja para so nonta ira kait shen pangolo ja wared Damasko. Kowan sha nodta solat sha ey ipalobos sha sota ira emati son Jesus shi Damasko ja a-shelen ko ira, jet i-ilaw ko ira did jay kono, jet shiyay i keshosa-an sha.

<sup>6</sup> “Nem nonta naka eman-ekad ja nay-esopak ma shi Damasko, nankawa nontan i akew, jet bigla ja waray makedsang alin similew shi dangit ja emenili, jet diniktob towak. <sup>7</sup> Jet nontan, eto-dangak, jet waray intenengan kon esel ja kowan to ey, ‘Saulo, Saulo, apay nga mowakka pedigata?’ <sup>8</sup> Simongbatak ja kowan ko ey, ‘Sipa ka apo?’ Waray simongbat mowan ja kowan to ey, ‘Si-kak si Jesus ja i-Nasarit ja maybidang ey moka panpedigata, ta epaladoy moka pesing so ira nonta emati son si-kak.’ <sup>9</sup> Jet sota ira inodop ko, inon-an sha sota nimiyal alid dangit son si-kak, nem sota esel nonta ekital son si-kak, eg sha intenengan. <sup>10</sup> Jet sota eman-a-sel, inbag-an ko ja kowan ko ey, ‘Apo, ngantoy dag-en ko?’ Simongbat si Apo ja kowan to son si-kak ey, ‘Dayat ka, jet daw ka shi Damasko, jet waray mengikowan son si-kam shiman ni emin na piyan nen Apo Shiyos sa dag-en mo.’ <sup>11</sup> Nontan ma, ekorabak, ta sota nimiyal ali son si-kak, makedsang nga pasiya, isonga sota ira kait ko, si-karay en enawat son si-kak ja engipangdo ni shalan shi Damasko.

<sup>12</sup> “Shi Damasko, waray kait tayon Hodi Yos ja manngeshan ni Ananias; toka tongpala ni olay i emin na kowan nonta bilin nen Apo Shiyos, jet emin na kait tayon Hodi Yos ja wared man na dogad, asdeg ton shaka ibaingi. <sup>13</sup> Sajay ya too, si-katoy dimaw ali nodta kad-an ko. Jet imaskang son si-

kak, jet kowan to ey, 'Agi Saulo, niman man-esas ka mowan.' Jet nontan met laeng nga inkowanan to so niyay, nan-asasak jet inon-an kon mismo si Ananias. <sup>14</sup> Jet kowan to ma son si-kak ey, 'Si Apo Shiyos ja inshayaw ni appo tayo da nontan, pinidi toka ja mengamta ni piyan to; isonga inon-an mon mismo sota shino-tokan to ja si Jesus, tan intenengan mo pay ya mismo i esel to. <sup>15</sup> Ta say si-kam i mengikowan so ni emin na totoo ni maypangkep nonta inon-an mo tan intenengan mo. <sup>16</sup> Jet niman, enshiy eshom ma mo seskeshen. Dayat ka et panpabonjag ka. Sota basol mo, mepekawanan no si Jesucristo i panshingan mo.' Sajay i inkowan nen Ananias son si-kak.

<sup>17</sup> "Idi naksheng iyay, nay-oli-ak shi Jerusalem, jet dimawak shima Timplo ja en nanshawak son Apo Shiyos, jet idi nonta maramen naka emanshewat, waray inpasas nen Apo Shiyos son si-kak. <sup>18</sup> Inon-an kos Apo Jesus sa mismo, jet say inkowan to son si-kak, 'Kano-im, ilekjas mo shagos iya Jerusalem, ta saja ira tood jay, eg sha pati-en i ikowan mo ja maypangkep son si-kak.' <sup>19</sup> Jet say songbat ko, kowan ko ey, 'Apo, mebedin emon pati-en sha-ak shiyay, ta amtaren mismo ey si-kak sota nansolsolsol ni emati son si-kam shima ira balebaley ya sanopan, jet sota simpol ko, inbalod ko ira, tan sinepsepdat ko pay ira. <sup>20</sup> Angken pay nonta inbono sha so nen Esteban pangkep nonta toka pengitosho ni maypangkep son si-kam, wara-ak nontan jet kowan ko ey kosto sota shaka pandaga son si-kato, tan si-kak pay i nanbantay ni ta-kep ni baro ira nonta bimono son si-kato.' Sajay i inkowan ko son Apo. <sup>21</sup> Nem say songbat to son si-kak, kowan to ey, 'Daw ka, ibetkag taka shima

arawin dogad ja kawad-an ni toon aliwen Hodiyo, jet si-karay itod-an mo ni maypangkep son si-kak.' "

<sup>22</sup> Sota ira totoo, siningpet shen nanteneng nin nonta kowan nen Pablo. Nem idi intenengan shay kowan nen Pablo ey piyan nen Apo Shiyos ja maytod-an ngoy toon aliwen Hodiyo, kimeljaw ma ira, ja kowan sha ey, "Bono jo itan na too! Enshiy kenkenshat ton manbibiyag shiya dobong!" <sup>23</sup> Jet nontan ma, ireka manbonget ta pasiya ja ireka mankeljaw, jet angken sota ira baro sha, shaka pan-iwasawas, jet pati sota depok, shaka pay pan-ishapongaw shi naykayang.

<sup>24</sup> Jet sota apo ni solsharo, inkowan to so nonta solsharo to ey isekep sha nodta kowartil sha, jet shiman konoy kebistigalan to. Asan kowan to pay ey sepdaten sha, ta piyan ton amta-en no ngantoy kabol la kepanbongeti ira nonta Hodiyo son si-kato.

<sup>25</sup> Nem idi shaka panbedora si Pablo, inkowan to so nonta solsharo ja nay-esop son si-kato ey, "Aliwen nebeng nga jo ba-ngaten i sepdat ni toon i-Roma ja eg nin ebistigal no waray basol to."

<sup>26</sup> Idi intenengan nonta solsharo iyay, kinano-an ton dimaw so nonta apo to et to inkowan son si-kato ey, "Apay nganto ayay istay dag-en mo so nonta balod ket i-Roma met gayam?"

<sup>27</sup> Jet sota apo ni solsharo, dimaw ma ali jet kowan to so nen Pablo ey, "Ipodnom! Apay i-Roma ka aya?"

Si Pablo, simongbat ja kowan to ey, "Owen, i-Roma-ak."

<sup>28</sup> Jet sota apo ni solsharo, kowan to ey, "Si-kak, ebadeg i pilak ja kastos ko, asan naka maybilang ey i-Roma-ak."



Nem si Pablo, kowan to ey, “Si-kak, sigod ja inbilang sha-ak ey i-Roma-ak nonta inkay-anak ko.”

<sup>29</sup> Jet sota ira istay menepdat son si-kato, inbi-jag shen shagos, jet bintawan sha. Jet sota apo ni solsharo, entakot, ta inamta-an to ey si Pablo ja inpabedod to ket i-Roma gayam.

*Inpabistigal shes Pablo so nonta ira toray ni Hodiyo*

<sup>30</sup> Nem sota apo ni solsharo, piyan to met laeng nga amta-en no apay nga sota ira Hodiyo ket kowan sha ey wáray basol nen Pablo. Isonga idi ewa-wa, inkowan to so nonta ira apo ni papashi ni Hodiyo tan sota ira eshom ma pangolo ni Hodiyo ey ma-olnong ira. Inpa-kal to sota balod nen Pablo, jet inbo-day to say mekitongtong son si-kara.

## 23

<sup>1</sup> Jet si Pablo, diritson insi-ning to ira sota toray jet kowan to son si-kara ey, “Si-kayon a-akik, amta nen Apo Shiyos ey mapteng i wáred nemnem ko ingkato niman; enshiy amtak ka basol kon kebistigalan kod jay.”

<sup>2</sup> Jet sota kangeto-an na pari ja si Ananias, inkowan to nonta nay-askang so nen Pablo ey sedpaken shay bongot nen Pablo.

<sup>3</sup> Jet si Pablo, kowan to son si-kato ey, “Si Apo Shiyos i onsedpak son si-kam, si-kam ma sinan kekowis! Timongaw ka ja si-kam i mengigsheng ni kasok shi dinteg, nem naykontra met shi dinteg ita inpasedpakan mowak so!”

<sup>4</sup> Jet sota ira dimayat ja nay-askang so nen Pablo, kowan sha ey, “Apay nga endedamsis moy insaad nen Apo Shiyos ja kangeto-an na pari?”

<sup>5</sup> Si Pablo, simongbat ja kowan to ey, “Si-kayon a-akik, ekak amta ey si-kato ket kangeto-an na pari.

No amtak koma, ekak koma sinopngil, ta say naysolat nonta bayag da, kowan to ey, ‘Aliwen mo pan-a-sedan ni ngaaw wa esel i toon emengitoshay son si-kayo.’”

<sup>6</sup> Nem si Pablo, idi inamta-an to ey sajay iren too ket Sadosiyo i eshom, tan wára pay iray Parisiyo, inkedsang toy esel to, ja kowan to ey, “Si-kayon a-akik, si-kak, Parisiyo-ak, tan mismon anak towak ni Parisiyo! Jet niman, iyayak shiyay ya emankebistigal pangkep nonta pamatik ey say nanketey, manbiyag mowan!”

<sup>7</sup> Idi enaksheng nga inkowan to iyay, sota ira Parisiyo tan Sadosiyo, inshogi sha men nansosongbat. Jet sajay iren esanop, nanshowa ira, <sup>8</sup> ta say pamati ira nonta Sadosiyo, kowan sha ey eg manbiyag mowan i etey, tan eg sha pati-en ey wáray anghil, ono sota eshom ma eg ma-sas; nem sota ira Parisiyo, shaka pati-a ey say etey, manbiyag mowan, tan shaka pay pati-a ey wáray anghil tan sota eshom ma eg ma-sas. <sup>9</sup> Jet nontan ma, eshakel i kaonkaneljaw, jet sota ira Parisiyo ja ekayang i ashal sha, dimayat ira ja shaka pan-ibaliwi si Pablo, ja kowan sha ey, “Enshi met i mi dinoktalan na basol niyay ya too; baka et ey sota eg ma-sas ono anghil i engitoshong son si-kato. Isonga eg tayo koma bedawen.”

<sup>10</sup> Ema-men makedsang i shaka pansosongbat. Jet sota apo ni solsharo, entakot ey debniken shes Pablo, isonga engibetkag ni solsharo to ja en ali engigojod so nen Pablo so nodta totoo, jet in-oli sha si Pablo shima kowartil sha.

<sup>11</sup> Jet nontan na dabi, nanpasas si Apo Jesus so nen Pablo, ja kowan to ey, “Pakedsang moy nemnem mo, kareka medismaya. Inkowan moy maypangkep son si-kak shiya Jerusalem, isonga

mesepol ngon ikowan moy may-pangkep son si-kak shi Roma.”

*Nantotodag sota makakontra son Pablo ey bono-en sha*

<sup>12</sup> Idi nonta ewa-wa ma, sota ira Hodiyo ja enshiy pamatira son Jesus, nantotodag ira, jet insangbara ey eg ira nin mengmengan tan eg ira mengin-inom ingkatod meksheng nga bono-en sha si Pablo. <sup>13</sup> Jet sajay iren too ja nantotodag, esolok iren epat ta polo. <sup>14</sup> Dimaw ira jay ya totoo so nonta ira apo ni papashi ni Hodiyo, tan so nonta ira eshom ma pangolo ni Hodiyo, jet kowan sha ey, “Insangba mi ey eg kami nin mengmengan ingkatod meksheng nga bono-en mi si Pablo. <sup>15</sup> Isonga niman say pesing jo, tan sota ira kait jon toray, ikowan jo nima apo ni solsharo ey idaw sha ali si Pablo son si-kayo, ja singa agpayson piyan jon amta-en na pasiya sota maypangkep ni kaso to. Jet si-kami, mansesked kami ali shi shalan na memono son si-kato.” Sajay i kowan sha.

<sup>16</sup> Nem sota ka-anakan nen Pablo, ja anak ni agi ton bii, inamta-an to iyay ya planora ja kowan sha ey tambangen sha si Pablo, isonga dimaw shima kowartil ni solsharo ja to inkowan iyay so nen Pablo.

<sup>17</sup> Jet si Pablo, tinewal to i sakey so nonta ira kapitan ni solsharo, jet inkowan to ey, “Ipangdoyo ka iya balodaki so ni apo jon solsharo, ta waray ikowan to kono son si-kato.”

<sup>18</sup> Jet sota kapitan, inpangdo to sota balodaki so nonta apo sha, jet kowan to ey, “Tina-wal towak nonta balod ja si Pablo i ngaran to, jet kowan to ey ipangdok iya balodaki son si-kam ta wara konoy ikowan to son si-kam.”

<sup>19</sup> Jet sota apo ni solsharo, inegni-an toy takday nonta balodaki, jet inbag-an to ni abos sha, ja

kowan to ey, “Ngarantoy ikowan mo son si-kak?”

<sup>20</sup> Simongbat sota balodaki, ja kowan to ey, “Sota ira Hodiyo, nantotodagan sha ey nem kabasan ket sha ikowan son si-kam ey paidaw mo si Pablo so nonta ira pangolo min Hodiyo, ja singa agpayso konon wara pay i piyan shen amta-en pangkep nonta kaso to. <sup>21</sup> Nem karam kari patpati-en ira, ta waray esolok ka epat ta polon too sha ja emansesked son si-kato shi shalan ja piyan shen bono-en, jet sajay ira, insangbara ey eg ira nin mengmengan ono eg ira man-in-inom, ingkatod meksheng nga bono-en sha si Pablo. Nansagana ira, ja shaka segsegsha bengat sota ikowan mo so ni solsharo ey idaw sha si Pablo.”

<sup>22</sup> Jet sota apo ni solsharo, kowan to so nonta balodaki ey, “Karam ikowan ni angken sipa ey sajay i inkowan mo son si-kak.” Jet inkowan to pay so nonta balodaki ey angken on-akad.

*Inpalaw sha si Pablo shi Sisaria ja kawad-an nen Gobinarol Felix*

<sup>23-24</sup> Nontan ma, sota apo ni solsharo, tinewal to sota showen kapitan to, jet kowan to son si-kara ey, “Pansagana kayo ni showen dasos sa solsharo, tan piton polon solsharon mankebaya, tan showen dasos sa solsharo ja mengita-jon ni kayang, tep itolod jos Pablo shi Sisaria so nen Gobinarol Felix ni oras ni alas nowibi ni kalebi-an. Tan pangisagana kayo pay ni kabajo ja pankebaya-an nen Pablo. Ta kapiditan na imotok jod man ja enshiy mengan-ano son si-kato.” Kowan nonta apo ni solsharo, <sup>25</sup> asan nandaga pay ni solat ja ondaw so nen Gobinarol Felix, jet kowan nonta solat to ey:

<sup>26</sup> “Si-kak si Claudio Lisias ja makasolat niyay, jet sajay ya solat, ondaw so nen si-kam, Gobinarol Felix, ja emayshedshedjaw wa gobinarol. Sapay koma ta mapteng i kasesaad mo niman. <sup>27</sup> Sajay ya toon inpaitolod ko la son si-kam, singkel ira ni Hodiyo shiyay, jet istay ya bono-en sha. Nem inodop ko iray solsharok et mi insalakan si-kato tep inamtaan ko ey si-kato, i-Roma gayam. <sup>28</sup> Piyan kon amta-en no ngantoy kabol la shaka panpebesoli so, isonga say inpasing ko, insangok so nonta ira toray sha. <sup>29</sup> Jet say sinepolan ko ja shaka panpebesoli so, sota maypangkep bengat ni dinteg sha ja Hodiyo, nem enshiy basol to ja kabol la to kebono-an, ono to kaybedoran. <sup>30</sup> Jet idi waray engikowan son si-kak ey waray Hodiyo ja nantotodag ja kowan sha ey bono-en sha, ninemnem ko ey mapteng emo no paitolod ko len shagos son si-kam. Jet inbilin ko ngo so nonta ira makontra son si-kato ey iparang sha son si-kam i kabol la kakontra-an sha so.” Sajay i kowan nonta solat.

<sup>31</sup> Jet sota ira solsharo, tinongpal sha sota bilin ni apo sha, jet indaw sha si Pablo nonta edabi shi Antipatrisa. <sup>32</sup> Jet idi nonta ewa-wa, nay-oli ira sota eshakil la solsharo, jet sota ira solsharo bengat ja waray kabajo to, si-karay engitodoy ja engitodod so nen Pablo, <sup>33</sup> ingkatod Sisaria, jet sota solat, in-awat sha so nonta gobinarol, asan shaka i-wat si Pablo son si-kato.

<sup>34</sup> Sota gobinarol, binasa to sota solat jet inbag-an tos Pablo no toway ilin edapo-an to, jet idi inamtaan to ey edapod Silisia, <sup>35</sup> kowan to ey, “No onmotok ali ira sota makontra son si-kam, itenangan ko ita kasom.” Jet inkowan to ey bantayan ni

solsharo shima kad-an ni baley ni gobinarol, ja istay baley nen Ari Hirodis nontan da.

## 24

*Etongtong ma sota kaso nen Pablo*

<sup>1</sup> Idi edabas i dimen akew, mimotok ali sota kangeto-an na pari ja inodop to aliy eshom so nonta ira pangolo ni Hodiyo, tan si Tirtolo ja mengita-shel son si-kara ni kaso sha so nen Pablo, jet inparang sha so nen gobinarol sota kowan sha ey basol nen Pablo.

<sup>2</sup> Jet idi sha di inpa-odop si Pablo, si Tirtolo, inshogi ton ikowan sota kowan sha ey basol nen Pablo; kowan to ey, “Apo Gobinarol Felix, ja emayshedjaw, say engi-kan ni nanmaptengan mi, tan olnos ni ili mi, amta mi ey si-kam. <sup>3</sup> Jet kabol niyay ya banag ja dingkam, si-kamin emin ja intorayan mo, kamika man-iyaman na pasiya son si-kam. <sup>4</sup> Jet sajay ya naka pan-asel, ekak kosto ja ishokey, isonga naka pankekshawa son si-kam ey, no mebedin, itnengim iya ikowan mi son si-kam. <sup>5</sup> Sajay ya too, sinokalan mi ey makedsel; emengi-kan ni kolo shi emin na kad-an ni Hodiyo. Tan sakey pay, si-katoy pangolo nonta badon sinan pamati ja intoro kono nonta sakey den toon i-Nasarit. <sup>6</sup> Pineshas to pay ya panbedin ima Timplo shi Jerusalem ja ensekig, nem singkel mi. Istay piyan mi koma ja shosa-en shi dinteg mi, <sup>7</sup> nem si Lisias ja apo ni solsharo, dimaw ali jet pinidit ton inelbat son si-kami. <sup>8</sup> Jet say kowan to, sota waray sharom to so niyay ya too, manpeshang ira son si-kam. Jet niman, si-kam i onbistigal so, say amta-en mon mismo ey podno iya kowan min basol to.”

<sup>9</sup> Jet sota eshom ma Hodiyo, nay-eshom ira, jet inkowan sha ey

agpayso noman sota kowan sha ey basol nen Pablo.

*Inta-shelan nen Pablo shorog i bakdang to*

<sup>10</sup> Jet sota gobinarol, sininjasan tos Pablo ey on-esel, et si Pablo, simongbat ja kowan to ey, “Am-tak ey si-kam, ebayag ken nantoray shiyay ya dogad; isonga naka man-imdeng ja onsongbat nonta kowan sha ey basol ko, ta wara ka. <sup>11</sup> Intenengan mo nonta ekay i kowan sha ey eshakel la basol ko. Nem toway inpasing ko ja nandaga niyay, ey sampolo tan showen akew ko bengat shi Jerusalem? Sajay, mebedin na mo sho-peten no agpayso. Say dinawan kod Jerusalem, nak nanshayaw bengat son Apo Shiyos. <sup>12</sup> Jet sota ira Hodiyo met shiman, nonta simbira-ak, aliwen naka mekisongbati so ni angken sipa, aliwen naka mengi-kan ni kolo shi Timplo, ono shima baley ja sa-nopan, ono shima siyodad. <sup>13</sup> Sajay iren totoo, dingdingkara bengat iya inparang sha son si-kam ja kowan sha ey basol ko; enshiy pengibetayan sha. <sup>14</sup> Say amtak bengat, ja naka ewata ey podno, naka emanshedjaw so nen Apo Shiyos, ja kepanshedjawi ira da nonta amma mi, nem say naka pesing nga manshedjaw niman ket saja badon pamati ja kebedawa iren jay. Nem si-kak, naka pati-en emin sota kowan ni bilin nen Apo Shiyos nonta bayag da tan sota emin na kowan ni para padto nen Apo Shiyos nonta bayag da ja naysolat. <sup>15</sup> Jet waray namnamak son Apo Shiyos ey sota ira nanketey ya maronong ono makedsel, manbiyag mowan ira, jet angken saja ira nansharom son si-kam, sajay met laeng i pamatira. <sup>16</sup> Isonga si-kak, naka dag-ay kabaalan ko ja no mebedin, enshi komay nak panbesolan

son Apo Shiyos, kasta met so ni totoo. <sup>17</sup> Ebayag ga tawen na enshi-ak shi Jerusalem, jet niman na imoli-ak, aliwen kowan ko ey nak mankodo, nem say nayoli-an ko, nak mengi-kan ni inedos min tolong mi so nonta ira kait min Hodiyo ja maligdigat, tan nak mengi-kan ni daton ko so nen Apo Shiyos. <sup>18</sup> Nem idi marama ja naka pandag-a iyay, say simabi son si-kak shima Timplo, sota Hodiyo ja edapod Asiya. Naksheng nga dingkak sota ogadi mi say enshiy kebedawan ko shi kait kon Hodiyo, jet nontan na timpo, aliwa met ta naka mangedawangaw, enshi met i eshakel la kait ko! <sup>19</sup> Jet sota Hodiyo ja edapod Asiya nontan, si-kara et komay istay wared jay ja mansheshom, no waray eg sha kosto son si-kak. <sup>20</sup> Jet niman, ibagim ira jay no ngarantoy sinepolan shen basol ko nonta insakdang sha-ak shi toray shi Jerusalem. <sup>21</sup> Say amtak bengat, sota inkeljaw ko nonta indayat kod sango-an sha, ja kowan ko ey, ‘Sota maypangkep ni panbiyag ira nonta nanketey, si-katoy naysakdangan ko niman son si-kayo!’ ” Kowan nen Pablo.

*Eg kinshengan nen Gobinarol Felix ja shagos sota kaso nen Pablo*

<sup>22</sup> Jet si Felix, ta asdeg toy amta to ni maypangkep ni pamati son Jesus, inbi-jag to nin iyay ya kaso jet kowan to ey, “No onmotok ali si Lisias ja apo ni solsharo, kegshengan ko iyay ya kaso jo.” <sup>23</sup> Jet nontan, inkowan nen Felix so nonta kapitan ni solsharo ey, “Bantayi jo si Pablo, nem akniyo ni waya to. Mebedin na angken en bisita-en ira di nonta kagajem to, say i-aknan sha ni kasapolan to.”

<sup>24</sup> Idi waray edabas sa pigen akew, si Felix tan sota asewa ton

si Drosila, ja Hodiyos, sha ali inpa-odop si Pablo, ta piyan shen itenengan i ikowan nen Pablo ja maypangkep nonta pamati son Cristo Jesus. <sup>25</sup> Jet si Pablo, intoro to ey say too, mesepol la nemnemen toy panmaptengan ni eshom, tan mesepol la tetngelen to shorog i bakdang to ja eg koma manbesol, asan kowan to pay ey wára aliy ma-onod ja timpo ja onsangon emin i totoo son Apo Shiyos, jet si-katoy pengigsheng nen Apo Shiyos no sipay maysedakan. Jet si Felix, timakot, jet kowan to ey, “Angken ondaw ka nin; no wáray wáyak, pa-odop taka mowan.” <sup>26</sup> Toka pa-odop si Pablo ni olay ja mekitbal son si-kato, nem say kabol pay ya toka pa-odopi so ni olay, kowan to ey balang nem aknan nen Pablo ni pilak.

<sup>27</sup> Idi edabas may showen tawen, si Porsio Pisto i naysa-dat so nen Gobinarol Felix. Si Felix, piyan ton sesmeken ni Hodiyos; isonga binaybay-an to si Pablo shi badoran.

## 25

*Inelbat nen Pisto i kaso nen Pablo*

<sup>1</sup> Idi wáray tedon akew nen Pisto shi Sisaria ni inkaysa-dat ton gobinarol, dimaw shi Jerusalem. <sup>2</sup> Jet sota ira apo ni papashi, tan sota ira eshom ma pangolo ni Hodiyos, inkowan sha sota kakontra sha so nen Pablo jet shaka panpidita si Pisto, <sup>3</sup> ey i-oli to koma son si-kara si Pablo shi Jerusalem, ta say wáred nemnem sha, kowan sha ey seskeren shed shalan et bono-en sha.

<sup>4</sup> Nem si Pisto, simongbat ja kowan to ey, “Si Pablo, wáred badoran shi Sisaria, jet si-kak, on-oli-ak shagos shiman. <sup>5</sup> Jet sota ira pangolo jo, mebedin na mekidaw ira son si-kak, jet no

ngarantoy basol nen Pablo, mebedin na isharam sha son si-kak shi Sisaria.”

<sup>6</sup> Nan-iyen si Pisto shi Jerusalem ni eg simolok ni sampolon akew, asan ka-edaw shi Sisaria. Idi nonta ewa-wa ni inmotok tod Sisaria, inshogi to ma ja menongtong, jet inkowan to ey metongtong ma si Pablo. <sup>7</sup> Jet idi nontan na wára ma si Pablo, sota ira Hodiyos ja edapod Jerusalem, dimayat iren emin ja diniktob sha si Pablo, jet eshakil i inkowan shen basol to konon embel-at, nem eg sha met kari peneknekan.

<sup>8</sup> Idi naksheng nga inkowan sha sota kowan sha ey basol to, nan-esel ngo si Pablo, ja tina-shelan toy bakdang to shorog, ja kowan to ey, “Enshiy nak dingka ja maykontra shi dinteg ni Hodiyos, ono maykontra shima Timplo, ono maykontra so nonta ari shi Roma.”

<sup>9</sup> Nem si Pisto, ta piyan ton paboran ira sota Hodiyos, inkowan to son Pablo ey, “No piyan mo, on-oli ked Jerusalem jet shiman i ketongtongan nonta kowan sha ey ngaaw wa aramid mo. Jet si-kak met laeng i mengigsheng so.”

<sup>10</sup> Nem si Pablo, simongbat ja kowan to ey, “Enshi, shiya Sisaria i ketongtongan ni kasok tep shiyay i insaashan ni ari ni Roma ni oskaro to. Nem no maypangkep ni sharom iren ta Hodiyos, enshi met i nak nanbasolan son si-kara, jet amtam met ta pasiya. <sup>11</sup> No bilang ey si-kak ket wáray dingkak ja ngaaw wa aramid, ey ikesheng jon patey i karo to, ekak sopngilen, ontolokak. Nem enshi met! Sota kowan sha ey basol ko, aliwen podno. Isonga angken sipa, enshiy en mengi-wat son si-kak son si-kara. Sota ari shi Roma i ikamangan ko so ni kasok!”

<sup>12</sup> Jet si Pisto, nantatabtabal ira nin nonta kait ton toray, asan toka ikowan son Pablo ey, “Sota

ari mid Roma i ikamangan mo so ni kasom; si-kato i dawán mo ja kaysakdangan nonta kasom.”

*Nan-esel si Pablo shi sango-an nen Ari Agripa*

<sup>13</sup> Idi waray edabas den pigen akew, si Agripa ja toray ngod apil la ili, tan si Bernice, ira nanbisita son Pisto shi Sisaria. <sup>14</sup> Jet nan-iyán nin ired man ni pigen akew, jet si Pisto, inshingan to nontan na insodsod so nen Agripa sota kaso nen Pablo, ja kowan to ey, “Waray balod ja binay-an nen Felix shiyay, <sup>15</sup> jet nonta dimawak shi Jerusalem, inkowan ira nonta apo ni papashi ni Hodiýos, tan sota ira pangolo sha i maypangkep son si-kato, jet shaka pay pankekshawa ey kenshat ta meshosa. <sup>16</sup> Jet say insongbat ko son si-kara, inkowan ko ey aliwén ogadi ni gobirnod Roma ja i-awat i balod shi eshom ma too say si-karay menosa, ta mesepol nin ja onsango ira di sota engireshom, say wára ngoy wáya nonta naysharom ja mengitakshel shorog ni bakdang to, ja onsongbat so nonta sharom. <sup>17</sup> Sajay iren too, dimaw ira did jay et ekak tinaktak itan na kaso. Nonta ewa-wa, dimawak shima baley ya bistigalan et inkowan ko ey isekep sha ali sotan na balod. <sup>18</sup> Jet sota ira nansharom, inkowan shay basol niyay ya balod. Kowan ko nem waray talaken aramid ton ngaaw, nem enshi met gayam. <sup>19</sup> Nem say eg sha bengat pan-i-inawatan, sota maypangkep ni rilihiyon shen Hodiýos, tan maypangkep nonta toon etey da ja si Jesus i ngaran to, ta si Pablo, say kowan to, nanbiyag mowan iyay den too. <sup>20</sup> Jet si-kak, ekak tongolan i pesing ko niyay ya kaso; isonga inbag-an kos Pablo no piyan ton on-oli shi Jerusalem, say shiman i ketongtongan nonta

kowan sha ey basol to. <sup>21</sup> Nem si Pablo, piyan ton ikamang iyay ya kaso to so ni ari shi Roma. Isonga inkowan ko so nonta ira solsharo ey bantayan sha nin ingkatod paitolod ko so ni solsharo so nonta ari shi Roma.” Kowan nen Pisto.

<sup>22</sup> Jet si Agripa, kowan to so nen Pisto ey, “Piyan ko ngon itenengan i ikowan nitan na too.”

Jet si Pisto, kowan to ey, “No kabasan, pa-odop ko di jet itenengan moy ikowan to.”

<sup>23</sup> Idi nonta ewa-wa ma, sota ira apo ni solsharo, tan sota ira bebaknang nodtan na dogad, ekiskep ira so nen Agripa, tan si Bernice shima baley ya bistigalan. Jet si Agripa nen Bernice, nanbisti iren pasiya. Jet si Pisto, to di inpa-odop si Pablo.

<sup>24</sup> Jet si Pisto, nandiskolso nin ja kowan to ey, “Apo Ari Agripa, tan si-kayon emin na ekisa-nop niman son si-kami, sajay sota toon kontra ni emin na Hodiýos shi Jerusalem ingkato did ja Sisaria. Kinshaw sha son si-kak ey mebono; aliwén anam to konon manbibiyag shiya dobong. <sup>25</sup> Nem enshiy naka doktali ja kebono-an to. Jet si-kato ngo, kinshaw to ey sota kaso to, ikamang to so ni ari shi Roma. Jet ninemnem ko ey mapteng nem paitolod kod man. <sup>26</sup> Nem enshiy koston nak isolat so ni ari shi Roma ni maypangkep niyay ya too, ja dipot kon pekita-jon ko son si-kato. Isonga inpa-odop ko iya si Pablo say asen jon emin, agdalo son si-kam Apo Ari Agripa. Piyan kon si-kam i mismon onbistigal so, say amtak i isolat ko so nonta ari shi Roma no meksheng i bistigal. <sup>27</sup> Ta say wared nemnem ko, nalas ja nak paitolod i balod son si-kato, ey enshiy koskoston sharom ja basol to.” Kowan nen Pisto.

## 26

*Si Pablo, inta-shelan to shorog i bakdang to shi sango-an nen Agripa*

<sup>1</sup> Jet si Agripa, kowan to son Pablo ey, “Eti, ikowan mon emin niman i podnon dingkam.”

Jet si Pablo, sininjasan to ira ey mantetneng ira, jet inta-shelan toy bakdang to, ja kowan to ey, <sup>2</sup> “Apo Agripa, ebadeg i iyaman ko ni kawasham. Jet niman, songbatan kon emin sota kowan ira ni Hodiyo ey basol ko, say itenengan mo. <sup>3</sup> Ta si-kam, amtam ma emin i ogadi tayon Hodiyo tan sota eg tayo pan-i-inawatan. Jet say shawat ko son si-kam, no mebedin, anosim ja itenengan iya ikowan ko.

<sup>4</sup> “Manshoki nonta ka-ootik ko, emin na Hodiyo shi ilik tan shi Jerusalem, amtaray koskoston kasesaad ni biyag ko, <sup>5</sup> no talaken si-kara ket ipodnora sota amtaren kasesaad ko. Sigod ja amtara ey sakeyak so nonta ira Parisiyo; isonga inonod kon pasiya sota ogadi tayon Hodiyo. <sup>6</sup> Jet niman, iyayak ja naysakdang son si-kayo, jet say kabol la naysakdangan ko, naka pati-a ey sota kari nen Apo Shiyos so nonta ira amma tayo da nonta bayag, tinongpal to niman den timpo. <sup>7-8</sup> Angken sota emin na kait tayon Hodiyo, piyan sha ngon asen i ketongpal niyay ya kari nen Apo Shiyos, isonga masimet iren mansilbi son si-kato ni kalebi-an man tan ka-akawan. Nem ngaran gayam ni sajay et i kabol la insharoman sha-ak so ira nonta kait kon Hodiyo! Say ekak ewatan, Apo Ari Agripa, apay nga waray eshom son si-kayo shiyay ja makakowan ey angsan kono ja en panbiyag nen Apo Shiyos mowan i etey?

<sup>9</sup> “Si-kak nonta pilmiro, kowan ko ngo ey mapteng no kontra-

en kon emin sota banag ja may-pangkep so nen Jesus ja i-Nasarit. <sup>10</sup> Jet mismon dingkak iyay shi Jerusalem. Sota kangeto-an na pari, in-aknan towak ni palobos, jet eshakil i inbalod kon emati son Jesus shiman, jet sota ira eshom ma kowan sha ey mebono, naka owena ey mapteng sotan na kowan sha ey dag-en sha. <sup>11</sup> Jet sota ira emati son Jesus, eminshakil la waray shinosak son si-kara shima balbaley ya sanopan tayon Hodiyo shi kedogadogad, ta piyan kon piditen iren mengibi-jag ni pamatira son Jesus. Ebadeg i bonget ko son si-kara nontan; dimawak pay shima ira nay-arawin siyodad ja kawad-an ira nonta emati son Jesus ja nak ira pinedigat.”

*Inistoriya ma nen Pablo i inpasing ton emati son Jesus*

<sup>12</sup> “Sajay i kabol la istay dinawan kod Damasko. Jet waray solat ja indak so nonta ira apo ni papashi shi Jerusalem jet kowan to nonta solat ey ipalobos ira nonta kait shen toray ja wared Damasko i pengkel ko ira nonta emati son Jesus ja wared man. <sup>13</sup> Nem idi nonta nankawa i akew ni kawashak shi shalan, Apo Agripa, waray silew ja edapo alid dangit ja makedsang ey say sekit, ja diniktob towak, pati sota ira inodop ko. <sup>14</sup> Jet emin kami, etodang kami jet waray intenengan kon esel, ja esel tayon Hodiyo i toka pan-a-sel, ja kowan to ey, ‘Saulo, Saulo, apay nga mowakka pedigata? Enshiy baal mon mengebak son si-kak; katideg ka.’ <sup>15</sup> Jet simongbatak ja kowan ko ey, ‘Sipa ka apo?’ Say kowan to son si-kak, ‘Si-kak si Jesus ja singa moka pedigata, ta epaladoy moka pesing so ira nonta emati son si-kak. <sup>16</sup> Nem angken dayat ka, ta say nanpa-sasan ko son si-kam, si-

kam i shinotokan ko ja mansilbin mengikowan ni maypangkep son si-kak. Si-kam i onpaneknek ni in-  
 asas mowak so niman, tan wára pay aliy banag ja ipa-sas ko son si-kam, jet si-kam i mengikowan so ni eshom. <sup>17</sup> Si-kam i pini-dik ja en mengikowan ni may-pangkep son si-kak so nonta ira toon aliwén Hodiyo. Si-kak i mismon mengajowan son si-kam say enshiy ngaaw wa dag-en ni Hodiyo ono aliwén Hodiyo son si-kam. <sup>18</sup> Ibetkag taka so ni aliwén Hodiyo say maynemne-man ira ja amta-en sha ey wára ired embolinget jet say ontorong ira shi dawag, say maysi-jan ira nodta toray nen Satanas jet si Apo Shiyos may toshongen sha. Jet no memati ira son si-kak, mepekawanan may basol sha, tan mayda-kam ira ja mekitewid so nonta ira toon pinidi nen Apo Shiyos ja too to.' Sajay i inkowan nen Apo Jesus son si-kak.

<sup>19</sup> "Isonga si-kak, Apo Agripa, ekak sopngilen sotan na inten-gan kon edapo alid dangit. <sup>20</sup> Say pilmiron nantoro-an ko, shi Damasko, asan shi Jerusalem, asan ma shima intiron sakop ni Jodia, tan angken shima nay-arawin dogad ni aliwén Hodiyo. Intorok son si-kara ey manbebawi ira ni basol sha, ja si Apo Shiyos i kemangen sha ja panshedjawan, say ibi-jag shay aramid shen ngaaw jet mandeka ma ira ni mapteng. <sup>21</sup> Sajay i kabol la singkelan sha-ak so ira nonta Hodiyo shima Timplo, jet pineshas sha pay ja bono-en sha-ak. <sup>22-23</sup> Nem si Apo Shiyos i timolong son si-kak nontan jet kaantolong pay ingkato niman. Isonga wára-ak shiyay niman ja emengikowan niyay son si-kayon nankengato tan angken pay so ni nankebaba. Jet enshiy eshom ma naka pan-ikowan, nem eg sota inkowan met laeng

ira da nonta para padto nonta bayag da ja naysolat, tan sota kowan nen Moises, ja kowan sha ey wára aliy ibetkag nen Apo Shiyos ja mengisedakan, jet sotan na mengisedakan, kowan sha ey kenshat ta manda-kam ni digat asan ma matey, nem si-katoy pilmiro ja manbiyag so nonta ira nanketey. Jet say kowan sha pay, tan angken si-kak, sotan na mengisedakan ja si Jesus, si-kato met laeng i ondawag ni nemnem ira nonta toon Hodiyo tan toon aliwén Hodiyo."

<sup>24</sup> Jet nonta marama pay laeng ja eman-a-sel si Pablo, biglen kimeljaw si Pisto ja kowan to ey, "Nayda-kad i ashal mo, isonga inpan-angaw toka!"

<sup>25</sup> Nem si Pablo, simongbat ja kowan to ey, "Aliwén naka man-engaw, Apo Gobinarol Pisto. Saja naka pan-ikowan, podno, enshiy solok to. <sup>26</sup> Say karinelan kon mengikowan niya maypangkep son Jesus, amta nen Apo Agripa ja emin iyay ya banag. Amtak ey emin iyay den edaga ja naka pan-ikowan, amta to, ta aliwén shima nay-emot i edaga-an to, no diket naypalantaro. <sup>27</sup> Apo Agripa, kaka memati ni inkowan ni para padto nonta bayag da? Amtak ey moka pati-a."

<sup>28</sup> Jet si Agripa, simongbat ja kowan to ey, "Moka namnama-a ey ewisen mowak ja memati son Jesus kabol nita ootik ka inkowan mo la?"

<sup>29</sup> Si Pablo, simongbat ja kowan to ey, "No kabol niya ootik ka inkowan ko ket memati ka, ono mesepol la mebedjag i i-adok ko son si-kam, say shawat ko son Apo Shiyos, si-kam tan saja emin na engitneng ni inkowan ko la niman, onoran jowak koma, powira i inkaybalod ko."

<sup>30</sup> Jet nontan ma, si Agripa, si Pisto, si Bernice, tan sota ira



kait shen timanongaw nodtan, dimayat ira. <sup>31</sup> Jet idi bimano-day ma ira, kowan sha ni sakey tan sakey son si-kara ey, “Sajay ya too, enshi met i kabol la to kebono-an, ono to kaybedoran.” <sup>32</sup> Jet si Agripa, kowan to son Pisto ey, “Sajay ya too, mebedin na istay mebedos koma no eg to inkowan ey ikamang to sota kaso to so ni ari shi Roma.”

## 27

*Indogan sha si Pablo shi barko ja ondaw shi Roma*

<sup>1</sup> Idi enaksheng nga kinshengan sha ey onda-jat kamin ondaw shi Roma, in-awat sha ma si Pablo tan sota ira eshom ma balod so nonta kapitan ni solsharo ja si Julio, ja sikatoy maka-amta son si-kara. (Say gropon solsharo ja nay-eshoman nen Julio, sota epilin solsharo ni ari.) <sup>2</sup> Jet kami nandogan nodta barko ja edapod Adromito, ja manshedan shima ira istasjon shi kilig ni baybay shi probinsiya ni Asiya. Si Aristarko ja i-Masidonia ja edapo alid Tisalonika, ekidaw son si-kami. <sup>3</sup> Nonta maykadwen akew, mimotok kamid Sidon, jet si Julio ja kapitan ni solsharo, ta ensemek tos Pablo, intolok ton angken en bisita-en nen Pablo sota ira kagajem tod man. Jet intolok to pay ya angken aknan sha ni kasapolan to. <sup>4</sup> Jet manshokid man, nanshalan kamid sedong ni Cyprus, say mesa-dinan kami, ta makedsang i shagem, ja toka panspola sota barko ja nandoganan mi. <sup>5</sup> Jet binedasat mi sota baybay ya kilig ni Silisia, tan Pampilia, jet mimotok kamid Mira ja sakop ni Lisia. <sup>6</sup> Sota kapitan ni solsharo, waray simbi tod Mira ja barkon edapod Alejandria ja ondaw shi Roma, jet nan-etan kami ja nandogan nodtan na barko. <sup>7</sup> Eman-adoney sota barko ja nandoganan mi ni pigen akew, jet edigatan

kamin mimotok shi Nido. Sota shagem, makedsang nga pasiya, isonga eg mebedin na itoloy min ondaw. Isonga say inpasing mi, nanshalan kamid kilig ni Crete, say mesa-dinan kami ni shagem, jet dinabsan mi sota istasjon ja kowan sha ey Salmoni. <sup>8</sup> Inonod mi ni olay sota kilig ni baybay, jet edigatan kami asan kami motok nodta dogad ja kowan sha ey Mapteng nga Istasjon, ja nay-esop nodta siyodad ni Asia.

<sup>9</sup> Etaktak ka pasiya i inda-jat mi; nakol ni simabi sota timpo ni powek, jet dilikaro may panbiyaki mi. Isonga si Pablo, inadok to ira sota emengimanshal nonta barko, ja kowan to ey, <sup>10</sup> “Si-kayon pangolo ni sajay ya biyaki, naka dekna-a ey no itoloy tayon ondaw, dilikaroy kasesaad tayo; kenshat ta waray kalka ja mepilshi, tan mebedin na angken saja barko ono biyag tayo pay i mepokaw.”

<sup>11</sup> Nem sota kapitan ni solsharo, say toka ngo patpati-a ket sota kapitan ni barko tan sota makakokowa so, ey aliwen sota kowan nen Pablo. <sup>12</sup> Karakdan i makapiyan ey idekjas mi sotan na istasjon ja nansalshengan mi tep dilikaro no timpo ni powek, isonga kowan sha ey peshasen shen ontorong shi Ponis, ja sakey ya istasjon met laeng shi Crete no mebedin, ta mapteng kono sotan na istasjon, angken na timpo ni powek. Jet shiman nin i inkowan sha ey pansalshengan mi ingkatod ondabas i timpo ni powek.

*Naytompong ja waray powek nonta wara ired baybay*

<sup>13</sup> Jet nontan, inshogi ton eman-adoney i shagem ja edapod pesaw, jet kowan sha ma ey mebedin na itoloy sha sota planora. Isonga ninatnat sha di sota dan-shok ka emengipked ni barko, jet inonod sha sota kilig ni Crete.

<sup>14</sup> Nem ebigla ja wáray maked-sang alin shagem ja edapod kamag-an nonta inonod mi ni olay i kilig ni Crete. <sup>15</sup> Pinonta-an to sota barko jet pinosipos to, jet idi eg mebedin men ipilit shen i-aspol sota barko nodta shagem, binay-bay-an shen angken toway itorongan to so nonta barko. <sup>16</sup> Idi sinadinan shakami nonta ootik ka dogad ja kowan sha ey Kaoda, ininat mi alin indogan sota bangka ja kaikoyokoyod nonta barko, nem nandigat kami nin ja pasiya. <sup>17</sup> Idi enaksheng nga innat sha ja insingpet sha nodta barko, wáray in pandiked shen inbedbed nonta bakdang ni barko say kemkemen to ja eg mansisi-jan. Entakot ira ey onsayad sota barko nodta baton nayseked nodta kepengitolshoni ni shagem; isonga indespag sha pay sota dopot ta dayag nodta barko, jet intolok shen itolshon nonta shagem sota barkon nandoganan mi.

<sup>18</sup> Idi nonta maykadwén akew, makedsang nga pasiya pay laeng sota powek, isonga in-ibong shay eshom ma kalka say onka-jas sota barko, tep kamika emandikat ta pasiya. <sup>19</sup> Jet idi nonta maykatdon akew, in-ibong sha mowan sota kompormin wára nodta naytapew ni barko. <sup>20</sup> Jet nontan ma, eshakel day akew wa dimabas ey oltimon eg mi inon-on-an i sekit ono talaw, jet makedsang nga pasiya i shagem. Isonga enshi may namnama mi ey mebiyag kami.

<sup>21</sup> Idi pigen akew malen eg engengan ira sota totoo, dimaw si Pablo son si-kara, jet kowan to ey, “No istay pinatiyo koma sota kowan ko nontan, ey eg kito ontoloy nonta wára kitod Crete, istay ya enshiy mepilshin kalka tan enshi koma i sajay ya digat ja tayoka panda-kami niman. <sup>22</sup> Nem niman, karekayo manshanag, en-

shiy en mepokaw, angken sakey ya biyag son si-kayo; saja barko bengat i mepilshi. <sup>23</sup> Ta nonta edabi da, si Apo Shiyos ja makatoo son si-kak tan naka panshed-jawi, engibetkag ni anghil to ali ja nanpa-sas son si-kak, <sup>24</sup> jet say kowan nonta anghil son si-kak, ‘Kareka manshanag Pablo; kenshat ta onsabi ka so nonta ari shi Roma, jet saja ira toon kait mo shiya barko, kowan nen Apo Shiyos ey enshiy en mepokaw son si-kara, pangkep son si-kam.’ Kowan nonta anghil. <sup>25</sup> Isonga si-kayo, karekayo manshanag, ta si-kak, naka memati son Apo Shiyos ey sota inkowan to, tongpalen to. <sup>26</sup> Nem wára et mangoy ootik ka dogad shiya naykawa ni baybay ya kesesheyen tayo.” Kowan nen Pablo.

<sup>27</sup> Sampolo tan epat ta dabi mi nodta kawa ni baybay ey shakamika kaitoltolshon nonta shagem. Jet nonta kawa ni dabi, dinmo ira nonta obrantis ni barko ey kamika eman-a-sop shi sakey ya kamag-an. <sup>28</sup> Jet engi-kas ira ni dokod, jet showen polon shepa i kalbeng ni shanom nodtan. Idi ima-adaw kami pay, pininshowa sha ja dinokod, jet sampolo tan dimen shepa may kalbeng to bengat. Isonga amtara ma ey nay-esop kami shi kamagan. <sup>29</sup> Entakot ira ey maydomdom sota barko, ta aliwén debeng sota shanom, isonga say inpasing sha, in-ekas sha sota epat ta danshok ja mengipked nonta barko shima obet to, jet ireka man-a-agag ey ma-akew komen shagos.

<sup>30</sup> Sota ira obrantis ni barko, piyan shen onbetik. Say inpasing sha, inoy-oy sha sota bangka, ja singa wáray isingpet sha nodta sango ni barko ja danshok ka mengipked met laeng nonta barko, nem piyan sha karin onbetik. <sup>31</sup> Nem si Pablo, say

kowan to so nonta kapitan ni solsharo, tan sota ira solsharo to met laeng, kowan to ey, “No onbetik ira ja obrantis niya barko, eg kayo mebiyag.”

<sup>32</sup> Isonga say inpasing ira nonta solsharo, pinotol sha sota ira wanet ja engipekod nonta bangsa ja istay inoy-oy ira nonta obrantis, jet na-anod mala sota bangsa.

<sup>33</sup> Idi shanshani men ma-akew, pinidit nen Pablo iren emin ja mengan, jet kowan to ey, “Niman i maykesampolo tan epat ta akew ja eg kayo eng-engan ni angken nganto, ta esiwat kayo ni kel-ew jo.” <sup>34</sup> Isonga takejoka panpidita ja mengan, say onkedsang kayo. Karekayo manshanag; pesed, enshiy mepesamak son si-kayo.”

<sup>35</sup> Idi enaksheng nga inkowan to iyay, engala nonta tinapay jet nan-iyaman son Apo Shiyos say asen sha, jet pinetpet-ing to, jet sikatoy engirokin engan. <sup>36</sup> Sotan ma ey naynemneman iren emin jet engan ma ira. <sup>37</sup> (Say kabebilang min emin na nandogan nodta barko, showen dasos tan piton polo tan enem.) <sup>38</sup> Idi enaksheng iren engan, in-ibong sha sota kalkaren bekas, jet kima-jas sota barko.

#### *Simayad sota barko shi bato*

<sup>39</sup> Idi nonta na-akew ma, eg imatonan nonta ira obrantis sota kamag-an na nay-esop son sikami, nem waray inon-an shen patadan nodta kilig ni baybay, jet ninemnem sha ey mapteng emo no i-abot sha nodtan sota barko, no mebedin, ta baton emin i nanbina-sil nontan na patadan. <sup>40</sup> Jet say inpasing sha, pinotol sha sota wanet ja nay-iket nodta danshok ka emengipked ni barko, jet in-oway sha len ondened; tan dinokayan sha sota wanet ja nay-iket nodta ipay nonta barko. Idi naksheng sotan, inkayang sha sota dopot ta dayag

nonta barko, jet intorong sha ma nodta patadan. <sup>41</sup> Nem waray naysayashan nonta barko, jet naydomdom sota sango to, jet eg mebedin ma ja mebegnad. Jet sota obet ni barko, binokal ni shadoyon. <sup>42</sup> Sota ira solsharo ma, planora ey bono-en shen emin ira sota balod, ta baka et ey onnangoy ira, jet waray onbetik. <sup>43</sup> Nem sota kapitan ni solsharo, piyan ton mebay-an si Pablo; isonga inkowan to ey, “Enshi, karejo dag-en itan!” Jet say inpasing to, inkowan to ey emin ira sota amtaren mannengoy, mepangdo iren onnangoy da nodta kamag-an. <sup>44</sup> Jet sota eg maka-amten mannengoy, onpekot kono ira nodta kiyew wa edapo nodta esharal la obet ni barko. Sajay i inpasing min emin na kima-jat nodta naykilig, jet enshiy en na-an-ano son si-kami.

## 28

### *Esarey ira shi Malta*

<sup>1</sup> Idi nonta wara kami ma nodta ootik ka dogad ja naykawed baybay, inamta-an mi ey sotan na dogad gayam ket manngeshan ni Malta. <sup>2</sup> Jet sota too nodtan na dogad, masmek ira; sin-ingpet shakami noman na emin. Nan-apoy ira jet inpanangshang shakamin emin, ta eman-oshan ma mowan et teg-in.

<sup>3</sup> Si Pablo, en engolnong ali ni eshakil la pating jet inpongpong to nodta apoy. Idi pimetang sota pating, waray bimo-day alin oleg nodtan et kindat toy takday nen Pablo. <sup>4</sup> Jet sota ira too nodtan na dogad, inon-an sha sotan na oleg ja nanba-jat shi takday nen Pablo jet kowan sha ey, “Enshiy showashowa, sigoradon sajay ya too, bimono ni too. Agpayson indasat toy biyag to alid baybay, nem kenshat ta eg maypedobos ja manbiyag.” <sup>5</sup> Nem si Pablo,

inpelki to et sota oleg nodta apoy, jet pesed ja eg na-an-ano si Pablo. <sup>6</sup> Sota ira too nodtan na dogad, shaka sesseskera no ondarag sota takday ton kindat ni oleg, ono keto-dang ton metey; nem idi ebayag, ey enshiy emepesamak son si-kato, nannemnem-nem mowan ira jet kowan sha ma ey shiyos si Pablo.

<sup>7</sup> Nodtan na kawad-an mi, waray nay-askang nga bo-day nonta toon manngeshan ni Poblio, ja pangolo nodtan na dogad. Sajay ya too, tokami inpa-odop, jet inpan-iyen tokamid baley to ni tedon akew, jet sinintil shakamin pasiya noman. <sup>8</sup> Nontan na timpo, naytompong nga emansekit sota ama nen Poblio, ja empetang nga pasiyay bakdang to, tan emantai ni shala. Jet si Pablo, dimaw, ja to inon-an, jet nanshawit nin son Apo Shiyos asan toka isakpal i takday to so nontan na emansekit, jet na-kal i sakit to. <sup>9</sup> Sajay ya edaga, inamta-an ni eshom ma totoo nodtan, jet emin ira di sota emanpansekit nodtan na dogad, dimaw ira di son si-kami jet na-kal i sakit sha. <sup>10</sup> Eshakel i kompormin inakan sha son si-kami nontan, jet idi shanshani ma ja idekjas mi ira, sha di indogan nodta pandokanan mi sota ngaranton mesepol mi.

*Edapo ired Malta asan ireka kemotok shi Roma*

<sup>11</sup> Idi edabas sota tedon bolan na inpan-iyen mid Malta, kami nandogan nodta barko ja edapod Alejandria, ja minalka-an sha ni ditarato ni san-epin na dakin kowan sha ey shiyos sha. Sajay ya barko, epokok shi Malta ni ebayag nonta timpo ni powek. <sup>12</sup> Dima-jat kami et say pilmiron minotok mi, shi Sirakosa, jet nan-iyen kamid man ni tedon akew. <sup>13</sup> Jet manshokid man, intoloy miy biyaki mi, jet nandikaw kami asan kamika motok shi Rigio. Jet idi

edabas i san-akew, shimagem alid pesaw jet intolshon to sota nandoganan mi, jet nonta maykadwen akew mowan, mimotok kamid Potioli. <sup>14</sup> Jet waray simbi mid man na a-aki mi shi pamati, jet inewis shakamid man na meki-iyen nin son si-kara ni piton akew, asan kamika edaw shi Roma. <sup>15</sup> Sota ira a-aki mi shi pamatid Roma, shinemag sha ey wara kami di jet shakami inapol shima dako-an ja kowan sha ey Apio, tan wara pay i eshom ja nay-apol shima tedon baley ya sha-kosan. Jet idi inon-an nen Pablo ira jay, nan-iyaman son Apo Shiyos, tan kimedasang i nemnem to.

*Sota edagdaga nonta wara si Pablo shi Roma*

<sup>16</sup> Idi mimotok kami ma shi Roma, waray palobos son Pablo ja angken man-iyen shi piyan ton baley ja pan-inan, nem ampet et mangon waray solsharo ja manbantay son si-kato.

<sup>17</sup> Idi waray tedon akew nen Pablo shiman, inpa-odop to ira sota pangolo ni Hodiyo shiman, jet idi esa-nop ira, nan-esel si Pablo ja kowan to son si-kara ey, "Si-kayon kait ko ja Hodiyo, enshiy amtak ja nak dingka ja maykontra so ni kait tayon Hodiyo, ono maykontra so nonta ogadi ira ni amma tayo da nontan. Nem say inpasing sha son si-kak, inshel sha-ak shi Jerusalem. Jet in-awat sha-ak so ni i-Roma. <sup>18</sup> Binistigal sha-ak ni toray ja i-Roma, jet kinshengan sha ey enshiy basol kon nak kebono-an. Isonga sajay iren toray ja i-Roma, piyan shen istay ibolos sha-ak. <sup>19</sup> Nem sota ira kait tayon Hodiyo, eg sha piyan ja mebodosa. Isonga ninemnem ko ey sajay ya kasok ket ikamang ko so ni ari shiya Roma. Eg jo koma ipangkep ey say inkamangan ko so niyay ya kasok ket waray

sharom ko so di ni kait tayon Hodiyo; <sup>20</sup> nem say kina-agpayso ni inpa-odopan takejo so ja pangolo ira ni Hodiyo shiya Roma, piyan kon am-amta-en takejo. Tan piyan kon idawag son si-kayo ey say kabol la naybaloshan ko ket saja naka pemat-i nonta kepati-a met laeng ni kait tayon Hodiyo, ey waray ibetkag ali nen Apo Shiyos ja mengisedakan son si-katejo.”

<sup>21</sup> Jet sajay iren too, kowan sha ni songbat sha ey, “Enshi met i mi inewat ja solat sha did Jodia ni maypangkep son si-kam. Angken sota ira kait tayon Hodiyo ja dimaw alid jay, enshi met ngo i sha inistoriya, ono sha insodsod, ey ngaaw i dingkam. <sup>22</sup> Nem angkena; piyan min intenengan ita ikowan mon wared nemnem mo, ta amta mi ey karakdan shi emin na dogad ket eg sha kosto ita kowan mon badon pamatin.” Kowan ni pangolo ni Hodiyo shi Roma.

<sup>23</sup> Jet nontan ma, inkesheng shay akew wa pan-a-apol sha nen Pablo, jet idi simabi sotan na akew wa nantotodagan sha, eshakil aliy dimaw nodta baley ya kad-an nen Pablo. Jet si Pablo, manshoki nonta agsapa, ingkato nonta mama-shem, eshakil i inolog to son si-kara, jet inkowan to pay i maypangkep ni pantoshayan nen Apo Shiyos, jet pineshas to iren inewis ja memati son Jesus, ja inbatay to nodta bilin nen Moises tan nodta naysolat ja kowan ni para padto nen Apo Shiyos nonta bayag da. <sup>24</sup> Jet sota ira eshom, waray na-awis pangkep nonta inkowan nen Pablo, nem wara ngoy eshom ma eg emati. <sup>25</sup> Jet nontan ma, sajay iren emati tan eg emati, eg ira man-inawatan, jet indekjas shes Pablo.

Nem inkowan nen Pablo nin ey, “Nayto-to-wa niman sota intorong

ni Ispirito Santo nen Apo Shiyos ja inkowan ni para padto ja si Isaias so nonta ira ammayo da, ja kowan to ey,

<sup>26</sup> ‘Inkowan nen Apo Shiyos son si-kak ey ondawak so nonta ira kait kon i-Israel, jet sajay konoy ikowan ko son si-kara: “No waray maykowan, eg jo itenengan. Kasta met no waray asen jo, singa eg jo inon-an.” <sup>27</sup> Say kabol la eg sha so itenengan, singa inopop shay tangidara; singa shaka kimita pay i matesha, isonga eg sha asen. Entakot ira ey no asen sha, ono itenengan sha, baka ewatan sha jet nakol ni si Apo Shiyos i kemangen sha say ma-omas i basol sha.’

“Sajay i inpadto ni Ispirito Santo. <sup>28</sup> Isonga niman, masepol la amta-an jo ey sajay ya esel nen Apo Shiyos pangkep ni kaysedakan, emaytoshong ngo so ni toon aliwen Hodiyo, jet si-kara et ngo mowan i ememati.” Kowan nen Pablo.

<sup>29</sup> Jet idi enaksheng nga inkowan nen Pablo iyay, indekjas nonta ira Hodiyo si Pablo, ja ireka mansosongbat met laeng nga mismo.

<sup>30</sup> Jet si Pablo, nan-iyen shiman ni showen tawen, ja si-katon mismo i nankastos ni kasapolan to. Jet emin ira di sota en mengesas son si-kato, toka ira sintila. <sup>31</sup> Jet nantorod man ni maypangkep ni pantoshayan nen Apo Shiyos, tan inkowan to pay i maypangkep so nen Apo Jesucristo. Bolos i inpangitodorod man; angken sipa, enshiy engipeshit so.

## SOTA SOLAT NEN SAN PABLO PARA SO NONTA IRA I-ROMA

<sup>1</sup> Si-kak si Pablo ja makasolat niyay, ja mismon inbetkag nen Jesucristo ja mansilbi son si-kato. Si-kak, shinotokan towak nen Jesucristo ja manbedin ni apostol to, say nak mengitosho nonta mapteng nga shamag ja edapo son Apo Shiyos. <sup>2</sup> Insigod nen Apo Shiyos ja inpaisodat to so nodta ira para padto nonta bayag da iyay ya mapteng nga shamag. <sup>3-4</sup> Sajay ya mapteng nga shamag ja naka pan-ikowan, maypangkep nonta Anak ton si Jesucristo ja Apo tayo. No sota maypangkep ni katoo nen Cristo nonta kawasha tod ja dobong, si-kato, nay-anak shi poli nen Ari David nonta bayag da; no sota maypangkep ni kina-Shiyos to ngo, inpa-amta ni Ispirito Santo nen Apo Shiyos ey si-kato sota Anak nen Apo Shiyos ja Manakabalin. Sota inpan-ongal toy ka-sasan to ey si-kato ket Anak nen Apo Shiyos. <sup>5</sup> Si Cristo i kabol la engaasi-an towak so nen Apo Shiyos; isonga shinotokan towak ja en mengikowan ni maypangkep son si-kato so nonta ira totoon eg maka-amta, say si-katoy pati-en sha, tan say si-katoy mayshedjaw shi emin na ili. <sup>6</sup> Angken si-kayo ngon i-Roma, istay eg jo amta si Apo Shiyos, nem pinidi tokejon manbedin na kokowa nen Jesucristo.

<sup>7</sup> Jet niman, sajay ya solat ko, para son si-kayon tood Roma ja ensemblek nen Apo Shiyos, ja pinidi ton manbedin ni too to. Jet say shawat ko son Apo Shiyos, sapay koma ta kaasi-an tokejo, tan ashoman to sota talna ja wara son si-kayo ja edapo met laeng son

Apo Shiyos ja Ametayo, tan si Apo Jesucristo.

<sup>8</sup> Iyay nin i ikowan ko son si-kayo. Naka man-iyaman son Apo Shiyos pangkep so nen si-kayo, ta eshakil la dogad i engamta ey emati kayo so nen Cristo. Jet say ikowanan ko so ni iyaman ko para son Apo Shiyos, si Jesucristo. <sup>9</sup> Si Apo Shiyos, amta to ey no man-shewatak son si-kato, kanayon na takejoka ishawati. Sajay ya si Apo Shiyos, si-katoy naka topogen pansilbi-an, ta say obdak, sota pengikowan nonta mapteng nga shamag maypangkep so nonta Anak to ja si Jesucristo. <sup>10</sup> Jet say shawat ko ni olay son Apo Shiyos, no mebedin koma, ipalobos to koma ja metongpalak da ja ondaw shita kadnan jo. <sup>11</sup> Tep piyan kon pasiya ja asen takejo, say ikowan ko pay koma son si-kayo sota intoro ni Ispirito Santo nen Apo Shiyos son si-kak say onkedsang i pamatiyo son Cristo. <sup>12</sup> Aliwén si-kayo bengat, no diket say piyan kon ikowan, sajay: Sota asen kon iba-deg ni pamatiyo, si-kato ngoy pekedsang so ni pamatik; jet angken si-kayo ngo, no asen jon bima-deg i pamatik, onba-deg ngoy pamatiyo. <sup>13</sup> Si-kayon a-akik shi pamati, eminshakil la piyan kon pasiya ja ondaw da son si-kayo, nem wara ni olay i kaontiped son si-kak; isonga ekak da etoltoloy. Piyan kon ondaw da shita kad-an jo say onkedsang i pamatiyo jet sotan i singa kon-oren ko son si-kayo, ja inges toy edaga shi eshom ma dogad ja dinawan ko.

<sup>14</sup> Isonga eshotokanak ja manbedin ni apostol nen Cristo say ikowan koy maypangkep son si-kato so ni sapesap — sota wared siyodad ono wared shontog, sota ekayang i ashal to ono eg nan-ashal. Bilin nen

Apo Shiyos iyay; isonga kapiditan na dag-en ko. <sup>15</sup> Isonga piyan kon pasiya ja ikowan son si-kayon tood ta Roma sota mapteng nga shamag maypangkep so nen Jesucristo.

<sup>16</sup> Ta angken towen dogad ja dawán ko, ekak ibaing ja mengikowan nonta mapteng nga shamag maypangkep so nen Jesucristo, ta sajay ya mapteng nga shamag i kawad-an ni panakabalin nen Apo Shiyos. No pati-en ni too iyay, si-katoy kaysedakan sha. Jet say pilmiro nin ja insalakan nen Apo Shiyos, sota kait kon Hodiyos jet niman ma, angken si-kayon aliwén Hodiyos. <sup>17</sup> Ekak ibaing ja mengikowan ni maypangkep son Cristo tep sotan i panshoki-an ni amta-an tayo so ey say kekosto-i so nen Apo Shiyos so ni sakey ya too ket sota kabol ni inpamati to son Cristo; enshiy eshom. Ta sajay met laeng i kaytoshongan nonta naypadto nonta bayag da, ja kowan to ey, “Sota toon kinostotan nen Apo Shiyos ni inpamati to son si-kato, si-katoy mewad-an ni biyag ja enshiy to engintegan.” Sajay i inkowan nonta padto.

*Shosa-en ngoreshan nen Apo Shiyos sota waray basol to*

<sup>18</sup> Nem sota ira eg memati son Apo Shiyos, ja ngaaw i aramid sha, ngaaw ngoy nemnem nen Apo Shiyos son si-kara. Sota ngaaw wa aramid sha, si-katoy kaonsadin nodta istay piyan nen Apo Shiyos ja amta-an sha koma, jet inpa-amta to ey eg to kosto sota ngaaw wa aramid. <sup>19-20</sup> Sigod ja ambara ngo eshan i pangkep son Apo Shiyos angken nonta inka-palsowa ni dobong; isonga enshiy dason sha ja kowan sha ey eg sha amta. Ta wara sota pinalsowa nen Apo Shiyos jet si-katoy mismon amta-an sha so ey si-katoy

Shiyos ja Manakabalin, angken eg sha inon-an. Emin na mebedin ni toon amta-an maypangkep son Apo Shiyos, edawag son si-kara tep inpa-amta to. <sup>21</sup> Amta ni too ey waray Shiyos, nem eg sha koston pati-en, tan eg sha pay nemnemen i mapteng nga inpasing nen Apo Shiyos son si-kara. Anongosto ma ey bimaki iren eg ira ma maka-awat jet enshin polos i mapteng nga shaka nemnema. <sup>22</sup> Say wared nemnem sha ma, kowan sha ey matekal ira, nem say agpayso, enshiy am-ambara. <sup>23</sup> Si Apo Shiyos ja Manakabalin, ja wara ni olay ingkatod ingka, si-katoy anam ton panshedjawan sha koma, nem apil et ngo mowan i shaka panshedjawa: sota sinan shiyos ja dingkara met laeng, ja singa tooy inkaleka to, ono singa titit, ono singa animal, ono singa oleg.

<sup>24</sup> Jet nontan ma si Apo Shiyos, binaybay-an to iray too, ja angken sota pipiyan shen ngaaw, si-katoy dag-en sha, angken nganton aramid; isonga si-kara met laeng i may-eshig ey dimo-shis so ni bakdang sha. <sup>25</sup> Jet say too, sota oowap et ngo mowan i inonod sha ja shaka panshedjawi, ey aliwa et ta sota podnon edapo son Apo Shiyos; tan sota palsowa nen Apo Shiyos i nantalimokoshan sha ja nanshayawan, ey aliwén si Apo Shiyos ja mismon emalsowa. Nalalas i inpasing sha, ta si Apo Shiyos i nebeng komen panshedjawan ingkatod ingka. Siya, satan da.

<sup>26</sup> Jet sajay ya inpanshayaw sha, si-katoy kabol la binaybay-anan so nen Apo Shiyos son si-kara; nakol ni say too, inonod sha sota pipiyan shen dag-en ja kabebaing. Angken sota bibii mala, aliwén sota dakiy shaka kosto-in esholen, no diket sota kait sha et ngo mowan na bii. <sup>27</sup> Angken sota ira daleki, iso

met laeng i aramid sha: binaybay-an shay kalekira. Jet aliwén sota bii i piyan sha, no diket sota kait sha et ngo mowan na daleki. Jet shaka dagdag-a sota pipiyan sha ja kabebaing nga aramid so ni kait shen daki; isonga si-katoy shaka pan-ikaro niman shi bakdang sha, ta sotan i anam ni wáray basol ton sajay.

<sup>28</sup> Jet nontan ma eg sha koston man-iyaman son Apo Shiyos; isonga si Apo Shiyos ngo, inbiyang to ira ja angken nankedogit i wáred nemnem sha ni olay, tan angken dag-en shay na-alas sa aramid. <sup>29</sup> Emin na kilasin ngaaw wa aramid, wára ni olay son si-kara: sota pengang-angja ni kait, sota pengamkam ni kompormi, sota pengokes ni kait, sota apal, sota pemono, sota pekibekal, sota pengi-owap, sota sikap, sota somang. <sup>30</sup> Say shaka pesing pay, shaka iba-ba-ngat ja kowan sha ey ngaaw i eshom, kontra shes Apo Shiyos, shaka bebaingiy eshom; etangsit tan ma-itek pay ira, tan tima-nil la ngaaw i pangkep sha; tan endedamsis shay amesha tan inesha. <sup>31</sup> Enshiy mapteng nga shaka ewáti, eg ira mepiyal, eg sha amten mengaasi ni eshom ono ontolong. <sup>32</sup> Angken amtaren pasiya ey inkowan nen Apo Shiyos ey sota mandeka niyay ya ngaaw wa aramid ket anam shen meshosa ingkatod ingka, si-kato pay laeng i shaka dagdag-a, jet shaka pay ikowan ey “siya kosto”, no onoran ni eshom.

## 2

<sup>1-2</sup> Say inkowan ko la, sajay. Sota toon wáray basol to, anam ton meshosa. No sota mengitneng niyay ket kowan to ey epalado noman i basol ni eshom, ja eg to ida-kam i bakdang to, enshi met laeng i to idason son Apo Shiyos, ta singa bakdang to met

laeng i toka panshoyshoya nontan na kowan to ey basol ni eshom. Ta iso met laeng ja nan-inges i aramid shen ngaaw. Jet amta tayo ey sota showen toon nan-inges i basol sha, nan-inges met laeng nga shosa-en nen Apo Shiyos iren showa, angken ngantoy katoora. <sup>3</sup> Isonga sota toon emengikowan ey epaladoy basol ni eshom, eg to ngo disi-an sota shosa nen Apo Shiyos, ta angken si-kato, iso met laeng ja ngaaw i aramid to. <sup>4</sup> Say kowan to emo, eg shosa-en nen Apo Shiyos tep na-anos si Apo Shiyos, tan masmek pay ni too; kowan to emo nem pasinsiya-an nen Apo Shiyos. Nem say nemnemen to koma, sota ebadeg ga semek nen Apo Shiyos so ni too ket piyan ton say manbebawi koma ira ni maypangkep ni basol sha. <sup>5</sup> Nem etangken i nemnem ni too, eg sha koston manbebawi maypangkep ni basol sha; isonga singa shaka pan-olnonga i basol sha ja si-kato met laeng i keshosa-an sha, no onsabi ali sota timpon penosa nen Apo Shiyos so nonta ira nanbasol. Tep koskosto i pengigsheng ali nen Apo Shiyos, <sup>6</sup> ja maytotop nodta dingka ni sakey tan sakey. <sup>7</sup> Jet sota toon enganos ja nandaga ni mapteng, tep toka kamkamkamiy kay-a-tek tod dangit, ono sota koreto to ingkatod ingka, si-katoy may-aknan ni biyag ja enshiy to engintegan. <sup>8</sup> Nem sota ira eg makakosto son Apo Shiyos, ja eg memati nonta kowan to, ja say pipiyan sha et ngo mowan ket sota ngaaw wa aramid, shosa-en ali nen Apo Shiyos iren pasiya. <sup>9</sup> Say da-kaman ni emin na toon ngaaw i aramid to, mandikat iren enshiy sha delstotan, jet say pilmiro nin son si-kara, sota ira Hodiyo, asan men sota aliwén Hodiyo. <sup>10</sup> Nem sota ira toon mandeka ni mapteng, may-a-tek ira jet



wara pay son si-karay talna. Jet say pilmiro met laeng, sota ira Hodiyo, jet asan sota ira aliwen Hodiyo ma.

<sup>11</sup> Edawag ey angken sipa, enshiy en pandesin nen Apo Shiyos ja to paboran. <sup>12</sup> Emin ira sota toon nanbasol ja eg maka-amta nonta bilin nen Apo Shiyos, meshosa met laeng ira, nem eg maybetay nodtan na bilin. Jet sota ira maka-amta nonta bilin nen Apo Shiyos nem nanbasol, meshosa ngo ira ja maybetay nodtan na bilin. <sup>13</sup> Sotan i pesing nen Apo Shiyos, ta aliwen sota mengiteng bengat ni bilin to i kosto-an nen Apo Shiyos so ni too, no diket sota on-onod ja tongpalen to sota bilin, sotan i kosto-an nen Apo Shiyos. <sup>14</sup> Sota ira toon aliwen Hodiyo ja enshi son si-kara sota mismon bilin nen Apo Shiyos, waray eshom son si-kara ja shaka dekna-a met laeng ey mesepol la mandeka ira ni mapteng, jet sotan na dag-en sha, emay-enam met laeng nodta bilin nen Apo Shiyos. Si-kara met laeng i ememidin shorog ni bakdang sha, angken enshi sota bilin nen Apo Shiyos ja ememidin son si-kara. <sup>15</sup> Jet angken enshi son si-kara sota bilin nen Apo Shiyos ja naysolat ja onoran sha, ma-sas met laeng ey wared nemnem sha sota koston kowan ni bilin, jet shi deknara, waray emengipa-amta ey ngaaw i dingkara. Nem no sina-shom, shaka dekna-a ey enshiy basol sha. <sup>16</sup> Jet no onsabi ali sota timpo ja pengigsheng nen Apo Shiyos no sipay maysedakan, angken sota aramid sha, ono pangkep shen in-em-emot sha, po-jasan nen Cristo Jesus. Sajay ya pemo-jas nen Cristo i sakey nodta naka pan-itoro ni olay, maypangkep son sikato.

<sup>17</sup> Jet angken sota ira kait kon Hodiyo, iso met laeng i pesing

nen Apo Shiyos son si-kara. Ireka manshinel nodta bilin nen Apo Shiyos ja wara son si-kara, jet sikatoy shaka idastog ja kowan sha ey amtara si Apo Shiyos. <sup>18</sup> Kowan sha pay ey amtara kono no ngarantoy piyan nen Apo Shiyos ja dag-en sha, tan shaka ikowan pay ey “Siya, sotan i mapteng”, ta etod-an ira nonta bilin nen Apo Shiyos. <sup>19</sup> Jet shaka namnama-a ey si-kara i mebedin na mengitoshosho so nonta ira eg maka-amta son Apo Shiyos ja may-eshig ey ekorab, tan si-karay para dawag kono ni nemnem ira nonta may-eshig ey wared embolinget. <sup>20</sup> Jet kowan sha ey si-karay mengitoshosho ni mapteng so nonta ira eg etod-an, tan kowan sha ey itod-an sha ira sota waray kolang to ja singa a-anak. Jet shaka ikokowan ey wara sota bilin nen Apo Shiyos son si-kara, isonga kowan sha ey amtara konon emin sota podno. <sup>21</sup> Nem sota ira Hodiyo, apil met kariy shaka pesing! Kowan sha ey mengitoshosho ira ni eshom, nem eg sha met itod-an i bakdang sha! Say toro sha, kowan sha ey ngaaw i mengibot, nem angken si-kara kari ket ireka mengibot! <sup>22</sup> Jet kowan sha pay ey ngaaw i pemii, nem angken karin si-kara, ireka ememii! Kowan sha pay ey ngaaw i manshedjaw so nonta sinan shiyos, nem shaka met pankibota sota wara nodta timplo ni pagano ja istay seskigen sha koma! <sup>23</sup> Sikaren emengilastog nonta may-pangkep ni bilin nen Apo Shiyos, eg sha met onoren sota kowan nontan na bilin. Eg man-inges sota shaka ikowan tan sota shaka dagdag-a, isonga niman, sotan i kabol la dinamsisan so ni eshom so nen Apo Shiyos. <sup>24</sup> Sajay i kaytoshongan nonta naysolat nonta bayag da, ja kowan to ey, “Isonga ngaaw i kaikokowan ira nonta too ja aliwen Hodiyo ni maypangkep

so nen Apo Shiyos, ta si-kayoy kabol.”

<sup>25</sup> No sota maypangkep ni kina-Hodiyos, istay waray pandesinan sha, no shaka koma onora sota bilin nen Apo Shiyos. Nem no eg sha onoren, enshi met laeng i silbi nonta kina-Hodiyos sha, enshi may singa kaydesinan sha so nonta ira aliwen Hodiyos. <sup>26</sup> Sota toon aliwen Hodiyos, no si-kara et ngo mowan i emay-enam i ogadira nodta bilin nen Apo Shiyos, si-karay koston maybidang ey too ma nen Apo Shiyos. <sup>27</sup> Jet sajay iren aliwen Hodiyos ja kostoy ogadira, angken enshin sigod son si-kara sota bilin nen Apo Shiyos, si-kara et ngo mowan i pengibetayan nen Apo Shiyos ey ebadeg i basol ira nonta Hodiyos. Ta sota ira mismon Hodiyos, ja kawad-an ni naysolat ta bilin nen Apo Shiyos, eg sha onoren sota kowan nonta bilin, nem sota ira aliwen Hodiyos et ngo mowan, nay-anam i shaka pesing nodta bilin. <sup>28</sup> Isonga aliwen sota kina-Hodiyos i kaybidangan ni sakey ya too ey too ma nen Apo Shiyos, <sup>29</sup> no diket say podnon too nen Apo Shiyos, sota inpanbaliw ni Ispirito Santo nen Apo Shiyos i wared poso to. Ipinshowak ey aliwen sota pengonod ni ogadi ni Hodiyos i kaybidangan ni too son Apo Shiyos. Si Apo Shiyos i mengiredjaw nonta toon panbediw ni Ispirito Santo to, nem mebedin na eg mango ishayaw ni kait ton too.

### 3

<sup>1</sup> Sotan den inkowan ko, baka ikowan jo et ey sota ira Hodiyos, enshiy sha nandasinan, jet kowan jo ey enshiy silbi gayam nonta ogadira. <sup>2</sup> Kina-agpayso to, eshakil i nandasinan sha so ni emin na totoo. Say pilmiro, si-karay naypiyalan nonta esel nen Apo Shiyos ja naysolat.

<sup>3</sup> Agpayson waray eshom ma kait kon Hodiyos ja eg memati nonta kowan nen Apo Shiyos, nem angken eg memati i eshom, aliwen sotan i eg itoloyan so nen Apo Shiyos nonta sigod ja bindisiyon ja inkari to so ni poli nen Abraham. <sup>4</sup> Si Apo Shiyos, emin na kowan to, tongpalen to, angken emin na too ket ma-owap. Isonga waray naysolat nonta bayag da ja kowan to ey, “Sota moka itongpal so ni kowan mo, Apo Shiyos, si-katoy asanan so ni totoo ey enshiy oowap son si-kam; si-kam ngo eshan i mengebak, angken sipen too i makakowan ey eg mo di tongpalen i kowan mo.”

<sup>5</sup> Sajay met laeng i ka-osala ni eshom ni dason sha, ja kowan sha ey, “No kasta, eg shakito koma shosa-en nen Apo Shiyos tep no enshi komay kakedsel ni too, eg maykowan ey mapteng si Apo Shiyos, ta enshiy kay-eshigan to. No sotan i pesing nen Apo Shiyos, singa inba-ngat toy shosa son si-katejon totoo!” (Aliwen si-kak i makanemnem niyay; naka pan-ikowan bengat, ta si-katoy kowan ni eshom.) <sup>6</sup> Nem arawi sotan! Si Apo Shiyos, enshiy kolang to, isonga koskostoy toka pengigsheng no sipa so ni tood ja dobong i maysedakan. <sup>7</sup> Kowan pay ni eshom ni dason sha ey, “No sota naka pengi-owap ket si-katoy ka-amta-an ton pasiya ey si Apo Shiyos ket enshiy oowap pa toka ikowan, apay nga kowan to ey ikarok pay laeng i inpan-owap ko?” <sup>8</sup> Singa kowan sha ey angken mandeka kito ni basol ta say panbenagan to, panmaptengan met laeng. Say kowan kono ni eshom, sotan i mismon mika pan-itoro, nem angkena. Ta si Apo Shiyos, esaganen menosa nonta ira totoon maledamsis, jet sotan i anam ton mepesamak son si-kara.

<sup>9</sup> Jet niman, enshiy nandasi-nan ni Hodiyo shi sango-an nen Apo Shiyos. Si-kato sota inkowan ko la, ey sapasap i toon kanayon na emanbesol — angken sipa, Hodiyo ono aliwén Hodiyo.  
<sup>10</sup> Sajay met laeng sota kowan nonta naysolat nonta bayag da ey,

“Angken sipa, enshiy toon mapteng ni olay i toka dagdag-a; <sup>11</sup> enshiy maka-awat nonta inpa-amta nen Apo Shiyos, enshi pay i kaonnemnem son Apo Shiyos. <sup>12</sup> Emin na too, inbiyang sha si Apo Shiyos, jet nan-i-inges iren ngaaw i shaka dagdag-a. Angken sakey, enshiy ogadi ton naytotop shi piyan nen Apo Shiyos. <sup>13</sup> Say emanekad shi bagang sha, edogit ta esel, isonga may-eshig ira ey naydiyangan ni etey ja epojasan. Angken pay sota shaka pekitbal, olbod. Sota esel la emanbo-day shi bongot sha, may-eshig ey singa sota shita ni oleg, tep emeneshal ni kait shen too. <sup>14</sup> Say shaka ikowan ni olay, sota abig tan empait ta esel. <sup>15</sup> Jet say aramid sha pay, alisto iren menekit ni kait sha, tan angken pay bono-en sha. <sup>16</sup> Jet angken toway toshongen sha, shaka pedigatay too nodtan, tan shaka kodo-a. <sup>17</sup> Sota mengikan ni olnos ni biyag sha, eg sha amta, <sup>18</sup> jet eg sha pay amten tekotan si Apo Shiyos.”

Sajay i kowan nonta naysolat ja bilin nen Apo Shiyos nonta bayag da, <sup>19</sup> jet amta tayo ey sota kowan nonta bilin ja nay-awat nonta bayag da, say kaytoshongan to, sota ira toon nay-awatan to ngo ja Hodiyo. Jet say kabol la naysolatan nontan, say angken sipen too, mayda-kam ira ngo ja enshiy sha idason son Apo Shiyos, tan say amta-an pay ni emin na tood ja dobong ey waray ikaro sha

so nen Apo Shiyos ja basol sha. <sup>20</sup> Ta angken sipen too, enshiy kosto-an nen Apo Shiyos ni kabol bengat ni pengonod to so nonta kowan ni bilin ja nay-awat nonta bayag da. Ta sotan na bilin, si-katoy mengipa-amta bengat ey waray basol tayan totoo.

*Emin na tood ja dobong, sota pamati to son Cristo i kosto-an so nen Apo Shiyos son si-kato*

<sup>21</sup> Nem niman, inpa-sas nen Apo Shiyos so ni totoo ey aliwén sota pengonod nonta bilin nonta bayag da bengat i kosto-an to so ni too. Jet angken sotan na bilin ja naysolat, tan sota kowan ni para padto nonta bayag da, toka ipalewag met laeng ey aliwén sotan i kosto-an so nen Apo Shiyos so ni too. <sup>22</sup> Say kosto-an so nen Apo Shiyos so ni too, sota pamati to so nen Jesucristo. Jet sama ira Hodiyo, eg to paboran; nan-i-inges i pesing to so ni emin na too. <sup>23</sup> Ta sapasap ja nanbasol i toon emin. Enshiy en pimosin engonod nonta kowan nen Apo Shiyos, isonga emin na too, arawi ira nodta eshiyosan na ogadi ja istay piyan to komen dag-en sha. <sup>24</sup> Nem niman si Apo Shiyos, kosto-an shakito ta ebadeg i kaasi to, jet sajay ya kaasi to, dibshi; aliwén sobadit ni dingka tayo. Sajay i dag-en to, ta inkaro nen Cristo Jesus shi koros sota istay keshosa tayo. <sup>25</sup> Si Apo Shiyos, ninemnem to ngo eshan ey si Cristo, metey ja maybokbok i shaletto shi koros, say emin na memati son si-kato, mepekawanan i basol sha. Sajay i dingka nen Apo Shiyos say ma-amta-an ey kosto ngo eshan i toka dagdag-a. Ta angken inpalebas to nin nontan da sota basol ni totoo ta na-anos, <sup>26</sup> niman na etey si Cristo, inpa-sas to ey eg to mala pedabas. Jet niman ma, toka kosto-iy too no memati son Jesus.

27-28 Jet enshi mala niman i tayo idastog, ta say kosto-an shakito so nen Apo Shiyos, aliwen sobadit nonta dag-en tayon mapteng ja pengonod ni bilin to. Say kowan ko, say kekosto-i so nen Apo Shiyos so ni too, sota pemat i to son Cristo. 29-30 Jet nan-i-inges i Hodiyo tan aliwen Hodiyo ja kosto-an nen Apo Shiyos may-pangkep ni pamatira. Ta si Apo Shiyos, abos ton Shiyos ja podno, jet aliwen sota Hodiyo bengat i maka-Shiyos so, no diket Shiyos ngo met laeng ira nonta aliwen Hodiyo. 31 Sajay ya inkowan ko la, aliwen kowan ko ey ibiyang tayo sota bilin nen Apo Shiyos nonta bayag da, ja naysolat; ekak ikowan ey sina-datan niya pamati son Cristo. Enshi, arawi itan. Say agpayso, si-kamiy emengitosho ni koston olog nontan na bilin.

#### 4

1 Jet si Abraham ngay, ja apo tayo da nonta bayag? Ngantoy inpasing to ja kinosto-an so nen Apo Shiyos son si-kato? 2 No si Abraham ket sota may-pangkep ni dingka to i kinosto-an so nen Apo Shiyos son si-kato, istay wara komay idastog to. Nem enshi; isonga angken si Abraham, enshiy to idastog son Apo Shiyos ja dingka to. 3 Niman, nemnem jo kari sota naysolat nonta bayag da, ja kowan to ey, "Si Abraham, emati so nen Apo Shiyos jet sotan i kabol la kinosto-an so nen Apo Shiyos son si-kato, ja naybilang to ey singa enshiy basol to."

4 Arig to sota dagbo ni sakey ya toon nan-obda. Aliwen in-akan nonta toon nandagbo-an ja kaasi to son si-kato, no diket indigatan nonta nandagbo. 5 Nem say itsora ni kepesing nen Apo Shiyos, dibshin kaasi, isonga toka ibilang sota emati son si-kato ey singa enshiy basol sha, angken say

kinapodno to ket ebadeg i basol sha. Nem sotan na too, mesepol la manshinel ira son Apo Shiyos, ja eg manshinel nonta dingkara, ey si-katoy kosto-an so nen Apo Shiyos son si-kara. 6 Jet angken si Ari David nonta bayag da, inges niyay met laeng i kowan to. Inkowan to ey say too ja inbilang nen Apo Shiyos ja singa enshiy basol to, man-imdeng ma, ta sota inpangaasi nen Apo Shiyos son si-kato, aliwen sobadit iyay ni dingka to. 7 Say insolat nen Ari David, sajay: "Man-imdeng sota toon epakawanan i basol to, ta may-eshig ey sotan na basol to, singa enshi mala. 8 Man-imdeng sota toon eg ibilang ma nen Apo Shiyos sota basol to." Kowan nen Ari David.

9 Jet iyay pay i piyan kon nem-nemen jo. Sajay ya inkowan nen Ari David may-pangkep ni pan-imdeng, ja inkaasi nen Apo Shiyos, aliwen na para so ni Hodiyo bengat, no diket pati sota ira aliwen Hodiyo, mayda-kam ira ngo. Tayoka pati-a ey sota pamati nen Abraham i inbilang so nen Apo Shiyos son si-kato ey singa enshiy basol to. 10 Nem nontan, aliwa nin na maykowan ey Hodiyo si Abraham, ta eg pay laeng ekogit. Nem sigod ja inbilang ngo eshan nen Apo Shiyos ey singa enshiy basol nen Abraham, 11 jet idi inonod ton mekokit, say olog nontan, sigorado ma ey si-kato ket too ma nen Apo Shiyos. Nem kinosto-an na sigod nen Apo Shiyos si Abraham nonta inpamati to son si-kato. Say kabol la dingka-an so nen Apo Shiyos so niyay, say si Abraham i panbedin to ja ama ni emin na memati ali. Angken sota ira aliwen Hodiyo ja eg ekogit, ibilang nen Apo Shiyos ira ngo ey enshiy basol sha. 12 Si Abraham met laeng i ama ira nonta Hodiyo ja imonod so ni ogadi ja kogit,

nem aliwén sota inkakogit sha i nayda-kaman sha son Abraham, no diket mesepol la memati ngo ira ja onoran shes Abraham ja apo tayo da, ta emati ngo eshan si Abraham nonta aneng i i-onod to so nonta ogadi ni Hodiyo ja kowan sha ey kogit.

<sup>13</sup> Sota inkari nen Apo Shiyos so nen Abraham nonta bayag da ey si-kato tan sota poli to ali i ontawid so niya dobong, aliwén na nay-awat son si-kato ja sobadit nonta inpangonod to so ni bilin nen Apo Shiyos ja nay-awat so ni Hodiyo. No diket say kabol la inkari-an to so, sota inpamati nen Abraham son si-kato. Sotan i kinosto-an son Apo Shiyos son si-kato. <sup>14</sup> Ta no bilang ey say i-awatan so nen Apo Shiyos so nonta dobong ja inkari to ket sota emengonod so nonta bilin ja nay-awat so ni Hodiyo, eg to tong-palen i kari to gayam. Jet angken sota pamati son Cristo, enshiy silbi to, no sotan i pesing nen Apo Shiyos. <sup>15</sup> Enshiy eshom ma tayo tinewid shima bilin na nay-awat so ni Hodiyo nem eg sota keshosa ali ni totoon eg imonod so. Sajay i itsora ni angken nganton bilin, ta no waray amtam ma bilin, ey eg mo onoren, basol mo.

<sup>16</sup> Isonga sota kari nen Apo Shiyos, in-awat to son Abraham tep emati son si-kato. Sotan i inpasing nen Apo Shiyos ta piyan ton kaasi-an si Abraham. Jet aliwén sota emengonod ni bilin ja nay-awat so ni Hodiyo bengat i maybidang ey poli to, no diket angken sota ira memati ja inges toy inpasing nen Abraham, mayda-kam ira ngo. Ta si-katoy ametayon emin shi pamati. <sup>17</sup> Owen, si-katoy ametayon emin ja emati, jet naytotop iyay nodta naysolat nonta bayag da ja kowan to ey, “Si-kam Abraham i panbedin kon ama ni tood ka-ili-ili.” Si

Apo Shiyos i makakowan niyag, isonga amta tayo ey si-katejon emati, shakitoka ibilang ey poli nen Abraham, ta angken si Abraham, emati son Apo Shiyos ja ememiyag nonta nanketey, tan emengikowan ey mepalsowa i angken nganto, jet siya, emayto-to-wa.

<sup>18</sup> Si Apo Shiyos, inkari to son Abraham ey mebonat sota poli to. Isonga si Abraham ja istay enshiy namnama ton on-anak si asewa to tep eba-kol ma, pinati to sota inkowan nen Apo Shiyos jet isonga ewad-an ni namnama. <sup>19</sup> Singa eg mebedin men mengipotot, nem makedsang ngoreshan i pamati to, angken na edakay ya pasiya (tep say tawen to nontan, sandasos ma), tan angken si Sara ja asewa to ket kowan sha ey basig. <sup>20</sup> Nem nontan, maked-sang ngo eshan i pamati to ja enshiy showashowa to maypangkep nonta kari nen Apo Shiyos son si-kato. Eg kimapoy i pamati to; intoltoloy to ngoreshan ja nan-shayaw so nen Apo Shiyos. <sup>21</sup> Ta ebadeg i namnama to ey sota kari nen Apo Shiyos son si-kato, kabaalan ton dag-en. <sup>22</sup> Isonga sota pamati to i inbilangan so nen Apo Shiyos son si-kato ey enshiy basol to.

<sup>23</sup> Sota naysolat nonta bayag da, jey inbilang nen Apo Shiyos si Abraham ey enshiy basol to, aliwén naysolat maypangkep son si-kato bengat, <sup>24</sup> no diket si-katejo ngo ket maybidang kito ngo ey enshiy basol tayo, no memati kito son Apo Shiyos ja inpan-ongal so nen Jesus ja Apo tayo. <sup>25</sup> Si Jesus, intolok toy bakdang ton metey shi koros say ikaro toy basol tayo, tan nanbiyag mowan say mebedin na kosto-an shakito ma nen Apo Shiyos no memati kito son Cristo.

## 5

<sup>1</sup> Niman ma, ta emati kito so nen Cristo, kinosto-an shakito ma nen Apo Shiyos jet mapteng may pengidmang nen Apo Shiyos son si-katejo; eg shakito ma shosaken. Sajay i kabol la eteyan nen Jesucristo ja Apo tayo shi koros; <sup>2</sup> jet niman, si-katoy nayda-kaman tayo nodta kaasi nen Apo Shiyos ni inpamati tayo son si-kato. Jet kitoka ma man-imdeng nodta namnama tayo ja maydakam so nen Apo Shiyos shi dangit. <sup>3</sup> Jet aliwen sotan bengat, no diket kitoka pay eman-imdeng nonta digat niman ja tayoka da-da-kami, ta amta tayo ey no enosan tayo jay ya digat, onkedsang i nemnem tayo, say eg kito ma-ebak no wara pay i onsabin digat, <sup>4</sup> jet no amta-an tayon man-enos ni olay, man-imdeng si Apo Shiyos son si-katejo. Jet no sigoradon amta tayo ey man-imdeng si Apo Shiyos son si-katejo, waray namnama tayo ey shi ma-onod alin timpo, mapteng nga pasiya i panbenagan tayo. <sup>5</sup> Jet sota tayoka namnama-a ja tayoka sesseskera, agpayson tongpalen nen Apo Shiyos, ta ebadeg ga pasiyy semek to son si-katejo. In-akan nen Apo Shiyos i Ispirito Santo to son si-katejo, isonga amta tayo ey ebadeg i semek to son si-katejo.

<sup>6</sup> Enshin polos ngo eshan i mebedin na dag-en tayon kaysedakan tayo tep ebadeg i basol tayo. Nem idi simabi sota koston timpo, etey si Cristo shi koros para son si-katejon totoo ja istay eg memati son Apo Shiyos. <sup>7</sup> Manmano son si-katejon too i masi-met ta metey angken para so nonta eshiyosan na too. <sup>8</sup> Nem si Cristo etey para son si-katejo nonta eg pay laeng epakawanan sota ebadeg ga basol tayo. Sotan i amta-an tayo so ey ebadeg i semek nen Apo Shiyos son si-katejo.

<sup>9</sup> Sota naybokbok ka shala nen Cristo nonta inkatey to shi koros i kaybidangan tayo ma ey songa enshiy basol tayo; isonga waray namnama tayo ma ja isalakan shakito no onsabi sota timpon penosa nen Apo Shiyos so nonta ira eg emati. <sup>10</sup> Agpayso ey nonta pilmiro, endedamsis tayos Apo Shiyos, isonga eg shakito kosto. Nem idi etey sota Anak to shi koros, ja inkaro toy basol tayo, mapteng ma, enshi la sota istay inkaysi-jan tayo son Apo Shiyos. Sigod ja naysi-jan kito son si-kato, nem intolok ton etey sota Anak to para son si-katejo, jet sigorado men amta tayo ey maysedakan kito ma shi anongosto tep wares Cristo shi biyag ja emengibediw son si-katejo. <sup>11</sup> Aliwen na say pan-imdengan tayo bengat ket sota eg tayo ma keshosa, no diket kitoka man-imdeng ta wara kito son Apo Shiyos niman na na-olnos sota istay inkaysi-jan tayo son Apo Shiyos. Si Jesucristo ja Apo tayo, si-katoy dimaga so niyay; isonga nay-esop kito ma son Apo Shiyos.

*Si Cristoy engipatewid ni biyag ja enshiy to engintegán*

<sup>12</sup> Apay nga waray basol shiya dobong? Say nanshogi-an to, sota sakey ya too nonta bayag da ja si Adan. Si-katoy kabol la ewara-an ma ni patey shiya dobong. Manipod nontan ingkato niman, emin na too, kenshat ta metey ira ta sapasap pa nanbasol. <sup>13-14</sup> Angken nonta bayag da ja eg pay laeng in-awat nen Apo Shiyos sota bilin to so nen Moises, ngaaw ngo eshan i kedagdag-a ira ni totoo. Jet basol sha ngo sotan; nem eg maybidang ey inges toy basol ira nonta nay-awatan ni bilin nen Apo Shiyos. Si Adan nonta pilmiro, si-katoy sakey ya nay-awatan ni bilin nen Apo Shiyos, jet manshoki son Adan, ingkato so

nen Moises, na-amta-an ngo eshan ey wáray basol sha tep etey ngo met ira.

Si Adan, wáray singa kay-ingesan to son Cristo ja na-onod ja dimaw ali, ta wáray inpatewid shen showa so ni totoo. <sup>15</sup> Nem sota kaasi nen Apo Shiyos ja inpatewid nen Jesucristo, tan sota basol, ja inpatewid ngo nen Adan, arawin enshiy sha nan-ingesan. Ta agpayson eshakel i emetey maypangkep ni basol ja inpatewid nen Adan, nem ebadbadeg ngo eshan sota kaasi nen Apo Shiyos ja memekawan ni basol, jet eshakel i totoon nayda-kam nodta kaasi to. <sup>16</sup> Jet na-apil ngon pasiya i nanbanagan ni basol nen Adan, tan sota kaasin edapo so nen Cristo, ta nonta nanbasol sota sakey ya too, say nanbanagan to, istay meshosen emin i totoo, tep sapa sap iren nanbasol. Nem angken ngaaw i dingdingkara, ebadeg ngo eshan i kaasin edapo so nen Cristo, jet say nanbanagan to, kinosto-an ma ira nen Apo Shiyos et inbilang to ey singa enshiy basol sha ma. <sup>17</sup> Isonga no maypangkep nonta basol nonta sakey ya too ja si Adan, emin ma ja too, kenshat ta metey, manshoki nontan ingkato niman. Sotan i nanbanagan nonta aramid nen Adan. Nem say nanbanagan nonta aramid nonta sakey ya too ja si Jesucristo, mayda-kam ira so nen Jesucristo sota totoon ibilang to ey enshiy basol sha, no onsabi ali sota badon biyag.

<sup>18</sup> Sotan na basol ni sakey ya too, ja si Adan, si-katoy kabol la istay shosa-an so nen Apo Shiyos so ni emin na totoo. Nem si Cristo, pinati ton emin i bilin nen Apo Shiyos ingkato nonta eteyan to shi koros, jet sotan na inpasing to ngo, si-katoy ibilangan so nen Apo Shiyos so ni emin na too ey singa enshiy basol sha, jet i-aknan to ira

ni biyag. <sup>19</sup> Sota sakey ya too, ja si Adan, eg to pinati sota kowan nen Apo Shiyos, jet si-katoy kabol la nayda-kaman ni emin na totoo ni basol. Nem sota sakey ya too ja emati nonta kowan nen Apo Shiyos, ja si Cristo, si-katoy kabol la ibilangan so nen Apo Shiyos so ni eshakel la totoo ey singa enshi may basol sha.

<sup>20</sup> Nonta nay-awat sota bilin nonta bayag da son Moises, singa inparakel to et i basol ni too tep inamta-an sha sota bilin nen Apo Shiyos, nem eg sha inbi-jag sota shaka dagdag-a ja ngaaw. Nem angken na emanba-deg nontan i basol tan emankaiweshis, mas ebadbadeg ngo eshan i kaasi nen Apo Shiyos. <sup>21</sup> Agpayso ey say singa enanggal ni biyag ni emin na totoo ket sota basol, isonga wáray patey. Nem niman ma, sota kaasi nen Apo Shiyos, si-katoy mengebak ja mengi-kan ni biyag ja enshiy to engintegan so nonta ira toon toka kosto-i. Jet sajay ya toka isalakani son si-kara, emedepo son Jesucristo ja Apo tayo.

## 6

*Kinaasi-an shakito nen Apo Shiyos, nem aliwen piyan ton aselen ey bolos may panbesol*

<sup>1</sup> Jet sotan den inkowan ko, baka ikowan jo et ey mapteng no itoltoloy tayon manbesol, ta no onba-ba-deg i basol, ma-mashoman i kaasi nen Apo Shiyos.

<sup>2</sup> Nem enshi! Arawi itan na nem-nem. Say agpayso, enshi may bibiyang tayon manbesol ja inges to sota etey ja eg ma manbesol.

<sup>3</sup> Amtayo met ey nonta ebonjagan kito ja nayda-kam son Cristo Jesus ket ebonjagan kito ngo ja nayda-kam ni inkatey to. <sup>4</sup> Sota inpanbonjag tayo, say kay-eshigan to, singa etey kiton nayda-kam so nen

Cristo ja naybeka. Jet say sakey pay ja kay-eshigan ni inpanbonjag tayo, singa nayda-kam kito so nen Cristo nonta inpanbiyag so nen Apo Shiyos maypangkep ni panakabalin to, say mebado-an ngoy biyag tayo niman na wára kitod biyag.

<sup>5</sup> Ta no si-katejo ket nayda-kam kiton singa etey, ja kadwá nen Cristo, mayda-kam kito met laeng son si-kato ja man-ongal ja inges to. <sup>6</sup> Amta tayo met ey sota sigod ja ogadi tayo nonta eg kito pay laeng emati ket singa ekilansa sotan na ogadi so nen Cristo shi koros, say sotan na ngaaw wa aramid ni bakdang tayo, mesadatan, jet aliwén sota basol ma i ontengel son si-katejo. <sup>7</sup> Singa kowinta ey etey kito jet amtayo ey say etey ya too ket eg mebedin na manbesol tep etey ngarod.

<sup>8</sup> Nem no etey kito ja nayda-kam so nen Cristo, wáray shinel tayo ey mayda-kam kito ngo ali ja mekibiyag son si-kato. <sup>9</sup> Ta amta tayo ey si Cristo, nanbiyag shi patey jet eg ma metmetey, ta sota patey, enshiy to naybiyangan son si-kato. <sup>10</sup> Say kabol la eteyan to, say ikaro toy basol ni totoo, jet etey ni pinsak bengat para so ni emin na too. Nem sota biyag ja wára son si-kato ma niman, para sota kayshedjawan nen Apo Shiyos. <sup>11</sup> Isonga angken si-kayo, ibidang jo ngoy bakdang jo shorog ey etey kayo da ja enshiy jo kaybiyangan ni basol, nem nemnem jo ngo ey ebiyag kayo met laeng para sota kayshedjawan nen Apo Shiyos maypangkep ni pamatiyo so nen Cristo Jesus.

<sup>12</sup> Karejo ipalobos ja sota basol i mengebak son si-kayo, say eg jo onoren sota pipiyan ni bakdang jo ja ngaaw; <sup>13</sup> karejo itolok shorog i bakdang jon mandeka ni ngaaw wa aramid, no diket say dag-en jo

koma, itodok jon osalen shakejo nen Apo Shiyos ja mansilbi met laeng son si-kato ni pandeka ni mapteng. Ta si Apo Shiyos i engikan ni biyag son si-kayo nonta singa etey kayo. <sup>14</sup> Nemnem jo ey enshiy pesing ni basol son si-kayo, ta say kasesaad jo niman, wára kayo ma son Apo Shiyos ja kinaasi-an shakejo; isonga sota kaysedakan tayo ket eg maybetay nodta pengonod tayo nonta bilin ja nay-awat nonta bayag da.

<sup>15</sup> Nem eg jo koma ikowan ey, “Angken manbesol kito, sagang mango et aliwén sota pengonod ni bilin i kaysedakan tayo, nem eg sota kaasi nen Apo Shiyos son si-katejo.” Nem enshi! Arawi itan na nemnem! <sup>16</sup> Amtayo met ey no ngantoy naydowaman jon dagen, sotan i singa enanngel son si-kayo. Isonga no naydowam kayon manbesol, singa sotan i enanngel son si-kayo. Jet say panpano-an ni joka panbeshesol, patey ja enshiy to engintegan. Nem no naydowam kayon memati son Apo Shiyos, say panbenagan jo, ewaten shakejo nen Apo Shiyos jet maybidang kayo ma ey enshiy basol jo. <sup>17</sup> Nontan da, naydowam kayon manbesol, nem niman, man-iyaman kito so nen Apo Shiyos, ta say pinatiyon nay-edet shi poso jo ma, sota koston toro, jet si-kato mayjoka on-onora ni olay. <sup>18</sup> Jet niman ma, enshiy pesing ni basol ja menngel son si-kayo, ta say singa nanngel son si-kayo niman, naydowam kayon mandeka ni piyan nen Apo Shiyos. <sup>19</sup> (Saja inosal kon esel, sota nam-ay ya esel la tayoka osala ni olay, tep si-katoy nam-ay ya ewatan tayon too.) Nontan da sota bakdang jo, joka osala ja mandeka ni ensekig ga aramid, jet emankema-sota sotan na aramid jon ngaaw. Nem niman ma, baliwiyo, osal



jo ta bakdang jo ja mandeka nonta piyan nen Apo Shiyos, say mapteng ni olay i dagdag-en jo.

<sup>20</sup> Nontan da, naydowam kayon manbesol, isonga eg jo ngo nem-nemen ja mandeka ni mapteng nga aramid ja kekosto-i nen Apo Shiyos. <sup>21</sup> Nem enshi met i jo kinon-od ja mapteng nodta dingdingkayo nontan da, ja si-katoy joka ibebaing niman. Patey ingkatod ingka i panpa-no-an ni inges ira nontan na aramid. <sup>22</sup> Nem niman ma ja aliwen basol i timengel son si-kayo, si Apo Shiyos i naydowaman jon onoren, jet asdeg to may kinon-od jo tep emanmapteng may ogadiyo, ja mebedin na waray kay-ingesan to son Apo Shiyos. Jet say panpa-no-an niyay, mewad-an kayo ni biyag ja enshiy to engintegan. <sup>23</sup> Isonga say sobadit ni basol, patey ingkatod ingka, nem waray dibshin i-akan nen Apo Shiyos so nonta ira wara son Cristo Jesus ja Apo tayo; si-kato sota biyag ja enshiy to engintegan.

## 7

<sup>1</sup> Si-kayon a-akik shi pamati, iyay pay i piyan kon ikowan son si-kayo ja toloy nonta inkowan ko la. Sigosho ewaten jo iya piyan kon ikowan tep amtayo met sota bilin nen Apo Shiyos ja naysolat nonta bayag da. Say piyan kon ikowan son si-kayo, sajay. Say penongpal ni too nonta bilin nonta bayag da, sota kawasha to pay laeng shiya biyag; nem no metey, enshi ma. <sup>2</sup> Kaspangarigan, sota biin waray asewa to, kapiditan na tongpalen to sota bilin maypangkep ni san-asewa, tep sota asewa ton daki, mabiday pay laeng. Nem no metey sota daki, angken eg to ma tongpalen sota bilin pangkep ni san-asewa. <sup>3</sup> Nem no sotan na bii ket waray apil la daki to, angken

na wara sota sigod ja asewa to shi biyag, ikowan sha ey ekileki sotan na bii. Nem no etey sota asewa ton daki, asan maki-sawa mowan, eg sha ikowan ey daki to bengat sotan na maykadwen asewa to.

<sup>4</sup> Sajay i may-eshig son si-kayon a-akik shi pamati. Singa etey kayo ta enshiy jo kaybiyan-gan nonta bilin ja naysolat nonta bayag da. Ta nonta etey i bakdang nen Cristo, singa angken si-kayo, etey kayo ngo. Jet si-katoy makatoo son si-kayo. Ta angken etey nontan da, nanbiyag mowan say mebedin na tongpalen jo sota sigod ja piyan nen Apo Shiyos ey dag-en jo. <sup>5</sup> Nonta eg kito pay laeng emati son Cristo, sota ngaaw wa pipiyan ni bakdang tayon dag-en, si-katoy tayoka dagdag-a ni olay. Jet singa pay ya inpaba-deg bengat nonta bilin nonta bayag sota tayoka dagdag-a ja ngaaw. Nakol ni istay patey ingkatod ingka i panpa-no-an tayo. <sup>6</sup> Nem niman ma, ewaya kito tep aliwen kapiditan na tongpalen tayo sota bilin nonta bayag da. Singa etey kito tep enshiy bibiyang tayo nodtan na bilin. Nontan den eg kito pay laeng emati son Cristo, istay sota bilin nonta bayag day tongpalen tayo koma. Nem niman men badoy biyag tayo, kitoka mansilbi son Apo Shiyos jet sota Ispirito Santo nen Apo Shiyos i emengitoshong son si-katejo.

*Sota bilin nonta bayag da, eg to kabaalan na mena-dat ni ngaaw wa ogadi ni too*

<sup>7</sup> Sajay ya inkowan ko la, aliwen kowan ko ey sota bilin nen Apo Shiyos nonta bayag da ja naysolat ket singa emengikan ni panbesolan. Enshi, arawi sotan na nemnem. Nem no enshi met kitdi sotan na bilin, istay ekak amta sota maypangkep ni basol. Kaspangarigan sota

pengamkam, istay ekak amta ey sota pengamkam ket basol gayam, no eg inkowan nonta bilin ey, “Karam kamkaman i kokowa ni eshom.”<sup>8</sup> Nem idi inamta-an ko sotan na bilin, ema-ma sota sigod ja ngaaw wa wáred nemnem ko, jet kinamkaman koy angken nganto. No enshi koma sota sigod ja bilin, istay eg tayo inamta-an i basol.<sup>9</sup> Nontan da, angken si-kak naka manbibiyag ja ekak amta sota maypangkep nonta sigod ja bilin jet ekak panshanagan i emin na naka dagdag-a. Nem idi simabi ali sotan na bilin son si-kak, singa ebangon sota sigod ja ngaaw wa wáred nemnem ko jet inamta-an ko may basol. Jet nontan i in-  
 amtak so ey meshosa gayam ingkatod ingka sota toon manbesol.<sup>10</sup> Isonga sotan na bilin ja istay mengitoshong ni too koma shi biyag, sotan et ngo mowan i singa keshosa-an to.<sup>11</sup> Kowan ko nem biyag i panpa-no-an ko ni pengonod ko nonta sigod ja bilin, nem apil gayam! Sotan et i engamta-an ko ey patey i panpa-no-an ko. Isonga singa sinaol towak nonta sigod ja ngaaw wa wáred nemnem ko nonta inamta-an ko so nontan na bilin.

<sup>12</sup> Sota bilin nen Apo Shiyos nonta bayag da ja naysolat, mismon edapo so nen Apo Shiyos; enshiy kolang to, mapteng nga emin.<sup>13</sup> Jet aliwén na kowan ko ey sotan na mapteng ket sikatoy emono son si-kak. Arawi sotan na nemnem. Say singa emono son si-kak, sota sigod ja ngaaw wa wáred nemnem ko. Jet say nanbanagan niyay, inamta-an koy maypangkep nonta sigod ja wáred nemnem ko. Ta nonta inamta-an ko sota sigod ja bilin, inamtak ma ey sota ngaaw wa wáred nemnem ko ket basol la embel-at ta pasiya gayam.

<sup>14</sup> Amta tayo ey sotan na bilin

nen Apo Shiyos ja naysolat nonta bayag da ket mapteng ta edapo met laeng son si-kato. Nem si-kak, too-ak bengat. Saja sigod ja ngaaw wa wáred nemnem ko, sikatoy emengitoshong son si-kak ni olay; isonga naka dagdag-a ni olay sota pipiyan ni bakdang ko ja ngaaw.<sup>15</sup> Ekak ewatan shorog i bakdang ko, ta sota piyan kon dag-en, aliwén si-kato, no diket say naka dag-a et ngo mowan, sota mismon ekak kosto.<sup>16</sup> No ekak koston dag-en sota ngaaw wa naka dagdag-a, sotan i ka-amta-an to ey naka enogota ey mapteng sota bilin nen Apo Shiyos. Ta eg to ngo kostoy ngaaw.<sup>17</sup> Si-kak, piyan koy mapteng, isonga singa aliwén si-kak ma i emandeka ni ngaaw wa naka dag-a, nem wára met laeng i sigod ja ngaaw wa wáred nemnem ko, jet si-katoy kabol la naka panbesoli.<sup>18</sup> Amtak ey no ekak emati son Cristo, enshin polos i mapteng son si-kak. Niman, makedsang mangoy nemnem kon mandeka ni mapteng, nem iso met laeng nga eg kabaalan ni bakdang kon dag-en.<sup>19</sup> Ekak dagen sota mapteng nga piyan kon dag-en, nem say naka dag-a et ngo mowan, sota ngaaw wa ekak kosto.<sup>20</sup> Jet no dag-en ko sota ekak kosto, sajay i ka-asan to ey aliwén si-kak i emandeka niyay, no diket sota sigod ja ngaaw wa wáred nemnem ko.

<sup>21</sup> Singa kenshat et ta no piyan kon mandeka ni mapteng ket sota ngaaw et bengat i naka dagdag-a.<sup>22</sup> Say epigsen wáred nemnem ko, sota pengonod ni bilin nen Apo Shiyos,<sup>23</sup> nem waray eg man-inawatan shiya bakdang ko. Sota wáred nemnem ko, kowan to ey mandeka-ak ni mapteng, nem apil i kedag-a niya bakdang ko, jet sota piyan niya bakdang koy emengebak ni olay; nakol ni naka manbesol.<sup>24</sup> Ara! Kakaasiy

kasesaad kon too! Istay enshiy mengisedakan niya bakdang ko ja ontorong shi patey, <sup>25</sup> nem niman ebadeg i iyaman ko so nen Apo Shiyos ta insalakan towak may-pangkep so nen Jesucristo ja Apo tayo!

Isonga sajay nin i kasesaad ko: no shi nemnem ko, naka mansilbi son Apo Shiyos, nem saja bakdang ko, ememasig i toka panbesol.

## 8

*Sota Ispirito Santo nen Apo Shiyos bengat i onbaal ja mena-dat ni ogadi*

<sup>1</sup> Owen agpayso, angken saman i kakapoy ni bakdang tayo, eg shakito shosa-en nen Apo Shiyos, basta wára kito et so nen Cristo Jesus. <sup>2</sup> Ta wára son si-katejo sota Ispirito Santo to jet si-katoy engikan ni biyag son si-katejo niman na emati kito son Cristo Jesus. Sikato ma niman i emengitoshay son si-kayo; isonga ewaya kayo ma ja aliwén basol i timengel son si-kayo, jet aliwén patey ingkatod ingka i panpa-no-an jo. <sup>3</sup> Sota kowan nonta bilin nen Apo Shiyos ja naysolat nonta bayag da ket eg kabaalan ni toon tongpalen na emin sotan tep ekapoy i too. Isonga sotan na bilin, eg to kabaalan na mengisedakan ni too. Nem si Apo Shiyos, say inpasing to ja mengisedakan son si-katejo, inbetkag to ali sota Anak to, jet nay-inges i bakdang tod bakdang tayo, nem say nay-apilan ni bakdang tayon too, mabesol i bakdang tayo. Jet sotan na Anak to, si-katoy engikesho nonta basol tayo. Siya, idi etey sota bakdang nen Cristo, na-abak i basol; enshi malay kedsang ton ontengel ni too. <sup>4</sup> Si Apo Shiyos, inbetkag to alis Cristo say kabaalan tayon menongpal nonta kowan ni bilin to. Jet siya, tayoka nemnema ma

niman sota pengonod ni kowan ni Ispirito Santo nen Apo Shiyos, aliwén sota sigod ja nemnem tayo nonta eg kito pay laeng emati. <sup>5</sup> Apil i wared nemnem nonta ira emengonod nonta sigod, ta say wára ngod nemnem sha ni olay, sota naydowaman shen dagdag-en ja ngaaw; tan apil ngo sota emengonod nonta kowan ni Ispirito Santo nen Apo Shiyos, ta say wára ngo ni olay shi nemnem tayo, sota piyan ni Ispirito Santo ja dag-en tayo. <sup>6</sup> Sota toon say toka nemnemnema ket sota naydowaman ton dag-en ja ngaaw, say panpa-no-an to, patey ingkatod ingka; nem sota toon say toka nemnemnema ket sota pengitoshong ni Ispirito Santo nen Apo Shiyos son si-kato, say kon-oren to ali ngo, biyag ja enshiy to engintegan, tan kon-oren toy talna. <sup>7</sup> Ta sota toon say toka nemnemnema ket sota naydowaman ton dag-en ja ngaaw, emaykontra so nen Apo Shiyos. Ta eg sha pati-en sota bilin nen Apo Shiyos, jet kenshat ta sotan ni olay, eg mebediwan. <sup>8</sup> Jet sota ira emengonod ni olay ni naydowaman ni bakdang shen dag-en ja ngaaw, eg sha mebedin na mandeka ni pan-imdengan nen Apo Shiyos.

<sup>9</sup> Nem si-kayo, aliwén say joka on-onora ket sota sigod ja nemnem jo nonta eg kayo pay laeng emati, no diket sota pengitoshong ni Ispirito Santo nen Apo Shiyos. Ta agpayson sota Ispirito Santo nen Apo Shiyos ja wára son si-kayo ket si-katoy emengitoshong son si-kayo. Nem sota ira enshiy Ispirito nen Cristo son si-kara, enshi ngo ira so nen Cristo; <sup>10</sup> singa etey ira. Jet angken si-kayo ngo nontan, singa etey kayo kabol ni basol jo, nem niman, ewad-an kayo ngo eshan ni badon biyag ta kinosto-an shakejo ma nen Apo

Shiyos ni inpamatiyo son Cristo. <sup>11</sup> No sota Ispirito nen Apo Shiyos ket wára son si-kayo, si-kato met laeng i mengi-kan ni biyag nonta bakdang jo ja emetey, ta si-kato ngoy engi-kan ni biyag son Cristo nonta inkatey tod koros, jet sotan na Ispirito, wára son si-kayo.

<sup>12</sup> Si-kayon a-akik shi pamati, niman ja ewad-an kito ni Ispirito Santo nen Apo Shiyos, wáray kapiditan na dag-en tayo, nem aliwén sota pengonod nonta sigod ja nemnem tayo nonta eg kito pay laeng emati. <sup>13</sup> Ta no sotan i onoren jo, say panpa-no-an to, patey ingkatod ingka; nem no sota pengitoshong ni Ispirito Santo nen Apo Shiyos i onoren jo, mebedin jon ibi-jag sota ngaaw wa aramid jo, jet sota biyag ja medepo son Apo Shiyos i maysa-dat. <sup>14</sup> Sota ira toon kaitorong ni Ispirito nen Apo Shiyos, si-karay annak nen Apo Shiyos. <sup>15</sup> Jet sota Ispirito Santo ja inewat jon edapo so nen Apo Shiyos, aliwén panbedin shakejo mowan ni singa бага-en; marinél kayo ma, enshiy jo itakot ja shosa ali, no diket sota Ispirito Santo nen Apo Shiyos ja inewat jo, si-katoy naybilangan jo ma ey annak tokejo. Jet si-katoy kabol la tayoka ingadni so ma ey si Apo Shiyos i Ametayo. <sup>16</sup> Waray kepedekna ni Ispirito Santo nen Apo Shiyos shi nemnem tayo ey annak shakito nen Apo Shiyos. <sup>17</sup> Jet niman ma, ta annak shakito nen Apo Shiyos, mayda-kam kiton mekitewid son Cristo nodta i-akan nen Apo Shiyos: mayshedjaw kito ngo shi dangit ja kait nen Cristo. Mayda-kam kito nodtan, ta kitoka manda-kam ngo ni digat niman kabol ni tayoka pengonod son si-kato, ja singa kitoka mekilikat son si-kato.

<sup>18</sup> Saja digat niman na tayoka da-da-kami, kowan tayo ey palado, nem say kowan ko, singa

engka-jas kari ta ebadbadeg aliy ewáten tayod dangit, ja sobadit niyay ya digat. Jet shiman i amtan tayo so no ngarantoy itsora to. <sup>19</sup> Emin na palsowa, shaka segsegshen pasiya sota pengipasas ali nen Apo Shiyos nonta kaskasshaaw wa panbedinan tayo ali ja annak to. <sup>20</sup> Ta emin na palsowa, sapaasap ja singa eg nin maytotop nodta epalsowa-an sha. Aliwén ka-way shen engigsheng ni mebedin na dag-en sha, no diket si Apo Shiyos i makanemnem so, ta sigod ja ninemnem ton mapteng aliy panbedinan sha. <sup>21</sup> Ta angken saja emin na palsowa, angnabi ali sota timpon kayda-kam sha ngo nonta ira annak nen Apo Shiyos. Singa mebedos ira ngo ta eg ira ma mantoshong shi ketoytoyán sha, jet wára ngo ma ira shi wáya ja enshiy to kay-ingesan. <sup>22</sup> Amta tayo ey ingkato niman, emin na palsowa, sapaasap ja ireka man-a-agag ja memeshas nonta sigod ja ninemnem nen Apo Shiyos ja medeka son si-kara. <sup>23</sup> Nem aliwén saja ira palsowa bengat i eman-a-agag, no diket angken si-katejon too ja na-aknan ni Ispirito Santo nen Apo Shiyos. Sajay ya Ispirito, si-katoy pilmiro nin ja in-akan nen Apo Shiyos son si-katejo, jet kitoka man-a-agag ngo ni tayoka pansessesked ja manbedin ali ni koston annak ma nen Apo Shiyos. Jet no onsabi sotán, saja bakdang tayo, ingesen toy itsora ni bakdang nen Cristo shi dangit. <sup>24-25</sup> Ta aneng nin, eg simabi sota koston kaysedakan ni bakdang; nem wáray namnama tayo. Namnama bengat i wára, ta eg tayo pay laeng nin inonan. Kenshat ta sotán i itsora ni kaysedakan tayo, enshiy eshom. Isonga enosan tayon seskeshen.

<sup>26</sup> Sota Ispirito Santo, emengikan ni anos son si-katejo. Asan

sakey pay, kaontolong son si-katejo say makedsang kito ni olay. Ta si-katejo, eg tayo pay laeng amta ja pasiya no ngarantoy pesing nga manshe'wat son Apo Shiyos. Nem sota Ispirito Santo nen Apo Shiyos, si-kato met laeng i emengire'wat nonta istay ishawat tayo koma, nem singa nged-as bengat iyay tep eg maybodikas shi esel ni si-katejon too. <sup>27</sup> Jet si Apo Shiyos ja maka-amta ni nemnem ni too, toka ewati sota piyan ni Ispirito to, ta sota Ispirito to, si-katoy emanshe'wat para so nonta too nen Apo Shiyos, jet emaykompas ni olay nodta piyan nen Apo Shiyos sota shawat to.

<sup>28</sup> Amta tayo ey si Apo Shiyos, toka i-anap i panmaptengan nonta toon w'aray semek sha son si-kato. Sajay i toka pesing ni olay shi angken ngaranton mepesamak son si-kara, tep si-karay sigod ja ninemnem nen Apo Shiyos sa ma-osal shi piyan ton medeka shiya dobong. <sup>29</sup> Ta amta ton sigod no sipa aliy memati son si-kato jet ninemnem to ey ingesen sha sota mismon Anak to ja si Cristo, ta piyan ton si Cristoy Pangodowan shen emin ja sana-aki. <sup>30</sup> Sotan iren toon pinidi to, si-karay ninemnem to ngo eshan ja mayda-kam son si-kato, jet si-kara met laeng sota too ton toka kosto-i niman. Jet si-kara, i-inges to ira so nen Cristo.

<sup>31</sup> Jet sajay den inkowan ko, enshi may eshom ma tayo ikowan, nem eg sajay bengat: no si Apo Shiyos ket si-katoy w'ara son si-katejo, angken sipay onkontra son si-katejo, eg tayo panshanagan. <sup>32</sup> Eg to met inikotan sota Anak ton mismo, no diket intolok ton metey para son si-katejon emin. No sotan i inpasing to, sigorado ngarod ja i-akan ton emin i kasapolan tayo. <sup>33</sup> Si Apo Shiyos, inbilang to ey enshi may basol nonta

too ton pinidi to, isonga enshiy kowinta nonta ikowan ni angken sipa ey w'aray basol la ikaro nonta too to. <sup>34</sup> Angken sipa, enshiy kanebengan shen mengigsheng ey meshosa kito tep imed ma petek ni kanawan nen Apo Shiyos si Cristo Jesus; isonga enshiy en ma-an-ano son si-katejo, tep shakitoka itakshel so nen Apo Shiyos. Nemnem jo ey saja si Cristo Jesus, si-katoy etey, nem nanbiyag mowan. <sup>35</sup> Jet enshiy mengisijan son si-katejo shi semek nen Cristo, angken nganton digat i onsabi. Angken w'aray mepesamak ja pansekitan na pasiya ni nemnem tayo, ono w'ara aliy memedigat son si-katejo, ono w'ara aliy bitil, ono enshiy ma-osal la baro; angken dilikaroy biyag tayo, ono angken metey kito, ebadeg ngo eshan i semek nen Cristo son si-katejo. <sup>36</sup> Angken nonta bayag da, w'ara ngoy paras nonta too nen Apo Shiyos, ta say naysolat nonta bayag da, kowan to ey, "Inakew ja dilikaroy kasesaad mi ja singa patey i pantongpalan mi ta too jokami Apo Shiyos, jet say nemnem ni makakontra son si-kami, kowan sha ey singa kalniro kami, ja angken nganton oras palti-en shakami." Kowan ni too nonta bayag da. <sup>37</sup> Nem emin iyay ya digat ja emepespesamak niman, mengebak kito ngoreshan, tep si Cristo, ebadeg ni olay i semek to son si-katejo. <sup>38-39</sup> Ta enshiy showashowak nonta semek nen Apo Shiyos. Sotan na semek to, w'ara ni olay son si-katejo, enshiy makabaal la onpotol so. Angken onsabi ali sota patey, ono w'ara kito pay laeng shi biyag, w'ara ngo eshan; angken nganton palsowa ja w'ara niman ono onsabi ali, angken anghil ono eshom ma eg ma-sas ja mapteng ono ngaaw, aliwen sotan i memotol ni semek nen Apo Shiyos son si-katejo;

wara ni olay. Saja semek to, mismon inpa-sas to son si-katejo ni indaw ali nen Cristo Jesus ja Apo tayo.

## 9

*Niman i kaysedakan ni aliwén Hodiyo, nem angken sota ira kait kon Hodiyo, maysedakan ngo ira di*

<sup>1-3</sup> Si-kak, emati-ak so nen Cristo, isonga agpayso iya ikowan ko di; aliwén na naka man-owap. Amtak ey aliwén o-owap iya ikowan ko tep sota Ispirito Santo nen Apo Shiyos i emengitoshong niya nemnem ko. Say kowan ko, sajay: ebadeg i naka pengisekit ni kait kon Hodiyo. Naka mandeshingit ta pasiya ni olay kabol son si-kara ja karadanan ko. No mebedin koma, angken si-kak et ngo i shosa-en nen Apo Shiyos ingkatod ingka, jet angken maysi-janak son Cristo, basta si-katoy pematian ni kait kon Hodiyo son Cristo. Nem eg met mebedin. <sup>4</sup> Si-kara sota sigod ja too nen Apo Shiyos jet ebadeg i kaasi to son si-kara: si-karay inpanbalin ton annak to, naytakshol pay son si-kara sota emenenili ja emengipa-sas ni kawasha to son si-kara; nay-awat pay son si-kara sota bilin to; inkari to pay son si-kara ey si-karay ibilang ton too to, tan wara pay i eshom ma inkari to son si-kara; tan naypiyal pay son si-kara sota koston pesing shen manshedjaw son si-kato. <sup>5</sup> Si-karay poli nonta mismon sampolo tan showen annak nen Israel, jet si Cristo ja inbetkag ali nen Apo Shiyos, no maypangkep ni kinatoo to, edapo met laeng shi poli nen Israel; isonga kait sha met laeng si Cristo. Jet si Cristo, ja Shiyos met laeng, si-katoy Kangeto-an so ni emin, tan si-kato pay i mayshedjaw ingkatod ingka! Siya, satan da.

<sup>6</sup> Aliwén kowan ko ey engawn-gaw sota kari da nen Apo Shiyos son si-kara nonta bayag da, ja ootik son si-karay maysedakan. Ta say kowan ko, aliwén emin na edapod poli nen Israel ket agpayson too nen Apo Shiyos. <sup>7</sup> Aliwá ngon emin na medepod poli nen Abraham ket maykeshi ey podnon poli to ja mekitewid nonta inkari nen Apo Shiyos son Abraham, tan si Isaac ja anak to. Enshi, ta say kowan nen Apo Shiyos son Abraham nontan da, kowan to ey, “Sota ipoli ali nen Isaac, si-karay maykeshi ey koston polim, aliwén sota ipoli ni eshom ma anak mo.” Kowan to, <sup>8</sup> jet say olog niyay, aliwén na sota naypoli-an ni too i kabol la kaybidangan sha ey annak ira nen Apo Shiyos, no diket sota toon etongpalan nonta kari nen Apo Shiyos, si-karay maybidang ey podnon annak to. <sup>9</sup> Ta si Isaac met i etongpalan nonta kari to nonta bayag da; isonga wara sota kari to son Abraham ja kowan to ey, “No onsabi ali sota koston timpo, ondawak ali et on-anak si Sara ja asewam ni daki.” <sup>10</sup> Jet aliwén sotan bengat. Si Rebecca ja asewá nen Isaac, nonta kalokon to so nonta anak ton epin, ja inpotot nen Isaac ja makapoli son si-katejo, <sup>11-12</sup> inkowan nen Apo Shiyos so nen Rebecca nontan ey sota pinidi to, kenshat ta sotan; kowan to ey, “Sota na-onod ja nay-anak et ngo mowan i patien nonta epangdo.” Sajay ya inpasing nen Apo Shiyos nonta eg pay laeng nay-anak sota anak nen Rebecca ja epin, pinidi to sota sakey, ey enshi nin nontan i aramid shen mapteng ono ngaaw, ta wara nin pay laeng ired dokon. Jet sajay i edaga, say sota nemnem nen Apo Shiyos, ni toka memidi ni too to, ontoloy; jet say sigod ja toka pesing ja memidi ja ibilang

to ey too to ma, sota piyan to, aliwén sobadit ni aramid ni too.  
<sup>13</sup> Si-katoy kowan met laeng nonta naysolat nonta bayag da, ja esel nen Apo Shiyos ey, “Si Jacob i ensemek ko, nem ekak ensemek si Isaw.”

<sup>14</sup> Eg jo koma ikowan ey ngaaw i kepesing nen Apo Shiyos, ja wáray pinaboran to. Ayshi, arawí itan na nemnem. <sup>15</sup> Mapteng sotan na toka pesing; isonga inkowan to so nen Moises nonta bayag da ey, “Sota piyan kon sesmeken, si-kato, jet sota piyan kon kaasi-an, si-katoy kaasi-an ko.” <sup>16</sup> Isonga sota kaasi nen Apo Shiyos, aliwén may-ekan nodta makapiyan so, ono nodta toon kowan to ey idigatan to say si-katoy mepaboran, no diket olay tos Apo Shiyos no sipay kaasi-an to. <sup>17</sup> Say kay-eshigan niyay, si Paro ja ari nonta bayag da. Isonga wáray naysolat ja esel nen Apo Shiyos son Paro, ja kowan to ey, “Inpanbalin taka ni ari say si-kam met laeng i mismon ka-asan to ey si-kak i Kangeto-an, ta i-onod moy piyan ko ni anongosto, say sota ngaran ko ma, maypedawag shi intiron dobong.” Kowan nen Apo Shiyos son Paro. <sup>18</sup> Isonga sajay i nemnemen jo, ta sota piyan nen Apo Shiyos ja kaasi-an, si-kato; jet sota toon piyan nen Apo Shiyos ja angken ontangken i nemnem ton eg memati, si-katoy medeka.

<sup>19</sup> Jet sigosho say kowan jo mowan, “Apay ngarod nga kowan nen Apo Shiyos ey wáray basol ni too, no sotan i wára son si-kato, ey enshi met i kabedinan ni toon memediw ni dag-en to, ta si Apo Shiyos met i sigod ja nannemnem so!” <sup>20</sup> Nem too ka bengat jet eg ka koma onpa-so ja onsopngil son Apo Shiyos! Say kay-eshigan to, sota mandeka ni banga. Enshiy mebedin nonta banga ja onsopngil nonta itsora

ni inkaleka to. Sota inpasing nonta dimaga so, si-kato. <sup>21</sup> Sota emandeka ni banga, wára ngo son si-kato no ngantoy pesing ton memkel nontan na banga. No piyan nonta mandeka ey sota sakey ket, dag-en ton memapteng ja kay-iyanan ni sabsabong, si-katoy pesing to, ono sota sakey ket dag-en ton para pengi-janan ni ensekig, si-kato ngoy pesing to. Ta wáray kanebengan ton mandeka ni piyan to.

<sup>22</sup> Isonga wáray kanebengan nen Apo Shiyos ja mengipekat ni panakabalin ton menosa niya dobong say ma-amta-an ey si-katoy Manakabalin na Shiyos. Nem inenosan to nin ja eg to pay laeng shosa-en sota toon anam ton maknan ni embel-at ta shosa, <sup>23</sup> say sota eshom ma too, ja insagana ton sigod ja mayda-kam son si-kato met laeng shi dangit, amta-an sha ey ebadeg i kaasi to. <sup>24</sup> Jet si-katejo sotan na pinidi nen Apo Shiyos ja too to; aliwén emili bengat son si-kamin Hodiyo, no diket angken son si-kayon aliwén Hodiyo. <sup>25</sup> Saja inkayda-kam jon aliwén Hodiyo, si-katoy kay-toshongan nonta inkowan nen Apo Shiyos ja insolat nen Osias nonta bayag da, ja kowan to ey,

“Sota ira istay aliwén took, ibilang ko ma ey took ira. Jet sesmeken ko ira sota istay ekak kinosto-an nontan da. <sup>26</sup> Istay ya nayngadnan iren too ja in-oway ko, nem ibilang ko iren mismon annak ko.”  
 Kowan nen Apo Shiyos.

<sup>27</sup> Jet si Isaias nonta bayag da, wára ngoy inkowan to, nem may-pangkep so nonta ira Hodiyo, ja kowan to ey,

“Sota ira poli nen Israel, angken eshakek iren pasiya ja singa karakek nonta bisil shima kilig ni baybay, ootik son si-kara i maysedakan. <sup>28</sup> Ta si

Apo Shiyos, eg to ishokey i timpon pengenos to son si-kara, no diket dag-en ton shagos sota kowan to ey dag-en to.”

<sup>29</sup> Jet si Isaias, wára ngo nonta bayag da i inpadto to, ja kowan to ey,

“No enshiy kaasi nen Apo Shiyos, istay emin kiton poli nen Israel, mekolpi kiton enshiy mebaybay-an; istay mesheshal kiton emin, ja ingesen tayo sota tood ma siyodad ni Sodoma tan Gomora ja ekolpi.”

<sup>30</sup> Jet iyay i esa-nopan nonta emin na inkowan ko la. Sota ira aliwén Hodiyo, istay eg sha ninemnem i kosto-an so nen Apo Shiyos son si-kara, nem kinosto-an ira nen Apo Shiyos tep emati ira son Cristo. <sup>31</sup> Nem sota ira Hodiyo et ngo mowan, say kowan sha ket, kosto-an kono ira nen Apo Shiyos ja sobadit ni itongpal sha so nonta bilin to ja naysolat nonta bayag da, nem enshi, ta eg sha kabaalan na onoren na emin. <sup>32</sup> Jet ngantoy kabol la nankolongan sha? Say kabol la nankolongan sha, nanshinel ira nonta kowan sha ey tongpalen shay bilin nen Apo Shiyos, ey eg sha kari baalan. Say inpasing sha koma, emati ira son Cristo say kinosto-an ira nen Apo Shiyos. Isonga singa nayko-bilan ira, jet sotan i kaytoshongan nonta esel nen Apo Shiyos nonta bayag da, <sup>33</sup> ja naysolat, ja kowan to ey, “Waray ibetkag ko la so ni took jet sajay da, may-eshig shi bato ja inseked ko nodta shalan ira nonta totoo. Jet eshakel i mayko-bilan nodtan. Nem sota ira memati son si-kato, eg ira medismaya tep wáray panpa-no-an ni pansaad to.”

## 10

<sup>1</sup> Si-kayon a-akik shi pamati, say wáred nemnem ko ni olay, sota maypangkep ni kait kon Hodiyo.

Naka ishawshawat so nen Apo Shiyos ey maysedakan ngo ira.

<sup>2</sup> Waray mapteng mango son si-kara, ta say wáred nemnem sha, kowan sha ey mansilbi ira son Apo Shiyos. Nem aliwén kosto-

toy shaka pansilbi, ta bimaki ira. <sup>3</sup> Ta eg sha amtay koston pesing sha say kosto-an ira nen Apo Shiyos. Say wáred nemnem sha, kowan sha ey sota pandekara ni mapteng, si-katoy kosto-an so ira nen Apo Shiyos, jet si-katoy shaka pespesing; eg sha i-onod nodta kowan nen Apo Shiyos ey dag-en sha koma. <sup>4</sup> Sota bilin nen Apo Shiyos nonta bayag da, eg ma mansilbi niman ta binediwan to ni indaw ali nen Cristo; isonga si Cristoy singa engintegan ni sakop nonta sigod ja bilin. Jet niman, emin na memati son si-kato, kosto-an nen Apo Shiyos.

<sup>5</sup> Isonga wáray insolat nen Moises nonta bayag da maypangkep nonta toon kowan to ey mengonod nonta bilin nen Apo Shiyos say kosto-an to; kowan nen Moises ey, “Ampet tongpalen mon emin sota bilin nen Apo Shiyos, asan ka may-akni ni biyag.” Kowan nen Moises. <sup>6</sup> Nem aliwén sajay i kosto-an so nen Apo Shiyos so ni too niman, no diket sota pamati to son Cristo. Isonga wára pay i inkowan nonta naysolat ey,

“Aliwén mo nemnemen ja ondaw shi dangit (eg mesepol tep dimespag alis Cristo); <sup>7</sup> aliwén mo nemnemen ja ondaw shima nayshalem ja kawad-an ni etey (eg mesepol tep nan-ongal alis Cristo). <sup>8</sup> Sota esel nen Apo Shiyos, wáren nay-esop son sikam, wáren mismo shita nemnem mo, tan shita bongot mo.”

Kowan to, jet sotan na mismon esel to, si-katoy mika pan-itoro so ni angken sipa. <sup>9</sup> Jet sajay sotan na esel: no ikowan mon mismo, ja eg mo ibaing, ey si



Jesus bengat i Apom, tan pati-en mo ey si Apo Shiyos ket inpanongal to si Jesus, maysedakan ka. <sup>10</sup> Ta no mismon si Cristoy wared nemnem mo ja pinatim, kosto-an toka nen Apo Shiyos; jet no mismon pa-amtam ngo shi eshom i inpmatim, maysedakan ka. <sup>11</sup> Jet say kowan nonta naysolat nonta bayag da, kowan to ey, “Sota ira memati son Apo Shiyos, sigoradon metongpal ali sota namnama shen mekaasi-an.” Kowan nonta naysolat. <sup>12</sup> Jet sajay, enshiy nandasinan ni angken sipen too — Hodiyo ono aliwén Hodiyo. Ta say Apo shen emin, saksakey ja si Cristo, jet si-katoy emengaasi so ni emin na manbeka son si-kato, jet sobda pay i toka i-akan son si-kara. <sup>13</sup> Ta say kowan met laeng nonta naysolat nonta bayag da, kowan to ey, “Angken sipen too ja manbeka ni kaasi son Apo Shiyos, kaasi-an ton isalakan.”

<sup>14</sup> Nem eg amta ni too no sipay koston panbeka-an sha ni kaasi no eg ira nin emati. Jet enshiy pesing shen memati, no eg sha nin itenengan i toro pangkep son Cristo. Jet enshi ngoy pesing shen mengitneng, no enshiy en mengitosh. <sup>15</sup> Jet enshi pay i toon en mengitosh, no eg ibetkag nen Apo Shiyos. Nem wara met i inbetkag ton en mengitosh. Si-katoy kaytoshongan nonta naysolat nonta bayag da, ja kowan to ey, “No itenengan tayo diy shanapshap ni katin ira nonta mengitosh ni mapteng nga shamag, kitoka manimdeng.” Isonga waray mebedin na memati. <sup>16</sup> Nem aliwén emin na mengitneng so ket, memati ira. Ta sotan met laeng i inpadto nen Isaias nonta bayag da, ja kowan to ey, “Apo, manmanoy ememati nonta intoro mi son si-kara.” <sup>17</sup> Jet niman ma, sota mengitneng ni toro maypangkep son Cristo, si-kara bengat i mebedin na memati,

jet say itenengan sha so, sota ondaw wa en mengitosh son si-kara.

<sup>18</sup> Jet say kowan ko, sigod ja itenengan sha met; isonga enshiy pangbal sha ni eg sha pematian so. Ta say kowan nonta naysolat nonta bayag da, kowan to ey, “Angken towen dogad, waray engitneng ni inkowan sha, jet naywaris sotan shi intiron dobong.”

<sup>19</sup> Jet kowan ko pay ey sota ira kait kon Hodiyo, mebedin na inewatan sha sota sigod ja banshaan son si-kara ey sota ira aliwén Hodiyo et ngo mowan i kaasi-an nen Apo Shiyos. Ta angken nonta timpo nen Moises nonta bayag da, kowan nen Apo Shiyos ey, “Sota ira toon aliwén took, waray dag-en ko son si-kara, say si-kayon sigod ja took, mapal kayo son si-kara. Angken enshiy pamatira, kaasi-an ko say onbonget kayo.” <sup>20</sup> Jet si Isaias nonta bayag da, intoled ton inkowan sota inkowan nen Apo Shiyos ey, “Sota toon aliwén si-kak i pangkep shen amta-en, inamta-an sha-ak et ngo mowan, jet sota ira eg manbeka pangkep son si-kak, si-kara et ngo mowan i inpa-amta-an ko so met laeng maypangkep son si-kak.” Kowan nen Apo Shiyos maypangkep nonta ira aliwén Hodiyo. <sup>21</sup> Nem no maypangkep nonta ira Hodiyo, kowan nen Apo Shiyos nonta bayag da ey, “Naka ipa-sas ni olay ey piyan kon on-oli iray took son si-kak, nem eg sha kosto, shaka et ipilit i piyan sha.”

## 11

<sup>1</sup> Sigosho kowan jo ey si Apo Shiyos, singa inbiyang to iray Hodiyo ja too to. Nem enshi, arawi sotan! Kinapodno to, angken si-kak, Hodiyo sak, ta poli towak nen Benjamin ja mismon

anak nen Israel da; isonga poli towak ngo met laeng nen Abraham. <sup>2</sup> Si Apo Shiyos, eg to inbiyang sota too ton sigod ja pinidi to, nem ootik nin i imonong ja emati, jet arig to ngo sota timpo nen Elias. Ta si Elias nonta bayag da, inkowan to son Apo Shiyos sota aramid ira nonta tood Israel, <sup>3</sup> ja kowan to ey, "Apo, binonora ira sota para padton inbetkag mo, jet binagbag sha pay sota ira panshedjawan ni totoo son si-kam. Sikak bengat i ebay-an ja emansilbi son si-kam, jet piyan sha pay ja bono-en sha-ak." <sup>4</sup> Nem say songbat nen Apo Shiyos son si-kato, kowan to ey, "Waray piton dibon too ja ekak intolok ja manshedjaw so nen Baal ja sinan shiyos." Sajay i kowan nen Apo Shiyos. <sup>5</sup> Jet angken niman, inges to met laeng nontan. Wara iray Hodiyo sa pinidi nen Apo Shiyos ja kinaasi-an to, nem aliwen eshakil. <sup>6</sup> Nem sota toon pinidi nen Apo Shiyos, dibshiy inkaasi to, aliwen sobadit nonta mapteng nga dingkara. Ta no say pemidi nen Apo Shiyos so ni too to ket, sota sobadit nonta mapteng ja dingkara, aliwa malen kaasi sotan.

<sup>7</sup> Sota naksheng den inkowan ko la, sajay i esa-nopan to. Sota ira Hodiyo, eg sha kinon-od sota kinosto-an so nen Apo Shiyos son si-kara, angken sotan i istay shaka kamkamami. Waray eshom son si-kara ja pinidi nen Apo Shiyos, jet si-karay kinosto-an to; nem sota ira eshom, timangken i nemnem sha, eg sha kosto sota kowan nen Apo Shiyos. <sup>8</sup> Sajay i kaytoshongan nonta kowan ni naysolat nonta bayag da, ja kowan to ey, "Si Apo Shiyos met laeng i inpatangken so ni nemnem sha, jet angken niman, singa eg ira man-esas, tan singa eg ira makate-neng." <sup>9</sup> Jet angken si Ari David nonta bayag da, kowan to ey,

"Sota eshakil la inkaasi nen Apo Shiyos son si-kara, sotan et ngo mowan i kabol la keshosaaan sha tep binedaw sha. Siya, singa mekna ira, singa mesolan ira, tep anam shen meshosa! <sup>10</sup> Angken mekimit ja eg man-esas sota matesha! Jet maydakaran ira ni digat ni olay ingkatod ingka!"

<sup>11</sup> Jet idi singa nayko-bilan sota karakdan na Hodiyo ni eg sha pemati son Cristo, kowan jo emo nem sotan ni olay? Eg ira makabangon? Kinapodno to, mebedin na on-oli ira mowan son Apo Shiyos. Nem kabol nontan na eg sha pemati son Cristo, mebedin men maysedakan ngo iray aliwen Hodiyo. Jet balang nem ma-epal ira sota Hodiyo ja mannemngo ngo ira. <sup>12</sup> Ta say kowan ko, singa sota basol ni Hodiyo ni eg sha pemati-an son Cristo i kabol ja panmaptengan ni emin na tood ja dobong, tan sota kakodang ni pamatira i kabol la kinaasi-an nen Apo Shiyos ira sota aliwen Hodiyo. Nem mas ebadbadeg i kaasi ali nen Apo Shiyos, no onsabi sota timpon kay-odi ni Hodiyo shi koston pamati!

<sup>13</sup> Niman ma, iyay i piyan kon ikowan son si-kayon aliwen Hodiyo, agdalo ta si-kak i apostol ja inbetkag nen Apo Shiyos para son si-kayo. Jet saja naka penosho son si-kayo, naka ipakat i kabaalan kon pasiya, say eshakil aliy memati. <sup>14</sup> Nem say pangkep ko pay, piyan kon asen ira nonta kait kon Hodiyo, say maynemneman ira, jet balang nem maysedakan ngo ira sota eshom. <sup>15</sup> No bilang ey maysedakan i Hodiyo, asdeg toy kaasi nen Apo Shiyos son si-katejon emin! Ta say nanpa-no-an ni engibiyan-gan nin nen Apo Shiyos so ni Hodiyo, nan-esop i eshakil la toood dobong tan si Apo Shiyos.

Jet ngaranto emoy panpa-no-an ni pan-odira son Apo Shiyos? Enshiy eshom nem eg sota panbiyag mowan ni nanketey!<sup>16</sup> Sigod ja too ira nen Apo Shiyos tep pinidi tos Abraham nonta bayag da jet ontaron ja too to met laeng sota ira poli to. Arig to sota kepesing ni Hodiyo s nonta tinapay. Shaka idaton son Apo Shiyos sota pilmiron edoto jet da-kaman ton singa naydaton ja emin sota eshom alin tinapay ja medoto pay. Tan say arig to pay, sota kadasan. No pinidi nonta makakokowa sota damot, mayda-kam ngon singa epili sota panga nonta kadasan na makadamot nonta epili.

<sup>17</sup> Saja kadasan, i-arig ko maypangkep ni kasesaad jon aliwen Hodiyo s. Sota naymola ja kadasan, si-katoy may-eshig so ni Hodiyo s, jet si-kayon aliwen Hodiyo s, may-eshig kayo ey kadasan bengat, ja aliwen koston mola. Jet say edaga niman na timpo, sota eshom ma panga nonta sigod ja naymola, epotol. Jet naysilpo kayo nodta sigod ja mola, jet nayda-kam kayo ma nodta biyag nonta mola.<sup>18</sup> Nem si-kayo, karekayo on-itek ja damsisen jo sota sigod ja panga, ta aliwen si-kayoy engi-det nonta kadasan, no diket sota damot, si-katoy emengi-kan ni kedsang jo.<sup>19</sup> Karejo ikowan ey, “Siya, sota sigod ja panga, epotol say si-kak i maysa-dat ja maysilpo.”<sup>20</sup> Agpayso ja sajay i epasemak son si-kara, nem say kabol, eg ira memati, jet say kabol ngon naysa-datan jo son si-kara ja naysilpo nodta kadasan, emati kayo son Cristo. Isonga aliwen kayo on-itek ni maypangkep niyay ya edaga son si-kayo, no diket man-anad kayo koma.<sup>21</sup> Ta say nemnemen jo, sota koston panga, pinotol nen Apo Shiyos

nodta kad-an sha, ey si-karay sigod. Nem si-kayo, aliwen koston panga kayo, isonga mas nam-ay ya ma-kal kayo, no onbaki kayo.<sup>22</sup> Mesepol la amta-an jo ey si Apo Shiyos, manangaasi, nem eg to ngo baybay-an ja shosa-en sota mandeka ni ngaaw. Epaladoy inpasing to so nonta ira Hodiyo s ni inpankolang sha, nem si-kayo, itoloy ton kaasi-an tokejo pay laeng no itoloy jon sota kaasi toy nemnemnemen jo. Nem no eg jo itoloy, mebedin ngon isi-jan tokejo ja potolen nodta naysilpo-an jo.<sup>23</sup> Jet sota ira Hodiyo s ja naysi-jan, no may-odi iren memati, may-odin maysilpo met laeng ira mowan nodta sigod, ta si Apo Shiyos, waray panakabalin ton mengi-odi met laeng son si-kara.<sup>24</sup> Jet mebedin na may-odi ira, ta no sota may-eshig ey panga ni kadasan ja aliwen mola ket naysilpo nodta bakdang ni mola ja kadasan, mas namnam-ay sota sigod ja panga ja may-odi mowan nodta edapo-an sha. Mas nam-ay ta nodtan i sigod ja edapo-an sha, nem si-kayo, singa eg kayo may-enam.

<sup>25</sup> Si-kayon a-akik shi pamati ja aliwen Hodiyo s, piyan kon amta-an jo iya badon toro ja edapo so nen Apo Shiyos. Nemnem jo nin na pasiya say eg jo iba-ba-ngat i kokowan ey waray nandasinan jo shi Hodiyo s. Sota eg memati ni eshom ma Hodiyo s, aliwen sotan ni olay, no diket ingkato bengat nodta kakosto ni bilang ira nonta aliwen Hodiyo s ja memati ali.<sup>26</sup> Jet no metongpal ma ira jay, sota ira karakdan na Hodiyo s, maysedakan ma ira. Sajay i kay-toshongan nonta esel nen Apo Shiyos nonta bayag da ja kowan to ey,

“Sota Mengisedakan, medepo met laeng alid ili ni Hodiyo s, jet say pesing ton mengisedakan

ira nonta poli nen Jacob, a-kalen toy ngaaw wa aramid sha jet sota mapteng may maysa-dat. <sup>27</sup> Jet say ikarik son si-karen took ja tood Israel, omasen koy basol sha.” Kowan nen Apo Shiyos.

<sup>28</sup> Saja ira Hodiyo, eg ira memati nonta mapteng nga shamag maypangkep son Jesus, isonga kontra ira nen Apo Shiyos niman. Jet kabol niyay, naysadat kayon aliwen Hodiyo son Apo Shiyos. Nem ensemek to pay laeng ira sota Hodiyo, tep totoo toy makapoli son si-kara, jet eg bediwan nen Apo Shiyos i inpili to son si-kara. <sup>29</sup> Tep no ngarantoy inkari nen Apo Shiyos, si-katoy medeka, eg mesadatan; jet sota Hodiyo ngo eshan i pinidi to ja engi-watan to ni kari to. <sup>30</sup> Nontan da, eg kayo emati son Apo Shiyos jet sota ngo ira Hodiyo, too to ira. Nem niman, kinaasi-an shakejo et ngo mowan nen Apo Shiyos, tep sota ira Hodiyo, ja sigod ja too to, eg sha tongpalen niman i piyan nen Apo Shiyos. <sup>31</sup> Sota ira Hodiyo, eg sha pinati si Apo Shiyos, isonga kinaasi-an shakejo nen Apo Shiyos ni inpatiyo. Jet inges to ngon kaasi-an to sota ira Hodiyo no man-odi ira mowan ja mematin kosto son Cristo. <sup>32</sup> Isonga emin na too, angken ngantoy katoo to, intolok nen Apo Shiyos ja angken eg ira nin memati, say man-i-inges ja kaasiy pesing to son si-karen emin.

<sup>33</sup> Angken nganto, amta nen Apo Shiyos; isonga sota wared nemnem to, si-katoy kosto. Jet angken sipa, enshiy maka-awat nonta emin na pangkep to, ono sota toka dagdag-a. <sup>34</sup> Si-katoy kaytoshongan nonta naysolat nonta bayag da ja kowan to ey, “Enshiy maka-amta ni wared

nemnem nen Apo Shiyos, jet enshi pay i mebedin na mengitoshon son si-kato ni pesing to. <sup>35</sup> Jet angken sipa, enshiy to inpa-otang son Apo Shiyos, ja to ikowan ey bayshan nen Apo Shiyos son si-kato.”

<sup>36</sup> Ta emin na banag, si Apo Shiyos i pimalsowa so, jet si-kato pay i emengajowan so, tan si-kato met laeng i panshedjawan sha. Siya, si Apo Shiyos i mayshedjaw ni olay ingkatod ingka. Siya, satan da.

## 12

*Sota epateg ga ogadi ni toon emati son Cristo*

<sup>1</sup> Jet niman si-kayon a-akik shi pamati, kinaasi-an shakejo nen Apo Shiyos; isonga iyay i kekshawen ko son si-kayo. Niman na wara kayod biyag pay laeng, i-kan jon mismo i biyag jo son Apo Shiyos ja singa daton jo son si-kato, jet si Apo Shiyos ni olay i nemnemnenen jo. Sajay i dagen jo ni olay, ta sajay i mengikan ni pan-imdengan to. Sajay i koskoston pesing nga manshedjaw son si-kato, ta eg mayba-bangat. <sup>2</sup> Karejo on-onoran i ngaaw wa aramid ni karakdan na tood ja dobong, no diket ipedobos jo koma ja si Apo Shiyos i onbaliw so ni nemnem jo say mannemnem kayo ma ni kosto. No sajay i pesing jo, amta-en jo sota aramid ja toka kosto-i. Jet sota piyan nen Apo Shiyos ja medeka, sotan i mapteng, sotan i enshiy kolang to, sotan i mengikan ni pan-imdengan to.

<sup>3</sup> Ebadeg i kaasi nen Apo Shiyos son si-kak, ni inpanbalin towak so ni apostol; isonga ibilin ko iyay son si-kayo. Si-kayon emin, nemnem jo koma no ngantoy koston in-akan nen Apo Shiyos ja kabaalan jon itolong shi eshom;

nem eg jo koma da-bagan i kinapateg jo kabol nonta kabaalan jon in-akan nen Apo Shiyos. <sup>4</sup> Jet say kay-eshigan tayon emati, saja bakdang tayo. Say bakdang, sakey bengat, nem eshakel i parti to, jet eg man-i-inges i obda nonta parti ni bakdang. <sup>5</sup> Isonga angken eshakel kito, naykasakey kito son Cristo pangkep ni pamati tayo son si-kato, jet sankagait kito ma.

<sup>6</sup> Isonga say in-akan nen Apo Shiyos so ni sakey tan sakey son si-katejo ja itolong shi eshom ma emati, ekalkalasi; jet mesepol la osalen tayon emin. No say in-akan nen Apo Shiyos ket sota baal mon mengipa-amta nonta inpa-amta nen Apo Shiyos son si-kam, sotan i dag-en mo, ja may-enam nodta pamati tayo. <sup>7</sup> Jet no say amtam, ja in-akan nen Apo Shiyos son si-kam ket sota ontolong ni makasapol, si-katoy dag-en mo. No sota pengitosho i wára son si-kam, pangitoro ka. <sup>8</sup> No say wára son si-kam ket sota mengikan ni kedsangan ni pamati ni eshom, si-katoy dag-en mo. Sota waray kabaalan ton mengila-kam ni eshom, man-imdeng komen mengila-kam ni eshom. Jet sota pangolo ni emati, alisto komen mengitoshong ni too to, ja eg to baybay-an i toka pan-itod-i. Jet sota amta ton mengaasi, mansimet koma ja mengaasi ni eshom.

<sup>9</sup> Jet sota semek jo ni kait jo, mesepol la sota podnon semek. Sota ngaaw, arawi-i jo, jet sota mapteng, si-katoy nemnemnemen jo. <sup>10</sup> Semek joy kait jon emati ja inges toy semek jo so ni mismon agi jo, jet wára komay pengired-jaw jon pasiya so ni sakey tan sakey. <sup>11</sup> Kanas jon emin i joka dagdag-a pangkep ni joka pansilbi son Apo Shiyos; eg kayo koma onsarot. <sup>12</sup> Pan-imdeng kayo tep waray namnama jo ali son Cristo.

Isonga no waray memedigat son si-kayo, anosiyos. Jet panshawit kayo ni olay son Apo Shiyos. <sup>13</sup> Mesepol la ontolong kayo nodta kait jon waray mesepol to. Tan sintil jon kosto sota eshom ja onmotok shi baley jo.

<sup>14</sup> Sota ira memedigat son si-kayo ali, karejo i-abigan, no diket ikowan jo et son si-kara ey, "Sapay koma ta bindisiyonan shakejo nen Apo Shiyos." <sup>15</sup> Paki-imdeng kayo so nonta ira man-imdeng, jet pakidaringit kayo ngo so nonta ira emandeshingit.

<sup>16</sup> Pan-i-inges jon mapteng i pesing jo so ni sakey tan sakey son si-kayo. Aliwen kayo ondastog, no diket pakikadwa kayo so nonta ira ebaba. Aliwen jo ipangkep ey si-kayoy kalaingan.

<sup>17</sup> No waray ngaaw wa dingka ni eshom son si-kayo, aliwen jo ibales. Say nemnemnemen jo koma ja dag-en, sota mapteng ja kekosto-i ni karakdan. <sup>18</sup> No mebedin, dagejoy kabaalan jon mekikadwa so ni emin na totoo, say enshiy bakal. <sup>19</sup> A-akik shi pamati, aliwen jo ibales no ngantoy ngaaw wa dag-en ni eshom son si-kayo. Bay-iyo, ta si Apo Shiyos i maka-amta ja onshosa son si-kara. Tep waray naysolat ja esel nen Apo Shiyos nonta bayag da ja kowan to ey, "Sikak i maka-amten mengibedes ja onshosa nonta ngaaw i aramid sha." Kowan nen Apo Shiyos. <sup>20</sup> Jet say pesing jo, patiyos sota bilin nen Apo Shiyos ja naysolat nonta bayag da, ja kowan to ey, "No sota makakontra son si-kam ket na-agang, pakan mo. No na-kew ni shanom, i-aknim ni inomen to. Ta no sajay i dag-en mo, mebebaingan et ondeshang." Kowan to. <sup>21</sup> Aliwen jo ibales, ja mandeka ngo ni ngaaw, ta no sajay i pesing jo, singa si-kayoy inebak ni ngaaw. Isonga sota

mapteng ni olay i ipa-sas jo son si-kara say maynemneman ira.

### 13

<sup>1</sup> Angken sipa, mesepol la patien sha sota toray ni gobirno. Ta enshiy nganton toray ja mansaad no eg inpalobos nen Apo Shiyos. Emin na toray, si Apo Shiyos i engisaad so. <sup>2</sup> Isonga sota eg memati ni toray, singa si Apo Shiyos i kontra sha, ta si-katoy engisaad nontan na toray. Jet sota toon sajay i pesing to, ikaro to son Apo Shiyos. <sup>3</sup> Say nebeng nga ontakot so nonta ira toray, sota ira waray aramid shen ngaaw, nem no say aramid jo ket mapteng, enshiy jo itakot ja dag-en ni toray son si-kayo, no diket may-a-tek kayo et pay. <sup>4</sup> Ta sota toray, si-katoy insaad nen Apo Shiyos ja mengesas ni panmaptengan jo. Nem no say aramid jo ket ngaaw, si-katoy tekotan jo, ta say toray, waray nebeng ton menosa son si-kayo, jet kenshat ta sotan i dag-en to. Ta si-katoy insaad nen Apo Shiyos ja menosa ira nonta waray basol to. <sup>5</sup> Mesepol la patien jo sota ira toray; nem aliwen sota maypangkep ni penosa nen Apo Shiyos i pati-an jo so bengat; i-onod jon pati-en ira tep si-katoy amtayon koston nebeng nga medeka.

<sup>6</sup> Jet kabol met laeng niyay, mesepol pay ya manbedjad kayo ni bowis jo, ta sota ira toray, si-karay insaad nen Apo Shiyos ja emengolnos ni ili, isonga mesepol shay pilak. <sup>7</sup> Sota anam ni toray ja ipaay jo, si-katoy dag-en jo. No ngarantoy pansingila nonta para singil ni bowis, si-katoy i-akan jo. Jet sota anam ton mayshedjaw, si-katoy ishayaw jo.

<sup>8</sup> No waray otang jo, mesepol la bayshan jo say meksheng; nem no sota maypangkep ni semek

jo so ni sakey tan sakey, mesepol mangon wara sotan ni olay. Jet no waray semek jo so ni kait jo, singa tinongpal jon emin sota kowan nonta bilin nen Apo Shiyos ja naysolat nonta bayag da. <sup>9</sup> Eshakel iray bilin to jet sajay iray eshom: "Kareka memii, kareka memono, kareka mengibot, karam kamkaman i kokowa ni eshom." Nem angken nganton bilin nen Apo Shiyos, sakey bengat i esa-nopan ton esel; si-kato iyay: "Semek moy kait mon too ja inges toy moka penmek ni bakdang mo." <sup>10</sup> No ensemek moy kait mo, aliwen mo doko-en, no diket mapteng ni olay i pesing mo son si-kato. Isonga sotan na semek, si-katoy timongpal nonta emin na bilin nen Apo Shiyos.

<sup>11</sup> Sajay i medeka, ta si-katoy kasapolan niman na timpo. Mesepol la manmodiyat kayo, si-kayon emanpampamaayan ja singa nagogip. Ta shanshani ma sota timpon pengeda nen Cristo son si-katejo; manshoki nonta inpamati tayo son si-kato, eman-a-sop ma sotan na timpo. <sup>12</sup> Sota may-eshig ey dabi, ja timpo tayod ja dobong, shanshani men mepospos, jet isadat nen Apo Shiyos sota inkari ton mapteng nga timpo, ja may-eshig ey ka-akawan. Jet sota pandeka ni ngaaw wa aramid, ja emedegdeka niman na timpon embolinget, mesepol la sa-datan tayo ni pandeka ni mapteng nga aramid, say may-enam kiton manbiyag no timpo alin ka-akawan. Sota pandeka ni mapteng i osalen tayo niman say eg kito ma-ebak. <sup>13</sup> Olnosen tayo shorog i bakdang tayo, ta si-katoy koston ogadi ja may-enam nodtan alin maysa-dat ta timpo. Isonga aliwen tayo ma dag-en sota panboteng, ono edaos sa pandadsak, ono sota eshom ma na-alas sa aramid, jet ibi-jag tayo pay sota pekibekal tan pengepal

ni eshom. <sup>14</sup> Nem say nemnemen jo et ja dag-en, sota inges ni dingka nen Apo Jesucristo; isonga niman, karejo ma nemnemen ja dag-en sota pipiyan jon dag-en nonta eg kayo pay laeng emati.

## 14

<sup>1</sup> No wára son si-kayo i toon ekapoy i pamati to ta eg etod-an ni kosto, awat jo sotan na too. Karekayo mekisongbat son si-kato, no diket ipeteg jo sota wáred nemnem to. <sup>2</sup> Say sakey ya nan-i-inapilan ni nemnem ni too, sajay. Kowan ni eshom ey palobos i pangan ni angken nganto. Nem wára ngoy eshom, ja eg etod-an ni kosto, ja say wáred nemnem sha, sota natnateng bengat i mebedin na kenen sha. <sup>3</sup> Nem sota toon mebedin na kenen toy angken nganto, aliwén to koma bedawen sota nagshengan i toka kena. Jet kasta met sota sakey, eg to koma bedawen sota emengan ni angken nganto. Tep inges to ngon inewát nen Apo Shiyos met laeng sotan na too. <sup>4</sup> No eg nay-inges i nemnem ni eshom son si-kam, eg mo koma bedawen, tep aliwén si-kam i apo to, no diket si Cristo. Eg mo koma ikowan ey kosto ono aliwén kostoy nemnem ni sakey ya baga-en ja aliwén si-kam i apo to. Tep sota apo to bengat i mebedin na mengikowan no kosto ono aliwén kostoy dingka ni sakey ya baga-en to. Jet sota maka-apo son Cristo, eg ira bedawen nen Cristo, tep toka ira pekedsang ni olay.

<sup>5-6</sup> Jet say sakey pay, sota eshom ma too, wáray akew wa shaka ngidina; nem wára ngoy eshom ma too ja say wáred nemnem sha, kowan sha ey emin na akew, nan-i-inges. No manngidin man ono enshi, iso met laeng, ta sota toon wáray akew ja toka ngidina, sota kayshedjawan nen Apo Jesus i wáred nemnem to.

Jet sota toon eg manngidin, ja emengan ni angken nganto, iso met laeng ja kayshedjawan kono nen Apo Jesus i wáred nemnem to, ta eman-iyaman met laeng son Apo Shiyos nonta toka kena. Jet sajay ngoy nemnem nonta eg mengangan ni angken nganto. Nan-inges iren showa ja mapteng, nem say kowan ko son si-kayon emin, nemnem jo nin no ngarantoy koston pesing jo, no manngidin kayo ono enshi. <sup>7</sup> Say nemnemen tayo koma, sota piyan nen Apo Shiyos, ta no metey kito, ono wára kitod biyag, si Apo Shiyos ngoreshan i makakokowa son si-katejo, aliwén si-katejon shorog. <sup>8</sup> Niman na wára kitod biyag, mansilbi kito so nen Apo Jesus, jet no metey kito, iso met laeng ja maytoday i tayoka pansilbi. Isonga angken niman na wára kitod biyag ono metey kito, si Apo Jesus met laeng i makatoo son si-katejo. <sup>9</sup> Sajay i kabol la eteyan nen Cristo, tan nanbiyagan to mowan, say si-katoy Apo ira nonta wára pay laeng shi biyag, tan sota ira nanketey da.

<sup>10</sup> Jet emin kito, onsango kito so nen Apo Shiyos shima tinongawan to, jet amta-en tayo ma sota nanbanagan ni dingdingka tayo nonta wára kitod biyag. Isonga eg jo koma bedawen no ngantoy asen jon apil la wáred nemnem ni eshom, tep agi jo met laeng sotan shi pamati; baybay-iyoy.

<sup>11</sup> Sota isango tayo son Apo Shiyos ali, si-katoy kaytoshongan nonta esel nen Apo Shiyos ja naysolat nonta bayag da ja kowan to ey, “Sigoradon wára-ak shi biyag, jet emin na too, sigorado ngon manteditmokod ira son si-kak, jet ikowan shay shayaw sha son si-kak met laeng.” Kowan nen Apo Shiyos. <sup>12</sup> Isonga emin kito, no ngantoy dingka tayo, songbatan tayo di so nen Apo Shiyos.

<sup>13</sup> Jet niman ma, ibi-jag tayo sota tayoka pemedaw ni eshom. Mese-pol la nemnemen tayo shorog i tayoka dagdag-a say aliwen si-katejoy kabol la kepyan ni pamati ni eshom. <sup>14</sup> Amtak ey mapteng nga emin i angken nganto; enshiy mesepol la en ngidinen. Jet naka pati-a ey sajay ngoy kowan nen Apo Jesus. Nem wára iray eshom ma too ja say wáred nemnem sha, kowan sha ey wára konoy singa ensekig jet shaka ngidinen kenen ono dagen. Jet siya, sota toon sajay i wáred nemnem to, kosto sotan na panngidin to. <sup>15</sup> Nem no sota agim shi pamati ket esakitan i nemnem to kabol nonta kinan mon toka ngidina, singa moka pan-ipa-sas ey enshiy semek mo so nontan na agim shi pamati. Isonga no sota mekan i kabol la kesheshalan nonta pamati ni agim, karam kenen. Nemnem mo ey say sakey ya kabol la eteyan nen Cristo ket sota kaysedakan nontan na too.

<sup>16</sup> Isonga say kowan ko, angken na waray kanebengan mon mandeka ni sakey ya banag, pantan-shaan ka, ta baka ngaaw i penge-sas ni eshom. <sup>17</sup> Ta say epateg koma ja nemnemen tayo niman na nayda-kam kitod pantoshayan nen Apo Shiyos, sota mapteng nga ogadi, sota talna, tan sota imdeng ja medepod Ispirito Santo nen Apo Shiyos; eg kito koma mansosong-bat pangkep nonta emengidin ja eg mekan ono ma-inom. <sup>18</sup> Jet no sajay i pesing mo, moka pan-onora sota bilin nen Cristo, jet kosto-an toka nen Apo Shiyos; tan angken pay sota kait mon too, kosto-an shaka ngo.

<sup>19</sup> Isonga niman ma, say mese-pol la menemnem, sota mengikan ni olnos, tan mengikan ni kedsangan ni pamati ni eshom. <sup>20</sup> Kareka memasig ja mengani ni piyan mo, no sotan i meneshal

ni pamati ni eshom, ta sota pamatira, obda met laeng nen Apo Shiyos. Angken nganto, mebedin na mekan ja eg bedawen nen Apo Shiyos, nem aliwen mapteng i pangan ni angken nganto, no sikatoy kabol la kedismaya-an ni eshom shi pamati to. <sup>21</sup> Say mapteng nga medeka, sajay. No sota pangan ni apag, ono penginom ni adak, ono pandeka ni kompormi, i kabol la kepyan ni pamati ni eshom, mesepol la maybi-jag.

<sup>22</sup> Say kowan ko, sota wára son si-kam, si-kato — no ngidinen mo ono enshi. Ta enshi ngoy nay-biyangan ni eshom, no diket sikayo ngo bengat nen Apo Shiyos. Say nemnemen mo koma, sajay: sota toon man-imdeng ni olay, si-kato sota toon enshiy to bedawen shorog ja toka dagdag-a. <sup>23</sup> Nem no say sakey ya too ket waray showashowa tod nemnem to no aporbalan nen Apo Shiyos ono enshi, sotan na kowan to ey pangan to ni kompormi, eg to et ngo koma itoloy. Ta no itoloy ton dagen, eg kosto-an nen Apo Shiyos, ta eg to inonod sota amta ton mapteng. Jet emin na dagen ni too ja eg maytotop shi toka pemat, basol to sotan.

## 15

<sup>1</sup> Si-katejon etod-an ni kosto, ja makedsang i pamati to, mesepol la enosan tayo ira sota toon eg etod-an ni kosto, angken bimaki ira. Eg tayo koma ipilit i kosto tayo.

<sup>2</sup> Say dag-en tayo, sota mengikan ni pan-imdengian ni eshom, say onkedsang i pamatira, ta sikatoy panmaptengan sha. <sup>3</sup> Ta angken si Cristo, aliwen sota pan-imdengian to shorog i ninemnem to nonta kawasha tod ja dobong. Say piniyan to et ngo mowan, sota kekosto-i nen Apo Shiyos. Isonga inenosan toy balaw ni too. Si-katoy kaytoshongan nonta naysolat



nonta bayag da, ja kowan to ey, “Sota ngaaw ja kaledamsis ni too son si-kam Apo Shiyos, si-kak i engipedawan sha so.” <sup>4</sup>Jet sota ira naysolat nonta bayag da, naysolat ja mengitoshon ni panmaptengan tayo niman. Ta sajay iren naysolat i emengi-kan ni anos tan kedsang no timpo ni digat, say eg medingding i tayoka panshinel son Cristo. <sup>5</sup>Si Apo Shiyos i kedepo-i ni anos, tan kekedsangi ni pamati, jet say shawat ko son Apo Shiyos, sapay koma ta si-katoy ontolong met laeng son si-kayo say man-inanos kayo, ja inges jos Cristo Jesus ni dingka to. <sup>6</sup>Jet no sajay i pesing jo, emin kayo ma, mansek-sekey kayo ja mengiredjaw so nen Apo Shiyos ja Ama nen Jesucristo ja Apo tayo.

<sup>7</sup>Isonga say kayshedjawan nen Apo Shiyos ja dag-en jo, ibidang joy sakey tan sakey son si-kayo ey kait jo ira; karejo ibiyang i eshom. Ta si Cristo, inewat shakejo ngo ja too to ma; eg tokejo inbiyang. <sup>8</sup>Karejo dibkan ey aliwen sakey bengat i pangkep nen Cristo nonta inbetkag nen Apo Shiyos ja en mengitoshon so nonta ira Hodiyo. Dimaw ali say ipa-sas to ey si Apo Shiyos ket agpayson tongpalen to sota kari to nonta bayag da so nonta ira apo sha. <sup>9</sup>Nem say sakey pay ja pangkep to, say si-kayon aliwen Hodiyo, manshedjaw kayo ngo so nen Apo Shiyos pangkep nonta kaasi to. Si-katoy kaytoshongan nonta naysolat nonta bayag da ja kowan to ey, “Manshedjaw ira ngoy aliwen Hodiyo son si-kam Apo Shiyos, jet mekiredjawak son si-kara, jet mekikansiyonak pay son si-kara ja man-iyaman son si-kam.” <sup>10</sup>Wara pay i inkowan to, ja kowan to ey, “Pan-imdeng kayo, si-kayon aliwen Hodiyo, ta mayda-kam kayo so nonta ira sigod ja too nen

Apo Shiyos.” <sup>11</sup>Jet wara pay i kowan to ey, “Pan-iyaman kayo so nen Apo Shiyos, si-kayon emin na aliwen Hodiyo, tan aliwen si-kayo bengat, no diket emin na too, man-iyaman ira son si-kato.” <sup>12</sup>Jet wara pay i inpadto nen Isaias nonta bayag da, ja kowan to ey, “Wara aliy mengibengon so nen Ari David ja anak nen Jesse, jet say itorayan to, sota ira aliwen Hodiyo. Jet sotan alin mismo i panshingan ira nonta aliwen Hodiyo.”

<sup>13</sup>Jet say shawat ko son Apo Shiyos ja kedepo-i ni namnama tayo, sapay koma ta si-katoy mengi-kan son si-kayo ni ebadeg ga imdeng jo, tan talnayo, ni joka pemat son Cristo, jet sota Ispirito Santo nen Apo Shiyos, si-katoy ontolong son si-kayo, say asdeg toy koston panshinel jo son Cristo.

*Asdeg to lay inkowan ko, nem iyay pay i eshom*

<sup>14</sup>Si-kayon a-akik shi pamati, enshiy showashowak son si-kayo, jey mapteng may ogadiyo. Asdeg to may amtayo pangkep ni pamati jet edaing kayo ma ja mebedin na itod-an joy sakey tan sakey son si-kayo. <sup>15</sup>Nem intoled kon engikowan da niyay son si-kayo say eg jo dibkan. Si Apo Shiyos, kinaasi-an towak ja inpanbalin towak ni apostol nen Cristo, <sup>16</sup>jet naka mansilbi so nen Cristo Jesus niya naka pengitoshon so nonta ira aliwen Hodiyo pangkep son si-kato. Naka mansilbi ja singa sota parin para akan ni daton; nem say inpasing ko, intorok sota mapteng nga shamag ja edapo so nen Apo Shiyos, say ewaten nen Apo Shiyos ira sota aliwen Hodiyo. Jet inewat to ira ta singa indaton sha shorog i bakdang sha son si-kato, ni intolok sha so ey sota Ispirito Santo to i mengitoshong son si-kara. <sup>17</sup>Jet siya,

asdeg ton tinongpal ko sota obda ja inpiyal nen Apo Shiyos son si-kak; nem aliwen si-kak bengat i maka-obda niyay, no diket wares Cristo son si-kak ja kaontolong.<sup>18</sup> No sota maypangkep ni obda ni eshom, enshiy nak ikowan. Say amtak bengat, si-kak i inosal nen Cristo ja mengewis ira nonta aliwen Hodiyo say memati ira. Jet siya, emati ira tep shaka ipateg sota inkowan ko, tan sota itsora ni biyag ko.<sup>19</sup> Inon-an sha sota milagron dingdingkak, jet sajay, inewatan sha ey edapod panakabaln ni Ispirito Santo nen Apo Shiyos. Isonga inekad ko ira jay ya dogad, manshokid Jerusalem ingkatod Ilirikom, jet intorok ka emin shiman sota mapteng nga shamag pangkep so nen Cristo.<sup>20</sup> Ta say wared nemnem ko, say topogen kon dogad ja nak pengikowanan ni mapteng nga shamag pangkep so nen Cristo, sota ira dogad ja enshiy to inten-teneng ja maypangkep son si-kato. Ta ekak koston ta-kepan sota obden inshogi ni eshom.<sup>21</sup> Say piyan kon dag-en, inges to sota naysolat nonta bayag da ja kowan to ey, "Sota ira eg engitneng ni maypangkep son Apo Shiyos, amta-en shen mismo, jet ewatan sha pay."

<sup>22</sup> Sajay ya naka pengitosho, si-kato nin i kaontaktak son si-kak ja ekak dawán da son si-kayo, ingkato niman.<sup>23</sup> Nem niman ma, ta eg sha-ak mala mesepol shiyay iren dogad, mebedin na idekjas ko ira. Saja epalabas den pigen tawen, piyan kon ondaw da son si-kayo,<sup>24</sup> jet niman, mebedin emo ma. Isonga ninemnem ko ey manshedanak da son si-kayo ni idaw kod dogad ni Ispanjol. Jet meki-nyanak son si-kayo ni sankatikan say meki-adibayak son si-kayo jet asen joy ida-jat kon ondaw shi dogad ni Ispanjol.<sup>25</sup> Nem niman, ondawak nin shi Jerusalem, ja

nak i-akan sota inedos min tolong so nonta ira eshom ma ematid man.<sup>26</sup> Ta sota ira ematid Masi-donia, tan sota ira ematid Akaya, mapiyan iren mengi-kan ni tolong sha so nonta ira nankebiteg ga kait tayod pamati ja wared Jerusalem.<sup>27</sup> Ireka eman-imdeng ja mandeka ni sotan. Nem say agpayso, singa waray otang sha so nonta ira Hodiyo, isonga mesepol la ontolong ira son si-kara. Ta sota ira aliwen Hodiyo ket say nayda-kaman sha ni mapteng nga kon-oren ni too nen Apo Shiyos, sota ira Hodiyo. Isonga mesepol ngon onsobadit ira ni kasapolan ni Hodiyo shi biyag.<sup>28</sup> Nem no meksheng iyay ya dag-en ko, ja idaw ko sotan na alos sha, onshalanak mala son si-kayo ni idaw ko la shi dogad ni Ispanjol.<sup>29</sup> Jet naka namnama-a ey sajay den panshedan ko son si-kayo, asdeg ton kaasi-an shakiton emin nen Cristo ni timpon kawashak son si-kayo.

<sup>30</sup> Iyay i kekshawen ko son si-kayon a-akik shi pamati, tep sank-agait kiton emati so nen Jesucristo ja Apo tayo, tan saksakey pay met sota semek ja wara son si-katejo, ja edapo shi Ispirito Santo nen Apo Shiyos. Dilikaro aliy kasesaad ko et say mebedin na itolong jo son si-kak, sota panshewat jo son Apo Shiyos para son si-kak,<sup>31</sup> say eg sha-ak an-ano-en ira nonta eg emati shi Jodia, jet say sota alos ja idaw ko so nonta ira emati shi Jerusalem, ewaten sha, ja enshiy sha ipangkep pa ngaaw.<sup>32</sup> Jet balang nem metodoy ja onmotokak da son si-kayo ja eman-imdeng, no si-katoy piyan nen Apo Shiyos, jet say onka-jas ma i deknak ni i-asas takejo so.<sup>33</sup> Jet say shawat ko pay, sapay koma ta si Apo Shiyos ja kedepo-i ni talna, si-katoy wara ni olay son si-kayon emin. Siya, satan da.

## 16

<sup>1</sup> Piyan kon i-am-amta son si-kayo da shiya solat ko sota biin si Pibi, ja agi tayod pamati. Si-katoy para tolong so nonta ira emati shi Sinkria. <sup>2</sup> Awat jo ja mekikadwa son si-kayo, ta si-katoy mapteng nga dag-en tayon san-a-aki shi pamati so ni kait tayon too nen Apo Jesus. Jet no ngantoy mesepol to, tolongiyo, ta si-kato, asdeg toy tinodongan to, jet angken si-kak, tinodongan towak pay.

<sup>3</sup> Pakikowan jo lay semek ko so nen Priscilla nen Akila. Inges ko ira ja emansilbi so nen Cristo Jesus. <sup>4</sup> Jet nontan da, inpakat sha pay i kabaalan sha ja memiyag son si-kak, ja angken pay ya istay biyag shay onsongbat. Jet aliwen abos kon eman-iyaman son si-kara pangkep nontan na mapteng nga inpasing sha; angken sota emin na aliwen Hodiyoys ja emati, ja wared ka-ili-ili, ireka ngo eman-iyaman son si-kara. <sup>5</sup> Pakikowan jo pay i semek ko so nonta ira emin na ematin emesa-nop shima baley nen Priscilla nen Akila, jet angken si Ipinito, ja pilmiron emati so nen Cristo shi Asiya.

<sup>6</sup> Jet emin ira jay ya totoo, pakikowan jo pay i semek ko son si-kara: si Maria ja ebadeg i into-long ton panmaptengan jo, <sup>7</sup> tan si Androniko, nen Jonias ja kait kon Hodiyoys; si-karay kait kon naybalod nontan da. Sajay ya showen too, si-karay sigod ja am-amta ira nonta eshom ma apostol, ta epangdo iren emati ey say si-kak. <sup>8</sup> Pakikowan jo pay i semek ko son Aplias ja epateg son si-kak shi pamati, <sup>9</sup> tan si Urbano ja inges min emansilbi so nen Cristo, tan si Istakis ja epateg son si-kak, <sup>10</sup> kasta met si Apilis ja namta-an ey emepiyal la mansilbi so nen Cristo, tan angken pay si Aristobolo, pati sota pamilja to.

<sup>11</sup> Jet pakikowan jo pay i semek ko so nonta kait kon Hodiyoys ja si Hiredion, tan sota ira emati ja wared pamilja nen Narciso.

<sup>12</sup> Pakikowan jo pay i semek ko so nonta ira eman-obda pangkep so nen Apo Jesus ja si Triposa, tan agdalo si Pirsida ja epateg son si-kak; si-kato, asdeg toy inobda to pangkep son Apo Jesus. <sup>13</sup> Tan si Ropo ja sakey ya kamaptengan i ogadi to so nonta ira emati, tan angken pay si ineto, ja naka ikari ngo ey inak. <sup>14</sup> Pakikowan jo pay i semek ko so iren jay ya totoo: si Asinkrito, si Pligonti, si Hirmis, si Patrobas, si Hirmas, tan sota ira eshom ma a-akid pamati ja wara son si-kara. <sup>15</sup> Si Pilologo, si Julia, si Nirio, tan sota agi ton bii, tan si Olimpas, tan sota emin na ematin wara son si-kara.

<sup>16</sup> Ipa-sas joy semek jo ni sakey tan sakey son si-kayo. Jet angken sota ira emin na ematin emesa-sa-nop ja wared ka-ili-ili, piyan shen pekikowan ko ngoy semek sha son si-kayon emin ja emati shita Roma.

<sup>17</sup> Shewaten ko son si-kayon a-aki shi pamati ey tanshaaniyo ira sota eg makakosto nonta koston toro ja naytoro son si-kayo, ta si-karay emengi-kan ni eg jo pan-inawatan, tan kaondingding ni pamatiyo. Arawi-i jo ira. <sup>18</sup> Ta sota toon sajay i aramid sha, aliwen si Cristo ja Apo tayo i shaka pansilbi-i, no diket say shaka nem-nemnema, sota pipiyan ni bakdang sha. Singa agpayso i shaka ikowan, nem emengantiyok bengat, nakol ni sota ira toon maonod, inam-ay ya may-owapan. <sup>19</sup> Angken sipa, amtara sota may-pangkep ni pamatiyo, jet si-katoy naka pan-imdengi. Nem mesepol la tanshaanan jo ira jay, ta no itenengan jo sota ikowan sha, sotan i amta-an jo so ni ngaaw, jet piyan kon sota mapteng bengat

i amta-en jon dag-en. <sup>20</sup> Jet no dag-en jo iyya, si Apo Shiyos ja kedepo-i ni talna, ipalobos ton ebaken jo shagos ira jay ya too nen Satanas, ja singa mebedin na ikatin jo ma ira. Jet say shawat ko son Apo Shiyos, sapay koma ta si Apo Jesucristo, kaasi-an shakejo say amtayoy pesing jon onsongbat so iren ja apil i toro sha.

<sup>21</sup> Si Timoteo ja kadwak ni sajay ya obda, piyan ton pekikowan koy semek to son si-kayo, jet angken sota ira kait kon Hodiyos ja si Lucio, si Jason, tan si Sosipater, si-kato ngoy kowan sha.

<sup>22</sup> Si-kak si Tirsio, ja inpangisolat nen Pablo niyay; piyan ko ngon ikowan i semek ko son si-kayo.

<sup>23</sup> Si Gayo ja nanshiwesanan kod jay, piyan ton pekikowan koy semek to son si-kayon emin. Shiyay met laeng i kesa-nopi ni emin na ematid jay. Jet angken si Irasto ja trisoriro ni siyodad, tan si Kowartos ja agi tayod pamati, piyan sha ngon pekikowan koy semek sha son si-kayo.

<sup>24</sup> Jet say shawat ko son Apo Shiyos, sota kaasi nen Apo Jesucristo, ja wára son si-kayon emin, sapay koma ta si-katoy mashoman. Siya, satan da.

<sup>25</sup> Niman, mayshedjaw koma si Apo Shiyos, ta si-kato bengat i makabaal ja mengi-kan ni kedsang jo shi pamati, jet say toka osala ja emengi-kan ni kedsang jo, sota naka itoro ja kosto pangkep so nen Jesucristo. Istay ya enshiy maka-amta so niyay ya sigod ja nemnem nen Apo Shiyos nonta bayag da, tep eg to inpa-amta so ni angken sipen too. <sup>26</sup> Nem niman ma sotan na istay eg tayo amta, naypa-amta ma son si-katejo jet emankaitosho shi intiron dobong, say amta-en sha, tan say si-katoy onoren sha. Jet mika ibatay ni olay nodta insolat ni para padto

nonta bayag da. Si Apo Shiyos ja wára ni olay ingkatod ingka, sajay i inbilin ton medeka.

<sup>27</sup> Isonga mayshedjaw koma si Apo Shiyos ni olay ingkatod ingka, ta si-kato bengat i maka-amta ni emin. Mayshedjaw koma si Apo Shiyos jet si Jesucristo komay kabol ni kayshedjawan nen Apo Shiyos. Siya, satan da.

## SOTA PILMIRON SOLAT NEN SAN PABLO PARA SO NONTA IRA I-KORINTO

<sup>1-3</sup> Si-kak si Pablo ja makasolat niyay, jet si Sostinis ja agi tayod pamati, si-katoy kadwak. Sajay ya solat ko, para son si-kayon kait ko ja too nen Apo Shiyos ja wared ta siyodad ni Korinto. Si Apo Shiyos i joka topogen panshed-jawan niman na inpamatiyo son Cristo Jesus. Pinidi shakejo nen Apo Shiyos ja manbedin ni too to; isonga naykait kayo so nonta ira emin na emati so nen Apo Jesucristo shi kompermin dogad, tep si Jesucristo, si-katoy Apo tayon emin ja emati.

Itnengi jo iyay ya ikowan ko tep si-kak i sakey ya apostol nen Cristo Jesus, jet si Apo Shiyos i mismon enotok son si-kak.

Say shawat ko son Apo Shiyos, sapay koma ta kaasi-an tokejo, tan a-shoman to sota talna ja wara son si-kayo ja edapo met laeng son si-kato ja Ametayo, tan si Apo Jesucristo.

*Naka man-iyaman ni pamatiyo, nem naka meshanagi mep eg kayo nankasakey*

<sup>4-5</sup> Naka man-iyaman ni olay son Apo Shiyos, ta ebadeg i kaasi to son si-kayo, niman na wara kayo ma so nen Cristo Jesus. Jet kabol nonta kaasi nen Apo Shiyos son si-kayo, eshakil may mebedin na dag-en jo. Isonga mebedin men ewatan jo i toro nen Jesus, tan mebedin pay ja itoro jod eshom. <sup>6</sup> Sajay ya inamantan jo maypangkep so nen Jesucristo, si-katoy engipilmi ni pamatiyo. <sup>7</sup> Jet niman ma, in-akan ni Ispirito Santo nen Apo Shiyos i emin na mesepol jod pamati;

enshiy kolang jo, angken niman na joka pansessesked ni idaw ali mowan nen Jesucristo ja Apo tayo.

<sup>8</sup> Si Apo Shiyos i mengi-kan met laeng ni kedsang jo say enshiy jo kebedawan no onsabi sota akew wa pengigsheng nen Jesucristo ja Apo tayo no sipay maysedakan. <sup>9</sup> Si Apo Shiyos i mebedin na panshindan, jet si-katon mismo i engila-kam son si-kayo ja maykait so nen Apo Jesucristo ja Anak to.

<sup>10</sup> Niman, iyay i kekshawen ko son si-kayo ja a-akik shi pamati. Nemnem jo si Jesucristo ja Apo tayon emin, say man-i-inawatan kayo koma. Eg kayo koma mebodak; pansaksakey jo et i nemnem jo say saksakey ngoy pangkep jo.

<sup>11</sup> Ta waray insodsod ira nonta too nen Klo i son si-kak ey si-kayon a-akik shi pamati, waray emanbabakal kono son si-kayo. <sup>12</sup> Say sodsod sha, kowan kono ni eshom son si-kayo ey si-kak i onoren sha, nem sota ira eshom, kowan sha ey si Apolos ngo i onoren sha, ono si Pedro. Sota eshom, kowan sha kono ey si Criston mismoy onoren sha. <sup>13</sup> Na-alas sotan na inpasing jo! Si Cristo komay emongsanan jo, nem ebolak kayo gayam! Apay si-kak aya i naydansa shi koros ja engikesho ni basol jo? Apay inngadnan sha ayay ngaran ko nonta ebonjagan kayo? Enshi met: si Cristo! <sup>14</sup> Naka man-iyaman ta enshiy eshakil la binonjagan ko son si-kayo, say enshiy manpangkep ey inewis takejo. Say binonjagan ko bengat son si-kayo, si Krispo nen Gayo. <sup>15</sup> Ta no istay waray binonjagan kon eshakil son si-kayo, sigosho memama ja ikowan jo ey si-kak i onoren jo, ta binonjagan takejo. <sup>16</sup> (Ay owen pay gayam: angken sota pamilja nen Istipanas, binonjagan ko ira; nem enshiy eshom ma amtak ja nak binonjagan son si-kayo, nem eg si-kara bengat.) <sup>17</sup> Si

Cristo, nonta inbetkagan towak so, inkowan to ey si-kak i mengi-tosho nonta mapteng nga shamag maypangkep son si-kato; aliwén sota pemonjag i inbetkagan towak so. Inkowan pay nen Cristo ey ekak i-osal i kalaing kon man-a-sel, ta no sotan i pesing ko, baka et ey ikowan ni too ey say kabol la na-awisan ni eshakil, sota kalaing kon man-a-sel. Nem enshi: say na-awisan sha, inewatan sha sota maypangkep ni inkatey nen Cristo shi koros.

<sup>18</sup> Amtak ey sota toro maypangkep ni inkatey nen Cristo shi koros, endedamsis ira nonta toon shanshanin shosa-en nen Apo Shiyos; nem say amta tayon emati ja shanshanin isalakan to, sota toro ja maypangkep ni inkatey nen Cristo, si-katoy kawad-an ni panakabalin nen Apo Shiyos. <sup>19</sup> Aliwén kaskasshaaw iyay, tep angken nonta bayag da, waray naysolat ja esel nen Apo Shiyos, ja kowan to ey, “Sheshalen koy kalaing ira nonta toon edaing jet angken sota takal ni matekal, dingdingen ko.” Kowan nen Apo Shiyos nonta bayag da. <sup>20</sup> Isonga enshi lay silbi nonta toro ni toon nankedaing, ono sota maistoro, ono sota toon matekal la man-a-sel, no sota biyag ja wara niman i shaka itoro, ta enshiy silbi to son Apo Shiyos; ta toro bengat ni tood ja dobong iyay.

<sup>21</sup> Si Apo Shiyos, amta toy toka dagdag-a, jet say plano to, angken ngantoy kalaing ni too, eg mebedin na sotan i amta-an to so nen Apo Shiyos. Nem say inpasing to et ngo mowan, kowan to ey isalakan to ira sota memati nonta mika pan-itoro maypangkep son Cristo, angken kowan ni nankedaing ey enshiy silbi ton toro. <sup>22</sup> Sota ira Hodiyo, eg ira kono memati no enshiy sha asen na panakabalin nen

Apo Shiyos ja dag-en min milagro, jet sota ngo ira toon kowan sha ey Grigo, eg ira kono ngo memati no enshiy na-oneg ga toro ja mengi-kan ni pannemman sha. <sup>23</sup> Nem say mika pan-itoro, sota maypangkep so nen Cristo ja naydansa shi koros, jet sajay ya inkaydansa nen Jesus shi koros, endedamsis ira ni Hodiyo, jet no sota ira Grigo, shaka ngo ikokowan ey enshiy kowinta to. <sup>24</sup> Nem sota ira Hodiyo, tan aliwén Hodiyo, ja pinidi nen Apo Shiyos ja maysedakan, inamta-an sha ey say kawad-an ni panakabalin nen Apo Shiyos tan daing to, si Criston mismo. <sup>25</sup> Sota mika pan-itoro ja edapo son Apo Shiyos, kowan ni toon eg memati ey enshiy kenshat to. Nem say agpayso, epatpateg ey say sota kowan sha ey daing sha. Kowan ngo ni Hodiyo ey ekapoy, nem epigpigsat et ngo mowan ey say sota wara son si-kara.

<sup>26</sup> Si-kayon a-akik shi pamati, nemnem jo kari sota inpasing nen Apo Shiyos son si-kayo. Ootik son si-kayo i kowan ni karakdan ey matekal, ootik pay son si-kayo i ekayang i saad to, tan ootik pay son si-kayo i nay-anak ka baknang. Nem si Apo Shiyos, pinidi tokejon maysedakan. <sup>27</sup> Owen, si Apo Shiyos, pinidi to sota endedamsis ni tood ja dobong ja kowan sha ey enshiy amta to, ono ekapoy, say onbaing ira sota kowan sha ey waray amtara, tan sota kowan sha ey matekal. <sup>28</sup> Si Apo Shiyos, pinidi to ira sota kowan ni tood ja dobong ey ebaba, tan sota shaka damsisa, ono sota kowan sha ey enshiy silbi to, say ipa-sas to ey say kebenoli ni too, eg maytotop nodta nemnem to. <sup>29</sup> Inpa-sas to iyay say angken sipa, enshiy to idastog so nen Apo Shiyos, ja to ikowan ey waray nandasinan to shi eshom. <sup>30</sup> Nem

si Apo Shiyos, inda-kam tokejo so nen Cristo Jesus; isonga wára may koston daing jo, jet sotan met laeng i edapo son Apo Shiyos. Aliwén sotan bengat, no diket tokejoka ibilang ey singa enshiy basol jo jet kayoka ma mankai-inges son si-kato, jet anongosto ma ey maysedakan kayo. <sup>31</sup> Agpayso noman sota naysolat nonta bayag da ja kowan to ey, “Sota piyan ton mandastog, si Apo Shiyos komay idastog to.”

## 2

*Nonta wára-ak shitan, say intorok son si-kayo ket sota intorong ni Ispirito Santo*

<sup>1</sup> Si-kayon a-akik shi pamati, nonta indaw ko son si-kayo ja engitoshon nonta esel nen Apo Shiyos, aliwén sota katekal kon man-a-sel, ono sota kalaing ko i inosal kon engawis son si-kayo. <sup>2</sup> Ta nonta wára-ak son si-kayo, ninemnem ko ey say topogen kon itoro son si-kayo, sota maypangkep bengat so nen Jesucristo, jet wa-wa-sha ja intorok sota inkaydansa to shi koros. <sup>3</sup> Nontan na indaw ko son si-kayo, singa ekapoyak ka pasiya, isonga naka mankaikelkel-ewi ta baka et ey ekak iposi sota piyan nen Apo Shiyos ja dag-en ko. Naka pay emanbebayedbed nem sinashom. <sup>4</sup> Jet sota inkowan ko nonta naka mengitoshon son si-kayo, aliwén inges to sota kepesing ni toon kowan sha ey matekal, ja enamis sa esel i shaka osala. Nem say na-awisan jo, inewatan jo ey sota intorok, mismon intorong ni Ispirito Santo nen Apo Shiyos. <sup>5</sup> Isonga say pamatiyo, aliwén na shi kalaing ni tooy naynadraran to, no diket shi panakabalin nen Apo Shiyos.

<sup>6</sup> Nem wára et mangoy naoneg ja naka itoro so nonta ira

makedsang i pamati to. Jet sajay ya toro, aliwén edapo so ni tood ja dobong, ono edapod daing ira nonta toray niya dobong, tep wára diy timpon kengawngawan niyay ya amtara. <sup>7</sup> Saja mika pan-ikowan son si-kayo, sajay sota nemnem nen Apo Shiyos ja eg nin amta ni too nontan da tep eg to nin inpa-amta son si-kara. Sajay ya nemnem to, enshiy eshom nem eg si-katejoy naydakam son si-kato ingkatod ingka. Plano ngo eshan nen Apo Shiyos iyay nonta eg pay laeng epalsowa iya dobong, <sup>8</sup> nem sajay, angken sakey so nonta ira toray shiya dobong, eg sha inewatan iyay. Ta no istay inewatan sha koma, eg sha indansa si Apo Jesucristo shi koros, tep si-katoy Kangetoan. <sup>9</sup> Say mika itoro, sota nantongpalan nonta naysolat nonta bayag da, ja kowan to ey, “Sota eg inon-an tan eg intenengan ni too, tan sota eg sha pay ninemnem ja panmaptengan sha, si-katoy insagana nen Apo Shiyos so nonta toon waray semek to son si-kato.” Sajay i kowan to.

<sup>10</sup> Jet sota istay eg tayo amta pangkep son Apo Shiyos, inpa-amta met laeng ni Ispirito Santo nen Apo Shiyos. Ta sota Ispirito Santo, angken sota eda-med ja nemnem nen Apo Shiyos, toka ewatin emin. <sup>11</sup> Arig toy too. Enshiy maka-amta no ngarantoy wared nemnem ni kait ton too, ta say maka-amta bengat, sota makabakdang nga shorog. Isonga angken si Apo Shiyos, say maka-amta bengat ni nemnem to, sota Ispirito Santo to met laeng. <sup>12</sup> Jet si-katejon emati, say inewat tayo, sota intoro ni Ispirito Santo ja edapo son Apo Shiyos, aliwén sota intoro bengat ni too. Inpa-amta ni Ispirito Santo iyay say ewatan tayo sota in-akan nen Apo Shiyos

ja kaasi ja panmaptengan tayo.

<sup>13</sup> Isonga sajay ya mika pan-itoro, intoro met laeng ni Ispirito Santo nen Apo Shiyos son si-kami, aliwen edapo shi kait ta too. Jet si-kato ngoy mika pan-i-olog so nonta toon kawad-an ni Ispirito Santo nen Apo Shiyos. <sup>14</sup> Nem sota toon eg emati, enshi son si-kara sota Ispirito Santo, isonga eg sha ewatan sota kaitoro ni Ispirito Santo nen Apo Shiyos, ta kowan sha ey enshiy silbi to kono son si-kara. Eg mebedin na ewatan sha tep no enshiy Ispirito Santo so ni too, eg ma-ewatan tep sota Ispirito Santoy mengi-odog so. <sup>15</sup> Sota toon kawad-an ni Ispirito Santo nen Apo Shiyos, mebedin na ewatan ton emin i kowan nen Apo Shiyos. Nem sota toon enshiy Ispirito Santo nen Apo Shiyos son si-kato, pan-inemnem mango ey na-apil sota toon kawad-an ni Ispirito Santo. <sup>16</sup> Sajay met laeng i kowan ni padto nonta bayag, ja kowan to ey, “Sipay toon makamta ni nemnem nen Apo? Enshi, isonga enshi ngoy toon mengitosho son Apo ni dag-en to.” Kowan to. Jet si-katejo, waray amta tayon nemnem nen Cristo, isonga eg shakito ewatan nonta toon enshiy Ispirito Santo son si-kato.

### 3

<sup>1</sup> Nem si-kayon a-akik shi pamati, nonta wara-ak son si-kayo ingkato nonta indekjas takejo so, wara pay laeng sota sigod ja ogadiyon ngaaw. Singa a-anak i itsora ni pamatiyo. Istay say intorok koma nontan son si-kayo, sota maytotop shi toon kawad-an ni Ispirito Santo, nem enshi. <sup>2</sup> Mesepol la nam-ay nin i intorok tep eg jo kabaalan pay laeng sota na-oneg ja toro. Isonga say intorok son si-kayo nontan, arig to sota katas ja maypesoso shi

nga-nga tep eg to kabaalan na mengekmon ni apag. Jet angken niman, eg jo pay laeng kabaalan, <sup>3</sup> ta si-kayo, wara pay laeng sota sigod ja ogadiyon ngaaw. Say kasan niyay, wara pay laeng son si-kayo sota apal, jet kayoka pay manbabakal. Sajay i kasan to ey si-kayo, singa inges jo ira sota toon enshiy pamati to. <sup>4</sup> Sota eshom kono son si-kayo, kowan sha ey si-kak i onoren sha, jet sota eshom, kowan sha ngo ey si Apolos i onoren sha. Jet sajay ya eg jo pan-i-inawatan, singa inges joy itsora ni toon eg emati.

*Eg kayo koma mebodak pangkep son si-kamin emengitosho: kamika bengat emansilbi son Cristo*

<sup>5</sup> Nemnem jo kari iyay. Apay sipa kami nen Apolos? Si-kamin showa, kamika bengat emansilbi so nen Apo Jesucristo. Agpayson si-kamiy kabol la emati-an jo, nem say mika pandag-a bengat, sota obda ja kowan nen Apo Jesucristo ey dag-en mi. <sup>6</sup> Sajay i kayeshigan ni obda mi: si-kak i singa engimoda nonta botil, jet si Apolos i singa simibog so. Nem sotan na mola, eg onba-deg no eg peba-deg nen Apo Shiyos. <sup>7</sup> Isonga sota toon engimoda, ono simibog so, aliwen si-karay epateg, ta si Apo Shiyos i inpaba-deg so. <sup>8</sup> Sota engimoda tan simibog so, nan-atang bengat ira, jet si Apo Shiyos, si-katoy mengi-kan ni sobadit shen showa, no ngantoy inpasing shen nan-obda. <sup>9</sup> Jet sajay den obda min Apolos, si Apo Shiyos i mika pan-i-obda-i; aliwen kamika mandongba. Jet si-kayoy singa payew ton inpa-iso to son si-kami.

Say sakey pay ya kayeshigan ni obda mi, singa si-kayo i inpaitowen nen Apo Shiyos ja baley to. <sup>10</sup> Jet si-kak i inpangitowen to ni tokod tep si-kak i maka-



amten mengiroki, jet apil ngoy engitodoy. Nem sota mengitodoy, mesepol la singpeten toy pesing ton ondaga so; eg to koma ba-ba-ngaten. <sup>11</sup> Ta si-kayo, say nay-edetan ni pamatiyo, si Jesucristo; enshiy eshom. Si-katoy arig nonta inkowan ko ey intowen kon tokod. Eg mebedin na mesa-datan sotan na tokod, ta si-kato may nay-towen. <sup>12-13</sup> Jet sota ira toon mengitodoy niyay ya obdak, mesepol la eg sha iba-ngat i shaka pengitosh, ta no onsabi sota timpon pengigsheng ali nen Apo Shiyos no sipay maysedakan, ma-amtaan ngo eshan no sipay kostoy toro to, ta singa apoy i osalen ton pemeshas to ni obda ni sakey tan sakey. Jet sota kostoy toro to, may-eshig ey say inpangitoloy to nodta sigod ja tokod ja naytowan, balitok, ono palata, ono sota eshom ma ebanol et eg mepoolan sotan. Nem sota apil i toro to, may-eshig ey say inpangitoloy to nodta nayshogin baley, sota kiyew, ono sota sapsap. Jet sotan, mepoolan. <sup>14</sup> Jet no sota obda ni sakey tan sakey ja in-amag to nodta sigod ja intowen ko ket, mebay-an ni kepeshas to ali shi apoy, si-katoy waray ewaten ton konkona. <sup>15</sup> Nem no say obda nontan na too ket, mepoolan ni kepeshas to ali shi apoy, enshiy to konoren. Maysedakan mango, nem palashan i inpasing ton engilesat nonta apoy.

<sup>16</sup> Ngantoy intolokan jo so nonta ira apil i toro sha? Singa dinibkan jo ey si-kayon emati, may-eshig kayo ey Timplo nen Apo Shiyos, ta sota Ispirito Santo to, wara son si-kayo. <sup>17</sup> Jet no sipay ondogit so nonta Timplo nen Apo Shiyos, si Apo Shiyos met laeng i onshosa so. Si-kayo i may-eshig so nontan na Timplo nen Apo Shiyos, jet aliwen bolos ja kompormiy medeka nodtan.

<sup>18</sup> No wara son si-kayo i kowan to ey matekal tep wara son si-katoy daing ni toon eg emati, man-nemnem koma, ta naytopo sotan na nemnem. Say pesing to koma, i-onod to ey enshiy silbi nontan na kowan to ey amta to, say wara et pay koma i amta-en ton mapmapteng. <sup>19</sup> Ta sota kowan ni toon eg emati ey takal sha, enshiy silbi nontan son Apo Shiyos. Si-kato sota kowan nonta naysolat nonta bayag da ey, "Sota in-amag ni toon matekal ja solo, sotan met laeng i osalen nen Apo Shiyos ja mengna son si-kara." <sup>20</sup> Wara pay i naysolat nonta bayag da ja kowan to ey, "Si Apo Shiyos, amta toy wared nemnem ira nonta kowan sha ey matekal, jet sotan, enshiy silbi to son Apo Shiyos." Kowan to. <sup>21</sup> Isonga enshiy en idastog ni sakey tan sakey son si-kayo ja to ikowan ey waray matekal ja inonod ton too. Enshiy pateg niyay; eg mesepol la sajay i pesing jo, ta in-akan met nen Apo Shiyos i emin son si-kayo. <sup>22</sup> Si Apolos, si-kak, si Pedro, saja dobong, tan angken nganton banag ja onmotok shi ma-onod alin timpo, ono sota wara niman, angken sota ketey jo, ono kawashayo pay laeng shiya biyag, nay-akan na pansigshan jo. <sup>23</sup> Nem si-kayo, say Apo jo, si Cristo, jet say Apo ngo nen Cristo, si Apo Shiyos.

#### 4

<sup>1</sup> Say nemnemen jo pangkep son si-kamin emengitosh, kamika mansilbi bengat so nen Cristo, jet si-kamiy piniyal nen Apo Shiyos ja mengitosh ni piyan ton amta-en ni totoo. <sup>2</sup> Amtayo met ey sota toon piniyal ni apo to, sota kowan ni apo toy dag-en to; aliwen sota kowan ni eshom. <sup>3</sup> Isonga si-kak, aliwen epateg sota ikowan jo, ono sota ikowan ni eshom, pangkep nonta obden inpiyal nen

Apo Shiyos son si-kak, no mapteng i dingkak, ono ngaaw. Angken na si-kak ka mismo, ekak pay mebedin na ikowan ey tinongpal ko ono enshi. <sup>4</sup> Ta si Apo Jesucristo, si-katoy mengesas ali nonta obdak. Enshiy amtak ja nak nankolongan shi obdak; nem sotan na wared nemnem ko, aliwen sotan i kaybidangan ko so nen Apo Shiyos ey naka mepiyal. <sup>5</sup> Isonga eg tayo ibangat ja ikowan i kamapteng ono kangaaw ni sakey tan sakey son si-katejo niman na timpo, ta no onmotok alis Apo Jesucristo, emin sota nay-emot, tan angken pay sota pangkep ni toon toka nem-nemnema, ma-amta-an. Sotan aliy amta-an tayo so no siyen panindengan nen Apo Shiyos sota dingka tayo, ono enshi.

<sup>6</sup> A-akik shi pamati, emin ira jay ya inkowan ko la, inosal koy bakdang mi nen Apolos, say metod-an kayon eg mengilastog ni sakey ya emengitoshon ni esel nen Apo Shiyos, ono memedaw ira nonta eshom ma emengitoshon. Mesepol la i-anam joy joka pesing nodta esel nen Apo Shiyos ja naysolat nonta bayag da. <sup>7</sup> Nem edastog kayo et ngo mowan, jet ngantoy kabol? Ngarantoy nandasinan jod eshom? Emin na wara son si-kayo, edapo son Apo Shiyos, jet eg jo koma idastog — ta apay si-kam ma mismo i edapo-an to?

<sup>8</sup> Apaw kayon i-Korinto! Siya, warden emin ma i kasapolan jo, jet singa baknang kayo ma! Singa inbiyang jokamin engitoshon son si-kayo nontan da jet si-kayo et ngo mowan i emekitoshay ma so nen Cristo. Angka et nem simabi ma koma sota pantoshayan nen Cristo say mekitoshay kami ngo! <sup>9</sup> Ta no onsabi iyay, mapteng mala. Niman, say kowan ni tood ja dobong maypangkep son si-kamin apostol, kowan sha ey si-

kamiy sobda ni tood ja dobong, ja agpos maykait kami so nonta pirison mebitay. Say kowan ko no sina-shom, si Apo Shiyos emo, inpalobos to ja mebebaingan kami shi sango-an ni karakdan na tood ja dobong, tan shi penginingning ni anghil. <sup>10</sup> Ta si-kami, say kowan ni too, enshi konoy amta mi, tep say toro mi, sota maypangkep son Cristo. Nem si-kayo, kowan sha ey dimaing kayo ma ni inpamatiyo son Cristo. Siya, ekapoy kami mango jet maked-sang kayo! Eshayaw kayo, nem si-kami, endedamsis sha. <sup>11</sup> Jet ingkato niman na oras, kamika mankodang ni kenen mi tan inomen mi, enshi pay i koston baro mi, tan enshiy baley min pan-iyanan mi; shakamika pay pan-shangkasi. <sup>12</sup> Isonga kamika manobden pasiya say waray osalen mi ni kasapolan mi, ta enshiy emengi-kan. Jet no waray ngaaw wa ikowan sha son si-kami, eg mi ibales, no diket say kowan mi, si Apo Shiyos komay onbindisiyon son si-kara. Jet no waray memedigat son si-kami, mika itoled. <sup>13</sup> No bebaingan shakami, eg mi soppingilen. Singa sobda kami ma ni tood ja dobong, singa dogit kami ja ensekig sha.

<sup>14</sup> Say insolatan ko so niyay son si-kayo, aliwen piyan kon say mebebaingan kayo, no diket say kowan ko ey metod-an kayo. Ta singa annak takejod pamati. <sup>15</sup> Angken bilang ey eshakil i emengitoshon son si-kayo maypangkep ni pamati son Cristo, saksakey bengat i may-eshig ey amejo. Jet si-kak sotan, ta si-kak i intenengan jo so ni mapteng nga shamag pangkep so nen Cristo Jesus. <sup>16</sup> Isonga shewaten ko son si-kayo ey sota ogadik koma i onoran jo. <sup>17</sup> Say amta-an jo so ni koston ogadi ni toon emati

son Cristo, sota inon-an jon naka dagdag-a. Isonga ibetkag ko la si Timoteo son si-kayo, jet si-katoy penemnem son si-kayo nontan na dingdingkak. Si-katoy naka piyala ja anak kod pamati ja ensemek ko, jet saja ikowan to la, si-kato met laeng i naka itoro so ni emin na esa-nop pa emati shima dogad ja dinawdaŵan ko.

<sup>18</sup> Sota ira eshom son si-kayo, ireka mandastog, ta kowan sha emo ey ekak da ondaw wa man-pasiyal son si-kayo. <sup>19</sup> Nem no ipalobos nen Apo Jesus, ondawak den shagos son si-kayo, jet asen ko ga sota shaka idastog ja kowan sha ey katekal sha, no esel sha bengat, ono agpayso. <sup>20</sup> Ta say pamati maypangkep ni pantoshayan nen Apo Shiyos, aliŵen na notnotnot bengat, no diket agpayson dag-en. <sup>21</sup> Isonga olay tokejo ngo: no eg jo bediwan i ogadiyo, kenshat ta manda-kam kayo ni bilin na pasiya no ondawak da. Nem no bediwan jo, mapteng day idaw ko son si-kayo, ta kaasi-an takejo.

## 5

*Wara son si-kayo i nanbasol ni ebadeg: ibiyang jo sotan*

<sup>1</sup> Iyay i shinemag ko ey wára kono son si-kayoy na-alas i aramid to. Wara konoy dakin pinidiw toy asewa met laeng nen ameto. Angken sota ira toon enshiy pamati to son Apo Shiyos, eg sha dag-en iyay. <sup>2</sup> Jet edastog kayo pay laeng, jey eg kayo et mandeshingit pangkep nonta ngaaw wa aramid ni kait jo! Sota toon sajay i aramid to, mesepol la eg ma maybidang son si-kayon emati. <sup>3-4</sup> Ta si-kak, naksheng nga ninemnem koy pesing jo so nontan na too. Nebeng nga si-kak i mengigsheng, tep si-kak i emen-gitakshel son Apo Jesus. Isonga no ma-olnong kayo, angken enshi-ak,

singa wára-ak met laeng ja ekisanop, tep si-kayoy kawad-an ni nemnem ko, jet sota panakabalin nen Apo Jesus, ja wára son si-kak, wára ngo ni kesa-nop jo, ja mengiredan. <sup>5</sup> Isonga no mesanop kayo, pantabtabal kayo ey sajay ya too, ibiyang jo ma jet olay to ngo si Satanas son si-kato. Jet angken manda-kam ni digat, balang nem mebidin, say sota ispirito to mango, maysedakan ni timpon pengigsheng ali nen Apo Jesus no sipay maysedakan.

<sup>6</sup> Sota joka pandastog, na-alas! Itan met son si-kayo i ngaaw wa aramid ja eg jo ikaso. Am-tayo met ey sota ootik ka para debag ni tinapay, no maydaok nodta kaydaokan to, edinan ton emin. <sup>7</sup> Isonga ibi-jag jo sota sigod ja ngaaw wa ogadiyo, ja may-eshig nodta para debag ni tinapay. Ibong jo sota tinapay ya na-alinan ni para debag jet sadata jo ni bado ja enshiy daok to. Say piyan nen Apo Shiyos, enshi koma sota ogadin ngaaw son si-kayo ja man-a-elbat. Piyan ton may-eshig kayo nodta tinapay ya enshiy daok ton para debag tep sotan i ema-osal ni timpon piyasta ni Paskowa. Si Cristo i may-eshig ngo nodta kalniron maydeton ni timpon Paskowa, tep naksheng nga etey da say ma-kal i basol tayo. <sup>8</sup> Isonga man-imdeng kito koma ja singa timpo ni piyasta ni Paskowa. Nem i-anam tayo komay tayoka pesing, ja aliŵen sota sigod ja ngaaw wa aramid i en dagdag-en, ono sota ensekig, tep si-katoy may-eshig nodta tinapay ja na-alinan ni para debag ja eg ma-osal ni Paskowa. Say itsora ma ni ogadi tayo, sota podnon emin i onoren, ja enshiy o-owap.

<sup>9</sup> Insigod ko ja insolat son si-kayo nontan da jey eg kayo mekikadkadwa so nodta toon mabii ono maleki. <sup>10</sup> Nem aliŵen

na say piyan kon ikowan ket, sota enshiy pamati to i eshawian jo, ja mabii, ono magamkam ni kompormi, ono makibot, ono sota emanshedjaw so nonta sinan shiyos, ta no eshawian jo ira ja eg emati, mesepol la onkinan kayod ja dobong. Nem eg mebedin nin. <sup>11</sup> Say piyan kon ikowan son si-kayo ja insolat ko, eg kayo mekikadwa so nonta ira toon kowan to ey agi shi pamati nem mabii, ono magamkam, ono emanshedjaw pay shi sinan shiyos, ono masomang, ono maboteng, ono makibot. Sota toon sajay i itsora to, karekayo mekipengan pay son sikato. <sup>12-13</sup> Ta no sota maypangkep ira nonta eg emati, enshiy nak kaybiyangan na memidin son si-kara. Si Apo Shiyos i maka-amta son si-kara. Nem no si-katejo, sota kait tayon emati ngo i mesepol la bidinen tayo. Isonga sota toon ngaaw i aramid to ja wara son si-kayo, karejo ipalobos ja mekisanop son si-kayo.

## 6

*Eg kayo koma ondaw shi paganon kowis say tongtongen shay kaso jo*

<sup>1</sup> No kaspangarigan ey wara son si-kayon emati i eg man-inawatan, apay enshiy baing jo aya ja jo petongtong iyay ja kaso jo so nonta ira kowis ni ili? Pagano met ira! Apay nga eg jo ngo olnosen shorog i eg jo pan-inawatan? <sup>2</sup> Apay eg jo aya amta ey si-katejon emati i mengitoshay ali niya dobong? Jet no si-kayon emati i mengigsheng no ngarantoy medeka so ni tootod ja dobong ingkatod ingka, apay eg jo aya posi-en i angken otik ka banag ja tongtongen? <sup>3</sup> Apay eg jo aya amta ey no ka-onoran ali ket itorayan tayo ali sota ira anghil? No

kabaalan jo alin itorayan sota ira anghil, apay eg jo et ngo kabaalan ira ta kokonting nga banag niman? <sup>4</sup> No waray kaso jo, apay nga ondaw kayo so nonta ira eg jo patkan i kowan sha, ja si-kara et ngo mowan i menongtong son si-kayo? <sup>5</sup> Sajay i inkowan ko ta kabebaing itan na joka pesing. Apay enshi ngoy angken sakey son si-kayo ja waray amta to ja ontongtong met laeng son si-kayo ni eg jo pan-i-inawatan? <sup>6</sup> Nem si-kayon san-a-aki shi pamati, say joka pengitongtongi ni kaso jo shorog, shima toon enshi et ngo mowan i pamati to, jet si-karay kaontongtong so!

<sup>7</sup> Sajay ya joka panshiringkol, si-katoy ka-asan to ey singa eg jo benolan i pamatiyo met laeng. Say mapteng nga pesing jo koma, eg kayo mekiringkol; angken ontolok kayon ma-ebak, angken doko-en shakejo. <sup>8</sup> Nem si-kayo, ngaaw met ngo i aramid jo, jet joka pandoko-a ira sota mismon agi jo shi pamati!

<sup>9-10</sup> Amtayo met ey sota toon ngaaw i aramid to, eg maydakam shi pantoshayan nen Apo Shiyos. Isonga aliwen sota ngaaw wa aramid i jo dag-en, ta naytopoy nemnem jo no kowan jo ey baybay-an nen Apo Shiyos sotan na basol. Ta sota mabii, sota maleki, sota emay-a-shom so nonta ira ensekig i shaka dagdag-a shima timplo ni pagano, tan sota daleki ja kait ton daki met laeng i shaka eshola, eg ira maydakam shi pantoshayan nen Apo Shiyos. Kasta met sota makibot, sota magamkam ni kompormi, maboteng, masomang, mengolbod ni kokowa ni eshom, eg ira ngo maydakam. <sup>11</sup> Waray eshom nontan da son si-kayo ja inges niyay i aramid to. Nem niman ma, ta emati kayo son Apo Jesucristo, tan wara sota

Ispirito Santo nen Apo Shiyos son si-kayo, epakawanan ira jay den aramid jet may-eshig ey edinis kayo ma. Too kayo ma nen Apo Shiyos, ja para mansilbi son si-kato, jet si Apo Shiyos, kinosto-an tokejo ngo.

*Aliwa komen ekotay i pannem-nem jo maypangkep ni pengeshem*

<sup>12</sup> Owen, agpayso sota kowan jo ey si-katejon emati, palobos ja mebedin na dag-en tayan emin. Nem aliwen emin na dag-en ket, waray i-akan ton panmaptengan tayo. Isonga no si-kak, ekak itolok ja sotan et ngo mowan i onsekdin shi naka pansilbi son Apo Jesus. <sup>13</sup> Say dason jo, kowan jo ey, “Nganto mangoy epalsowan ni bakdang, no aliwen para pengeshem?” In-arig jo pay i ekes, ja kowan jo ey, “Say ekes, kay-iyanan ni mekan; tan say mekan, ondaw shi ekes.” Nem say bakdang, aliwen na para pemii ono pekileki, no diket para son Apo Jesus tep si Apo Jesus, si-katoy makakokowa ni bakdang. Nemnem jo iyay, ta no ondaw ali mowan si Cristo, mesa-datan iya sigod ja bakdang, pati sota istay tayoka dagdag-a. <sup>14</sup> Si Apo Shiyos, inpanbiyag tos Apo Jesus shi patey, jet panbiyag shakito ngod patey ni panakabalin to.

<sup>15</sup> Apay eg jo aya amta ey say bakdang jo ket, parti ni bakdang nen Cristo? Isonga no si-kak, eg mebedin na sota parti ni bakdang ko, ja parti met laeng ni bakdang nen Cristo ket, nak osalen ja i-eshom so nonta bakdang ni biin maleki. Ayshi — eg mebedin sotan! <sup>16</sup> Apay eg jo aya amta ey sota toon nay-eshom so nonta biin maleki ket, naykasakey son si-kato ja singa saksakey may bakdang sha? Ta say kowan ni naysolat nonta bayag da, kowan to ey, “Sota showen bakdang, no man-

a-shom, saksakey ma.” <sup>17</sup> Nem sota emati ja naykasakey son Apo Jesus, saksakey ma i nemnem sha nen Apo Jesus. <sup>18</sup> Isonga karekayo memii ono mekileki; arawi-i jo ira jay ya aramid. Ta sota mabii, bakdang to shorog i dino-shis to. Sota eshom ma basol, eg ma-apiktaran i bakdang ja inges niyay. <sup>19</sup> Baka et ey dinibkan jo ey say bakdang jo ket, Timplo ni Ispirito Santo ja inpan-iyen nen Apo Shiyos son si-kayo. Isonga say bakdang jo, aliwen kokowayo. <sup>20</sup> Si-kayo, may-eshig ey tinongkal shakejo nen Apo Shiyos ni epaliti; isonga say dag-en jo koma, sota kayshedjawan nen Apo Shiyos.

## 7

*Kanemnema ni toon emati son Cristo i pansigshan ni eshom, aliwen bina-ngatan i toka pesing*

<sup>1</sup> Niman, songbatan ko sota salodsod jo, ja insolat jo di son si-kak. Say kowan ko, mapteng no eg kayo mengesawa koma, ta pansigshan jo iyay. <sup>2</sup> Nem ma-da tep eshakil i maleki tan mabii shita kad-an jo, mapmapteng met laeng no waray asewayo say eg kayo ma-ewis ja mandeka ni ngaaw. <sup>3</sup> Jet sota daki, mesepol la i-akan toy kasapolan nonta asewa ton bii, jet kasta met sota bii, mesepol ngon i-akan toy kasapolan nonta asewa to. Sajay i koston itsora ni san-asewa. <sup>4</sup> Ta sota biin waray asewa to, aliwen si-katoy mengitoshay shorog ni bakdang to, no diket sota asewa ton daki. Kasta met sota dakin waray asewa to, aliwen si-katoy mengitoshay nonta bakdang to shorog, no diket sota asewa ton bii. <sup>5</sup> Isonga karejo diwayan iyay ya mesepol la dag-en ni san-asewa, malaksig no waray nantolagan jon showa ey eg kayo nin mankadwa say eg medingding sota panshewat jo son Apo Shiyos,

ja si-katoy topogen jo. Nem mese-pol la mankadwa kayo mowan na shagos no mepospos sotan da, ta amtayo met i itsora ni si-katejon too. Amangan et no ewisen shakejo nen Satanas ja mandeka ni ngaaw wa aramid.

<sup>6</sup> Sajay ya inkowan ko la son si-kayo, aliwen na naka pan-ipilit. No piyan jon mengesawa, ekak iparit. <sup>7</sup> Nem say piyan ko, no mebedin koma, emin na too ket si-kak i onoran sha ja eg engasewa. Nem aliwen na nan-inges i dekna ja in-akan nen Apo Shiyos so ni sakey tan sakey ya too. Sota mebedin na itoled ni sakey, eg mebedin ngon dag-en nonta sakey.

<sup>8</sup> No si-kak, iyay i ikowan ko so nonta ira eg pay laeng engasewa, inges to ngo sota ira biin eballo: mapmapteng no on-onong ira koma ja eg mengesawa ja inges ko. <sup>9</sup> Nem no eg ira makatengel ni bakdang sha shorog, ja ireka ma-ewis sa mekileki ono memii, mapmapteng ngo eshan no mengesawa ira, say eg ira manbesol.

<sup>10</sup> Niman sota ira waray asewa to, iyay i bilin nen Apo Jesucristo ja ikowan ko son si-kara. Sota bii, aliwen to isi-jan koma i asewa to, <sup>11</sup> jet kasta met sota daki, aliwen na to isi-jan koma i asewa to. Nem no isi-jan ni biyy asewa to, mesepol la on-onong ja eg meki-esawa mowan, ono may-odi et ngo so nodta asewa ton sigod.

<sup>12-13</sup> Saja eshom ja ikowan kod jay, aliwen bilin nen Apo Jesucristo, no diket si-kak i makakowan. Si-kayon a-aki shi pamati ja waray asewa ton eg emati, no piyan ton on-onong nga asewam ngo eshan, aliwen mo isi-jan. <sup>14</sup> Ta si-kam ja emati, say nayda-kaman nonta asewam ni kaasi nen Apo Shiyos, si-kam ja emati, jet angken sota annak jo,

mayda-kam ngo ira. Nem no isi-jan mo sotan na asewam, singa naysi-jan ngo sota annak jo shi kaasi nen Apo Shiyos. <sup>15</sup> Nem no sotan na asewam ja eg emati ket, piyan ton isi-jan toka, angkena. Ebolos ka ma, enshiy emengipked son si-kam. Jet mebedin iyay, ta say piyan nen Apo Shiyos, si-katejon pinidi ton too to, waray talna tayo. <sup>16</sup> Enshiy kanas mon memasig ja eg mengisi-jan, tep eg mo sigorado-en ey ewisen mo ja memati sota asewam say isalakan nen Apo Shiyos.

<sup>17</sup> Say esa-nopan ni emin den inkowan ko, sajay: no ngantoy kasesaad mo nonta inpamatim, itodoy mo ngo eshan, tep sotan i piyan nen Apo Shiyos ja pesing mo ni olay. Sajay i bilin ko so ni emin na emati, angken townen dogad. <sup>18</sup> No kaspangarigan ey si-kayon imonod nonta kogit ja ogadi ni Hodiyos asan kayoka mamati, bay-iy, eg jo koma bedawen sotan na edaga son si-kayo. Kasta met sota eg imonod ni ogadi ni Hodiyos nonta pilmiro asan mamati, eg mesepol la dag-en to pay laeng sotan na ogadi ni Hodiyos. <sup>19</sup> Ta aliwen sota pengonod ni ogadi ni Hodiyos, ono eg pengonod, i kaibilang nen Apo Shiyos, no diket say epateg, sota pemati ni bilin to. <sup>20</sup> No ngarantoy kasesaad mo nonta pilmiro asan kaka mamati so nen Cristo, aliwen mo bediwan. <sup>21</sup> Isonga no bilang ey baga-en ka nontan asan kaka mamati so nen Cristo, angkena. Nem no pedobosan shaka ja aliwen baga-en ma, awat mo et. <sup>22</sup> Anam ton aliwen baga-en ka ma, ta niman na emati ka son Apo Jesus, ewaya ka ma ja eg toka shosa-en nen Apo Shiyos. Kasta met son si-kam ma aliwen baga-en nontan, niman na emati ka son Apo Jesus, maybidang ey baga-en

toka nen Apo Jesus. <sup>23</sup> May-eshig ey binayshan toka da ja kokowa to ma, isonga aliwén jo pati-en i ikowan ni eshom. <sup>24</sup> Si-kayon a-akik shi pamati, no ngarantoy kasesaad jo nonta pinidi shakejo nen Apo Shiyos ja memati, aliwén jo bediwan: basta si Apo Shiyos i pansilbi-an jo.

<sup>25</sup> Niman sajay ya ikowan ko mowan pangkep ni enshiy asewa to, aliwén na bilin iyay ya edapo son Apo Jesucristo, no diket edapo iyay shi nemnem ko. Nem mebedin na panshingan jo iya ikowan ko, ta amtayo met ey ebadeq i kaasi nen Apo Jesus son si-kak. <sup>26-27</sup> Say kowan ko, no niman na timpon digat, mapmapteng no sota waray asewa to, eg to koma nemnemen ja isi-jan sota asewa to; kasta met sota enshiy asewa to, eg to koma nemnemen sota peki-esawa to. <sup>28</sup> Nem no sipay mengesawa, aliwén basol sotan. Saja inkowan ko la, piyan kon say nam-ay komay biyag jo, ta sota waray asewa to niman na timpo, eshakil ni olay i digat to.

<sup>29</sup> Iyay i piyan kon amta-an jo koma, si-kayon a-akik shi pamati: emankepospos may timpo. Isonga manshoki niman, sota ira waray asewa to, ishingan sha koma ja mansilbi son Apo Jesucristo, ja singa sota enshiy asewara. <sup>30</sup> Eg tayo koma ida-kad i daringit ono imdeng, jet no menongkal kito, aliwén sotan et ngo mowan i tayo kesiwatan. <sup>31</sup> Sota ira waray kokowa sha shiya dobong, aliwén sotan i sha nemnememen. Ta saja dobong, eman-a-sop may pan-tepos to.

<sup>32</sup> Piyan kon enshi koma i jo kesiwatan. Sota daki ja enshiy asewa to, sota pan-imdengan nen Apo Jesus bengat i toka nemnem-nema, <sup>33</sup> nem sota dakin waray asewa to, eshakil i toka nemnem-nema ja pesing to say man-

imdeng si asewa to. <sup>34</sup> Nakol ni say wared nemnem to, nanshowa. Kasta met sota bii ja enshiy asewa to, etopog i wared nemnem to: sota enshiy to kebedawan so nen Apo Jesus, shi bakdang to tan shi nemnem to. Nem sota biin waray asewa to, emesiwat ni nemnem to nonta pan-imdengan nen asewa to. <sup>35</sup> Sajay i inkowan ko tep piyan kon todongan takejo. Enshiy naka pan-iparit, no diket naka pan-ikowan i panmaptengan jo, say metopog ja si Apo Jesucristo koma i pansilbi-an jo.

<sup>36</sup> No kaspangarigan ey waray toon marikit i anak to, nem kowan to ey emankeba-kol sota anak to, itolok ton esaw-en sha, no sotan i mesepol. Aliwén basol iyay. <sup>37</sup> Nem no nemnemen nonta too ey angken eg mengesawa sota anak to, sotan i mapmapteng. Mesepol la nemnem to ngo, ja enshiy emilit son si-kato. <sup>38</sup> Isonga enshiy problima no i-asewa to ono enshi; nem mapmapteng koma no eg to i-asewa.

<sup>39</sup> Sota biin waray asewa to, eg to koma isi-jan sota sigod ja asewa to. Nem no metey sota daki, ewaya ma, mebedin na meki-esawa mowan shi eshom, no kait ton emati son Apo Jesus. <sup>40</sup> Nem no si-kak, say kowan ko, no sotan na biin ebalo ket, ononong ja eg mowan meki-esawa, pansigshan to. Jet amtak ey sajay ya inkowan ko, intorong towak ni Ispirito Santo nen Apo Shiyos.

## 8

<sup>1</sup> Niman, iyay i ikowan ko pangkep nonta salodsod jo, no palobos ja mekan sota naydaton so ni sinan shiyos. Nem iyay nin i ikowan ko maypangkep nonta sinan shiyos ja keshedshedjawa ni pagano shita kad-an jo. Ag-payson amta tayon emin ey o-owap i itsora ni sinan shiyos. Nem

no sina-shom, sota kowan tayo ey amta tayo, si-katoy panshoki i ni pankospag. Isonga mesepol la isakit tayoy kait tayo, ta si-katoy emengi-kan ni kedsang ni pamatira. <sup>2</sup> Sota toon kowan to ey waray amta to, ey enshiy semek to ni kait to, si-kato et ngo mowan i kolang pay laeng i amta to. <sup>3</sup> Nem sota toon waray semek to son Apo Shiyos, ja emengonod ni piyan to, si-katoy agpayson waray amta to.

<sup>4</sup> Jet no sota maypangkep ni mekan ja naydaton shi sinan shiyos, palobos sa kenen jo tep amta tayo met ey sota sinan shiyos, o-owap, enshiy panakabalin to. Amta tayo pay met ey sakey bengat ngoreshan i Shiyos, enshiy eshom. <sup>5</sup> Eshakel konoy shiyos shi dangit ono shiya dobong, jet siya, eshakel i sinan shiyos ja o-owap jet kaishayaw ni pagano. <sup>6</sup> Nem no si-katejo, amta tayo ey sakey bengat i Shiyos, jet si-katoy Ametayo. Si-katoy engamag ni emin, tan si-katoy tayoka toshonga ni emin na tayoka dagdag-a. Amta tayo pay ey sakey bengat i Apo, jet si-kato si Jesucristo. Si-katoy kabol la epalshowa-an ni emin, tan si-katoy kabol la ewara-an ni biyag tayo ingkatod ingka.

<sup>7</sup> Nem waray eshom nodta ira kait tayon emati ja istay naydowam ma manshedjaw nodta sinan shiyos, jet wara pay laeng shi nemnem sha ey waray panakabalin nontan. No mengan ira nonta naydaton shi sinan shiyos, shaka nemnemnema ey para so nonta sinan shiyos jet kowan shed nemnem sha ey nanbasol ira, tep eg ira etod-an ni kosto pangkep niyay. <sup>8</sup> Aliwen na sota mekan i ewatan shakitejo so nen Apo Shiyos. No mengan kito nonta naydaton shi sinan shiyos ono enshi, iso met laeng: enshiy

tayo nandasinan no mengan kito, ono tayo nankolongan no eg kito mengan. <sup>9</sup> Nem mesepol la tanshaanan jo iyay ya nay-akan na palobos son si-kayo; mesepol la nemnemnem jo ira sota eg pay laeng etod-an ni kosto, tep baka et ey mesekitan i nemnem sha. <sup>10</sup> No kaspangarigan ey wara sota eg etod-an ni kosto, jet inon-an toka ja emengan nonta naydaton shi sinan shiyos shi timplo ni pagano, mebedin na sotan i ka-ewisan to ja mekipengan, ta kowan to ey amtam i moka dagdag-a. Nem si-kato, eg pay etod-an ni kosto, jet no meksheng nga mengan, <sup>11</sup> medismaya shi pamati to. Isonga sotan na inpakipangan mo kabol ni kowan mod nemnem mo ey amtam i kasesaad ni sinan shiyos, si-katoy singa esharalan ni pamati nonta kait mo. Aliwen mapteng sotan na dingkam, ta sotan na agim shi pamati, si-katoy sakey ya eteyan nen Cristo. <sup>12</sup> Isonga no kaspangarigan ey sajay i dag-en mo, nanbasol ka son Cristo, ta si-kam i kabol la na-awisan nonta too ton eg etod-an ni kosto ja mekipengan, jet nakol ni edismaya shi pamati to. <sup>13</sup> Isonga no si-kak, angken ekak ma mengan na polos ni apag, no sota mekan i kabol la kedismaya-an ni agik shi pamati to, say aliwen si-kak i kabol.

## 9

<sup>1-2</sup> Angken si-kak, palobos met ja dag-en koy pansigshan ko, nem ekak inpakat. Waray nandasinan ko met so ni eshom ma emati, tep apostolak; inon-an ko met ta mismo si Apo Jesus! No kowan ni eshom ey aliwen apostolak, istay amtayo koma mango, ta si-kak i kabol la emati-an jo son Apo Jesus. Jet sotan i ka-asan to ey si-kak, agpayson apostolak. <sup>3</sup> Say naka isongbat so nonta ira toon



eg memigbig ey apostolak, kowan ko ey si-kayon i-Korinto koma ja emati i asen sha.

<sup>4</sup> Nem ekak inpakat i kina-apostol ko. Apay aliwen palobos aya son si-kami, no i-aknan jokami ni kenen mi tan inomen mi? <sup>5</sup> Apay aliwen palobos aya no kaspangarigan ey mekidkidaw i asewa mi shi mika dawdawi? Sota kait min apostol, pati si Pedro, tan sota agi ira nen Apo Jesus, shaka ngo pekiddidaw i asewara. <sup>6</sup> Sota eshom, joka ira i-alosi ni i-ala sha ni mesepol sha; nem si-kamin Birnabi ket eg jo mango pansalsheng ja mandeka ni embel-at ta obda ni sajay ya mika pansilbi son Apo Jesus? <sup>7</sup> Sipay inon-an jon solsharo ja emekikobat ey si-kato shorog i mankastos ni mesepol to? Sipay inon-an jon nanmola jet eg to ninamtan sota apit to? Sipay inon-an jon nanopastol ni animal, ja eg to ninamtan i katas nontan na pinastol to? Si-kak i kabol la emati-an ni eshakel la totoo, nem angken nganto, enshiy nak kinshaw son si-kara. <sup>8</sup> Sajay i inosal kon arig ta amtak ey ewatan jo iyay, nem wara pay i bilin nen Apo Shiyos ja arig met laeng niyay, <sup>9</sup> ja nay-awat so nen Moises nonta bayag da, ja kowan to ey, "Karejo koma bosalan sota animal no emengidik ni pagey, ta say namtan to koma ngo sota sabal ni toka pan-idika." Kowan to, jet edawag ey aliwen sota pansigshan niyay ya animal bengat i kaytoshongan niyay ya bilin. <sup>10</sup> Apay eg jo aya ewatan ey sajay ya naysolat ket, si-katejon too i kaytoshongan to? Sota man-obda, wara komay namnama ton konoren. Arig to sota mengesharo: enshiy imdeng ton mengesharo no enshiy namnama ton to epiten, tan kasta met sota mengidik. <sup>11</sup> No si-kamiy kabol la inamta-an jo so ni mapteng nga toro pangkep

son Apo Shiyos, apay embel-at aya son si-kayo no mayda-kam kami ngo son si-kayo ni kasapolan mi? <sup>12</sup> No sota ira eshom ja engitoshon son si-kayo ket, waray nebeng sha ja manbeka ni mesepol sha son si-kayo, istay ebadbadeg komay nebeng mi ey si-kara. Si-kami, waray istay nebeng min manbeka son si-kayo koma ni kasapolan mi, nem eg kami nanbaga; inenosan mi ngon man-obda ni kasapolan mi. Ta no manbeka kami, amangan no sotan i ondingding so nonta mapteng nga shamag maypangkep son Cristo, ja mika panitoro. <sup>13</sup> Apay eg jo aya amta ey sota ira eman-obda shima Timplon nen Apo Shiyos ket, shiman i shaka pengal-i ni shaka panbiyag? Ta ireka may-akni nonta maydeton shima kowan sha ey altar shi Timplo. <sup>14</sup> Inges to met laeng sota ira emengikowan ni mapteng nga shamag maypangkep son Jesucristo. Say kowan nen Apo Jesus, sota ira emengitoshon, say pengal-an sha koma ni kasapolan sha, sota ira shaka pantodi. <sup>15</sup> Nem si-kak, ekak inosal ira jay ya istay palobos sa dagen ko. Jet sajay ira den insolat ko, aliwen naka mengshaw ni kasapolan ko. Mapmapteng ja angken meteyak ni agang ko nem say nak mankekkekshaw, nakol ni damsisen sha sota naka panitoro ja mapteng nga shamag maypangkep son Jesus. Baka kowan sha ey sota kenen koy naka nemnema.

<sup>16</sup> Si-kak, enshiy nebeng kon mengilastog ni naka pengitoshon nonta mapteng nga shamag maypangkep son Jesucristo. Nay-awat iyay ya obda son si-kak jet kapiditan na nak itoro. Kaasi-ak ali no ekak ikowan iya mapteng nga shamag pangkep son Jesucristo! <sup>17</sup> No sajay ket dingkak ja nandapo bengat shi nemnem

ko, mebedin na wáray idastog ko. Nem aliwén nemnem ko iyay, no diket si Apo Shiyos i emili son si-kak, jet inpiyal to iyay ya obda son si-kak. <sup>18</sup> Jet ngarantoy konoren ko? Enshiy eshom nem eg sajay: Sota naka pengitosho nonta mapteng nga shamag maypangkep son Cristo, dibshi, ekak panbedjad ira sota naka pan-itod-i. Tan say sakey pay, ekak inosal sota istay palobos sa pengshaw ko ni mesepol ko so nodta ira naka pantod-i.

<sup>19</sup> Angken sipen too, enshiy toon memidit son si-kak no ngantoy dag-en ko, nem say ninemnem ko, inpanbalin ko iya bakdang kon singa baga-en ni emin na totoo, say eshakel koma i itorong kon memati son Jesucristo. <sup>20</sup> Isonga no wára-ak shi kad-an ni Hodiyo, singa Hodiyo, say ewisen ko iren memati son Jesucristo. Aliwén kapiditan son si-kak ja onoren i dinteg sha, nem naka i-anam son si-kara, balang nem ewisen ko iren memati. <sup>21</sup> No wára-ak so nonta ira toon aliwén Hodiyo ja eg maka-amta ni bilin nen Apo Shiyos ja in-awat to so ni Hodiyo, naka i-anam son si-kara, say ewisen ko ngo iren memati. Nem aliwén na kowan ko ey enshiy bilin nen Apo Shiyos ja onoren ko, ta naka onora met sota bilin nen Cristo. <sup>22</sup> No wára-ak ja naykadwa so nonta ira eg pay laeng etod-an ni kosto, ekak ipilit i kostok, say ewisen ko iren onkedsang i pamatira son Jesucristo. Angken sipen too i kaydaokan ko, naka i-anam i naka pesing son si-kara, say wára koma iray eshom ma memati ja maysedakan. <sup>23</sup> Sajay i naka dagdag-a say ma-shoman ira sota memati nonta mapteng nga shamag maypangkep son Jesucristo, tan say onshakel i kait kon mayda-kam nodta pansigshan ja

kai-akan ni mapteng nga shamag.

<sup>24-25</sup> Amtayo met ey sota ira emekilongba, olay toy matekal ja mepangdo. Jet saksakey bengat i mengebak ja on-awat so ni primiyoy. Isonga shaka bidina shorog i bakdang sha, ja aliwén kompormi i shaka dagdag-a. Sajay komay onoran jo, say wáray kon-oren jo di. Sota ira mekilongba, shaka singpetay shaka pekilongba say meprimiyoy-an ira, nem sotan na primiyoy sha, eg onbayag, meseshal met laeng. Nem si-katejo, mas pay komen singpeten tayo i pesing tayo, ta sota ewaten tayo, eg mesheshal, wára ni olay ingkatod ingka. <sup>26</sup> Si-kak, singa nay-arigak shi emekilongba niya naka dagdag-a niman. Jet diritso i naka pesing, aliwén palashan. Singa boksingiro pay i kay-eshigan ko, jet aliwén inges ko sota boksingiron eg to amten mekiboksing: <sup>27</sup> naka bidina shorog i bakdang ko, say aliwén sota piyan koy ma-onod. Sajay i naka dagdag-a, tep piyan kon sigorado-en sota primiyoy shi dangit. Si-kak met i engitosho so ni eshom, nem baka enshiy nak kon-oren shi karonoran.

## 10

<sup>1</sup> A-akik shi pamati, eg tayo koma dibdibkan sota epasemak so nonta ira apo tayo da nonta timpon Moises. Kolpot i emengitoshong son si-karen emin shi dawán sha, tan emin ira, nanshalan ira nodta kawa ni baybay ja inti-an nen Apo Shiyos. <sup>2</sup> Jet nontan ma, singa may-eshig ey ebonjagan ira ja too ma nen Moises ira. <sup>3</sup> Emin ira, engan ira nonta tinapay ya in-akan nen Apo Shiyos ja kowan sha ey mana. <sup>4</sup> Tan enginom ira nonta shanom ja in-akan nen Apo Shiyos ja edapo nodta bato. Si Cristo i wára met laeng nontan ja emay-odo-odop son si-

kara ja emengi-kan ni kasapolan sha. <sup>5</sup> Inon-an shen emin iyay ya kaskasshaaw wa dingka nen Apo Shiyos, nem karakdan son si-karay eg kinosto-an nen Apo Shiyos. Isonga shineshal to ira sotan nonta wára ira nodta dogad ja nan-ak-akshan shen embanaw wa dogad ja enshiy toon eman-iyen.

<sup>6</sup> Jet niman, sotan na epaspasemak da son si-kara, banshaan son si-katejo, say aliwén sota ngaaw i tayo nemnemnemen na dag-en, ja inges toy inpasing sha. <sup>7</sup> Isonga aliwén kayo manshedjaw so nonta ira sinan shiyos ja inges toy inpasing da nonta eshom son si-kara. Inkowan nonta esel nen Apo Shiyos ja naysolat nonta bayag da i itsora ni inpanshayaw sha, ja kowan to ey, “Sota ira totoo, timanongaw iren mengantan emenginom jet enayaw ira.” <sup>8</sup> Mesepol la aliwén kito memii ono mandeki, ja inges to sota dingka nonta eshom son si-kara. Sajay i basol sha, isonga say etey son si-kara nontan ni san-akew, showen polo tan tedon dibo. <sup>9</sup> Isonga aliwén na tayo damsisen si Apo Shiyos, ja onong toy dingka nonta eshom son si-kara, ja kowan sha ey asen sha no ito-to-wá nen Apo Shiyos i penosa to son si-kara. Sajay i basol sha, isonga si Apo Shiyos, inpalobos to ja angken shita-an ni oleg ira ja metey. <sup>10</sup> Aliwén tayo ikotot sota insaad nen Apo Shiyos ja pangolo tayo shi pamati, ja inges toy dingka nonta eshom son si-kara. Sajay i basol sha, isonga inpalobos nen Apo Shiyos ey bono-en nonta anghil to ira.

<sup>11</sup> Sajay ya edaga son si-kara, si-katoy banshaan so ni emin na maysa-dat son si-kara, jet inpaisolat nen Apo Shiyos iyay ya edaga nonta bayag da say eg tayo onoran sotan na dingkara. Pan-

ashalan tayo komen emin sota epalabas den epasemak. <sup>12</sup> Sota toon marinel ja kowan to ey matekal niman ta emati, mesepol la mantanshaan ta baka et ey no kabasan ket ma-ebak no ma-ewis sa mandeka ni ngaaw. <sup>13</sup> Ingkato niman, sota kaonsabi son si-kayon awis ja manbesol, aliwá et ngon epalado, no diket kenshat ta sotan i kaonsabi so ni emin na totoo. Nem angken ngantoy onsabi ali, si Apo Shiyos i panshingan jo, ta eg tokejo i-oway no eg jo posien. Si-kato met laeng i mengi-kan ni kedsang jo ja mengenos say eg kayo ma-ebak.

<sup>14</sup> Isonga niman si-kayon ensemek ko, karekayo manshedjaw ma shi sinan shiyos; arawí-i jo iyay ya aramid. <sup>15</sup> Amtak ey manemnem kayo, isonga olay tokejo ja onbigbig so niya ikowan ko, no kosto ono aliwén kosto. <sup>16</sup> No mesa-nop kitejon emati, tayoka ipa-sas ey naykait kito so nen Cristo ni tayoka pandilikob. Emebindisiyoni sota tasen tayoka penginomi, jet sota mekinom nontan, tan mekikan nonta tinapay ja mepetpet-ing, singa naykasakey ira son Cristo, ta nayda-kam ira shi shaletto, tan shi bakdang to. <sup>17</sup> Eshakel kito, nem sesakey bengat sota tinapay ja tayoka panbibingayi, jet sotan na tinapay, si-katoy nansakakeyan tayon emati. <sup>18</sup> Nemnem jo kari sota kepesing ni Hodiyo: sota naydaton so nen Apo Shiyos shima kowan sha ey altar, si-katoy naykasakeyan sha son Apo Shiyos. <sup>19-20</sup> Jet joka ewati i piyan kon ikowan? Say kowan ko, sota kaidaton ni pagano shi sinan shiyos sha, aliwén si Apo Shiyos i naydatonan to, no diket sota ira dimonyo. Isonga ekak kosto ja mekikan kayo ni naydaton so ni dimonyo, ta no kenen jo, naykasakey kayo ma so ni

dimonyo. Nem aliwén kowan ko ey wáray panakabalin niya naydaton, ono sota naydatonan ton sinan shiyos. Say piyan ko ikowan, eg kayo koma mekikan, <sup>21</sup> ta eg mebedin na showay kayda-kaman jon peki-inoman ono pekipenganan. Mesepol la manpidi kayo nodta showa: shi panshedjawan so nen Apo Shiyos, ono panshedjawan so ira ni dimonyo. <sup>22</sup> Apay piyan jon sen-gkiten si Apo Shiyos, say on-bonget? No bilang ey ondaw alin shosa-en shakejo, apay posi-en jon disi-an?

<sup>23</sup> Agpayso sota kowan jo ey si-katejon emati, palobos ja dag-en tayan emin. Nem aliwén emin na dag-en tayo ket, wáray i-akan ton panmaptengan ono kedsangan ni kait tayo. <sup>24</sup> Aliwén na sota panmaptengan jo bengat i jo nem-nemnemen, no diket nemnem jo ngo sota panmaptengan ni kait jo. <sup>25</sup> Sajay i inkowan ko la pangkep ni pengan nonta apag ja naydaton shi sinan shiyos. Nem no shima dako-an, angken ngaranton apag ja dako, mebedin jon tongkalen ja kenen, jet eg mesepol la jo pay laeng ibaga no ngarantoy ka-apag to. Eg mesepol la mepnek kayo ja mengamta. <sup>26</sup> Emin na mekan, edapo met laeng son Apo Shiyos. Amta tayo ta wáray naysolat nonta bayag da ja kowan to ey, “Saja dobong, kokowa nen Apo Shiyos, pati sota emin na wara nodtan.”

<sup>27</sup> Iyay pay i ikowan ko pangkep nonta inemnem jo so ni panmaptengan ni kait jo. No wáray toon eg emati ja mengewis son si-kam ja kowan to ey ka mekipenganan son si-kato, jet piyan mon ondaw, mebedin na ondaw ka. Jet no ngantoy isango to son si-kam, kan mo. Angken eg mo pay laeng nin ibaga, no ngantoy ka-apag nonta insango to; eg mese-

pol la mepnek ka ja mengamta. <sup>28-29</sup> Nem no bilang ey wáray kait mon emati ja naydikob nodtan ja mengikowan son si-kam ey sotan na apag ket, naydaton shi sinan shiyos, kareka mengan, say eg mesekitan i nemnem nonta engikowan son si-kam.

Nem sota eshom son si-kayo, kowan sha kono ey, “Apay, sota egket ngo mowan etod-an ni kosto i mengitoshon son si-kak ni mebedin kon dag-en? Palobos sa emin met son si-kak. <sup>30</sup> No nan-iyamanak et son Apo Shiyos ni maypangkep so nontan na mekan, apay pay laeng nga en bedawen ni eshom ja ikowan sha ey wáray nankolongan ko?”

<sup>31</sup> Nem say kowan ko, no mengan kayo, ono menginom kayo, ono ngarantoy kowan jo ey dag-en jo, nemnem jo nin no kayshed-jawan nen Apo Shiyos. <sup>32</sup> Asas jon eg kayo mengi-kan ni kedismaya-an ira nonta makapiyan na memati koma son Cristo — Hodiyos ono sota aliwén Hodiyos — tan karekayo pay mengi-kan ni kedismaya-an ira nonta kait jon emati. <sup>33</sup> Si-kak, say naka pesing, naka i-anam i emin na naka dagdag-a, say mengi-kanak ni pan-imdengan ni eshom ma too. Aliwén sota panmaptengan ko bengat i naka nemnemnema, no diket sota panmaptengan ni karakdan, say memati koma ira ja maysedakan.

## 11

<sup>1</sup> Si-kak komay onoran jo tep si Cristoy etod-an ko.

<sup>2</sup> Ebadeg i naka pengiredjaw son si-kayo, ta jowakka nemnemnema ni olay, jet angken pay sota intorok son si-kayo, si-katoy joka on-onora. <sup>3</sup> Nem piyan kon ewatan jo koma ey emin na dag-en jo, mesepol la na-olnos. Say pangolo ni emin na daki, si

Cristo, jet say pangolo ngo ni bii, sota dakin asewa to, jet say pangolo ngo nen Cristo, si Apo Shiyos. <sup>4</sup> Isonga no mesa-nop kayo, i-nam jo sota joka pesing. Sota ira daleki ja emanshewat son Apo Shiyos, ono emengitosho, ja nankadogong, singa eg to amten mengiredjaw nonta pangolo ton si Cristo. <sup>5</sup> Nem sota bii ja emanshewat son Apo Shiyos ono emengitosho, ja enshiy ta-bon ni toktok to, singa eg to amten mengiredjaw ni pangolo ton daki. Enshiy baing to, ja inges to sota biin ekoskosan i toktok to. <sup>6</sup> No sota bii ket, eg manta-bon, pekoskos to et ngoy toktok to. Nem kenshat ta enshiy biin makapiyan nontan na kebebaingan to; isonga mesepol la manta-bon i bii koma. <sup>7</sup> Nem say daki, eg to koma ta-bonan i toktok to, ta si-katoy emengitakshel son Apo Shiyos ja Kangeto-an. No manta-bon, singa toka ibaba i bakdang to. Sota bii, si-kato komay manta-bon ta intorayan nonta daki. <sup>8</sup> Ta say daki, nonta pinalsowa nen Apo Shiyos, aliwen shi bii i edapo-an to, no diket say bii, edapod daki. <sup>9</sup> Say daki, aliwen na epalsowa ja para kadwa ni bii, no diket say bii epalsowa ta mesepol i kadwa ni daki. <sup>10</sup> Isonga mesepol la say bii, ta-bonan shay toktok sha ta say sota ira anghil ja wara nodtan ja ekisa-nop, asen sha ey sota ira bii, amtaren ishayaw sota daki ja pangolo sha. <sup>11</sup> Nem say piyan nen Apo Shiyos ja dag-en nonta toon emati son Cristo, sajay: say bii, eg to koma ikowan ey enshiy bibiyang ni daki son si-kato; jet say daki ngo, eg to koma ikowan ey enshiy biyang ni bii son si-kato. <sup>12</sup> Ta say bii, edapod daki nonta inkapalsowa to, jet niman say daki emay-enak ja medepod bii. Jet emin iyay ya banag, edapo so nen Apo Shiyos. <sup>13</sup> Nemnem jo

kari. Angken si-kayo, amtayo ey aliwen anam ni biin manshewat son Apo Shiyos no eg manta-bon. <sup>14</sup> Apay aliwen sigod aya ja kowan tayo ey no enshokey i bowek ni daki ket kabebaing? <sup>15</sup> Nem no say bii ket enshokey i bowek to, kayshedjawan to, ta sota bowek to ja enshokey, si-katoy singa ta-bon ja in-akan nen Apo Shiyos.

<sup>16</sup> Nem no wared tan i toka ipilit i kosto to maypangkep niyay, say songbat ko, ampet medeka sota inkowan ko la, ta sajay bengat i mika ipalobos ja apostol ja pesing ni emati son Cristo no mesa-nop iren manshedjaw. Asan say sakey pay, shi eshom ma dogad ja kawad-an ni emati, enshiy eshom ma ogadin shaka dag-a ni shaka panshedjaw son Apo Shiyos.

<sup>17</sup> Wara pay i naka bedawa son si-kayo, ta no mesa-nop kayo kono ja manshedjaw son Apo Shiyos, ngaaw et day toka panbenagi, aliwen sota mapteng. <sup>18</sup> Waray engikowan son si-kak ey no mesa-nop kayo kono, kayoka mandilinasin, ja eg kayo man-i-inawatan. Jet singa naka pati-a sota eshom ma kowan sha ali, <sup>19</sup> ta kenshat ni si-katen too ja sajay i medeka. Jet ipalobos nen Apo Shiyos say ma-on-an nem sipay emepiyal la emati. <sup>20</sup> Say nantongpalan nonta inpandilinasin jo, no mesa-nop kayon mengan, aliwen sota penginemneman jo son Apo Jesus i medeka; apil. <sup>21</sup> Ta sota eshom kono son si-kayo, epangdo la ja kinan toy si-kato, jet sota eshom, na-agang ja enshi anan, jet sota eshom pay kono, na-aminan. <sup>22</sup> Ngantoy pesingan jo so nitan? Apay enshiy baley jo aya ja jo penganan, ono penginoman? Apay endedamsis jo aya sota totoon esa-nop pa manshedjaw son Apo Shiyos? Apay nga joka bebaingi sota ira enshiy mebedin ton ita-jon na kenen? Jet ngaranto may

ikowan ko son si-kayo? Naka bedawa itan na joka pesing, eg takejo ishayaw.

<sup>23</sup> Nemnem jo sota intorok son si-kayo maypangkep ni pandilikob tayon emati ja penginemneman son Apo Jesus. Inewat ko sotan na toro son Apo Jesus, ja epasamak nonta edabin en inbaag ni sakey ya too to so nodta makakontra son si-kato. Nontan, engala ni tinapay, <sup>24</sup> jet idi enaksheng ja nan-iyaman son Apo Shiyos, shinshowa to sotan na tinapay, jet say kowan to, “Sajay i bakdang kon bono-en sha; si-katoy kaysedakan jon took. Pandilikob kayon took jet shoshowa joy tinapay ja penginemneman jo son si-kak.” Kowan to. <sup>25</sup> Jet idi naksheng iren engan, inda to sota tasa jet kowan to ey, “Manshoki ma niman, badoy pesing nen Apo Shiyos ja mengisedakan ni totoo, jet saja inomen jon wared tasa, si-katoy pengiroki to, ta sajay i shalak ka on-ayos ali nem meteyak. No mandilikob kayon took, panginom kayo ja penginemneman jo son si-kak, jet angken memipigen dag-en jo iyay.” Kowan to. <sup>26</sup> Isonga niman na ka-enshi nin nen Apo Jesus, ingkatod idaw to mowan ali, no mandilikob kayon emati ja mengan ni tinapay tan menginom shi tasa, joka panpa-  
amta shi totoo i inkatey to la.

<sup>27</sup> Isonga sota ira mengan tan menginom ja shaka pandag-a sota penginemneman sha so nen Apo Jesus, nem eg sha patkan kari, nanbasol ira so nen Apo Jesus ta endedamsis sha sota inkatey to, tan sota shaleton imayos shi koros. <sup>28</sup> Isonga mesepol la nemnemen nin ni tooy itsora to shorog no toka met laeng patki sotan na penginemneman so nen Apo Jesus, asan mangan niyay ya tinapay tan menginom nonta

wared tasa. <sup>29</sup> Ta sota ira mekikan niyay tan meki-inom ja eg sha bigbigen ey penginemneman ni bakdang nen Cristo ja naykoros, ja kowan sha ey pengan bengat, dingkara i eg koston nen Apo Shiyos ja keshosa-an sha met laeng. <sup>30</sup> Isonga eshakil son si-kayo i ekapoy tan emansekit jet etey pay sota ira eshom. <sup>31</sup> Nem enshiy tayo ikaro no nemnemen tayo koma nin no kostoy pangkep tayo, asan kitoka makipangan. <sup>32</sup> Nem no kaspangarigan ey waray ipalobos met laeng nen Apo Jesus ja digat son si-katejo, piyan ton say mebidin kito, jet say eg kito may-a-shom so nonta ira toon eg emati ni keshosara di.

<sup>33</sup> Isonga niman si-kayon akik shi pamati, no mesa-nop kayon mandilikob ja dag-en jo sota penginemneman jo son Apo Jesus, karekayo man-a-agag, seked joy kait jo. <sup>34</sup> No bilang ey waray na-agang, mengan koma nin shi baley to asan makidikob, jet say metopog ga si Cristoy nemnemen jo. No sajay i pesing jon mesa-nop, enshiy jo ikaro son Apo Shiyos.

Sota ira eshom ma piyan kon ikowan, asan naka ikowan da son si-kayo, no onmotokak da.

## 12

*Ekalkalasyi in-akan ni Ispirito Santo so ni emati ja pesing shen ontolong shi kait shen emati*

<sup>1</sup> Niman, si-kayon akik shi pamati, piyan kon ewatan jo koma sota nan-i-inapil la daing ja kait-akan ni Ispirito Santo nen Apo Shiyos shi eshom ma too ja para pansigshan ni karakdan.

<sup>2</sup> Amtayo met sota itsora jo nonta eg kayo nin emati son Jesucristo. Nontan, inapaki shakejo nonta ira dimonyo say manshed-jaw kayo so nonta ira sinan

sheshidjos ja enshiy biyag sha, jet joka patpati-a sota kowan ni rilihiyon jo, angen eg jo ewatan. <sup>3</sup> Nem niman ma, piyan kon ewatan jo no ngantoy pesing jon mengilesin no sipay intorong ni Ispirito Santo nen Apo Shiyos. Sota intorong ni Ispirito Santo nen Apo Shiyos, enshiy shaka ikowan ja ngaaw maypangkep so nen Jesus. Jet angen sipa, enshiy mengewag son Jesus ey Apo no eg intorong ni Ispirito Santo nen Apo Shiyos.

<sup>4</sup> Eshakel iray kilasin kai-akan ni Ispirito Santo nen Apo Shiyos ja pansigshan ni emati, nem saksakey bengat sotan na Ispiriton emengi-kan niyay. <sup>5</sup> Eshakel i kilasin pesing nga mansilbi son Apo Jesus, nem saksakey bengat sotan na Apon pansilbi-an. <sup>6</sup> Eshakel la kilasin obda maypangkep son Apo Shiyos, nem si Apo Shiyos met laeng i emengibalnay so ira niyay ya emin. <sup>7</sup> Waray in-akan ni Ispirito Santo nen Apo Shiyos so ni sakey tan sakey son si-katejon emati, jet osalen tayo koma shi panmaptengan ni kait tayod pamati. Sajay ya in-akan to, si-katoy ka-asan ni panakabalin nen Apo Shiyos. <sup>8</sup> Jet iyay iray eshom nodta ekalkalasin kai-akan ni Ispirito Santo nen Apo Shiyos so ira ni emati: Sota eshom, in-aknan to ni daing ja mengipamta ni esel nen Apo Shiyos, jet sota ngo ira eshom, na-aknan ira ni daing ja mengi-odog nonta esel to. Nem sajay ira, sakey ya Ispirito i edapo-an ni daing sha. <sup>9</sup> Jet sotan met laeng nga Ispirito, toka i-akni ira sota eshom ni ebadeg ga pamati, jet sota ira eshom, toka i-akni ira ni panakabalin ja mebedin na pemapteng shay emansekit. <sup>10</sup> Sota ira eshom, toka i-akni ira ni baal shen mandeka ni milagro, jet sota ira eshom, toka itorong ja mengipa-amta nonta

inamta-an sha son Apo Shiyos. Sota ira eshom, toka i-akni ira ni panakabalin sha ja mengilesin nonta ira eman-a-sel shima esanop pa emati, no agpayson intorong ni Ispirito Santo sotan, ono enshi. Sota ira eshom, toka i-akni ira ni panakabalin shen manshedjaw son Apo Shiyos ni kalkalasin esel ja eg ma-ewatan, jet sota ira eshom, toka i-akni ira ni daing ja mengi-odog nontan na ekalkalasin esel. <sup>11</sup> Emin iyay ya pesing, sakey i edapo-an to: sota Ispirito Santo nen Apo Shiyos bengat. Jet toka i-akan iyay ja iwaris so ni sakey tan sakey ya piyan ton pengi-kanan.

<sup>12</sup> Sajay ya kai-akan ni Ispirito Santo nen Apo Shiyos so ni emati, arig toy bakdang ja eshakel i parti to. Jet sotan na parti, eshakel nem sakey bengat i bakdang ja naypeketan sha. Sajay i kayingesan ni emati son Cristo, ta eshakel kito, nem sakey i bakdang nen Cristo ja naymongsanan tayo. <sup>13</sup> Saksakey i Ispirito Santo nen Apo Shiyos ja inewat tayon emin, ta manshoki nonta nanpabonjag kito, si-kato may emengitoshong son si-katejo, jet nansaksakey kitejo ma ja singa sakey ya bakdang, angen ngantoy katoo tayo — Hodiyo ono aliwen Hodiyo, бага-en ono aliwen бага-en.

<sup>14</sup> Say kay-eshigan niyay, sota bakdang ni too, ja eshakel i parti to. Jet sotan iren eshakel la parti ni bakdang, aliwen nan-i-inges i obdara. <sup>15</sup> No kaspangarigan ey ikowan nonta sedi ey, “Enshi met i naka itolong shi bakdang. No takdayak koma, mebedin na ontolongak shi bakdang.” Eg to koma ikowan iyay, ja enshiy toka itolong, ta wara met. <sup>16</sup> Jet no say tangida ket, kowan to ey aliwen mata, isonga enshi konoy itolong to ni bakdang, aliwen sotan koma may to ikowan, ta waray tolong

to. <sup>17</sup> No kaspangarigan ey emin na parti ni bakdang ket mata, towa ngarod i para teneng? Jet no emin na parti ni bakdang ket tangida, towa ngarod i para agob? <sup>18</sup> Nem si Apo Shiyos, si-katoy emalsowa ni bakdang ni too et emin sota parti to, inpetek tod koston ka-osalan sha. <sup>19</sup> Mesepol la eshakel i parti ni bakdang, ta no sakey bengat i parti to, enshiy silbi to. <sup>20</sup> Eshakel i inemag ton parti, nem saksakey bengat i bakdang ja naypeketan sha. <sup>21</sup> Sota mata, eg mebedin na toy-an toy obda ni takday, ja kowan to, “Eg taka mesepol.” Kasta met i toktok, eg to ikowan ni sedi ey, “Eg taka mesepol.” <sup>22</sup> Waray parti ni bakdang ja singa aliwén epateg, nem sotan et ngo mowan i kasapolan ni bakdang say mebiyag. <sup>23</sup> Jet sotan i tayoka singpeta ja ajowan. Jet sota ira parti ja aliwén mapteng i boya to, tayoka ira singpeten pasiya, <sup>24</sup> nem sota ira parti ja mapteng i boya to, eg mesepol la mesingpetan. Si Apo Shiyos i mismon engi-mag ira niyay ya parti ni bakdang, jet sota ira parti ni bakdang ja singa enshiy shayaw to, si-karay mesingpetan na pasiya. <sup>25</sup> Sajay i itsora ni in-amag to so, say manseksekey ira ja enshiy mankokontra nodta parti ni bakdang, no diket mantitinolong ira. <sup>26</sup> No sota sakey ya parti ket mesekitan, emin ira, mesekitan, jet no sota sakey ya parti ket mesingpetan, mapteng ngo may dekna ira nonta eshom ma parti.

<sup>27</sup> Jet niman ma, si-kayo i kay-es-higan nonta bakdang nen Cristo, jet emin sota sakey tan sakey son si-kayo, parti nontan na bakdang nen Cristo, <sup>28</sup> jet na-na-jew i obdayo. Si Apo Shiyos, wára iray shinotokan to son si-katejon emati. Jet say mesepol la pasiya,

sota apostol; say maykadwa, sota mengitosho ni inpa-amta nen Apo Shiyos son si-kara; say maykatdo, sota eshom ma mengitosho; asan wára pay iray mandeka ni milagro, pemapteng so ni mansekit, ontolong, mengolnos ni kasapolan ni emati, asan sota man-a-sel ni ekalkalasin esel. <sup>29</sup> Eg mebedin na apostol iren emin, ono mengitosho. Eg mebedin na emin ket, mandeka ni milagro, <sup>30</sup> eg mebedin na pemapteng shen emin i sakit, ono man-a-sel ni ekalkalasin esel, ono mengi-odog. <sup>31</sup> Nem say kamkaman jo koma ja i-akan ni Ispirito Santo, ja dag-en jo ma, sota obden panmaptengan ni kait jo, tep si-katoy epateg.

Nem niman, ipalewag ko ma son si-kayo iya ogadin kamaptengan.

## 13

<sup>1</sup> Say kapatkan, saja semek. No si-kak, angken bilang ey amtak ka emin i kalkalasin esel ni kait kon too, ono angken sota esel ni anghil, no enshiy semek ko ni kait ko, singa naka mannoteng bengat ja inges to sota kalsa ja emankakkak. <sup>2</sup> Jet angken bilang ey edaingak ja mengitosho nonta inpa-amta nen Apo Shiyos tan amtak pay ya emin sota eg amta ni eshom maypangkep son Apo Shiyos, tan angken amtak pay ya emin sota ashal ni emin na too, tan ebadeg ga pasiya i pamatik, ja sotan i kabol la posi-an ko son pa-tan so ni shontog, no enshiy semek ko so ni kait ko, enshi met laeng i silbik ka too. <sup>3</sup> Angken i-akan kon emin i wára son si-kak so ni nankebiteg, tan angken pay i-onod kon mepoolan i bakdang ko, enshiy banag nontan na dingkak, no enshiy semek ko ni kait ko.

<sup>4</sup> Say toon waray semek to, amta ton man-enos, tan mengaasi; enshiy apal to, tan enshiy dastog to.



<sup>5</sup> Say toon wáray semek to, aliwén etangsit; eg onpa-so, aliwén to ipilit i kosto to, aliwén na namay ya onbonget, ono aliwén mapodit. <sup>6</sup> Sota toon wáray semek to, aliwén na en man-imdeng no ngaaw i dingka ni kait to, no diket say pan-imdengan to, sota mapteng nga dingka ni eshom. <sup>7</sup> Sota toon wáray semek to, nanos: wára ni olay i namnama ton mapteng, isonga ememiyal ni kait ton too. Jet amta ton mengitoded ni emin na digat.

<sup>8</sup> Say semek, wára ni olay ingkatod ingka. Nem sota pengitoshon ni esel nen Apo Shiyos, wára diy timpon salshengan to; angken sota panshedjaw son Apo Shiyos ni esel ja eg ma-ewátan, onsalsheng ngo di. Wára pay aliy timpon eg ma ma-osal sota inashal tayo, <sup>9</sup> ta sota inashal tayo, tan sota tayoka pengitoshon, wáray kolang to tep eg pay laeng inpa-amta nen Apo Shiyos sa emin. <sup>10</sup> Mesa-datan ma ira jay ni enshiy kolang to. <sup>11</sup> Say kay-eshigan niyay, singa sota itsora ni nganga. Si-kak, nonta kanga-ngak, tabtabal ni nga-ngay naka pekitbal, nemnem ni nga-ngay naka pannemnem, tan awat ni nga-ngay naka pengawat. Idi bima-degak ma, inbi-jag ko ma sota ogadi ni nga-ngen wára son si-kak. <sup>12</sup> Ta niman singa aliwén na edawag i emin na banag pangkep son Apo Shiyos, singa sota ispikon aliwén edawag i ka-esas ni dopa. Nem wáray onsabi alin timpo ja asen tayon mismo jet ewátan tayo ma. Niman na timpo, ootik i amtak, nem no onsabi sotan alin timpo, ewátan ko men emin; eg megshengan i naka pengewat ni emin na banag, ja inges toy kepengewat nen Apo Shiyos son si-kak.

<sup>13</sup> Jet wáray tedo ja mebay-an ni olay ingkatod ingka: sota pamati,

sota namnama son Apo Shiyos, tan sota semek. Nem say kapatkan so ni emin, sota semek.

## 14

<sup>1</sup> Say nemnemen jon mewesha son si-kayo ja kapatkan so ni emin, sota semek. Nem piyanen jo komen pasiya ja mewesha son si-kayo sota kai-akan ni Ispirito Santo nen Apo Shiyos, agdalo sota daing ni pengitoshon ni ipa-amta nen Apo Shiyos son si-kayo. <sup>2</sup> Sota panshedjaw son Apo Shiyos ni esel ja eg ma-ewátan, aliwén kasapolan na pasiya, ta enshiy to i-akan na pansigshan ni karakdan. No sotan, aliwén na kait ton too i toka pekitbali, no diket si Apo Shiyos, ta enshiy maka-awat son si-kato. Mebedin na say toka pan-ikowan, sota eg ma-ewátan pangkep son Apo Shiyos ja intorong ni Ispirito Santo. <sup>3</sup> Nem sota ira emengitoshon ni ipa-amta nen Apo Shiyos, say toka pekitbali, too, jet sotan i ontolong so ni pamati ni eshom ja onkedsang, tan mengi-kan ni pan-imdengan sha. <sup>4</sup> Sota manshedjaw son Apo Shiyos ni esel ja eg ma-ewátan i toka pan-ikowan, pansigshan to ni abos, nem sota mengitoshon ni ipa-amta nen Apo Shiyos, si-katoy mengi-kan ni kedsang ira nonta emati.

<sup>5</sup> No si-kak, piyan ko koma ja emin kayo ket, manshedjaw kayo son Apo Shiyos ni esel ja eg ma-ewátan, nem epatpateg ngo eshan sota pengitoshon ni inpa-amta nen Apo Shiyos. Nem no wáray mengi-odog nontan na panshedjaw son Apo Shiyos ja eg ma-ewátan, epateg met laeng, ta emengi-kan ngo ni kedsangan ni pamati ni eshom. <sup>6</sup> Si-kayon akik shi pamati, kaspangarigan ey ondawak da son si-kayo jet manshedjawak son Apo Shiyos ni esel la eg jo ewátan, singa enshiy

silbi to, ta enshiy nak inkowan ja panmaptengan jo. Mebedin na waray silbi to no waray ipa-amtak ja inpa-amta ngo nen Apo Shiyos son si-kak, ono itorok et ngo sota inashal ko. <sup>7</sup> Say kay-eshigan niyay, sota ira para mosiko ja kowan sha ey toladi, ono sota gitara. No eg ma-diw sota janget to, emannoteng bengat, enshiy olog to. <sup>8</sup> Kasta met sota kowan sha ey trompita ja ka-osala ni solsharo. No eg ma-diw i janget to, ja eg maydesin no ngarantoy piyan ton ipa-amta, eg sha tongolan i dag-en sha — no mansekana iren mekigobat ono enshi. <sup>9</sup> Inges to ngo son si-kayo, no say joka pan-a-sel ket, aliwen edawag, sipay mengewat ni olog to? Ayshi. Say singa joka pekit-bali, sama shagem. <sup>10</sup> Eshakel la kilasin esel shiya dobong, jet emin na esel, mebedin na ewatan ni eshom. <sup>11</sup> Nem no ekak ewatan sota esel nonta eman-a-sel, aliwen sankait kami, ta eg kami man-inawatan. <sup>12</sup> Jet no si-kayo ket eg kayo man-i-inawatan ni joka panshedjaw, aliwen mapteng. Say joka patkin pasiya, sota emedepod Ispirito Santo nen Apo Shiyos, isonga say nemnemen jo koma ni olay, sota pansigshan jon emin ja esa-nop pa emati.

<sup>13</sup> Isonga no sota manshedjaw son Apo Shiyos ket, eg ma-ewatan sota esel to ni toka panshedjaw, ishawat to koma son Apo Shiyos ey itorong ni Ispirito Santo say i-olog to met laeng sotan na esel to. <sup>14</sup> Ta no bilang ey manshewatak son Apo Shiyos jet say osalen kon esel ket, sota eg ma-ewatan, mebedin na sota Ispirito Santo i wara son si-kak, nem ekak met laeng ewatan. <sup>15</sup> Isonga say piyan ko, manshewatak ja itorong ni Ispirito Santo, nem piyan ko ngon ma-ewatan sota naka panshewat. Jet no mankansiyonak, piyan kon

itorong ni Ispirito Santo, nem piyan ko ngon ma-ewatan sotan na naka pan-ikansiyan. <sup>16</sup> Jet no kaspangarigan ey man-iyaman ka son Apo Shiyos, ja itorong ni Ispirito Santo nem say pan-a-sel mo ket, eg ma-ewatan, toway pesing ira nonta eshom ma mengitneng ja mengikowan ey, “Siya, mapteng ita inkowan mo?” <sup>17</sup> Mebedin na sota moka pan-iyaman son Apo Shiyos, mapteng nga pasiya, nem sota toon engitneng, enshiy to inewatan na panmaptengan to.

<sup>18</sup> Naka man-iyaman son Apo Shiyos ta ememinshakel ja naka manshedjaw son si-kato ni esel la eg ma-ewatan nem say si-kayo. <sup>19</sup> Nem no si-kak, no timpo ni kesanop ira nonta emati, mapmapteng ngo eshan ja angken dimen esel bengat i ikowan ko ja mengitoshon ni eshom nem say sota man-a-selak ni sampolon dibon esel ja eg ma-ewatan.

<sup>20</sup> A-akik shi pamati, ibi-jag jo sota itsora jon singa nga-nga. Osal joy koston nemnem jo. No sota maypangkep ni basol, mebedin na may-inges kayo komen nga-nga ja eg to amten mandeka ni basol. Nem no sota maypangkep ni pesing jo, aliwen singa nga-nga kayo koma. Say benolan jon ipateg, sota pengitoshon ni ipa-amta nen Apo Shiyos. <sup>21</sup> Sotan i kaytoshongan nonta esel nen Apo Shiyos ja inpaipadto to nonta bayag da, ja kowan to ey, “Waray ibetkag ko ja toon en mengikowan maypangkep son si-kak, jet ekalkalasin esel i pengikowan sha. Nem sotan iren toon mengitneng, endedam-sis sha-ak met laeng.” Kowan ni esel nen Apo Shiyos. <sup>22</sup> Isonga sota esel ja eg ma-ewatan, no itenengan ni toon eg emati, singa saja eg to inpangewat i kinon-od to ni eg to emati-an. Nem sota pengitoshon ni inpa-amta nen Apo Shiyos, si-

katoy kekon-ora ni toon emati ni inpamatira. <sup>23</sup> No bilang ey sota esel la eg ma-ewatan i pan-a-sel jon manshedjaw son Apo Shiyos no mesa-nop kayo, ey waray ondaw ali ja eg emati ono badbado ja mengitneng, baka ikowan sha ey kayoka man-engaw. <sup>24</sup> Nem no emin kayon esa-nop ket, ma-ewati sota joka pengitosho ni inpa-amta nen Apo Shiyos son si-kayo, itenengan nonta eg emati ono badbado ja onsekep nodtan et ewaten to ey eshakel gayam i nankolan-gan to. <sup>25</sup> Jet maynemneman pangkep ni itsora to shorog. Jet mantedimokod ma ja manshed-jaw son Apo Shiyos, jet ikowan to ma ey podno ja wara son si-kayo si Apo Shiyos.

<sup>26</sup> Iyay i mapteng nga pesing jo no mesa-nop kayo, si-kayon a-akik shi pamati. Wara komay esaganen mankansiyon, wara ngoy mengitosho, wara ngoy mengipa-amta nonta kowan nen Apo Shiyos son si-kato shorog, wara ngoy man-a-sel ni esel ja eg ma-ewatan (jet wara koma ngoy mengi-odog nonta esel ja eg ma-ewatan). Jet emin iyay ya pesing jo, daga jo say mengikan ni kedsangan jod pamati. <sup>27</sup> No bilang ey waray man-a-sel ni esel ja eg ma-ewatan, eg koma mesodok ni tedoy man-a-sel jet eg ira koma man-inshas, jet mesepol la waray mengi-odog nonta ikowan sha. <sup>28</sup> Nem no enshiy mengi-odog, eg ira et ngo on-es-esel nodta esa-nopan jo. No abos to, angken manshedjaw ngo shorog son Apo Shiyos ni esel la eg ma-ewatan. <sup>29</sup> Jet wara koma ngoy showa ono tedo ja mengitosho ni inpa-amta nen Apo Shiyos son si-kara jet mansisina-dat ira ja on-esel. Sota eshom, mantetneng ira no kosto ono ngaaw sota inkowan nonta nan-

esel. <sup>30</sup> No bilang ey sota eshom ma timongaw ket wara ngoy inpa-amta nen Apo Shiyos son si-kato ja ikowan to, sota maramen eman-a-sel, on-eket jet maysa-dat ngo sotan. <sup>31</sup> Ta mebedin na mengitosho kayon emin, say metod-an kayon emin, et say mansi-met kayon emin. <sup>32</sup> Sota emengikowan ni esel nen Apo Shiyos, wara met laeng son si-kato shorog i nemnem no onsalsheng ono mansesked nin. <sup>33</sup> Ta si Apo Shiyos, eg to kostoy ngalawngaw; say piyan to, olnos.

Shi emin na dogad, no mesa-nop i emati, <sup>34</sup> sota ira bibii, on-eket ira koma. Aliwen na palobos ja waray sha ikowan, aliwen ira onpa-so. Ta angken sota bilin nen Apo Shiyos nonta bayag da, si-katoy kowan to. <sup>35</sup> No bilang ey waray piyan shen amta-an, ibaga sha koma so nen asewara shima baley sha. Ta kabebaing no timpon inkasa-nop nonta ira emati i pan-a-sel sha.

<sup>36</sup> Nem si-kayon i-Korinto, singa eg jo nemnemen i kepesing ni emin na emati shi eshom ma dogad. Sigosho say kowan jo, si-kayon i-Korinto i inamta-an so ni eshom ma dogad ni esel nen Apo Shiyos? Ono kowan jo ey si-kayo bengat i shinanonan to? Tep joka ba-ba-ngatay dagdaga ni piyan jo!

<sup>37</sup> No sipa son si-kayo i kowan to ey wara son si-kato sota daing nga kai-akan ni Ispirito Santo ja pengitosho ni ipa-amta nen Apo Shiyos son si-kato, ono mandeka ni kompormi, ewaten to koma ey emin iyay ya insolat ko ket bilin nen Apo Jesus jet mesepol la eg to ipilit i kosto ton dag-en. <sup>38</sup> Nem no eg to pati-en iyay ya kowan ko, karejo ngo patpati-en sotan na too.

<sup>39</sup> A-akik shi pamati, say kapatkan ja dag-en jo, sota pengitosho ni ipa-amta nen Apo Shiyos,

nem karejo iparit i panshedjaw son Apo Shiyos ni esel ja eg maewatan. <sup>40</sup> Nem emin na dag-en jo ni joka kesa-nop, mesepol i olnos say enshiy jo kebedawan.

## 15

*Sigoradon manbiyag kiton emati shi patey jet mesa-datan i bakdang tayo ja ingesen toy bakdang nen Cristo*

<sup>1</sup> Niman, si-kayon a-akik shi pamati, karejo dibdibkan sota intorok son si-kayo ja mapteng nga shamag maypangkep son Jesucristo ja inewat jo. Sotan i naynadnaran ni pamatiyo, <sup>2</sup> jet sotan i kaysedakan jo, no eg jo ibi-jag. Nem amtak ey eg jo ibi-jag no agpayson pinatiyo.

<sup>3</sup> Sota kapatkan ja intorok son si-kayo, si-kato ngo sota inewat ko ja kowan to ey si Cristo, etey ja engikesho ni basol tayo, jet sajay ya edaga, nay-agpayso sota esel nen Apo Shiyos ja naysolat nonta bayag da. <sup>4</sup> Intorok pay ey naybeka shi diyang, jet nonta maykatdon akew, nanbiyag met laeng. Sajay, naytotop met laeng nodta esel nen Apo Shiyos nonta bayag da. <sup>5</sup> Jet inkowan ko pay son si-kayo ey nanpa-sas si Cristo so nen Pedro asan ma manpa-sas so nonta ira emin na apostol to. <sup>6</sup> Jet nanpa-sas ni pinsak so nonta ira dimen dasos ja kait tayod pamati. Jet karakdan so ira niyay ja engasas ket, wara pay laeng ired biyag niman. <sup>7</sup> Nanpa-sas pay so nen Santiago, asan mowan manpa-sas so ni emin na apostol.

<sup>8</sup> Shi ka-onoran, nanpa-sas ngo son si-kak. Si-kak, singa nayanakak shi aliwen timpo to, ta nanbalinak ni apostol nen Jesus jey ekak nin nay-olo-olop son si-kato. <sup>9</sup> Si-kak i singa kabababan so nonta ira emin na apostol. Ekak koma maykeshin apostol to,

ta nontan da, pinedigat ko sota ira emati son Jesus, ja too ma nen Apo Shiyos. <sup>10</sup> Nem ebadeq i kaasi nen Apo Shiyos son si-kak, isonga sajay i nanbalinan ko, jet sotan na kaasi to son si-kak, waray nanbanagan to. No i-inges koy obdak so ira ni kait kon apostol, asdeg to met i dingkak. Nem aliwen si-kak ka mismo i maka-obda nontan, no diket si Apo Shiyos ja engaasi son si-kak ni olay. <sup>11</sup> Si-kak, ono sota eshom ma kait kon apostol, nani-inges i toro mi maypangkep ni pamati, jet si-katoy emati-an jo. Angken sipa son si-kamin apostol i mengitoshho, saksakey met laeng i torong ni mika ikowan.

<sup>12</sup> Apay nga kowan ni eshom son si-kayo ey sota nanketey ket, eg ma manbiyag mowan? Say kowan met ni mapteng nga shamag maypangkep son Cristo, inpanbiyag nen Apo Shiyos shi patey. <sup>13</sup> Jet no agpayso sota kowan ni eshom son si-kayo, ja enshiy etey ja manbiyag, wara met. Si Cristo, nanbiyag shi patey. <sup>14</sup> Agpayso sota mika pan-itoro pangkep son si-kato. Nem no bilang ey eg nanongal ket istay enshiy silbi ni inpamatiyo son si-kato. <sup>15</sup> Jet mebedin na ikowan jo ey ma-owap kami ja engikokowan maypangkep son Apo Shiyos, ta inba-ngat miy kowan ey si Apo Shiyos, inpanongal to Jesus. No agpayso sota kowan jo ey eg manbiyag mowan i nanketey, angken si Apo Shiyos, eg to koma inpanbiyag si Cristo shi patey. <sup>16</sup> Ta no say nanketey ket eg manbiyag mowan, angken si Cristo, eg nanbiyag shi patey. <sup>17</sup> Jet no kasta, sota pamatiyo son si-kato, enshi ngoy silbi to jet shosa-en shakejo met laeng nen Apo Shiyos maypangkep ni basol jo. <sup>18</sup> Angken pay sota ira emati ja nanketey da, may-inges met laeng ira so nonta eshom ja shosa-

en nen Apo Shiyos. <sup>19</sup> No si Cristo ket eg nan-ongal nontan, saja namnama tayan dag-en to di son si-katejo, enshiy to panbenagan. No eg nan-ongal, para niman bengat gayam ja wára kitod biyag i kawasha tayo son si-kato. Jet si-katejoy ka-kaasi so ni emin na too shiya dobong.

<sup>20</sup> Nem say agpayso, si Cristo, nan-ongal. Jet sotan i kesigoradonan to ey manbiyag ira di ngo sota nanketey. <sup>21</sup> Say kabol la ewara-an ni patey, ja keteyi ni emin na too, edapo so nonta sakey ya too, ja si Adan, jet say kaydakaman ngo ni too ja manbiyag shi patey, sota sakey ya too, ja si Cristo. <sup>22</sup> Say nanshogi-an ni ketey ni too, si Adan jet si-katoy singa tinewid ni emin na too son si-kato. Nem say nanshogi-an ngo ni panbiyag mowan shi patey, si Cristo jet emin na toon wára son si-kato, nayda-kam ngo ira son si-kato. <sup>23</sup> Nem si Cristo i epangdon nanbiyag shi patey. Sota ira emati son si-kato, si-karay man-onod ja manbiyag ngo di nem on-oli si Cristo ali.

<sup>24</sup> Jet shi ka-onoran, sheshalen nen Cristo sota ira waray toray to, ono saad to, tan sota ira waray panakabalin to ja makakontra son si-kato. Jet no si Cristo may mengitoshay ni emin, pa-elbat to so nen Apo Shiyos ja Ameto. <sup>25</sup> Ta si Cristo, mesepol la si-katoy mantoshay nin ingkatod emin na makakontra son si-kato ket, ma-ebak. No ma-ebak ma ira panpetokan ma ni sedi to ira. <sup>26</sup> Say ka-onoran ja ma-ebak, sota patey, tep enshi may metey, jet sota ira nanketey, manbiyag ngo ira. <sup>27</sup> Amta tayo ey itorayan nen Criston emin, pati sota patey, ta say kowan nonta padton naysolat nonta bayag da, "Si Apo Shiyos i enggsheng ey sotan aliy mengitoshay ni emin." Jet sajay ya

kowan to, edawag ey aliwen pati si Apo Shiyos ket, itorayan nen Cristo. <sup>28</sup> No meksheng ma ja pansaad nen Apo Shiyos si Cristo ja mengitoshay ni emin, pa-elbat nen Cristo ja si Apo Shiyos i mengitoshay ni emin, pati si-kato shorog, say si Apo Shiyos i mayshedjaw so ni emin, enshiy eshom.

<sup>29</sup> No aliwen agpayso sota inkowan ko la, jey manbiyag i nanketey, ngaranto ngarod i panbonjagan ni eshom maypangkep so ira nonta etey? Ngaranto ngarod i silbi to? <sup>30-31</sup> Jet sikak ngay? Dilikaroy biyag ko ni inakew tan angken inoshas. Jet no say etey ket, eg manbiyag mowan, ngantoy en-enosan ko so pay laeng ni digat? A-akik shi pamati, amta nen Apo Shiyos ey say biyag ko, dilikaro, jet amta to pay sota naka pengiredjaw son si-kayon nanbanagan ni obdak pangkep son Cristo Jesus ja Apo tayo. <sup>32</sup> Ngarantoy kon-oren ko no sajay ya biyag ko niman bengat i pengintegan to, ja ekak mowan manbiyag shi patey? No sotan, singa inges ko sota nemnem ni karakdan! Shiya Ipiiso, makedsel iray toon makakontra son sikak; mabonget iren singa atap pa animal. Jet no bilang ey sota etey ket, eg manbiyag mowan, agpos ey i-onod koy kowan sha. Say pesing et ma, mandaladsak kito et, ta no ekay, metey kito met laeng jet sotan may pengintegan to!

<sup>33-34</sup> Nem ayshi! Kay-oli kayo mowan na mannemnem ni siked, karekayo pai-owap nonta kowan sha ey eg manbiyag mowan sota nanketey. Karejo ma pati-en sotan na toro ta basol i panpa-no-an to. Sajay iren too, eg sha bigbigen si Apo Shiyos, nem joka ira sintila! Sajay i inkowan ko say amta-an jo ey kabebaing iyay ya inpasing jo. Ibiyang jo ira jay ya o-owap

i toro sha, ta sota ira toon ngaaw i ogadiren pekikadwá-an, edinan sha sota mapteng i ogadira, jet manbedin ngo iren ngaaw.

<sup>35</sup> Nem baka kowan ni eshom son si-kayo ni salodsod sha ey, “Toway pesing ni nanketey ja manbiyag mowan? Ngaran-toy itsora ali ni bakdang sha?”

<sup>36</sup> Kolang i nemnem nonta toon nansalodsod niyay! Ta no manbiyag mowan i toon etey, aliwén sota sigod ja itsora ni bakdang toy onbo-day mowan ali, no diket mebediwan. Arig to sota botil. No i-esek moy botil, aliwén sota botil mowan aliy onbo-day, no diket mola ma. <sup>37</sup> Jet no bilang ey manmoda kayo ni trigo ono kompormin mola, say imola jo, sota botil bengat, aliwén sota bakdang ni mola. <sup>38</sup> Nem si Apo Shiyos i mengi-kan ni mapteng nga bakdang nonta botil ja maymoda tep emin na kalasin botil, nan-i-inapil i itsora ni bakdang shen onba-deg ali. <sup>39</sup> Sajay i kayeshigan ni bakdang, nem emin na bakdang, aliwén na nan-inges: waray bakdang ni too, waray bakdang ni animal, waray bakdang ni titit, waray bakdang ni paideng. <sup>40</sup> Jet sota bakdang ira nonta wáred naykayang, apil ngo: aliwén inges toy bakdang tayo. Say itsora ni kamapteng ni bakdang sha, aliwén inges toy itsora ni bakdang tayo. <sup>41</sup> Say kayeshigan to pay, sajay: Sota sekit, apil ngoy boya to, jet sota bolan, apil ngoy boya to. Jet angken sota ira talaw, aliwén na nan-inges i boya sha.

<sup>42</sup> Sajay ira den inkowan ko, si-katoy kay-eshigan nonta nanketey ja manbiyag mowan, ja apil i itsora ni bakdang sha di. Say bakdang nga maybebka, mebojok, nem no manbiyag shi patey, eg ma metey. <sup>43</sup> Saja bak-

dang tayon too, no metey, ngaaw wa mayshedmang, enshiy silbi to; nem no manbiyag ali shi patey, mesa-datan ni mapteng tan makedsang. <sup>44</sup> Saja bakdang tayo niman, anam to ngon man-iyen shi dobong, nem sota maysadat alin bakdang tayo, anam to ngon man-iyen shi dangit. Waray bakdang tayod ja dobong, wara met laeng i bakdang tayod dangit. <sup>45</sup> Naytotop shiyay met laeng sota naysolat nonta bayag da ja kowan to ey, “Si Adan ja pilmiron too, nay-aknan ni biyag.” Si Cristo, singa paris nen Adan, jet si-kato ngoy emengi-kan ni biyag, nem sajay ya biyag, anam ton man-iyen shi dangit. <sup>46</sup> Nem say epangdon in-akan nen Apo Shiyos son si-katejo, saja bakdang tayo niman, asan maysadat sota anam ton manbiyag shi dangit. <sup>47</sup> Sota pilmiron tood ja dobong ja si Adan, depok i edapo-an to. Nem sota paris nen Adan ja si Cristo, edapod dangit. <sup>48</sup> Jet emin na too shiya dobong, sota bakdang sha, singa sota bakdang met laeng nen Adan ja edapod depok nem si-katejon too nen Cristo, ingesen tayo aliy bakdang nen Cristo shi dangit. <sup>49</sup> Si-katejo, inges tayo sota toon edapod ja depok, nem mebediwan ali iya bakdang tayo ja ingesen to si Cristo ja edapod dangit.

<sup>50</sup> Iyay i piyan kon ewatan jo koma, si-kayon a-akik shi pamati. Saja bakdang tayo niman, mese-pol la mesa-datan, ta eg mebedin na ondaw sotan na bakdang shi pantoshayan nen Apo Shiyos. Saja emetey ya bakdang tayo niman, aliwén si-katoy man-iyen shiman, ta say itsora ni bakdang tayod man, eg metmetey ingkatod ingka.

<sup>51-52</sup> Jet niman ipa-amtak iya plano nen Apo Shiyos ja medeka ali son si-katejo. Eg kitejo

metey ya emin, nem emin kito, mesa-datan iya bakdang tayo ni sankakimshatan. Magenon pasiya ja singa kimkim ni mata. Onjanget nin sota trompita ja amtan so ey tapos ma ni dobong. No onjanget sotan na trompita, sota ira nanketey, manbiyag ira jet eg ira ma metmetey. Jet angken si-katejon wared biyag, mesa-datan ngoy bakdang tayo ja eg ma metmetey. <sup>53</sup> Ta mesepol la saja bakdang nga emetey, ja emebojok, mesa-datan ni eg metey. <sup>54</sup> No meksheng ma iyay, sajay may itongpal son Apo Shiyos nonta inkowan to met laeng nonta bayag da, ja kowan to ey, "Jet sota patey, na-abak mala!" <sup>55</sup> Isonga say kowan ko, inges to sota kowan ni para padto ey eg mengebak malay patey, enshi malay panakabalin ton mengipked ni toon manongal. Isonga enshi malay sha tekotan! <sup>56</sup> Tep say ketekoti so ni too ni patey, si-kato may keshosa ni nanbasol, jet say singa emengi-kan ni kedsang ni basol, sota bilin nonta bayag tep eg baalan ni toon onoren ja emin. <sup>57</sup> Isonga naka man-iyaman son Apo Shiyos, ta tokitoka pengebak ni olay, pangkep ni kaasi nen Jesucristo ja Apo tayo!

<sup>58</sup> Isonga niman ma, si-kayon a-akik shi pamati ja ensemek ko, iki-det joy pamatiyo, say enshiy jo ka-ewisan na korpormin adilaw. Pan-alisto kayo et ja man-obda para son Apo Jesus, ta amtayo met ey asdeg toy kon-oren jo din sobadit ni obdayo maypangkep son si-kato.

## 16

*Sota pesing jon mengi-kan ni tolong jo so nonta kait jon emati ja ebiteg*

<sup>1</sup> Niman, iyay i pesing jo nonta alos ja itolong jo so nonta ira kait

tayon emati shi Jodia. Onoshiyo sota inkowan ko so nonta ira emati shi Galasia ja pesing sha. <sup>2</sup> Domingko komay ka-eda ni alos ni sanseskey son si-kayo, jet akew ni Domingko ngoy pengi-kan jo nontan na alos. Eg nagshengan i i-akan jo; sota wara, si-kato. Sajay i pesing jo say angken eg kayo mangedos no onmotokak da. <sup>3</sup> Jet no onmotokak da, sota toon joka piyala, si-karay pengi-idaw jo niyay ya alos jo shi Jerusalem, jet taksholan ko ni solat. <sup>4</sup> Nem no ngantoy pannemnem ko, baka ondawak met laeng shi Jerusalem, jet meki-odop ira son si-kak.

<sup>5</sup> Ninemnem ko ey nak manbisita son si-kayo, nem onshalanak nin shi Masidonia. Jet no meksheng, mandiritso-ak da shita kad-an jo. <sup>6</sup> Piyan ko ja meki-yan son si-kayo, sigosho ingkatod bekas ni oran, say asen joy ida-jat ko ja ondaw shi eshom ma dogad. <sup>7</sup> Sajay i pesing ko, ta ekak koston ondabas shita kad-an jo ja asen takejo bengat ni sankatikan. Say piyan ko, meki-yanak son si-kayo ni mebedjag koma, no ipalobos nen Apo Jesus ja metongpalak da. <sup>8</sup> Nem man-iyanak shiya Ipiiso nin ingkatod onsabi sota piyasta ni Pintikostis. <sup>9</sup> Say kabol la pan-iyanan ko nin shiyay, asdeg toy mapiyan ja mengitneng niya naka pan-itoro, jet mesepol la ishingan ko, ta eshakil ngoy makapiyan na meneshal niya obdak.

<sup>10</sup> No onmotok da si Timoteo shita kad-an jo, singpet jon sintilen, ta say obda to, inges to met laeng iya obdak ja emansilbi so nen Apo Jesus. <sup>11</sup> Aliwen jo koma damsisen, no diket tolongiyo et ja ondaw shi dawán to, say mariwes. Ta piyan kon on-olin shagos ali son si-kak, jet waray kait kon emansessedked son si-kato shiyay.

<sup>12</sup> No si Apolos ja agi tayod pamati, inkowan kon pasiya son si-kato ey may-odop so nonta mengidaw niyay ya solat ko son si-kayo. Nem say kowan to, kenshat ta aliwén niman i timpon idaw tod tan. Asan nem waray waya to kono.

<sup>13</sup> Say kowan ko son si-kayo shiya ma-onod ja parti niya solat ko, pantanshaan kayo: baka adilawen shakejo nonta eg emati son Cristo; nemnem joy pamatiyo; karekayo ontakot; pakedsang joy nemnem jo. <sup>14</sup> Emin komen dagen jo koma, metaksholan ni semek.

<sup>15</sup> Amtayo met ey si Istipanas ja sanpamilja, si-karay pilmiron emati shita Akaya. Jet niman ireka mansilbi ja ontolong so nonta ira too nen Apo Jesus. Jet kekshawen ko son si-kayon akik shi pamati, <sup>16</sup> ey si-kara et ngo i songoren jon pati-en, tan angken pay sota inges nen Ispipanas ja matodong tan masdo. <sup>17-18</sup> Naka man-imdeng ni indaw ali nen Istipanas, si Fortunato, tan si Akaikos, ja kaidiyan jo. Simpin takejon emin, nem na-o-onito may naka pannemnemnem son si-kayo, ni kawashara. Wara komay joka pengipateg so ira niyay ja timolong son si-kak, tan sota eshom ma inges sha ja kait jo.

<sup>19</sup> Sota ira ematid ka-ili-ili shi Asiya, piyan shen pekikowan ko shiya solat ko sota semek sha son si-kayo. Jet angken si Akila nen Prisilla, tan sota ira eshom ma emati ja emesa-nop shi baley sha, kowan sha ngo ey ebadeg i semek sha son si-kayon akira shi pamati son Apo Jesus. <sup>20</sup> Jet angken sota ira emin na ematid jay, inkowan sha ngo ey pekikowan kod ja solat koy semek sha son si-kayo.

Jet say kowan ko, ipa-sas joy semek jo ni sakey tan sakey son

si-kayo met laeng.

<sup>21</sup> Si-kak si Pablo ja mismon makatakday ni engisodat niyay ya ka-onoran niyay ya solat. <sup>22</sup> No sipa iray toon enshiy semek sha so nen Apo Jesus, si Apo Shiyos komay onshosa son si-kara.

Apo Jesus, angka et nem magenon ondaw ka di!

<sup>23</sup> Jet say shawat ko son Apo Shiyos, sota kaasi nen Apo Jesus, ja wara son si-kayo, sapay koma ta si-katoy ma-shoman.

<sup>24</sup> Jet angken sota semek ko, si-katoy mewesha son si-kayon emin na emati son Cristo Jesus. Siya, satan da.



## SOTA MAYKADWEN SOLAT NEN SAN PABLO PARA SO NONTA IRA I-KORINTO

<sup>1</sup> Si-kak si Pablo ja makasolat niyay et si Timoteo ja agi tayod pamati, si-katoy kadwák. Jet sajay ya solat, para son si-kayon kait ko ja toon Apo Shiyos ja wáred ta siyodad ni Korinto, tan shita intiron probinsiya ni Akaya. Itneng jo iya ikowan ko tep si-kak i sakey ya apostol nen Cristo Jesus, jet si Apo Shiyos i mismon enotok son si-kak.

<sup>2</sup> Say shawat ko, sapay koma ta kaasi-an shakejo nen Apo Shiyos, tan a-shoman to koma sota talna ja wára son si-kayo ja edapo met laeng son Apo Shiyos ja Ametayo, tan si Apo Jesucristo.

<sup>3</sup> Man-iyaman kito ni olay so nen Apo Shiyos ja Ama nen Jesucristo ja Apo tayo. Si-katoy Ama ja manangaasi, tan si-katoy kedepo-i ni emin na tolong say eg kito medismaya. <sup>4</sup> Si-katoy kaontolong son si-katejo ni emin na digat tayo, say wára ngoy kedsang tayon ontolong so nonta ira kait tayon waray digat to. Jet say osalen tayon ontolong son si-kara, sota tolong met laeng ja edapo son Apo Shiyos ja wára son si-katejo. <sup>5</sup> No ebadeg i digat ja da-kaman tayo ja singa kitoka mekila-kam ni digat nen Cristo, ebadeg ngoy tolong to ja ipaay to son si-katejo. <sup>6</sup> Nem sota mika panda-kam ni digat, pansigshan jo, ta angken si-kayo, manda-kam kayo ngo ni digat, jet no enosan jo, ja eg kayo medismaya, si-kayoy onda-kam met laeng nonta tolong to. Jet no anongosto ma, si-kayo met laeng i maysedakan. Sota intolong nen Apo Shiyos son si-

kami ni inpandigat mi, singa si-katoy mengi-kan ni kedsangan ni pamatiyo. <sup>7</sup> Ebadeg i namnama mi ey idasat jon emin sota digat ja da-kaman jo, ta inon-an mi ey sota digat ja dina-kaman jo la, inges to ngoy digat mi; isonga amta mi ey si Apo Shiyos, ipaay to ngo ni olay i tolong to son si-kayo.

<sup>8</sup> Si-kayon a-akik shi pamati, piyan min ipa-amta son si-kayo sota dina-kaman min digat shi probinsiya ni Asiya. Sotan na digat, embel-at ta pasiya ja singa eg mi itoled, jet angken biyag mi, dinamsis mi ma ja singa enshiy namnama min mebiyag pay laeng. <sup>9</sup> Mika dekna-a ey patey ma i panpa-no-an mi. Nem sajay i epasemak say eg kami manshinel shorog shi bakdang mi, no diket si Apo Shiyos bengat i panshingan mi. Ninemnem mi ey si-kato met ngoy onbiyag so ni nanketey, jet amta mi ey kabedinan ton memiyag son si-kami. <sup>10</sup> Jet siya, sotan na digat ja istay patey i toshongen mi, si Apo Shiyos i engisedakan son si-kami. Jet aliwén nontan bengat, no diket si-kato i kawad-an ni namnama mi ni olay jen si-katoy mengisedakan son si-kami. <sup>11</sup> Nem mesepol la manshewat kayo son Apo Shiyos say ajowanan tokami. Jet no sotan i dag-en jo, ey eshakil kayon manshewat son Apo Shiyos ni pansigshan mi, eshakil ngoy maniyaman son Apo Shiyos, ta sintilen to sotan na eshakil la shawat jo.

<sup>12</sup> Marinel kami ey sotan i dag-en jo tep mapteng ni olay i inpasing mi son si-kayo. Saja nemnem mi, mika sigorado-a ey say mika pekikadwa shi emin na totoo, agdalo son si-kayo, si Apo Shiyos i engitoshong son si-kami. Isonga podno ni olay i pangkep mi. Jet sajay, aliwén na nemnem min dag-en, no diket kaasi nen Apo Shiyos. Jet sajay i mika pan-

imdengi. <sup>13-14</sup> Saja insolat mi son si-kayo, enshiy polibas to: sota basa-en jon olog to, si-kato; enshiy eshom. Amtak ey waray eshom son si-kayo ja emansi-met tep sikak ka mismo i engiranon son si-kayo ni esel nen Cristo, nem naka namnama-a ey no onsabi sota timpon idaw ali mowan nen Apo Jesus, pansi-metan jowak ka emin. Jet angken si-kami ngo, pansi-metan mikejo.

<sup>15</sup> Ebadeg i namnamak ey sikamiy joka pan-imdengi; isonga ninemnem kon si-kayo i pilmiron nak da bisita-en, say singa meminshowa ja mebindisiyonan kayo. <sup>16</sup> Ta ninemnem kon manshedan da son si-kayo ni idaw ko did ja Masidonia, jet kasta met no on-oli-ak den medepod jay, istay kowan ko ey manshedanak mowan son si-kayo, say asen joy ida-jat ko ja ondaw shi Jodia. <sup>17</sup> Amangan no kowan jo et ey emanbinaliw i nemnem ko, ja ekak nin ninemnem i pesing ko, tep ekak da etoloy. Enshi, aliwen inges ko sota eshom ma too ja kowan to ey owen, nem enshi gayam. <sup>18</sup> Si Apo Shiyos i emepiyal, ja maka-amta ni mika ikowan son si-kayo, jet saja mika ikowan, aliwen emanbinaliw. <sup>19</sup> Si Jesucristo ja Anak nen Apo Shiyos, aliwen emanbinaliw i toro to, no diket sota kowan to, si-kato. Isonga sota naka pan-itoro, tan sota pan-itoro nen Silas nen Timoteo, ja maypangkep son Cristo, inges to ngon aliwen emanbinaliw. <sup>20</sup> Ta emin sota kari nen Apo Shiyos nonta bayag da, si Cristo i timongpal so nontan na emin, ja si-katoy engowen so. Jet sotan i kabol la tayoka ikowani so ey "Siya Apo Jesus" no meksheng nga manshedjaw kito son Apo Shiyos. <sup>21</sup> Jet mesepol la nemnemen tayo ey si Apo Shiyos sa mismo i emengi-kan ni kedsang

ni pamati tayo son Cristo jet si-kato met laeng i shimotok son si-katejo. <sup>22</sup> Jet inpan-iyen to sota Ispirito Santo to son si-katejo say sotan i amta-an tayo so ey sigoradon kokowa shakito ma nen Apo Shiyos, tep singa sota Ispirito Santo to i inmalka to son si-katejo.

<sup>23</sup> Saja naka pan-ikowan pay laeng, sota maypangkep ni ekak da nin dinawan son si-kayo. Si Apo Shiyos, amta to i wared nemnem ko, ja ekak man-o-owap. Say kabol la ekak da dinawan na shagos son si-kayo, ekak koston bigla-an takejon sekitan ni pemidin ko son si-kayo. <sup>24</sup> Eg jo koma nemnemen ey nayda-kad i nak pemidin son si-kayo. Enshi, no diket mikejoka pantodongi say man-imdeng kayo. Eg mesepol la itorayan takejon pasiya ta kosto met i pamatiyo.

## 2

<sup>1</sup> Nonta indaw ko la son si-kayo ni pinsak, sinekitan koy nemnem jo jet angken si-kak ngo, nandaringitak. Isonga ekak da etoloy, ta ekak koston mesekitan mowan i nemnem jo. <sup>2</sup> Ekak koston pandeshingit takejo mowan, ta enshi met i eshom ma mengikan ni pan-imdengan ko nem eg si-kayo bengat. <sup>3</sup> Nansolatak et ngo mowan son si-kayo tep piyan kon mesenok ka mebidin sota kait jon nanbasol, say no bilang ey metodoyak da, eg mesekitan i nemnem ko kabol son si-kayon istay mengi-kan koma ni pan-imdengan ko. Naka namnama-a ey sota pan-imdengan ko, pan-imdengan jo ngo. <sup>4</sup> Nansolatak da nontan tep piyan kon amta-en jo koma ey ebadeg i semek ko son si-kayo; aliwen kowan ko ey say mandeshingit kayo. Agpayso, nonta insolat ko sota pemidin jo ni nanbasol la kait

jo, ekak maynemneman, naka emankaisaysay-i pay.

<sup>5</sup> Agpayso, aliwén si-kak i engikan ni daringit jo, nem eg sota kait jon nanbasol met laeng, si-katoy engi-kan ni nandaringitan ni eshom son si-kayo. Aliwén si-kak i nanbasolan to, no diket singa si-kayo met laeng. Nem say wared nemnem ko, ekak koston ida-karan sotan; <sup>6</sup> isonga onanay sota inpasing jon emilin so nonta nanbasol la too. Kosto sota inpasing jon engibiyang nin son si-kato, <sup>7</sup> nem niman mesepol la pakawaniyo et, jet atngiyo ma ni pansigshan to, say eg medismaya; nakol ni ebaken ni ebadeg ga daringit to et ngo mowan. <sup>8</sup> Jet kekshawen ko son si-kayo, ey ipasas joy semek jo pay laeng son si-kato. <sup>9</sup> Sajay i kabol la insolatan ko so nontan na solat, ta piyan kon peshasen takejo, no pati-en jo met laeng i ikowan ko son si-kayo. <sup>10</sup> Siya, no pekawanan jo sotan na too — ono sota eshom ma toon nanbasol — pekawanan ko ngo ira. Nem no bilang ey waray pinekawanan ko shita kad-an jo, dingkak sotan tep pansigshan jo met laeng, jet sotan i ka-aporbalin Cristo. <sup>11</sup> Sajay i inpasing ko ja emakawan say eg ewisen nen Satanas sota kait tayo, ta amta tayo met i pangkep nen Satanas ja meneshal ni too.

*Embel-at iya epateg ga obda mi, nem kabaalan mi*

<sup>12</sup> Nonta indaw ko shi siyodad ni Troas kabol ni nak pengitosho nonta mapteng nga shamag pangkep son Cristo, eshakil i masi-met ja mengitneng nonta naka pan-itoro maypangkep so nen Apo Jesus. <sup>13</sup> Nem ekak maynemneman nontan, ta si Tito, ja agik shi pamati, eg nay-aspol shiman ni inkalapo to did ta kadan jo. Isonga indekjas ko sotan na dogad jet dimawak shi Masidonia

say nak sebi-en shiman tep piyan kon pasiya ja amta-en son si-kato i kasesaad jo.

<sup>14</sup> Nem naka man-iyaman son Apo Shiyos ta si-katoy emengitoshong son si-katejo angken toway dawán tayo, ni tayoka pansilbi son Cristo. Isonga eg kito ma-ebak. Jet si-kato met laeng i emengitoshong son si-katejo ja mengikowan so ni eshom shi emin na dogad nonta mapteng nga shamag maypangkep so nen Cristo. Singa may-eshig ey emanseng-ew sota maypangkep son Cristo, jet emansengaw shi intiron dobong. <sup>15-16</sup> Si-katejon emengikowan ni maypangkep son Cristo, may-eshig ey kitoka mengiweshis nontan na emanseng-ew so nonta ira angken sipen too. Sota ira emantoshong shi kaysedakan, shaka ekoba et piyan sha tep mengi-kan ni biyag son si-kara. Nem sota ira emantoshong shi keshosa-an sha, shaka ngo ekoba nem ngaaw sha et metodoy iren manda-kam ni shosa. Sajay ya obda tayon mengikowan ni maypangkep son Cristo, ebadeg ga pasiya, singa eg mayposi, jet manmanoy kaonbaal so. <sup>17</sup> Nem si-kami, mebedin mi, ta aliwén inges mi ira sota eshom ma shaka panpidaki sota esel nen Apo Shiyos. No ikowan mi sota esel nen Apo Shiyos, eg kami man-olbod tep mika nemnemnema ey si Apo Shiyos i emili son si-kami ja mengikowan maypangkep so nen Cristo, jet tokamika os-osshongi.

### 3

<sup>1</sup> Istay kowan jo emo ey mika pan-isagot shorog i bakdang mi son si-kayo. Nem enshi! Apay mesepol la isolat mi aya i maypangkep son si-kami shorog? Ono mesepol aya i solat ni eshom ja mengisekot son si-kami asan jokami awata? Sotan i kepesing

ni eshom asan shakejoka awisa shi piyan sha. Nem si-kami, amamtayon sigod. <sup>2</sup> Si-kayo shorog i may-eshig ey solat ja mengisekot son si-kami, jet mebedin na basanen ni emin na totoo i semek mi son si-kayo tan semek jo ngo son si-kami. <sup>3</sup> Edawag ey si-kayoy may-eshig ey solat ja edapo son Cristo ja basa-en ni totoo, jet si-kamiy singa mismon engisodat. Nem sajay ya solat, aliwén inges to sota naysolat ni tinta, no diket singa say inpangisolat mi, sota Ispirito Santo nen Apo Shiyos ja sibibiyag ja wáred poso jo; isonga aliwén inges to sota solat ja nayko-nit shi bato. <sup>4</sup> Kamika menigorado niyay, ta say mika panshindi, si Apo Shiyos pangkep so nen Cristo. <sup>5</sup> Angken nganto, enshiy mi ikowan ey kabaalan mi no enshis Apo Shiyos son si-kami. Ta si-katoy emengi-kan ni emin na kedsang mi ja ondaga so niyay ya obda. <sup>6</sup> Jet si-kato met laeng i engikowan ey si-kami i mengitoshon nonta badon bilin to so ni totoo. Aliwén inges to sota sigod ja bilin ton naysolat nonta bayag da, no diket sota Ispirito Santo to i mismon inpan-iyen to so ni totoo. Jet sota Ispirito Santo, si-katoy emengi-kan ni biyag ingkatod ingka. Nem sota bilin ja naysolat nonta bayag, apil ngo, ta singa ememona ingkatod ingka.

<sup>7</sup> Sota bilin nen Apo Shiyos ja naysolat nonta bayag da shi bato, nonta in-awat nen Moises so nonta ira totoo, inpa-sas nen Apo Shiyos i panakabalin to. Nontan, kaskasshaaw i inpasing to, ta emenenilin pasiya i dopa nen Moises. Jet eg itoled ira nonta too ja isi-ning si Moises. Angken nonta emanka-kal mala sota emenenilid dopa to, eg ngoreshan itoled nonta ira totoo ja isi-ning si-kato. Kaskasshaaw iyay ya epasemak nonta in-awat nen Moises

sota bilin nontan da, angken sotan na in-awat to ket, eg mengi-kan ni biyag ingkatod ingka. <sup>8</sup> No sotan i panakabalin nen Apo Shiyos ja maytakshol son Moises, mas ebadbadeg pay i panakabalin nen Apo Shiyos ja maytakshol son si-kami, ta kamika mengitoshon nonta badon bilin to, ja sota on-awat so, ma-aknan ni Ispirito Santo to. <sup>9</sup> Kaskasshaaw i edaga so nen Moises nontan jet say in-awat to bengat, sota bilin ja singa engi-kan ni keshosa-an ni totoo. Nem mas pay ya kaskasshaaw wa pasiya i medeka niman, ta kamika mengitoshon ni koston pesing ni too say kosto-an nen Apo Shiyos. <sup>10</sup> Mebedin na ikowan tayo ey sota pilmiron bilin da ja istay ya etaksholan ni panakabalin nen Apo Shiyos, enshi mala niman i panakabalin to. Tep sota badon bilin nen Apo Shiyos, ebadeg i panakabalin to; jet si-katoy naysadat ma. <sup>11</sup> Sota epangdo la ja bilin, etaksholan na agpayso ni panakabalin, nem sanka-atikan bengat. Nem sota naysa-dat niman, wára ni olay ingkatod ingka. Isonga ebadeg pay i panakabalin to.

<sup>12</sup> Jet niman, ta wára iyay ya namnama mi, marinel kamin mengikowan ni koskosto; <sup>13</sup> aliwén inges mis Moises ja inbaing to sota panka-kali nonta emenenili shi dopa to nonta bayag da. Tina-bonan toy dopa to, say sota ira kait to, eg sha idasin i panka-enshi-i nonta emenenili. <sup>14</sup> Nem si-kami, angken diritsoy mika pengitoshon, sota nemnem ira nonta Hodiyo, timangken ingkato niman. Jet no basa-en sha sotan na epangdon bilin nen Apo Shiyos, may-eshig ey kaonong pay laeng sota ta-bon sha ja simekkin say eg sha ewatan sota olog to, ta eg sha pinati si Cristo. Si Cristo bengat i mebedin na

mengkal nonta singa simekdin say edawag ma i olog to. <sup>15</sup> Angken niman na timpo, no ibasara sota bilin nen Apo Shiyos ja naysolat nonta bayag da ja in-awat nen Moises, singa wára pay laeng sota simekdin, ta eg ewátan nonta mengitneng. <sup>16</sup> Nem no si Apo Jesus i toshongen ni too, ewátan sha ma ja singa ma-kal sota singa simekdin. <sup>17</sup> Ta si Cristo ja toshongen ni too, si-katoy emengikan ni Ispirito Santo, jet sota toon kawad-an ni Ispirito Santo, ewáya ma.

<sup>18</sup> Jet emin kiton emati son Cristo, aliwén inges tayos Moises ja sina-dinan toy dopa to, ta si-katejo, singa ispiko kito ja emengipa-sas nonta itsora nen Apo Jesus. Niman ma, wáray ootik ka nay-ingesan tayo son Apo Shiyos, nem emanka-shomi ni olay, jet no ekay ingesen tayo ma si Apo Jesus, ta si-katoy emengikan ni Ispirito Santo.

#### 4

<sup>1</sup> Si Apo Shiyos, kinaasi-an tokami jet si-katoy engipedaw son si-kami ni sajay ya obda. Isonga eg kami medismaya. <sup>2</sup> Sajay ya obda min mengitosho, enshiy kabebaing ja mika dagdag-a, ono na-alas sa aramid min mika i-em-emot. Aliwén mika pan-olbora i too say memati ira. Say mika pan-itoro, sota podpodnon kowan ni esel nen Apo Shiyos, aliwén mika pansa-dati ono mika pan-a-shomi. Sajay, amta nen Apo Shiyos et sajay bengat i mika pesing nga mengisekot ni bakdang mi shorog so ni totoo, say nemnemen sha ey mapteng kamin too. <sup>3</sup> Nem angken diritsoy mika pengitosho, wára pay laeng i eg maka-awat, nem sotan ira sota toon emantoshong shi keshosa-an sha. <sup>4</sup> Sota kepatpati-a ira niya eg emati son Cristo ja si Satanas, si-katoy singa

simekdin so ni nemnem sha say eg sha ewátan sota mapteng nga shamag pangkep son Cristo, say eg medewágan i nemnem sha. Si Cristo, ja engipa-sas ali ni itsora nen Apo Shiyos, <sup>5</sup> si-katoy etopog ga mika pan-itoro; aliwén sota maypangkep ni bakdang mi. Mika ikowan ey si Jesucristo, Apo tayon emin. Jet say mika ikowan bengat pangkep ni bakdang mi shorog, kowan mi ey inbaba miy bakdang min mandeka ni pansigshan jo, ta ensemek mis Jesus. <sup>6</sup> Ta si Apo Shiyos, inkowan ta ngo eshan nonta pinalsowa toy dobong ey sota embolinget, mesepol la mesilwán. Jet si-kato met laeng i singa enilew ni nemnem tayo, say amta-en tayo i maypangkep so nen si-kato, jey si-katoy Kangeto-an. Jet no si Cristoy nemnemen tayo, singa emesilwiy nemnem tayo.

<sup>7</sup> Jet sajay ya obden inpiyal nen Apo Shiyos son si-kami, epateg ga pasiya; nem too kami bengat. May-eshig ey intalo nen Apo Shiyos sota ebanol shi banga ja emebowey. Sajay i inpa-sing to say eg mi nemnemen ey si-kami shorog i makabalin ja ondaga so niyay ya ebadeg ga obden mika dagdag-a, no diket si-kato. <sup>8</sup> Eshakel la digat ni olay i mika da-da-kami, nem mika idasat; mandikat ta pasiyy nemnem mi no sina-shom, nem eg ngo eshan ma-kal i namnama mi. <sup>9</sup> Eshakel i makakontra son si-kami, nem eg kami ma-en-shi-an ni kajem; inteltel shakami pay shi bo-day, nem eg mi inna-jon na etey. <sup>10-11</sup> Kanajon na wáray digat ja mika da-da-kami, jet sotan na digat, singa in-inges sha nodta dina-kaman nen Jesus nonta shan-shani men bono-en sha. Dilikaro i kasesaad ni biyag mi ni olay kabol ni mika pansilbi so nen Jesus. Jet sajay i emedegdeka

son si-kami niman, say no asdeg toy dag-en mi pangkep ni mika pengitosh, amta-en ma ni totoo ey angken niman, wára si Jesus shi biyag ja kaontoltolong son si-kami. <sup>12</sup> Isonga no patey i emansessesked son si-kami, pansigshan jo, tep biyag ngoy emansessesked son si-kayo.

<sup>13</sup> Say kowan nonta naysolat nonta bayag da, kowan to ey, “Naka memati son Apo Shiyos, isonga wára ngoy naka ikowan.” Jet sota engikowan niyay, tan si-kami, saksakey i pinati mi, isonga wára ngoy mika ikowan. <sup>14</sup> Ta amta mi ey si Apo Shiyos ja inpanongal so nen Apo Jesus, panbiyag shakami ngo, ta wára kami son Jesus. Jet angken si-kayo ngo. Isonga no anongosto, man-o-odop kito, si-katejod Cristo, ja ondaw son Apo Shiyos. <sup>15</sup> Emin iyay, pansigshan jo. Ta sota ebadeg ga kaasi nen Apo Shiyos son si-kami, singa emanba-deg pay tep eshakil kayon emanshewat son Apo Shiyos ni pansigshan mi, jet eshakil ngoy eman-iyaman ja emengiredjaw son Apo Shiyos.

<sup>16</sup> Isonga eg kami medismaya. Angken na saja bakdang mi ket emankepoy, saja nemnem mi, kebado-i nen Apo Shiyos ni olay. <sup>17</sup> Jet sajay ya ootik ka digat ja sankat-antikan, si-kato iya mika dada-kami, nem say panpa-no-an to shi ka-onoran, sota ebadeg ga sobadit ja i-akan nen Apo Shiyos ingkatod ingka, ja enshiy to kay-ingesan. <sup>18</sup> Isonga aliwén sota ma-sas niman na banag i mika nemnemnema, no diket sota banag ja eg pay laeng ma-sas niman. Ta sota ma-sas niman, maganon ma-enshi; nem sota eg ma-sas ja kedagdag-a nen Apo Shiyos, si-kato ngo eshan i wára ni olay ingkatod ingka.

## 5

<sup>1</sup> Amta tayo met ey saja bakdang tayo, ja may-eshig ey kampo ja tayoka pan-iyani ni sankat-antikan, mesheshal ngo eshan. Nem wára i dingka nen Apo Shiyos ja koston pan-iyanan shi naykayang ja aliwén dingka ni too. Sajay, eg mesheshal, wára ni olay ingkatod ingka. <sup>2</sup> Shiya dobong, singa kitoka man-ingag ni digat tayo; isonga kitoka man-a-agag ga pasiya ja no mebedin, ondaw kito ma shi dangit ja kawad-an ni koston pan-inan. <sup>3</sup> Sotan may osalen tayo say aliwén na may-eshig ey dabos kito. <sup>4</sup> Niman na kawasha tayod ja bakdang tayo, ja may-eshig ey kampo ja tayoka pan-iyani, singa kitejoka mannged-as ta edigat i biyag shiyay. Nem aliwén say piyan tayo, maydekjas iya bakdang tayo niman, ta nakol ni singa dabos kiton enshi may pan-inan. Say piyan tayo, mayta-kep koma sota bado, ta si-katoy pilmi, jet say saja bakdang tayo niman na emetey, mesa-datan na kolpi ni biyag ja wára ni olay ingkatod ingka. <sup>5</sup> Esagana kiton ma-aknan niyay ta si Apo Shiyos met laeng i engisedakan son si-katejo. Jet sota Ispirito Santo to ja wára son si-katejo, si-katoy penigorado-an tayo ey tongpalen to di.

<sup>6</sup> Isonga eg kito medismaya, makedsang ni olay i namnama tayo, no pay arawi kito nin son Cristo. Amta tayo ey no wára kito pay laeng shiya bakdang tayo, ja wára kito pay laeng shi biyag, enshi kito nin shima koston pan-inan. <sup>7</sup> Ta shiyay, kitoka memati bengat son Cristo; eg tayo nin inon-an. <sup>8</sup> Nem makedsang i namnama tayo, jet say piyan tayo, angken maydekjas iya bakdang tayo say on-akad shima kad-an nen Apo Jesus. <sup>9</sup> Isonga say wared nemnem tayo, angken niman na

wara kitod jay, ono shiman da, piyan tayon sota pan-imdengan nen Apo Shiyos i dag-en tayo. <sup>10</sup> Ta emin kito, onsango kito so nen Cristo, jet bisna-en toy dingdingka tayo nonta kawasha tayod biyag shiya dobong, no mapteng ono ngaaw, jet ewaten tayoy sobadit nonta dingka tayo.

<sup>11</sup> Amta mi ey si Apo Jesus, si-ka-toy mesepol la metekotan; isonga mika ad-adokay toon memati nonta kowan mi. Jet si Apo Shiyos, amta to ey enshiy ngaaw wa pangkep mi; naka pay namnama ey angken si-kayo, amtayo ngo. <sup>12</sup> Nem baka kowan jo ey mika pan-isagot mowan i bakdang mi shorog son si-kayo. Enshi. Kina-agpayso to, piyan min ipa-amta son si-kayo iyay, say wara ngoy ikowan jon mapteng nga itsora mi so nodta totood tan ja say shaka shedjawa ket sota toon mengipasas ni kandasinan tod eshom, aliwen sota toon podnon mapteng i wared nemnem to. <sup>13</sup> Jet no bilang ey kowan sha ey edabas i mika pesing, ja singa kamika man-engaw, mebedin; nem dingka mi sotan maypangkep so nen Apo Shiyos. Nem niman, no koskosto iyay ya mika pan-ikowan son si-kayo, ja aliwen edabas, pansigshan jo met laeng. <sup>14-15</sup> Sota semek nen Cristoy emengitoshong son si-kami, isonga aliwen bakdang mi bengat i mika nemnem-nema, angken ngarantoy dag-en mi. Ebadeg i semek to son si-katejo, isonga etey para so ni emin na totoo. Isonga mika kowinta ey singa etey kiton emin et no sotan, eg mi nemnemen i pansigshan mi shorog. Jet aliwen sikami bengat, no diket si-katejon emin ja wara pay laeng shi biyag, aliwen tayo nemnemen ma i pansigshan tayo shorog, no diket si Cristo i nemnemen tayo, ta etey

maypangkep ni pansigshan tayo, nem nan-ongal met laeng.

<sup>16</sup> Isonga say kowan mi, no kowinta ey etey i totoo, eg mi ma ibilang i kasesaad ni angken sipen too shiya dobong. Angken si Cristo, kowan mi nem too bengat nontan da, nem niman aliwen sotan ma i wared nemnem mi pangkep son si-kato. <sup>17</sup> Jet angken sipen too ja memati so nen Cristo, mebediwan i wared nemnem to; singa badon palsowa ma. Sota sigod ja ogadin ngaaw, enshi mala, jet sota bado, si-katoy naysa-dat ma. <sup>18</sup> Jet emin iyay, si Apo Shiyos i dimaga so, ta si-kato met laeng i engawat son si-katejo pangkep nonta inkatey nen Cristo, jet in-esop shakito met laeng son si-kato say dag-en tayo may piyan to. Jet say piyan to ngon dag-en min apostol, itod-an miy eshom ma totoo say may-asop ngo ira son si-kato. <sup>19</sup> Say olog nonta inkowan ko la, nonta etey si Cristo, si Apo Shiyos, toka pandaga i pesing ton mengi-sop met laeng so ni emin na totoo son si-kato, say eg to ma ibilang sota ngaaw den aramid sha. Jet sajay i inpiyal ton itoro mi. <sup>20</sup> Shinotokan shakami nen Apo Shiyos ja mengi-edagey son Cristo, isonga no mengadok kami ni too, aliwen nemnem mi ni abos, no diket nemnem nen Apo Shiyos sota mika pan-i-adok. Isonga shewatan mi ngarod son si-kayo kabol so nen Cristo ey ipalobos jon i-esop shakejo nen Apo Shiyos son si-kato met laeng. <sup>21</sup> Si Cristo, enshin polos i ngaaw wa aramid to, nem si Apo Shiyos, inkowan to ey si-kato et ngo mowan i mengikesho nonta basol tayon totoo, say no memati kito son si-kato, ibilang shakito ma nen Apo Shiyos ey mapteng kito, ja inges ni ogadi tayoy ogadi to met laeng.

## 6

<sup>1</sup> Sajay ya obda, mika pan-atngi si Apo Shiyos ni obda to; isonga iyay i kekshawen mi son si-kayo. Niman na kinaasi-an shakejo nen Apo Shiyos, osal jod pansigshan jo, karejo pekewas sota inkaasi to. <sup>2</sup> Alisto-iyon mengosal niyay ya kaasi. Nemnem jo kari sota inkowan nen Apo Shiyos ja naysolat nonta bayag da ja kowan to ey, “Nonta simabi sota koston timpo, kinaasi-an takejo, tinodongan takejo, say maysedakan kayo.” Kowan nonta padto, jet marama ma niman sota inpadto ton timpon kaysedakan; isonga awat jo et ma.

<sup>3</sup> Enshiy mika dag-a ja bedawan shakami so ni eshom, ta eg mi kosto ja ikowan sha ey ngaaw iya obda mi. <sup>4</sup> Say mika dagdag-a et ngo mowan, angken nganton banag, mika ipa-sas ey si Apo Shiyos i mika pansilsilbi-i; isonga angken nganton digat, mika itoled. <sup>5</sup> Jet iyay i eshom ma digat ja dina-kaman mi. Dina-kaman miy sepdat, dina-kaman miy balod, dina-kaman mi pay i bonget ni eshakil la totoo. Kamika emebdey ni obda, eg kami pay maka-ogip ni medebi no sinarom, tan dina-kaman mi pay i agang. <sup>6</sup> Jet say mika pesing pay ja mengipa-sas ey si Apo Shiyos i mika pansilsilbi-i, poro mapteng i pangkep mi, mika pan-itoro sota inpa-amta nen Apo Shiyos son si-kami, na-anos kami pay ja mika todongiy kait min too. Mika ipa-sas ni olay ey sota Ispirito Santo nen Apo Shiyos i emengitoshong son si-kami, jet waray podnon semek mi shi eshom. <sup>7</sup> Sota koskosto, si-katoy mika ikowan, jet say sakey pay, edawag ey sota panakabalin nen Apo Shiyos i ka-ontolong son si-kami. Singa say mika osala ja mekisengo so nonta ira eg makakosto ni mika

itoro, saja mapteng nga ogadi mi; jet sajay, kaon-anay, enshiy kolang to. <sup>8</sup> Sota ira eshom, inshayaw shakami, jet sota ira eshom, binedaw shakami. Sota ira eshom, kowan sha ey ngaaw kami, nem sota ngo ira eshom, kowan sha ey mapteng kami. Nem enshi met i ngaaw wa dingka min kabol ja shakami so bedawan. Agpayso i mika ikowan, nem kowan ni eshom kono ey mawap kami. <sup>9</sup> Sota karakdan na too, eg shakami am-amta, nem si Apo Shiyos, tan sota ira too to, ambara kami. Inbilang shakami ni karakdan ey etey kami, nem wara kami pay laeng met shi biyag. Pinedigat shakami, nem eg kami ebono met laeng. <sup>10</sup> Kamika emandeshingit, nem wara met laeng ni olay i imdeng mi; ebiteg kami, nem eshakil met i singa inbabaknang mi; enshin polos i kokowa mi, nem singa in-akan nen Apo Shiyos son si-kami i emin na waray banol to.

<sup>11</sup> A-akik shi pamati ja i-Korinto, indiritso min inkowan iyay ya dekna mi. Say agpayso, ebadeg i semek mi son si-kayo. <sup>12</sup> Enshiy ngaaw wa wared nemnem mi pangkep son si-kayo, nem si-kayoy eg makakosto son si-kami. <sup>13</sup> Saja naka pan-ikowan son si-kayo, takejoka ikari ey singa anak takejo; isonga angken si-kayo ngo, semek jokami ngo koma.

*Pantanshaan kayo tep baka onoran jo et sota totoon enshiy pamati to son Apo Shiyos*

<sup>14</sup> Karejo ikadwa shorog i bakdang jo so nonta ira eg emati tep eg kayo mankinompasan. Say arig to, sota baken nanparis sa mengojod ja eg nan-inges i kedsang sha. Enshi met i naykamitan ni toon mapteng so nodta toon naykontra son Apo Shiyos i aramid to; jet enshi met laeng i naykaitan ni toon



edawagan i nemnem to so nodta toon eg edawagan i nemnem to.<sup>15</sup> Apay mankompas aya i ogadin Cristo tan si Satanas? Enshi met, Jet angken ngon si-katejon emati son Cristo, eg nay-inges i nemnem tayo nodta wared nemnem ni eg emati.<sup>16</sup> Si-katejo i may-eshig ey Timplo nen Apo Shiyos et nalas no ikadwa i Timplo nen Apo Shiyos nodta inemag ni toon sinan shiyos. Ta si Apo Shiyos, wared biyag. Isonga wara sota naysolat nonta bayag ja esel to, ja kowan to ey, “Panbedin ko ira ja may-eshig ey baley ko et man-iyanak son si-kara say wara-ak ni olay son si-kara. Jet si-kak ma i metopog ga Shiyos sha et si-kara ngo ma i took.”<sup>17</sup> Jet kowan to pay ey, “Isonga ilesin joy bakdang jo et karekayo mekibiyang ma so nodta kedagdag-a nonta ira toon enshiy Shiyos to. Bay-iyo sotan na ngaaw wa aramid sha, say ewaten takejo.<sup>18</sup> No sotan i dag-en jo, si-kak ma i Amejo, jet si-kayo i annak kon daleki, tan annak kon bibii.” Sajay i kowan nen Apo Shiyos ja Manakabalin.

## 7

<sup>1</sup> Si-kayon a-akik shi pamati, emin ira jay ya kari nen Apo Shiyos, si-katejoy inkari-an to so. Isonga mesepol la niman ma, ibijag tayo sota ngaaw wa aramid ja singa emengi-kan ni dogit ni bakdang tayo tan nemnem tayo, jet say nemnemen tayo ma, si Apo Shiyos. Si-kato pay i mesepol la tekotan tayo, say may-inges kito nodta ogadi to.

*Sota epangdon solat ko, inpandaringit takejo, nem mapteng ngoy nanpa-no-an to*

<sup>2</sup> Say kowan ko, semek jokami ngo, ta amta mi ey enshi met i ngaaw wa mi dingka so ni angken sakey son si-kayo; enshi met i mi shineshal son si-kayo, ono

mi pinidiw i kokowa to son si-kayo.<sup>3</sup> Baka ipangkep jo ey waray piyan kon pebesolan son si-kayo; enshi! Amtayo met i inkowan ko la son si-kayo ey wara kayo ni olay shi nemnem mi. Jet angken bilang ey metey kami, ono wara kamid biyag, si-kayo pay laeng i mika nemnemnema.<sup>4</sup> Ebadeg i namnamak pangkep son si-kayo, jet ebadeg pay i naka pengiredjaw son si-kayo. Si-kayo met i emengikan ni kedsang ko. Angken naka medigdikati, ebadeg ngo eshan i imdeng ko.

<sup>5</sup> Nonta mimotok kamid ja Masidonia, emandikat ni olay i nemnem mi, enshiy salsheng mi. Angken townen dogad shiyay ja dinawan mi, waray kolo. Shakamika panbekala, jet entakot kami.<sup>6</sup> Nem si Apo Shiyos, si-katoy emengikan ni kedsang so nonta toon emedismaya, jet siya, angken si-kami inpakedsang shakami nonta mimotok ali si Tito son si-kami.<sup>7</sup> Ta say inkowan to nonta inmotok to, inpakedsang joy nemnem to nonta wared ta kadnan jo. Jet nay-imdenganan ngon pasiya, ta inkowan to ey piyan jo konon asen jowak ngo, asan inkowan to pay ey kayoka mandeshingit maypangkep nonta epasemek nontan da, jet esagana kayo men mengonod nonta piyan kon medeka.

<sup>8</sup> Ta amtak ey sota solat ko la, inpandaringit tokejo, nem aliwen naka manbebawi ja engisodat nontan da son si-kayo. Singa istay naka manbebawi nonta insolat ko la son si-kayo ta nandaringit kayo ni in-awat jo so, nem sankatikan bengat i inpandaringit jo.<sup>9</sup> Jet niman, naka ma manimdeng. Aliwen sota inpandaringit jo i naka panimdengi, no diket sota nanbanagan ni daringit jo, ta nanbebawi kayo nonta ngaaw wa aramid jo. Isonga nanmaptent-

gan jo met laeng sota inpansolat ko son si-kayo, eg kayo naydakaran. Sotan na itsora ni pandeshingit ni totoo, si-katoy piyan nen Apo Shiyos, <sup>10</sup> ta si-katoy toka osala ja panbebawi so ni too. Kowinta ey sotan, emengi-kan ni kaysedakan ni totoo, isonga eg kito manbebawi no sotan i itsoren pandeshingit ni too. Nem apil i panpa-no-an ni daringit ni tood ja dobong ja eg emati, ta singa toka ira pan-itorong shi patey ingkatod ingka. <sup>11</sup> Nemnem jo kari sota mapteng nga nanpa-nonan ni inpandaringit jo. Niman ma, kabol ni inpandaringit jo, alisto kayo men memidin ni kait jon manbesol, mapiyan kayo pay ya mengipedawag ni koskoston nanbaliwan jo, singa sinodngan jo shorog i bakdang jon inbonget pangkep nonta nanbasol ja kait jo, tan wára pay gayam i takot jo son si-kak. Nem piyan jo met laeng nga asen jowak, tan masimet kayo ma ja mengonod nonta kowan ko. Siya, binidin jon kosto sota kait jon waray basol to, jet niman, enshi may basol jo pangkep nontan na banag, ta dingkayo met i kosto.

<sup>12</sup> Jet angken na insolat ko sotan son si-kayo, aliwa bengat ja say bidinen jon kosto sota ngaaw wa aramid jo, ono say isingpet jo sota toon nanbasol. No diket say epateg ga nansolatan ko, piyan kon say maynemneman kayo, tan say ipa-sas jo ey si-kami met laeng i joka pati-a, aliwen sota eshom. Jet sajay ya insolat ko, aliwen pampamaayan, ta si Apo Shiyos, shakamika pan-osshongi ni inpansolat ko.

<sup>13</sup> Sajay ya inpasing jo, inpakedsang to mowan i nemnem mi, jet kamika pay man-imdeng nga pasiya so nen Tito, ta eman-imdeng ngo ni inmotok to did jay. Jet si-kayon emin konoy inpaka-

jas so ni nemnem to. <sup>14</sup> Kamika man-imdeng ta inamta-an nen Tito ey nay-agpayso sota inkowan ko nontan son si-kato pangkep son si-kayo, tep sinintil jo la nonta indaw to led ta kad-an jo. Isonga mapteng i deknak, ta nay-agpayso sota inpangi-tek ko son si-kayo so nen Tito, ja inges to sota emin na inkowan mi son si-kayo ket, nay-agpayso. <sup>15</sup> Jet niman ma, nashoman men pasiya sota semek to son si-kayo. Ta eg to dibkan sota mapteng nga dingkayo son si-kato, ja joka pati-en emin sota inkowan to. Tan sakey pay ya eg to dibkan, kowan to ey singa kayoka man-anad kono son si-kato ni inmotok to, ta eg jo amtay pesing to son si-kayo. <sup>16</sup> Jet niman ma, naka man-imdeng ta inamta-an ko ey siya, kayoka emepiyal.

## 8

*Itoday jo sota plano jon ontolong so nonta ira i-Jodia ja maligdigat*

<sup>1</sup> Si-kayon a-akik shi pamati, piyan min amta-en jo ey si Apo Shiyos, asdeg ton kinaasi-an to ira sota emati son Cristo shiya intiron Masidonia. <sup>2</sup> Asdeg toy digat ja dina-kaman sha, nem ireka pay laeng man-imdeng nga pasiya ja ontolong, angken na sikara ket enshiy kabedinan sha. <sup>3-4</sup> Kinshaw sha son si-kami ey piyan shen pasiya ja ontolong ni kasapolan ira nonta emati ja i-Jodia ja maligdigat. Jet say inpasing shen engi-kan ni alos sha, aliwen sota kabaalan sha bengat i inakan sha, no diket sinodokan sha pay. Inon-an ko ey masimet iren ondaga so niyay, enshiy emilit son si-kara. <sup>5</sup> Eg mi namnama-en ey sotan i dag-en sha. Nem say inpasing sha nin, ninemnem sha ngo shorog ey i-akan shay bakdang shen mansilbi son Apo

Jesus tan mansilbi son si-kami, ta inewatan sha ey sotan i piyan nen Apo Shiyos sa dag-en sha.

<sup>6</sup> Isonga shinewat mi so nen Tito ey itoloy to sota inshogi tod tan, say meksheng ngoy itolong jo. <sup>7</sup> Joka singpeten emin i joka dagdag-a. No maypangkep ni pamati, ebadeg i pamatiyo, asdeg toy daing jon mengitosho, tan asdeg toy amtayo pay. Masi-met kayon ontolong so ni eshom, tan ebadeg pay i semek jo son si-kami. Isonga no maypangkep ni sajay ya obden penodong ni kait tayod Jodia, piyan min singpeten jo iyay ya dag-en. <sup>8</sup> Aliwen kowan ko ey pilit ja onoren jo iya naka panikowan shiya solat ko, no diket piyan kon pa-amta son si-kayo ey eshaket i masi-met ja ontolong, ket no onoran jo ngo ira, mepati ma ey aliwen pampamaayan i semek jo. <sup>9</sup> Eg mesepol la piditen takejo ta amtayo met sota maypangkep ni kaasi nen Jesucristo ja Apo tayo. Si-kato, baknang nontan da shi dangit, nem inbaba toy bakdang to ja nanbalin ni ebiteg kabol ni pansigshan jo. Jet niman ma, si-kayoy may-eshig ey baknang. <sup>10</sup> Jet ikowan ko son si-kayo iya wared nemnem ko. Mapmapteng no itoloy jon kekshengen sota inshogi jon alos nonta sakey den tawen. Ta masi-met kayo nontan ja ondaga so niyay, <sup>11</sup> jet niman, itoday jon kekshengen, say mayenam nodta ogadiyon mapiyan ja ontolong. Sota kabaalan jon i-akan ja itolong, si-kato, <sup>12</sup> ta no mapiyan kayon mengi-kan ni tolong, si Apo Shiyos, ewaten to sota warden may-ekan; eg to toy-an.

<sup>13</sup> Aliwen kowan ko ey pannamay ko sota ira emati shi eshom ma dogad, ja angken ayshiy sha i-akan ja tolong, ey si-kayo i mayda-karan. <sup>14</sup> Nem niman, ta wara met i mebedin na itolong jo,

tolongiyo ira sota makasapol, jet no sakey alin akew, ey mesepol jo ngoy tolong, sobalitan shakejo met laeng, say man-inges ma. <sup>15</sup> Waray naysolat nonta bayag da ja maypangkep ni inpangolnong ni too nonta tinapay ja kowan sha ey mana, ja kowan to ey, “Sota eshaket i inolnong to, eg simolok, jet sota otik i inolnong to, eg kimolang.”

<sup>16</sup> Nem naka man-iyaman son Apo Shiyos ta intorong tos Tito, jet niman, say toka pengisekit son si-kayo, inges toy wared nemnem ko. <sup>17</sup> Aliwen man-imdeng bengat nonta shawat mi son si-katon ondaw shitan, nem mas pay ya masi-met den en manbisita shita kad-an jo. Nem angken bilang enshiy mi inkowan, ondaw ngo eshan da ta piyan ton pasiya ja asen tokejo. <sup>18</sup> Jet wara day peki-odop mi son si-kato ja agi tayo met laeng shi pamati. Sajay ya too, am-amta ni emin na emati shi emin na ka-ili-ili, tep edaing nga mengikowan ni mapteng nga shamag maypangkep so nen Jesucristo. <sup>19</sup> Jet aliwen sotan bengat i dag-en to, no diket si-kato pay i shinotokan ira nonta emati shi ka-ili-ili ja kaiten min mengolnong nonta alos sha ja itolong sha shi eshom ma emati. Isonga kadwa mi ni mika pan-eka-ekad ja mengolnong nonta alos. Sajay i mika pandag-a, say eshaket i mengiredjaw son Apo Jesus, tan say ipa-sas mi ey masi-met kamin ontolong. <sup>20</sup> Inpaki-olop mi si iyay ta eg mi koston waray apil la nemnemen ni too son si-kami ni maypangkep niya ebadeg ga alos ja inegshi-an mi. <sup>21</sup> Say pangkep mi, sota koskosto i dag-en mi. Sajay, amta nen Apo Shiyos, nem piyan ko ngon amta-en ni totoo.

<sup>22</sup> Jet iyay pay i sakey ya agi tayod pamati ja peki-odop mi la son si-kara. Jet sajay ya agi

tayod pamati, inon-an miy toka dagdag-a jet masi-met ni olay ya ontolong, angken nganton obda. Agdalo niman ta marinela ma son si-kayo. <sup>23</sup> No sota maypangkep so nen Tito, si-katoy kadwák ni sajay ya mika dagdag-a ja pansigshan jo. Jet sota ira may-odop da son si-kato, si-karay inbetkag ira nonta emati shi ka-ili-ili. Jet si Cristoy emayshedjaw pangkep nonta shaka dagdag-a. <sup>24</sup> Isonga ipa-sas joy semek jo son si-kara, say asen ni emin na emati shi ka-ili-ili ey agpayso sota mika pengitek son si-kayo.

## 9

<sup>1</sup> Sota maypangkep ni alos ja mika pan-olnonga ja i-akan mi so nonta ira kait tayod pamati ja maligdigat shi Jodia, eg mesepol la isolat ko son si-kayo. <sup>2</sup> Amtak ey mapiyan kayon ontolong, jet sotan i naka pengitek son si-kayo so ira niya toon emati ja i-Masidonia. Say inkowan ko son si-kara pangkep son si-kayon i-Akaya, inkowan ko ey angken nonta sakey den tawen ket esagana kayon meki-edos. Jet sotan na si-met jon ontolong, si-katoy engawis ni nemnem ni karakdan shiyay, ja ontolong ngo. <sup>3</sup> Jet sajay iren a-aki tayod pamati, ibetkag ko len mepangdo say may-agpayso ey sota mika pengitek son si-kayo, ja esagana kayon meki-edos. <sup>4</sup> Sajay i inpasing ko ta baka waray mekidaw den i-Masidonia son si-kak ket no eg kayo pay laeng esagana, maybebaing kami, tan angken si-kayo, ta naksheng den inkowan ko ey waray namnamak son si-kayo, ey esagana kayon ontolong. <sup>5</sup> Isonga ninemnem kon mapmapteng emo no mepangdo ira jay den a-aki shi pamati, say olongen shen mareng sota alos jo ja inkari jo

asanak da motok. Say no onmotokak da, esagana ja wara. Nem karejo nemnemen ey kapiditan iyay; say piyan ko, sota nemnem jo ngon mengi-kan, si-kato.

<sup>6</sup> Iyay koma i nemnemen jo ja arig ni pengi-kan. Sota toon ootik i inmola to, otik ngoy epiten to. Jet sota eshakel i inmola to, asdeg to ngoy epiten to. <sup>7</sup> Nem enshiy memidit son si-kayo. Isonga eg kayo koma onkotot pangkep niyay ya alos. Emin sota masi-met ja mengi-kan, nemnemen to no pigay i-akan to jet si-katoy i-akan to. Ta si Apo Shiyos, pipiyan to sota man-imdeng ja mengi-kan. <sup>8</sup> Jet si Apo Shiyos, kabaalan ton i-akan i ebadeg ga kaasi to son si-kayo jet aliwen sota kasapolan jo bengat, no diket esolokan pay. Kabaalan ton mengi-kan ni koskoston kasapolan jo jet sodokan to pay say wara ni olay i i-akan jo so nonta mesepol la metodongan. <sup>9</sup> Sotan i kaytoshongan nonta naysolat nonta bayag da ja kowan to ey, “Sota toon maekan so nonta nankebiteg, eg ma-enshi-an; isonga eg ngo mepospos sota pandeka to ni mapteng.” Kowan nonta naysolat. <sup>10</sup> Jet si Apo Shiyos ja emengi-kan ni botil so nonta ira manmoda, tan emengi-kan ni mekan, si-kato met laeng i peshekel so nonta wara son si-kayo say eshakel ngoy todongan jo. Si-katoy mengi-kan ni olay son si-kayo say waray pesing jon mandeka ni mapteng. <sup>11</sup> Isonga mebedin men asdeg to ni olay i i-akan jo, ta si Apo Shiyos met laeng i maka-amta ni baknangan jo. Jet no maypangkep nonta alos jon ipiyal jo son si-kami, say panbenagan to, eshakel i man-iyaman son Apo Shiyos. <sup>12</sup> Ta sajay ya tolong nga dagen jo, aliwen na tolong jo bengat so nonta ira kasapolan ni eshom

ma emati, no diket sajay i kabol la esha-kelan ni man-iyaman na pasiya so nen Apo Shiyos. <sup>13</sup> Jet sota ira todongan jo, ishayaw shes Apo Shiyos pangkep nonta ebadeg ga alos jon i-akan jo son si-kara, tan so ni eshom pay. Nem aliwén sota kasi-met jon mengi-kan ni tolong bengat i pan-iyamanan sha, no diket man-iyaman pay ira so nen Apo Shiyos, ta sotan i kasan to ey joka ipateg sota bilin nen Cristo ja inewat jo. <sup>14</sup> Jet ishawatan shakejo, tan piyan sha pay ja asen shakejo, ta sota alos jon in-akan jo son si-kara, si-katoy amta-an sha so ey kaskasshaaw sota kaasi nen Apo Shiyos son si-kayo. <sup>15</sup> Jet si Apo Shiyos i pan-iyaman tayo, ta enshiy kay-ingesan nonta in-akan ton kaasi son si-katejon too to!

## 10

*Aliwa kamin basta toon abos, nem eg shinotokan shakami nen Apo Shiyos ja manbedin ni apostol*

<sup>1-2</sup> Niman, iyay i ikowan ko so ni eshom son si-kayo shita Korinto ja eg makakosto son si-kak, ja makakowan ey sota aramid ko ket aramid met laeng ni karakdan, ja ekak mepiyal kono. Si-kak si Pablo, nem ekak ipakat i kina-apostol ko son si-kayo, no diket ibabak i bakdang ko ja mekikaasi son si-kayo. Tep mesepol la onoran ko si Cristo ja dododop ni olay i inpasing to so ni too. Sota eshom son si-kayo, kowan sha kono ey ekombabak no wara-ak son si-kayo, nem no arawi-ak son si-kayo, embelat konoy naka pemidin son si-kayo shi solat. Shewaten ko son si-kayo ey manbebawi kayo, say no ondawak da son si-kayo, eg mesepol la ito-to-wak ja pebel-at i pemidin ko son si-kayo. <sup>3</sup> Agpayso ja say kawad-an mi niman, shiya

dobong. Nem eg kami manshinel nonta ogadi ni karakdan na too shiya dobong ni pekileban mi so nonta ira makakontra son Cristo. <sup>4</sup> Sota singa almas ja mika osala ni pekileban mi son si-kara, aliwén na inges to sota almas ni tood ja dobong, no diket sota panakabalin nen Apo Shiyos i mika osala. Isonga kamika mengebak ni olay ja meneshal nonta angken nganton singa kaontiped son si-kami. <sup>5</sup> Say pangkep mi, ibaba mi sota kowan sha ey matekal, ono etangsit, ja eg makakoston mengamta so nen Apo Shiyos. Piyan min angken sipa, say nem-nemen sha bengat, sota piyan nen Cristo, say si Cristoy pati-en sha. <sup>6</sup> Jet sota toon memasig, ja eg mebidin, esagana kamin memidin son si-kato. Nem asen mi nin son si-kayo no sipay mematin kosto son Cristo.

<sup>7</sup> Sigosho say kabol la eg jowak so pati-an, sota kakapoy ni bakdang koy joka nemnemnema. Nem no wara son si-kayo i toka ibilang shorog i bakdang to ey too nen Cristo, mesepol la nemnemen to ey angken si-kami ngo, too shakami nen Cristo ja inges to. <sup>8</sup> Nem si-kak, waray nandasinan ni saad ko. Isonga angken bilang ey waray edabas ja naka ikowan pangkep niya saad kon in-awat nen Apo Jesus son si-kak, agpayso. Say kowan nen Apo Jesus ey dag-en ko, sota ontolong son si-kayo say onkedsang i pamatiyo, aliwén sota peneshal son si-kayo. <sup>9</sup> Jet ekak koston nemnemen jo ey takejoka panta-kota nodta insolat ko la. <sup>10</sup> Nem wara met son si-kayo i makadedamsis son si-kak, ja kowan sha kono ey, “Si Pablo, makedsang noman i solat to, ja waray banag to, nem pampamaayan met kari i bakdang to no mismon wared jay, angken sota toka pan-a-sel!” Kowan sha

kono. <sup>11</sup> Nem no sipa sotan na toon engikowan niyay da, mese-pol la ewatan sha koma ey enshiy na-apilan nonta insolat ko no enshi-ak, tan sota dag-en ko ni kawashak son si-kara. Ta sota insolat ko, ja kowan sha kono ey emena-ta-kot bengat, sotan met laeng i dag-en ko ni kawashak son si-kara!

<sup>12</sup> Aliw'en na mika pan-i-inges i bakdang mi so nonta ira toon kowan sha ey si-karay kamaptengan. Eg mi i-eshom i bakdang mi nodta shaka pesing nga mengitek. Ta sotan iren too, enshiy amamtara! Say shaka pengilokori ni amtara, sota inges sha; isonga kowan sha ey si-karay kamaptengan. <sup>13</sup> Nem si-kami, eg mi ibangat i dastog, eg mi da-to-an sota obden in-akan nen Apo Shiyos son si-kami. Nem si-kayon i-Korinto i sinekapan niyay ya obda mi. <sup>14</sup> Wara met i nebeng mi son si-kayo, ta si-kami met i pilmiron dimaw son si-kayo ja engikowan ni mapteng nga shamag maypangkep son Cristo. <sup>15</sup> Aliw'en kowan mi ey obda mi sota inobda ni eshom, ta enshiy mi kaybiyangan nodtan. Nem shita Korinto, say namnama mi, no onkedsang koma i pamatiyo, mebedin na si-kami mowan may nemnemnemen jo. <sup>16</sup> Ta piyan min mengitoshon pay nonta shamag pangkep so nen Cristo shima dogad ja medabsan i kad-an jo. Jet si-kayo komay mengisekot son si-kami. Ta say obda ja mika idastog, sota obda ja dingka mi, aliw'en sota obda ni eshom.

<sup>17</sup> Nem agpayso noman sota naysolat nonta bayag da, ja kowan to ey, "Sota toon piyan ton mandastog, say idastog to koma, sota kekosto-i nen Apo Shiyos son si-kara." <sup>18</sup> Isonga sota mengisekot shorog ni bakdang to, karejo patien; say koskoston pati-en jo koma,

sota insagot nen Apo Shiyos.

## 11

<sup>1-2</sup> Nem niman, ta ensakit i nemnem ko maypangkep son si-kayo, sapay koma ta enosan jon itenengan iya ikowan ko, ta singa waray dedamsis ko nodta ikowan ko di son si-kayo. Ta piyan kon isagot nin i bakdang ko son si-kayo. Ebadeg i naka pengisekit son si-kayo, ja inges toy kepengisekit nen Apo Shiyos. May-eshig ey bii kayon enshiy dakin imad-arol so, jet singa intolag takejo ja esawen ali nonta sakey ya daki, ja si Cristo. <sup>3</sup> Nem naka manshanag ta baka manbediw i nemnem jo, ja eg jo mala nemnemnemen sota koston joka pansilbi so nen Cristo. Baka may-owapan kayo, ja inges to sota in-olbod so ni oleg so nen Eva, nonta bayag da, jet nayowapan noman. <sup>4</sup> Ta inam-ay met i joka ka-ewis. No waray eshom ma ondaw son si-kayo ja mengitoshon ni apil, ja aliw'en inges to sota intoro mi ngo maypangkep so nen Jesus, joka ewata. Masi-met kayon mengewat nonta ispiriton shaka ikowan son si-kayo, anta nga inewat jo la met sota koston Ispirito Santo nen Apo Shiyos nonta inpamatiyo son Cristo. Masi-met kayo pay ya mengewat nonta apil ja kowan sha ey kaysedakan. <sup>5</sup> Jet no joka enosi ira ja kowan sha ey kangetoan konon apostol, anosi jowak koma ngo ni sajay ya ikowan ko. Ta say wared nemnem ko, angken sipa son si-kara, eg sha-ak et ngo ebaken ni angken ootik. <sup>6</sup> Aliw'en na matekalak ja man-a-sel, nem amtak i naka ikokowan. Nem eg mese-pol la ikowan ko son si-kayo i itsorak ja too, ta inpalewag kon emin son si-kayo, jet amtayoy ey apostol towak nen Cristo.

<sup>7</sup> Nem baka apil i wared nemnem jo son si-kak, ja kowan jo

ey inbabak i kina-apostol ko, ta enshiy nak siningil son si-kayo nonta intorok sota mapteng nga shamag ja edapo so nen Apo Shiyos. Nem pansigshan joy kabol la ekak dingka-an so nontan.<sup>8</sup> Nonta wára-ak son si-kayo ja emengitosho, say inosal kon pilak, sota in-akan ni emati shi eshom ma dogad. Isonga singa tinodisan ko noman ira, say dibshi mangoy pengitoshok son si-kayo.<sup>9</sup> Jet nonta wára-ak son si-kayo, enshiy kowan ko ey mengshawak son si-kayo no wáray mesepol ko. Sota ira a-aki shi pamati ja i-Masidonia, si-kara i engimotok ni mesepol ko nontan. Ta ekak kosto nontan ja wáray mankastos son si-kayo ni kabol ni kompormin mesepol ko. Jet no ondawak da mowan, satan met laeng i dag-en ko.<sup>10</sup> Ta no bilang ey si-kayoy pengshawan ko ni mesepol ko, enshi may pengitek ko ey eg takejo siningil ni in-pangitorok son si-kayo. Amtak ey sigoradon inpiyal nen Cristo son si-kak sota podnon piyan ton maytosho, isonga amtak ngo ey ekak mengmengshaw son si-kayon i-Akaya.<sup>11</sup> Sigosho say kowan jo emo, ekak mengshaw son si-kayo, ta enshiy semek ko son si-kayo. Nem enshi, aliwén sotan i wáred nemnem ko. Amta nen Apo Shiyos ey ensemek takejon emin!

<sup>12</sup> Jet itoloy kon eg mengmengshew son si-kayo say sota etangsit ta totoo ja makakowan ey apostol ngo ira, onsalsheng sota shaka pandastog ja kowan sha ey sota shaka dagdag-a ket inges toy obda mi.<sup>13</sup> Sotan iren totoo ket aliwén agpayson apostol ira. Sota obdara, singa obda ni apostol nen Cristo, nem o-owap kari.<sup>14</sup> Iso gayam ma angken si Satanas, singa anghil ja mismon edapo son Apo Shiyos no sin-arom, nem emengi-o-owap kari.<sup>15</sup> Isonga

aliwén na kaskasshaaw no saja ira sinan apostol ja emansilbi son Satanas ket singa emengitosho ni mapteng nga pengonod son Apo Shiyos. Nem say panbenagan sha, epiten sha met laeng sota aramid shen ngaaw.

<sup>16</sup> Ipinshowak iyay son si-kayo. Aliwén jo koma nemnemen ey singa wáray kolkolang ko, ta singa wáray dedamsis ni ikowan ko di. Nem no sotan i wáred nemnem jo, anosi jowak, ta iyay nin i idastog ko, ja inges toy kapan-dastog ira nonta toon wáred tan.<sup>17</sup> Say agpayso, sajay ya ikowan ko, aliwén inbilin nen Apo Jesus, no diket ikowan ko iyay ja singa wáray kolkolang ko.<sup>18</sup> Jet niman, ta eshaket i emengilastog ni kowan sha ey nandasinan sha kono shi eshom, onoran ko ngo ira ja mandastogak.<sup>19</sup> No kowan jo ey wáray kolkolang ko, angkena, ta naydowam kayon mengitneng met nonta toon wáray kolkolang to. Ara, nankedaing kayo!<sup>20</sup> Nem joka iba-ngat i onod nonta toon emengila-kad son si-kayo! Say shaka pesing met son si-kayo ket shaka al-ay kokowayo, ireka mayda-da-kam bengat, angkan i shaka pesing son si-kayo, ja angken bebaingan shakejo pay. Jet joka enosi ira!<sup>21</sup> No sotan i kowan jo ey itsora ni apostol nen Cristo, agpayso sota kowan sha ey ekapoyak, ta ekak kabaalan na dag-en sota shaka dagdag-a son si-kayo!

Ikowan ko mowan ey si-kak, singa wáray kolkolang ko, nem mesepol ngon mandastogak. No sota eshom ket etoled iren idastog sota kowan sha ey wáray nandasinan sha, mebedin ngon etoleshak ja mandastog ni inges nonta kowan sha.<sup>22</sup> Isonga no kowan sha ey Hodiyo ira, angken si-kak, Hodiyo sak ngo met. No kowan sha ey poli ira nonta sigod

ja too nen Apo Shiyos, poli sha-ak ngo. No kowan sha ey apo ira da nen Abraham, ja mekitewid kono nonta kari nen Apo Shiyos, angken si-kak, apo towak ngo. <sup>23</sup> Singa wáray angaw ko ni sajay ya naka pan-ikowan, nem angkena. Itoloy ko et ja ikowan. No kowan sha ey ireka emansilbi so nen Cristo, mas pay ya naka mansilbi, ta eshakel i digat ko nem say si-kara. Ebadbadeg ngo eshan i obdak nem say si-kara, tan eminshakelak pay ja naybalod nem say si-kara. Jet eminshakel pay ya sinepsepat sha-ak nonta toon naykontra son si-kak, tan eminshakel pay ya singa ngannganin meteyak. <sup>24</sup> Jet sota ira kait kon Hodiyo, emindima ja sinepdat sha-ak ni tedon polo tan siyam. <sup>25</sup> Emintedo ja sinepdat sha-ak ni sowan; pinsak ja kineskespigan sha-ak ni bato. Emintedon ena-ned sota nandoganan kon barko jet esareyak mala. Jet nonta pinsak ka esareyan ko, sandabi tan san-akew ja nannangoyak shima baybay. <sup>26</sup> Asdeg toy inek-ekad kon dogad, jet eshakel pay i dilikaron dina-kaman ko: wáray dayos, wára iray tolisan, jet angken sota ira kait kon Hodiyo, kataktakot i itsora sha no sin-arom. Angken sota ira aliwén Hodiyo, iso met laeng ja kataktakot ira no sin-arom. Jet angken pay shima siyodad, dilikaro-ak ja man-ek-ekad, angken pay shima shonshontog. Dilikaro-ak ja mandokan shima barko. Jet angken sota ira kowan sha ey a-aki shi pamati, ja o-owap kari, kataktakot i itsora sha. <sup>27</sup> Naka emebdey ya pasiya ni sajay ya obdak, jet eminshakel la ekak pay maka-ogip. Eminshakel la na-agagangak tep enshin polos i kenen ko tan na-kewak pay ni shanom. Naka mekmektel ta enshiy koston barok. <sup>28</sup> Jet aliwén sotan bengat,

no diket ina-akew ja naka nem-nemnemen pasiya sota ira emati shi emin na dogad, no kas-anoy kasesaad sha. <sup>29</sup> No wára iray ekapoy i pamati to, naka isakit ira, jet no wáray eshom ma toon panbesol so nonta kait kon emati, singa naka onpetang.

<sup>30</sup> Mesepol la mandastogak, nem say indastog ko la, sota mengipa-amta ni kakapoy niya bakdang ko. <sup>31</sup> Jet si Apo Shiyos ja Ama nen Apo Jesus, ja shedjawen ni emin na totoo ingkatod ingka, si-katoy maka-amta ey si-kak, agpayso iya inkowan ko la, ekak dina-bagan.

<sup>32</sup> Iyay pay i ikowan kon dina-kaman ko. Shi Damasko, sota gobinarol shiman ja insaad nen Ari Aritas, inpabantay to ni solsharo sota siyodad say a-shelen sha-ak. <sup>33</sup> Nem wáray tood man ja engi-iyen son si-kak shi baskit jet inoyoy sha-ak nodta tawa ja naypetek nodta alad ja dimikmot so nonta siyodad. Isonga dinisi-an ko sota istay kowan sha ey mengkel son si-kak.

## 12

<sup>1</sup> No sota maypangkep ni pandastog, enshiy to i-akan na panmaptengan ko. Nem mesepol la itoloy kon ikowan sota epaspasemak son si-kak. Niman, sodsoren ko sota inpa-sas nen Apo Jesus, tan inpa-amta to son si-kak. <sup>2</sup> Waray amtak ka toon emati so nen Cristo, jet nonta epalabas den sampolo tan epat ta tawen, indaw nen Apo Shiyos sotan na too shi mismon dangit. Jet ekak amta no mismon sota kabakbakdang nontan na too, ono aliwén mismo ja bakdang to i dimaw shiman, nem si Apo Shiyos, amta to. <sup>3</sup> Sajay ya too, amtak ey agpayson dimaw shima kad-an nen Apo Shiyos, nem say ekak amta, no mismon sota bakdang to,



ono enshi. Si Apo Shiyos bengat i maka-amta niyay. <sup>4</sup> Jet shiman, waray intenengan ton esel ja eg mebedin na mayteshos shi esel ni si-katejon too, asan naykowan son si-kato ey parit i pengi-odog to. <sup>5</sup> Jet sajay ya too, waray mebedin na idastog ko pangkep son si-kato. Nem no si-kak ka mismo, enshiy eshom ma nak idastog nem eg sota inkowan ko la, ja emengipa-amta ni kakapoy ni bakdang ko. <sup>6</sup> Nem no istay piyan kon mandastog, aliwen pampamaayan, ta agpayson eshakel i koston dingdingkak. Nem ekak ma mandastog, ta baka et ey pasiya-en ni totoo i shayaw son si-kak. Piyan kon say nemnemen sha koma ja ogadik, sota asen sha son si-kak, tan sota itenengan shen ikowan ko.

<sup>7</sup> Eshakel la pasiyy inpa-amta nen Apo Shiyos son si-kak, nem say inpasing to say ekak ikayang shorog i bakdang ko, waray inpalobos ton digat ni bakdang ko ja naka da-da-kami, ja singa waray tebek ni olay shiya daman ko. Singa waray toka ibetbetkag ja anghil nen Satanas ja emenakit son si-kak, say ekak ingato i bakdang ko shorog. <sup>8</sup> Jet emintedo ja nanshawatak so nen Apo Jesus ey a-kalen to koma iyay ya naka da-da-kami. <sup>9</sup> Nem eg to ingkal. Say songbat to et, kowan to ey, "Sota kaasik son si-kam, on-anay ja pekedsang son si-kam. Ta sota panakabalin kon mengaasi, agdalon naka i-akan so nonta ekapoy." Kowan nen Apo Jesus. Isonga naka man-imdeng nga pasiya ja mengenos niyay ya digat ko, say sota panakabalin nen Cristo ja toka penodong, ipakat to ngo son si-kak. Jet angken ekapoyak, si-katoy naka idastog. <sup>10</sup> Isonga niman ma, napnekak; angken ekapoyak, enosan ko. Jet enosan ko pay no bebaingan sha-

ak, ono pedigaten sha-ak, ono angken nganton digat i da-kaman ko. Ta amtak ey emin iyay ja emedegdeka son si-kak, pangkep so nen Cristo ja naka pansilbi-i. Amtak ey no timpon ikapoy ko, si Cristo met laeng i mengi-kan ni kedsang ko.

<sup>11</sup> Si-kayo met i emilit son si-kak, isonga sajay i inkokowan ko la; nakol ni singa wara may kolkolang ko. Istay si-kayo komay mengikowan ni kamapteng ko, say aliwen na si-kak koma et ngo mowan i mengisodat ni maypangkep ni bakdang ko. Ta si-kak, amtak ey angken ootik bengat, eg sha-ak ebaken nonta kowan sha ey kangeto-an konon apostol shitan, angken bilang ey agpayso sota kowan sha ey enshiy silbik kono, ta enshi ngo met kariy silbira! <sup>12</sup> Say ka-asan to ey koskoston apostolak, wara met i koston dingkak ja kaskasshaaw tan milagro nonta kawashak son si-kayo, tan sakey pay, inenosan ko i eshom son si-kayo ja makakontra son si-kak. <sup>13</sup> Jet enshi met i nak inpabor so ni emati shima eshom ma dogad ja ekak ngo inpabor son si-kayo. Say amtak bengat ja singa inpabor ko son si-kara, sota inpangados sha ni kasapolan ko. Jet pakawani jowak ni sajay ya nankolongan ko, ta eg takejo ngo inpangados!

<sup>14</sup> Jet sajay ya maykatdon idaw ko la son si-kayo, ekak met laeng koston mankastos kayo pangkep son si-kak. Ta aliwen sota pilak jo i piyan ko, no diket mismon si-kayo i piyan ko. Ta say kayeshigan to, aliwen na sota ira anak i mengi-kan ni kasapolan nen amesha, no diket sota amesha i mengi-kan ni kasapolan ni annak to. <sup>15</sup> Aliwen entapik ja kastosen i nganton wara son si-kak, tan mebedin pay ya osalen ko

iya bakdang ko, ja ontolong son si-kayo. Jet no bilang ey sajay i kaba-deg ni semek ko son si-kayo, eg jowak ngw ngata sesmeken?

<sup>16</sup> Mebedin na imanogot kayo nonta inkowan ko la, ey enshiy kastos jo ni kawashak shitan. Nem say kowan kono ni eshom son si-kayo, sotan i intapang ko say may-owapan kayo jet say si-kak i onoren jo. <sup>17</sup> Nem enshi met i nak inolbod son si-kayo nonta waray inbetkag ko la ja ondaw son si-kayo. Nemnem jo kari. <sup>18</sup> Si-kak i mismon engikowan so nen Tito ey ondaw son si-kayo, jet engibetkagak pay ni nay-olop son si-kato ja agi shi pamati. Jet enshi met i amtak ja sha inda son si-kayo. Nan-inges met i pangkep mi son si-kayo, ta nan-inges kamin emengonod son Cristo.

<sup>19</sup> Sigosho say wara mowan shi nemnem jo, kowan jo ey kamika mandeson son si-kayo pangkep nonta inkowan jon nankolongan mi. Enshi, si Apo Shiyos bengat i maka-amta no kostoy dingka mi, ono enshi. Jet amta to ey wara kami son Cristo. Emin iyay ya inkowan mi la son si-kayon a-aki mi shi pamati, panmaptengan jo met. <sup>20</sup> Ta naka manshanag ta baka et ey no onmotokak da son si-kayo, eg jo pay laeng tinongpal sota naka namnama-a ja dagen jo. Nakol ni ekak dag-en sota joka namnama-a, ja enosan takejo. No onmotokak da, baka eg jo pay laeng binediwan sota sigod ja ogadiyo, ja kayoka manbabakal, waray apal jo ni kait jo, waray mabonget, waray ma-isew, waray mayamjam, waray masomang, waray edastog. Baka ngalawngaw kayo, ja enshiy olnos jo. <sup>21</sup> Naka manshanag ta baka no ondawak da son si-kayo, mandeshingitak pangkep so nonta ira eshakel la nanbasol ja kait jo non-

tan da, ja eg pay laeng nanbebawi. Baka ingkato pay laeng niman ket ireka pay laeng ememii no wara pay laeng son si-kara sota eshom ma kilasin edogit ta aramid, nakol ni say pedekna nen Apo Shiyos son si-kak, ibaing takejo.

## 13

<sup>1</sup> Sajay i maykatdon dawān ko la son si-kayo, jet no ondawak da, i-anam koy pemidin nodta sigod ja wared bilin nen Apo Shiyos nonta bayag da, ja kowan to ey, “No waray kowan ni too ey nanbasol, mesepol la waray showa ono tedon onpaneknek so, asan joka pati-a.” <sup>2</sup> Nonta naykapinshowa ja indaw ko shita kad-an jo, sota inbanshaan ko so nonta nanbasol nontan, tan si-kayon eshom, si-kato met laeng; ekak bediwan. Ta say inbanshaan ko met nontan son si-kayo, kowan ko ey no ondawak mowan da, shosa-en kon emin ira sota nanbasol, enshiy nak pesinsiya-an son si-kara. Jet angken niman na enshi-ak son si-kayo, sotan met laeng i isolat kod jay. <sup>3</sup> Ipa-sas ko son si-kayo ey podnon si Cristo i enotok son si-kak ja apostol, ta sotan konoy piyan jo. Jet eg jowak koma damsisen, ta aliwen na ekapoy si Cristo ja memidin son si-kayo. Mebedin ton ipa-sas i panakabalin to son si-kayo. <sup>4</sup> Agpayso ja nonta naydansa shi koros, ekapoy ja inges tayo, nem nonta nan-ongal, Manakabalin ma ja inges tos Apo Shiyos. Jet angken si-kamin apostol, ekapoy kami ja inges tos Jesus nonta wared biyag pay laeng; nem makedsang i pemidin mi son si-kayo, ta nayda-kam kami nonta panakabalin nen Jesus ja wared dangit.

<sup>5</sup> Piyan jo konon asen no si Cristo ket wara son si-kak. Nem say kowan ko son si-kayo, asas jo shorog i ogadiyo, no wara kayo

pay laeng son Cristo ja emati. Ta say ekak amta, no si-kayo ket aliwen agpayson emati kayo. Istay mebedin komen idasin jo no si Cristo, wára son si-kayo. <sup>6</sup> Jet no dag-en jo iyay, naka namnama-ey amta-en jo met laeng ey agpayson wares Cristo son si-kami. <sup>7</sup> Say shawat mi son Apo Shiyos pangkep son si-kayo, onmapteng koma i ogadiyo. Say kabol la sajay i shawat mi pangkep son si-kayo, aliwen say ikowan ni totoo ey “Siya, agpayson apostol noman si Pablo ta mapteng i ogadi noman ira nima inewis ton emati!” Enshi, sajay i shawat mi ta piyan mi bengat sota panmaptengan jo. No onmapteng i ogadiyo, enshiy kabol la keshosa-an jo, nakol ni toy-an shakami pay laeng ni eshom, ta kowan sha ey enshiy mi inpa-sas sa panakabalin min menosa ja ketekotan sha. Nem say kowan mi, angken damsisen shakami, no onmapteng kayo et. <sup>8-9</sup> Jet say shawat mi son Apo Shiyos, piyan min onmapteng i ogadiyo; eg mi nemnemen ey eg kayo koma manbebawi say ipa-sas miy panakabalin nen Apo Shiyos ja wára son si-kami ja menosa son si-kayo. Enshi, eg mebedin na piyan min medeka sota maykontra nodta podnon toro nen Apo Shiyos. Say piyan mi, sota podno ni olay i medeka. Mas pay komay imdeng mi no si-kamiy ekapoy, ey si-kayo ngoy maked-sang. <sup>10</sup> Insolat ko iyay niman na ka-enshik pay laeng son si-kayo, ta piyan kon no onmotokak da, eg mesepol la ida-karan takejo ni bilin. Ta sota saad kon in-awat nen Apo Jesus, say kowan to ey osalan ko so, sota ontolong son si-kayo say onkedsang i pamatiyo; eg to koston sheshalen takejo.

<sup>11</sup> Jet siya, niman ma, si-kayon aki shi pamati, pan-imdeng kayo. Pannemnem kayo say man-i-in-

awatan kayo. Patiyo sota inbilin ko son si-kayo. Pansaksakey joy nemnem jo say wáray olnos jo. Jet no sajay i dag-en jo, si Apo Shiyos ja kedepo-i ni semek tan talna, si-kato i mewesha pay son si-kayo ni olay. <sup>12</sup> Ipa-sas joy semek jo shi sakey tan sakey son si-kayo. <sup>13</sup> Jet emin ira sota ematid ja ilin kawad-an ko, inkowan sha ey pekisodat kod jay i semek sha son si-kayo.

<sup>14</sup> Jet say shawat ko son Apo Shiyos, sota kaasi nen Apo Jesucristo, tan sota semek nen Apo Shiyos, ja wára son si-kayon emin, sapay koma ta si-katoy mashoman, tan kasta met sota inpankagait jo ta wára sota Ispirito Santo nen Apo Shiyos so ni sakey tan sakey son si-kayo.

## SOTA SOLAT NEN SAN PABLO PARA SO NONTA IRA I-GALASIA

1-2 Si-kak si Pablo ja makasolat niyay, jet sajay ya solat ko, para son si-kayon kait ko ja emati son Cristo ja emesa-sa-nop shita ka-ili-ili ni probinsiya ni Galasia. Itnengi jo iya ikowan ko ta apostol towak nen Cristo et aliwén too iray enotok son si-kak ja manbedin ni apostol, ono engisekot son si-kak, no diket saja inpan-apostol ko, mismon edapo son Jesucristo, tan si Apo Shiyos ja Ama, ja inpan-ongal son Jesus.

Sota ira a-aki tayod pamati ja kait kod jay, inkowan sha ey pekikowan koy semek sha son si-kayo.

<sup>3</sup> Say shawat ko son Apo Shiyos, sapay koma ta kaasi-an shakejo, tan a-shoman to sota talna ja wara son si-kayo ja edapo met laeng son Apo Shiyos ja Ametayo, tan si Apo Jesucristo. <sup>4</sup> Si Cristo, si-katon mismo i engikesho ni basol tayo ni inkatey to shi koros, say malsa kitod ja maramen ngaaw ja kedagdag-a ni totoo. Edaga iyay tep sajay i piyan nen Apo Shiyos ja Ametayo. <sup>5</sup> Si-kato komay ishayaw ni emin na too ni olay ingkatod ingka. Siya, satan koma.

*Karejo ibi-jag sota intorok son si-kayo ta edapo sotan na mismo son Cristo*

<sup>6</sup> Naka messhaaw ni in-amtak so ey inbi-jag jon shagos i joka pemat son Apo Shiyos. Si-kato met i emili son si-kayo, tan si Jesucristo, ebadeg met i kaasi to son si-kayo. Nem apil kono may inonod jo — sota toro ni eshom ja kowan sha ey kaysedakan. <sup>7</sup> Say kosto bengat ja pati-en ni too, sota intoro mi; enshiy eshom karin

kaysedakan. Sajay iren too, piyan shen sa-datan sota sigod ja intoro mi ja mapteng nga shamag maypangkep son Cristo, say madilaw kayo. <sup>8</sup> Nem karejo ira pati-en. Ta angken sipa — si-kak ono anghil ja mandepod dangit — no apil i itoro sha, ja aliwén inges to sota intoro mi son si-kayo nonta pilmiro, kenshat ta shosa-en ira nen Apo Shiyos. <sup>9</sup> Sajay met laeng sota inkowan mi son si-kayo nontan da. No waray mengitoshon son si-kayo, nem apil i kowan sha, ja aliwén inges to sota intenengan jo son si-kak nonta pilmiro, kenshat ta shosa-en nen Apo Shiyos ira.

<sup>10</sup> Apay nganto ayay nemnem jo son si-kak? Say kowan jo emo ket sota pemiyan ni too son si-kak i naka kamkamkami, ono sota penmek sha? Enshi, aliwén sotan i piyan nen Apo Shiyos! Say agpayson apok ja naka pansilbi-i, si Cristo, isonga aliwén sota pemiyan ni too son si-kak i naka patki.

<sup>11</sup> A-akik shi pamati, mesepol la amta-an jo ey sota mapteng nga shamag ja intorok son si-kayo, aliwén shamag bengat ja pinalbo ni too. <sup>12</sup> Ta aliwén too i inewatan ko so; enshiy engitoshon son si-kak, no diket mismon si Jesucristo i engipa-amta son si-kak.

<sup>13</sup> Shinemag jo met i maypangkep son si-kak nontan da, ey say naka on-onora, sota ogadi ni si-kamin Hodiyo, isonga asdeg to noman nin ja pinedigat ko sota ira emati son Jesus, tan istay piyan kon kenshat ja sheshalen ira, ta ekak amta ey too gayam ira nen Apo Shiyos. <sup>14</sup> Jet no sota maypangkep ni ogadi ni si-kamin Hodiyo, nandasinak ka pasiya nem say sota ira ka-idaran ko ja kait ko, ta si-kak, inpakat koy kabaalan ko ja onoren sota ogadi

ira da nonta ap-apok nonta bayag da.

<sup>15</sup> Nem angken nonta ekak pay laeng gayam nay-anak, sigod ja ninemnem nen Apo Shiyos ey kaasi-an towak ali, ja wáray insagana to ja piyan ton dag-en ko di, jet niman, si-kato ma iyay.

<sup>16</sup> Inpa-sas ton mismo son si-kak sota Anak ton si Cristo, ta say piyan ton dag-en ko, ikowan koy maypangkep son Cristo so nonta toon aliwén Hodiyo. Jet manshoki nonta nanpa-sas si Cristo son si-kak, polos ja ekak en nansalsalodsod shi angken sipen too ni maypangkep niya obden inpiyal nen Cristo son si-kak.

<sup>17</sup> Ekak pay dimaw shi Jerusalem ja en nansalodsod so nonta ira kait kon apostol ja epangdon shinotokan nen Jesus ey say si-kak. Say inpasing ko, dimawak ni abos ko shi Arabia asan naka olid Damasko. Jet nontan i in-amtak so niya naka pan-itoro. <sup>18</sup> Jet idi edabas i tedon tawen, dimawak ma shi Jerusalem, ja nak inon-an si Pedro, jet nan-iyanak shiman ni showen domingko. <sup>19</sup> Nem enshiy eshom ma nak inon-an ja apostol, nem eg si Santiago bengat, ja agi nen Apo Jesus.

<sup>20</sup> (Sajay ya insolat ko son si-kayo, amta nen Apo Shiyos ey podno; aliwén o-owap.)

<sup>21</sup> Idi naksheng nga dimawak shi Jerusalem, dimawak ma shi sakop ira ni dogad ja kowan sha ey Siria tan Silisia, jet nonta wára-ak shiman, arawí met sota ira kait kon apostol; isonga ayshiy apostol la enolong son si-kak ja mengashal niya naka pan-itoro.

<sup>22</sup> Angken sota ira emati son Jesus shi ka-ili-ili ja nay-esop shi Jerusalem, eg sha-ak nin inon-an na mismo. <sup>23</sup> Say amtara bengat pangkep son si-kak, in-tenengan sha bengat sota kowan ni eshom ey, “Sota kono emaligat

son si-katejo nontan da, ja si Pablo, toka pan-itoro sota maypangkep ni pamati son Cristo niman. Kaskasshaaw iyay tep istay pineshas ton pokawen sota pamati nontan da!” <sup>24</sup> Isonga si Apo Shiyos i inshayaw sha ni sajay ya shinemag sha maypangkep son si-kak.

## 2

*Angken enshiy apostol la enoro son si-kak, imanogot ira met laeng nodta naka pan-itoro*

<sup>1</sup> Idi naksheng i sampolo tan epat ta tawen, dimawak shi Jerusalem, ja kadwák si Bernabe, tan inodop ko pay si Tito. <sup>2</sup> Dimawak shiman ta si-katoy inpa-amta nen Apo Shiyos ja dag-en ko, jet ekitbalak nin na epangdo so nonta ira emebigbig ja pangolo nonta ira ematid Jerusalem, ni abos sha. Jet siningpet kon sinodsod son si-kara sota maypangkep ni naka pan-itoro so nonta ira toon aliwén Hodiyo, ey angken eg sha onoren sota ogadi min Hodiyo, maysedakan ngo eshan ira. Sajay i inpasing ko say eg mekolkol sota obden dingkak, tan sota obden dag-en ko di. <sup>3</sup> Jet siya, inanogot sha. Angken si Tito, ja inodop ko ja aliwén Hodiyo, eg sha pinidit ja on-onod nodta ogadi min Hodiyo ja kowan sha ey kogit. <sup>4-5</sup> Nem nontan met laeng wáray sinan a-aki shi pamati jet si-karay emengipidit. Sajay iren too, ekiskep iren eg sha inpodno i pangkep sha. Piyan sha karin siiman sota badon ogadi tayo, ta piyan shen i-oli shakito nodta sigod ja ogadi, ja si-kato kono may tongpalen. Nem saja sigod ja ogadi met i singa engipokok son si-kami, jet entapi min ibijag sota wáya tayo ja too ma nen Cristo. Isonga oltimon eg mi

intolok i piyan sha. Eg mi koston medingding sota podnon intoro mi son si-kayon aliwen Hodiyo, say sotan i ontoloy son si-kayo.

<sup>6</sup> Angken sota ira wara nontan ja kebigbiga ni karakdan na emati ey waray saad sha, enshi met i angken sakey ya bilin ja kowan sha ey itobtob ko nodta naka itodtoro son si-kayon aliwen Hodiyo. (Angken ngantoy saad sha, aliwen sotan i epateg son si-kak, ta angken si Apo Shiyos, aliwen sota saad ni too i toka bigbiga.) <sup>7</sup> Enshiy badon bilin ja sha inkowan son si-kak, no diket dineknara ey si-kak i inpiyalan son Apo Shiyos ja mengikowan ni mapteng nga shamag maypangkep son Cristo so ni toon aliwen Hodiyo, ja inges to ngoy inpangipiyal to son Pedro ja mengitoshosho so ni too ja Hodiyo. <sup>8</sup> Ta si Apo Shiyos ja emili son Pedro ja manbedin ni apostol ja mengikowan ni mapteng nga shamag maypangkep son Cristo so nonta ira Hodiyo, si-kato met laeng i emili son si-kak, ja manbedin ni apostol ja mengikowan ni mapteng nga shamag so nonta ira toon aliwen Hodiyo. <sup>9</sup> Jet si Santiago, si Pedro nen Juan, ja emaybidang nga pangolo, inewatan sha ey si Apo Shiyos, kinaasi-an towak ngo, ja inpiyal nen Apo Shiyos son si-kak iyay ya obda. Isonga sinemano-an shakamin Bernabe, jet sotan i ka-asan to ey podnon sankagait kami shi pamati son Cristo. Jet kowan sha ey, "Siya, itodoy joy obdayo so nonta ira aliwen Hodiyo, jet si-kami ngoy mengitoshosho so nonta ira Hodiyo." Kowan sha, <sup>10</sup> jet nontan ma, say inbilin sha son si-kami bengat, kowan sha ey eg mi koma dibkan sota ira Hodiyo sa enshiy mebedin to, no diket mengi-kan kami ni alos ja para son si-kara. Nem si-kato met laeng i wared nemnem

ko ja naka dagdag-a ni olay.

<sup>11</sup> Sakey pay, eg sha-ak intorayan ni kait kon apostol. Idi pinsak ka nanopasiyal si iya Pedro shi siyodad ni Antiok, kinowan ko noman na mismo shi karakdan, ta edawag ja aliwen kosto sota dingka to. <sup>12</sup> Emanbinaliw met i toka pesing! Ta nonta eg pay laeng mimotok sota ira inbetkag nen Santiago ja edapod Jerusalem, ekipengpengan si Pedro so nonta ira aliwen Hodiyo. Nem idi mimotok ira di sota kait ton Hodiyo, inbi-jag ton mekipengan so nonta ira aliwen Hodiyo et in-apil toy bakdang to son si-kara. Ta eman-shanag ey bedawen ira nonta emengipidit ni ogadi ni Hodiyo, no shemagen sha iyay ya inpasing to. <sup>13</sup> Jet nontan ma, sota ira eshom ma Hodiyo, inba-ngat shen inonoran sotan na aliwen koston inpasing nen Pedro, jet angken si Bernabe, imonod ngo. <sup>14</sup> Nem idi inon-an ko ey sajay ya inpasing sha, eg maytotop shi podnon pamati tayo, kinowan kos Pedro shi sango-an shen emin, jet say inkowan ko son si-kato, "Si-kam, Hodiyo ka met, nem say inpasing mo la, singa ken aliwen Hodiyo, ta kaka mekipengan so nonta ira aliwen Hodiyo! Nem apay nga inbi-jag mo ma niman ja mekipengan son si-kara? Satan na dingkam, singa moka panpidita ira sota aliwen Hodiyo ja mengonod ni ogadi tayo! Ta singa piyan mon man-Hodiyo ira nin asan ireka maybilang son si-katejon wared pamati ja Hodiyo!" Sajay i inkowan ko.

<sup>15</sup> Si-kami, nay-anak kamin Hodiyo, aliwen inges mi ira sota toon aliwen Hodiyo ja enshiy Shiyos sha. <sup>16</sup> Nem enshiy mi nandasinan shi eshom, ta edawag ey say kekosto-i so nen Apo Shiyos so ni sakey ya too, sota pamati to bengat so nen Jesucristo, aliwen

sota pengonod to nonta bilin ja in-awat nen Apo Shiyos so nonta apo min Hodiyo nonta bayag da. Jet angken si-kami, emati kami son Jesucristo, jet si-katoy kabol la kinosto-an shakami nen Apo Shiyos; aliwén sota pengonod ni bilin nonta bayag da. Ta sota toon emengonod bengat ni bilin nen Apo Shiyos nonta bayag da, ey enshiy pamati to son Cristo, angken sakey, enshiy en kosto-an nen Apo Shiyos son si-kara. <sup>17</sup> Isonga niman na inpamati mi son Cristo tep piyan min kosto-an shakami nen Apo Shiyos, inamta-an mi ey enshi gayam i mi nandasinan so nonta ira aliwén Hodiyo. Jet sota eshom kono, kowan sha ey singa si Cristo i engi-kan ni basol mi, ta shaka ibilang ey ebadeg i basol ni aliwén Hodiyo ja nay-ingesan mi. Nem aliwén kosto iyay ya nemnem! <sup>18</sup> Say agpayso, no on-oli-ak ja on-onod mowan shi bilin ni Hodiyo, singa naka pan-i-oli sota sigod ja katook ja mabesol. Singa arig to ey bengonen ko sota shineshal kon kowan ko ey enshiy silbi to! <sup>19</sup> Ta sotan na bilin ja in-awat nen Apo Shiyos nonta bayag da, si-katoy singa bimono son si-kak ta ekak baalan na dag-en sota kowan to, jet niman, kowinta ey eteyak maypangkep nontan na bilin, jet say manbiyagak ma son Apo Shiyos. <sup>20</sup> Singa eteyak ja inpakidansara-ak son Cristo shi koros, jet niman, sajay ya biyag ko, aliwén sota sigod, no diket si Cristo iya wára ma son si-kak. Isonga say emengitoshong ni biyag ko niman, sota naka pemati son Cristo ja Anak nen Apo Shiyos. Si-katoy ebadeg i semek to son si-kak, jet si-katoy mismon etey shi koros say ikaro to sota istay ikarok koma. <sup>21</sup> Si-kak, ekak damsisen i kaasi nen Apo Shiyos. No say kekosto-i so nen Apo Shiyos so ni

sakey ya too ket maypangkep ni in-onod to so nonta bilin ja in-awat nen Apo Shiyos nonta bayag da, enshi ngarod i silbi ni inkatey nen Cristo shi koros.

### 3

*Sota pemati son Cristo i kaysedakan, aliwén sota pengonod nonta bilin nonta bayag da*

<sup>1</sup> A, nganto et ngoy inpasing jon tood ta Galasia aya? Eg kayo gayam maka-aw-awat! Ngantoy? Wara gayam i engawis son si-kayo shi apil la pamati, ket inpalewag mi met son si-kayo i inkaydansa nen Jesucristo shi koros! <sup>2</sup> Iyay i piyan kon nemnemen jo. Ngantoy inpasing jon engawat aya ni Ispirito Santo nen Apo Shiyos? Inewat jo aya ja sobadit ni inpangonod jo nonta bilin ja nay-awat so ni Hodiyo nonta bayag da? Enshi — inewat jo nonta inpamatiyo ni intenengan jon mapteng nga shamag ja pangkep son Jesucristo! <sup>3</sup> Nonta pilmiro, sota Ispirito Santo nen Apo Shiyos i timolong son si-kayo, nem niman, kowan jo ey si-kayon mismo i on-anay ja pebadeg so ni pamatiyo, ja eg jo mese-pol i Ispirito Santo. Enshi gayam i nemnem jo! <sup>4</sup> Sata eshakil la ninamtan jo manipod nonta emati kayo son Cristo, enshi aya i silbi to ma son si-kayo? Sapay koma ta wára. <sup>5</sup> Jet si Apo Shiyos, nganto ngarod i kabol ja engi-kanan to so ni Ispirito Santo to son si-kayo, ono ngantoy inemagan to so ni kaskasshaaw son si-kayo? Aliwén sobadit nonta inpangonod jo ni kowan nonta bilin ni Hodiyo, no diket sobadit nonta inpamatiyo son Cristo!

<sup>6</sup> Nemnem jo kari iyay. Sota too nonta bayag da ja si Abraham, emati bengat son Apo Shiyos jet sotan i kinosto-an so nen Apo Shiyos son si-kato. <sup>7</sup> Isonga iyay

komay nemnemen jo. Sota ira toon wáray pamati to, si-kara may maybidang ey poli nen Abraham ja ontawid nonta bindisiyon na inkari nen Apo Shiyos son si-kato. <sup>8</sup> Sigod iyay ya esel nen Apo Shiyos ja naysolat nonta bayag da ja kowan to ey sota ira toon aliwén Hodiyo, kosto-an met laeng nen Apo Shiyos ira maypangkep ni pamatira bengat. Kowan met nen Apo Shiyos son Abraham nontan da ey, “Mapteng aliy panpa-no-an ni totood emin na ka-ili-ili, jet si-kam Abraham i kabol la kaydakaman sha.” Kowan nen Apo Shiyos. <sup>9</sup> Isonga sota ira totoon wáray pamati to, nayda-kam ira nodta bindisiyon nen Apo Shiyos ja inges to si Abraham ni inpamati to.

<sup>10</sup> Sota ira toon emanshinel ngo nodta pengonod sha ni kowan ni bilin nonta bayag da, kenshat ta shosa-en ira nen Apo Shiyos, ta si-katoy naysolat ja esel nen Apo Shiyos, ja kowan to ey, “Meshosa ira sota toon eg mengonod ni olay nonta emin na kowan ni bilin ja naysolat.” Kowan to. Jet angken sipa, enshiy engonod niyay ya emin; <sup>11</sup> isonga edawag ga pasiya ey angken sakey ya too, enshiy en kosto-an nen Apo Shiyos ni pengonod to nonta kowan ni bilin to nonta bayag da. Nem say kowan ni esel et mango nen Apo Shiyos ja naysolat nonta bayag da, kowan to ey, “Sota kinosto-an nen Apo Shiyos ni inpamati to, si-katoy wáray biyag to.” <sup>12</sup> Nem no sota bilin nonta bayag day kowan jo ey onoren jo, mesepol la si-katoy topogen jo, ja aliwa mowan na pamati. Ta say kowan nonta bilin, kowan to ey kenshat ta si-kato ngoy metongpal asan kitaka may-akni ni biyag. <sup>13</sup> Isonga say pantongpala nonta toon emanshinel so nonta bilin nonta bayag da, kenshat ta meshosa, ta si-

kato i kowan met laeng ni bilin. Nem si Cristo, si-katoy mismon engikesho ni istay keshosa tayo koma; isonga niman, ewaya kito ma. Maybidang nga si-kato et ngo mowan i eshosa ni inkayba-jat tod koros, ta say kowan nonta esel nen Apo Shiyos ja naysolat nonta bayag da, kowan to ey, “No sipen too i mayba-jat shi kiyew, si-katoy ka-asan to ey eshosa.” <sup>14</sup> Sajay i inpasing nen Jesucristo say si-kayon aliwén Hodiyo, no memati kayo son Cristo, mayda-kam kayo nodta bindisiyon nen Apo Shiyos so nen Abraham, tan say ewaten tayon emin sota inkari ton Ispirito Santo to.

<sup>15</sup> A-akik, iyay i ikowan kon arig. Nemnem jo kari sota kepesing ira nonta wáray itawid to. No meksheng nga epilma-an ma sota papidis, angken sipa, eg to mebedin na sa-datan, ono a-shoman. <sup>16-18</sup> Iyay i olog nontan den arig. Sota kari nen Apo Shiyos ja inkari to son Abraham, si-kato ni olay; eg mebedin na sheshalen nonta bilin ton inpan-onod to. Ta sotan na bilin, na-onod ja arawi ni epat ta dasos tan tedon polon tawen asan may-awat. No kaspangarigan, say bindisiyon nen Apo Shiyos ja inkari to ey i-akan to ket, i-akan to ja sobadit ni pengonod tayo nonta kowan ni bilin to, aliwa malen kari i itsora to, ta singa naydigatan. Nem say pengewat tayo nonta bindisiyon nen Apo Shiyos, si-katoy tongpal nonta kari to son Abraham.

(Say sakey pay ya kaytoshongan nonta arig ga inkowan ko la, sota ira kari nen Apo Shiyos, si Abraham i nay-awatan to, tan sota poli to. Nem eg inkowan nen Apo Shiyos ey sota eshakel la poli ali nen Abraham i i-awatan to so, no diket sakey bengat ja poli to, jet say kaytoshongan nonta sakey ya poli ja kowan nen Apo Shiyos, si



Cristo.)

<sup>19</sup> Nem apay ngarod nga intobtob nen Apo Shiyos iya bilin to so nodta epangdon kari to son Abraham? Naytobtob nin ta say amta-en ni too nonta bayag da ey eg to koston manbesol i too. Nem sajay, aliwa komen ingkatod ingka, no diket menginteg koma nodta imotok ali nonta poli nen Abraham ja naykari-an nonta kari. Say inpangikari to son Abraham, mismon inkowan to, nem say itsora nonta bilin, in-awat ira ni anghil so nen Moises, jet si-kato ngoy engi-wat so ni totood Israel. <sup>20</sup> Isonga mapmapteng i kari ta sakey nen Apo Shiyos ja engi-wat so, ta no wara pay laeng i eshom ja mengi-wat so, aliwen diritso.

<sup>21</sup> Nem sajay ya inkowan ko, aliwen piyan kon ikowan ey maykontra sota bilin ja in-awat nen Apo Shiyos nodta kari to met laeng son Abraham. Enshi, arawi iyay ya nemnem. Tep say agpayso, say bilin tan kari, aliwen nan-inges i pangkep sha. Istay mebedin emon say kosto-an so nen Apo Shiyos so ni too, sota pengonod to nonta kowan ni bilin to, nem apil, aliwen sotan i pangkep to. Say itsora nonta bilin na in-awat nen Apo Shiyos, eg mengi-kan ni biyag, <sup>22</sup> no diket say kowan ni bilin nen Apo Shiyos ja naysolat, istay meshosa komen emin i totoo ta nanpanbasol ira. Inkowan to iyay say ewatan sha ey aliwen sota pengonod ni bilin i kaydakaman ni too nodta inkari nen Apo Shiyos, no diket medepod pamati son Jesucristo. Isonga niman, nayda-kam kito ta emati kito son Jesucristo.

<sup>23</sup> Nonta eg mimotok pay laeng sota pamati son Cristo, enshiy waya tayo, singa naypokok kito nodta sigod ja bilin, ingkatod imotok koma nontan na pamati.

<sup>24</sup> Sota bilin, si-katoy singa emengajowan, tan emengitosho son si-katejo ingkatod eg pay nin mimotok si Cristo, say no onsabi sota timpon pemati tayo son si-kato, si-katoy kosto-an shakito so ma nen Apo Shiyos. <sup>25</sup> Nem niman, ta wara ma iya pamati, eg mesepol sota bilin ja singa istay emengajowan son si-katejo.

<sup>26</sup> Jet si-kayon aliwen Hodiyo, ta emati kayo ngo son Cristo, anak shakejo ma nen Apo Shiyos, jet emin kito ma, nan-i-inges sa wara kito son si-kato. <sup>27</sup> Ta sota emin son si-kayon ebonjagan, ja wara ma son Cristo, nanbalin kayon inges nen Cristo ja annak nen Apo Shiyos. <sup>28</sup> Isonga si-kayon wara son Cristo, nansak-sakey kayod pamati; enshiy en nandasinan ni sakey tan sakey — Hodiyo man ono aliwen Hodiyo, бага-en man ono aliwen бага-en, daleki ono bibii. <sup>29</sup> Niman na emati kayo son Cristo, si-kayo i podno ja poli da nen Abraham, ta mayda-kam kayon mengewat nonta inkari nen Apo Shiyos son si-kato.

## 4

<sup>1</sup> Iyay pay i ikowan ko son si-kayo ja maypangkep nonta bilin ja nay-awat so ni Hodiyo nonta bayag da. Iyay i kay-eshigan to. Sota nga-nga ja waray tawid to nem kolang i tawen to pay laeng, singa enshiy to nandasinan nodta бага-en, angken pay no si-katoy makakokowa ali nonta tawid. <sup>2</sup> Enshiy to nandasinan, ta wara pay laeng i emengajowan son si-kato. Nem no onsabi sota timpo ja inkowan nen ameto ey i-elbat to so nontan na tawid, ewaya ma. <sup>3</sup> Sajay i kay-eshigan to son si-katejo. Nonta aneng alis Cristo, singa a-anak kitan emin. Say enanggal son si-katejo, sota ira ogadi ja kaitoro met laeng ni

kait tayon too. <sup>4</sup> Nem idi simabi ma sota koston timpo, inbetkag nen Apo Shiyos ali sota Anak to. Jet sajay ya Anak to, in-anak ni bii jet sinekohan nonta bilin ni Hodiyo manipod nonta inkay-anak to. <sup>5</sup> Jet say kabol la nay-anakan to ali, say to ibolos sota ira may-eshig ey inpokok nontan na bilin, say koston maybidang kito ma ey annak nen Apo Shiyos.

<sup>6</sup> Niman ma, annak shakejo nen Apo Shiyos; isonga inbetkag to sota Ispirito Santo ni Anak to ja man-iyen shi poso tayo. Jet sajay i amta-an tayo so ey Ametayo ma si Apo Shiyos. <sup>7</sup> Jet isonga niman ma, aliwen baga-en i sakey tan sakey son si-kayo, no diket annak shakejo nen Apo Shiyos, jet sota ira annak to, mekitewid iren mayda-kam son Cristo.

<sup>8</sup> Nontan da, eg jo amta si Apo Shiyos, isonga say istay joka panshedjawi, saja ira kompormin sinan shiyos. <sup>9</sup> Nem niman ma, ta amtayo si Apo Shiyos, tan si Apo Shiyos ngo, tokejoka ibilang ma ey annak tokejo, apay nga on-oli kayo mowan nodta ogadin enshiy silbi to ja kaitoro met laeng ni kait ta too? Apay, piyan jo ayen manbedin mowan na singa baga-en? <sup>10</sup> In-eshom jo et sota ogadi ni Hodiyo shita mapteng nga pamatiyo son Cristo! Angken sota ira akew, bolan, tawen, tan sota ira piyastara, joka mala ngidina. <sup>11</sup> Naka manshanag, ta baka sota inbandigat kon engi-obda ni pansighsan jo ket, enshiy to panpa-nan.

<sup>12</sup> A-akik, iyay i kekshawen ko son si-kayo. Si-kak koma i onoran jo, ja eg manshinel nodta bilin ni Hodiyo. Ta singa inonoran takejo ngon aliwen Hodiyo nonta emati-ak son Cristo, ta ekak mala patkan sota bilin nonta bayag da. Mapteng met i inpasing jo son si-kak nontan, <sup>13</sup> angken

nonta pilmiro. Amtayo met no ngantoy engitoshon-an ko son si-kayo ni mapteng nga shamag, ta waray sakit ni bakdang ko. <sup>14</sup> Nem angken ekapoy i bakdang ko nontan, inenosan jowak, eg jowak binedaw, ono dinamsis. Sajay i sakey ya kepeshasan jo no ewaten jowak, nem inewat jowak ja waray pateg ko son si-kayo; inbilang jowak pay ja singa anghil nen Apo Shiyos, ono si Cristo Jesus ja mismo. <sup>15</sup> Jet towa da niman sota imdeng jo son si-kak nontan? Amtak ey nontan, no mebedin koma, singa okiten joy matejo pay jet i-akan jo son si-kak. <sup>16</sup> Nem niman ma, ngaaw jowak ta diritso i inpasing kon nan-esel son si-kayo.

<sup>17</sup> Sota ira emenogsog son si-kayo, mapteng ni olay i shaka ikokowan son si-kayo, nem apil i pangkep sha. Piyan shen isi-jan shakejo son si-kami, say si-karay songoren jo. <sup>18</sup> Mapteng met kitdi, no waray makapiyan son si-kayon pasiya, nem mesepol la mapteng ni olay sota pangkep sha; tan mesepol la kanayon, aliwen sota kawashak son si-kayo bengat. <sup>19</sup> Ara! Singa mesepol mowan na mandikatak ja mengi-odi son si-kayo nodta sigod ja pinatiyo. Piyan kon pasiya ja si Cristoy mengitoshay son si-kayo. Si-kayon naka ikarin annak ko shi pamati, <sup>20</sup> no mebedin koma, angken niman, piyan kon asen takejo, say mekitbalak son si-kayon mismo, balang nem ma-amta-an ja kosto iya eg tayo pan-i-inawatan.

<sup>21</sup> Niman, iyay i ikowan ko son si-kayon makapiyan ja sekopan ni bilin ni Hodiyo. Apay eg jo aya ewatan sota kowan nontan na bilin? <sup>22</sup> Wara met i naysolat ja nay-arigan ni panpidi-an tayon pemat. Sajay sota maypangkep nonta showen inpotot nen Abra-

ham. Sota sakey, inpotot tod biin baga-en, jet sota sakey, inpotot tod biin aliwén baga-en. <sup>23</sup> Jet sota in-anak nonta biin baga-en, aliwén sotan i inkari nen Apo Shiyos son Abraham ja ipotot to. Nem sota inkarin Apo Shiyos son si-kato ja ipotot to, si-kato sota in-anak nonta biin aliwén baga-en. <sup>24-25</sup> Sajay ya edaga nontan da, si-katoy i-arigan ko so niya inkowan ko la. Sota showen bii, si-kato ngoy kaytoshongan nonta showen inpasing nen Apo Shiyos. Sota sakey, si-katoy bilin nonta bayag da ja nay-awat shi shontog shi Arabia ja kowan sha ey Sinai. Sajay i may-eshig so nen Hagar, ja baga-en na inpa-anak nen Abraham. Sota anak to, baga-en met laeng, jet sajay i kay-ingesan ira ni tood Jerusalem niman ja intorayan ni bilin nonta bayag da. Ta singa baga-en ira. <sup>26</sup> Nem si-katejo, aliwén baga-en kito, ta sota inetayo aliwén baga-en; sotan, may-eshig ey sota Jerusalem ja edapod dangit. <sup>27</sup> Ta say kowan nonta esel nen Apo Shiyos ja naysolat, kowan to ey, “Pan-imdeng ka, si-kam ma biin eg to pineshas ja on-anak. Iked-sang moy keljaw mo ni imdeng mo, ta angken eg mo dina-kaman i digat ni pan-enak, si-kam et ngo mowan i singa eshakil i annak to, nem say sota waray asewa to.”

<sup>28</sup> Jet niman, a-akik, inges tayos Isaac ja anak nen Abraham tep si-katoy tongpal nonta kari nen Apo Shiyos son Abraham. <sup>29</sup> Jet sakey pay ya nay-ingesan tayo son Isaac nontan da, kitoka mepedigat ja inges tos Isaac. Ta si Isaac nontan da, sota Ispirito Santo nen Apo Shiyos i kabol ni nay-anakan to, nem pinedigat nonta agi ton nay-anak ka kenshat, ja eg inkari nen Apo Shiyos. Jet ingkato niman, sotan ni olay. <sup>30</sup> Nem say kowan nonta esel nen Apo Shiyos nonta

bayag da son Abraham, kowan to ey, “Pabtik mo sota biin baga-en, pati sota anak to, ta sota anak to, eg mebedin na mekibingay nonta tawid nonta anak ni biin aliwén baga-en.” Kowan to. <sup>31</sup> Isonga si-kayon a-akik, iyay koma i nem-nemnemen jo. Sota may-eshig ey maka-anak son si-katejo, aliwén biin baga-en.

## 5

<sup>1</sup> Isonga niman, aliwén singa baga-en kito ma ja inpokok ni bilin nonta bayag da, ta inbolos shakito nen Cristo. Jet eg to koston on-oli kiton manngeshan mowan ni baga-en. Isonga karejo itolok ja pesakbat shay digat ni bilin nonta bayag da son si-kayo.

<sup>2</sup> Si-kak si Pablo, jet sajay alin ikowan ko, aliwén pampa-maayan: nemnennem jo. No itolok joy kowan sha, ja onoren jo sota ogadi ni Hodiyo, en-shi malay jo kaybibiyangan son Cristo. <sup>3</sup> Asan iyay pay i ikowan ko. Sota ira toon on-onod ni sakey ya ogadi ni Hodiyo, may-eshig ey singa naypagod ira ta mesepol la onoren shen emin sota bilin ni Hodiyo. <sup>4</sup> Sota toon kowan to ey say kosto-an son Apo Shiyos ket, sota pengonod to ni kowan ni bilin ni Hodiyo, naysi-jan et ngo mowan son Cristo, ta ibiyang toy kaasi nen Apo Shiyos. <sup>5</sup> Nem si-katejo, waray namnama tayo ey kosto-an shakito di nen Apo Shiyos shi ka-onoran na timpo, jet sotan i tayoka segsegsha ni olay. Wara sota Ispirito Santo nen Apo Shiyos son si-katejo, tan wara kito pay shi pamati, isonga sajay i itsora ni namnama tayo. <sup>6</sup> Jet no memati kito son Cristo, say epateg bengat ja nemnemen tayo, sota pamati son si-kato. Ta sotan na pamati, si-katoy kedepo-i ni semek. No sota maypangkep ni pengonod nonta bilin ni Hodiyo,

enshiy to naykamitan shi pamati son Cristo.

<sup>7</sup> Makedsang met i pamatiyo son Cristo nonta pilmiro, nem wára gayam i toon inbabaki son si-kayo; isonga singa eg jo ma onoren sota intorok ka podno. <sup>8</sup> Sajay ya inbangawis sha son si-kayo, esel sha bengat; aliwén edapo son Apo Shiyos ja engawis son si-kayod koston pamati. <sup>9</sup> Asas jo, baka ma-edinan kayo ni kowan sha, ta inges niyay sota kowan tayo ey, “Angkena ootik ka bobod, edinan ton emin i kayboboran to.” <sup>10</sup> Jet wáray namnamak son Apo Jesus ni maypangkep son si-kayo ey sota kowan ko i pati-en jo met laeng nem anongosto, aliwén sota kowan ni eshom. Jet sota toon emengadilaw son si-kayo, kenshat ta shosa-en ali nen Apo Shiyos, angken ngantoy katoo to.

<sup>11</sup> Si-kayon a-akik shi pamati, no bilang ey si-kak ket itorok pay laeng i maypangkep ni ogadi ni Hodiyo ja ikowan ko ey si-kato et ngo mowan i epateg, istay eg shak pedigaten ni Hodiyo, ta enshiy kesekitan ni nemnem sha; ekak mengitoshon nonta maypangkep ni koros nen Cristo. <sup>12</sup> Nem say kowan ko, angka et nem sota emengadilaw son si-kayo, mama-en sha sota ogadiren kogit: angken pankeponan sha shorog i bakdang sha!

*Ewáya kiton emati son Cristo, nem aliwén piyan ton a-selen na bolos i pandeka tayo ni kompormi*

<sup>13</sup> A-akik shi pamati, say kabol la pinidi-an shakejo so nen Apo Shiyos, say mewedja-an kayo, nem sajay ya wáya, aliwén jo koma osalen shi pipiyan jon dag-en ja ngaaw. No diket say pesing jo et mango, ipa-sas joy semek jo ni sakey tan sakey son si-kayo ni joka pantitiniolong. <sup>14</sup> Ta sota emin na bilin nen Apo Shiyos,

sakey bengat i esa-nopan ton esel, jet si-kato iyay: “Semek moy kait mon too ja inges toy moka penmek ni bakdang mo.” <sup>15</sup> Nem no mankikinalat kayo ja singa aso, tan sekitan joy eshom, asas jo ta baka sheshalen joy joka pankagait.

<sup>16</sup> Isonga kowan ko ey itodok joy Ispirito Santo nen Apo Shiyos ja mengiredan son si-kayo, say eg jo onoren sota pipiyan ni bakdang jon dag-en ja ngaaw. <sup>17</sup> Ta sota ngaaw wa pipiyan ni bakdang nga dag-en, maykontra shi piyan ni Ispirito Santo. Sota piyan ni Ispirito Santo, eg ngo piyan ni bakdang nga dag-en. Sajay ya showa, eg man-inawatan, isonga emedingding sota piyan jon dag-en ja mapteng. <sup>18</sup> Nem no sota Ispirito Santo nen Apo Shiyos i mengiredan son si-kayo, ewáya kayo ma ta eg shakejo ma sekopan ni bilin nonta bayag da.

<sup>19</sup> Sota aramid ja na-alas ja pipiyan ni bakdang nga dag-en, edawag, jet si-kato ira jay: sota pemii ono kompormin ensekig ga aramid, pandeka ni ngaaw ja mengibiyang ni kowan ni eshom, <sup>20</sup> panshedjaw shi sinan shiyos, panmantala, sota igem, babakal, apal, bonget, isew, eg peki-olnos shi eshom, <sup>21</sup> pengamkam ni kokowa ni eshom, panboteng, edaos ja pandadsak, tan wára pay i eshom ma banag ja inges niyay ya ngaaw. Ipinshowak mowan iya inkowan ko nontan son si-kayo, ey sota sajay i aramid to, eg ira mayda-kam shi pantoshayan nen Apo Shiyos ali.

<sup>22</sup> Nem sota toon kaishalan ni Ispirito Santo nen Apo Shiyos, iyay iray ma-sas son si-kato: semek, imdeng, talna, anos, pengaasi, mapteng nga nemnem, tan emepiyal pay; <sup>23</sup> amta ton memesinsiya ni eshom, tan amta

ton tetngelen shorog i bakdang to. Sajay iren ogadi, emayto-top shi emin na bilin nen Apo Shiyos. <sup>24</sup> Sota toon wára son Cristo Jesus, singa inpakilansara shi koros sota ngaaw wa ogadira, pati sota ngaaw ja istay pipiyan sha, jet inbiyang sha ma sotan iren ngaaw. <sup>25</sup> Jet sota Ispirito Santo nen Apo Shiyos i engi-kan ni biyag tayo, isonga mesepol ngon si-katoy mengiredan son si-katejo. <sup>26</sup> Aliwén kito koma mandastog, ja mengi-kan ni bongetan ni kait, ono mengi-kan ni epalan to.

## 6

<sup>1-2</sup> Si-kayon a-akik shi pamati, no wáray toon na-amta-an ey wáray ngaaw wa aramid to, si-kayo ja inshalan ni Ispirito Santo nen Apo Shiyos, i-odiyo shi panmaptengan to. Nem mesepol la mapteng i pesing jon mengisingpet, karejo ida-karan. No diket isekit joy sakey tan sakey son si-kayo, say metongpal i bilin nen Cristo. Nem asas jo et mango i bakdang jo, ta baka angken si-kayo, on-onod kayon mandeka ni ngaaw. <sup>3</sup> Sota toon kowan to ey makedsang i pamati to, nem enshi kari, naytopo sotan na nemnem, jet si-katoy mesepol la mantanshaan. <sup>4</sup> Isonga mesepol la nemnemen joy bakdang jo, no sota joka dagdag-a ket wáray pateg to ngo. Tep sota pandekayo ni mapteng komay mengi-kan ni panimdengan jo, aliwén sota inpanbasol ni kait jo. <sup>5</sup> Sajay i mesepol, ta emin kito, si-katejoy onsongbat son Apo Shiyos ni nankolongan tayo.

<sup>6</sup> Sota toon etod-an ni maypangkep ni esel nen Apo Shiyos, no ngarantoy wára son si-kato ja mapteng, mesepol la ibingayan to koma ngo sota enoro son si-kato shi pamati.

<sup>7</sup> Karekayo pa-adilaw, ta si Apo Shiyos, amta ton emin, angken nganto; eg may-owapan. Isonga no ngarantoy dingka ni too, si-kato ngoy epiten to. <sup>8</sup> No sota toon say toka nemnemnema bengat ket sota maypangkep ni ngaaw wa aramid, say epiten to, patey ja enshiy to engintegangan. Nem sota toon say toka onora ket, sota pengitoshong ni Ispirito Santo nen Apo Shiyos son si-kato, say epiten to, biyag ja enshiy to engintegangan. <sup>9</sup> Isonga eg kito koma on-ekdas ja mandeka ni mapteng, ta no onsabi sota koston timpo, wáray epiten tayo no eg kito on-ekdas. <sup>10</sup> Isonga mesepol la ishingangan tayo ni olay ja mandeka ni mapteng so ni emin na too, agdalo so nonta ira a-aki tayod pamati.

<sup>11</sup> Kakembaleg i inkaysolat niya na-onod ja parti niya solat: si-kak ka mismoy engisodat. Epateg i piyan kon ikowan shiyay, isonga nemnemnem jon pasiya. <sup>12</sup> Sota ira toon ememidit son si-kayo ja on-onod shi ogadi ni Hodiyo, say pangkep sha, kowan sha ey say ishayaw ni kait sha ira ni sajay ya inpasing shen ememidit son si-kayo, tan say eg ira maydakam nodta toon mepedigat kabol nonta inpamatira nonta inkatey nen Cristo shi koros. <sup>13</sup> Nem angken sota ira imonod so ni ogadi ni Hodiyo, eg sha met laeng patkan shorog sota bilin ni Hodiyo. Nem piyan shen si-kayo i on-onod ni ogadi, say wáray idastog sha ey imonod kayo son si-kara. <sup>14</sup> Nem si-kak, enshiy nak idastog ja kompormin banag, nem eg say naka idastog bengat, sota inkaydansa nen Apo Jesucristo shi koros. Isonga son si-kak niman, na-kal i pateg nonta sigod ja naka patkid ja dobong. Jet angken sota tood dobong ja istay ya wáray pateg sha son si-kak, enshi mala tep say kapatkan son si-kak, sota

koros nen Cristo. <sup>15</sup> Ta no wára kito son Cristo, say epateg bengat ja nemnemen, sota binado-an nen Apo Shiyos ja biyag tayo, aliwén sota pengonod ni ogadi ni Hodiyo ono sota eg pengonod i epateg. <sup>16</sup> Si-kayon emengonod niyay ya bilin ja inkowan ko son si-kayo, say shawat ko son Apo Shiyos, sapay koma ta kaasi-an tokejo, tan ma-shoman sota talna ja wára son si-kayo. Jet sajay i shawat ko ngo para so ni emin na too nen Apo Shiyos, angken ngantoy katoo to.

<sup>17</sup> Manshoki niman, sapay koma ta enshi may en mengi-kan son si-kak ni digat. Pinedigat sha-ak pay maypangkep son Cristo, jet iyay iray kabat shi bakdang ko ja kasan to.

<sup>18</sup> Niman a-akik, say shawat ko son Apo Shiyos, sota kaasi nen Apo Jesucristo ja wára son si-kayo, sapay koma ta si-katoy mengitoshong ni nemnem jo. Siya, satan da.

## SOTA SOLAT NEN SAN PABLO PARA SO NONTA IRA I-IPISO

1-2 Si-kak si Pablo ja makasolat niyay et sajay ya solat ko, para son si-kayon kait kon too nen Apo Shiyos ja wared siyodad ni Ipiiso, ja makedsang i pamati to so nen Cristo Jesus. Jet say shawat ko son Apo Shiyos, sapay koma ta kaasi-an tokejo, tan a-shoman to sota talna ja wara son si-kayo ja edapo met laeng son si-kato ja Ametayo, tan si Apo Jesucristo. Itnengi jo iyay ya ikowan ko tep si-kak i sakey ya apostol nen Cristo Jesus, jet si Apo Shiyos i mismon enotok son si-kak.

*Naka man-iyaman ni olay son Apo Shiyos tep asdeg toy kaasin in-akan to son si-katejo*

<sup>3</sup> Man-iyaman kito ni olay so nen Apo Shiyos ja Ama nen Jesucristo ja Apo tayo, ta si Apo Shiyos, in-aknan shakito ni eshakil la kalasin bindisiyon, ta too kito ma shi dangit, kabol ni inpamati tayo so nen Cristo. <sup>4</sup> Nonta eg pay laeng epalsowa iya dobong, sigod pay laeng ja pinidi shakito ja memati so nen Cristo, say enshiy tayo kebedawan, ono tayo pankodangan, ni pengidmang to son si-katejo. <sup>5</sup> Si Apo Shiyos, sigod ja waray semek to; isonga ninemnem to ey pidi-en shakito ja annak to maypangkep so nen Jesucristo. Sajay i dingka to ta piyan to, <sup>6</sup> ja man-iyaman kito son si-kato nonta ebadeg ga kaasi to ja asdeg ton in-akan to son si-katejo, ta wara kitejo so nen Jesucristo ja epateg ga Anak to. <sup>7</sup> Say ewaya-an tayo, ono epakawanen ni basol tayo, kabol ni shala nen Jesus ja imayos shi koros nonta inkatey to. Sajay i inpasing nen Apo Shiyos

son si-katejo ta ebadeg i kaasi to. <sup>8-9</sup> Sajay ya kaasi to son si-katejo, asdeg to, jet say nantong-palan to, na-shoman ma sota amta tayo maypangkep son si-kato, tan tayoka ewati pay no ngarantoy wared nemnem to. Inpa-amta to niman son si-katejo sota nemnem ton istay enshiy maka-amta so. Sajay ya plano to, ninemnem to ngo eshan ey tongpalen to ni ibetkag to so ali nen Cristo son si-katejo, <sup>10</sup> tep sotan may koston timpo. Jet say plano tod nemnem to, emin sota wared dangit, tan saja wared ja dobong, mansek-sekey ira so nen Cristo.

<sup>11</sup> Sigod ja wara ngo eshan i plano nen Apo Shiyos ey pidi-en shakito ja too to, kabol son Cristo. Sajay i edaga ta si-katoy piyan nen Apo Shiyos, jet no ngarantoy wared nemnem nen Apo Shiyos, si-katoy toka dag-a. <sup>12</sup> Jet say sigod ja wared nemnem nen Apo Shiyos, piyan ton si-kamin epangdon emati so nen Cristo, sota pesing min mansil-silbi, si-katoy kabol ni kayshed-jawan to, pangkep nonta panakabalin to. <sup>13</sup> Jet niman, wara kayo ngo son si-kato. Intenengan jo sota podnon esel nen Apo Shiyos, ja engipa-amta ni kaysedakan jo et emati kayo son Cristo. Jet si Apo Shiyos, in-awat to sota inkari ton Ispirito Santo say man-iyaman son si-kayo, ja singa malka to son si-kayo ja mengipa-sas ey kokowa shakejo ma. <sup>14</sup> Sota Ispirito Santo nen Apo Shiyos, ja nay-awat son si-katejo, si-katoy amta-an tayo so ey sota kari nen Apo Shiyos son si-katejo, tongpalen to. Jet wara sota Ispirito Santo to son si-katejo ingkatod annayen to pay sota inkaysalakan tayo. Isonga man-iyaman kito son Apo Shiyos maypangkep nonta ebadeg ga panakabalin to.

<sup>15</sup> Isonga nonta shinemag ko

sota maypangkep ni ebadeg ga pamatiyo so nen Apo Jesus, tan kowan sha ey ebadeg konoy semek jo so ni emin na kait jon ememati, <sup>16</sup> naka man-iyaman ni olay son Apo Shiyos pangkep son si-kayo, tan naka ishawshawat pay son si-kato i pansigshan jo. <sup>17</sup> Jet kowan ko ni shawat ko so nen Apo Shiyos ja Kangeto-an, ja Ama nen Apo Jesucristo, ey si-kato komay mengi-kan ni daing son si-kayo ja medepo son si-kato, tan ipa-amta to pay ya emin i maypangkep ni pamati, say ewatan jo pay i maypangkep son si-kato. <sup>18</sup> Say shawat ko pay so nen Apo Shiyos, si-kato komay ondawag ni nemnem jo say ewatan jo sota maypangkep ni namnama ja wara son si-kayo ni inpili shakejo so, tan ewatan jo pay sota mapteng nga kari to, ey mayda-kam kayo son Cristo ali, ta totoo tokayo. <sup>19-20</sup> Say sakey pay ya shawat ko para son si-kayo, ewatan jo komay itsora nonta panakabalin nen Apo Shiyos ja wara son si-katejon ememati son Cristo. Enshiy maka-inges so, jet sotan na panakabalin to, si-katoy mismon inosal to ni inpanbiyag to so nen Cristo shi patey. Jet idi inpanbiyag to, inpanbalin ton inges ton Kangeto-an; isonga inpatongaw to shima apit ni kanawan to shima dangit ja kawad-an to. <sup>21</sup> Jet angken sipen toray, ono ap-apo, ono sota kowan to ey waray panakabalin to, ono pangolo, ono ngarantoy kaishayaw ni too, si Cristo, si-kato ngo eshan i engitoshay son sikaren emin shi dangit. Jet aliwen niman bengat ja si-katoy Kangeto-an so ni emin, no diket si-katoy Kangeto-an ngo eshan ingkatod ingka. <sup>22</sup> Si Apo Shiyos, si-kato met laeng i engipilmi ey emin na banag, si Cristo i mengitoshay, tan si-katoy inpanbalin ton pan-

golo tayon emin ja emati. Si-katoy singa toktok, <sup>23</sup> jet si-katejon emati, si-katejoy may-eshig ey bakdang to, jet emin sota wara son Cristo, wara ngo son si-katejo. Jet si Cristo ngo, enshiy kolang ni toka i-akan son si-katejon emin.

## 2

*Singa etey kito, nem inpanbiyag shakito nen Apo Shiyos*

<sup>1</sup> Nonta eg kayo pay laeng emati, may-eshig ey singa etey kayo kabol ni basol jo. Nem niman, si Apo Shiyos, inpanbiyag shakejo. <sup>2</sup> Nontan, say joka on-onora, sota ngaaw wa aramid, ja inges ni aramid ira nonta karakdan na tood dobong ja eg memati son Apo Shiyos, jet angken sota panakabalin nonta eg ma-sas ja si Satanas, istay ya joka patia. Si Satanas i emengitoshong niman so nonta ira emenopngil so nen Apo Shiyos. <sup>3</sup> Jet angken si-katejo nonta eg kito pay laeng nin emati, inges tayoy itsora shen ngaaw. No ngantoy piyan tayo, ono nemnemen tayo, si-katoy dagen tayo. Sajay ya ogadin ngaaw, si-katoy kabol la istay shosa-an shakito so nen Apo Shiyos, ja inges toy shosa-an to so ni eshom. <sup>4</sup> Nem si Apo Shiyos, ebadeg i semek to son si-katejo tan ebadeg i kaasi to; <sup>5</sup> isonga angken singa etey kito kabol ni basol tayo, say inpasing to, inda-kam shakito so nen Cristo ja nay-aknan ni biyag. Isonga say naysalakanan tayo, sota maypangkep ni kaasi nen Apo Shiyos. <sup>6</sup> Jet niman, may-eshig ey ebiyag kito mowan, ja naydakam son Cristo ni inpan-ongal to, jet may-eshig ey inpanbalin shakito men kait nen Cristo Jesus ja mantoshay shi dangit. <sup>7</sup> Sajay i inpasing to say ma-sas ingkatod ingka sota ebadeg ga kaasi to son si-katejo, ja enshiy maka-



inges so. Jet say naykabolán tayo ni kaasi to, si Cristo. <sup>8</sup> Si Apo Shiyos, manangaasi, isonga insalakan shakejo maypangkep ni pamatiyo so nen Cristo. Aliwén sobadit ni dingkayon mapteng i inkaysalakan jo, no diket dibshin in-akan nen Apo Shiyos. <sup>9</sup> Sajay i inpasing nen Apo Shiyos ta say enshiy ondestog ey say naysalakanan to, sota maypangkep ni dingka ton mapteng. <sup>10</sup> Ta si Apo Shiyos met i emalsowa son si-katejo; jet niman ma, singa bado kiton palsowa ni inpamati tayo so nen Cristo, jet piyan nen Apo Shiyos ey sota mapteng i onoren tayo, ta sigod ja sotan i plano to ja piyan ton dag-en tayo.

*Inpansaksakey shakito nen Apo Shiyos shi pamati son Cristo*

<sup>11</sup> Jet si-kayon aliwén Hodiyo, nemnem jo sota sigod ja kasesaad jo. Endedamsis shakejo nonta Hodiyo, ja kowan sha ey enshiy Shiyos jo, ta eg jo onoren sota ogadira ja kowan sha ey kogit. <sup>12</sup> Tan nontan pay laeng ja enshi kayo nin so nen Cristo, enshiy jo naybiyangan so nonta ira too nen Apo Shiyos ja Hodiyo, eg jo pay amta tan eg kayo nayda-kam nodta kari nen Apo Shiyos; isonga istay enshin polos son si-kayoy namnama, ta eg jo amtay podnon Shiyos. <sup>13</sup> Nem niman, ta wára kayo son Cristo Jesus, si-kayon aliwén Hodiyo ja istay aráwi so nen Apo Shiyos, nay-eshom kayo ma so ni too to, kabol nonta in-ayos ni shala nen Cristo shi koros. <sup>14</sup> Si Cristo, si-katoy engi-kan ni talna tayon Hodiyo tan aliwén Hodiyo, say manseksekey kito, ta sota istay eg tayo pan-i-inawatan, ja sima-din, ingkal to. <sup>15</sup> Say inpasing to ni inkatey to, sina-datan to sota sigod ja bilin to son si-kamin Hodiyo, tan sota maypangkep ni

dinteg mi, ja aliwén sotan komay mepati, say si-kamin Hodiyo, tan si-kayon aliwén Hodiyo, panseksekey shakito ma ni inpamati tayo son si-kato. Isonga si Cristoy emengi-kan ni tayoka pan-i-inawati tep sakey may pamati tayo. <sup>16</sup> Sota inkatey tod koros i engisop son si-katejon emin son Apo Shiyos — Hodiyo ono aliwén Hodiyo — say manseksekey kito. Isonga na-kal ma sota istay eg tayo pan-i-inawatan. <sup>17</sup> Isonga si Cristo, dimaw ali son si-katejon emin — aliwén Hodiyo ja aráwi son Apo Shiyos, tan kasta met son si-kamin Hodiyo ja sigod ja too to — say amta-en tayoy maypangkep ni talna. <sup>18</sup> Amtayo ey agpayso iyay tep pineshas jo. Saksakey met i Ispirito Santo nen Apo Shiyos ja wára son si-katejo et sotan i naymongsanán tayon emin ja on-esop son Apo Shiyos ja Ametayo, niman na inpamati tayo ma son Cristo.

<sup>19</sup> Isonga niman ma, si-kayon aliwén Hodiyo, nayda-kam kayo so nen Apo Shiyos. Jet naybilang kayo ma son si-kato, tan naykait kayo ma so nonta ira sigod ja too to. Naybilang kayo pay ey pamilja to. <sup>20-21</sup> Si-katejon too nen Apo Shiyos, may-eshig kitod baley ya naypilmid na-det ta bato. Say arig nonta na-det ta bato ja naypirmi-an tayo, sota intoro ira nonta apostol, tan para padto. Si Cristo Jesus i singa enapaja nonta baton naysaashan tayo, jet emin son si-katejon emati son Apo Jesus, singa nanmomongsan kitejo ngo son si-kato. Jet no anongosto ma, singa manbedin ni Timplo nen Apo Shiyos. <sup>22</sup> Angken si-kayon aliwén Hodiyo, ekila-kam kayo nodtan na emankaitowen na baley nen Apo Shiyos, ta wára kayo son Cristo, tan wára sota Ispirito Santon Apo Shiyos son si-kayo. Jet sotan na emankaitowen,

singa manbedin na baley ja pan-  
yanaan nen Apo Shiyos.

### 3

*Eshotokanak ka mengitoshon  
son si-kayon aliwen Hodiyo son ni  
pangkep son Cristo*

<sup>1</sup> Sajay ira day kabol la naka  
panshewati so nen Apo Shiyos.  
Si-kak, ebaloshak maypangkep  
ni naka pengitoshon ni esel nen  
Cristo Jesus son si-kayon aliwen  
Hodiyo. <sup>2</sup> Amtak ey shinemag  
jo ey si Apo Shiyos, kinaasi-an  
towak, isonga shinotokan towak  
ka mismo ja mengikowan son si-  
kayo ni maypangkep ni pamati.  
<sup>3</sup> Amtak ka amtayo pay ey inpa-  
amta nen Apo Shiyos son si-kak  
sota ebayag ga plano ton enshiy  
maka-amta. Si-kato iya ootik ka  
insolat ko la. <sup>4</sup> Jet no basa-en  
jo iyay, si-katoy ewatan jo so ey  
agpayson amtak sota plano nen  
Apo Shiyos maypangkep so nen  
Cristo. <sup>5</sup> Sajay ya plano nen Apo  
Shiyos, eg to inpa-amta so ni  
angken sipen too nonta epalabas  
den pigen dasos sa tawen, nem  
niman inpa-amta ni Ispirito Santo  
to iyay so ira nonta apostol to, tan  
sota ira para padto. <sup>6</sup> Jet sotan  
na plano to, si-katoy nayda-kaman  
ira nonta aliwen Hodiyo ni kari  
to ja inkowan to nonta bayag da  
so nonta ira too to. Nayda-kam  
ira ta emati ira son Cristo Jesus  
ni inteneng sha so nonta mapteng  
nga shamag pangkep son si-kato.  
Jet niman, naykasakey ira ma so  
nonta ira sigod ja too nen Apo  
Shiyos.

<sup>7</sup> Jet say kabol la kinaasi-an  
towak so nen Apo Shiyos, pinidi  
towak ja ontolong ja mengitoshon  
ni mapteng nga shamag may-  
pangkep son Cristo Jesus. Jet  
si-kato met laeng i mengosal ni  
panakabalin ton ontolong son si-  
kak. <sup>8</sup> Si-kak i kabeba-an so

ira nonta too nen Apo Shiyos,  
nem si Apo Shiyos, kinaasi-an  
towak et si-kak i mengikowan so  
nonta ira toon aliwen Hodiyo  
nonta epateg ga bindisiyon nen  
Cristo ja enshiy to kay-ingsan.  
<sup>9</sup> Say sakey mowan na kinaasi-  
an towak so, say ipalewag ko  
so ni emin na totoo sota plano  
nen Apo Shiyos ja istay enshiy  
maka-amta nontan da. Si Apo  
Shiyos, ja emalsowa ni emin na  
banag, eg to nin inpa-amta nonta  
dinesos den tawen ja epalabas,  
<sup>10</sup> say niman na timpo i amta-an  
so ira nonta toray shi naykayang,  
tan sota ira waray panakabalin  
tod man, ey say daing nen Apo  
Shiyos, aliwen etopog. Say in-  
osal to ni inpangipa-amta to son  
si-kara, si-katejon emati so nen  
Cristo. <sup>11</sup> Sajay i sigod ja plano  
nen Apo Shiyos ngo eshan nonta  
pilmiro, jet etongpal iyay nonta  
indaw ali nen Cristo Jesus ja Apo  
tayo. <sup>12</sup> Jet niman ma, ta emati  
kito son si-kato, waray shinel  
tayon on-esop son Apo Shiyos jet  
eg kito ma onbaing ja manshewat  
son si-kato. <sup>13</sup> Isonga say kowan  
ko, karekayo medismaya pangkep  
ni saja naka pandigdigat pangkep  
son si-kayo, ta sajay, pansigshan  
jo.

*Isonga takejoka ida-da-kam shi  
shawat ko son Apo Shiyos*

<sup>14</sup> Jet sajay ya ebadeg ga plano  
nen Apo Shiyos, no nemnemen ko,  
naka mantedimokod ni iyaman ko  
so nen Apo Shiyos ja Ametayo.  
<sup>15</sup> Ta agpayso ma niman ey si-  
katoy Ama ni emin na kalasin too  
shiya dobong, tan sota ira wared  
naykayang. <sup>16</sup> Jet say shawat ko  
so nen Apo Shiyos ja Kangeto-  
an, kowan ko ey sota Ispirito to  
komay mengi-kan ni kedsang ni  
nemnem jo, ta ebadeg i panaka-  
balin to, <sup>17</sup> say si Cristoy nem-  
nemen jo koma ni olay, ni joka

pemati son si-kato. Say shawat ko pay son Apo Shiyos, maynadnad kayo shi pamati ja singa ondamot i semek jo, <sup>18-19</sup> say emin kayon emati, mebedin jon ewatan sota maypangkep ni semek nen Cristo. Sota semek to, ebadeg ga pasiya ja enshiy maka-inges so; eg mebedin na amta-en tayon emin i itsora to. Nem no emansha-kel i joka pan-amta-i, emanka-shomi ngoy es-hiyosan na ogadiyo ingkatod ma-enay.

<sup>20</sup> Niman, mayshedjaw koma si Apo Shiyos, ta si-kato i emengosal ni panakabalin ton emengitoshong son si-katejo. Isonga sobden pasiya aliy kabaalan ton i-akan nem say sota nemnemen tayon ibaga. <sup>21</sup> Jet si Apo Shiyos, si-katoy mayshedjaw ni olay so nonta ira emati ja wara so nen Cristo Jesus, tan so ni emin na totoon may-enak ali, jet mayshedjaw ingkatod ingka. Siya, satan koma.

## 4

*Sota ogadin anam ma dag-en ni toon ebaliwán i toka pannemnem*

<sup>1</sup> Ebaloshak tep naka mengitoshon ni maypangkep so nen Apo Jesus, isonga iyay iray shewaten ko son si-kayo. I-enam jo komay ogadiyo shi piyan nen Apo Shiyos ja dag-en ira nonta pinidi ton too to. <sup>2</sup> Isonga mesepol la eg kayo ontangsit, no diket mesepol la man-i-inanos kayo, ta si-katoy ka-asan to ey waray semek jo so ni sakey tan sakey son si-kayo. <sup>3-4</sup> Ipekat joy kabaalan jon man-i-inawatan, ta si-katoy emengikan ni olnos jo. Saksakey nonta Ispirito Santo nen Apo Shiyos ja wara son si-kayo; isonga may-eshig kayo ey singa saksakey bengat i bakdang jo. Sakey bengat pay i namnama jon toshongen niman na inewat shakejo nen Apo Shiyos

ja too to. <sup>5</sup> Sakey bengat i Apo tayo, sakey ngo bengat i tayoka pemati, jet nonta inkabonjag tayo, saksakey ngo bengat i olog to. <sup>6</sup> Si Apo Shiyos, sakey bengat, jet si-katoy Ama ni emin na emati. Si-katoy Kangeto-an na emin, enshiy eshom, tan si-kato pay i emengitoshay son si-katejon emin, tan si-katoy eman-iyon son si-katejon emin.

<sup>7</sup> Waren kenshat i inkaasi nen Cristo son si-katejon emin, nem aliwen nan-i-inges i dokod ni toka i-akan na kaasi so ni sakey tan sakey son si-katejo. <sup>8</sup> Sajay ya inpangi-kan to ni kaasi, naypadto met nonta bayag; isonga wara iya naysolat ja esel nen Apo Shiyos ja kowan to ey, “Idi dimaw shi naykayang, eshakil i intakin ton piriso, jet waray inwaris ton pansigshan ni totoo.” Kowan nonta naysolat. <sup>9</sup> Jet ngantoy piyan ton amta-en tayo ni inkowan to so ey dimaw shi naykayang? Enshiy eshom nem eg say piyan ton amta-en tayo koma, si Jesus, dimespag nin alid ja kad-an tayon dobong ja kabeba-an. <sup>10</sup> Saja si Jesucristo ja dimespag ali, si-kato met laeng nga mismo sota kimayang ded dangit ja kakedjangan, jet say kabol la kinedjangan to, say si-katoy mengitoshay ni emin na angken nganto, say enshiy pankedangan sha. <sup>11</sup> Jet sotan na inakan ton kaasi, ekalkalasi; isonga ekalkalasi ngoy dag-en tayo. Jet wara iray apostol, wara iray para padto, wara iray mengikowan met laeng ni maypangkep son si-kato, tan wara iray emantoshon tan emengiredan ni emati. <sup>12</sup> Jet say pangkep nen Apo Shiyos ni engikanan to so niyay, say onkedsang i pamati ira nonta emati son si-kato, ja may-eshig ey bakdang to, tan say amta-en shen emin i pesing sha. <sup>13</sup> Jet no sajay i medeka, manseksekey kiton emin

shi pamati, tan amta-en tayon pasiya sota maypangkep so nen Jesucristo ja Anak nen Apo Shiyos, tan onba-deg kitod pamati tayo, ja enshiy pankodangan tayo, jet say ingesen tayo sota ogadi nen Jesucristo. <sup>14</sup> Aliwén kito on-onong koma ja singa nga-nga ni olay, ja edaken i-owapan ni toon matekal la mengi-owap, ono edaken maewís nem wáray badon toro. Sajay ya itsora, may-eshig nodta barkon sini-bok ni shagem, ja olay toy toshongen to. <sup>15</sup> Nem si-katejo, mesepol la sota podnoy medeka, ja metaksholan ni semek, say sota pamati tayo son Cristo, onba-deg; eg meki-to-an. Si Cristo, si-katoy singa toktok tayo, <sup>16</sup> jet si-katejon emati so nen si-kato, si-katejoy may-eshig ey bakdang to met laeng. Si-katoy esa-nopan tayo, ja singa nan-a-apolan tayon emin ja emati. Si-katejoy nay-inges mowan nodta kaikedsang nonta bakdang. No mapteng i ka-olnos nonta bakdang, ja eman-obden emin sota olat to, onba-deg tan onkedsang sotan na bakdang. Jet no si-katejo ket, mapteng i olnos tayo, wára ni olay i semek.

<sup>17</sup> Jet niman, iyay i ibilin ko son si-kayo ja edapo met laeng so nen Apo Jesus. Say kowan to, karejo ma onoran i ogadi ira nonta toon enshiy Shiyos sha, ta enshiy kenkenshat nonta wáred nem-nem sha. <sup>18</sup> Isonga si-kara, may-eshig ey wára ired embolinget, ta enshiy shaka ewáti. Enshiy son si-kara sota biyag ja enshiy to engintegán ja edapo so nen Apo Shiyos. Sajay i kasesaad sha tep etangkén i nemnem sha, nakol ni enshiy amtara pangkep son Apo Shiyos. <sup>19</sup> Enshin polos pay i bebaing sha jet naydowam ma ira. Isonga na-alas ma ni olay i aramid sha jet pipiyan shen dagen i angken nganton aramid ja ngaaw. <sup>20</sup> Nem si-kayon emati,

enshiy toron sotan na inashal jo ja edapo so nen Cristo. <sup>21</sup> Si Jesus si-katoy kawad-an ni podno. Isonga niman, ta inewátan jo sota toron maypangkep so nen Jesus, <sup>22</sup> ibi-jag jo sota ngaaw wa ogadiyon sigod, ja istay joka on-onora nontan da, ta sotan na ogadi, istay ya ememilshi ni nemnem. Ta say itsora niyay ya ogadiyon sigod, joka dagdag-a sota pipiyan jon dag-en, nakol ni si-kayo met laeng i nay-owapan. <sup>23</sup> Mesepol la mebediwan na emin i joka pannemnem, <sup>24</sup> jet sota badon ogadi ma i maysadat ja in-akan nen Apo Shiyos son si-kayo, say mewad-an kayo ni ogadi ja inges tos Apo Shiyos. Ta say kowan ni podnon esel to, sota koskostoy dagdag-en tayo ja inges tos Apo Shiyos.

<sup>25</sup> Isonga niman ma, ibi-jag joy pengi-o-owap, jet sota podno i ikowan jo so ni kait jo, ta emin kiton emati, saksakey kito so nen Cristo. <sup>26</sup> Isonga no bilang ey wáray bongetan jo, aliwén kayo mandeka ni ngaaw. Tan aliwén jo isan-akew i bonget, <sup>27</sup> say enshiy pengiringanan nen Satanas ja mengewís son si-kayo.

<sup>28</sup> No wáray makibot ja naykait son si-kayo, ibi-jag to komen mengibot. Man-obda et koma ni kosto say makatolong so nonta ira makasapol ni tolong.

<sup>29</sup> Karekayo mengikokowan ni kasesakit ta esel. Say pesing jo komen mekitbal, i-enam jo nodta kasapolan ni mengitneng, say mapteng i pengitneng sha, tan say onkedsang i pamatira. <sup>30</sup> Aliwén kayo mandeka ni ngaaw ja kesekitan ni Ispirito Santo nen Apo Shiyos. Sota Ispirito Santo ja wára son si-kayo, si-katoy may-eshig ey malka nen Apo Shiyos son si-kayo. Si-katoy ka-asan to ey kokowa shakejo ma et si-katoy

amta-an so ey enayen to ali sota inkaysalakan jo.

<sup>31</sup> Emin iyay ya aramid, ibi-jag jo: sota bonget, igem, kolkol, somang, tan sota pengokos so ni kait; tan aliwén wáray jo papaiten. <sup>32</sup> Say mapteng koma ja dag-en jo, sota pansigshan ni sakey tan sakey son si-kayo, tan pankinaasi kayo, tan mesepol pay ya amtayon memekawan ni kait jo no wáray nanbasolan to son si-kayo. Ta angken si Apo Shiyos, pinekawan shakejo ni basol jo, kabol ni inpatiyo son Cristo.

## 5

<sup>1</sup> Niman ta annak shakejo ma nen Apo Shiyos, mesepol la say onoran jo, sota ogadi nen Apo Shiyos. <sup>2</sup> Mesepol la wáray semek jo ni olay shi sakey tan sakey. Nemnem jo ey si Cristo, ebadeg i semek to ngo son si-katejo; isonga intolok toy bakdang ton metey para son si-katejo. Saja engitodokan to ni bakdang to, may-eshig ga daton ja piyan nen Apo Shiyos.

<sup>3</sup> Si-kayo, ta too kayo ma nen Apo Shiyos, karekayo ma memii ono mekileki, ono mandeka ni kompormin ensekig ga aramid, ono epaladon pengamkam ni kari-irin, tan eg jo pay tabtabalen ira jay. <sup>4</sup> Tan pan-anad kayo pay ni pesing jon mekitbal. Baka wáray ngaaw wa esel ja onbo-day shi bongot jo, ono esel la enshiy silbi to, ono solsolog ja nayda-kad. Ta aliwén anam jon mandeka niyay. Say mesepol et mango, sota pan-iyaman ni olay so nen Apo Shiyos. <sup>5</sup> Sigorado iyay: sota toon mabii, ono sota mandeka ni olay ni eshom ma ensekig ga aramid, eg mebedin na mayda-kam shi pantoshayan nen Cristo, ono shi pantoshayan nen Apo Shiyos. Jet angken pay sota toon magamkam ni kompormi, eg

mayda-kam met laeng, ta saja toka kamkamkami, si-katoy singa shiyos to.

<sup>6</sup> Karejo patpati-en sota kowan ira nonta eshom ey palobos sa dag-en ira jay ya edogit ta aramid, ta sota ensekig ga aramid i kabol la shosa-an so nen Apo Shiyos so nonta ira eg memati. <sup>7</sup> Isonga si-kayon emati, karekayo mekikad-kadwa so ni toon ensekig i aramid to. <sup>8</sup> Ta nonta eg kayo pay laeng emati, may-eshig ey wára kayo shi embolinet, nem niman ta emati kayo, may-eshig ey wára kayo med emanniyal. Isonga say dag-en jo koma, sota anam ni toon wáred emanniyal. <sup>9</sup> Ta sota toon wáred maniyal, si-kara sota mandeka ni mapteng nga aramid, tan sota kostoy pesing sha shi kait sha, tan podnoy ikowan sha. <sup>10</sup> Isonga si-kayo, say mesepol la dag-en jo, ashal jo no ngarantoy mengi-kan ni pan-imdengan nen Apo Shiyos, say si-katoy nem-nemen jo. <sup>11</sup> Arawi-i jo sota aramid ja kedagdag-a ni toon wára pay laeng shi embolinet, ta enshiy silbi nontan. No diket say pesing jo koma, ikowan jo et i nankolongan sha, say amta-en sha. <sup>12</sup> Sota aramid ja kai-em-emot ira niya toon eg emati, angken eg maykowan shiya solat ko, ta kabebaing nga pasiya. <sup>13</sup> Nem sota aramid ja ngaaw, no mesokalan, amta-an ira nonta dimaga so i itsora nontan na basol sha et balang nem ibi-jag sha ma. <sup>14</sup> Sajay i kaytoshongan nonta kowan to ey, “Si-kam ma may-eshig ey na-ogip, bangon ka, pan-pawil ka did patey, jet si Cristo, dewagan toka.”

<sup>15</sup> Asas joy itsora ni biyag jo: aliwén jo ba-ba-ngaten i daga ni angken nganto, ja singa enshiy amtayo, no diket pannem-nem kayo nin. <sup>16</sup> Iringan jon

mengikowan so nonta ira eg memati, ta say timpo niman, emankema-ma ja emanggaaw i kedagdag-a ni totoo. <sup>17</sup> Isonga pannemnem kayo et asas jo no ngantoy piyan nen Apo Shiyos ja dag-en jo.

<sup>18</sup> Aliw'en sota boteng i jo dagdag-en, ta sotan i panshoki-an ni aramid ja ngaaw. Say mapteng nga onoran jo ni olay, sota itorong ni Ispirito Santo. <sup>19</sup> No mesanop kayo, ikansiyon jo sota kansiyon ja pengiredjaw son Apo Shiyos, pati sota ira salmo, ta si Apo Shiyos i emengitneng. Jet angken mansisi-jan kayo, panimdeng kayo met laeng ja singa kayoka mankankansiyon shi poso jo. <sup>20</sup> Angken ngantoy medeka son si-kayo, pan-iyaman kayo ni olay so nen Apo Shiyos ja Ametayo, jet maykadwa ni olay i ngaran nen Jesucristo ja Apo tayo.

<sup>21</sup> Pan-i-inanos kayo kabol ni joka pengipateg son Cristo; karejo ipilit i kostoyo.

<sup>22</sup> Si-kayon bibii ja waray asewa to, patiyoy asewayo ja inges toy joka pemat i so nen Apo Jesus. <sup>23</sup> Ta say pangolo ni bii, sota asewa ton daki ja inges toy kepengipan-golo nen Cristo so nonta ira emin na emati ja may-eshig ey bakdang to. Nem waray eg kay-ingesan ni daki son Cristo, ta si Cristo met i engisedakan so nonta ira emati. <sup>24</sup> Nem mesepol met laeng ja si-kayon bibii, pati-en joy asewayon daki, ja inges toy kepemati ira nonta emati so nonta kowan nen Cristo.

<sup>25</sup> Jet si-kayo ngon daleki, semek jo ni olay i asewayo, ja inges toy semek nen Cristo son si-katejon emati son si-kato. Ta sajay met i kabol la intolokan to so ni bakdang to ja metey para son si-katejo. <sup>26</sup> Sajay i dingka nen Jesus, say sota emati son si-kato, wara ma ira so nen Apo Shiyos. Jet

nonta inewat to ira, dininisan to ira ni basol sha nonta esel to met laeng, tan singa dininisan to pay ira ni shanom nonta inkabonjag sha. <sup>27</sup> Pemapteng to ira say mapteng nga pasiya i pengidmang to ali son si-kara. Piyan ton enshiy kolang sha, ono kompormin sha kebedawan, no diket inges sha mala i ogadi nen Apo Shiyos. <sup>28</sup> Isonga si-kayon daleki ja waray asewa to, mesepol la ensemek jo ni olay i asewayo ja inges toy joka penmek ni bakdang jo. Sota dakin ensemek toy asewa to, singa ensemek to shorog ngoy bakdang to, ta sota san-asewa, singa saksakey i bakdang sha. <sup>29</sup> Enshiy toon enoges to shorog i bakdang to, no diket toka ajowani, ta ensemek to. Inges niyay i kepesing nen Cristo son si-katejon emati son si-kato, <sup>30</sup> ta si-katejon emati, may-eshig ey nay-eshom kito shi bakdang to. <sup>31</sup> Sajay i kaytoshongan nonta esel nen Apo Shiyos nonta bayag da ja naysolat ja kowan to ey, "Sota daki ja mengesawa, idekjas toy ameto, tan ineto, jet en maymongsan so nen asewa to. Jet sotan na showen bakdang, manbedin ma ni sakey." Kowan nonta esel nen Apo Shiyos. <sup>32</sup> Eshakel i kaytoshongan niyay ya toro, nem say epateg ja piyan kon amta-en jo, maytoshong iyay so nonta ira emati ja naykasakey so nen Cristo. <sup>33</sup> Nem wara met laeng i kaytoshongan to son si-kayo ja ashaleen jo koma. Si-kayon daleki, mesepol la ensemek jo ni olay i asewayon bii, ja inges toy joka penmek ni bakdang jo. Jet si-kayo ngon bii, patiyoy sota kowan ni asewayon daki.

## 6

<sup>1</sup> Si-kayon a-anak, mesepol la pati-en jo ni olay sota kowan ni maka-anak son si-kayo, ta sajay i mapteng nga pesing ni emati so nen Apo Jesus. <sup>2-3</sup> Waray bilin nen

Apo Shiyos maypangkep niyay, ja kowan to ey, “Shyaw jo si amejo nen inejo, jet si Apo Shiyos, bin-disiyonan shakejo jet onshokey i biyag jo shiya dobong.” Sajay i maykedima nodta sampolon bilin nen Apo Shiyos, nem sajay i pilm-iron etaksholan ni mapteng nga sobadit so nonta ira onpati so. <sup>4</sup> Jet si-kayo ngon a-ama, karejo ida-karan i annak jo ni seg-ang, say enshiy sha bongetan; no diket say pesing jo et mango, bilin jo ira, tan tod-iyu ira pangkep so nen Apo Jesus.

<sup>5</sup> Si-kayon baga-en, patiyo ni olay ja emin sota ikowan ni apo jo. Shayaw jo iren pasiya, topog jo iren pansilbi-an, ja inges toy joka pandag-a maypangkep so nen Cristo. <sup>6</sup> Aliwén man-edisto kayo bengat nem wára sota apo jo ja emanbantay son si-kayo, say ikowan jo ey ikowan nonta apo jo ey ma-obda kayo. Aliwén sotan i pesing jo, no diket pansimet kayon man-obda, jet say nemnemen jo, joka pandag-a iyay pangkep so nen Cristo ta sotan i piyan nen Apo Shiyos. <sup>7</sup> Panalisto kayon man-obda et karejo nemnemen ey too bengat i joka pansilbi-i no diket nemnem jo ey joka pandag-a sotan maypangkep so nen Apo Jesus. <sup>8</sup> Amtayo met ey angken sipen too — baga-en man, ono aliwén baga-en — wáray ewaten ton i-akan nen Apo Jesus ja konkona to ja sobadit nonta mapteng nga dingka to.

<sup>9</sup> Kasta met son si-kayon wáray baga-en to, asas jo ngoy nebeng nga pedekayo son si-kara. Aliwén jo ira ta-koten say man-obda ira, ta sota ira baga-en, tan si-kayon apo sha, saksakey i Apo jo ja wáred dangit, jet say toka pesing son si-kayon showa, nan-inges ja mapteng.

<sup>10</sup> Jet niman, say ma-onod ja ikowan ko son si-kayo, sajay. Say

nemnemen jo ja mengi-kan ni kedsang jo, si Apo Jesus, tan sota panakabalin to. <sup>11</sup> Jet nemnem jon osalen sota in-akan nen Apo Shiyos son si-katejo ja may-eshig shi almas ja para kobat, say eg shakejo ebaken nonta taktiko nen Satanas. <sup>12</sup> Tep aliwén kait tayon too i kabakal tayo, no diket si Satanas, tan sota ira kait to ja ispiriton ngaaw ja toka ibetbetkag. Jet angken pay sota ira kait to ja singa enanngel ono emengitoshay niya dobong niman, si-karay makakontra son si-katejon emati. <sup>13-14</sup> Isonga niman, karekayo mebegnad; osal jo et ja emin sota almas nen Apo Shiyos ja wára son si-kayo, say eg kayo ma-ebak no onsabi sota timpon paladoy pemekal nen Satanas son si-kayo, tan say wára kayo pay laeng shi pamati ingkatod anongosto. Say kay-eshigan ni almas nen Apo Shiyos, sajay. Daga jo sota agpayso, aliwén sota o-owap, ta sotan i may-eshig ey singa balkes jo. Onod jo ni olay sota bilin nen Apo Shiyos ja kowan to ey dag-en jo, jet sotan i may-eshig ey danshok ka sa-din ni pagew jo. <sup>15</sup> Mesepol la esagana kayo ja mengikowan nonta maypangkep ni mapteng nga shamag ja mengi-kan ni talna, jet sotan i may-eshig ey singa sapatos jo. <sup>16</sup> Say epateg so niyay ya emin, sota pamati so nen Cristo. Say arig niya pamatiyo, singa kalasay jo ja penadin jo ni bakdang jo no wáray diy ipana nen Satanas ja singa apoy ya emanshedang, ja may-eshig shi aramid ton meneshal ni too. <sup>17</sup> Jet say nemnemen jo ni olay, sota kaysedakan jo, ta sotan i may-eshig ey hilmit ja sa-din ni toktok jo. Itoshoyo sota esel nen Apo Shiyos, ta sotan i may-eshig nodta kampilan ja in-akan ni Ispirito Santo nen Apo Shiyos. <sup>18</sup> Panshawat

kayo ni olay so nen Apo Shiyos say todongan shakejo, jet karekayo on-ekdas ja manshewat ni olay para so nonta ira emin na emati. Onod jo ni olay sota pengiredan ni Ispirito Santo son si-kayo ni joka panshewat. <sup>19</sup> Pati si-kak ngo, irewati jowak so nen Apo Shiyos say osalen towak ja mengikowan nonta mapteng nga shamag may-pangkep son Cristo ja istay enshiy maka-amta. Irewat jo pay ey ekak ontakot ja mengikowan niyay ya mapteng nga shamag. <sup>20</sup> Ta say kabol la naybaloshan ko shiya badoran ket, sota inbetkagan towak nen Apo Shiyos say nak ikowan sota mapteng nga shamag maypangkep so nen Cristo. Isonga kowan ko ey irewati jowak so nen Apo Shiyos, say aknan towak ni toled ja mengikowan nonta may-pangkep ni esel to, ta si-katoy nebeng nga dag-en ko.

<sup>21</sup> Si Tikiko ja ensemek tayon agi shi pamati, emepiyal la mansilbi so nen Apo Jesus, isonga si-katoy mengikowan da ni emin may-pangkep son si-kak, no ngantoy naka dagdag-a, say amta-en jo. <sup>22</sup> Say kabol la ibetkagan ko la so nen Tikiko shita kadnan jo, piyan kon say amta-en jo i maypangkep son si-kamid jay. Tan piyan ko pay ya pekedsang toy nemnem jo, say eg kayo medisdismaya.

<sup>23</sup> Si Apo Shiyos ja Ametayo, tan si Apo Jesucristo, sapay koma ta a-shoman shay talnayo ja a-aki mi shi pamati, tan kasta met sota semek jo ni emin na kait jon emati. <sup>24</sup> Jet sapay koma ta kaasian pay nen Apo Shiyos ja emin sota wara ni olay i semek to son Apo Jesucristo.



## SOTA SOLAT NEN SAN PABLO PARA SO NONTA IRA I-PILIPOS

<sup>1</sup> Si-kak si Pablo, ja makasolat niyay et say kadwák, si Timoteo. Si Cristo Jesus i mismon engi-betkag son si-kami ja mansilbi son si-kato; isonga itnengi jon pasiya iya ikowan mi. Jet sajay ya solat, para son si-kayon emin ja kait min too nen Jesus ja wáred siyodad ni Pilipos, agdalo son si-kayon pangolo ni ematid tan, tan son si-kayon para tolong met laeng so nonta ira emati.

<sup>2</sup> Say shawat ko son Apo Shiyos, sapay koma ta kaasi-an shakejo, tan a-shoman to pay sota talna ja wára son si-kayo ja edapo met laeng son Apo Shiyos ja Ametayo, tan si Apo Jesucristo.

*No nemnemen takejo, naka man-imdeng*

<sup>3</sup> Si-kayon tood Pilipos, eg takejo dibdibkan. Isonga no nemnemen takejo, naka man-iyaman son Apo Shiyos ja naka shedjawa, ni maypangkep son si-kayo, <sup>4</sup> jet no manshewatak son Apo Shiyos ni pansigshan jon emin, naka man-imdeng ni olay. <sup>5</sup> Ta ekak dibkan sota inpankakadwa tayo ja engikowan nonta mapteng nga shamag pangkep so nen Cristo nanshogi nonta badbado kayo nin ja emati, ingkato niman.

<sup>6</sup> Jet ebadeg i namnamak ey si Apo Shiyos, ja engaasi son si-kayo nonta pilmiron emati kayo son Cristo, si-kato met laeng i mengitodoy so nontan na mapteng nga obda to son si-kayo ingkatod onsabi ali sota akew wa idaw mowan nen Jesucristo ja mandepod dangit. Ta sotan aliy ka-enay ni kaysedakan jo. <sup>7</sup> Anam ton sajay mango i wáred nemnem

ko pangkep son si-kayon emin, ta ebadeg i naka pengisekit son si-kayo. Ta sota kaasi nen Apo Shiyos son si-kak, inbetkag towak ja en mengitosho ni mapteng nga shamag et singa kayoka maydakam ni olay — inges to nem wára-ak shiya badoran ono nonta ekak naybalod pay laeng. Ta nontan den ewaya-ak pay laeng ja emengitosho nonta mapteng nga shamag pangkep so nen Jesucristo, inatngan jowak, jet niman, eshakil ma iray koston emati. <sup>8</sup> Si Apo Shiyos, amta to ey naka mansespi ja piyan kon pasiya ja asen takejo, ta say semek ko son si-kayo, inges toy semek nen Cristo Jesus son si-kayo. <sup>9</sup> Jet say shawat ko son Apo Shiyos maypangkep son si-kayo, mas mashoman komay semek jo ni sakey tan sakey, tan metaksholan koma ni daing ja medepo son si-kato met laeng, tan kosto komay pannemnem jo ni olay. <sup>10</sup> Sajay i shawat ko, say amta-en jon memidi ni kamaptengan na ogadi, say eg kayo manbesol, tan say enshiy jo kebedawan niman na kawashayo pay laeng shiya biyag, ingkatod onsabi sota akew wa idaw ali nen Cristo. <sup>11</sup> Piyan kon waray pengasan ko ey agpayson inonod jo sota mapteng nga ogadi ja edapo so nen Jesucristo, ta no asen ni too ey mapteng i ogadiyo, si Apo Shiyos i ishayaw sha, ta si-katoy kabol ja nanbalbaliwán jo.

*Saja naybaloshan ko ket, mapteng i nanbanagan to*

<sup>12</sup> Si-kayon a-aki shi pamati, piyan kon amta-an jo ey emin sota digat ja epasemak son si-kak, waray mapteng nga nanbanagan to. Ta sota mapteng nga shamag maypangkep so nen Jesucristo, eshakil i engitneng. <sup>13</sup> Jet say pilmiron mapteng nga nanbanagan to, inamta-an ira nonta kowadja ni

ari shima baley to, tan angken sota ira emin na wáred ja bado-ran, jey say kabol la naybaloshan ko ket sota maypangkep ni pamatik so nen Cristo. <sup>14</sup> Jet say sakey pay, karakdan so nonta ira a-aki tayo shi pamati i kimed-sang so nen Apo Jesus jet say kabol la kinedsangan sha, saja inkabedod ko. Jet enshi may takot sha ja mengitoshon nonta esel nen Apo Shiyos pangkep so nen Jesucristo.

<sup>15</sup> Amtak met kitdi, jey wáray eshom ma emengitoshon pangkep so nen Cristo, nem say wáred nemnem sha, ket apal sha son si-kak, tan piyan sha pay ya onkontra son si-kak. Nem wára ngoy eshom ma emengitoshon ja agpayson mapteng i pangkep sha. <sup>16</sup> Jet sota ira mapteng i pangkep sha, si-kara sota wáray semek sha son si-kak, ta amtara ey say inpalobosan so nen Apo Shiyos ey maybedorak, say itakshel ko sota mapteng nga shamag pangkep so nen Jesucristo. <sup>17</sup> Sota ira mango emengitoshon ja ngaaw i pangkep sha, say wáred nemnem sha, sota panmaptengan sha bengat, jet sa-jay i shaka pandag-a, ta kowan sha ey angka et nem ma-shoman iya naka pandigdigat shiya bado-ran. <sup>18</sup> Nem ekak panshanagan iyay. Angken ngaaw i pangkep sha, ono mapteng, no itoro sha et i mapteng nga maypangkep so nen Cristo, man-imdengak pay laeng.

Jet mas man-imdengak pay, <sup>19</sup> ta amtak ey sota emepespesamak son si-kak, panmaptengan ko met laeng. Jet amtak ey metongpal ali sota mapteng nga panbenagan ko tep kayoka manshéwat so nen Apo Shiyos ni pansighan ko, tan sota tolong pay nonta Ispirito Santo nen Jesucristo. <sup>20</sup> Jet say wáred nemnem kon pasiya, namnamak ey ekak onkapoy ja mansilbi son Cristo, no diket onked-sangak ni olay ja inges toy naka

pesing nontan da ingkato niman. Namnamak ey si Cristoy mayshed-jaw shi emin na naka dagdag-a, ni kawashak pay laeng shiyay ya biyag, ket no si-katoy kabol la keteyan ko. <sup>21</sup> Ta si-kak, niman na wára-ak pay laeng shi biyag, wára-ak son Cristo et naka pandadsaki; nem no meteyak, mas edaddadsakak pay mowan ali shi dangit. <sup>22</sup> Isonga ekak tongolan shiya showa no toway pidi-en ko, ta no on-onongak pay laeng nga manbibiyag, asdeg toy mebedin na dag-en ko. <sup>23</sup> Isonga entapik i showen panpidi-an ko et ekak tongolan no towed jay ya showa. Singa piyan kon metey say on-dawak shagos shima kad-an nen Cristo, ta si-katoy kamaptengan. <sup>24</sup> Nem kasapolan pay laeng ni eshakel la too i kawashak shi biyag, ta wáray itolong kon pansighan jo. <sup>25</sup> Isonga amtak ey ekak nin metey, ta mesepol jo pay laeng i tolong ko, say onkedsang i pamatiyo, jet man-imdeng kayo nodtan na pamatiyo. <sup>26</sup> Kenshat ta mebododak, ta no sotan i medeka, mas pay ya si Cristo Jesus i panshedjawan jo, ta wára-ak da son si-kayo.

<sup>27</sup> Asas joy itsora ni ogadiyo. Mesepol la may-enam shi toro pangkep so nen Cristo, say no angken bilang ey ondawak da, ono enshi, mapteng ali komay shamag maypangkep son si-kayod tan, ja saksakey i nemnem jo; kasta met i pangkep jo. Amta-en ko koma di ey kayoka mantitinolong, say eg kayo ma-ebak no kontra-en shay pamatiyo ja edapo nodta mapteng nga shamag pangkep son Cristo. <sup>28</sup> Jet say piyan kon amta-en pay pangkep son si-kayo, eg jo tekotan sota ira makakontra son si-kayo, angken ngantoy pesing sha. No eg jo ira tekotan, sotan i amta-an sha so ey si-kara et ngo mowan i ma-ebak

ni anongosto jet si-kayo i isalakan nen Apo Shiyos. Si Apo Shiyos met laeng i mengipa-amta nontan son si-kara, <sup>29</sup> jet ewatan sha ey angken sota joka pandikat, onto-long si Apo Shiyos son si-kayo, ja eg shakayo i-oway. Ta aliwén sota inpamatiyo son Cristo bengat i inalobos nen Apo Shiyos son si-kayo, no diket inalobos to pay ja manda-kam kayo ngo ni digat pangkep son si-kato. <sup>30</sup> Nontan da, inon-an joy inpalikat sha-ak so ni makakontra son si-kak ni naka pansilbi son Cristo, jet shinemag jo pay jey angken niman, marama pay laeng. Jet niman, angken si-kayo ngo, joka panda-kami iyay ya digat.

## 2

*Si Apo Jesus i onoran jo shi emin na dag-en jo*

<sup>1</sup> Niman, no waray dineknayon kedsang ni nemnem jo ja in-akan nen Cristo son si-kayo, ono semek to son si-kayo ja emengi-kan ni diwdiwa, ono pineshas jon inshalan tokejo ni Ispirito Santo nen Apo Shiyos, ono amtayon mengaasi, iyay i ibilin ko ma son si-kayo. <sup>2</sup> Pansaksakey jo ngarod i nemnem jo, ja mewad-an ni semek so ni sakey tan sakey son si-kayo, tan mewad-an pay ni saksakey ya pangkep. No sajay i pesing jo, ma-enay iya imdeng ko. <sup>3</sup> Nemnem joy pansigshan ni kait jo, aliwén sota bakdang jo bengat i jo nemnemnemen, eg kayo ondstog. Pankombaba kayo et mango, jet ibidang jo ngoy eshom ey waray amtara nem say si-kayo. <sup>4</sup> Mesepol la eg jo ipilit i kostoyo shi eshom; no diket nemnem joy kowan ngo ni eshom. <sup>5</sup> Sajay ira den inkowan ko, si-katoy mapteng nga nemnemen jo, ta mesepol la si Cristo Jesus i onoran jo. <sup>6</sup> Si Cristo Jesus, sigod ja inges toy itsora nen

Apo Shiyos, nem eg to inpilit ja onong nga inges nen Apo Shiyos. <sup>7</sup> Isonga inbiyang to nin i kina-inges to son Apo Shiyos et dimaw alin nanbalin ni too, ja nay-anak, jet singa baga-en i kasesaad to. <sup>8</sup> Jet nonta nanbalin ni too, in-baba toy bakdang to shorog et inonod ton angken manda-kam ni kabebaing nga ketey to shi koros ja singa himasol et ngo mowan. <sup>9</sup> Isonga si Apo Shiyos, inngato to ma niman i kasesaad nen Cristo, jet inpanbalin ton kangeto-an ni emin, ja enshiy maka-inges so. <sup>10</sup> Angken sipa shi dangit, shiya dobong, ono shi nayshalem ni bo-day, mantedimokod ira ni shayaw sha so nen Jesus. <sup>11</sup> Jet angken sipa, ikowan sha met laeng ey si Jesucristo, si-katoy Apo, jet sotan i kayshedjawan met laeng nen Apo Shiyos ja Ameto.

<sup>12</sup> Si-kayon a-akik shi pamati ja ensemek ko, nontan na wara-ak son si-kayo, no waray ikowan ko, joka pati-a. Jet angken niman na enshi-ak koma son si-kayo, mas tongpalen jo koma pay iya bilin ko son si-kayo. Insalakan shakejo nen Apo Shiyos, isonga mesepol la man-edisto kayon ontongpal so ni bilin to. Nem mesepol la eg kayo mansheshinel, no diket mewad-an kayo ni takot son Apo Shiyos. <sup>13</sup> Ta angken si Apo Shiyos, eman-obda ngo ja emengitoshong son si-kayo, say mapiyal kayo ja mandeka ni piyan to.

<sup>14</sup> No waray dag-en jo, ob-dayo, eg kayo mankotot, ono mansosongbat, <sup>15</sup> say enshiy jo kebedawan, ono jo panbesolan. Ta si-kayo, annak shakejo nen Apo Shiyos jet si-kayoy mengilewag ni podno so ira niya tood ja dobong ja ma-owap tan poron makedsel. Si-karay naydaokan jo et piyan kon eg kayo ma-edinan. <sup>16</sup> Ikowan jo so ira nonta eg emati

sota esel nen Apo Shiyos pangkep son Cristo, say mewad-an ngo ira ni biyag. No sajay i pesing jo, ebadeg aliy imdeng ko nem karonoran alin timpon imotok nen Cristo, ta si-katoy pengamta-an ko ma ni nanbanagan ni obdak, ono nandigatan kon engitoshon son si-kayo. <sup>17</sup> Angken bono-en sha-ak, man-imdengak pay laeng. Arig toy ogadi min Hodiyos, ja no mandeton kami ni animal son Apo Shiyos, mika iso-jat met laeng sota shaletton nodta bakdang ton emankaileton say ma-enay. Jet singa inges to ngo sota shalak, ja si-kato ngoy mayso-jat nodta daton jo. Nem sota mismon daton jo, si-kato sota joka pandigdikat ni maypangkep ni pamatiyo. Siya, man-imdengak et meki-imdeng kayo ngo son si-kak. <sup>18</sup> Piyan kon man-imdeng kayo koma ngo pangkep ni sajay, ja inges toy naka pan-imdeng.

*Ibetkag ko la si Timoteo, asan si Ipaprodito*

<sup>19</sup> Jet niman, naka namnama-a ey no ipalobos nen Apo Jesus, ibetkag ko len shagos si Timoteo son si-kayo, ta piyan kon amta-en kon mismo i maypangkep son si-kayo, say man-imdengak. <sup>20</sup> Enshiy eshom ma toon maka-inges ni naka pengisekit son si-kayo, nem eg si Timoteo bengat. <sup>21</sup> Emin ira sota eshom, say shaka nemnemnema, sota bakdang sha bengat, aliwen sota maypangkep so nen Jesucristo. <sup>22</sup> Nem si Timoteo, amtayo met ey waray nanbanagan ni obda to. Timolong pay son si-kak ja engitoshon nonta mapteng nga shamag maypangkep so nen Jesucristo, ja inges toy itsora ni tolong ni sakey ya anak so ni ameto. <sup>23</sup> Isonga naka namnama-a ey ibetkag ko len shagos si Timoteo son si-kayo. Nem

asen ko nin no ngarantoy panbenagan niya kasok. <sup>24</sup> Nem waray namnamak ey ipalobos nen Apo Shiyos ja ondawak den shagos son si-kayo.

<sup>25</sup> Ninemnem ko pay ey mesepol la ibetkag ko la si Ipaprodito ja on-oli shita kadnan jo. Ta naka ikari ey si-kato, epateg ga agik shi pamati, tan sakey pay, etoled ja kadwak ni mika pansilbi so nen Jesucristo. Salammat ta inbetkag jo di, ta ebadeg i tolong to son si-kak. <sup>26</sup> Nem niman, eg maynem-neman tep shinemag to ey inamtaan jo kono ey emansekit, isonga piyan ton pasiya ja on-akad da. <sup>27</sup> Agpayso noman ja nansakit, jet istay pay ya metey, nem si Apo Shiyos, kinaasi-an to. Jet aliwen si-kato bengat i kinaasi-an nen Apo Shiyos, no diket angken si-kak, ta no etey si Ipaprodito, istay ma-shoman pay sota digat ko, ta mandeshingitak kabol son si-kato. <sup>28</sup> Isonga angken si-kak, piyan kon pasiya da ja angken on-akad si Ipaprodito shita kad-an jo, say man-imdeng kayo mowan ni i-asas jo son si-kato. Jet no man-imdeng kayo, singa onkajas may naka pannemnem son si-kayo. <sup>29</sup> Pa-sas jo son si-kato i ebadeg ga imdeng jo no onmotok da, ta si-kato, agi tayo shi pamati et anam ton rispito-en jon emin ira sota inges nen Ipaprodito, ja epateg i dingka to. <sup>30</sup> Ta say kabol la istay keteyan to, sota obda ton embel-at maypangkep so nen Cristo. Inposta toy biyag to ja timolong son si-kak, ta sota obden kowan jo ey itolong jo son si-kak, si-kato noman i dimaga so.

### 3

<sup>1</sup> Jet niman ma, si-kayon a-aki mi shi pamati, pan-imdeng kayon pasiya, ta totoo shakejo nen Apo Jesus. No si-kak, ekak on-egjat

ja mengipinpinshowa niya insolat ko la para son si-kayo, ta si-katoy panmaptengan jo.

*Say podnon pesing nga maysedakan, si-katoy pamati son Cristo*

<sup>2</sup>Tanshaaniyo ali sota toon apil i toro sha, ta si-karay mengi-kan ni kolo shi pamatiyo. Ta say itsora ni ogadira, singa aso. Piyan sha pay ya kedkeshen i bedat jo, <sup>3</sup> ta say toro sha, kowan sha ey sota ogadi ni Hodiyo ja kogit, si-katoy ka-anta-an ni toon Apo Shiyos. Nem si-katejo kari i podnon too nen Apo Shiyos, ta sota Ispirito Santo nen Apo Shiyos i emengitoshong son si-katejo ni tayoka panshedjaw son si-kato. Sota pamati son Cristo Jesus i tayoka panshindi; eg kito manshinel bengat nodta toro ni kait tayon too.

<sup>4</sup>Mebedin ngon waray dason kon manshinel, ta asdeg toy dingkak ni maypangkep ni pamati ni sikamin Hodiyo nontan da, nem en-asnengak. No kowan ni eshom ey ireka manshinel pangkep ni sajay, mas si-kak koma pay i manshinel, <sup>5</sup> ta asdeg toy paras ko ni kina-Hodiyo. Si-kak, poli towak nen Benjamin ja mismon anak nen Israel, isonga say shalak, poron shala ni Hodiyo. Nonta maykewalon akew ko ni nay-anak ko, kinokit sha-ak, jet no sota maypangkep ni emin na pengonod ni dinteg min Hodiyo, inonod kon emin, ta sakeyak so nonta ira Parisiyo. <sup>6</sup> Jet no sota maypangkep ni kinashonong ja medepod dinteg min Hodiyo, enshiy en emalaw son si-kak. Masi-metak ka pasiya ja mansilbi son Apo Shiyos, isonga sota ira epangdon emati son Jesus nontan, pinedigat ko ira, ta kowan ko nem sotan i koston pansilbi son Apo Shiyos, nem apil gayam. <sup>7</sup> Nem niman, ta emati-ak son

Cristo, emin sotan den dingkak ja istay kowan ko ey epateg, inbilang ko ma niman ey enshiy silbi to. <sup>8</sup> Say kabol la inbilangn ko so ey enshiy silbi to, inamta-an kos Cristo Jesus ja Apok, jet si-kato may mas epatpateg son si-kak. Maypangkep ni inonoran ko son Cristo, inbiyang kon emin i wara son si-kak et no nemnemen ko, singa ensekig sotan na dingdingkak nontan. Sajay i inparing ko say metopog i nemnemen ko, ja si Cristo ni olay bengat. <sup>9</sup> Ta niman ma, wara-ak son si-kato. Jet aliwen sota naka pengonod ni bilin ni Hodiyo i naka panshindi kosto-an son Apo Shiyos son si-kak, no diket towakka kosto-i maypangkep ni naka pamati son Cristo. Ta say kekosto-i nen Apo Shiyos, sota waray pamati to son Cristo. <sup>10</sup> Jet niman, say naka nemnemnema, sota pengamtak pay ya pasiya ni maypangkep so nen Cristo. Piyan ko pay ya dekna-en sota panakabalin nen Apo Shiyos ni toka penodong son si-kak, ja panakabalin ton inosal to ni inpanbiyag to so nen Jesus shi patey. Piyan kon mekila-kam ni digat nen Jesus, angken pay ya i-onod kon metey ja inges to. <sup>11</sup> Ta si-kak, waray namnamak ey panbiyag towak ngo ali shi patey ja inges to.

<sup>12</sup> Ekak pay laeng ibilang i bakdang ko ey pineshas kon emin iya maypangkep ni pamati, ono ekak ikowan ey enshiy nak nankolkolongan. Nem say wara son si-kak, naka memasig ey amta-en kon emin na pasiya sota maypangkep so nen Cristo Jesus, ta si-katoy pangkep to ja indaan towak so nonta pilmiro pay laeng. <sup>13</sup> Si-kayon a-akik shi pamati, ekak pay laeng ibilang i pamatik so nen Jesus ey siya, kosto ma. Isonga sota i-abantik bengat i naka nemnemnema, ta si-kak, may-eshig

ey singa naka mekilongba: ekak wingi-en sota wared benegkan ko, no diket naka memasig ga ontorong shi sango-an ko. <sup>14</sup> Isonga naka takal say posposen ko sota pengintegangan ni bebtiken ko, say waray ewaten ko ngon primiyo. Si Apo Shiyos, si-katoy emili son si-kak ja mansilbi so nen Cristo Jesus et si-kato met laeng i mengikan ni primiyok da shi dangit.

<sup>15</sup> Si-kayon makedsang i pamati to, say nemnemen jo, saja inkowan ko la. Nem no waray kait jo ja apil i nemnem to, ja aliwen inges to iyay, si Apo Shiyos i ondawag so ni nemnem sha say amta-en sha ey waray nankolan-gan sha. <sup>16</sup> Nem saja ma-ashal pay, mesepol la may-enam nodta inamta-an tayo da, ja podno, pangkep so nen Jesucristo.

<sup>17</sup> Si-kayon a-aki mi shi pamati, sota inon-an jo son si-kak, si-katoy onoran jo, jet sota toon emengonod niyay ya inkowan ko la, si-kato ngoy pati-en jo. <sup>18</sup> Eminshakel la inkowan ko son si-kayo sota maypangkep so nonta ira totoon apil i ogadira ja singa ngaaw shay toro maypangkep ni koros nen Cristo. Jet niman ma, pinshowa-en ko la sota inkowan ko son si-kayo et sajay ya maramen naka pan-ikowan son si-kayo, naka mansesaya ni daringit ko. <sup>19</sup> Sajay iren totoo, sota shosa i emansessesked son si-kara. Say singa shiyos sha, sota ekes sha tep epingit ira ni kompormi. Shaka pay idastog sota aramid shen ngaaw, ja nebeng nga ibebaing sha koma, aliwen sha ikokowan. Tan say shaka nemnemnema pay, sota kompormin wared ja dobong, aliwen sota maypangkep son Cristo. <sup>20</sup> Nem si-katejo, eg kito naysolatan shiya dobong; singa too kitod dangit. Isonga enshiy eshom ja tayoka sesseskera ja en

mengisedakan son si-katejo, nem eg si Apo Jesucristo bengat. <sup>21</sup> Si-kato aliy onsa-dat niya bakdang tayan kabeba-an ja manbedin ni inges toy bakdang tod dangit ja emenenili. Jet sajay alin pesing to, osalen toy panakabalin to et sotan na panakabalin i toka osala met laeng niman ja mengitoshay so ni emin.

## 4

<sup>1</sup> Si-kayon a-aki shi pamati, ebadeg i semek ko son si-kayo, isonga piyan kon pasiya ja asen takejo. Si-kayoy kawad-an ni imdeng ko, tan si-kayoy ka-asan ni nanbanagan ni obdak. Jet say bilin ko son si-kayo, itodtodoy jon memati so nen Apo Jesus et eg jo pay dibdibkan ey ebadeg i semek ko son si-kayo.

### *Ka-onoran na togon*

<sup>2</sup> Si-kam Ibodia, tan si-kam ma Sintiki, kekshawen ko son si-kayon showa ey mesepol la mantabtabal kayo no ngantoy eg jo nan-inawatan. Ta si-kayo, san-agi kayo shi pamati son Apo Jesus. <sup>3</sup> Jet si-kam ma kait kon emepiyal la emansilbi, kekshawen ko ngo ey si-kam i mengolnos son si-kara, no ngarantoy eg sha nan-inawatan. Ta sajay iren bii, ebadeg i tolong sha son si-kak ni naka pengitosho nonta mapteng nga shamag pangkep so nen Jesucristo. Aliwen si-kara bengat i timolong son si-kak, no diket angken pay si Clemente, tan sota ira eshom ma kait kon emansilbi. Jet say ngaran ira niyay, naysolat ngo nodta dibsho nen Apo Shiyos ja naysolatan ira nonta nay-aknan ni biyag ja enshiy to engintegangan.

<sup>4</sup> Isonga say kowan ko, panimdeng kayon pasiya ni olay, ta totoo shakejo nen Apo Jesus, jet ipinshowak mowan ey panimdeng kayo! <sup>5</sup> Ipa-sas joy ka-anos jo so ni emin na totoo, ta si Apo Jesus,

magenon ondaw mowan ali ja medepod dangit. <sup>6</sup> Angken ngantoy mepesamak, eg kayo man-shanag, no diket panshawwat kayo et so nen Apo Shiyos ni emin na kasapolan jo, tan si-kato pay i pan-iyamanan jo. <sup>7</sup> Jet no sajay i dag-en jo, si Apo Shiyos i mengi-kan ni talna shi nemnem jo, ja medepo son si-kato met laeng. Sajay ya talna, enshiy toon maka-awat ja pasiya no toway toka pesing nga mengi-anshal, nem angken na enshiy toon maka-awat, sotan ngo eshan i mengitoshong ni poso jo, tan joka pannemnem, ta too kayon ememati so nen Cristo Jesus.

<sup>8</sup> Jet niman, iyay i ma-onod ja ibilin ko son si-kayo. Sota may-pangkep ni kamaptengan, ono sota kompormin pansigshan ni totoo, si-katoy topogen jon nem-nemen. Jet iyay pay iray maya-shom nodta inkowan ko la ja nemnemen jo: sota podno, kapatkan, tan sota pengonod ni piyan nen Apo Shiyos. Nemnem jo pay sota mapteng ja eg medaokan ni ngaaw, sota sessesmekan shakejo so ni totoo, tan sota eshom ma tayoka aporbalin mapteng. <sup>9</sup> Sota intorok son si-kayo ja inashal jo, tan inewat jo, ono sota inon-an jo son si-kak, kasta met sota intengnan jon inkowan ko, si-katoy onoran jo. No dag-en jo iyay, wára son si-kayo si Apo Shiyos ja mismon emengi-kan ni talna.

*Naka mansedamat nonta tolong ja in-akan jo di*

<sup>10</sup> Naka man-imdeng, tan naka mansedamat so nen Apo Shiyos, ta kimesdang i nemnem jon ontolong son si-kak mowan. Amtak met kitdi ey mapiyan kayon ontolong nontan, nem enshiy pesing jo. <sup>11</sup> Saja inkowan ko la, aliwén naka pan-isingil i eg jowak so tinodongan ali, ta say nemnem ko ma niman, mepnekak,

angken ngarantoy wára son si-kak. <sup>12</sup> Amtak ma niman ja manbiyag — inges to no esobday kasapolan ko, ono markodang. Isonga angken ngantoy mepesamak son si-kak, naydowamak mala ja man-enos no enshiy kenen ko, ono wára; no ebitegak, ono baknangak. <sup>13</sup> Esagana-ak ja mengitoded ni angken nganto, ta si Jesucristo, si-katoy emengi-kan ni kedsang ko.

<sup>14</sup> Nem ekak toy-an sota intolong jo son si-kak. Mapteng sotan na dingkayo ta nonta kasapolan koy tolong, tinodongan jowak. <sup>15</sup> Si-kayon i-Pilipos, amtayon mismo met ey nonta indekjas ko i Masidonia ni pilmiron inpangitoshok nonta mapteng nga shamag pangkep so nen Cristo, appayson si-kayo bengat i engi-kan ali son si-kak ni alos jo ja singa sobadit nonta intorok son si-kayo. Ta enshi nontan i en in-akan ni eshom ma emati shi eshom ma dogad son si-kak. <sup>16</sup> Jet angken nonta wára-ak shi Tisalonika, eminshowa ja engi-kan kayo son si-kak. <sup>17</sup> Nem aliwén sota in-akan jo son si-kak i naka pan-imdengi, nem say naka pan-imdengin pasiya, inon-an ko ey amtayon ontolong. Jet si Apo Shiyos, si-katoy onsobadit son si-kayon ma-ekan. <sup>18</sup> Sota tolong jo son si-kak ja inpaw-it jo ali so nen Ipaprodito, inewat ko, jet sotan na in-akan jo son si-kak, imanay shi kasapolan ko, jet simobda pay. Sotan na dingkayo, singa may-eshig ey si Apo Shiyos i in-aknan jo so, jet siya, kinostonan nen Apo Shiyos tep sotan na dingkayo, in-anam jo nodta piyan ton dag-en ni too to. <sup>19</sup> Si Apo Shiyos, ja naka panshedjawi, si-katoy mengi-kan ngo ni emin na mesepol jo, ta wára kayo son Cristo. Jet eg nagshengan sota

kabedinan ton mengi-kan ni kom-pormi so ni too to. <sup>20</sup> Si Apo Shiyos ja Ametayon tayoka shedjawa, si-katoy mayshedjaw ni olay ingka-tod ingka. Siya, satan da.

<sup>21</sup> Piyan kon pekikowan joy semek ko so ira nonta emin na emati son Cristo Jesus shitan. Jet angken sota ira a-aki tayod pamati ja kadwak shiyay, kowan sha ngo ey ibalikas koy semek sha son si-kayon emin shitan. <sup>22</sup> Jet emin ira sota ematid ja ilin kawad-an ko, agdalo sota ira ematin wared baley ni ari, sotan met laeng i kowan sha.

<sup>23</sup> Jet say shawat ko son Apo Shiyos, sota kaasi nen Apo Jesu-cristo ja wára son si-kayo, sapay koma ta sotan i mengitoshong ni nemnem jo.



## SOTA SOLAT NEN SAN PABLO PARA SO NONTA IRA I-KOLOSAS

<sup>1-2</sup> Si-kak si Pablo ja makasolat niyay et si Timoteo ja agi tayo shi pamati, si-katoy kadwak, jet say shawat mi, sapay koma ta kaasi-an shakejo nen Apo Shiyos, tan a-shoman to sota talna son si-kayo ja edapo met laeng son Apo Shiyos ja Ametayo. Sajay ya solat, para son si-kayon toood Kolosas ja kait min too nen Apo Shiyos ja makedsang i pamati to. Itnengi jo iyay ya kowan ko tep si-kak i sakey ya apostol nen Cristo Jesus et si Apo Shiyos i mismon enotok son si-kak.

<sup>3</sup> No timpo ni mika panshewat son Apo Shiyos, ja Ama nen Jesucristo, kamika man-iyaman ni olay ni maypangkep son si-kayo, <sup>4-5</sup> ta shinemag mi ey ebadeg i pamatiyo son Cristo Jesus, tan ebadeg i semek jo so ni emin na kait jon emati. Nonta pilmiro, intenengan jo iya esel nen Apo Shiyos pangkep so nen Jesucristo, ja podno, jet pinatiyo jet amtayo ma niman ey waray kon-oren jo la ja i-akan nen Apo Shiyos ali shi dangit. Isonga niman wara ma i ebadeg ga semek jo tan pamatiyo. <sup>6</sup> Jet sota esel nen Apo Shiyos pangkep so nen Jesucristo, ja simabi son si-kayo, si-katoy emankaiweshis shi emin na dogad shiya dobong. Jet waray nanbanagan to ni olay, ja inges to son si-kayo, manshoki nonta pilmiron akew wa inamta-an jo ey sota podnon kaasi, medepo son Apo Shiyos. <sup>7</sup> Amta mi ey sajay met laeng i intoro da nen Ipapras son si-kayo. Si Ipapras, emepiyal, isonga si-katoy inbetkag mi ja en menosho son si-kayo. Si-katoy

sakey ya ensemek mi ja emansilbi met laeng son Cristo. <sup>8</sup> Jet si-katoy mismon engikowan son si-kami ey waray ebadeg ga semek jo ja edapo so ni Ispirito Santo nen Apo Shiyos.

<sup>9-10</sup> Isonga nontan na akew wa intenengan mi so niyay, kanayon na kamika manshewat son Apo Shiyos ni pansigshan jo, jet say shawat mi para son si-kayo, a-shoman to pay koma sota amtayo maypangkep son si-kato, say ewatan jon pasiya no ngarantoy piyan ton dag-en jo, ja mayenam shi too to, tan si-katoy mengi-kan ni pan-imdengan to. <sup>11</sup> Jet say shawat mi pay son Apo Shiyos, si-kato komay mengi-kan ni edagshen kedsang ni pamatiyo, ta Manakabalin, say angken ngantoy mepesamak son si-kayo, itoled jo et man-enos kayo, tan man-imdeng kayo pay koma. <sup>12</sup> Jet kowan mi pay jey amta-an jo komen man-iyaman ni olay son Apo Shiyos, ja Ametayo, ta inkowan to met ey kitoka maykeshi ja mayda-kam so nonta mapteng nga wara son si-kato ja i-akan tod dangit so nonta ira memati son si-kato. Pan-iyaman kayo son si-kato, <sup>13</sup> tep istay ya intorayan shakito nen Satanas, nem niman, si Apo Shiyos, si-katoy engi-kan son si-katejo ja itorayan nen Jesucristo ja Anak to. Si Cristo, si-katoy ensemek nen Ameto, <sup>14</sup> jet si-katoy kabol la ewaya-an tayo, ono epakawanan ni basol tayo.

*Sota nanbalinan ni inpamati jo son Cristo*

<sup>15</sup> Si Apo Shiyos, eg ma-sas, nem si Cristoy dimaw ali ja engipa-sas ni emin pangkep son Apo Shiyos. Si Cristo, wara ngo eshan, asan kepalsowa-a nen Apo Shiyos i kompormi. <sup>16</sup> Emin na banag ja wared dangit, tan shiya dobong — saja ma-sas, tan saja eg ma-

sas — si Apo Shiyos i emalsowa — angken pay sota ira anghil la kangeto-an shi dangit, nem si Cristoy kadwa ton emalsowa iren jay. Si Cristoy kabol la epalsowa-an sha, say si-kato met laeng i ishayaw sha. <sup>17</sup> Waren sigod si Jesucristo nonta eg pay laeng pinalsowa nen Apo Shiyos ira ja emin na palsowa, jet na-olnos sa emin, ta si-katoy nanngel. <sup>18</sup> Si Cristo, si-katoy pangolo ni emin na emati; isonga si-katoy singa toktok et sota ira emati, si-kara ngoy may-eshig ey bakdang to. Si Cristoy kangeto-an na mengitoshay so ni emin na palsowa; nan-ongal, isonga si-katoy edapo-an ni biyag tayon emati. <sup>19</sup> Si Apo Shiyos, ninem-nem to ey i-inges to si Jesucristo ja Anak to son si-kato met laeng, say emin na wara son si-kato, wara ngo son Cristo. <sup>20</sup> Jet ninem-nem to pay ey sajay ya Anak to, si-katoy mengolnos ni emin na wared dangit, tan shiya dobong, say may-odi met laeng son si-kato, ja tongpalen shay piyan to. Jet say kabol la nay-oli-an ni emin ja angken nganto son Apo Shiyos, sota inkatey nen Cristo shi koros ja imayos i shaletto.

<sup>21</sup> Nontan da, enshi kayo nin son Apo Shiyos jet en-oges jo pay si-kato. Ngaaw ni olay nontan i aramid jo, <sup>22</sup> nem niman, ta etey sota bakdang nonta Anak to shi koros, mapteng ma, tep in-oli shakejo son si-kato met laeng, jet niman, no onsango kayo son Apo Shiyos, say pingsas to son si-kayo, enshiy ngaaw son si-kayo, enshiy to bedawen son si-kayo, mapteng kayo ma. <sup>23</sup> Nem mesepol la itoloy joy pamatiyo, karejo ibi-jag; mesepol la edagshay pamatiyo. Jet mesepol pay ya eg jo itolok ka maysi-jan nodta esel nen Apo Shiyos ja naytoro son si-kayo, ta sajay i kawad-an ni namnama jo.

Jet sajay ya esel nen Apo Shiyos, naykowan da shi emin na sakop ni dobong, jet si-kak i sakey ja kaontolong ja mengikowan so.

<sup>24</sup> Jet niman, angken naka emedigdikati pangkep son si-kayo, ebadeg i imdeng ko, tep saja naka pandikat, toloy ni inpandigat nen Cristo, pangkep nonta emati ja may-eshig ey bakdang to. <sup>25</sup> Si Apo Shiyos i enotok son si-kak ja ontolong so ira nonta emati son Cristo, say ikowan ko sota esel to ja mesepol la amta-an ni tootod ja dobong. Jet sajay, panmaptengan jon aliwen Hodiyo. <sup>26</sup> Sajay ya naka panpa-amta, enshiy makamta, angken sipa, ni dinesos den tawen ja epalabas, nem niman, inpa-amta nen Apo Shiyos so nonta ira too to. <sup>27</sup> Jet sota plano ton inpa-amta to niman, enshiy eshom nem eg sajay: si Cristo, waren mismo son si-kayo. Eg to nin inpa-amta iyay ya plano to nonta bayag da, ta say piyan ton pa-amta-an so, sota memati son si-kato niman, jet sajay ya plano ton epateg, enshiy to kay-ingesan. Jet si-kayon aliwen Hodiyo, naydakam kayo ma. Isonga niman wara may namnama jo ja maydakam son Apo Shiyos shi dangit. <sup>28</sup> Isonga si Cristo, si-katoy mika pan-itoro so ni emin na too, ja mika panbanshaani ira, tan mika pantod-i ni emin na amta mi, ta piyan mi komen emin na totoo, enshiy kolang ni pamatira son Cristo. <sup>29</sup> Jet niman, say metongpal iyay, mesepol la ikalikatan kon dag-en iyay et dag-en ko iyay, ta asdeg ton ebadeg i tolong nen Cristo son si-kak.

## 2

<sup>1</sup> Inkowan ko iyay ta piyan kon ewatan jo sota naka pengisekit son si-kayon i-Kolosas, tan sota ira tood Laodisia, tan sota eshom pay ja eg engasas son si-kak.

<sup>2</sup> Ta say piyan ko, onkedsang i nemnem jo ja manseksekey ya mewad-an ni ebadeg ga semek so ni sakey tan sakey son si-kayo. Jet piyan ko pay ya amtan joy maypangkep son Cristo, ta si-katoy piyan nen Apo Shiyos ja ipa-amta, say si-katoy panshingan jon pasiya. <sup>3</sup> Nemnem jos Cristo, ta si-katoy edapo-an ni emin na mesepol la ashalen tayo. <sup>4</sup> Sajay i ikowan ko son si-kayo, ta say eg kayo may-owapan ni singa mapteng nga itoro ni eshom son si-kayo. <sup>5</sup> Agpayson arawi-ak son si-kayo, nem wara kayo ni olay shi nemnem ko, jet naka manimdeng ta mapteng i olnos jo, tan makedsang i pamatiyo son Cristo.

*Karejo pati-en sota ngaaw wa itoro ni eshom*

<sup>6</sup> Niman, ta si Cristo Jesus i pinatiyo ja Apo jo, mesepol la si-katoy piyalen jo ja mengiredan ni joka panbiyag ni inakew. <sup>7</sup> Kostoy naytoro son si-kayo, isonga dagsha-iyo i pamatiyo son Cristo, ja ondeshek son si-kato ja singa damot, jet no ondeshek, memasig ja onba-deg sotan na pamatiyo et man-iyaman kayo ni olay son Apo Shiyos.

<sup>8</sup> Asas jo sota toon mengewis son si-kayo, ta piyan shen i-owapan shakejo say si-karay songoren jon kay-a-shoman. Singa mapteng i toro sha, nem o-owap kari ja enshiy silbi to; aliwen toro nen Cristo, no diket nemnem tan karaoyan bengat ni too. <sup>9</sup> Nemnem jos Cristo, ta si-katoy nay-anak ja inges tayon too met laeng, nem wara pay ngon emin son si-kato sota wara son Apo Shiyos. <sup>10</sup> Isonga karejo sintilen i kowan ni eshom, ta niman na emati kayo son Cristo, wara son si-kayon emin, enshiy kolang jo ja pepno-an ni eshom.

Si Cristo, si-katoy Kangeto-an ni angen nganto, pati anghil.

<sup>11</sup> Si-kayo, niman na emati kayo son Cristo, too kayo ma nen Apo Shiyos. Sota ira eshom, kowan sha ey too ira nen Apo Shiyos ta ekogit ira, nem aliwen sotan sota kayda-kaman ni too son Cristo. Say kaydesinan tayo ja too nen Cristo shima eshom, sota eg tayo ma pandeka nonta pipiyan ni bakdang tayon dagen ja ngaaw, aliwen sota kogit. <sup>12</sup> Jet say sakey pay, sota inkabonjag jo. Nonta ebonjagan kayo, nay-arig ey nayda-kam kayo nonta naydiyag si Cristo nonta inkatey to. Jet nontan met laeng, singa nayda-kam kayon ekibiyag son si-kato nonta nan-ongal, ta emati kayo ey inpanbiyag nen Apo Shiyos si Cristo shi patey pangkep ni panakabalin nen Apo Shiyos met laeng. <sup>13</sup> Nontan da, enshi kayo son Apo Shiyos, isonga may-eshig ey singa etey kayo pangkep ni basol jo, nem niman, inda-kam shakejo nen Apo Shiyos son Cristo ja nay-aknan ni biyag, ta pinekawanan ton emin i basol tayo. <sup>14</sup> Istay ya sigoradon meshosa kito tep shineshal tayoy dinteg nen Apo Shiyos, nem eg to itoloy ya shosa-en shakito, tep etey si Cristo shi koros. <sup>15</sup> Jet nonta etey ma, inebak to mala si Satanas, tan sota ira dimonyon intorayan to, jet inpa-sas to ni inpan-ongal to ey enshi malay pesing sha, tep na-abak mala ira.

<sup>16</sup> Niman ma, ta enshi la sota kepemedaw nen Apo Shiyos son si-katejo, karejo i-onod shagos sota bilin ni eshom no toy-an shay pamatiyo, ja kowan sha ey waray parit ja eg jo kenen, ono eg jo inomen, ono sota kowan sha ey pengonod jo ni ngilin ni Hodiyos ja tinaw-en, binodan, ono dinomingko. <sup>17</sup> Ta sajay ya ba-

nag, emengipa-amta bengat nonta bayag da ni isabi ali nen Cristo, nem niman, si Cristo i kawad-an ni podnon ma-onod. <sup>18</sup> Isonga karejo pati-en sota kowan ni eshom ma too ey eg kayo mebedin na maysedakan no eg kayo mankombaba ja manshedjaw so nonta ira anghil. Sajay iren too, kowan sha ey waray inpa-amta nen Apo Shiyos son si-kara, nem karejo kari pati-en. Sajay, dastog sha bengat, ey enshiy kabol, ta saja kowan sha, edapo bengat shi nemnem sha; aliwen edapo son Apo Shiyos. <sup>19</sup> Karejo ira pati-en, ta eg ira nantoloy ja emati son Cristo. Mesepol la si Cristoy topogen jo, ta si-katoy pangolo tayon emati et si-katoy emengi-kan ni kedsangan ni pamati tayo, tan si-katoy kabol la nansaksakeyan tayo. Jet si Apo Shiyos pay i kaontolong son si-katejo say onbadeg i pamati tayo. Arig nen Cristoy toktok ja pangolo ni bakdang ja emengi-kan ni pansigshan to.

<sup>20</sup> Isonga no emati kayo son Cristo, may-eshig ey nayda-kam kayo son si-kato ja singa etey kayo, et no etey kayo, enshi may biyang jo nodta rilihiyon jo da nonta bayag. Jet apay nga pati-en jo pay laeng sota bilin sha, ja singa naykait kayo so nonta ira tood ja dobong ja eg emati? <sup>21-22</sup> Sajay ya toro sha, ono bilin sha, edapo bengat shi nemnem sha. Isonga angken eg jo ira ikaso no waray shaka iparit son si-kayo ja kowan sha ey “Karejo kenen”, “Karejo namtan”, ono “Karejo pishaten”, ta sotan, mekan na kenshat; enshi met i to naykamitan shi pamati. <sup>23</sup> Sajay ya toro sha, singa mapteng ta emengi-kan ni pankombaba-an, tan kowan sha ey mapteng i itoled tayo so ni digat, tan singa mapteng ira tep masi-met iren mengiredjaw, nem enshiy silbi to tep sota on-onod so,

ka-onong sota ngaaw wa nemnem sha.

### 3

<sup>1</sup> Niman, ta badoy biyag jo, ja may-eshig ey ekibiyag kayo son Cristo, tan nayda-kam kayo son si-kato ni inpan-ongal to, mesepol la say toshongen ni poso jo, sota pengonod ni mapteng nga ogadi nen Cristo. Ta si Cristo niman, wared dangit, ja in-aknan nen Apo Shiyos ni panakabalin ton mantoshay. <sup>2</sup> Sota maypangkep son Cristo shi dangit, si-kato komay nemnemnenen jo, ja aliwen inges toy nemnem ni karakdan na tood ja dobong, <sup>3</sup> ta si-kayo, may-eshig ey singa etey kayo ja enshi may kaybiyangan jo nodta nemnem ni karakdan shi dobong. Niman ma, say biyag jo, si Cristo shi dangit i engegshi, ta wara kayo son Apo Shiyos. <sup>4</sup> Si Cristo i koston kawad-an ni biyag jo, jet no man-odi ali mowan, mesadatan i bakdang tayon may-inges son si-kato; onniyal, ja inges toy wared dangit.

*Sota anam ma dag-en, tan sota aliwen anam ma dag-en ni toon Cristo*

<sup>5</sup> Niman, ta enshiy kaybiyangan jo nodta nemnem ni karakdan shiya dobong, ibiyang jo sota dingdingkayon ngaaw. Karekayo memii, ono mandeka ni eshom ma ensekig ga aramid; karejo nemnemen ja dag-en sota ngaaw wa pangkep; karejo pingitan sota banag ga pipiyan jon pasiya, ta sotan, singa inges toy panshedjaw ni sinan shiyos. <sup>6</sup> Karejo dag-en iyay, tep sota mandeka ni olay niyay ya ngaaw wa aramid, shosanen nen Apo Shiyos tep eg ira memati ni bilin to. <sup>7</sup> Nontan den eg kayo pay laeng memati, nay-inges i ogadiyo nodta toon nandagdaga ni ngaaw wa ogadi. <sup>8</sup> Nem niman ma, apil. Isonga ibi-

jag jon dag-en ira jay ya aramid: sota igem, bonget, somang, tan sota eshom ma esel ja menekit ni eshom; <sup>9</sup> tan ibi-jag jo pay sota pan-i-inolbod. Sina-datan jo met sota sigod ja ngaaw ja wared nemnem jo, isonga enshi komay ngaaw wa ogadiyo. <sup>10</sup> Jet wára ma son si-kayoy badon nemnem, ja pinalsowa nen Apo Shiyos ja nay-inges son si-kato. Jet toka bado-i ni olay, say amta-an jon pasiya i ogadi to. <sup>11</sup> Isonga niman ma, enshiy en nandasinan ni angken sipen too ja binado-an nen Apo Shiyos. Nan-i-inges i toon aliwen Hodiyoos ono sota Hodiyoos, nan-ashal ono eg nan-ashal, baga-en ono aliwen baga-en. Nan-i-inges ta say menemnem ma, si Cristo i wára son si-katejon emin.

<sup>12</sup> Jet niman ma, tep too shakejo nen Apo Shiyos, ja ensemek to, mesepol la isa-dat jo sota mapteng nga ogadi nodta sigod ja ngaaw, jet iyay i eshom: mesepol la wára son si-kayo i kaasi, anos, tan penodong ni kait ta too; mesepol la eg jo ipilit i kostoyo. <sup>13</sup> Pan-inanos kayo, mesepol la esagana kayon memekawan ni eshom, no waray eg jo pan-i-inawatan. Si Apo Jesus, pinekawanan shakejo, isonga mesepol ngon pekawanan jo sota nanbasol son si-kayo. <sup>14</sup> Jet niman, say epateg komen pasiya ja wára son si-kayo, sota penmek jo ni sakey tan sakey, ta si-katoy emengi-kan ni pansek-sekeyan jo ni olay. <sup>15</sup> Jet sota olnos ja wára son si-kayo ja edapo son Cristo, mesepol la si-kato komay nemnemen jo. Karejo dibdibkan ey si Apo Shiyos, inpansaksakey shakejo met nonta inpanbalin shakejo ni too to, jet singa sakey kayo men bakdang. Tan karejo dibdibkan ja man-iyaman ni olay son Apo Shiyos, kabol niyay ya dingka to son si-kayo.

<sup>16</sup> Jet niman, say eg jo dibdibkan sota toro ja intenengan jo ja esel nen Cristo, osal jon emin sota amtayon pesing nga mengitosh, tan memanshaan, ni sakey tan sakey son si-kayo. Tan i-shom jo pay shi iyaman jo son Apo Shiyos sota kankansiyon ja pengiredjaw son si-kato, pati sota ira salmo. <sup>17</sup> Jet emin na dag-en jo, ono ikowan jo, nemnem jo nin koma sota kayshedjawan nen Apo Jesus. Pan-iyaman kayo ni olay son Apo Shiyos ja Ametayo, ta too shakejo pangkep son Cristo.

<sup>18</sup> Si-kayon bibiin waray asewa to, patiyoy asewayon daki, ta sajay i anam ma dag-en ni emati son Cristo. <sup>19</sup> Jet angken si-kayon daleki ja waray asewa to, mesepol la sessesmeken jo ni olay i asewayon bii; karejo ira penginda. <sup>20</sup> Si-kayon a-anak, mesepol la pati-en jo ni olay sota kowan ni maka-anak son si-kayo, ta sajay i kekosto-i nen Apo Shiyos. <sup>21</sup> Jet si-kayo ngon a-ama, karejo ida-karan i annak jo ni seg-ang, say eg ira medismaya.

<sup>22</sup> Si-kayon baga-en, patiyoy ni olay ja emin i ikowan ni apo jo; aliwen man-edisto kayo bengat nem wára sota apo jo ja emanbantay son si-kayo, say ikowan jo ey ikowan nonta apo jo ey ma-obda kayo. Ta aliwen sota aporbal ni too bengat i jo nemnemen. Pan-obda kayon kosto ja mandepod poso jo, ta sotan i anam ni toon memati son Apo Shiyos. <sup>23</sup> Angken nganton obda, karejo nemnemen ey too bengat i joka pansilbi-i, no diket nemnemnemen jo koma ey joka pandag-a sotan kabol son Apo Jesus. <sup>24</sup> Amtayo met ey si Apo Jesus, waray isobadit ton konkona jo kabol nonta dingkayo son si-kato, jet say i-akan to son si-kayo, biyag shi dangit. Si Cristoy joka pansilbi-i, <sup>25</sup> jet no eg jo

onoren iyay, ja ngaaw i pesing jo, ikaro jo son Apo Shiyos. Si Apo Shiyos, nan-i-inges i toka pesing shi totoo; enshiy toka pabori.

#### 4

<sup>1</sup> Isonga angken si-kayon waray baga-en to, mesepol ngon mapteng i pesing jo son si-kara; karejo ira ida-karan. Karejo dibdibkan ey waray apo jod dangit ja mesepol la pati-en joy bilin to.

<sup>2</sup> Jet iyay i bilin ko son si-kayo ni maypangkep ni panshewat jo son Apo Shiyos. Karejo diwayan na manshewat son si-kato; karejo ekdasan, tan karejo dibdibkan ja man-iyaman son si-kato. <sup>3</sup> Jet say kowan ko pay, karejokami dibkan shi panshewat jo, say i-aknan shakami nen Apo Shiyos ni waya mi ja mengikowan pangkep son Cristo. Say piyan kon itoro, sota plano to nonta bayag da ja niman bengat i inpa-amta-an to so. Sotan i naka itoro ni olay; isonga iyayak niman shiya badoran ja naybalod. <sup>4</sup> Nem irewati jowak ka, say idawag kon pasiya sota plano nen Apo Shiyos pangkep so nen Cristo, ta si-katoy mesepol la dag-en ko.

<sup>5</sup> Si-kayo, karejo ba-ba-ngaten i joka dagdag-a ni joka pekikadwa so nonta ira enshiy pamati to, say enshiy sha bedawen son si-kayo. Iringan jon mengikowan koma son si-kara ni maypangkep son Cristo. <sup>6</sup> No bilang ey waray tabtabalen jo, singpet joy tabtabal son si-kara, say mapteng i pengitneng sha, say no bilang ey waray mansedodsod son si-kayo, amtayoy isongbat jo.

#### *Ka-onoran na togon*

<sup>7</sup> Si Tikiko, ja ensemek tayon agi shi pamati, emepiyal la onto-long son si-kami ni mika pansilbi son Apo Jesus, isonga si-kato day

mengikowan niya edagdaga son si-kak. <sup>8</sup> Say kabol la ibetkagan ko so da son si-kayo, piyan kon say amta-en joy pangkep son si-kamid jay, tan say pekedsang tokejo, tan say eg kayo medismaya. <sup>9</sup> Si Onisimo i kadwa to da, ja kaidiyan jo ngo met laeng. Sajay den too, emepiyal ngo, tan ensemek tayon agi shi pamati. Sajay ya shadwen too, si-karay mengikowan ni emin na shamag ded jay.

<sup>10</sup> Si Aristarko ja kadwak shiya badoran, inkowan to ey pekikowan koy semek to son si-kayo, jet angken si Marcos ja kasingsing nen Birnabe, inges to met laeng i kowan to. Jet say kowan ko pangkep so nen Marcos, karejo dibdibkan sota inkowan ko son si-kayo nontan da ey no bilang ey ondabas da shita kad-an jo, singpet jo. <sup>11</sup> Tan si Jesus Hosto, inkowan to ngo ey ibalikas koy semek to son si-kayo. Saja tedo bengat iray Hodiyo ja kait kon emengikowan pangkep so nonta pantoshayan nen Apo Shiyos, jet si-karay emengi-kan ni imdeng ko.

<sup>12</sup> Jet si Ipapras, ja kaidiyan jo met laeng, inkowan to ngoy semek to son si-kayo. Sajay ya si Ipapras, emansilbi met laeng son Jesucristo. Kanayon ja toka ishawshawat son Apo Shiyos i panmaptengan jo. Toka ishawshawat son Apo Shiyos ey aknan shakejo koma ni kedsang ni pamatiyo, tan ipa-amta to pay koma son si-kayo sota piyan ton dag-en jo, say enshiy showashowa jo. <sup>13</sup> Jet si-kak, naka aporbalin mismo ey ebadeg i toka pengisekit son si-kayo. Jet angken pay sota ira i-Laodisia, tan sota ira i-Hirapolis, toka ira isakit. <sup>14</sup> Jet angken si Lucas pay ja doktor, ja ensemek tayon agi shi pamati, tan si Dimas, inkowan sha ngo ey pekikowan koy semek sha son si-kayo.

<sup>15</sup> Jet si-kak ngo, piyan ko ngon pekikowan joy semek ko so nonta ira a-aki tayod pamati ja i-Laodisia, tan son Nimpa, tan sota ira kait ton emesa-sa-nop shi baley to say manshedjaw ira son Apo Shiyos. <sup>16</sup> Sajay ya solat ko, no meksheng nga ibasayo nonta ira ematid ta kad-an jo, i-kan jo ngod Laodisia, say ibasara nodta shaka kesa-sa-nopi. Jet sota sakey ya solat ko so nonta i-Laodisia, basayo ngo.

<sup>17</sup> Say sakey pay, ikowan jo so nen Arkipo ey mesepol la itoloy ton dag-en sota obden in-awat nen Apo Shiyos son si-kato.

<sup>18</sup> Si-kak si Pablo. Si-kak ka mismoy engisodat niya ka-onoran na naysolat. Karejo dibdibkan na emin ey wára-ak shiya badoran; irewátiyowak.

Sapay koma ta kaasi-an shakejo nen Apo Shiyos.

## SOTA PILMIRON SOLAT NEN SAN PABLO PARA SO NONTA IRA I-TISALONIKA

<sup>1</sup> Si-kak si Pablo ja makasolat niyay jet say kait ko si Silas nen Timoteo. Jet sajay ya solat ko, para son si-kayod ta siyodad ni Tisalonika ja kait min emati so nen Apo Shiyos ja Ametayo, tan si Apo Jesucristo. Sapay koma ta ma-shoman sota kaasi, tan talna ja wara son si-kayo ja edapo met laeng so nen Apo Shiyos.

*Naka man-iyaman son Apo Shiyos maypangkep son si-kayon emin shitan*

<sup>2-3</sup> No manshewat kami son Apo Shiyos, mikejoka ida-kam ni olay et kamika man-iyaman pay son Apo Shiyos ja Ametayo maypangkep son si-kayon emin shitan. Ta ebadeg i nanpa-no-an ni pamatiyo, tan mapiyan kayo ma ja ontolong, ta wara may semek jo ni kait jo. Tan eki-det pay ita namnama jo so nen Jesucristo ja Apo tayo. <sup>4</sup> A-aki, amta mi ey si Apo Shiyos, ebadeg i semek to son si-kayo, isonga pinidi tokejo ja manbedin ni too to. <sup>5</sup> Amta mi, ta sota inpangikowan mi son si-kayo nonta mapteng nga shamag maypangkep so nen Jesucristo, aliwen na mison si-kami i edapo-an nontan na esel, no diket inatngan shakami ni Ispirito Santo nen Apo Shiyos. Isonga waray kedsang nonta inkowan mi, jet si-katoy engi-kan ni enigorado-an jo ey podno. Inon-an jo met i mapteng nga ogadi mi nonta inpaki-iyam mi son si-kayo. Jet sotan i ninemnem min dag-en say waray onoran jo. <sup>6</sup> Jet siya, si-kami, tan si Apo Jesus, i inonoran jo. Nanda-kam kayo pay ni ebadeg ga digat, pangkep

bengat ni inpamatiyo nonta esel to, nem ebadeg met laeng i imdeng jo ta sota Ispirito Santo nen Apo Shiyos, wara son si-kayo. <sup>7</sup> Jet niman, mebedin na si-kayo ngoy inonoran ira nonta emin na emati shi Masidonia, tan sota ira emati shi Akaya. <sup>8</sup> Ta shinemag sha sota maypangkep ni pamatiyo et si-kayoy kabol la inamta-an sha so ni esel nen Apo Shiyos. Jet aliwen shiman bengat, no diket eshamag pay shi emin na dogad. Isonga eg mesepol la ikowan mi pay laeng i maypangkep son si-kayo, <sup>9</sup> ta angken towen dogad ja dawān mi, si-kara et ngo mowan i emengikowan son si-kami ni maypangkep son si-kayo. Say kowan sha, inewat jokami ni indaw mi shita kad-an jo et inbi-jag jon manshedjaw nodta sinan shiyos jo et si Apo Shiyos may sinongod jo. Jet kowan sha ma niman ey wara kayo ma so nonta podnon Shiyos ja sibibiyag, <sup>10</sup> jet say joka ma sesseskera, si Jesucristo ja Anak ton medepo alid dangit mowan. Sajay sota si Jesus ja inpan-ongal nen Apo Shiyos et si-katoy mengisedakan ali son si-katejo say eg shakito shosa-en nen Apo Shiyos ni ka-onoran alin timpo.

## 2

*Nemnem jo sota inaspasing mi nonta wara kami shita kawad-an jo*

<sup>1</sup> Si-kayon a-akik shi pamati, amtayo met ja mismo ey sota indaw mi shita kad-an jo, asdeg toy nanbanagan to. <sup>2</sup> Nonta inpanshalan mid Pilipos ja ondaw shita kad-an jo, ngaaw i inaspasing ni tood man son si-kami; binebaingan shakami. Nem amtayo, inaknan shakami nen Apo Shiyos tayo ni toled ja mengikowan son si-kayo nonta mapteng nga shamag ja edapo so nen si-kato. Eshakel shitan i makakontra son si-kami



maypangkep ni mika pan-ikowan, nem angkena. <sup>3</sup> Sajay ya mika pengadok so ni too, podno; aliwén edapod ngaaw wa pangkep ono sikap. <sup>4</sup> Si Apo Shiyos, inapolbaran tokami et sota mapteng nga shamag pangkep so nen Jesus, inpiyal to son si-kami, ey si-kamiy mengikowan so ni totoo. Jet say mika pengitosh, eg mi i-anam nodta kowan ni too ey piyan sha, no diket emay-enam nodta piyan nen Apo Shiyos sa maytosh say man-imdeng si Apo Shiyos, ta sikato bengat i maka-amta ni wared nemnem mi. <sup>5</sup> Amtayon met ey enshiy esel min emengantiyok; tan amta nen Apo Shiyos ey enshiy mi inosal la kekaskasin mapteng nga esel ja pengeda-an mi ni pilak son si-kayo. <sup>6</sup> Aliwén sota pengiredjaw jo son si-kami i mika kamkamkami nonta wára kami shita kawad-an jo, ono sota pengiredjaw ni eshom. <sup>7</sup> Nontan da, mebedin na sota ibilin mi, si-katoy pilit ta dag-en jo, ta apostol kami nen Cristo; nem na-anos kamin singa sota ina ja emengajowan ni anak to. <sup>8</sup> Ebadeg i semek mi son si-kayo, isonga piyan min pasiya ja itoro son si-kayo sota mapteng nga shamag ja edapo son Apo Shiyos. Jet aliwén sajay bengat, no diket esagana kami pay ya mengosal ni biyag min ontolong son si-kayo. Sotan i ka-asan to ey bima-deg i semek mi son si-kayo!

<sup>9</sup> Jet si-kayon a-akik shi pamati, mebedin na eg jo dinibkan pay laeng sota itsora ni mika pansepol ni panbiyag mi nontan. Angken edabi, tan ka-akawan, kamika man-obda ni panbiyag mi, ta enasneng kamin waray mankastos son si-kayo maypangkep son si-kami, ni mika pengikowan nonta mapteng nga shamag ja edapo so nen Apo Shiyos. <sup>10</sup> Si-kayon mismo i maka-amta, tan kasta met son Apo Shiyos ngo, amta to

ey sota piyan ton mapteng nga dag-en mi, si-katoy dingka mi ni olay son si-kayon emati et enshiy mebedaw nonta emin na dingka mi. <sup>11</sup> Amtayon mismo met sota inpasing mi son si-kayo, ja inges toy kepesing ni ama ja memidin ni annak to. <sup>12</sup> Isonga binidin miy sakey tan sakey son si-kayo, say onkedsang i nemnem jo. Jet inadok mi pay nontan ey say dag-en jo koma ni olay, sota mapteng ta si-katoy anam ni toon emati son Apo Shiyos. Sajay i inkowan mi, ta si Apo Shiyos i emili son si-kayo ja mayda-kam shi pantoshayan to, ono shi shayaw to.

<sup>13</sup> Jet kamika man-iyaman ni olay so nen Apo Shiyos maypangkep ni sajay, ta idi intengan jo sota inkowan mi ja esel nen Apo Shiyos, inewat jo. Jet sotan na inewat jo, indasin jo ey aliwén edapod nemnem ni too, no diket si Apo Shiyos i edapo-an to. Jet sotan na esel nen Apo Shiyos i emengitoshong son si-kayo, ta emati kayo. <sup>14</sup> Si-kayon a-akik shi pamati, sota dina-kaman jon digat, inges to sota dina-kaman ira nonta tood Jodia ja kait tayo met laeng shi pamati son Cristo Jesus, ja pinedigat ni kaidiyan shen Hodiyo, ta say emaligat met laeng son si-kayo, sota kaidiyan jo. <sup>15</sup> Sota apo ira niya Hodiyo, si-karay bimonon so nonta ira para padto nen Apo Shiyos nonta bayag da. Jet niman, sajay ngo iren anak sha, si-karay bimonon so nen Apo Jesus et si-kara pay i emaligat son si-kami. Nem eg kosto nen Apo Shiyos iya shaka dagdag-a. Eg sha pay nemnemen i pansigshan ni kait shen too shiya dobong, <sup>16</sup> ta shakamika dingdinga ja mengikowan nonta esel nen Apo Shiyos so ira nonta toon aliwén Hodiyo, say maysedakan ngo ira koma. Sajay i nay-eshom pay

nodta basol sha ja shaka ma-ma-a et anongosto ma ey shanshanin shosa-en ira nen Apo Shiyos.

*Piyan kon amta-en i kasesaad jo, isonga inbetkag ko la si Timoteo*

<sup>17</sup> Si-kayon a-akik shi pamati, simpian mikejo, isonga piyan min pasiya ja asen mikejo mowan. Angken nonta ikaydejas mikejo so, ingkato niman na nan-i-inarawi kito, epaladoy nemnem mi son si-kayo. <sup>18</sup> Piyan min pasiya ja on-oli son si-kayo mowan shitan et si-kak, naka memasig ey ondawak da son si-kayo, nem si Satanas toka kolkolkola. <sup>19</sup> Say naka pemasigi ja ondaw da son si-kayo, enshiy eshom ma kawad-an ni namnama mi, ono imdeng mi, ono singa primiyomi ni idaw ali nen Apo Jesus, no eg si-kayo bengat. <sup>20</sup> Ta agpayso ja si-kayoy kawad-an ni shayaw mi, tan emengikan ni imdeng mi.

### 3

<sup>1-2</sup> Anongosto ma ta nantaktakded kamin ebayag ni pengamta-an mi son si-kayod tan, eg mi itoled i shanag mi, isonga ninemnem mi ey mapteng no si Timoteo i ibetkag mi son si-kayo da, ey si-kamiy mebayan shi Atinas. Inbetkag mi la si Timoteo shitan, tep emepiyal la agi tayo shi pamati, ja kait min emansilbi so nen Apo Shiyos ni mika pengikowan nonta mapteng nga shamag nen Cristo. Si-katoy inkowan mi ey en ontolong son si-kayo, say onkedsang i pamatiyo, <sup>3</sup> say enshi komay en medismaya son si-kayo pangkep ni saja digat ja tayoka da-da-kamin emin. Amtayo met ey si-katejon emati, warentan kenshat i digat ja dakaman tayo. <sup>4</sup> Nonta wara kami son si-kayo, insigod min inkowan

son si-kayo ey waray digat alin da-kaman tayo, jet amtayo ey sikato ma iyay. <sup>5</sup> Sajay i kabola inbetkagan ko la son Timoteo son si-kayo, say amta-en ko no ngarantoy itsora jo, no makedsang pay laeng i pamatiyo ono enshi. Ta ekak maynemneman, naka manshanag ey baka et ey si Satanas, inadilaw tokejo; nakol ni enshi et day en panbenagan ni obda mi son si-kayo.

<sup>6</sup> Nem niman, ta imoli ali si Timoteo ja edapo son si-kayo, nakepak, ta mapteng i shamag ja inkowan to maypangkep son si-kayo. Kowan to ey ebadeg i pamatiyo tan semek jo so ni sakey tan sakey jet kowan to pay ey kanayon na jokamika nemnemnema, ja piyan jo ngon pasiyan asen jokami, ja inges toy mika dekna-a ngo. <sup>7</sup> Si-kayon a-akik shi pamati, niman ta sajay i intenengan mi maypangkep son si-kayo, emin sota digat mi ja mika da-da-kami, singa kima-jasma, ni imdeng mi maypangkep nonta shinemag mi pangkep ni pamatiyo. <sup>8</sup> Jet niman ma, singa onito la sota ebadeg ga mika panshanagi, ta sota pamatiyo son Apo Jesus, eki-det pay laeng. <sup>9</sup> Angken ngantoy badeg ni iyaman mi son Apo Shiyos, nandasin pay laeng i bindisiyon to son si-kami ni mika panimdeng maypangkep son si-kayo. <sup>10</sup> Jet angken kalebian, tan ka-akawan, kamika manshewat son Apo Shiyos sa pasiya ey itolok to komen asen mikejo mowan et say a-shoman mi no waray kolang ni pamatiyo.

<sup>11</sup> Jet niman, say shawat ko pay son Apo Shiyos ja Ametayo, tan si Apo Jesus, si-kara komay mengiredan son si-kami say mariwes i idaw mi la son si-kayo. <sup>12</sup> Jet say shawat ko pay son Apo Shiyos, sikato komay on-eshom so ni semek

jo so ni sakey tan sakey son si-kayo, tan onbadeg pay i semek jo so ni angken sipen totoo ja inges toy kaba-deg ni semek mi son si-kayo. <sup>13</sup> Si-katoy ontolong son si-kayo, say eki-det i nemnem jo et say eg kayo manbesol so nen Apo Shiyos ja Ametayo, ja kosto-an tokejo, ingkatod idaw ali nen Jesus ja Apo tayo. Jet sajay alin idaw to, may-odop ma son si-kato sota emin na emati son si-kato.

#### 4

##### *Iyay i ikowan min pesing jo*

<sup>1</sup> Niman ma, si-kayon a-akik shi pamati, iyay i keshaw mi, ono shawat mi son si-kayo, may-pangkep ni inpankagait tayo so nen Apo Jesus. Sota koma inashal jo son si-kamin ogadi ja mengikan ni pan-imdangan nen Apo Shiyos, si-kato komay onnayanayon ja itoltoloy jon dag-en. <sup>2</sup> Amtayo met sota intoro mi son si-kayo et sotan i toro met laeng ja edapo so nen Apo Jesus.

<sup>3</sup> Say piyan nen Apo Shiyos maypangkep son si-kayo, piyan ton maypilmi kayo son si-kato, ja eg kayo ma manbesol. Isonga karekayo memii ono mekileki.

<sup>4</sup> Si-kayon daleki, mesepol la dimpiyo i pesing jon mengesawa, nemnem jo sota mapteng nga kaporbali nen Apo Shiyos. <sup>5</sup> Say pengesawa, aliwén na en nemnememen i pandadsakan shi bii bengat, ja inges toy itsora ira nonta toon eg emati so nen Apo Shiyos. <sup>6</sup> Isonga mesepol la angken sipa son si-kayo, aliwén kayo memii. Ta say toon sajay i aramid to, toka pandoko-a i kait ton too. Mesepol la nemnememen jo ni olay ey si Apo Shiyos i onshosa so nonta toon sajay i aramid to. Isonga insigod min inbanshaan iyay son si-kayo. <sup>7</sup> Ta si Apo Shiyos, pinidi shakiton manbedin

ni too to say manbiyag kito ja eg manbesol ma. Onkawas sota inpamidi to son si-katejo no mandeka kito ni edogit ja aramid. <sup>8</sup> Jet sota eg memati niyay ya toro, aliwén na sota toon emengitosho niyay i eg to pinati, no diket si Apo Shiyos, ja engi-kan son si-kayo ni Ispirito Santo to.

<sup>9</sup> Nem no sota maypangkep ni penmek jo ni kait jon emati, eg mesepol la waray en maysodat ja pengamta-an jo ni pesing jo, ta si Apo Shiyos, si-katoy mismon engitosho son si-kayo ey sesmeken joy kait jo, <sup>10</sup> jet siya, dingkayo. Ta ensemek joy kait jon emin na emati shita intiron Masidonia. Jet say kowan mi, sajay komay itoloy jon dag-en, ja onnayanayon. <sup>11</sup> Jet daga jon emin i kabaalan jon manbiyag ga etalna; karekayo mekibiyang shi kedagdag-a ni kait jo. Nem pan-obda kayo et ni panbiyagan jo. Ta sajay i inbilin mi son si-kayo nontan pay laeng. <sup>12</sup> No sajay i pesing jo, sota ira toon enshiy pamati to, rispito-en shakejo. Jet no sota pangkep ni panbiyag jo, aliwén sota eshom i jo panshindan.

*Sota maypangkep ni nanketey ya kait tayod pamati, no ondaw mowan ali si Cristo*

<sup>13</sup> Si-kayon a-akik shi pamati, piyan min amta-an jo ey sota ira kait jo len emati ja nanketey, mapteng met laeng aliy panpano-an sha. Isonga aliwén na si-kato komay en pansekitan ni nemnem jo, ja inges toy wared nemnem ira nonta toon enshiy namnama sha shi ma-onod alin biyag. <sup>14</sup> Kitejoka memati ey si Jesus, etey, nem nan-ongal met laeng. Jet kitejoka memati met laeng ey si Apo Shiyos, panbiyag to ngo ali sota ira nanketey ja emati so nen Jesus et peki-odop to ira son Jesus no maykadwén idaw

to mowan ali. <sup>15</sup> Jet say planon inpa-amta nen Apo Jesus son si-kami, sajay. Si-katejon ebay-an ja wared biyag ni sajay alin i-oli mowan nen Apo Jesus, aliwen si-katejo i mepangdon may-aspol son si-kato. Nem say mepangdo, sota ira kait tayon emati ja nanketey da. <sup>16</sup> Sotan alin idaw nen Apo Jesus, mepangdo nin ja waray keljaw wa maytetnengan alid dangit, ja si-kato sota bilin na ikeljaw nonta kapitan ni anghil, tan wara pay i maytetnengan ja Janet ni trompita nen Apo Shiyos, jet sotan ma aliy idespag nen Apo Jesus, ja medepod dangit. Jet say dag-en to ma, panbiyag to ira sota nanketey ya emati so nen Cristo. <sup>17</sup> Jet si-katejon ebay-an na emanbibiyag pay laeng, ma-da kito met laeng et onted kito et aspolen tayo shi kad-an ni kolpot sota ira biniyag nen Apo Shiyos ja nanketey nontan, asan kito ma may-aspol so nen Apo Jesus shima naykayang nga dinespagan to. Jet no meksheng ma iyay, wara kito ma son si-kato ingkatod ingka, pati ira sota nanketey da nontan. <sup>18</sup> Jet niman ma, sajay ya inkowan ko la, si-katoy idiwdiwa jo so nonta ira emandeshingit ja eteyan ja kait jon emati.

## 5

<sup>1</sup> Si-kayon a-akik shi pamati, no sota maypangkep ni idaw mowan ali nen Jesucristo, eg mesepol la waray maysodat ja pengamta-an jo so no pigan ali. <sup>2</sup> Ta amtayo met ta mismo ey palibdibag ali i imotok to, ja arig toy kepesing ni toon mengibot no kawa ni dabi. <sup>3</sup> No sota ira totoo ket kowan sha ey, siya mapteng, ja enshiy en mepesamak son si-kara, si-kato et ngo mowan i kebiglan shen kesheshal sha, jet eg maydisi-an sotan na mepesamak ali. Mebiglen onsabi son si-kara,

ja inges to sota biin on-anak ja mebiglen dekna-en toy ensakit. <sup>4</sup> Nem si-kayon a-akik shi pamati, etod-an kayo ni maypangkep so nen Apo Jesus, isonga no onsabi ali sota timpo ja idaw ton palibdibag, eg kayo ondibag, ta esagana kayo. Arig to ey aliwen shi embolinget i kawad-an jo, <sup>5</sup> no diket may-eshig ey wara kayod eman-niyal ono ka-akawan. Aliwen na may-eshig ey wara kitod embolinget, ono kalebi-an. <sup>6</sup> Isonga man-edisto kito, tan mannemnem kito, ja aliwen inges toy ogadi ni eshom ja mansesinshayan ni olay ja singa na-ogip. <sup>7</sup> Say timpon ka-okip ni too, kalebi-an, tan si-kato pay i timpon shaka panboteng. <sup>8</sup> Nem si-katejo, wara kitod ka-akawan, isonga mese-pol la asen tayoy tayoka dagdag-a. Jet niman, say eg shakito ebaken nen Satanas, mansekana kiton menikpay ni kompormin pesing to. Sota pamati tayo tan semek tayo, may-eshig ey si-katoy singa danshok ka sa-din ni pagew tayo. Jet sota namnama tayon maysedakan, si-katoy may-eshig ey singa hilmit ja sa-din ni toktok tayo. <sup>9-10</sup> Sigoradon maysedakan kito, ta si Apo Shiyos, pinidi shakito ja manbedin ni too to, isonga enshiy pangkep ton menosa son si-katejo. Sigoradon isalakan shakito tep etey si Jesucristo ja Apo tayo, ja inkaro toy basol tayo. Isonga no metey kito, ono wara kito met laeng shi biyag, ni idaw to di, mayda-kam kito met laeng nodta biyag ja wara son si-kato. <sup>11</sup> Isonga niman ma, say dag-en jo, pakedsang jo ngoy nemnem ira nonta eshom ma kait jo, pantitinolong kayo, ja inges to met laeng sota joka dagdag-a niman.

*Ka-onoran na togon*

<sup>12</sup> Shewáten mi son si-kayon a-aki mi shi pamati ey patiyó ira sota pangolo jod pamati, ta ebadeg i obdara. Si-kara pay i emengitoshong son si-kayo shi koston piyan nen Apo Shiyos. <sup>13</sup> Jet sota obden dingkara, epateg; isonga patiyó ira, tan semek jo ira.

Na-olnos kayo koma ni olay. <sup>14</sup> Iyay i bilin mi son si-kayo ja a-aki mi shi pamati ja pesing jo say na-olnos kayo: togon jo ira sota esarot ja eg man-obda, pakedsang joy nennem ira nonta edismaya, jet sota ira ekapoy i pamatira, tolongiyo ira. Anosiyon emin ira jay. <sup>15</sup> Asas jo ta baka wáray kait jon manbibinales maypangkep ni ngaaw wa aramid. Say nemnemen jo koma, sota pansigshan ni kait jo, tan pansigshan ni emin na totoo. <sup>16</sup> Pan-imdeng kayo ni olay; <sup>17</sup> karejo isalsheng ja manshéwat son Apo Shiyos. <sup>18</sup> Jet angken ngantoy mepesamak son si-kayo, pan-iyaman kayo, ta sajay i piyan nen Apo Shiyos ja dag-en jo niman na wára kayo so nen Cristo Jesus.

<sup>19</sup> Karejo dingdingen sota itorong ni Ispirito Santo nen Apo Shiyos son si-kayo. <sup>20</sup> Karejo damsisen, no wáray shotokan nen Apo Shiyos ja mantosho son si-kayo, <sup>21</sup> nem mesepol la paras jo nin no sa-noy toka pengitoshó. No mapteng, patiyó. <sup>22</sup> Nem mesepol la eshawí-an jon emin sota ámtayon ngaaw.

<sup>23</sup> Niman say shawat ko son Apo Shiyos, ja kedepo-i ni talna, sapay koma ta si-katoy mismon mengitoshong son si-kayo, say maypilmi kayon kostokosto son si-kato. Say shawat ko pay, sapay koma ta si-katoy mengajowan son si-kayo, jet angken pati bakdang jo, dinawá jo, tan nemnem jo. Naka ishawat i pengajowan to son si-kayo, say kosto komay pamatiyo, ja enshi komay jo panbesolan, ingkatod

idaw ali mowan nen Jesucristo ja Apo tayo. <sup>24</sup> Si Apo Shiyos i emili son si-kayo ja manbedin ni too to; isonga si-katoy panshindan jo, tep eg shakejo i-oway.

<sup>25</sup> Si-kayon a-aki mi shi pamati, irewáti jokami ngo so nen Apo Shiyos.

<sup>26</sup> Si-kayo day mengikowan ni semek ko so nonta ira emin na a-aki tayo shi pamati shita kad-an jo.

<sup>27</sup> Jet say bilin ko son si-kayo, ta apostol towak nen Apo Jesus, sajay ya solat ko, ibasayo so nonta ira emin na a-aki tayo shi pamati.

<sup>28</sup> Sota kaasi nen Jesucristo ja Apo tayo ja wára son si-kayo, sapay koma ta si-katoy ma-shoman son si-kayo.

## SOTA MAYKADWEN SOLAT NEN SAN PABLO PARA SO NONTA IRA I-TISALONIKA

<sup>1</sup> Si-kak si Pablo ja makasolat niyay et say kadwák, si Silas nen Timoteo. Sajay ya solat, para son si-kayon tood ta Tisalonika ja kait min emati son Cristo, ja wára ma son Apo Shiyos ja Ametayo, tan si Apo Jesucristo. <sup>2</sup> Jet say shawat mi son Apo Shiyos, sapay koma ta ma-shoman sota kaasi, tan talna, ja wára son si-kayo ja edapo son Apo Shiyos ja Ametayo, tan si Apo Jesucristo.

*Inenosan joy digat et sobalitan ali nen Apo Shiyos no ka-onoran*

<sup>3</sup> A-aki mi shi pamati, mika nemnema ni olay ey mesepol la man-iyaman kami son Apo Shiyos ni maypangkep son si-kayo. Anam ton man-iyaman kami, ta say pamatiyo, emanba-deg ga pasiya et angken sota semek jo ni sakey tan sakey, emanba-deg ngon pasiya. <sup>4</sup> Isonga angken si-kami, waray mika pengiredjaw son si-kayo so ni eshom iren emati son Apo Shiyos no ondaw kami shima kaili-ilin kad-an sha. Mika ikowan son si-kara i naynay ja pamatiyo, ta na-anos kayon mengitoded ni ebadeg ga digat ja joka da-dakami.

<sup>5</sup> Saja inpangitoleo jo ni digat, ni eg jo engibi-jagan ni pamatiyo, si-katoy ka-asan to ey wares Apo Shiyos son si-kayo. Jet ma-sas pay ey no ka-onoran ali, sigoradon mapteng i pengesas to son si-kayo et ibilang tokejo shi pantoshayan to met laeng, tep si-katoy kabol ni dina-kaman jo so ni digat. <sup>6</sup> Si Apo Shiyos, enshiy toka pankodangi ni toka pengigsheng. Isonga sota ira emalikat son si-kayo, shosa

ngoy isobadit to son si-kara. <sup>7</sup> Jet si-kayon nandigat, si Apo Shiyos aliy mengi-kan ni pannam-ayan jo, kasta met son si-kami. Sajay i pesing to ni imotok mowan ali nen Apo Jesus ja medepod dangit. Odopen to ali sota anghil to et ma-on-an na mismo sota ebadeg ga panakabalin to tan wára pay i apoy ya emanshedang. <sup>8</sup> Jet shosa-en to ira sota toon makadedamsis son Apo Shiyos, tan eg memati pay ni toro pangkep son Apo Jesus, <sup>9</sup> jet say shosa sha, maysi-jan ira son Apo Jesus et eg sha asen i mismon kinashiyos ton emenenili. Eg ira may-aknan ni biyag ja enshiy to engintegan, no diket meshosa ira ingkatod ingka. <sup>10</sup> No timpo alin imotok to, ishayaw ira nonta emin na too ton emati et si-kayo i sakey pay son si-kara tep pinatiyo sota inkowan mi son si-kayo. <sup>11</sup> Nem say shawat mi ni olay son Apo Shiyos tayo ni maypangkep son si-kayo, sapay koma ta ipakat toy panakabalin ton ontolong son si-kayo, say maykeshi kayo nodta insagana to met laeng ja para son si-kayo no ka-onoran. Say tongpalen jon emin i mapteng nga joka nemnema niman na emati kayo son Cristo, <sup>12</sup> tan say mayshedjaw i ngaran nen Apo Jesus ni sajay ya dag-en jo, jet kasta met ngo son si-kayo, mayshedjaw kayo ngo pangkep son si-kato. Enshiy eshom ma kedepo-i ni mesepol tayo nem eg sota kaasi nen Apo Shiyos tayo, tan si Apo Jesucristo.

## 2

*Sota mepesamak nin, asan ke-motok mowan ali si Jesucristo*

<sup>1</sup> Niman, no sota maypangkep ni imotok ali mowan nen Apo tayo ja si Jesucristo, tan sota ka-olnong tayon may-aspol son si-kato, iyay i ibanshaan mi

son si-kayon a-aki mi shi pamati. <sup>2</sup> Karekayo mebiglen ma-adilaw shorog ni nemnem jo, ono karekayo manshanag nonta kowan sha ey enaksheng den mimotok si Apo Jesucristo. Ta baka sajay i inkowan ni sakey ya kait jod tan ja inpa-amta kono nen Apo Shiyos son si-kato, ono inkowan ni sakey ya engitosh, ono baka waray engikowan ey edapo iyay son si-kami ja insolat mi. <sup>3</sup> Angken ngarantoy ikowan sha, karejo kari patpati-en. Ta aneng nin kari sota timpon imotok nen Jesucristo ali. Mesepol la mepangdo nin kari ja metongpal iya inkowan ko la ey okesen ni karakdan na totoo si Apo Shiyos, tan onbo-day pay nin kari sota toon tima-nil ja ngaaw i aramid to. (Nem say pantongpalan niyay ya too, mepilshin kenshat.) <sup>4</sup> Kontra-en ton emin i kompormin kowan ni angken sipen too ey shiyos sha, tan sota kompormin pesing shen mengiredjaw ni shiyos sha. Ikayang to shorog i bakdang to ja kowan to ey si-katoy kangeto-an so ni angken sipen too, tan iba-ngat ton ontongaw ja mantoshay shima Timplo nen Apo Shiyos ja kowan to pay ey si-katos Shiyos. <sup>5</sup> Apay dinibkan jo aya? Inkowan ko met iyay ja emin nonta wara-ak son si-kayo, <sup>6</sup> jet amtayo met no apay nga eg nin mepesamak niman iyay ya banag. Ta aneng nin i koston timpo to. Nem onsabi di sota timpo, sajay ya toon tima-nil la ngaaw i aramid to, ma-amta-an. <sup>7</sup> Sota ngaaw wa aramid, si-katoy emanketongpal niman na timpo, nem dibas. Eg nin ondagsheng iyay ya ngaaw wa aramid tep waray emeniptiped niyay ya ngaaw wa aramid, say eg maykagshen onbo-day. <sup>8</sup> Jet no ma-kal sotan na emeniptiped, sotan na toon kawad-an ni aramid ja ngaaw, onbo-day ma. Nem si Apo Jesus, no onmotok ali, si-

boken to bengat iyay et metey, jet onsalsheng ma sota ngaaw wa toro to. <sup>9</sup> Sota toon kawad-an ni ngaaw wa aramid, ja itorong ali nen Satanas, no onmotok ali, wara son si-kato i panakabalin, isonga kalkalasiy pesing ton mengolbod tan mengi-owap, ja singa kaskasshaaw noman. <sup>10</sup> Enshin polos son si-kato i mapteng nga aramid; isonga na-na-jew i toka pesing nga mengolbod nonta ira toon emantoshong shi keshosa-an sha. Ta sajay ira, inasneng sha sota kinapodnon istay kaysedakan sha koma. <sup>11</sup> Sajay i kabol la binay-anan son Apo Shiyos son si-kara ey angken sota o-owap i pati-en sha, ja pan-i-awis nonta toon tima-nil ja ngaaw i aramid to. <sup>12</sup> Jet emin sota eg memati ni maypangkep nonta kinapodno, ja say pipiyan sha et ngo mowan, sota aramid ja ngaaw, kenshat ta meshosa ira.

*Salamat son Apo Shiyos tep insalakan shakejo ja too to*

<sup>13</sup> Nem si-kayon a-aki mi shi pamati ja ensemek nen Apo Jesus, anam ton man-iyaman kami ni olay son Apo Shiyos ni maypangkep son si-kayo, ta sigod ja pinidi shakejo nen Apo Shiyos ja maysedakan. Jet naysalakan kayo nontan, ta intorong shakejo ni Ispirito Santo nen Apo Shiyos say metopog sota podno ja maypangkep son Cristo i pati-en jo. <sup>14</sup> Say nayda-kaman jo son Apo Shiyos, sota inkowan mi son si-kayo, ja mapteng nga shamag maypangkep son Jesucristo. Jet si-katoy nayda-kaman jo nonta biyag nen Apo Jesucristo shi dangit. <sup>15</sup> Isonga niman, si-kayon a-aki mi shi pamati, nemnemnem jo sota inkowan min toro son si-kayo ja intenengan jo, ono binasayon insolat mi; karejo dibdibkan.

16-17 Jet niman, say shawat mi, sapay koma ta si Apo Jesucristo, tan si Apo Shiyos ja Ametayo, si-karay pekedsang so ni nemnem jo, say eg kayo medismaya, tan say mapteng ni olay i dag-en jo, tan ikowan jo. Sajay i shawat mi ja pesing nen Apo Shiyos, ta ense-mek shakito, tan si-katoy mismon engaasi son si-katejo ja engi-kan ni naynay ya kedsang ni nemnem, tan sota ebadeg ga namnama.

### 3

*Ishawatan mikejo, kasta met i pengirewat jo son si-kami*

<sup>1</sup> Niman ma, si-kayon a-aki mi shi pamati, irewati jokami son Apo Shiyos, say sota esel nen Apo Jesus ja mika itoro, magano komen mayweshis, ja enshiy en ondingding so et say patkan ni toton ewatan na shagos, ja inges toy in-awat jo so nontan. <sup>2</sup> Tan irewat jo pay komay kaydisi mi shi toton makedsel, ta karakdan na too ket en-oges shay pamati son Cristo.

<sup>3</sup> Nem si Apo Jesucristo i pan-shindan tayo bengat ja mengi-kan ni kedsang ni pamatiyo, tan si-katoy onbantay son si-kayo, say eg shakejo ebaken nen Satan. <sup>4</sup> Si Apo Jesucristo i engi-kan son si-kami met laeng ni namnama ni maypangkep son si-kayo, ey sota inbilin mi la, tan sota ibilin mi pay ali, si-katoy joka pandag-a niman, tan si-kato pay i itoloy jon dag-en.

<sup>5</sup> Jet say shawat ko, si-katon mismo komay mengiredan ni nemnem jo, say ewatan jon pasiya sota maypangkep ni semek nen Apo Shiyos, tan sota maypangkep ni kina-anos nen Jesucristo, ja si-katoy onoran jo.

*Onoshiyo iya sedo mi; eg kayo onsarot*

<sup>6</sup> Si-kayon a-aki mi shi pamati, iyay i ibilin mi son si-

kayo ja edapo son Apo Jesucristo. Karekayo mekikadwa so nonta angken sipen agi jo shi pamati ja esarot. Ta no sajay i itsora to, endedamsis to sota ira intoro mi son si-kayo. <sup>7</sup> Amtayo met ta mismo sota intoro mi son si-kayo, ta nonta wara kami son si-kayo, inon-an joy ogadi mi, ja aliwen kamika manpampamaayan. Jet sotan i mesepol la onoran jo koma. <sup>8</sup> Enshi met i mi nanshindan ja in-akan ni angken sipa shitan, no diket binayshan mi met. Kamika man-obda ni kalebiyan tan ka-akawan ta eg mi kosto ja waray mankastos son si-kayo ni para son si-kami. <sup>9</sup> Waray kanebengan mi nontan ja istay manbeka ni kasapolan mi son si-kayo, nem say eg mi nanbagan, piyan min say waray asen jo son si-kami, ja si-katoy onoran jo. <sup>10</sup> Ta angken nonta wara kami son si-kayo, sajay i inbilin mi nontan son si-kayo, ja kowan mi ey, "Sota toon ensikshal la man-obda, angken eg ngo may-aknan ni kenen to."

<sup>11</sup> Iyay i ibilin mi son si-kayo ta shinemag mi ey wara konoy eshom son si-kayo ja aliwen na na-olnos i shaka panbiyag. Esarot iren man-obda kono, ja sota mek-ibibiyang ni kedagdag-a ni eshom i ambara. <sup>12</sup> Jet niman, sota toon inges niyay i itsora to, ikowan mi son si-kato iya esel nen Apo Jesucristo ey on-eg-eket koma ira et man-obda et ngo ma ira ni panbiyag sha shorog.

<sup>13</sup> A-aki mi shi pamati, karekayo on-ekdas ja mandeka ni mapteng nga aramid. <sup>14</sup> Nem no waray eg memati niyay ya insolat mi son si-kayo, tanshaaniyo sotan na too et karekayo mekikadwa son si-kato, say onbaing. <sup>15</sup> Nem sotan ira, karejo ibilang ey singa kabakal jo, no diket ikeshiyo met laeng



ey singa agi jo iren makasapol ni bilin.

<sup>16</sup> Jet say shawat ko pay, si Apo Jesucristo ja kedepo-i ni talna, si-kato komay mengi-kan na mismo ni talna son si-kayo ni olay. Jet sapay koma ta si-katoy onbantay son si-kayon emin shitan.

<sup>17</sup> Si-kak si Pablo ja mismon engisodat niya ka-onoran niyay ya solat, jet sajay i naka pesing shi emin den solat ko. Isonga si-katoy pengimatonan jo ey podnon solat ko, ta sajay i itsora ni naka pengisodat.

<sup>18</sup> Sapay koma ta ma-shoman sota kaasi nen Jesucristo ja wára son si-kayon emin shitan na dogad.

## SOTA PILMIRON SOLAT NEN SAN PABLO PARA SO NEN TIMOTEO

<sup>1-2</sup> Si-kak si Pablo ja makasolat niyay et sajay ya solat ko, para son si-kam Timoteo, ja naka ikarin anak ko shi pamati. Jet say shawat ko son Apo Shiyos, sapay koma ta sota kaasi, tolong, tan talna, ja edapo so nen Apo Shiyos ja Ametayo tan si Cristo Jesus ja Apo tayo, sotan i ma-shoman koma son si-kam. Itnengim iya ikowan ko son si-kam, tep si-kak i apostol nen Cristo Jesus, ta si-katoy bilin nen Apo Shiyos ja engisedakan son si-katejo, tan si-katoy bilin nen Cristo Jesus ja kawad-an ni namnama tayo.

*Itoded mon memidin ira nonta apil i toro sha*

<sup>3</sup> Piyan kon ipinshowa sota inkowan ko son si-kam nonta shanshanin ondawak shi Masidonia. Jet say inkowan ko nontan, pan-iyen ka shi Ipišo et say dag-en mod man, bilin mo ira sota toon apil i shaka itodtoro say ibi-jag sha. <sup>4</sup> Ikowan mo son si-kara ey isalsheng sha sota shaka dagdaga ja shaka pematı nonta shiba ni toon bayag, tan shaka pemasa ni olay nonta ngarangan ni apapora nonta bayag da. Ta sajay i mengi-kan ni panshowashowan ni pamati ni eshom. Say piyan nen Apo Shiyos, saksakey komay pamati son Cristo, jet sota kowan ni eshom ma tood Ipišo, enshiy to itolong pangkep ni pengonod son si-kato. <sup>5</sup> Say pangkep tayon memidin ni angken sipa, piyan tayon mewad-an ira ni semek ja mandepod mapteng nga nemnem, tan say memati iren kosto. <sup>6</sup> Waray eshom ma toon dinibkan sha iyay ya mapteng nga

pangkep tayo et nakol ni notnot mala ni kait sha i shaka dagdaga. <sup>7</sup> Piyan shen mengitosho ira nonta bilin nen Apo Shiyos ja in-awat to nonta bayag da, nem eg sha amtay banag nonta shaka ikokowan, ono olog nonta shaka ipilpilit ey onoren ni totoo.

<sup>8</sup> Nem si-katejo, amta tayo met ey sota bilin nen Apo Shiyos nonta bayag da, mapteng, no ma-osal shi koston ka-osalan to. <sup>9</sup> Isonga mesepol la ewatan koma ni too ey sajay ya bilin, in-awat nen Apo Shiyos say mebidin koma sota eg mematpati son si-kato. No nan-i-inges komen mapteng nga emin i too, eg to koma in-awat iyay ya bilin. Sajay iren kalasin too, si-katoy kabol la nay-awatan niya bilin: sota masopngil son Apo Shiyos, sota ngaaw i aramid to, sota eg to amten mengiredjaw son Apo Shiyos, sota toon bimono ni ameto, ono ineto, ono bimono ni kait to. <sup>10-11</sup> Nay-awat ira jay ya bilin nen Apo Shiyos say mebanshaanan ira jay ya totoo: sota mabii tan maleki, tan dakin daleki met laeng i toka itoli, tan sota toon mengibot ni kait ton too ja to idako, tan sota ma-owap, ono mansangba ni toka pengi-owap. Nay-awat iyay ya bilin nen Apo Shiyos say mebanshaanan sota toon kompormiy toka pesing ja maykontra shi toro nen Apo Shiyos. Sajay ya toro nen Apo Shiyos, si-katoy koston toro ja enshiy maka-inges so et si-katoy wara nodta mapteng nga shamag pangkep so nen Cristo ja inpiyal nen Apo Shiyos son si-kak ja nak ngo itoro. Jet si-katoy emengi-kan ni bindisiyon.

<sup>12</sup> Ebadeg i iyaman ko son Cristo Jesus ja Apo tayo, ta in-aknan towak ni kedsang ko, say tongpalen ko sota piyan to. Inbilang towak ey naka mepiyal; isonga shinotokan towak ja mansilbi son

si-kato. <sup>13</sup> Nonta pilmiro ja enshi pay laeng i pamatik son Apo Jesus, ngaaw i inkokowan ko pangkep son si-kato, eshakil i pinedigat kon too to, tan binebaingan ko pay ira. Nem kinaasi-an towak, ta ekak amta ey ngaaw sotan na dingdingkak. <sup>14</sup> Jet ebadeg ga pasiyay tolong nen Apo Jesus son si-kak, isonga ewara-anak ni semek tan pamati, ja inges to ngoy semek tan pamati ja ewara nonta ira kait kon emati son Cristo Jesus. <sup>15</sup> Jet iyay pay i ikowan ko ja enshiy mo panshoshowa-an et sajay, agpayson mepati, panshingan, jey si Cristo Jesus, dimaw alid ja dobong ja mengisedakan ni toon ngaaw i aramid sha et si-kak i kabalkan i basol to son si-karen emin. <sup>16</sup> Say kabol la kinaasi-an towak so, jey angken na si-kak i kabalkan i basol to, piyan nen Jesus-cristo ja ipa-sas i ebadeg ga kanos to, say waray pengasan ira nonta toon memati ali son si-kato ja mewad-an ni biyag ja enshiy to engintegangan. <sup>17</sup> Isonga no mebedin koma, si Apo Shiyos komay i-aknan tayo so ni shayaw tayo, ta si-katoy ari ingkatod ingka, ja eg metmetey, tan eg ma-sas. Si-katoy podnon Shiyos, enshiy eshom. Si-katoy panshedjawan ingkatod ingka! Siya, satan da.

<sup>18</sup> Niman, si-kam Timoteo, ja naka ikarin anak ko shi pamati, iyay i ibilin ko son si-kam, ja toloy nonta naypadto maypangkep son si-kam nontan da. Saja inkowan nonta para padto nontan, si-katoy nemnemnemen mo, ta si-katoy mengi-kan ni kedsang mon mekisengo so nonta ira eg makakosto niyay ya koston toro. <sup>19</sup> Jet say singa almas mo, sota makedsang nga pamatim tan sota mapteng nga nemnem mo. Nemnemnem mo ira jay ni olay, ta waray eshom ma toon eg ira nannemnem ni mapteng, nakol

ni epilshiy pamatira. <sup>20</sup> Jet say showa so ira niyay, si Himinio nen Alejandro. Jet sajay iren too, in-awat ko nin ira so nen Satanas, balang nem maynemneman ira et ibi-jag sha sota ngaaw wa shaka ikokowan maypangkep so nen Apo Shiyos.

## 2

*Say pesing jo say na-olnos kayon emati son Cristo*

<sup>1</sup> Jet sajay iray ibilin ko son si-kam. Say pilmiro, eg mo dibdibkan ja manshawát son Apo Shiyos ni olay. Irewat mo son si-kato sota angken nganton kasapolan, agdalo sota mesepol ni eshom ma totoo, tan mesepol pay ja man-iyaman ka para so ni emin na totoo. <sup>2</sup> Tan irewatim iray a-ashi, tan sota ira eshom ja nankengato i toray sha, say mapteng i pengitoshay sha et say mewad-an kito ni etalnen panbiyag ja enshiy kolo, jet say eg medingding i tayoka panshedjaw son Apo Shiyos, tan say eg medingding pay sota mapteng nga ogadi tayo. <sup>3</sup> Sajay i mapteng nga koston ka-aporbalin Apo Shiyos. Si Apo Shiyos, si-katoy mengisedakan son si-katejo, <sup>4</sup> jet say piyan to, maysedakan ngon emin i too, tan piyan ton amta-en sha i maypangkep ni podnon pamati. <sup>5</sup> Ta si Apo Shiyos, sakey to, enshiy eshom ma Shiyos et sakey ngo bengat i mengi-sop ni too so nen Apo Shiyos, enshiy eshom — si Cristo Jesus bengat, ja mismon too. <sup>6</sup> Si Cristo Jesus, si-katoy engi-kan shorog ni bakdang ton etey shi koros ja engikesho ni basol tayo, say may-a-sop kito son Apo Shiyos, ja istay naysi-jan son si-kato. Sajay i inpasing nen Cristo ni koston timpo ja inkowan nen Apo Shiyos et si-katoy ka-ama-an to ey ensemek shakito

nen Apo Shiyos. <sup>7</sup> Jet sajay i kabol la shinotokan towak son manbedin ni apostol ja mengitoshon tan mengikowan ni podnon pamati so nonta ira toon aliwén Hodiyo. Jet sajay ya inkowan ko, agpayso; aliwén naka man-o-owap.

<sup>8</sup> Isonga say piyan ko, no mesanop i emati son Cristo shi emin na dogad, mesepol la sota dalekiy manshewat son Apo Shiyos. Nem no timpon panshewat, mesepol la metopog i nemnemen sha ja si Apo Shiyos bengat; aliwén en metaksholan ni bonget ono empait ta nemnem so ni eshom.

<sup>9</sup> Jet si-kayo ngon bibii, asas joy itsora ni baro jo, aliwén jo idakad i bisti, tan aliwén sota bowek joy jo singsingpeten; aliwén kayo man-osal ni kompormin ebanol ja alkos ni baro, ja balitok ono eshom iren nankepalit i bayad to. <sup>10</sup> Say mesepol et mango, sota mapteng nga ogadi. Si-katoy anam ni biin kowan to ey waray pamati to. <sup>11</sup> Jet say kowan ko son si-kayon bibii, mesepol la no timpo ni pan-ashal jo, on-eg-eket kayo koma ja i-onod joy kowan ni daleki. <sup>12</sup> Ekak itolok ja mantosho iray bibii, ta no sajay i medeka, ja pa-so-an shay daleki, singa sikaray mengitoshay ma ni daleki. Ekak koston manbedin jen engato i saad ni bibii, say eg sha itorayan i daleki. Mesepol la on-eg-eket ira. <sup>13</sup> Ta say epangdon pinalsowa nen Apo Shiyos, si Adan, asan si Eva. <sup>14</sup> Tan aliwén si Adan i nay-owapan, no diket sota bii, jet si-katoy bimasol. <sup>15</sup> Isonga emandikat ni toka pan-enak, nem maysedakan met laeng no itoloy ton memati son Cristo, tan no sesmeken toy kait to, tan no maytotop i ogadi to nodta piyan nen Apo Shiyos, ja amta ton menngel ni bakdang to shorog.

### 3

<sup>1</sup> Agpayso noman sota kowan sha ey, “Mapteng no say too ket, piyan ton mengipangolo ira ni emati, ta epateg sotan na obda.”

<sup>2</sup> Nem mesepol la say mengipangolo, sota toon maronong ja enshiy mebedaw son si-kato; mesepol la sota sakey i asewa to, tan aliwén dabas i ogadi to, no diket manemnem ni olay ni kosto; mesepol la waray amta to, tan masintil ni bisita to, tan mesepol la kabaalan ton mengitoshon.

<sup>3</sup> Mesepol la aliwén maboteng, ono masongbat, no diket na-anos, ono aliwén mabekal, tan aliwén pilak i toka nemnema. <sup>4</sup> Tan mesepol la amta ton mengolnos ni pamilja to, say sota annak to, eg ira onpa-so, nem onoren sha sota mapteng nga ogadi to. <sup>5</sup> Epateg iyay, ta no eg to amten mengolnos ni pamilja to, eg to ngo kabaalan na mengiredan ira nonta emati son Apo Shiyos. <sup>6</sup> Aliwén sota badbadon emati i mengipangolo, ta baka ondastog, nakol ni ingesentos Satanas ja dimastog et shinosa nen Apo Shiyos. <sup>7</sup> Say mengipangolo, sota enshiy embalaw ni too son si-kato, agdalo sota ira eg memati, say enshiy sha ikokowan na ngaaw pangkep son si-kato, tan say enshiy osalen nen Satanas ja mengadilaw son si-kato ni toka pengipangolo.

<sup>8</sup> Iyay ngoy maypangkep nodta ira kaontolong so nonta ira pangolo ni emati. Mesepol ngon manemnem ira: mebedin na kepanshindiya toka ikowan, aliwén maboteng, aliwén magamkam ni kompormi. <sup>9</sup> Tan mesepol pay ya topogen toy nemnem to nodta pamatin inpaamta nen Apo Shiyos ja enshiy showashowa to. <sup>10</sup> Paras mo nin ira ja mansilbi ni sankatikan, jet no asen mo ey enshiy mebedaw son si-kara, mebedin

ma ja ewaten mo ja ontolong ira so nonta pangolo ni emati. <sup>11</sup> Kasta met sota a-asawa sha, mesepol la mapteng ngoy ogadira: aliwen na masomang ni kait to, aliwen na mabonget, tan emepiyal shi emin na banag. <sup>12</sup> Sota ira kaontolong so nonta ira pangolo ni emati, mesepol la sakey bengat i asewa to et mesepol la amta ton mengolnos ni annak to, tan sota eshom ma wared pamilja to. <sup>13</sup> Jet sota ira para tolong ja waray panbenagan ali ni obdara, kaishayaw ali ni totoo nem ka-onoran et mebedin iren maypiyal ja mengitosho nonta pamati pangkep so nen Cristo Jesus.

<sup>14</sup> Piyan kon ondaw den shagos say asen taka, nem ninemnem ko ey mapteng no isolat ko iyay ya bilin ko son si-kam, <sup>15</sup> say amtam i pesing mo so nonta ira emati son Apo Shiyos, ta si-karay singa pamilja nen Apo Shiyos ja sibibiyag. Ta baka metaktakak da. Mesepol la amtam i pesing mon meno-tok nonta mengipangolo so nonta emati, ta si-katejon emati i naypiyal ja mengitosho ni podnon pamati, si-katejo met laeng i ontiped so ni aliwen koston toro. <sup>16</sup> Mapteng noman nga agpayso i pamati ja inpa-amta nen Apo Shiyos son si-katejo pangkep so nen Cristo Jesus, ta si Jesus nontan, nay-anak shi too et tinongpal ton emin sota inpangitorong ni Ispirito Santo nen Apo Shiyos son si-kato, jet inon-an ira ni anghil. Jet niman, emankaitoron emin i maypangkep son si-kato shi emin na sakop ni dobong, jet eshakil iray emati. Jet nay-oli ja dimaw shi dangit ja kad-an nen Apo Shiyos.

#### 4

<sup>1</sup> Sota Ispirito Santo nen Apo Shiyos, edawag ja inpa-amta to

ey no ma-onod alin timpo, waray eshom so nonta ira emati ja mengibi-jag ni pamatira, jet say onoran sha, sota toro nen Satanasa ja o-owap. <sup>2</sup> Sotan na toro, sikatoy kowan ni toon ma-owap say ma-adilaw kari sota toon mapteng i nemnem sha. Si-kara, enshi kariy mapteng nga nemnem sha; isonga enshiy shaka pengisekit ni kait sha. <sup>3</sup> Say sakey ya toro sha, kowan sha ey parit i pengesawa, tan kowan sha pay ey waray parit ta mekan. Nem ba-ngas sha kari, ta si Apo Shiyos i emalsowa ni emin na mekan et say piyan to, man-iyaman kito nin, asan kana, agdalo son si-katejon emati ja maka-amta ni podno. <sup>4</sup> Kapodpodno-an to, emin na palsowa nen Apo Shiyos, mapteng; isonga enshiy en maypeshit ja kowan sha ey eg mekan, nem man-iyaman kito et mango nin son Apo Shiyos asan makan. <sup>5</sup> Ta no manshewat kito nin asan manggan, eg bedawen nen Apo Shiyos, ta binindisiyonan to met nonta pinalsowa to.

<sup>6</sup> No sajay i ibilin mo so nonta ira a-aki shi pamati, mapteng i moka pansilbi so nen Cristo Jesus et ipa-sas mo pay ey amtam i esel nen Apo Shiyos maypangkep ni pamati son Cristo, tan sota mapteng nga toro ja inonod mo shorog. <sup>7</sup> Eg mo kari itentengan sota enshiy olog ton istoriya, ja kowan ni eshom ey eshiyosan. No diket say dag-en mo, ashal mo shorog i bakdang mo maypangkep ni eshiyosan na nemnem. <sup>8</sup> Say bakdang, mesepol to sota kowan sha ey exercise ni olay say makedsang, nem mas epatpateg pay ja i-ashal shi bakdang tayoy eshiyosan na nemnem tan aramid, ta ebadeg i itolong to ni saja maramen biyag niman, tan shi man-onod alin biyag shi dangit. <sup>9</sup> Sajay ya inkowan ko, enshiy

panshowashowa-an; isonga si-katoy panshingan koma ja onoren ni emin. <sup>10</sup> Sajay i kabol la tayoka ikalkalikatn mengitosho ni eshiyosan na nemnem, ta si Apo Shiyos i tayoka panshindi ja sibibiyag. Si-katoy mengisedakan ni emin na too, agdalo sota ira emati son Jesucristo.

<sup>11</sup> Sajay i ibilin mo, tan itorom so nonta ira emati. <sup>12</sup> Kareka onbaing no waray memedaw son sikam, ja kowan sha ey nga-nga ka nin pay laeng, no diket ipa-sas mo et so nonta ira emati i mapteng nga pekitbal, tan mapteng nga ogadi. Ipa-sas mo pay i semek mo, tan sota pamatim, tan sota karonong mo. <sup>13</sup> Say dag-en mo ingkatod ekak da onsabi, ibasam sota naysolat ja esel nen Apo Shiyos no bayag da, tan iodog mo say ewatan shen pasiya, tan itoshom pay son si-kara sota emin na maypangkep ni pamati. <sup>14</sup> Piyan kon penemnem son sikam sota inshotok shaka so nonta ira pangolo ni emati. Jet nontan, insakpal shay takday sha son sikam ni in-awatan sha son sikam ni nebeng ja mengiredan so nonta ira emati et inpadtora ey waray i-akan nen Apo Shiyos ja kabaalan mon dag-en. Jet osal mo itan; karam i-oway. <sup>15</sup> Nemnem mo iya kalko ja nay-awat son sikam. Si-katoy dag-en mo ni olay, eg mo dibdibkan, say asen shay panbenagan mo. <sup>16</sup> Tanshaanim i itsora ni moka panbiyag, tan tanshaanim ma pasiya ey kosto sota moka pan-itoro. Ta no sajay i pesing mo, bakdang mo met laeng i isalakan mo, tan maysedakan pay ira sota mengit-neng ni ikowan mo.

## 5

<sup>1-2</sup> No waray bidinen mo, i-enam mod tawen sha. No nankedakay, karam iseg-ang nga

pasiya, no diket singpet moy tebal son si-kara, ja inges to ngoy moka panrispito so nen amam. Sota ira bedoleki, ibidang mo ey singa akim ira. Jet sota ira nankebakol, ibidang mo ey singa inam, jet kasta met sota ira memeshikit, ikeshim ey singa orishiyon mo ira, ja enshi komay ngaaw wa pangkep mo son si-kara.

<sup>3</sup> Sota ira bibiin nankeballo ja enshin polos i ontolong son si-kara, mesepol la metodongan ira. <sup>4</sup> Nem sota biin ebalo ja waray anak to, ono apo to, sotan iray nebeng ja ontolong son si-kato koma, ta pamilja to met. Mesepol la sobalitan sha koma sota inpabadek sha son si-kara. Sajay i piyan nen Apo Shiyos ja toka aporbali. No sajay i pesing sha, shaka pan-ipa-sas ey kostoy pamatira son Cristo. <sup>5</sup> Sota biin ebalo ja enshin polos i ontolong son si-kato, si-kato komay todongan jo, ta si Apo Shiyos i toka panshindi et si-katoy toka panshewshewati ni dinedabi tan inakew ja mengikan ni kasapolan to. <sup>6</sup> Nem sota biin ebalo ja sota daddadsak i toka nem-nemnema bengat, enshiy silbi to. Angken wara pay laeng ja eman-bibiyag, singa naybilang nga etey. <sup>7</sup> Sota inkowan ko la, si-katoy ibilin mo, say angken sipa, enshiy sha bedawen so nonta ira emati. <sup>8</sup> Sota toon eg to sintilen i partido to, agdalo sota eman-iyon shi baley to, eg to inonod sota toro pangkep ni pamati son Cristo, jet ekarkaron ngaaw sotan na ogadi nem say ogadi ni enshiy pamati to son Apo Shiyos jen too.

<sup>9</sup> Sota ira bibiin nankeballo ja enem ma poloy tawen sha, tan esolok, si-kara bengat i i-eshom mo shima dista-an ni ebalon mesepol la metodongan ni olay ingkatod ketey sha, nem mesepol la sota pinsak bengat ja eki-sawa. <sup>10</sup> Nem

mesepol mowan na sota enshiy ngaaw wa ogadi to ja kebedawa ni eshom, tan sota inajowan toy anak to ja inpaba-deg, sota amta ton menintil ni bisita to, sota kaantolong pay so nonta ira kait ton emati, sota amta ton mengajowan ni maligdigat, tan sota kaantolong shi emin na mapteng nga obda. <sup>11</sup> Nem sota ira marikit ja nankeballo, angken eg mo i-eshom nin ira nodta dista-an ni nankebalon mesepol la metodon-gan ni olay ingkatod ketey sha, ta baka et ey mengebak sota nemnem shen meki-sawa mowan ira. Jet medingding mala sota inpankari sha ja pansilbi so nen Cristo. <sup>12</sup> Nakol ni sajay et ngo mowan i kebedawan sha, no sajay i dag-en sha, ta eg sha ma itoloy sota kari sha ja mansilbi ira son Cristo. <sup>13</sup> Tan sakey pay, baka mesiwat ira ni aka-akad sha bengat shi kebalebaley et manbedin ira ni esarot. Tan menomang pay ira ni kait sha; pekibiyangan sha pay i aliwen obdara, tan baka ibangat shay notnot ni aliwen kosto. <sup>14</sup> Isonga say kowan ko, sota ira bibiin nankeballo ja memeshikit pay laeng, mapteng no meki-sawa mowan ira, say manpamilja ira et say ontongaw ira ja wara may baley shen bantayan sha. Sajay i piyan ko, say enshiy en bedawen ira nonta enshiy pamati to son si-katejon emati. <sup>15</sup> Sajay i kowan ko, ta wara iray eshom ma nankeballo ja ngaaw i dingkara. Say inonod sha, sota aramid nen Satanas ja ngaaw. <sup>16</sup> Sota ira bibiin emati ja waray partido shen eballo, si-karay ontolong son si-kara, say sota inedos ira nonta emati, maytodong so nonta eshom ma nankeballo ja enshin polos i kaantolong son si-kara.

<sup>17</sup> Iyay mowan i ikowan ko pangkep nonta pangolo ni emati. Sota ira pangolo ja mapteng i

shaka pengiredan, agdallo sota ira eman-obden pasiya ni shaka pantosho tan shaka pengikowan ni maypangkep so nen Jesucristo, mesepol la ma-shoman i sowilshora. <sup>18</sup> Ta waray naysolat nonta bayag da, ja kowan to ey, "Sota nowang ja emengidik ni pagey, karejo bosalen, no diket itodok jon mengan." Tan wara pay i kowan to ey, "Say man-obda, mesepol la mesowilsho-an."

<sup>19</sup> No waray toon kowan to ey waray pangolo ni emati, ja nanbasol, karam nin patpati-en, no sakey bengat i engikowan. Mesepol la showa, ono tedo i onpaneknek so, asan moka patia. <sup>20</sup> No waray pangolo ja ngaaw i toka dagdag-a, togon mo shi sango-an ni karakdan say mebidin, jet say waray tekotan ngo ni eshom, ja eg sha onoran sotan na ngaaw wa aramid. <sup>21</sup> Jet si-kam Timoteo, sajay i bilin ko son si-kam et nemnem mo ni olay ey shakitoka pan-osshongi nen Apo Shiyos, tan si Jesucristo, tan angken pay sota ira anghil ja pinidi nen Apo Shiyos. Isonga say kowan ko, sajay ya bilin, si-katoy onoren mo, jet enshi komay mo en paboran, no diket pan-i-inges moy pesing mo ni toon inpangolo-an mo. <sup>22</sup> Kareka man-a-agag ja menotok ni mengipangolo ira nonta emati, ta baka manbesol sotan na too; nakol ni mayda-kam ka nonta ngaaw wa dingka to. Nemnem mo nin asan moka dag-a say eshalos ka ni olay.

<sup>23</sup> Aliwen shanom ni olay i ishenon mon inomen, no diket panginom ka ni ootik ka adak nem singka-shom, say eg mema-ma sota sigod ja sakit ni ekes mo, tan sota eshom pay ya sakit mo.

<sup>24</sup> Sota ira eshom ma too, edawag i basol sha et inam-ay i kekowis sha. Nem sota basol ni eshom, aliwen edawag, nem ma-

amta-an ngo eshan. <sup>25</sup> Kasta met i mapteng nga aramid. Waray ma-amta-an shagos, nem waray eshom ja eg nin ma-amta-an niman. Nem no ma-onod alin timpo, si Apo Shiyos, ipa-amta to ey sotan ngo eshan i mapteng nga aramid.

## 6

<sup>1</sup> Iyay pay i piyan kon ibilin son si-kam ja pesing ni baga-en. Mese-pol la rispito-en shen pasiya sota ira apo sha, ja aliwen sinsinan, say sota ngaran nen Apo Shiyos, tan mapteng nga toro pangkep son Cristo, eg damsisen ni eshom. <sup>2</sup> Sota baga-en ja emati son Cristo i apo to, eg to koma nemnemnemen ey angken eg to pati-en sotan na apo to ta naybilang ey agi tod pamati. Mesepol la singpeten to ngo eshan ja mansilbi so nonta apo to. Man-obden kosto, ta say onkon-od nodtan na obda to, kait ton emati, ta si Apo Shiyos, nan-inges i semek to son si-karen showa.

### *Ka-onoran na togon*

Iyay pay i piyan kon itorom tan i-adok mo shita toom. <sup>3</sup> No waray eshom ma toon apil i toro to, ja aliwen inges to iyay ya mapteng nga toro ja edapo so nen Apo Jesucristo, ja eg mengitoshong ni eshiyosan na nemnem, <sup>4</sup> sotan na too, edastog, enshiy amta to. Sotan na toro to, si-katoy emengikan ni kolo ja pansosongbatan, ono panbabakalan maypangkep ni esel bengat. Jet say pantongpalan niyay, apal, bonget, kesekitan ni nemnem ni eshom, tan eg panpipiniyal. <sup>5</sup> Sajay pay i mengi-kan ni pansosongbatan ni toon kolang i shaka pannemnem, ja eg maka-awat ta pasiya ni maypangkep ni podno. Agdalo sota toon say wared nemnem sha, kowan sha ey panbaknangan i pamati son Cristo.

<sup>6</sup> Nem say pamati, ebadbadeg ngo eshan i itolong to son si-katejo, no mepnek kito ni kasesaad tayo. <sup>7</sup> Ta nonta inkayanak tayo shiya dobong, enshiy tayo di inta-jon et no metey kito ngo, enshi met laeng i tayo ita-jon. <sup>8</sup> Isonga no wara et i kenen tayo, tan ebaro-an kito, mepnek kito; eg tayo koma toy-an. <sup>9</sup> Nem sota toon baknangan toy toka nemnemnema, inam-ay ya ma-ewis ja mandeka ni angken nganton ngaaw. Jet emesaol la mengamkam ni ka-iri-irin ja enshiy silbi to. Anongosto ma ey sotan met laeng i emengi-kan ni kesheshalan to, ta mepilshi ingkatod ingka. <sup>10</sup> Jet sota pengamkam ni pilak, si-katoy panshoki-i ni emin na ngaaw. Agpayso ey sota ira eshom ma engamkam ni pilak, inbi-jag sha may pamatira. Nem anongosto ma ey ensakit i nemnem sha, ta naydaw-an iren pasiya nodtan na dingkara.

<sup>11</sup> Nem si-kam Timoteo, ja too nen Apo Shiyos, arawi-im ma emin sota ngaaw wa ogadi ja inkowan ko la. Jet say nemnemen mo, sota kinashonong, sota eshiyosan na nemnem, sota pangkep ni pamati son Apo Jesus, sota semek mo ni totoo, sota pengitoded mo ni digat, tan sota kina-anos mo. <sup>12</sup> Dagam i kabaalan mon man-obda maypangkep nonta pamati, tan nemnemnem mo sota i-awat nen Apo Shiyos son si-kam ja biyag ja enshiy to engintegan. Si Apo Shiyos i mismon enotok son si-kam, tan engi-kan nontan na biyag son si-kam, nonta engikowanan mod karakdan ey emati ka. Jet eshakil nontan i engitneng.

<sup>13-14</sup> Iyay i ibilin ko son si-kam Timoteo, jet si-katoy nemnemnemen mo. Ta si Apo Shiyos, tan si Jesucristo, shakitoka os-osshongi



ni olay. Si Apo Shiyos, si-katoy engi-kan ni biyag so ni emin na palsowa et si Cristo Jesus, nonta simango so nen Pontio Pilato, inkowan toy podno. Jet say bilin ko, sajay. Emin sota bilin da ja nay-awat son si-kam, onod mon emin, karam dabdabsan i eshom. Jet sotan ni olay ingkatod imotok ali nen Apo tayo ja si Jesucristo. <sup>15</sup> Jet si Jesucristo, ondaw ali shi koston timpo to ja insagana nen Apo Shiyos. Si Apo Shiyos bengat i Kangeto-an, si-katoy ari ni emin na ari, tan apo ni emin na apo. <sup>16</sup> Si-kato bengat i Shiyos ja eg metey, jet shima mismon kawad-an to, angken sipa, enshiy toon en onshanon so, ta emenililn pasiya. Angken sipen too, enshiy en engasas son si-kato, ono mengesas so. Jet si-katoy mayshedjaw ja toray ja Manakabaln ingkatod ingka. Siya, satan da!

<sup>17</sup> Ikowan mo so nonta ira bebaknang nin niman na sibibiyag ired ja dobong ey aliwen ira ondstog, tan aliwen sota pilak shay sha en panshingan, ta aliwen sigorado. Isonga say panshingan sha koma, si Apo Shiyos, ja emengikan ni emin na kasapolan tayo, ja tayoka kenkenasa. <sup>18</sup> Say dag-en sha koma, sota panmaptengan ni kait sha, ja todongan sha ira, ta sotan i may-eshig shi koston baknangan. Mesepol la amtaren mengaasi koma, ja esaganen mengilakam ni olay. <sup>19</sup> No sajay i pesing ni bebaknang, mapteng, jet waray may-eshig ja singa poonan shed dangit ja kenasan shed man. Sajay i pesing nga menigorado ni podnon biyag shi dangit.

<sup>20</sup> Si-kam Timoteo, mesepol la eg mo baybay-an sota inpiyal nen Apo Shiyos son si-kam, ja dag-en mo. Kareka maybibiyang nonta enshiy silbi ton toro ni eshom, ja singa notnotnot bengat. Say

itsora nontan na too, ireka mansosongbat bengat. Kowan sha ey waray inpa-amta kono nen Apo Shiyos son si-kara, nem enshi kari. <sup>21</sup> Waray eshom iren too ja bimaki nonta intenengan sha iyay, jet enshi mala ira shi pamati son Jesus.

Jet sapay koma ta si Apo Shiyos i mengaasi son si-kam.

## SOTA MAYKADEN SOLAT NEN SAN PABLO PARA SO NEN TIMOTEO

<sup>1-2</sup> Si-kak si Pablo ja makasolat niyay, jet sajay ya solat ko, si-kam Timoteo i daʋan to, ja naka ikarin anak ko shi pamati ja ensemek ko. Si Apo Shiyos i mismon enotok son si-kak ja manbedin ni apostol nen Cristo Jesus, say si-kak i mengitoshon ni maypangkep nonta inkari ton biyag ja i-akan to so ni memati son Cristo Jesus.

Jet say shawat ko son Apo Shiyos, sapay koma ta sota kaasi, tolong, tan talna ja w̄ara son si-kam ja edapo so nen Apo Shiyos ja Ametayo tan si Apo Jesucristo, si-kato komay ma-shoman.

*Naka man-iyaman pangkep son si-kam, nem pa-onong mo ni olay ita pamatim son Cristo*

<sup>3</sup> Naka man-iyaman son Apo Shiyos, ja Shiyos met laeng ira da nonta ap-apok. Etopog ga sota pansilbik son si-katoy naka nemnemnema ja inges toy inpan-silsilbi ira nonta ap-apok nonta bayag da. No mansheʋatak son Apo Shiyos, takaka ida-kam ni olay. <sup>4</sup> Ekak dibkan sota moka pansesaya nonta la na-onod ja nansi-janan ta. Isonga dinedabi tan inakew ja takaka nemnem-nema jet piyan kon asen taka mowan say mepno-ak koma ni imdeng. <sup>5</sup> Ekak pay dibkan sota agpayson moka pematim son Apo Shiyos ja intoro nen Loida ja apom, tan si Eunice ja inam. Jet naka memati ey sajay ya pamatim ket inges toy kakedsang ni pamatira.

<sup>6</sup> Jet say ikowan ko son si-kam, nemnem mon mengosal nonta in-awat nen Apo Shiyos ja kabaalan

mon menodong ni karakdan na emati. Nay-awat iyay ya baal son si-kam nonta insakpal ko i takday ko son si-kam. <sup>7</sup> Jet mesepol la osalen mo sotan, ta si Apo Shiyos, aliw̄en in-akan toy Ispirito Santo to son si-katejo say ontakot kito, no diket say w̄aray kedsang tayo, semek tayo, tan tengel tayo ni bakdang.

<sup>8</sup> Isonga kareka onbaing ja mengikowan ni maypangkep so nen Jesucristo ja Apo tayo, tan eg mo koma ibaing sota inkabedod ko pangkep ni naka pengitoshon ni maypangkep son si-kato, no diket itoded mon mengikowan ni mapteng nga shamag maypangkep son Cristo angken manda-kam ka ni digat, ta i-akan toka met laeng nen Apo Shiyos ni kedsang mo. <sup>9</sup> Si-katoy engisedakan son si-katejo, tan emili son si-katejo met laeng ja manbedin ni too to, jet sajay i inpasing to son si-katejo ta ebadeg i kaasi to. Sajay ngo eshan i plano to, ta sigod ja kinaasi-an shakito pangkep so nen Cristo Jesus angken nonta eg pay laeng epalsowa iya dobong. Isonga sajay ya inpangisedakan to son si-katejo, aliw̄en sobadit nonta dingka tayon mapteng, <sup>10</sup> no diket sigod iyay ya plano to, jet inpa-sas to iyay nonta indaw ali nen Cristo Jesus ja engisedakan son si-katejo. Jet si Cristo Jesus, inebak toy panakabalin ni patey jet si-katoy engilew̄ag nonta biyag ja enshiy to engintegangan ni intoro to so nonta mapteng nga shamag.

<sup>11</sup> Si-kak i sakey ya eshotokan ja manbedin ni apostol ja mengikowan nonta mapteng nga shamag ja maypangkep son Cristo, <sup>12</sup> jet sajay i kabol la naka da-da-kami so ni digat niman. Nem ekak ibaing ta amtak ka mismo i pinatik, jet ebadeg i namnamak

ey eg towak baybay-an pangkep nonta obden inpiyal to son si-kak, ingkatod imotok to di, ta kabaalan ton emin.

<sup>13</sup> Say nemnemen mo ja onoren, sota koston toro ja inkowan ko la son si-kam; isonga iki-det moy pamatim son Cristo, tan semek mo so ni kait mon emati, ta si-katoy anam ni si-katejon emati son Cristo Jesus. <sup>14</sup> Sota Ispirito Santo nen Apo Shiyos ja nan-iyon son si-katejo, nemnemnem mo ni olay sota epateg ga inpiyal to son si-kam; karam baybay-an.

<sup>15</sup> Amtam met ey emin sota wared ta Asiya, angken pay si Pigilo nen Hirmoginis, inbiyang sha-ak ma. <sup>16</sup> Naimbag ta wara si Onisiporo ja sanpamilja. Si-kato bengat i emisbisita son si-kak, jet si-katoy emengi-kan ni imdeng ko, ta eg to ibaing i inkaybalod ko. Isonga naka ishawat so nen Apo Shiyos ey sapay koma ta kaasi-an to si Onisiporo tan sota pamilja to. <sup>17</sup> Ta nonta inmotok to shiya Roma, siningpet toy anap son si-kak ingkatod simpol toy kawad-an ko; <sup>18</sup> isonga kowan ko ey sapay koma ta kaasi-an ngo nen Jesucristo si Onisiporo no onsabi sota akew wa idaw to mowan ali. Angken si-kam ket amtam met ey ebadeg i tolong to son si-kak nonta wara-ak pay laeng shita Ipiiso.

## 2

*Sota toon para toro ni may-pangkep son Cristo, mesepol la eg manbedbediw i nemnem to*

<sup>1</sup> Niman, si-kam Timoteo ja anak ko shi pamati, say nemnemen mo ja mengi-kan ni kedsang mo, sota kaasi nen Apo Shiyos ja wara son si-katejo ni inpamati tayo son Cristo Jesus. <sup>2</sup> Emin sota intorok son si-kam ja intenengan ni es-hakel la totoo, si-kato ngoy itorom so nonta totoon moka piyalen

mengitosho, say tod-an sha ngoy eshom.

<sup>3</sup> Sota toon mapteng i toka pansilbi so nen Cristo Jesus, may-eshig shi solsharo, ta say solsharo, edigat i biyag to no sin-arom; isonga angken si-kam, anosim ja mandakam ngo ni digat. <sup>4</sup> Sota solsharo ja maramen emansilbi, eg koma mesiwat ni obda ni sibiliyan, say metopog i nemnemen to ja mansilbi so nonta apo to, say mayimdengan sota apo to. <sup>5</sup> Say emansilbi, may-eshig mowan shi toon mekilongba. Sota mekilongba, eg mebedin na mengebak say meprimiyo-an, no eg to ionod sota bilin ja pesing nga mekilongba. <sup>6</sup> Jet mebedin na may-eshig mowan shi nanmola. Sota nan-obda ja nandigidigat, si-katoy onkon-od so nonta pilmiron apit. <sup>7</sup> Isonga nemnem mo iya inkowan ko la son si-kam, jet si Apo Shiyos i ontolong son si-kam say ewatan mon emin.

<sup>8</sup> Karam dibdibkan sota mapteng nga shamag ja naka ikokowan so ni totoo, ey si Jesucristo ket etey nem nanbiyag mowan. Tan naka itoro pay ey si-kato sota poli nen Ari David nonta bayag da. <sup>9</sup> Jet sota naka pengitosho niyay ya mapteng nga shamag maypangkep so nen Jesucristo, si-katoy kabol la naka da-da-kami so ni digat niman, tan si-katoy kabol la naybaloshan ko pay ja singa bimasolak et ngo mowan. Nem angken inpokok sha-ak, eg mebedin na ipokok ni angken sipen too iya esel nen Apo Shiyos; maykowan ngo eshan shi totoo. <sup>10</sup> Agpayson naka mepedigat maypangkep ni naka pengitosho ni sajay ya esel nen Apo Shiyos, nem naka enenosi, say sota pinidi nen Apo Shiyos ja memati, ewatan sha ngo sota kaysedakan ja wara so nen Cristo Jesus, say mayda-kam

ira did dangit ingkatod ingka.  
<sup>11</sup> Agpayson mepati sota kowan tayo ey,

“No etey kito ja mayda-kam so nen Jesucristo, mayda-kam kito ngo son si-kato nodta biyag ja enshiy to engintegangan. <sup>12</sup> No enosan tayo ja manda-kam ni digat maypangkep son si-kato, mayda-kam kito ngo son si-kato ja mekitoshay; nem no idibak tayo ja ikowan tayo ey eg kito emati, ikowan to ngo di ey eg shakito am-amta. <sup>13</sup> Jet no bilang ey ekapoy i pamati tayo son si-kato, on-onong ngore-shan sota semek to, tep sotan i inkari to jet aliwén manbinaliw i toka ikowan.”

<sup>14</sup> Sajay day itorom so nonta ira totoo shita kad-an mo; ban-shaanim ira ey aliwén ira meki-ibiyang nonta pantabtabal ni eshom maypangkep ni pamati no notnotnot bengat. Ta sajay i emeneshal ni pamati ira nonta eshom ja emantettetngeng, ja enshiy to itolong. Jet ikowan mo son si-kara ey sajay i bilin nen Apo Jesus. <sup>15</sup> Si-kam, sota apor-balan nen Apo Shiyos i topogen mon dag-en ni moka pan-obda; mesepol la singpeten moy toro nonta koston esel nen Apo Shiyos. Sajay i dag-en mo say enshi diy kebedawan mo son nen Apo Shiyos, et say enshiy mo ibaing nga dinkam. <sup>16</sup> Arawi-im sota kompormin tabtabal ja emengishawi ni totoo so nen Apo Shiyos, ja emankebol ni kema-ma-i ni eg sha pati-an so nen Apo Shiyos. <sup>17</sup> Sotan na tabtabal ja notnotnot bengat, may-eshig ey singa bayang shi bakdang ja emanbanaw. Wara iray toon sajay i itsora ni shaka pantosho, jet si Himinio tan si Pilito i showen amtak ja sajay i shaka pesing shitan. <sup>18</sup> Sajay iren too, inbi-jag sha ja mengonod nonta podno, ta say kowan sha

ni maypangkep nonta panbiyag mowan ni toon nanketey, kowan sha ey enaksheng kono da. Jet waray eshom so nonta ira emati ja imonod son si-kara, nakol ni kimapoy i pamatira. <sup>19</sup> Nem eg mebedinan ni toon sa-datan i pamati son Cristo, ta si Apo Shiyos, innadnad ton pilmi. Singa naypilmi sota pamati nodta bato ja naysolatan niya kowan to ey, “Si Apo Shiyos, amta to sota ira too to.” Tan wara pay i naysolat ja kowan to pay ey, “Emin sota emati ni ngaran nen Apo, mesepol la eshawi-an sha sota aramid ja ngaaw ja eg sha dagdag-en.”

<sup>20</sup> Shi ebadeg ga baley ni baknang, ekalkalasiy pingkan ja maosal. Waray pingkan na balitok, waray pingkan na palata, waray pingkan na kiyew, waray pingkan na pingkel shen bo-day. Jet sota ebanol, ema-osal no waray bisita, nem sota eshom, kompormiy ka-osalan to. <sup>21</sup> Sajay i kay-eshigan ni si-katen emati. Isonga sota toon ngaaw to ma jen manbesol, si-kato sota may-eshig ey pingkan na epateg so nonta makakokowa so. Anam ton sota makapingkan na mismoy mengosal so, ta esagana ja ma-osal shi emin na mapteng nga pangkep. <sup>22</sup> Isonga arawi-im sota nemnem ni si-kayon bedoleki ja mengikan ni panbesolan. Say nemnemen mo et, sota kinashonong, sota panshinel son Apo Shiyos, sota semek, tan sota talna, ta sotan i pesing ni emin na too ja agpaysoy pamatira so nen Apo Jesus. <sup>23</sup> Arawi-im sota dinedokon tabtabal ja enshiy silbi to, ta amtam met ey say pantongpalan niyay ket bakal. <sup>24</sup> Jet sota piniyal nen Apo Jesus ja mengitosho ni esel to, aliwén bakal komay wara son si-kato, no diket wara komay semek to ni angken sipa, tan amta to pay komen mengitosho. Tan mesepol

pay ja na-anos, <sup>25</sup> ja amta to pay ja mekitbal ni mapteng so nonta eg makakoston mengitngeng ni toka pan-ikowan, ta balang nem itolok nen Apo Shiyos ja manbebawi sotan na too ni kasopngil to, jet amta-en to ma i maypangkep nonta podno. <sup>26</sup> Jet no maynemneman, onkopos ma so nen Satanas, ja istay nanngel son si-kato, jet eg to ma dag-en sota pipiyan nen Satanas.

### 3

*Iyay i banshaan maypangkep ni mepesamak ali*

<sup>1</sup> Nem mesepol la amta-en mo ey eshakel i dilikaron mepesamak ali shi ma-onod ja timpo. <sup>2</sup> Ta sajay alin timpo, say nemnemen bengat ni totoo, sota bakdang sha shorog, jet sota pilak pay bengat i epateg son si-kara. Ondastog ira, jet enshiy baing sha. Shaka sobda-i i pesing shed kait shen too, eg sha pay pati-en i bilin ni maka-anak son si-kara. Enshiy kowan sha ey ipa-sas shay shaka pan-iyaman, jet bedawen sha ja mantetngeng ni maypangkep so nen Apo Shiyos. <sup>3</sup> Sotan alin ma-onod ja timpo, enshiy pasinsiya ni karakdan na too, enshiy kaasira shi kait sha; angken sota mismon annak sha, ono mismon maka-anak son si-kara, eg sha pasinsiya-an. Soman-gen sha pay i toon angken enshiy basbasol to. Enshiy tengel sha pay ni bakdang sha, ja shaka penginda i kait sha. Kontra shen pasiya i angken nganton mapteng nga aramid. <sup>4</sup> Angken kait sha, i-owapan sha; eg sha pay nemnemen i panbenagan ni shaka dagdag-a. Nayda-kad i dastog sha; sota daddadsak bengat i pipiyan shen dagdag-en; enshin polos i semek sha so nen Apo Shiyos. <sup>5</sup> Say itsora sha pay, singa waray pamatira son Apo Shiyos, nem kina-agpayso

to ket enshi kari. Say ka-asan ni ka-enshi ni pamatira son Apo Shiyos ket sota nga-ngaawa ogadira. Jet mesepol la sota inges iren jay ya totoo, eg mo koma sintilen ira ja inges toy moka penintil nonta ira podnon emati. <sup>6</sup> Tep sajay iren ma-o-owap pa totoo, waray eshom shitan ja nandigod ja dimaw shima baley ira nonta bibiin naypasjay i nemnem sha, jet sotan i shaka dagdag-a ingkato niman. Sajay iren bibii, amtara shorog ey ngaaw day aramid sha, jet say pipiyan sha, sota badbado mowan ja eg sha nin pineshas. Isonga inam-ay iren ma-ewis, <sup>7</sup> ta sajay iren bibii, angken nganton toro, piyan shen itenengan, nem eg sha idasin sota podnon toro nodta ngaaw wa toro. <sup>8</sup> Sajay iren ma-o-owap pa too, inges sha ira da ja si Janis nen Jambris nonta bayag da. Sajay den showen too, sinokil shes Moises ja eg sha pinati, jet niman, sajay ngo iren ma-owap, eg sha ngo patien sota maypangkep ni podno, ta bimakiy nemnem sha jet o-owap i pamatira. <sup>9</sup> Nem sajay iren too, eg ira onbayag, ta sota ka-o-owap sha, amta-en ngo eshan ni karakdan, ja inges to sota epasamak so nen Janis nen Jambris nonta bayag da ja eg makakosto so nen Moises.

*Shanshani may ketey ko, jet anam ton si-kam i mengitoday ni obdak*

<sup>10</sup> Nem si-kam, aliwen inges mo ira jay ya ma-o-owap; amtam ngoreshan sota torok, sota ogadik, tan sota planok ja dag-en ko niman na maramen biyag. Tan amtam pay sota pamatik, sota ka-anos ko, sota semek ko, tan sota naka pengitoded ni digat. <sup>11</sup> Amtam pay sota digat ja naka da-da-kami. Amtam met ta emin sota edagdaga son si-kak shi Antiok, shi Ikoniom, tan shi Listra.

Epaladon pasiya sotan na digat ja dina-da-kaman ko, nem si Apo Jesus, insalakan towak ni olay. <sup>12</sup> Agpayso ey emin sota toon wára son Cristo Jesus ja makapiyan na mengonod ni eshiyosan na pan-biyag, sigoradon pedigaten ni toon maka-oges ni maypangkep ni pamatira, <sup>13</sup> jey sota toon ngaaw i aramid sha, tan o-owap i toro sha, mas mema-ma ja onngaaw i dagdag-en sha. Mengi-o-owap ira pay ni eshom, nem eg sha amta ey si-kara met laeng i nay-owapan. <sup>14</sup> Nem si-kam, say nemnemen mo et mango, sota maypangkep ni podno ja naytoro son si-kam, ja pinatim ma pasiya; mesepol la eg mo ibi-jag. Ta amtam met i itsora nonta ira toon engitoshon son si-kam ni podno. <sup>15</sup> Manshoki nonta kanga-ngam, etod-an ka nonta maypangkep ni naysolat ja esel nen Apo Shiyos, jet si-katoy engitoshong son si-kam shi pamati so nen Cristo Jesus; jet sotan na inpatim i naysalakanan mo. <sup>16</sup> Si Apo Shiyos i makanemnem nonta emin na inpaisolat to nonta bayag da; isonga epateg ira sotan shi pengitoshon maypangkep nonta pamati, tan sotan pay i mengipamta ni nankolongan tayo, tan sotan pay i mengitoshong son si-katejo shi panmaptengan tayo. Sotan met laeng i mengilteg ni tayoka panbibiyag ni inakew, say maytotop shi piyan nen Apo Shiyos. <sup>17</sup> Sajay i inpasing nen Apo Shiyos, say si-katejon too to, enshin polos i tayo pankodangan, tan say esagana kition ontolong shi angken nganton kasapolan ni eshom.

#### 4

<sup>1</sup> Jet iyay pay i ibilin ko son si-kam Timoteo, jet sajay ya naka pemidin son si-kam, kaon-osshong ali si Apo Shiyos tan si Cristo Jesus. Jet mesepol la

nemnemen mo ey eg medam-sis si Cristo, ta to di ita-shel i pantoshayan to jet sotan may pengigsheng to ni panbenagan ingkatod ingka ni toon wára pay laeng shi biyag tan sota ira nan-ketey da. <sup>2</sup> Isonga iyay i ibilin ko son si-kam: sota esel nen Apo Shiyos, si-katoy ishingon mon itoro, angken kompormin timpo, jet angken pay eg sha koston itenengan, pilit ta ikowan mo. No waray ngaaw i shaka pesing ono shaka itoro, bilin mo say metod-an. Bilin mo pay ira sota waray nankolongan ni pamatira say onkedsang ira shi pamati. Nem sajay, mesepol la metaksholan ni kina-anos ni moka pengitoshon. <sup>3</sup> Sajay i dag-en mo, ta waray timpon onsabi ali, ja saja totoo, en-asneng shen itenengan sota maypangkep ni koston toro. Say pipiyan sha et ngo mowan, sota en-amis sa esel i toka pengewis, jet mengeda ira ni mamaistoro shen mansasa-dat ja mengitoshon nonta pipiyan shen itenengan. <sup>4</sup> Ibi-jag sha sota epangdon itenengan shen podnon toro, jet say onoren sha ma, sota pamatin singa istoriya bengat i itsora to. <sup>5</sup> Nem si-kam, tanshaanim, karam iba-ba-ngat i onod nima toro sha. Anosim ja manda-kam ni digat, ipekat moy kabaalan mon mengitoshon ni maypangkep son Jesucristo, tongpal mon emin sota nay-awat son si-kam ja dag-en mo.

<sup>6</sup> Itodoy mon dag-en iyay, ta naka dekna-a ey nay-esop ma sota timpon kay-ewat niya biyag ko ja meteyak ma. <sup>7</sup> Dingkak i kabaalan ko shi obdak ja singa ekigobatak shi kobatan, ono singa ekilongbak ni betik, jet siningpet kon inonod tan intoro shi eshom sota pamatin naypiyal son si-kak. <sup>8</sup> Jet niman ma, waray naysagana ja primiyok, jet sajay, enshiy eshom

nem eg panbedin kon toon enshin polos i basol to shi dangit. Sajay ya primiyok, i-awat nonta kostoy toka pengigsheng ja si Apo Jesus. Jet aliwén si-kak bengat i i-awatan to so, no diket wára ngoy para so nonta ira eshom ja eman-a-agag ni idaw ali nen Cristo tep ensemek sha.

*Iyay pay i ibilin ko son si-kam*

<sup>9</sup> Jet niman ma Timoteo, say kowan ko, no mebedin, daw ka din shagos shiyay, <sup>10</sup> ta mesepol taka. Si Dimas, indekjas towak, ta say wára son si-kato, ja toka nem-nemnema, sota ka-id-irin shiya dobong; jet dimaw da shi Tisa-lonika. Jet si Krisinti, dimaw ngo shi Galasia; si Tito, dimaw ngod Dalmasia. <sup>11</sup> Si Lucas bengat i ebay-an shiyay ya kadwák. Olop mo di si Marcos shiyay ta asdeg toy toka itolong son si-kak. <sup>12</sup> Si Tikiko, inbetkag ko led ta Iviso. <sup>13</sup> Jet no ondaw ka ali, alam ali sota masshel la barok; wáred baley nen Karpo shi Troas. Tan itajon mo ali ira sota dibsho, tan karam dibdibkan sota ira papil la insolatan ko so nonta epateg son si-kak.

<sup>14</sup> Si Alejandro ja para selbit ni kambang, ngaaw i inaspasing to son si-kak. Nem si Apo Shiyos i onsobadit son si-kato ni maypangkep nontan na ngaaw ja dingka to. <sup>15</sup> Isonga angken si-kam, tanshaanim iyay ya too, ta epaladoy toka pesing; endedamsis ton pasiya iya tayoka pan-itoro pangkep son Jesucristo.

<sup>16</sup> Nonta pilmiron insakdang sha-ak so, enshin polos i en imatang so nontan na kasok; emin ira sota kait tayo ket indekjas sha-ak. Nem say shawat ko so nen Apo Shiyos, sapay koma ta eg to shosa-en ira sotan, no diket kaasi-an to ira, angken na binaybay-an sha-ak. <sup>17</sup> Nem eg towak met laeng

binaybay-an nen Apo Jesus nonta indekjas sha-ak so nonta eshom, no diket tinodongan towak, jet inaknan towak pay ni kedsang ko ja mengipedawag ni maypangkep son si-kato, say itenengan nonta ira totoo ja aliwén Hodiyo. Sota ira makakontra son si-kak ket istay piyan shen bono-en sha-ak, nem insalakan towak nen Apo Shiyos. <sup>18</sup> Amtak ey ngaaw aliy dagdag-en ira nonta makakontra son si-kak, nem si Apo Jesus, eg towak i-olay; idisi towak ni olay shiya maramen biyag ko niman jet al-en towak da shi dangit ja toka pantoshayi. Si-katoy mayshedjaw ni olay ingkatod ingka. Siya, satan da.

<sup>19</sup> Ikowan mo lay semek ko so ira niyay ya totoo: si Priscilla nen Akila, tan si Onisiporo ja sanpamilja.

<sup>20</sup> Si Irasto, ebay-an shi Korinto, jet si Tropimo, indekjas kod Milito ta emansekit.

<sup>21</sup> Ipeshas moy kabaalan mo ja ondaw ali niman, ta aneng nin sota timpo ni teg-in.

Sajay ira sota toon engikowan ni semek sha son si-kam: si Yobolo, si Podinti, si Lino, si Claudia, tan sota eshom ma a-aki tayo shi pamati ja wáred jay.

<sup>22</sup> Say shawat ko son Apo Shiyos, sapay koma ta si-katoy mengitoshong ni nemnem jo ni olay, tan sapay koma ta si-katoy mengaasi son si-kayon emin.

## SOTA SOLAT NEN SAN PABLO PARA SO NEN TITO

<sup>1</sup> Si-kak si Pablo ja makasolat niyay. Si Apo Shiyos i mismon engibetkag son si-kak ja mansilbi son si-kato, jet mismon si Jesucristo i enotok son si-kak ja manbedin ni apostol to. Say kabol la eshotokan ko ket say si-kak i menosho so nonta ira pinidi nen Apo Shiyos ja too to, say onkedsang i pamatira jet say amta-en sha ngo sota podnon toro. Saja naka pan-itoro, nay-anam shi eshiyosan na biyag, <sup>2</sup> jet say pangkep ko ni naka pansilbi son Cristo, say eshakel i mengamta nonta namnama ni si-katejon emati son si-kato. Sajay ya namnama tayo, si-kato sota biyag ja enshiy to engintegan, jet sajay da sota inkari nen Apo Shiyos nonta eg pay laeng epalsowa iya dobong. Jet agpayson tongpalen to ali ja i-akan iya namnama tayo, ta si Apo Shiyos, eg mebedin na man-o-owap. <sup>3</sup> Sajay ya inkari to, inpa-amta to nonta inkaywadsak ni esel to, ta nontan may koston timpo ni kaytosho to. Jet si-kak i inpiyal ton en mengitosho nonta esel to. Sajay i inbilin nen Apo Shiyos son si-kak, ta si-katoy Mengisedakan.

<sup>4</sup> Sajay ya solat ko, ondaw son si-kam Tito, ja naka ikari ey podnon anak ko pangkep ni pamati ten showa. Jet say shawat ko son Apo Shiyos, sapay koma ta sota kaasi tan talna, ja edapo met laeng son si-kato ja Ametayo, tan si Cristo Jesus ja mengisedakan son si-katejo, si-katoy ma-shoman.

*Mesepol la mapteng i ogadi ni shotokan mo ja mengipangolo ni emati*

<sup>5</sup> Say kabol la indekjasan taka so shi Crete, say olnoson mo sota mesepol la ma-olnoson shitan. Say inkowan ko son si-kam nontan ket menotok ka ni pangolo para so nonta ira emati shi sanseskey ya dogad ja kad-an ni ematid tan. <sup>6</sup> Say inkowan ko nontan son si-kam, mesepol la say shotokan mo ket sota toon enshiy mebedaw wa ogadi to, tan mesepol la sakey bengat i asewa to. Jet angken pay sota annak to, mesepol ngon ireka ememati son Cristo, tan maronong ira, say enshiy ikowan ni too ey eg ira mebidin. <sup>7</sup> Sajay i mesepol, tep say toon mengipangolo ket si-katoy piniyal nen Apo Shiyos ja mengi-obda ni pansigshan ni too to. Isonga mesepol la say pidi-en mo, sota enshiy mebedaw son si-kato: sota aliwen edastog, no diket nananos; sota aliwen maboteng, sota aliwen mabekal, sota aliwen pilak i toka nemnemnema. <sup>8</sup> Mesepol la sota amta ton menintil ni bisita to, sota panmaptengan i piyan to, sota eshiyosan i ogadi to, sota amta ton mantalna shorog. <sup>9</sup> Tan mesepol pay ya aliwen nanshoway itsora ni toka pengitosho, no diket emepiyal la mengitosho met laeng nonta koston toro ja inamta-an to, say onkedsang ngoy pamati ira nonta eshom, tan say mesdangan ira sota makakontra nonta koston toro.

<sup>10</sup> Pispis mo sota amtam ma mebedin na onkori ja mengilteg ni kait to, ta eshakel shitan i makakontra nonta koston toro, agdalo so nonta ira Hodiyos. Sajay ira, eg ira mebidin; eshakel i shaka ikokowan ja enshiy silbi ton esel, jet wara pay noman i in-owapan sha. <sup>11</sup> Mesepol la pesalsheng mo ira jay ya apil i toro sha, ta si-karay emeneshal ni pamati ira nonta kapamipamilja kabol nonta toro shen emayba-



ba-ngat, jet say sakey pay ya ngaaw wa pangkep sha, piyan shen panpidakan sota ira shaka itod-i. Kabebainga nga pasiya iyay ya shaka dagdag-a. <sup>12</sup> Sota sakey ya toon kait sha met laeng nga i-Create, ja para padto, kowan to nontan da ey, "Emin ira sota i-Create, ma-o-owap ira, jet epalado iren mareshal ja singa iren atap pa animal. Kenen sha bengat i shaka nemnemnema, nem eg ira man-obda." <sup>13</sup> Agpayso iyay den inkowan to, ja sajay i aramid shed tan; isonga bilin mo iren pasiya sota ematid tan, say onkedsang i pamatira, <sup>14</sup> jet say eg sha onoren sota pamati ira nonta eshom ma Hodiyo, ta pinalbo bengat sotan, tan say eg sha onoren sota bilin bengat ni too ja eg makakosto nonta koston toro pangkep so nen Apo Shiyos.

<sup>15</sup> Sota ira maronong, ja mapteng i wared nemnem sha, mapteng ngon emin i pangkep sha. Nem sota ira ngaaw i wared nemnem sha, ja eg memati son Cristo, ngaaw ngon emin i pangkep sha, ta eg sha mala idasin i kosto tan ngaaw. <sup>16</sup> Kowan sha ey wara ira so nen Apo Shiyos, nem enshi kari, ta masas shi aramid shen emengiskig. No maypangkep ni mapteng nga aramid, eg ira kari onkori, ta shaka sopngilay kowan nen Apo Shiyos.

## 2

*Singpet mon mantosho ni podnon toro*

<sup>1</sup> Nem si-kam Tito, say mesepol la itorom, sota ogadin anam ni toon etod-an ni kosto. <sup>2</sup> Ikowan mo so nonta ira nanketaangan na daleki ey mesepol la eg sha debasen i kompormin dag-en sha, no diket mannemnem et ira ni olay ni kosto; tan mesepol la mewad-an ira ni ebadeg ga pamati son Apo

Shiyos, ebadeg ga semek, tan ebadeg ga anos. <sup>3</sup> Sota ira nanke-taangan na bibii, ikowan mo ngo son si-kara ey sota kekosto-i nen Apo Shiyos i mesepol la dag-en sha ni olay, jet ikowan mo pay ey aliwen somang i sha dagdag-en, ono ira en manbotboteng, no diket mesepol la si-kara et i mengitosho nonta mapteng nga ogadi. <sup>4</sup> Si-kara komay mengitosho ira nonta memeshikit ja waray asewara, ey mesepol la sesmeken sha komay asewara, pati annak sha. <sup>5</sup> Tod-an sha et koma pay ira ja mannemnem ni kosto, say sota mapteng ni olay i dagdag-en sha tan nemnemnem sha; tan itod-an sha pay ira ja eg mengi-oway ni baley sha, no diket mewad-an koma ira ni anos; tan tod-an sha koma pay ira ja memati so ni asewara daki. Sajay den emin komay ogadira, say angken sipa, enshiy to pengibasalan na memedaw ni esel nen Apo Shiyos, ja kowan sha ey o-owap kari. <sup>6</sup> Kasta met sota ira bedoleki, ikowan mo son si-kara ey mesepol la tetngelen sha shorog i bakdang sha. <sup>7</sup> (Nem mesepol la si-kam ni olay i mengipa-sas shorog ni mapteng nga ogadi, say sotan na ogadim i onoren sha; isonga sota pengitoshom, mesepol la epasnek, say asen sha ey aliwen o-owap i moka pansilbi son Cristo. <sup>8</sup> Mesepol la emin na ikowan mo ket kosto, say enshiy sha ikowan ey waray nankolongan mo, jet say sota makakontra son si-katejo, mebebaingan ira, ta enshiy sha ikowan na ngaaw pangkep son si-katejo.)

<sup>9</sup> Iyay ngoy ibilin mo so ni ematid tan. Ikowan mo so nonta ira baga-en ey i-onod shen dag-en sota ikowan nonta apo sha, ja aliwen sha sopngilen, say manimdeng sota apo sha pangkep nonta emin na dingkara. <sup>10</sup> Eg

sha pengibotan komay apo sha, no diket ipa-sas sha et koma ey ireka emepiyal ni olay. Jet no sajay i pesing sha, ma-ewis i eshom so nontan na toron pangkep son Apo Shiyos ja engisedakan son si-katejo.

<sup>11</sup> Ta sota kaasi nen Apo Shiyos, inpa-sas to ma niman, jet sotan i mebedin na onbaal ja mengisedakan ni angken sipen too. <sup>12</sup> Jet sotan met laeng i emengitosho son si-katejo, ey ibi-jag tayo sota aramid ja aliwen eshiyosan, ono sota nemnem ja mengamkam ni ka-iri-irin ja wared ja dobong. Sotan na kaasi nen Apo Shiyos i emengitoshong met laeng son si-katejo ja manbiyag ni kinatalna, ono kinashonong, tan mandeka ni piyan nen Apo Shiyos niman na timpo ja wára kitod ja dobong. <sup>13</sup> Sajay komay wáren ogadi tayo niman na tayoka pansessesked nonta akew wa idaw ali mowan nonta Kangeto-an na Shiyos tayo ja si Jesucristo. Enshiy kay-ingesan nonta idaw to mowan ali jet man-imdeng kiton emin tep metongpal la emin sota namnama tayo. Si-katoy engisedakan son si-katejo, <sup>14</sup> ta intolok toy bakdang to shorog ja etey shi koros, say sa-datan toy emin na ngaaw wa aramid tayo ni mapteng, say manbedin kiton too to ja masi-met ni olay ja mandeka ni mapteng.

<sup>15</sup> Sajay day itorom so nonta ira emati, tan banshaanim pay ira, ono bilin mo ira, say bigbigen sha ey si-kam ket wáray kanebengan mon mandeka niyay, say eg shaka damsisen.

### 3

<sup>1</sup> Ikowan mo so nonta ira emati shitan ey mesepol la pati-en sha sota ira toray ni gobirno, tan mesepol la esagana iren ontolong

no ngarantoy mapteng nga kasapolan ni eshom. <sup>2</sup> Ikowan mo ngo son si-kara ey ngaaw i penomang ni eshom, tan aliwen ira mekibek-bekal; no diket say mapteng nga dag-en sha koma, mankombaba ira, ja eg sha ipilit i kostora shi kompormin too.

<sup>3</sup> Mesepol la sajay komay nem-nem tayon emati, ta angken si-katejo nonta eg kito pay laeng emati, makedsel kito ngo, jet tayoka sopngila ngo i kowan nen Apo Shiyos, jet imonod kito pay nodta aliwen koston pangkep. Istay ya naydowam kito pay ya mandeka ni pipiyan tayo, angken sota ngaaw wa daddadsak, ja istay eg tayo mebedinan na isalsheng nontan. Ngaaw nontan i pangkep tayo ni olay; kitoka man-i-inapal tan man-i-inoges. Tan kaibilang ni eshom ma too ey edogit sota aramid tayo nontan. <sup>4</sup> Nem si Apo Shiyos, ja mengisedakan, inpa-sas toy ka-anos to tan semek to, <sup>5</sup> ni insalakan tokito so. Jet sajay ya dingka to son si-katejo, aliwen sobadit ni kompormin mapteng ja dingdingka tayo, no diket dingka to iyay ta ebadeg i kaasi to son si-katejo. Inomas toy basol tayo, tan inpan-iyen to pay sota Ispirito Santo to son si-katejo; isonga wára ma son si-katejo i badon biyag, ja singa ikay-anak kito. <sup>6</sup> Saja inpan-iyen ton Ispirito Santo to son si-katejo, si-katoy on-anay ni kasapolan tayo, jet sajay ya Ispirito Santo ket in-akan to son si-katejo pangkep so nen Jesucristo ja engisedakan son si-katejo. <sup>7</sup> Jet sota kaasi to, sotan i epakańanan ni basol tayo et isonga kinosto-an tokito, say mekila-kam kito ngo nonta biyag ja tayoka namnama-a ja enshiy to engintegan. <sup>8</sup> Enshiy en panshowashowa-an niyay ya inkowan ko la; sigorado.

Isonga sajay den inkowan ko, piyan kon sotan i i-adok mon itoro, say sota ira emati so nen Apo Shiyos, topogen shen mapteng i dagdag-en sha, ta sajay den ogadi, ebadeg met laeng i itolong to son si-kara, tan shi panmaptengan ni eshom. <sup>9</sup> Nem mesepol la eg ka mekibibiyang nonta enshiy silbi ton tabtabtabal maypangkep ni rilihiyon, ono sota pamati ja maypangkep ni ngaranganan ni ap-apo sha la, jet kareka mekibekal ono mekisongbat ni maypangkep nonta bilin ni Hodiyo nonta bayag da, ta sotan na pesing, enshiy silbi to, enshiy to itolong. <sup>10</sup> Sota toon mengikan ni pansisi-janan ni emati, banshaanim nin ni pilmiro, jet no eg to ibjagan, pinshowam ma banshaanan. Nem no iso met laeng, kareka ma mekibiyang son si-kato, <sup>11</sup> ta dimagsheng ja eg mebidin sotan na too, jet sotan na basol to i keshosa-an to met laeng.

<sup>12</sup> No ibetkag ko la si Artimas son si-kam, ono si Tikiko, dagam i kabaalan mo ja ondaw shi Nikapolis, ta say planok, man-iyanak nin shiman no timpo ni teg-in. <sup>13</sup> Dagam i kabaalan mo ja ontolong so nen Sinas ja abokaro, tan si Apolos ni ida-jat sha shi dawán sha. Jet asas mo no wáren emin i mesepol sha. <sup>14</sup> Sota kait tayon ematid tan, ikowan mo son si-kara ey mesepol la osalen shay emin na akew shen ontolong ni olay so nonta ira makasapol ni tolong.

<sup>15</sup> Emin ira sota ematin wáred jay, piyan shen pekikowan kod ja solat koy semek sha son si-kam. Jet ikowan mo ngoy semek mi so nonta ira kait tayod pamati shitan.

Sota kaasi nen Apo Shiyos ja wára son si-kayo, sapay koma ta ma-ma-shoman son si-kayon emin.

## SOTA SOLAT NEN SAN PABLO PARA SO NEN FILEMON

<sup>1</sup> Si-kak si Pablo ja makasolat niyay jet say kadwák shiyay, si Timoteo, ja agi tayo shi pamati. Si-kak, ebaloshak kabol ni naka pansilbi son Cristo Jesus. Sajay ya solat ko, para son si-kam Filemon, ja epateg ga kait min kaontolong ni obda tayo. <sup>2</sup> Tan sajay ya solat, pabasam so nen Apia, ja biin agi tayo shi pamati, tan so nen Arkipo, ja etoled ja kait tayon emansilbi so nen Cristo, tan pabasam pay so nonta ira emesa-sa-nop shita baley mo ja emanshedjaw son Cristo.

<sup>3</sup> Say shawat ko, sapay koma ta sota kaasi tan talna ja wára son si-kayo ja edapo so nen Apo Shiyos ja Ametayo, tan edapo so nen Jesucristo ja Apo tayo, si-katoy ma-shoman.

### *Iyay i shawat ko son si-kam*

<sup>4</sup> No manshewatak so nen Apo Shiyos, takaka ida-da-kam ni olay; naka man-iyaman son si-kato ni olay pangkep son si-kam, <sup>5</sup> ta shinemag ko ey ebadeg i semek mo so nonta ira kait mon emati, tan ebadeg pay i pamatim so nen Apo Jesus. <sup>6</sup> Jet say shawat ko so nen Apo Shiyos, sapay koma ta sota inpankagait tayo pangkep niya pamati son si-kato, si-katoy kabol la pengam-amta-an tayo pay ni maypangkep nonta ebadeg ga kaasi to son si-katejon emati son Cristo. <sup>7</sup> Ebadeg i imdeng kon pasiya pangkep son si-kam, agi Filemon, ta moka pekedsang i nemnem ira nonta kait mon emati, ja si-katoy moka pengipasas ni semek mo son si-kara. Pati si-kak pay ket kimedasang ngoy nemnem ko ni intenengan ko so niya maypangkep son si-kam.

<sup>8</sup> Si-kak, wáray kanebengan kon mengikowan ni mesepol la dag-en mo, ta apostol towak nen Cristo, <sup>9</sup> nem enshi, ekak osalen iyay ya kanebengan ko tep ensemek taka. Nem iyay et mango i shewáten ko son si-kam, jet nemnem mo ey si-kak, agpayson inbetkag towak nen Cristo Jesus ja mengitakshel son si-kato, jet ebaloshak pay pangkep ni naka pengitosho shi totoo ni maypangkep son si-kato. <sup>10-12</sup> Jet iyay sota kowan ko ey shewáten ko son si-kam. Si Onisimo, ibetkag ko la ja on-oli son si-kam jet pangpangaasim, awat mo la koma. Si Onisimo, inbilang ko men singa anak ko med pamati, manipod niman na naybaloshak shiya badoran. Nontan da, mebedin na kowan mo ey enshiy silsilbi nen Onisimo son si-kam, nem niman, mebedin na ibilang mo ey epateg, kasta met son si-kak, ta wáray mebedin na itolong to. Singa entapik den mengibetkag son si-kato, <sup>13</sup> ta piyan ko komen kadwa-en, ta wára pay i itolong to son si-kak niman na kawashak shiya badoran. Amtak ey angken si-kam ket baka kowan mo ngo ey angken meki-iyay nin si Onisimo son si-kak say wáray menodong son si-kak tep amtam ey say kabol la naybaloshan ko ket sota naka pengitosho nonta mapteng nga shamag pangkep so nen Jesucristo. <sup>14</sup> Nem enshi, ekak koston ipeked, ta eg taka nin inbag-an, ta say eg ka mepidit ta mengaasi son si-kak, no diket dag-en mo koma ja mandepod nemnem mo.

<sup>15</sup> Sigosho, indekjas toka nin nontan da, ta plano ngoreshan nen Apo Shiyos ey no on-oli da ket melked ma son si-kam. <sup>16</sup> Nontan da, kowan tayo ey baga-en bengat, nem niman ma, epateg ga agi tayo shi pamati son Cristo. Jet si-kak, ensemek kon pasiya si Onisimo,

jet sigosho si-kam, mas pay ya sesmeken mo koma ey say sota naka penmek son si-kato, ta niman, aliwen baga-en mo bengat, no diket emati pay so nen Apo Jesus, isonga agim ma shi pamati.

<sup>17</sup> Isonga niman, nemnem mo la iya inkowan ko son si-kam, jet no agpayson mowakka ikarin kait mo shi pamati, awat mo ngarod da si Onisimo, ja inges toy moka pesing son si-kak. <sup>18</sup> No bilang ey waray dingka to nontan da ja ngaaw son si-kam, ono waray inotang to, angken si-kak i onbayad so. <sup>19</sup> Si-kak ka mismoy makasolat niyay; isonga sajay i ka-amtan to ey sigoradon bayshan ko. Nem si-kam Filemon, eg mesepol la ikowan ko ey say biyag mo ket singa inotang mo son si-kak.

<sup>20</sup> Isonga patkim komay shawat ko son si-kam, agi Filemon. Nemnem moy kasan-a-aki tayo shi pamati son Apo Jesus jet say dag-en mo koma, sota pan-imdengan ko.

<sup>21</sup> Sajay i solat ko son si-kam, ta amtak ey saja inkowan ko, dag-en mo, jet namnamak ey mas ebadbadeg i dag-en mo ey saja inkowan ko la.

<sup>22</sup> Sakey pay ya shawat ko son si-kam, isekana-imak ni kowadto ja pan-iyanan ko, ta waray namnamak ey songbatan nen Apo Shiyos sota ira shawat mo ey ondawak da ja en manbisita son si-kam.

<sup>23</sup> Si Ipapras, ja kadwak ja naybalod shiya badoran pangkep so nen Cristo Jesus, piyan ton pekikowan kod ja solat koy semek to son si-kam, <sup>24</sup> jet angken sota ira kait ko ja emansilbi so nen Jesucristo, ja si Marcos, si Aristarko, si Dimas, tan si Lucas, inkowan sha ngo ey pekikowan koy semek sha son si-kam.

<sup>25</sup> Sota kaasi nen Apo Jesucristo ja wara son si-kayon emin, sapay koma ta ma-ma-shoman.

## SOTA SOLAT JA PARA SO NONTA IRA HODIYOS JA EMATI SON JESUCRISTO

*Sota Anak nen Apo Shiyos ngoreshan i Kangeto-an so ni emin*

<sup>1</sup> Nonta bayag da, si Apo Shiyos, eminshakel la waray inpa-amta to so nonta ira ap-apo tayo da, jet sota ira para padto i inosal ton engipa-amta. Ekalkalasiy inpasing ton engipa-amta so nonta ira apo tayo da, <sup>2</sup> nem niman ma, simabi sota koston timpo, isonga waray inpa-amta to son si-katejo ngo jet sota Anak ton mismo i inosal ton engipa-amta son si-katejo. Sikatoy inpadaga nen Apo Shiyos ni dobong, jet si-kato pay i shinotokan to ja makakokowa ni emin ingkatod ingka. <sup>3</sup> Si-katoy engipa-sas ni koskoston ogadi nen Apo Shiyos, ja enshiy maka-inges ni kinamapteng to; si-kato bengat i maka-inges sa koskosto so nen Apo Shiyos, jet na-olnos iya dobong tep si-katoy timengel so. Sota esel to bengat i mebedin na mengolnos ni emin kabol ni panakabalin to. Idi naksheng nga etey ja inkaro toy basol ni totoo, dimaw ma shi dangit, jet timongaw shi petek ni kanawan nen Apo Shiyos ja Kangeto-an. <sup>4</sup> Angken sota ira anghil shi dangit, enshiy maka-inges son si-kato, jet engatngato pay i in-akan nen Apo Shiyos ja saad to ey say sota ira anghil.

<sup>5</sup> Ta say kowan ni esel nen Apo Shiyos ja naysolat nonta bayag da pangkep son Cristo, kowan to ey, "Si-kam i anak ko, jet niman si-kak i amam." Nem enshiy to engikowanan na eshom so nonta

ira anghil nonta bayag da ni inges niyay. Inkowan to pay ey, "Si-kak ma aliy ameto, jet si-kato ngo ali may anak ko." <sup>6</sup> Jet nonta shan-shanin ibetkag nen Apo Shiyos alid ja dobong sota Anak to, ja si-katoy singa pangodowan ja mandesin ni shayaw, say inkowan to, kowan to ey, "Emin na anghil ko, manshedjaw ira son si-kato."

<sup>7</sup> No sota ira anghil, aliwa mangon inges niyay i toka pengingeshan son si-kara. Isonga say inkowan to bengat pangkep son si-kara, kowan to ey, "Sota ira anghil, si-karay ibetbetkag nen Apo Shiyos shi piyan ton dawan sha jet mebedin na sa-datan nen Apo Shiyos i bakdang sha; isonga mebedin na manbedin ira ni singa shagem ono apoy no piyan nen Apo Shiyos."

<sup>8</sup> Nem sota Anak to, sajay i inkowan nen Apo Shiyos pangkep son si-kato:

"Si-kam ma Shiyos, sota pantoshayan mo, wara ni olay ingkatod ingka; eg mepospos, jet sota koskosto i pengitoshay mo.

<sup>9</sup> Sota koston mapteng bengat i moka kosto-i ni olay, eg mo kostoy ngaaw; isonga si-kak ja Shiyos mo, shinotokan taken manbedin ni ari; isonga si-kam i mandesin ni imdeng ey say sota ira eshom."

Kowan nen Apo Shiyos. <sup>10</sup> Jet wara pay i naysolat nonta bayag da pangkep nonta Anak nen Apo Shiyos, ja kowan to ey,

"Si-kam Apo i sigod ja emalsowa ni dobong, jet angken sama ira wared naykayang, sata takday mon mismo i dimaga so. <sup>11</sup> Emin iya pinalsowam, wara diy timpo

ja ka-enshira; mebediwan ira ja eg ma mansilbi, ja singa sota baro ja shimaan ma; nem si-kam i mebay-an ja on-onong ngo eshan. <sup>12</sup> Jet sota wara shi

naykayang ja singa nay-atep, bediwan mon kopikopen, ja inges toy mika pengopikop ni dopot. Nem si-kam, on-onong ka, si-kam ni olay; sota tawen mo, eg mepospos, enshiy to engintegan.”

Kowan nonta naysolat.

<sup>13</sup> Jet wára pay i inkowan nen Apo Shiyos nonta bayag da son Cristo; kowan to ey, “Tongaw ka shiya apit ni kanawan ko, ingkatod enshiy kabaalan nonta kabakal mo, ja wára ma ired shalokap ni shapan mo.” Nem angken sipa so nonta ira anghil, enshiy to inkowan na sajay son si-kara. <sup>14</sup> Ta say koston obda nonta ira anghil bengat ket si-karay kai-betbetkag nen Apo Shiyos ja eg ma-sas, ja para tolong so nonta ira totoon maysedakan ja mayda-kam ali son Apo Shiyos.

## 2

<sup>1</sup> Isonga mesepol la nemnemen tayon pasiya sota podnon toro ja intenengan tayo, ta baka et ey dibkan tayo jet nakol ni eshawi-an tayo sota kekostoi nen Apo Shiyos. <sup>2</sup> Jet mesepol la nemnemen tayo pay sota toka penosa, ta angken sota toon nanbasol nonta bayag da, ja eg emati nonta bilin nen Apo Shiyos ja in-awat ira nonta anghil, dina-kaman sha ngoy koston sobadit nonta dingkara. <sup>3</sup> Jet niman na wára iya kaysedakan ja kasaan ni ebadeg ga kaasi nen Apo Shiyos, mas pay ya eg medisi-an i penosa to no baybay-an tayo eg tayo pati-en. Jet sajay, inpa-amta nen Apo Jesus jet sota engitneng son si-kato, inpa-amtara ngo son si-katejo ey agpayso noman. <sup>4</sup> Jet angken si Apo Shiyos, pineneknekan to ey agpayso iyay, nonta inpalobos ton nandaga sota ira too nen Jesus ni kaskasshaaw, tan eshakil la kilasin milagro.

Jet wára pay i inwáris to so ni emati ja amta-an so ni karakdan ey podno sota esel ton emankaitoro, jet sajay ya inwáris to, kilasin daing, ja osalen nonta naywárisan to shi pansigshan ira ni eshom ma emati jet sajay ya inwáris nen Apo Shiyos, in-akan ni Ispirito Santo so nonta piyan nen Apo Shiyos ja pengi-kanan. <sup>5</sup> Ta si Apo Shiyos, aliwen sota ira anghil i shinotokan ton mengitoshay nonta maysa-dat alin dobong, jet sotan alin dobong, sikato iya emanketabtabal niman shiyay ya solat. <sup>6</sup> Jet sajay, nayto-top nodta naysolat nonta bayag da ey too i mengitoshay ali ni emin na banag; kowan to ey,

“Apo Shiyos, enshi met i mapteng nga wára so ni sakey ya too ja kabol ni nemnemenan mo so. Si-kato, enshiy kenkenshat to ja mo so ajowanen. <sup>7</sup> Nem say inpas-ing mo et ngo mowan, sajay: angken inpanbalin mon ebaba nin ni sankatikan ey say sota ira anghil, in-aknan mo met laeng ni shayaw to, ja singa ari. <sup>8</sup> Jet inkesheng mo ey si-katoy mengitoshay ni emin na banag.”

Kowan nonta naysolat. Jet nonta inkesheng to ey tooy mengitoshay ni emin na banag, inpiyal ton emin so ni too, enshiy to binayan ja eg to inpiyal. Nem sotan na kowan to, eg tayo nin asen, ey too i emengitoshay ni emin, tep eg pay laeng epasemak iyay. <sup>9</sup> Nem say inamta-an tayo naksheng den etongpal nodtan na naysolat, sajay: si Jesus, naybaba nin ni sankatikan ey say sota ira anghil, nonta kawasha tod ja dobong, nem niman, nay-aknan ni ebadeg ga shayaw tod dangit, tep nanda-kam ni ebadeg ga digat shiya dobong tan etey pay. Jet sotan i ka-amta-an ni kaasi nen Apo Shiyos so ni totoo, ta say

kabool la eteyan nen Jesus ket say ikaro toy basol ni emin na totoo.

<sup>10</sup> Anam nen Apo Shiyos sotan na dag-en, ta si-katoy emalsowa ni emin na wára, jet si-kato met laeng i emengajowan so, jet say pangkep to, anayen toy kaysedakan ira nonta annak to. Isonga inpandigat to si Jesus, say enshiy kolang to ni pengipangolo to ni totoon insalakan nen Apo Shiyos. <sup>11</sup> Ta si-katoy engomas ni basol ni totoo, jet sota Ameto, si-kato met laeng i Ama nonta ira totoon na-omas i basol sha. Isonga eg to ibaing ja ikowan ey a-aki to ira, <sup>12</sup> ta wára met i naysolat nonta bayag da, ja kowan to ey, “Ikowan koy maypangkep son si-kam Apo Shiyos so nonta ira a-akik. Jet ikansiyon koy panshed-jaw ko son si-kam ni ka-olnong sha.” <sup>13</sup> Jet wára pay i naysolat pangkep nonta inkaykait tod too, ja kowan to ey, “Si Apo Shiyos bengat i panshingan ko.” Tan kowan to pay ey, “Niman iyayak ja naykait so nonta ira annak ko ja in-akan nen Apo Shiyos son si-kak.” Kowan to.

<sup>14</sup> Si-katejon annak nen Apo Shiyos ja inkowan to, nay-anak kito shi too, jet wáray daman tayo, tan shaletayo. Isonga si Jesus, nanbalin ngo ja inges toy itsora ni too. Sajay i inpasing to, say no metey, wáray pesing to ma ja mengebak nonta emengi-kan ni ketey ni too, ja si Satanas, <sup>15</sup> tan mengibodos ira nonta totoon entakot ni olay so ni patey, manipod nonta ka-otik sha. <sup>16</sup> Jet nonta etey si Jesus, edawag ey aliwen sota ira anghil i tinodongan to, no diket say tinodongan to, sota ira toon poli nen Abraham. <sup>17</sup> Si-katoy para tolong nonta ira a-aki ton annak nen Apo Shiyos; isonga si Apo Shiyos, ninemnem ton mese-pol la i-inges to son si-kara, jet

mismon ininges toy katoora, say mebedin na kaasi-an to ira, ta pineshas na ngoy digat. Arig nen Jesus sota kangeto-an na pari ni pamati ni Hodiyo ja emansilbi son Apo Shiyos ni koskosto, tep si-katoy engikesho ni basol ni totoo, say eg ma ibilang nen Apo Shiyos sotan na basol. <sup>18</sup> Jet niman ma, mebedinan ton pekedsang ira sota piyan nen Satanas ja manbesol, say eg ira manbesol, ta si-katon mismo ket nanda-kam ni digat, ja inges to ngo ira. Angken pay si-katon mismo, pineshas nen Satanas.

### 3

*Si Jesus ja masmek tan manangaasi, ja may-eshig ey kangeto-an na pari*

<sup>1</sup> Isonga si-kayon a-akik shi pamati ja pinidi ngo met laeng nen Apo Shiyos ja too to, si Jesus i mesepol la nemnemen tayo. Si-katoy inbetkag ali nen Apo Shiyos jet may-eshig ey si-katoy kangeto-an na pari ni pamati tayo. <sup>2</sup> Nonta kawasha tod ja dobong, toka patia ni olay i kowan nen Apo Shiyos ja emili son si-kato ja ondaga so niyay ya obda. Inges to ngo si Moises. Si Moises nonta bayag da, pinati to ni olay si Apo Shiyos: inpangolo-an to sota ira too nen Apo Shiyos, ja may-eshig ey pamilja met laeng nen Apo Shiyos. <sup>3</sup> Nem si Jesus, mas pay ya anam ton maknan ni ebadbadeg ga shayaw ey say si Moises. Say kay-eshigan sha sajay: sota dimaga so nonta baley, si-katoy eshayaw wa pasiya, aliwen sota baley. <sup>4</sup> Say kay-eshigan sha pay, sajay: emin na baley, wáray dimaga so, nem say dimaga so ni emin, si Apo Shiyos. <sup>5</sup> Si Moises, dingka ton emin sota inpiyal nen Apo Shiyos son si-katon obda, ja say inpasing to, inpa-ama toy pangkep nonta ikowan met laeng ali nonta para padto



tan sota ikowan ali nen Cristo, shi ma-onod ja timpo. <sup>6</sup> Nem si Cristo, aliwen nansilbi bengat. Si-katoy mismon Anak nen Apo Shiyos, ja apo ira nonta may-eshig ey pamilja nen Apo Shiyos. Jet si-katejo, wára kito nodtan na pamilja ja intorayan nen Cristo, no itoloy tayoy epigsen tayoka panshinel tan tayoka pansimet pangkep ni inkari nen Cristo.

<sup>7</sup> Isonga mesepol la nemnemen tayo sota inkowan ni Ispirito Santo ey,

“Niman, no itenengan jo sota kowan nen Apo Shiyos, <sup>8-9</sup> patiyoy, karejo petangken iray nemnem jo, ja inges toy inpasing ira nonta too nonta bayag da nonta wára ired ma dogad ja nay-arawid ili. Sajay iren too, inpilit shen dingka sota pipiyan shen dag-en, ta kowan sha emo ey peshasen sha no ngantoy medeka son sikara ja dag-en nen Apo Shiyos. Sotan iren makapoli son si-kayoy, angken inon-an shen mismo sota milagron dingdingka to ni epat ta polon tawen, eg ira emati. <sup>10</sup> Jet eg kinostonan nen Apo Shiyos sotan na inpasing sha, isonga kowan to ey, ‘Apil ni olay i wáred nemnem sha, tan eg sha koston amta-en sota ogadik ja piyan kon onoran sha koma. <sup>11</sup> Jet oltimo ma ja ekak itoloy ja i-awat sota panmaptengan sha ja istay kowan ko ey i-akan ko son si-kara.’ ”

Kowan nen Apo Shiyos.

<sup>12</sup> Si-kayon a-akik shi pamati, mesepol la mantanshaan kayoy, ta baka et ey wára son si-kayoy i ngaaw i nemnem to, ja eg memati son Apo Shiyos. Tan-shaaniyo ta sotan na eg to pemati, sotan met laeng i kabol la kaysijanan to shorog son Apo Shiyos ja sibibiyag. <sup>13</sup> Nem say kowan

ko, bilin jo ni inakew i sakey tan sakey son si-kayoy, ta emankepospos ma sota inkowan ni Ispirito Santo ey “niman”. Dagejo iyay say enshiy ma-ewis sa mandeka ni ngaaw, ta no wáray toon mandeka ni olay ni ngaaw, ontangken ma i nemnem to jet eg ma memati son Apo Shiyos. <sup>14</sup> Sajay i kowan ko ta mesepol la eki-det ni olay i panshinel tayo son Cristo, ja inges to nonta pilmiron inpamati tayo. Mapteng no sotan ni olay, say metoday ja mayda-kam kito ali son Cristo.

<sup>15</sup> Mesepol la nemnemen tayo sota inkowan ko la ja esel ni Ispirito Santo nen Apo Shiyos, ja kowan to ey, “Niman, no itenengan jo sota kowan nen Apo Shiyos, patiyoy, karejo petangken iray nemnem jo, ja inges toy inpasing ira nonta too nonta bayag da ja inpilit shen dingka sota pipiyan shen dag-en.” <sup>16</sup> Jet sipa ira sota engiteng ni esel nen Apo Shiyos, nem inpilit shay piyan sha, ja eg sha pinati? Enshiy eshom nem eg sota ira emin na toon inbo-day nen Moises shi Egypt. <sup>17</sup> Jet kapota nanbasol ira, eg ira kinostonan nen Apo Shiyos ni epat ta polon tawen, isonga nabos iren etey shima dogad ja arawid ili. <sup>18</sup> Jet si-karen eg emati met laeng sota inkowanan to so ey i-awat sota panmaptengan sha ja istay kowan to ey i-akan to son sikara. <sup>19</sup> Jet niman, amta tayo ma ey eg mebedin na mayda-kam ira nontan da nodta panmaptengan sha ja inkari nen Apo Shiyos, ta eg ira met emati son si-kato.

#### 4

<sup>1</sup> Jet niman, sota kari nen Apo Shiyos nontan da maypangkep nonta panmaptengan ja i-akan to, wára pay laeng, jet si-kato met laeng iya toka pan-i-awis niman.

Isonga mesepol la mannemnem kito koma, ta baka wáray eshom son si-kayo ja eg mayda-kam nodtan, ja singa kini-moyan to bengat. <sup>2</sup>Ta intenengan tayo sota mapteng nga shamag ja kowan nen Apo Shiyos, jet si-kato met laeng sota intenengan sha nontan da. Nem sajay ya intenengan sha, enshiy nanmaptengan sha, tep intenengan sha bengat ja eg sha pinati. <sup>3-9</sup>Isonga kenshat ta si-katejon emati i mayda-kam nodtan na panmaptengan ja i-akan nen Apo Shiyos. Amta tayo ey wára pay laeng i mebedin na mayda-kam nodtan, ta sota sigod ja engitneng nonta bayag da, aliwén si-karay nayda-kam ta eg ira met emati. Inkowan met nen Apo Shiyos nontan da ey, “Oltimo ma ja ekak itoloy ja i-awat sota panmaptengan sha ja istay kowan ko ey i-akan ko son si-kara.” Kowan to, jet say itsora nonta panmaptengan na toka i-akan ket wáray toka kay-ingesi nodta inana ja pineshasan nen Apo Shiyos nonta kinsheng ton pinalsowa iya dobong. Ta si Apo Shiyos, nan-inana nonta naksheng i indaga to so niya dobong. Isonga wára sota nayso-lat nonta bayag da, ja kowan to ey, “Si Apo Shiyos, nan-inana ma nonta maykepiton akew tep naksheng malay obda to.”

Si Josue koma i istay ya mengikan nonta bayag da ni panmaptengan ni too nen Apo Shiyos, nem enshi, ta angken si Ari David ja ma-onod ali, wáray inkowan to pangkep nonta panmaptengan ni too nen Apo Shiyos ja i-akan to ali. Kowan nen Ari David nontan da ey, “Niman, no itenengan jo sota kowan nen Apo Shiyos, patiyoy, karejo petangken iray nemnem jo.” Kowan to. Jet nemnem jo ta wára met i inkowan to nontan ey, “niman”; isonga amtá tayo ey nonta timpo nen David, eg pay

nin etongpal sotan na kari nen Apo Shiyos; mebedin pay laeng nga wáray mayda-kam. Jet niman ma, tongpalen ton i-awat sota eg to intoloy ya in-awat nonta bayag da, ja panmaptengan nonta ira too to. <sup>10</sup>Jet sota mengewat nonta panmaptengan ja pan-i-awis nen Apo Shiyos, man-inana ngo ma jet mannam-ay ma, ja inges to si Apo Shiyos nonta kinsheng ton pinalsowa iya dobong.

<sup>11</sup>Isonga niman, iparas tayoy kabaalan tayon mayda-kam koma nodta panmaptengan ja i-akan nen Apo Shiyos. Aliwa komen tayo ingesen sota inpasing nonta ira too ja eg emati nonta bayag da, tep no ingesen tayo ira, ingesen tayo ira ngon meshosa.

<sup>12</sup>Sota esel nen Apo Shiyos, aliwén pampamaayan, ta naytashol nodtan i biyag to; isonga wáren kenshat i banag to. May-eshig ey singa sota kumpulan ja nanbangi i tarem to, nem mas pay ya makedkedsang sota esel to. Ta sota kumpulan, toka des-anga i nansisilpo-an ni pokel bengat, ja toka sebi-a i otek, nem sota esel nen Apo Shiyos, kabaalan ton des-angen i nemnem tan dina-wa ni too, jet toka idasin pay i angken nganton wáred nemnem tan pangkep ni emin na too. <sup>13</sup>Isonga angken nganton palsowa, eg mebedin na i-emotan to si Apo Shiyos. Singa dabos ira, ta toka asa i emin, angken ngantoy ja shaka dagdag-a, jet no ngantoy dingkara, si-katoy songbatan sha di son si-kato.

<sup>14</sup>Jet niman ma, nemnemen tayo koma sota pamatin inewat tayo say eki-det ni olay, ta wáray mengikan ni kedsang tayo, ja may-eshig ey kangeto-an na pari ni pamati tayo. Si-kato si Yesus ja Anak nen Apo Shiyos, ja kimayang da shi dangit. <sup>15</sup>Jet sotan na kangeto-an na pari tayo,

amta toy kasesaad tayo, ja ekapoy kito, ta angken si-kato, waray pinsak ja nanbalinan ton too. Amta ton mengisekit son si-katejo, tep angken si-kato, pinedpeshas nen Satanas ja panbesol ja inges toy kepespesing nen Satanas ja memeshas son si-katejo niman. <sup>16</sup> Jet niman ma, eg kito koma ontakot ja mengshaw ni kaasi so nen Apo Shiyos ja toka i-akan alid ma tinongawan to, say kaasi-an shakito nonta nankolongan tayo, jet sotan na kaasi to, si-katoy ontolong son si-katejo ni timpon kasapolan.

## 5

<sup>1</sup> Sota kangeto-an na pari ni Hodiyo, emeshotokin medepo met laeng shi too, ja mengita-shel met laeng ni totoo so nen Apo Shiyos, jet si-kato pay i mengileton nonta kai-akan ni totoo, ja animal la mepadti, ono kompormi, ja idaton sha so nen Apo Shiyos, say mepekawanan i basbasol sha. <sup>2</sup> Jet sajay ya pari ni Hodiyo, mebedin ngon amta toy pesing ton mengaasi so nonta ira emanbesol ja eg etod-an ni kosto, ta angken si-kato ngo, eshakil i toka pankodangi. <sup>3</sup> Isonga no mengileton ni daton ja kabol ni kepekawanan ni basol ira nonta totoo, kapiditan na mengileton ngo met laeng ni para so nonta basol ton mismo nem sina-shom. <sup>4</sup> Jet sotan na pari, aliwen si-katon shorog i emili ni bakdang to ja manbedin ni kangeto-an na pari; si Apo Shiyos i kaonshotok so ni toon manbedin ni kangeto-an na pari. Inges to si Aaron nonta bayag da: si Apo Shiyos i shimotok son si-kato ja manbedin ni pilmiron pari.

<sup>5</sup> Jet angken si Cristo, aliwen si-kato shorog i engingeto ni bakdang to ja manbedin ni kangeto-an na pari tayon emati, no diket say emili son si-kato, si Apo Shiyos

ja engikowan met laeng son si-kato ey, "Si-kam i anak ko, jet niman, si-kak may amam." Kowan nen Apo Shiyos, <sup>6</sup> jet wara pay i eshom ma esel nen Apo Shiyos ja naysolat ja kowan to ey, "Si-kam i pari ni olay ingkatod ingka ja inges to si Milkisidik."

<sup>7</sup> Jet nonta kawasha nen Jesus shiya dobong, toka inangis tan toka ikedsang no sina-shom i toka panshewat so nen Apo Shiyos, ta si Apo Shiyos bengat i makabaal ja memiyag mowan son si-kato nem metey, jet intenengan nen Apo Shiyos, ta si Jesus, toka i-onod ni olay i piyan nen Apo Shiyos ja dag-en to. <sup>8</sup> Angken na si-kato ket Anak nen Apo Shiyos, nandakam pay laeng ni digat, ja sotan i inamta-an ton pasiya ja mengionod ni emin na piyan nen Apo Shiyos. <sup>9</sup> Jet nontan ma, enshiy kolang to, jet mebedin ma ja si-katoy mengisedakan ingkatod ingka ni emin na memati son si-kato. <sup>10</sup> Jet inkowan ma nen Apo Shiyos ey si-kato may kangeto-an na pari ja inges to si Milkisidik nonta bayag da.

*Pakedsang joy pamatiyo say enshiy mankebol la jo so ibi-jagan ni pamatiyo*

<sup>11</sup> No sota maypangkep iren jay den banag, eshakil i mebedin na maykowan, nem edigat ja mayodog son si-kayo, ta eg jo mala koston ewatan. <sup>12-13</sup> Niman na timpo, istay mebedin na tod-an jo ngo may eshom koma, nem mese-pol la waray mengitosho mowan son si-kayo ni maypangkep nonta kapangdo-an na ma-ashal ja esel nen Apo Shiyos; eg jo kabaalan na ewatan i na-oneg ga toro. Arig jo sota nga-nga ja katas bengat i mebedin na kenen to, ta eg to kabaalan sota apag. Jet sota toon sajay i itsora sha, kolang i amtaren kekosto-i nen Apo Shiyos.

<sup>14</sup> Sota apag, si-katoy kakena ni na-tengan men too, jet may-eshig sotan so nonta na-oneg ga toro ja anam nonta toon naydowam ma mandeka ni mapteng, ta mebedin ton idasin i ngaaw.

## 6

<sup>1</sup> Niman ma, aliwa komen kito on-onong nodta kapangdo-an na emaytosho pangkep ni pamati son Cristo, no diket ishogi tayo ma komen mengashal nonta eda-med ja toro. Angken eg tayo topogen ja itoro sota inamta-an tayo da, ey mesepol la manbebawi i totoo, ja memati son Apo Shiyos, ja eg ma ira manshinel nodta mapteng nga aramid sha tep eg onkori sota pandeka ni mapteng nga aramid ja mengilisi son si-kara shi penosa nen Apo Shiyos. <sup>2</sup> Angken eg tayo ipinpinshowa sota toro pangkep ni bonjag, ono sota sigod ja tayoka pesing ja mengisakpal ni takday tayo so ni eshom, ono sota pangkep ni panbiyag ali ni toon nanketey shi ka-onoran. Eg koma mesepol la maypinshowa ja maytosho mowan ira jay son si-kayo. <sup>3</sup> Nem itoloy tayon ashalen i edamed ja toro pangkep ni pamati, no ipalobos nen Apo Shiyos. <sup>4</sup> Eg kayo koma on-onong nodta naytopon toro, ta no eg kito ontoloy ja mengashal nonta eda-med, baka et ey sotan i kabol la pengibijagan ma ni eshom so ni pamatira. Nakol ni sajay ira, eg mebedin na may-odi mowan shi pamati, ta eg ira manbebawi. Amtara met sota maypangkep nonta mapteng nga shamag pangkep son Jesus, jet ninamtan sha pay sota mapteng ja kai-akan nen Apo Shiyos so ni too to, tan pineshasan sha pay da ja intorong ni Ispirito Santo, <sup>5</sup> jet pineshas sha ey sota esel nen Apo Shiyos ket mapteng. Manshoki nonta inpamatira, emin ira jay ya paras sha ket pineshas sha

sota panakabalin nen Apo Shiyos ja ewara shiya dobong manipod nonta indaw ali nen Cristo. <sup>6</sup> Nem angken amtara ira jay ja banag, no inbiyang sha si Apo Shiyos ja eg sha ma kosto, eg mebedin na manbebawi ira mowan, ta singa shaka mowan pan-idansa sota Anak nen Apo Shiyos shi koros, shi shasoka idedamsis son si-kato, angken shi karakdan ni too. <sup>7-8</sup> Say kay-eshigan ira niyay ya too, singa sota bo-day ja emesibogi ni oran ni olay nem eg onba-deg i maymoda; enshiy silbi to, ta say kaonbengis bengat nodtan ket sota sebit tan edet. Jet shanshanin shosa-en ma ira nen Apo Shiyos, ja singa sota bo-day ja mepoolan no waray sipol. No sotan iren too ket singa koma sota mapteng nga bo-day, ja waray ka-epita nonta emengobda nodtan, bindisiyonan ira nen Apo Shiyos.

<sup>9</sup> Nem si-kayon ensemek ko, angken sajay i inbanshaan mi, wara mangoy namnama mi son si-kayo, ey waray mapteng nga panbenagan ni insalakan shakejo so nen Apo Shiyos; aliwen inges jo ira sota eshom ja enshiy silbira. <sup>10</sup> Waray namnama mi son si-kayo, ta sigoradon si Apo Shiyos i wara son si-kayo. Si Apo Shiyos, sota koskosto i toka pesing jet amta to sota maypangkep ni mapteng nga dingkayo ni intolong jo so ira nonta kait jon emati, pangkep ni semek jo son si-kato. Sajay met laeng i joka dagdag-a ingkato niman. <sup>11</sup> Jet say piyan min dag-en jo, emin kayo koma ket itodoy jon man-edisto ni olay, ingkatod onsabi ali sota joka segsegsha ja panmaptengan jon tongpalen ali nen Apo Shiyos shi ka-onoran. <sup>12</sup> Eg kayo koma onsarot, no diket onoshiyo sota inpasping nonta nankepangdo len emati. Ebadeg i pamatira,

tan nan-anos ira, isonga naydakam ira nodta kari nen Apo Shiyos nontan da.

<sup>13</sup> Nemnem jo kari si Abraham. Nonta bayag da, ja waray inkari nen Apo Shiyos son Abraham, inkowan nen Apo Shiyos ey sikaton mismoy ondaga so nonta kari to; enshiy eshom ma kangeto-an ja ingadnan ton pati-an so nen Abraham. <sup>14</sup> Jet say kowan to, sajay: “Si-kak met laeng i onbindisiyon son si-kam Abraham, jet agpayson metongpal, jet sota polim, mebonat ira di ja onshakel.” Kowan nen Apo Shiyos. <sup>15</sup> Sajay i inkari nen Apo Shiyos son Abraham, tep inenosan ton pinati sota inkowan nen Apo Shiyos son si-kato. <sup>16</sup> Say itsora ni too, no mankeshi so ni kait ton too, say ingadnan ton pati-an sha so, sota ngaran ni too ja engatngato ey say si-kato, jet no sotan i pesing ton mansangba ni timpo ni tongtong, shaka ma noman pati-a. <sup>17</sup> Jet angken si Apo Shiyos, inges to ngo sota kepesing ni too i inpasing to, nem ngaran to et mangon shorog i inosal to, say ewatan na pasiya ira nonta toon nankari-an to, ey sotan na inkari to, eg mebedin na mebediwan, no diket on-onong sotan na pangkep to. <sup>18</sup> Say inpasing nen Apo Shiyos nontan, shinobdi toy kepati-an nonta kari to nonta inosal toy ngaran to, say eki-det ni olay i tayoka panshinel son si-kato, tep eg mebedin na man-o-owap si Apo Shiyos, tan eg pay mebediwan i epasnek ka kari to. Isonga sikatejon kimamang son si-kato, eg kito koma manshowashowa nonta namnama tayo maypangkep nonta inkari to. <sup>19-20</sup> Sajay ya tayoka panshinel nonta inkari nen Apo Shiyos, si-katoy emengipilmi son si-katejo ja enshi may onpilshi son si-katejo ingkatod ingka. Sigoradoy namnama tayo

tep si Jesus, epangdo len dimaw shi dangit, ja en mengita-shel son si-katejo; isonga singa mayeshig ey simekep da nodta naydamed ja kowadto ni Timplo ja esadinan nonta masshel la kortina, ta si-kato ma i kangeto-an na pari, ingkatod ingka, ja inges tos Milkisidik nonta bayag da.

## 7

*Epatpateg i kinapari nen Cristo ey say sota eshom*

<sup>1</sup> Sajay ya si Milkisidik, si-katoy ari shi Salim, nem pari met laeng ja emansilbi so nen Apo Shiyos ja Kangeto-an. Idi on-akad si Abraham ja edapod kobatan, nonta inebak ton binono ira sota arin kabakal to, en inaspol nen Milkisidik, jet binindisiyonan to si Abraham. <sup>2</sup> Jet si Abraham, inakan to son Milkisidik i ikasampolon parti nonta inebak to alid kobatan. Say olog nonta ngaran ja Milkisidik, “arin inges toy ogadi nen Apo Shiyos”. Si-kato pay i ari shi Salim, jet say olog ni Salim, “olnos”, isonga si Milkisidik, ari ngo ni olnos. <sup>3</sup> Sajay ya ari, enshiy engistoriya ni ameto, ineto, ono poli to. Isonga enshiy ka-amta-an ni inkay-anak to, ono inkateyo to. Sajay ya too, pari ni olay ingkatod ingka, ja singa si Jesus ja Anak nen Apo Shiyos.

<sup>4</sup> Si Milkisidik, eg medamsis, ta angken si Abraham ja eshayaw ngon too ket in-aknan to si Milkisidik ni ikasampolon parti nodta inda ton kokowa nonta inebak to. Isonga ka-ewatan ngarod ey engatoy saad to ngoreshan ey say si Abraham, <sup>5</sup> jet waray sakey ya parin inges to si Milkisidik, ja si Jesus, ja engato ngoreshan ey say sota ira papashin poli nen Levi ja poli met laeng nen Abraham. Ta sota ira poli nen Levi ja papashi, say naypalobos bengat son si-kara ja singilen sha ni ikasampolo, sota

kait sha met laeng ja poli nen Abraham. <sup>6</sup> Nem si Milkisidik, ja aliwen poli nen Abraham, in-akan nen Abraham ma mismo ni ikasampolo nonta inebak to; jet binindisiyonan to si Abraham, ja mismon in-awatan son Apo Shiyos ni kari to. <sup>7</sup> Isonga enshiy showashowa ey engatngato si Milkisidik ey say si Abraham tep engatngato ni olay sota kaonbin-disiyon nem say sota mebindisiyonan, jet amta tayo met ey si Abraham i binindisiyonan nen Milkisidik. <sup>8</sup> Jet say sakey pay, sota papashi ni Hodiyoys ja wára niman, ja emengewat nonta ikasampolo ja emay-ekan, ireka metey; nem si Milkisidik ja engi-kanan nen Abraham ni ikasampolo nonta inebak to shi kobatan, kowan nonta naysolat nonta bayag da ey wared biyag ni olay ingkatod ingka. <sup>9</sup> Si Levi i edapo-an ira nonta papashi ni Hodiyoys, ja emengewat nonta ikasampolo ja kai-akan ni too para so nen Apo Shiyos, jet singa mebedin na maykowan ey sota in-akan nen Abraham so nen Milkisidik ja ikasampolo, singa sotan i maybidang ey in-akan nen Levi so nen Milkisidik, <sup>10</sup> ta si Levi, singa wared bakdang nen Abraham nonta inpan-aspol sha nen Milkisidik, ta si Abraham i mengipotot ali son si-kato.

<sup>11</sup> Sota bilin nen Apo Shiyos ja in-awat to nonta bayag da son Moises, in-akan to nonta timpo ni papashi ja poli nen Levi. Nem eg kabaalan ni toon onoren sotan na bilin ingkato niman, isonga aliwen sotan i kosto-an nen Apo Shiyos so ni too. Isonga inbetkag to ali si Cristo. Sota kinapari nen Cristo, aliwen inges toy inpanpari nen Aaron ja poli met laeng nen Levi, ta eg on-anay sota kinapari nen Aaron. Inbetkag ali nen Apo Shiyos si Cristo ja inges toy saad nen Milkisidik. <sup>12</sup> Isonga

esa-datan ma i maypangkep ni kinapari, ta si Apo Shiyos, eg to intoloy sota sigod ja papashi. Jet idi sina-datan to sota maypangkep ni kinapari, sina-datan to sota bilin to ja in-awat to nonta bayag da. <sup>13-14</sup> Sajay i ka-amta-an to ey eg intoloy nen Apo Shiyos sota sigod, ta si Apo Jesus met ket edapo shi apil la poli, ja aliwen sota poli nen Levi. Edawag ey say edapo-an ni makapoli so nen Jesus ket shi poli nen Joda, jet sotan na poli, enshin polos son si-kara i en nanpari; enshi met i angken sakey ja en inkowan nen Moises pangkep nonta poli nen Joda, ey wára son si-kara i nanpari.

<sup>15</sup> Jet mas pay ya edawdawag sota inkowan ko la, ja insadat nen Apo Shiyos so nonta pangkep ni kinapari tan sota bilin to, ta si Cristo, dimaw ali ja inges to si Milkisidik ni inpanpari to. <sup>16</sup> Si Cristo, nanbalin ja pari tep waray biyag ton angken pigan, eg meseshal; aliwen inges toy kepesing ni pari ni Hodiyoys ja poli nen Levi ja manpeshi, tep say shaka pesing ja manpeshi ket shaka tewira, ta sajay, sigod ja wared bilin nonta bayag da. <sup>17</sup> Si-katoy kaytoshongan nonta esel nen Apo Shiyos ja naysolat nonta bayag da, ja kowan to ey, "Si-kam i pari ni olay ingkatod ingka, ja inges to si Milkisidik." <sup>18-19</sup> Jet sota ira sigod ja bilin ja nay-awat son Moises, enshi mala, esa-datan; eg ma mansilbi niman, ta eg onposin mengi-kan ni kosto-an son Apo Shiyos ni too. Nem wára niman i mapmapteng ja inpasing nen Apo Shiyos say mebedin ngon on-esop kito son si-kato, ja inges toy kangeto-an na pari. Say inpasing to, inpansaad to si Cristo shi dangit.

<sup>20</sup> Jet sajay ya mapmapteng ja inpasing nen Apo Shiyos niman, ja inpanpari to si Jesus ket

tinaksholan to ni kari. <sup>21</sup> Sota ira eshom ma papashi, nanopari bengat ira, enshiy en inkari nen Apo Shiyos son si-kara. Nem saja badon pari ja si Cristo, wáray naysolat pangkep son si-kato ja kari nen Apo Shiyos, ja kowan to ey, “Si Apo Shiyos, inkari to ey si-kam i pari ni olay ingkatod ingka, jet sajay ya inkari to, eg to bebawien.” <sup>22</sup> Jet sajay ya inkari nen Apo Shiyos, si-katoy penigoradonan ey mapmapteng sota badon toka pesing ma niman, ta mismon si Jesus ma i emengitakshel ni too so nen Apo Shiyos.

<sup>23</sup> Jet say sakey pay ja pengamntaan ey mapmapteng iya dingka nen Apo Shiyos niman, sakey nen Jesus bengat ja pari. Sota papashi ni Hodiyo, ireka mansisina-dat, ta ireka emetey; isonga enshi son si-kara i parin kaon-onong nga pari ni olay. <sup>24</sup> Nem si Jesus, si-katoy pari ni olay ingkatod ingka ta angken pigan eg metmetey. <sup>25</sup> Isonga niman ma, tan angken nganton timpo ali, mebedin na isalakan to ira sota emanshinel son si-kato ja si-katoy mengi-sop son si-kara son Apo Shiyos, ta si-kato, wára ni olay shi biyag, ja emengita-shel son si-kara so nen Apo Shiyos.

<sup>26</sup> Anam ton si Jesus i kangetonan na pari ja mengita-shel son si-katejo, ta enshiy kolang to, tan enshin polos i basol to, tan say sakey pay, aliwén inges toy si-katejon toon ngaaw i aramid tayo, ta si-kato, dimaw da shi dangit, ja nay-apil ma shi totoon mabesol. <sup>27</sup> Aliwén inges to sota kangetonan na pari ni Hodiyo ja inakew wa ememalti ni animal ja daton so nen Apo Shiyos, pangkep nonta basol to shorog, tan basol ira nonta totoo; si Jesus, eg mesepol la dag-en to iyay, ta enshiy basbasol to. On-anay sota indaton to so ni bakdang to shorog ni pinsak, ja

inkaro toy emin na basol ni totoo, jet kosto sotan na dingka to, eg mesepol la mepinshowa. <sup>28</sup> Sota bilin nen Apo Shiyos ja naysolat nonta bayag da, emengitoshong no sipay toon manpeshi, jet say emeshotoki ni olay, too met laeng, ja wára ni olay i kolang sha. Nem sota inkowan nen Apo Shiyos ja inkari to pangkep son Cristo, kowan to ey sota Anak ton mismo, si-katoy manbedin ni kangetonan na pari ingkatod ingka, jet enshiy to pankodangan. Jet sota inkari nen Apo Shiyos pangkep son Cristo, na-onod ja timened nodta sigod ja bilin to, jet sinadatan to sotan na sigod.

## 8

<sup>1</sup> Niman ma, say esa-nopan nonta emin den inkowan ko, sajay. Wára ma i kangetonan na pari ja emengita-shel son si-katejo shi dangit, ja timongaw shima petek ni kanawan ni tongawan nen Apo Shiyos. <sup>2</sup> Si-kato i koston kangetonan na pari shima kadanen Apo Shiyos ja emansilbi nodta koskoston Timplo ja aliwén inemag ni too, no diket si Apo Shiyos ja mismo i dimaga so. <sup>3</sup> Nem aliwén inges toy kepansilbi nonta ira kangetonan na pari shi dobong, ja eshotokan ja mengileton nonta in-akan ni toon daton sha so nen Apo Shiyos. Si Cristo nontan da, wára ngoy indaton to, ta si-katoy mesepol la dag-en ni kangetonan na pari. <sup>4</sup> Nem no wára pay laeng si Cristo shiya dobong, eg manpeshi, ta wáren sigod ira sota pari ja emengi-kan ni daton ja kowan ni bilin nonta bayag da ey maydeton. <sup>5</sup> Sota ira pari shiya dobong, sota shaka dagdaga ja mansilbi nodta Timplo, shaka pan-onori bengat sota koston pansilbi shi dangit, jet angken sota Timplora, inonoran sha bengat sota wáred dangit. Ta angken si

Moises nonta shanshanin itowen to sota tolshen panshedjawan son Apo Shiyos, binanshaanan nen Apo Shiyos, ja kowan to ey, “Mese-pol la say onoran mon pasiya ni idagam so nonta panshedjawan, i-inges mo nonta inpa-sas ko son si-kam shi shontog nontan.”

<sup>6</sup> Nem no sota maypangkep ni kinapari nen Jesus ja toka pansilbi, epatpateg ngo eshan ey say sota kepansilbi nonta ira papashi ni Hodiyo, ta mapmapteng ma niman i inpasing nen Apo Shiyos ey say sota epangdon inbilin to ja kedagdag-a ira nonta papashi ni Hodiyo. Mas mapmapteng ngoy niman tep mas mapmapteng ngoy intakshol nen Apo Shiyos ja kari to. <sup>7</sup> No kosto koma sota epangdon bilin nen Apo Shiyos nonta bayag da, istay eg mesepol la sadatan to. <sup>8</sup> Sajay i inpasing nen Apo Shiyos ta inon-an ton enshiy koston aramid ira nonta toton in-awat to so nonta epangdon bilin to; isonga inkowan to nontan da ey,

“Waray onsabi alin timpo ja bediwan ko sota sigod ja bilin ko so nonta ira took ja poli nen Israel. <sup>9</sup> Say dag-en ko, aliwen inges to sota inpasing ko so nonta ira makapoli son si-kara da, nonta timpon intorong ko ira ja idekjas sha sota dogad ni Egypt. Bediwan ko, ta sotan iren took, eg sha intoloy ya inonoran sotan na bilin ko; isonga inbiyang ko ngo ira. <sup>10</sup> Jet say dag-en ko ali so ni took ja poli nen Israel, sajay: No meksheng den ondabas iyay ya timpo, penemnem kon mismo ni olay shi sakey tan sakey son si-kara i bilin ko, say eg sha ma dibdibkan; singa isolat ko nodta poso sha tan nemnem sha. Jet no onsabi ma iyay, si-kak ma i Shiyos sha jet ajowan ko ira; jet si-kara ngo ma i took jet pati-

en sha-ak. <sup>11</sup> Jet eg ma mesepol la mengitosho ira so nonta kait sha, ono agi sha ni maypangkep son si-kak, ta emin na too ma, amtara-ak ali; angken sota toon ebaba tan sota ira nankengato, amtara-ak ali. <sup>12</sup> Jet kaasi-an ko ira, angken ngaaw i aramid sha nontan da, jet sota basol sha, ekak ma ibilang son si-kara.”

Kowan nen Apo Shiyos.

<sup>13</sup> Jet sajay ya inkowan to la, ja bediwan to sota sigod ja bilin to, inbilang to ey eg ma onkori sotan na sigod ja bilin; jet emin na eg onkori, kenshat ta maybiyang ma.

## 9

<sup>1</sup> Sotan den epangdon bilin ja in-awat nen Apo Shiyos, waray emanonod ja pesing nga manshedjaw son si-kato, jet waray dingka ni too ja panshedjawan son si-kato, nem aliwen naypilmi. <sup>2</sup> Jet sotan, tolsha ja showay kowadto to. Sota mesongbob, si-kato sota kowan sha ey “Epateng ga dogad nen Apo Shiyos”, jet nodtan i kawad-an nonta sakey ya nanpa-pa-nga ja kaytowanen ni kanshila, tan shiman met laeng i kawad-an nonta damisaan ja naysagpatan nonta tinapay ya naydaton so nen Apo Shiyos. <sup>3</sup> Jet wara ngoy naydamed ja kowadton esa-dinan ni kortina, jet sotan i kowan sha ey “Kapatkan na dogad nen Apo Shiyos”. Showa sota kortina: sota sakey, nayba-jat nodta sakepan nonta tolsha, nem sota sakey, naysa-din nodta nankinaw-an ni kowadto. <sup>4</sup> Jet nodtan wara sota kowan sha ey altar ja balitok, ja kepoolan nonta insinso, tan nodtan met laeng i kawad-an nonta kakon ja naytalo-an nonta showen eshapis sa baton naysolatan ni bilin nen Apo Shiyos ja in-awat to son Moises. Balitok ka emin i nankinilig nontan na kakon. Wara pay nodtan sota balitok ka



salaw ja nay-inan nonta tinapay ya kowan sha ey mana, jet wára pay nodta kakon sota sowan nen Aaron ja bimolong. <sup>5</sup> Jet waray shownen balitok ka sinan palsowa ja epayashan ja naysakpal nodta tangeb nonta kakon. Ireka emeneni, isonga sotan i emengipamta ni kawasha nen Apo Shiyos nodtan, jet na-okdag i payad sha jet singa esiroman sota balitok ka tangeb ni kakon ja ewalki-an ni shala nonta naydaton na animal say pekawanan nen Apo Shiyos i basol ni totoo. Nem aliwen niman i kay-odog niyay iren banag.

<sup>6</sup> Sajay i itsora ni shaka panshedjawi son Apo Shiyos nontan da. Jet sota ira pari, ireka onsekep nodta naysongbob ja kowadto say dag-en sha sota sigod ja shaka dagdag-a. <sup>7</sup> Nem sota kangeto-an na pari bengat i mebedin na onsekep nodta nayda-med ja kowadto. Nem pinsak bengat ni makatawen i mebedin na isekap to nodtan, tan mesepol la mengita-jon ni shala ja idaton tod man say mepekawanan i basol ni totoo, tan sota basol to met laeng. <sup>8</sup> Jet sajay, edawag i toro nonta Ispirito Santo nen Apo Shiyos ja kowan to ey nontan da, angken sipen too, eg mebedin na ondaw nodta Kapatkan na dogad nen Apo Shiyos, ta wára pay laeng sota sigod ja bilin ja shaka on-onora. <sup>9</sup> Jet angken niman, sotan i kasesaad nonta toon emengonod nonta sigod ja bilin. Jet sakey pay, ireka mengikan ni animal ja daton so nen Apo Shiyos, nem eg met laeng kabedinan niyay ja pandelteg i nemnem ni too. <sup>10</sup> Ta emin ira jay ya shaka dagdag-a ket maypangkep bengat ni pangan, penginom, ono pesing nga mengoshas ni ka-iri-irin. Jet emin ira jay ket ingkato koma bengat nonta timpon sina-datan nen Apo Shiyos ni bado sota sigod ja bilin to; tan niman bengat ta

kawasha tayod ja dobong i kedekato.

<sup>11</sup> Jet sajay, simabi ma ta wára ma si Cristo ja may-eshig ey kangeto-an na pari, jet engisebi ali nonta kamaptengan, ja eg inakan nonta sigod ja bilin. Jet aliwen nodta panshedjawan ja dingka ni too i nansilbi-an to, jet sota toka pansilbi-i, si-katoy koskosto, si-katoy kapatkan, ta aliwen shiya dobong i kad-an to; aliwen inges nonta wára nonta bayag da ja na-enshi la. <sup>12</sup> Jet sota insekep nen Jesus nodta may-eshig ey Kapatkan na dogad nen Apo Shiyos, pinsak bengat nem imanay, angken eg mepinshowa. Jet nonta simekep shiman, aliwen sota shala ni kanshing, ono shala ni baka i indaw tod man, no diket mismon sota shaletto i indaton to; isonga sigoradon naysalakan kito ingkatod ingka. <sup>13</sup> Agpayso ja sota shala ni kanshing, ono sota shala ni baka, tan sota ngaep ni epoolan na kilaw, no naywalki nonta timpo ni daton, makedsang nga mengkal nonta kowan ni pamatira nontan da ey dogit sha say maypedobos mowan ja mekiredjaw ira son Apo Shiyos, <sup>14</sup> nem mas pay ya makedsang sota shala nen Cristo, ta intorong ni Ispirito Santo nen Apo Shiyos ja wára ni olay ingkatod ingka ey sota bakdang ton mismo i indaton to son Apo Shiyos; isonga enshiy kolang nontan na indaton to so ni bakdang to. Makedsang sota shaletto ja ondinis so nonta sigod ja ngaaw ja wared nemnem tayo ja kaondingding son si-katejo, ja istay eg tayo so kon-oran ni biyag ja kai-akan nen Cristo, isonga mebedin na mansilbi kito ma so nen Apo Shiyos ja sibibiyag.

<sup>15</sup> Isonga niman na binediwan nen Apo Shiyos sota sigod ja bilin to, tewiren ma ira nonta toon pinidi to sota inkari to nontan da,

ja kaysedakan sha ingkatod ingka, jet si Cristo i kabol, ta etey say eg kito meshosa pangkep nonta ngaaw wa aramid tayo ja edaga nonta timpo nonta sigod ja bilin. <sup>16-17</sup> Say kay-eshigan to, sota toon engamag ni kasodatan ey sota ira kokowa to ket wáray i-aknan to so ja ontawid so no metey. Jet no metey, mayweshis ma sota tawid so nonta toon ontawid so nontan. No eg pay laeng etey sota makasolat, eg nin metongpal sota naysolat. Sota tawid, eg mebedin na a-den nonta naykari-an to, no eg nin etey sota mengitewid so. <sup>18</sup> Angken sota epangdon bilin ja in-awat nen Apo Shiyos, wára nin i shala ja naybokbok nontan da asan man-anshal ma sotan na bilin to. <sup>19</sup> Ta si Moises, nonta naksheng nga inbasa ton emin sota bilin so nonta ira totoo, engala ni shala nonta kilaw ni baka, jet sini-nak to ni shanom, asan toka wálki-i sota naysolatan nonta bilin nen Apo Shiyos, tan sota ira totoon emin. Say inosal ton inpangiwalki to, sota ootik ka panga ni kowan sha ey hisop tan sota shotshot ni kalniro ja inpabedanga to. <sup>20</sup> Jet kowan nen Moises ey, “Sajay ya shala, si-katoy mengipilmi nonta bilin nen Apo Shiyos ja inkowan to ey onoren jo.” <sup>21</sup> Jet nontan met laeng, si Moises, wínalki-an to pay sota tolshen panshedjawan, tan sota emin na ema-osal nodtan ni timpon panshedjaw. <sup>22</sup> Say agpayso, no sota sigod ja bilin i onoren sha, ngannganin shalen emin i ema-osal no piyan shen ibilang nen Apo Shiyos ey mapteng sota kompormin banag ga wára son sikara. No enshiy shalen maybokbok, eg mebedin ja mepekawan i basol ni too.

<sup>23</sup> Sajay iren emedegdeka, inonoran sha bengat sota wáred dangit, jet mesepol la shala ni an-

imal i osalen sha say maybidang ey mapteng ma. Nem shi dangit, mapmapteng ngo eshan ey say sajay; isonga mesepol la sota mapteng ngoy maydeton. <sup>24</sup> Si Cristo, wáred dangit, jet aliwén shima panshedjawan ja inemag ni too i singkep to, no diket mismon dimaw da shi dangit ja kadan nen Apo Shiyos say ita-shel shakito son Apo Shiyos. Sota panshedjawan na wáred dobong, inonoran sha bengat sota koskoston wáred dangit, <sup>25</sup> jet sota pari ni Hodiyo, tinaw-en ja kaondaw shima Kapatkan na dogad nen Apo Shiyos ja mengileton nonta shala ni animal; aliwén sota mismon shaletto. Nem si Cristo, pinsak bengat ja indaton toy bakdang ton mismo; eg mesepol la pinpinshowa-en to. <sup>26</sup> No mesepol koma ja manpinpinshowa si Cristo, istay eminshakel ja nandigat asan matey, manshoki nonta inkapalsowa ni dobong. Nem ayshi met. Say dingka to, pinsak alin dimaw ja nanbalin ni too, nonta simabi sota koston timpo to, jet si-katoy mismon nangkai ni basol ni totoo, ni indaton to so ni bakdang ton mismo. <sup>27</sup> Naykesheng ey angken sipen too, peshasan to ngoreshan ja metey ni pinsak, jet ikesheng nen Apo Shiyos i panbenagan to no meksheng men metey. <sup>28</sup> Jet si Cristo, etey ngo ni pinsak, nem nontan, indaton ton mismoy bakdang to say si-katoy mengikesho ni basol ni totoo. Jet ondaw mowan ali, nem apil i dag-en to: aliwén mengkal ni basol, no diket anayen toy kaysedakan ira nonta emansessesked ja pasiya son sikato.

## 10

<sup>1</sup> Say mika pan-ikowan, aliwén nan-inges sota bilin nen Apo Shiyos ja in-awat to so nen Moises nontan da tan sota insabi ali nen

Cristo. Wara mangoy nan-ingsan sha, nem arawin mapmapteng ngoreshan sota insabi ali nen Cristo; singa may-eshig sota sigod ja bilin ey adirong bengat nonta indaw ali nen Cristo. Isonga sota daton ja emedegdeka ni tinaw-en, eg to mebedinan ja pemapteng i nemnem ni toon emengonod nonta bilin. <sup>2</sup> Ta no sotan koma i makabaal ja pemapteng so ni too, istay pinsak koma bengat ta medeka, aliwen tinaw-en. Ta no agpayson na-omas may basol sha, istay eg sha koma nemnemnemen ey wara pay laeng i basol sha. <sup>3</sup> Nem shaka nemnemnema i basol sha tep sota shaka pengileton ni tinaw-en, si-katoy emengipa-amta met laeng son si-kara ey waray basol sha. <sup>4</sup> Isonga angken sota shala ni baka tan shala ni kashing i shaka idaton ni olay, eg mebedin na sotan i on-anay ja mengkal ni basol sha.

<sup>5</sup> Jet nonta shanshanin ondaw ali si Cristo shiya dobong, sajay met laeng i inkowan to son Apo Shiyos, ja kowan to ey,

“Eg mo kosto sota kompormin pengileton ni animal, nem wara i insaganam ma bakdang para son si-kak. <sup>6</sup> Isonga angken sota mepoolan na animal ja daton, ono sota daton ja para ekal ni basol, aliwen sotan i emengi-kan ni pan-imdengan mo. <sup>7</sup> Jet isonga say kowan ko, Apo Shiyos, si-kak et ngoy ondaw ja ondaga nonta emin na piyan mo, ja inpa-amtam ey onoren ni too nonta bayag da, ja inpaisolat mo.”

Kowan to.

<sup>8</sup> Jet sotan den inkowan to, eg kosto gayam nen Apo Shiyos sota ira kompormin pengileton, angken sotan i sigod ja wara nodta bilin to ja medeka. <sup>9</sup> Nem iyay pay i intobtob nen Cristo nodta inkowan to la, ja kowan

to ey, “Si-kak et ngoy ondaw ja ondaga so nonta emin na piyan mo, Apo Shiyos.” Isonga nonta intolok nen Cristo ja metey, esadatan mala sota ogadin pengileton, jet say naysa-dat, sota pandeka ni piyan nen Apo Shiyos. <sup>10</sup> Jet niman ma, ta dingka nen Criston emin sota piyan nen Apo Shiyos, na-omas ma i basol tayo et mebedin men kosto-an nen Apo Shiyos i panshedjaw tayo, ta mismon bakdang to i indaton to ni pinsak et inkaro toy basol ni emin na totoo.

<sup>11</sup> Sota ira papashi ni Hodiyo, inakew wa wara ired ma shaka pengi-kan ni daton, jet ememinshakel la sotan met laeng i itsora ni shaka pengileton, nem sajay ya daton sha, eg to kabaalan na mengkal ni basol. <sup>12</sup> Nem si Cristo, pinsak bengat ja indaton toy mismon bakdang to say ma-kal i basol ni totoo. Sotan na inpasing nen Cristo i mapteng nga daton ja kekosto-i nen Apo Shiyos ingkatod ingka; jet angken enshi may eshom ma maydeton. Isonga idi naksheng iyay, dimaw da shi dangit si Cristo jet inpatongaw nen Apo Shiyos shi petek ni kanawan to. <sup>13</sup> Jet emansessesked ma ingkatod ebaken nen Apo Shiyos sa emin sota ira makakontra son si-kato, ingkatod enshiy kabaalan sha, ja wara ma ired shalokap ni shapan to. <sup>14</sup> Si Cristo, pinsak ka indaton to sota mismon bakdang to, jet si-katoy engomas ni basol ira nonta too to; isonga kinosto-an ira nen Apo Shiyos ingkatod ingka. <sup>15</sup> Jet amta tayo ey agpayso iyay, ta sota Ispirito Santo nen Apo Shiyos, waray intorong ton engisodat nonta esel nen Apo Shiyos, ja kowan to ey, <sup>16</sup> “Say dag-en ko ali so ni took, sajay: No meksheng den ondabas iyay ya timpo, penemnem kon mismo ni olay

shi sakey tan sakey son si-kara i bilin ko, say eg sha ma dibdibkan; singa isolat ko nodta poso sha tan nemnem sha.” Kowan nen Apo Shiyos. <sup>17</sup> Jet aliwén sotan bengat; wára pay i inkowan to, ja kowan to ey, “Sota basol sha, ekak ma ibilang son si-kara, angken sota eg sha inpangonod ni bilin ko.” Kowan nen Apo Shiyos; <sup>18</sup> isonga eg mesepol la wára pay laeng i maydeton ja mengkal ni basol, ta epakawanana mala i basol tayo.

<sup>19</sup> Jet niman ma, si-kayon a-akik shi pamati, sigoradon mebedin na angken sipen too nen Apo Shiyos, diritson manshedjaw son si-kato; singa marinel kito ma ja onsekep nodta Kapatkan na dogad nen Apo Shiyos, tep naybokbok i shala nen Cristo ni inkatey tod koros. <sup>20</sup> Jet nonta etey i bakdang to, singa epo-jasan ma sota Kapatkan na dogad nen Apo Shiyos, ta na-kal ma sota kortina ja naysa-din nodtan. Isonga angken si-katejo ma niman, waray pesing tayon onsekep, ta wára ngod biyag si Cristo shi dangit, <sup>21</sup> jet si-kato niman i Kangeto-an na pari ja emengitashel so ni too nen Apo Shiyos. <sup>22</sup> Isonga niman ma, manshinel kito komen on-esop so nen Apo Shiyos, ta singa edinisan i nemnem tayo et mapteng ma, jet singa na-odsan kito pay ni inpanbonjag tayo. Isonga niman ma, no on-esop kito son Apo Shiyos ja manshedjaw son si-kato, enshi koma i showashowa tayo, ja makedsang tan podno i pamati tayo son si-kato. <sup>23</sup> Jet nemnemen tayo ma ni olay sota namnama tayon in-akan ni pamatin inonod tayo son Cristo, eg kito koma medismaya, ta si Apo Shiyos, mebedin na panshingan ey sota inkari to, eg to bediwan, no diket tongpalen to. <sup>24</sup> Jet say sakey pay, nemnemen tayo ngo sota ira kait tayod pamati, no

ngantoy pesing tayon ontolong so ni sakey tan sakey son si-katejo say mapteng ngoy dag-en ni sakey tan sakey, tan say onba-deg i semek tayo. <sup>25</sup> Aliwén jo diwayan na man-a-aspol ja manshedjaw son Apo Shiyos, jet pantitino kayo say enshiy medismaya son si-kayo, agdalo ta say timpon idaw ali mowan nen Jesucristo ket eman-a-sop ma. Inkowan ko iyay son si-kayo, ta wára konoy eshom son si-kayo ja engibi-jag ja mekisanop.

<sup>26</sup> Nemnem jo ey dilikaro i kasesaad nonta toon endedamsis ton memati so nen Cristo. No itoltoloy ton manbesol ni olay, anta nga amta to sota podnon toro, sotan i ka-asan to ey endedamsis toy indaton so nen Cristo ni bakdang to, ey sotan bengat i mebedin na mengomas ni basol ni too. Jet enshi may eshom ma mengomas ni basol nontan na too. <sup>27</sup> Jet say wára ja medeka son si-kato, sota katetakot ja penosa nen Apo Shiyos shima apoy ya emanshedang nga shili ni olay, ta no sakey alin akew, sotan na apoy i meneshal so nonta ira makakontra so nen Apo Shiyos. <sup>28</sup> Say kay-ingesan niyay, angken nonta bayag da, sota toon manbesol ja eg memati nonta bilin nen Apo Shiyos ja in-awat to so nen Moises, mebono ja eg mekaasi-an no waray showa ono tedon onpaneknek so ey nanbasol sotan na too. <sup>29</sup> No sajay i shaka dag-a so nonta ira totoon maledamsis nontan da, mas pay ya epaladoy shosa ali nonta makadedamsis nonta Anak nen Apo Shiyos. Ta son si-kato, singa enshiy silbi nonta shala nen Criston naybokbok ja inkowan nen Apo Shiyos ey sotan bengat i mengkal ni basol ni too. Na-alas sotan na aramid ta ebadeg met i kaasi ni Ispirito Santo nen Apo Shiyos son si-

kato! <sup>30</sup> Amta tayo ey epalado aliy penosa nen Apo Shiyos, ta kowan to met ey, “Si-kak i maka-amten mengibedes ja onshosa so nonta ngaaw i aramid sha.” Jet wára pay i inkowan to ey, “Angken ngon sota ira took, si-kak i mengesas son si-kara, no mapteng i dingkara, ono ngaaw.” <sup>31</sup> Isonga katetakot ja pasiya i banag ali ni engibiyang son Apo Shiyos no onsango ali son si-kato, tep aliwén inges to sota kowan sha ey shiyos ja enshiy biyag to ja eg to kabadan na mengipekat ni keshosa-an ni too.

<sup>32</sup> Karejo dibdibkan sota edaga son si-kayo nonta pilmiro, nonta inamta-an jo sota koston toro pangkep son Jesus. Nontan, inenosan jon nanda-kam ni eshakel la digat jet eg kayo nabak. <sup>33</sup> No sin-arom, shakejoka bebaingi shi sango-an ni eshakel la too, tan shakejoka pedigata pay, nem sota ira eshom son si-kayo, eg jo bebtawan sota ira emepedigat ja kait jo, no diket kowan jo ey angken sakey kayo ngo son si-kara. <sup>34</sup> Ta kinaasi-an jo met sota ira naybalod ja kait jo. Jet idi pinidiw sha sota kokowayo, intolok jo, ja eg kayo nandaringit, ta amtayo ey wára aliy kokowayon mapmapteng, ja eg ma-omas, ja wára ni olay ingkatod ingka, ja emansessesked son si-kayo. <sup>35</sup> Isonga niman, karekayo medismaya, ta no manshinel kayo ni olay son Apo Shiyos, wára aliy ebadeg ga isobadit to son si-kayo shi dangit. <sup>36</sup> Mesepol ja manenos kayo, ta no meksheng nga dag-en jo sota piyan nen Apo Shiyos, ewaten jo ngo sota inkari to. <sup>37</sup> Nemnem jo kari sota naysolat nonta bayag da ja kowan to ey, “Eg mebedjag i idaw ali nonta mengisedakan; eg metaktak. <sup>38</sup> Jet sota ira took, no on-onong

ngo eshan ira ja memati son si-kak, si-kara i mebiyag. Nem sota enshiy anos to, ja ontengdaw wa shagos, ekak kosto-an sotan na dag-en sha.”

Kowan nen Apo Shiyos.

<sup>39</sup> Nem si-katejo, aliwén inges tayo ira sota toon timengdaw ja say panpa-no-an sha, mepokaw ira. No si-katejo, inges tayo ira sota ememati; jet eg kito di meshosa.

## 11

*Onoran tayo koma sota ira nankepangdon makedsang i pamatira*

<sup>1</sup> Say penigorado-an tayo ey metongpal ali sota namnama tayon eg nin na-sas ket sota pamati tayo so nen Apo Shiyos, tan sotan met laeng i kepati-an to ey wára sota eg ma-sas ja pinalsowa nen Apo Shiyos, pati si-kato shorog. <sup>2</sup> Say kinosto-an so nen Apo Shiyos so nonta too to nonta bayag da, sota inpamatira son si-kato.

<sup>3</sup> Inges to ngo son si-katejo: sota pamati tayo i amta-an tayo so ey saja dobong ket epalsowa nonta inkowan nen Apo Shiyos ey mewesha. Sotan ey ewaren to-to-wa. Agpayson saja ira pinalsowa to ket enshiy eshom ma to edapoman, no diket si-katon mismo; enshi nontan i kompormin banag ja pengal-an to ni palsowa-en to.

<sup>4</sup> Si Abel, tep emati son Apo Shiyos, inbilang nen Apo Shiyos ey sota indaton to, mapmapteng ey say sota indaton nen Kain. Jet sotan na inpamati nen Abel, si-katoy kinosto-an so nen Apo Shiyos son si-kato, ta si Apo Shiyos met laeng, inpa-sas to ey inewat to sota indaton nen Abel. Sajay ya si Abel, angken na etey nonta bayag da, singa emantosho niman son si-katejo, ta ebadeg i pamati to son Apo Shiyos nontan.

<sup>5</sup> Jet si Inok, tep emati son Apo Shiyos, eg etey nonta inda-an so nen Apo Shiyos son si-kato, isonga ebiglen na-enshid ja dobong. Jet say kowan nonta naysolat nonta bayag da pangkep son si-kato, angken nonta aneng nin i i-ala so nen Apo Shiyos son si-kato shi dangit, inbilang nen Apo Shiyos ngo eshan ey si-kato ket mapteng nga too. <sup>6</sup> Angken ngantoy dag-en ni too, aliwen sotan i mengi-kan ni pan-imdengan nen Apo Shiyos, no sotan na too ket eg memati son si-kato. Ta sota mapiyan ja on-esop so nen Apo Shiyos, mesepol la pati-en to ey si Apo Shiyos, wára ngo eshan, tan mesepol pay ya pati-en to ey no shewaten toy kaasi nen Apo Shiyos, mekaasi-an.

<sup>7</sup> Jet si Noe ngo, tep emati son Apo Shiyos, pinati to sota banshaan nen Apo Shiyos, angken eg to pay laeng nin inon-an nontan i dayos ja kowan nen Apo Shiyos ey mepesamak. Jet say inpasing to, nandaga nonta barko ja nandoganan to tan sota ira pamilja to; isonga eg ira edayos. Jet sotan na dingka to, si-katoy kinosto-an so nen Apo Shiyos son si-kato, ta toka kosto-i sota wáray pamati to; nem sajay ya dingka nen Noe, si-kato ngoy ka-amta-an to ey sota ira eshom ma totoo nonta timpo to ket nankolang ira tep eg ira emati ja inges nen Noe.

<sup>8</sup> Jet si Abraham ngo, tep emati son Apo Shiyos, pinati to sota inkowan nen Apo Shiyos ey on-daw nodta dogad ja inkari ton i-akan to. Jet dimaw nga agpayso ja indekjas to sota sigod ja dogad to, ey eg to pay nin amta no toway ikowan nen Apo Shiyos ey dogad ja dawán to. <sup>9</sup> Jet emati met laeng nonta nan-aka-akad nodtan na dogad ja inkari nen Apo Shiyos, ey eg to iningsa-an sotan na dogad. Jet tolshen kampo i nan-inan sha ni olay, jet angken si

Isaac nen Jacob ja anak to tan apo to, inges to met laeng i inpasing sha, anta nga si-kara ngoy inkari nen Apo Shiyos ey menewid nontan na dogad. <sup>10</sup> Inenosan nen Abraham ja kampo bengat i nan-in-inan to, ta say toka nemnem-nema, sota naypilmin siyodad ja aliwen dingka ni too, no diket sota misonon dingka nen Apo Shiyos. <sup>11</sup> Angken si Sara ja asewa to, tinodongan nen Apo Shiyos tep emati son si-kato, jet edokonan ey eba-kol malen pasiya, ta ebadeg i namnama to ey sota engikeshi niyay son si-kato, agpayson tong-palen to. <sup>12</sup> Kaskasshaaw iyay, ta si Abraham, singa ensdiy silbi to, ta edakay ya pasiya; nem si-kato et ngo mowan i makapoli nonta shimakel ja eg mebidang, ja inges toy karakel ni talaw, ono sota karakel ni bisil shima kilig ni baybay.

<sup>13</sup> Jet emin ira jay den totoo nonta bayag da, eg sha inewat sota inkari nen Apo Shiyos son si-kara. Nem eg ngoreshan nakal i pamatira, isonga singa inkadmang sha tan tinek-oyan sha bengat. Amtara ey shiya dobong, ireka eman-eka-ekad bengat ja ensdiy koston dogad sha. <sup>14</sup> Isonga ema-amta-i ey shaka nemnem-nema sota koston dogad ja pan-inan sha ali. <sup>15</sup> No say shaka nemnem-nema ket sota sigod ja dogad ja edapo-an sha, mebedin na istay may-odi koma ira; nem ensyi. <sup>16</sup> Ta say wáred nem-nem sha nontan, piyan sha sota mapmapteng nga dogad, ja wáred dangit. Isonga si Apo Shiyos, eg to ira ibaing ja kowan to ey angken ewagan sha ey si-katoy Shiyos sha, jet say ka-asan to, indag-an to ira ni siyodad.

<sup>17</sup> Saja si Abraham, tep emati son Apo Shiyos, idi inkowan nen Apo Shiyos ey idaton to si Isaac

ja mismon anak to say peshasen toy pamati nen Abraham, dimaw nga agpayso ja to idaton, ey mismon si Isaac i tongpal nonta kari nen Apo Shiyos met laeng son si-kato. <sup>18</sup> Pinati nen Abraham sota inkowan nen Apo Shiyos ey idaton to si Isaac ja saksakey ya anak to, ey si-kato met sota inngadnan nen Apo Shiyos nonta kowan to ey, "Sota ipoli ali nen Isaac ja anak mo, si-karay mengibengon son si-kam." <sup>19</sup> Say wared nemnem nen Abraham nontan, angken bilang ey metey sotan na anak to ja idaton to, kabaalan met laeng nen Apo Shiyos ja panbiyag mowan. Jet say agpayso, singa etey si Isaac nonta inkowan nen Apo Shiyos ey idaton nen Abraham, tan singa biniyag mowan nen Apo Shiyos si Isaac nonta inkowan to ey angken eg maydeton gayam, ja in-oli to son Abraham.

<sup>20</sup> Jet si Isaac, tep emati son Apo Shiyos, inkowan to so nonta anak ton si Jacob nen Isaw ey bindisiyonan nen Apo Shiyos ira shi ma-onod alin timpo.

<sup>21</sup> Jet si Jacob, tep emati ngo son Apo Shiyos, angken nonta shanshani men metey, inkowan to so nonta showen apo to ja potot nen Jose ja anak to ey bindisiyonan ira nen Apo Shiyos. Jet nontan, nanshayaw son Apo Shiyos ja nankokmos nodta inegni-an ton sowan to.

<sup>22</sup> Jet si Jose ngo, tep emati son Apo Shiyos, nonta shanshani men metey, inkowan to ey wara diy onsabin timpo ja sota ira apo nen Israel ja ameto, idekjas sha met laeng i Egypt, jet inbilin to pay i pesing sha, ja no idekjas sha konoy Egypt, peki-dara ngo sota pokel to.

<sup>23</sup> Sota maka-anak so nen Moises, tep emati ira son Apo Shiyos, marinel iren engi-mot so nen Moises ni tedon bolan nonta inkaw-

anak to, angken inbilin ni ari ey emin sota nay-anak ka daki ja annak ira ni Hodiyo ket mebono. Nem eg ira timakot tep memapteng nga nga-nga si Moises.

<sup>24</sup> Jet si Moises ngo, tep emati son Apo Shiyos, nonta bima-deg ma, eg to koston ma-ewagan ey anak nonta enagibi son si-kato ja biin anak nen Ari Paro shi Egypt, <sup>25</sup> no diket say pinidi to et ngo mowan, angken mekilakam ni digat so nonta ira kait ton Hodiyo ja too nen Apo Shiyos, tep amta to ey no pidi-en to nin sota nam-ay ya biyag, sotan may kayeshawi-an to son Apo Shiyos. <sup>26</sup> Jet nanda-kam ni digat ja naykait so nonta ira kait ton too nen Apo Shiyos, ja inges toy tayoka pandakam ni digat niman pangkep son Cristo. Nem inbilang to ey epatpateg sota toka pandigdigat ey say sota emin na kameng shi Egypt, ta say wared nemnem to ni olay, sota maypangkep ni konkona to ja i-akan ali nen Apo Shiyos shi ma-onod ja timpo. <sup>27</sup> Jet emati pay laeng son Apo Shiyos; isonga indekjas toy Egypt. Eg to tinekotan sota bonget ni ari, no diket emasig ja engilekjas ni Egypt, ta toka sigorado-a ey wara si Apo Shiyos ja emay-od-odop ni olay son si-kato, ja singa inon-an ton mismo. <sup>28</sup> Jet pinati to sota inkowan nen Apo Shiyos ey memalti ira sota too nen Apo Shiyos ni kalniro jet malka-an sha ni shala nontan na kalniro sota sakepan ni baley sha, say no ondabas ali sota anghil ja memono nonta pangodowan na anak ni i-Egypt, baybay-an to ira.

<sup>29</sup> Sota too nen Apo Shiyos ngo, tep emati ira son Apo Shiyos, binediw sha sota baybay ja kowan sha ey Embalengen Baybay. Nanakad ira ja singa kamagan-an i nanakshan sha, nem idi pineshas ira nonta i-Egypt ja mengosil son si-

kara, nalned ira. <sup>30</sup> Jet wára pay laeng i pamatira nonta inmotok shed dogad ja intorongan so nen Apo Shiyos son si-kara. Isonga idi dinikmot sha ni piton akew sota atol ja nay-alad shi Jiriko, kolpin eto-dang sota atol. <sup>31</sup> Nem sota sakey ya i-Jiriko ja si Rahab, eg sha inpakibono so nonta ira kaidiyan ton eg emati, tep si-kato, emati mango. Angken maleki si Rahab, binay-an sha si-kato tep tinodongan to sota ira en eniim nontan na dogad nonta sakey den akew.

<sup>32</sup> Istay eshakil pay i mebedin na ikowan ko pangkep so nen Gideon, si Barak, si Samson, si Jipti, si David, si Samuel, tan sota ira para padto nen Apo Shiyos nonta bayag da; nem ootik i timpok ja mengikowan. <sup>33</sup> Emin ira jay, emati ira son Apo Shiyos, isonga sajay i dingdingka ni eshom son si-kara: ekigobat ira shi apil la ili jet engabak ira; intod-an sha sota ira toon intorayan sha ja mandeka ni koskosto, jet inewat sha sota inkari nen Apo Shiyos son si-kara; angken sota bongot ni lion ja kowan to ey menge-dat son si-kara, binaalan shen inpanngiyem sha; <sup>34</sup> sota ira istay maypool shima emanshedang nga apoy, tan sota ira istay mebono ni kumpulan, indasat shay patey; sota ekapoy, inpakedsang ira nen Apo Shiyos; matekal iren mekikobat, jet inebak sha ira sota solsharo ni eshom ma dogad ja istay memidiw ni dogad sha. <sup>35</sup> Jet sota ira bibii, tep emati ira, nanopawil la ebiyag ira sota etey ya partidos sha, jet nay-oli ira met laeng son si-kara.

Sota ira eshom, eg sha koston mebodos; insikal shay shangkas, ja kowan sha ey angken metey ira ta amtara ey mebiyag met laeng ira di, jet mapmapteng pay sotan na biyag ja maysa-dat ali.

<sup>36</sup> Sota ira eshom, inenosan shay dedamsis ni kait shen too, tan sota inkasepsepdat sha, tan angken sota inkabedod sha ni kolkolong shi badoran. <sup>37</sup> Say inpasing shen emono nonta eshom, kinespigan shay eshom ni bato, dinekari shay eshom; jet say eshom, kumpulan i inpamonora son si-kara, tan wára pay i eshom ma inpasing shen emono. Jet eshakil pay so nonta ira emati i kakaasi. Pinedigat met laeng ni kait shen too, jet sota eshom, shinangkasan sha, jet say sinodngan shen inbaro, sota bedat ni kalniro ono kanshing. <sup>38</sup> Sajay iren emati, ireka eman-eka-ekad ja enshiy koston baley sha, jet sota ira eshom, say nan-ak-akshan sha, shima dogad ja arawi shi kadan ni too tan shima shonshontog, jet sota ira eshom, say nan-emotan sha, shima kompormin diyang. Sajay iren emati nonta bayag da, anam shen man-iyen shi mapmapteng nga dobong; eg maykeshi iya maramen dobong son si-kara.

<sup>39</sup> Jet emin ira jay ya emati, kinosto-an ira nen Apo Shiyos ta emati ira son si-kato; nem eg sha nin inewat sota inkari nen Apo Shiyos so ni too to. <sup>40</sup> Ta si Apo Shiyos, sigod ja wáray ninemnem ton mapmapteng ja pesing to son si-katejo, jet sajay ya plano to, kowan to ey si-katejo niman i kaytongpalan nonta kari to nonta bayag da; isonga si-katejo i singa nayda-kaman nonta totoo nonta bayag da.

## 12

*Onoran tayo ngo koma si Jesus ni inpanganos to ni digat*

<sup>1</sup> Sajay iren eshakil la too nen Apo Shiyos nonta bayag da, inpasas sha nontan da i pamatira son si-kato, jet singa wára pay laeng ira niman ja si-karay onoran tayo. Singa may-eshig kito shi toon



mekilongba maypangkep ni pamati tayo son Apo Shiyos, isonga no waray kompormin banag ja kaondingding son si-katejo, ono waray basol ja singa emengipked son si-katejo, mesepol la maybi-jag, say nam-ay i panbebtik tayo. Mesepol la man-enos kiton menongpal nonta inkowan nen Apo Shiyos ey dag-en tayo. <sup>2</sup> Jet topogen tayo ja si Jesus i nemnemen tayo, ta si-katoy nanshogi-an ni pamati tayo, jet si-kato met laeng i onoren tayo ingkatod meksheng. Jet anam ton si-katoy onoran tayo, ta inenosan toy digat nonta naysansa shi koros, ta amta to ey waray mapmapteng ja naysagana shi dangit ja para son si-kato; isonga angken na dinamsis sha tan binebaingan sha, inenosan to. Jet niman, wara ma shi petek ni kanawan nonta tinongawan nen Apo Shiyos, jet si-kato ngo ma i Kangeto-an na toray. <sup>3</sup> Nemnem jo kari i edagdaga son si-kato. Inokes nonta ira totoon makedsel si Jesus, nem inenosan to; isonga karekayo medismaya, pakedsang jo et i nemnem jo.

<sup>4</sup> Nem si-kayo, enshi pay laeng nin i binono ni maka-oges son si-kayo pangkep ni ka-asneng jo so ni basol, agdalo sota pengibi-jag jo ni pamatiyo. <sup>5</sup> Jet no medismaya kayo, singa dinibkan jo sota mapteng ja inkowan nen Apo Shiyos, ey si-kayo i annak to, ja kowan to ey,

“Si-kam ma anak ko, kareka on-apos no bidinen taka, ono kareka medismaya no ipa-amtak son si-kam sota nankolangan mo. <sup>6</sup> Ta sota ensemek ko, si-karay naka bidina, jet emin sota ibilang ko ey annak ko ma, naka ira sepsepdata.”

Kowan nen Apo Shiyos.

<sup>7</sup> Isonga anosiyo ja manda-kam ni digat, ta sotan na digat, si-katoy kepemidin nen Apo Shiyos

son si-kayon annak to. Amtayo met ey sota ira a-anak ja waray amesha, kebidina ira nen amesha. <sup>8</sup> Nem no si-kayo ket enshiy joka da-kamin bilin nen Apo Shiyos, aliwen koston annak shakejo, no diket in-eshab kayo. Ta toka bidinen emin i annak to. <sup>9</sup> Say kayeshigan niyay, si-katejo, waray ametayo shiya dobong, jet shakitoka bidina, jet tayoka ira kepati-a. Nem mas pay koma ja pati-en tayo si Apo Shiyos ja Ametayod dangit, say i-aknan shakito ni biyag ja ingkatod ingka. <sup>10</sup> Sota toon ametayo ja engipotot son si-katejo, shakitoka bidina ni sankatikan no kowan sha ey pansigshan tayo, nem shaka iba-ngat nem sin-arom i shaka pemidin. Nem si Apo Shiyos, sota panmaptengan tayo ni olay i toka pemidin son si-katejo, say waray kay-ingesan ni ogadi tayo son si-kato. <sup>11</sup> No bidinen shakito, singa ensakit nontan na maramen shakitoka panbidina, enshiy imdeng tayo; nem no meksheng nga mebidin kito, ontalna kito, jet onmapteng pay i ogadi tayo.

*Karejo dibdibkan ey ngaaw i panbenagan ni dedamsis son Apo Shiyos*

<sup>12-13</sup> Isonga emin kayo, mesepol la mantitinolong kayon mandeka ni banag ga kedsangan ni pamatiyo. Ipekat joy kabaalan jon mengilteg ni nankolangan jo, say angken sota ira ekapoy i pamati to, balang nem eg to et ibolos sota pamati to. May-eshig kayo shi toon emekilongba ja mesepol la ikalikatan ton pekedsang i takday to tan sedi to, say kamon sota ekapoy ya sedi to, eg mema-men onkapoy, no diket onkedsang et pay.

<sup>14</sup> Dagejoy kabaalan jon mekikadwa so ni angken sipen too say enshiy bakal, tan paras jon

manbiyag ja inges toy itsora nen Apo Shiyos, ta no enshi iyay ya ogadi son si-katejo, eg tayo asen na mismo si Apo Shiyos. <sup>15</sup> Asas jo ta baka wáray eshom son si-kayo ja mengibiyang nonta kaasi nen Apo Shiyos. Bilin joy inges niyay ya too tep aliwén abos to bengat ja onngaaw, no diket edinan to sota karakdan no mebaybay-an sotan na too. <sup>16</sup> Asas jo ta enshi komay ememii ono emekileki son si-kayo, ono sota toka damsisa i maypangkep son Apo Shiyos. Nemnem jo kari si Isaw nonta bayag da: istay si-katoy nebeng nga mengitoshay koma ni a-aki to tep si-katoy pangodowan; nem dinamsis to sotan, jet insa-dat to et ngo mowan i kinapangodowan to so nonta orishiyon to ni mekan ja pinsak bengat i kekanan to. Inbiyang ton shagos sota istay ebanol koma son si-kato. Pantanshaan kayo say eg jo ingesen si Isaw. <sup>17</sup> Jet nemnem jo pay sota epasamak son Isaw: idi anongosto ma, piyan ton odi-en ja ewaten to koma sota bindisiyon nen ameto (ja i-akan to so ni pangodowan), nem eg mebedin ta naksheng den insa-dat to. Angken emanbebawi, ja emansesaya pay, eg mebedin na odi-en to.

<sup>18</sup> Oonito pay i kepesing nen Apo Shiyos son si-kayo nem say sota ira too nen Apo Shiyos nonta bayag da, ta si-kara, intoled sha sota inpasing ton katetakot: inonan shen mismo shi shontog ni Sinai sota emanshedang nga apoy, tan sota emolingetan to, tan sota makedsang nga shagem. <sup>19</sup> Jet mismon intenengan sha pay shiman i makedsang nga janget ni singa trompita, tan intenengan sha pay sota mismon esel nen Apo Shiyos ja singa kirol. Jet idi intenengan sha iyay, epaladoy takot sha, jet kowan sha ey no

mebedin, i-enog to ma sotan na inkowan to, <sup>20</sup> ta kowan sha ey angsan sotan na inbilin nen Apo Shiyos, ja kowan to ey, “Angken sota ira animal, no ikatin sha iyay ya shontog, mekespigan ira ni bato et mebono.” <sup>21</sup> Jet sotan ket katetakot ta pasiya, jet angken si Moises, kowan to ey, “Naka emanbebayedbed ni takot ko!”

<sup>22</sup> Nem si-kayo niman, mapmapteng i kasesaad jo. Ta may-eshig ey wára kayod ma shontog ni Siyon ja siyodad ni Jerusalem, jet nam-ay i i-esop jo son Apo Shiyos, ja wáray biyag to ingkatod ingka, tep sotan i mismon siyodad to. Singa wára kayo nodta siyodad to shi dangit ja kawad-an ngo ira nonta dinibon anghil ja emandaladsak. <sup>23</sup> Jet singa naykait kayo ma so nonta ira too nen Apo Shiyos ja emayshedjaw shi dangit ja singa pangodowan na annak to. Jet say mismon insopan jo ma niman, si Apo Shiyos ja Kangeto-an, ja mengigsheng ali ni panbenagan ni emin; jet si Apo Shiyos, singa in-eshom tokejo nodta ispirito ira nonta too nonta bayag da ja kinosto-an nen Apo Shiyos, ja engawat ma niman shi dangit nonta kay-ingesan sha son Apo Shiyos ja kinamkaman sha nontan da. <sup>24</sup> Jet wára kayo pay so nen Jesus, jet si-katoy mismon emengita-shel son si-kayo shi dangit, tep binado-an nen Apo Shiyos ma sota sigod ja toka pesing nga mengisedakan. Jet mapmapteng ma i kasesaad jo niman, tep tokitoka kaasi-i, pangkep nonta shala nen Cristo ja imayos nonta inkatey tod koros, tep edinisan kito ma ni basol. Aliwén inges to sota inpasing to nonta ebono si Abel nonta bayag da, tep bales nontan i inpasing to.

<sup>25</sup> Asas jo ta baka ibiyang jo si

Apo Shiyos, ja kowan jo ey eg jo isikal i bilin to, ja inges toy inpassing ni too nonta bayag shi shontog ni Sinai. Jet no sotan ira ket shinosan nen Apo Shiyos ni inbiyang sha so nonta bilin ja inkowan tod dobong, sigoradon eg tayo ngo disi-an i shosa to no ibiyang tayo sota esel ton edapo alid dangit. <sup>26</sup> Nontan da, inetnag nonta esel ton inkowan to alid shontog ni Sinai i bo-day. Nem say inkari ton pesing to mowan ali, kowan to ey, “No pinsak pay ali, aliwen saja bo-day bengat i etnagen ko, no diket angken pay sama naykayang.” Kowan nen Apo Shiyos. <sup>27-28</sup> Saja inkowan ton “pinsak pay ali”, say olog to, pinsaken ton etnagen i angken nganton palsowa, jet no pinsaken to, ma-enshi mala. Nem waray mebay-an ja eg mebedin na ma-etnag, jet si-kato sota pantoshayan nen Apo Shiyos ja kaydakaman tayo. Isonga man-iyaman kito ni olay son Apo Shiyos, tep si-kato met laeng i engilakam son si-katejo, jet manshedjaw kito pay son si-kato. Nem mesepol la say panshedjaw tayo ket ibaingan tayo ni koskosto si Apo Shiyos, aliwen tayo iba-bangnat. <sup>29</sup> Ta si Apo Shiyos ja tayoka panshedjawa, aliwen pampamaayan; singa apoy ja emenshal ni angken nganto.

### 13

*Iyay i eshom ma dag-en jo say kosto-an shakejo nen Apo Shiyos*

<sup>1</sup> Say mesepol la wara ni olay son si-katejon san-a-aki shi pamati, sota semek ni sakey tan sakey. <sup>2</sup> Karejo diwayan na menintil ni kait jon emati ja eg jo am-amta ja nankedapod kompormin dogad, no onmotok shi baley jo. Inges to nontan da, wara ira sota enintil ni mimotok shi baley sha, jet ebindisiyonan

ira ta anghil gayam sota ira mimotok. <sup>3</sup> Nemnem jo ira sota kait jon wared badoran; isekit jo ira, ja singa naybalod kayo ngo. Nemnem jo ira sota emepedigat; isekit jo ira, ta angken si-kayo, wara kayo pay laeng shi biyag, jet mebedin na wara ngo diy akew wa mepedigat kayo ngo ja inges sha.

<sup>4</sup> Sota maypangkep ni pengesawa, mesepol la ipateg jo. Isonga sota san-asewa, mesepol la manpinateg ja enshi komay eshom ma sha peki-esholan. Ta sota mekileki ono memii, agdalo no waray asewa to, shosa-en nen Apo Shiyos.

<sup>5</sup> Aliwen sota pilak koma i mengebak ja jo nemnemnemen; sota wara son si-kayo, si-katoy enosan jo. Amta nen Apo Shiyos i kasapolan tayo; isonga kowan to ey, “Eg takejo baybay-an, ono i-oway.” Kowan to; <sup>6</sup> isonga niman, marinel kito ma ja mengikowan ey, “Si Apo Shiyos, si-katoy ontolong son si-kak; isonga enshiy nak tekotan, angken ngantoy dag-en ni eshom ma too son si-kak.”

<sup>7</sup> Nemnem jo kari ira sota pangolo jo la, ja engikowan ni esel nen Apo Shiyos son si-kayo. Nemnem jo sota inpassing sha nonta wara ired biyag, tan nemnem jo ngo sota inkatey sha, jet onoshiyo i itsora ni pamatira nontan da.

<sup>8</sup> Si Jesucristo, enshiy to nanbalbaliwan nontan da ingkato niman et sigoradon enshi diy to panbedbediwan ingkatod ingka.

<sup>9</sup> Isonga karejo itolok ja on-onod shi apil la toro, ono sota badbadon toro, say eg kayo may-eshawi nodta koskoston inamta-an jo. Mapmapteng no say mengikan ni kedsang ni pamati tayo ket mandepo ngo eshan nodta kaasi nen Apo Shiyos, aliwen sota kowan ni Hodiyo ey mengidin i eshom ma mekan. Ta enshi met i en intolong

nontan son si-kara. <sup>10-12</sup> Karekayo manshanag nonta kowan sha ey enshiy biyang jo nodta daton sha. Angken sota pari sha kari nontan da, ja emengi-kan ni daton shima panshedjawan, eg mebedin na mengan nonta indaton sha met laeng. Ta sota kangeto-an na pari, sota shala ni animal i toka i-ilaw shima Kapatkan na dogaden Apo Shiyos ja to idaton ja mengkal ni basol, nem sota bakdang ni animal, mepoolan shima naydasin shi kampo ni si-karen too nonta bayag. Si Jesus, si-katoy misonon daton tayo ngo, jet say eteyan to ngo, shima naydesin shi pasbol nonta siyodad, say omasen toy basol ira nonta totoo ni inkaybokbok nonta misonon shaletu. <sup>13</sup> Isonga niman ma, ibiyang tayo sota maypangkep ni kina-Hodiyos ja singa maydekjas sota kampo, jet si Jesus, si-kato may toshongen tayo, ja wared ma showal ni kampo, jet enosan tayan mekilakam son si-kato nonta kabebaing nga inpasing sha son si-kato. <sup>14</sup> Ta no shiya dobong, enshiy koston pilmin siyodad ja pan-inan tayo; nem waray tayoka segegsha ja pan-inan tayo alin siyodad. <sup>15</sup> Jet niman ma, ta etey da nontan si Jesus ja singa naydaton, eg mesepol sota animal la daton son Apo Shiyos. Say koston daton tayo, sota tayoka pengikowan ni iyaman tayo ni olay son si-kato. <sup>16</sup> Tan say sakey pay ya daton ja piyan nen Apo Shiyos, sota pandeka ni mapteng so ni sakey tan sakey, tan sota penodong ni eshom. Karejo diwayan ja dag-en iyay, karejo ikotan i wára son si-kayo ja mebedin na itolong jo shi eshom.

<sup>17</sup> Patiyo ira sota pangolo jo shi pamati, jet onod jo sota ikowan sha. Si-karay may-eshig ey emanbantay son si-kayo ni panmaptengan jo shi pamati, ta

si-kara diy onsongbat son Apo Shiyos no apil i toshongen jo. Isonga aliwa komen kayo mandeka ni pandeshingitan sha, say mapteng ngoy deknara ni shaka pansilbi. No pati-en jo sota pangolo jo shi pamati, panmaptengan jo met laeng.

<sup>18</sup> Nem si-kami, kamika menigorado ey mapteng i wared nem-nem mi, ja enshiy mi nanbasolan son Apo Shiyos, tep sota koskosto ni olay i piyan min dagen. Isonga irewati jokami son Apo Shiyos. <sup>19</sup> Jet kekshawen ko pay son si-kayo ey ishawatan jowak ka pasiya son Apo Shiyos, balang nem pa-odi towak koma den shagos son si-kayo.

<sup>20-21</sup> Jet niman, say shawat ko ngo son Apo Shiyos, si-katon mismo komay mengi-kan son si-kayo ni emin na kasapolan jo, say dag-en jo ni olay sota piyan to; tan say shawat ko pay, panbedin tokejo koma ni toon masi-met ja mandeka ni olay nonta mengi-kan met laeng ni pan-imdangan to, pangkep son Jesucristo. Sajay i shawat ko son Apo Shiyos tep si-kato met laeng i misonon kedepo-i ni talna. Si Apo Shiyos, inpanongal to si Jesus nonta etey shi koros. Nonta etey si Jesus shi koros, naybokbok i shaletu ja engipilmi nonta badon bilin ja insa-dat nen Apo Shiyos nodta sigod jet wára ni olay iyay ya bilin ingkatod ingka. Jet niman ma, si Apo Jesus i Kangeto-an na emengiredan ni too to, jet si-katoy mayshedjaw ni olay ingkatod ingka. Siya, satan da.

<sup>22</sup> Jet kekshawen ko son si-kayon a-akik shi pamati ey anosiyon mengitneng koma niya bilin ko la son si-kayo, ta aliwa met ta enshokey iya solat ko. <sup>23</sup> Piyan kon amta-an jo ey ebolos mala shi badoran si Timoteo ja agi tayod pamati. Jet no ondaw

alin shagos, odopen ko la ja en manbisita son si-kayo.

<sup>24</sup> Sota semek mi so nonta ira pangolo ni emati shitan, tan sota ira emin na kait jon too nen Apo Shiyos, ikowan joy semek mi son si-kara den emin. Jet angken sota a-aki tayod pamati ja i-Italia, inkowan sha ngo ey pekikowan miy semek sha son si-kayon emin.

<sup>25</sup> Sota kaasi nen Apo Shiyos ja wara son si-kayo, si-kato komay ma-shoman na mewesha son si-kayon emin. Siya, satan da!

## SOTA SOLAT NEN SANTIAGO

<sup>1</sup> Si-kak si Santiago ja makasolat niyay, ja mismon inbetkag nen Apo Shiyos tan si Apo Jesucristo ja mansilbi son si-kara, jet sajay ya solat ko, para son si-kayon emin na too nen Apo Shiyos ja naywaris shiya intiron dobong. Sapay koma ta mapteng kayon emin.

*Eg kayo koma medismaya no waray onsabin digat son si-kayo*

<sup>2</sup> Si-kayon a-akik shi pamati, no waray onsabi son si-kayon digat — angken nganton digat — karejo nemnemnemen ey ngaaw sotan na simabi son si-kayo, no diket nemnem jo ey sotan na digat ta simabi ket panmaptengan jo. <sup>3</sup> Ta amtayo ey sotan na pandikat jo ket si-katoy pemeshas nen Apo Shiyos ni pamatiyo et say maydowam kayo men mengenos ni digat. <sup>4</sup> Jet say anos jo, mesepol la naynay koma, karejo tengdawan i digat, say onkedsang kayo shi pamatiyo, ja enshiy jo pankodangan.

<sup>5</sup> No sipa son si-kayoy eg to amtay pespesing to, mesepol la si Apo Shiyos i panshewatan to, jet si-katoy ontolong son si-kato ja mannemnem ni kosto. Ta si Apo Shiyos, toka i-akni sota mengshaw son si-kato; eg to bebaingan. <sup>6</sup> Nem mesepol la enshiy showashowa ni panshewat jo; ipasnek jo ey kenshat ta itenen-gan shakejo nen Apo Shiyos. Ta say toon waray showashowa to, eg to panseksekey i wared nemnem to. May-eshig shi shadoyon ni baybay, ja no toway pedawan so ni shagem, si-kato ngoy toshongen to. <sup>7</sup> Sotan na too, eg koma mannannama ey waray ewaten ton i-akan nen Apo Shiyos son si-

kato, <sup>8</sup> ta nanshoway nemnem to, ja emanbinaliw ni olay.

<sup>9</sup> Sota toon emati ja enshiy mebedin to, man-imdeng komen pasiya tep si-kato ket epateg shi sango-an nen Apo Shiyos. <sup>10</sup> Kasta met sota toon waray mebedin to, man-imdeng koma ngo, no itolok toy kaybeba ni bakdang to, ja eg to ma ipateg sotan na kokowa to. Ta kina-agpayso to, waray akew alin ma-enshi sotan na kinabak-nang, ja inges to sota sabsabong ni edet. <sup>11</sup> Ta no meskitan ni mebedjag sota edet, medayday ma et ma-kas sota sabsabong to. Jet ma-enshi malay kamapteng to. Sajay i kay-eshigan ni baknang, ta angken maramen toka pan-a-shomiy kokowa to, ma-enshiy biyag to.

<sup>12</sup> Mebindisiyonan sota toon eg to tengdawan i digat tan eg to itolok i kesairo to. Sotan i ka-asan to ey podnoy pamati to, isonga say kon-oren to, sota biyag ja enshiy to engintegan, tep si-katoy inkari nen Apo Shiyos ja i-akan to so nonta ira toon waray semek to son si-kato. <sup>13</sup> Sota toon na-awis sa mandeka ni ngaaw, eg to koma ikowan ey si Apo Shiyos i engawis son si-kato, ta si Apo Shiyos, eg ma-ewis sa mandeka ni ngaaw wa aramid, ono mengewis ni toon mandeka ni ngaaw. <sup>14</sup> Nem say ka-ewisi ni toon mandeka ni ngaaw, eman-shoki nodta ngaaw wa nemnem to met laeng. <sup>15</sup> Jet sotan na ngaaw wa nemnem, basol i pantongpalan to et no meshokshok sota basol, patey ingkatod ingka i pantongpalan to ngo.

<sup>16</sup> Si-kayon a-akik shi pamati, eg jo itopo i nemnem jo ey si Apo Shiyos ket ngaaw i aramid to son si-katejo. <sup>17</sup> Ta emin na kompormin mapteng nga banag ja kaonsabi son si-katejo, si Apo Shiyos i toka kedepo-i.

Si-katoy Ametayo ja emalsowa so ni emin na kaonniyal alid naykayang. Mapteng ni olay i aramid nen Apo Shiyos; eg manbinaliw i itsora to. <sup>18</sup> Isonga nemnem to ngon inpanbalin shakiton annak to, jet say inosal to, sota esel to shorog ja podno ja naytoro son si-katejo. Jet siya, singa si-katejo may kapatkan so ni emin na palsowa to.

*Onoshiyo i esel to; aliwen jo itenengan bengat*

<sup>19</sup> Si-kayon a-akik shi pamati, iyay komay nemnemnemen jo. Mesepol la esagana kayon mantetneng ni bilin nen Apo Shiyos. Eg jo koma iba-ngat i notnot; nemnem jo nin i ikowan jo asan joka bekasa. Karekayo onbonget ta shagos, <sup>20</sup> ta say bonget, si-katoy kaondingding ni piyan nen Apo Shiyos ja dag-en tayo. <sup>21</sup> Isonga ibi-jag jon emin sota sigod ja pipiyan jon dag-en ja ensekig ja eg jo pay laeng binediwan. Sota esel nen Apo Shiyos ja dimamot shi poso jo komay nemnemnemen jo ni olay, tep sotan i mebedin na onbaal so ni kaysedakanan jo. Ekombaba kayo komen on-awat so ni esel to.

<sup>22</sup> Jet mesepol la pati-en jo sotan na esel: dagejoy kowan to, ta aliwen on-anay i panttetteng bengat. No kowan jo ey on-anay i panttetteng jo bengat, naytopo itan na nemnem jo. <sup>23</sup> Ta sota toon emantetteng bengat ja eg to tongpalen, singa sota toon toka singsingpeta i binbin ni bakdang tod ispiko: <sup>24</sup> no maramen toka binbinbina i bakdang to nodta ispiko, amta toy itsora to, nem no taynan to sota ispiko, dibkan ton shagos i ka-it-itsora ton too. <sup>25</sup> Nem sota toon toka singsingpeta i tongpal nonta bilin nen Apo Shiyos ja emengi-kan ni panmaptengan to, si Apo Shiyos i

onbindisiyon so nontan na too shi emin na dag-en to, tep si-kato ket aliwen emantetteng bengat, no diket toka pati-a tan toka dag-a pay i kowan nontan na bilin.

<sup>26</sup> Sota toon kowan to ey waray pamati to son Apo Shiyos, nem eg to kari annaran i toka pan-asel, enshiy silbi nonta inpamati to. Naytopo sotan na toka pan-nemnem. <sup>27</sup> Say ka-aporbali nen Apo Shiyos ja Ametayo ey koston waray pamati to, ja aliwen o-owap, sota emenodong ni nankengoso tan nankeballo shi shaka pandikat, tan eg to itolok shorog i bakdang to ja ma-edinan ni ogadi ni tood ja dobong ja enshiy pamati to so nen Apo Shiyos.

## 2

*Man-i-inges komay penintil jo so ni totoo*

<sup>1</sup> Si-kayon a-akik shi pamati, say piyan nen Apo Shiyos ja dag-en jon emati son Jesucristo, ja Apon Kangeto-an, man-i-inges komay pesing jon menintil ni totoo. <sup>2</sup> No kaspangarigan ey waray toon nan-ispot ja onsekep alin mekisanop son si-kayo, ja nansingsing pay ni balitok, ey naytompong ngon simekep ali sota toon nga-ngaaw i baro to, <sup>3</sup> ngaaw no eg man-inges i pesing jo son sikaren showa. No sota mapteng i baro to bengat i sintilen jo ja petongaw jod mapteng nga tonggawan ket no sota ebiteg mango i ikowanan jo so ey angken on-alekey, ono ikowan jo ey ondisbet shi shet-al, <sup>4</sup> sajay i ka-asan to ey waray pinaboran jo. Singa si-kayon shorog i emengigsheng ja mengilesin nem sipay mapteng ono ngaaw so ni kompormin too, jet ngaaw sotan. <sup>5</sup> Si-kayon a-akik shi pamati, itnengi jo iya ikowan

ko son si-kayo. Si Apo Shiyos, pinispis toy nankebiteg ja endedamsis shed ja dohong, ja si-kara et ngo mowan i kawa-wa-sha-an ni pamati son si-kato, jet inkesheng to ey mayda-kam ira di shi pan-toshayan to ja inkari to so nonta ira toon waray semek sha son si-kato. <sup>6</sup> Nem si-kayo, endedamsis jo iray nankebiteg. Apay nga sota baknang i joka pabori? Eg jo aya amta ey shakejoka penginam-ayi? Si-kara met i emengireshom son si-kayo shi oskaro. <sup>7</sup> Tan si-kara ket shaka notnotnota pay i ngaran nen Cristo. Si Cristoy kowinta ey makatoo son si-kayo, ja istay ya panshedjawan koma ni emin na too!

<sup>8</sup> Say mapteng nga dag-en jo, sota pengonod ni bilin nen Apo Shiyos ja Kangeto-an na toray. Say kowan ni esel to ja naysolat, kowan to ey, "Semek moy kait mon too ja inges toy moka penmek ni bakdang mo." <sup>9</sup> Nem no say joka bigbiga bengat ket sota toon waray mebedin to, eg jo pinati sota bilin nen Apo Shiyos, jet sotan i nanbasolan jo. <sup>10</sup> Jet karejo ikowan ey engka-jas iyay ya basol, ta emin na basol, enshiy maykowan ey engka-jas. No kaspangarigan ey waray sakey ya too ja sakey bengat i eg to pinati nodta emin na bilin nen Apo Shiyos, maybidang ey eg to inonod ja emin sotan na bilin; bimasol met laeng. <sup>11</sup> Ta say kowan ni bilin nen Apo Shiyos, "Kareka memii ono mekileki", asan kowan to pay ey, "Kareka memono." Isonga angken tinongpal mo ja eg ka emii ono ekileki, nem bimono ka ni kait mo, iso met laeng nga nanbasol ka.

<sup>12</sup> Mesepol la waray ipa-sas jon kaasiyo shi emin na joka pana-sel tan shi joka dagdag-a, ta say pesing ngo nen Apo Shiyos no mengigsheng ali ni panbenagan jo, ipakat to sota dinteg ton

mengi-kan ni panmaptengan jo. <sup>13</sup> Mesepol la waray kaasiyo, tep sota toon enshiy kaasi to so ni kait to, eg ngo kaasi-an nen Apo Shiyos. Nem sota toon amta ton mengaasi ni kait to, eg mesepol la panshanagan toy penosa ali nen Apo Shiyos.

*Mesepol la mantotop i pamati son Apo Shiyos tan mapteng nga aramid*

<sup>14</sup> Si-kayon a-akik shi pamati, no say too ket kowan to ey waray pamati to son Apo Shiyos, nem enshi kariy kaasi to so ni kait to, enshiy silbi nonta kowan to ey pamati to. Eg mebedin na sotan na pamati to ket si-katoy kaysedakan to. <sup>15</sup> No kaspangarigan ey waray agi jod pamati ja enshiy baro to, ono enshiy kenen to nontan na akew, <sup>16</sup> na-alas no ikowan jo bengat ey, "Eti daw ka, jet si Apo Shiyos i onbindisiyon son si-kam. Angka et nem eg ka mektel tan angka et nem mengan ka ma ni kosto." Sajay ya inkowan jo son si-kato, enshiy silbi to, no enshiy jo in-akan na kasapolan to. <sup>17</sup> Kasta met i pamati ni too, enshiy silbi to no eg metaksholan ni mapteng nga dagdag-en to.

<sup>18</sup> Baka et ey wara son si-kayoy kowan to ey angken eg man-inges i totooy, ta mebedin na sota sakey, wa-wa-shay pamati to, ey sota sakey, wa-wa-shay mapteng nga toka dagdag-a. Jet siya, nan-inges ira ja kekosto-i kono nen Apo Shiyos. Nem say kowan ko, toway amta-anan ko so ey waray pamatim no enshiy takshol ton mapteng nga aramid? Eg mebedin. Nem mebedin mangon ma-amta-an i pamati ni too shi mapteng nga aramid to. <sup>19</sup> Kowan mo emo ey kosto ita pamatim ey sakey bengat i agpayson Shiyos. Jet siya, mapteng itan. Nem



kolang, tep angken sota ira di-monyo, satan met laeng i pamatira, nem entakot ira, ja ireka manbebayedbed. <sup>20</sup> Si-kayo, eg jo pay laeng ewatan! Ampet waray pengesanan jo ey enshiy silbi ni pamatin enshiy takshol ton mapteng nga aramid, asan kayoka mamati! <sup>21</sup> Si Abraham ngay, ja apo tayo da. Si-katoy ka-asan to. Kinostonan nen Apo Shiyos si Abraham tep mapteng i dingka to. Kowan nen Apo Shiyos ey idaton to si Isaac ja potot to shima altar, jet pinati to. <sup>22</sup> Sota pamati to tan sota mapteng nga aramid to, nantotop, jet sota engi-onoran to ni inkowan nen Apo Shiyos ey dag-en to, si-katoy ka-asan to ey enshiy kolang ni pamati to. <sup>23</sup> Isonga say kowan nonta naysolat nonta bayag da, kowan to ey, “Si Abraham, emati son Apo Shiyos jet sotan i kinostonan nen Apo Shiyos son si-kato ja naybilangnan to ey singa enshiy basol to.” Jet etongpal iyay nonta pinati to sota kowan nen Apo Shiyos ey dag-en to. Isonga kowan sha nonta bayag da ey si-katoy kajem nen Apo Shiyos. <sup>24</sup> Sajay komay amta-anan jo so ey kekosto-i nen Apo Shiyos i too no waray mapteng nga aramid to ja naytakshol shi pamati to, ta say pamati bengat, eg on-anay. <sup>25</sup> Kasta met si Rahab, ja biin maleki, kinostonan nen Apo Shiyos tep waray mapteng nga inpasing to, ja sinintil to sota toon Josue ja emansiim nodta ili to, ta tinodongan to iren nan-emet asan toka ira panshalan shi dibas sa shalan. <sup>26</sup> Sota bakdang nga enshiy jasjas to, etey, ja enshiy silbi to. Kasta met i pamatin enshiy takshol ton mapteng nga aramid, enshi ngoy silbi to.

### 3

*Annari jo ni olay i esel la*

*ikowan jo*

<sup>1</sup> Si-kayon a-akik shi pamati, eg jo koma kamkaman ja manbedin ni sakey ngon mengitosho, ta amtayo met ey si-kamin emengitosho, wa-wa-sha i namnama nen Apo Shiyos son si-kami ey say sota ira eg mengitosho. <sup>2</sup> Ta emin son si-katejo, waray tayoka panbesoli. No bilang ey waray toon toka annarin emin i toka ikowan, satan na too, eg mankodang. Mebedin noman na toka tetngelay bakdang to; eg manbesol. <sup>3</sup> Singa inges toy tayoka pesing ni kabajo, ja tayoka pekedati ni ootik ka danshok say mebedin na metngel i intiron bakdang to. <sup>4</sup> Iso met laeng sota kowan sha ey barko shi baybay; nemnem jo kari. Angken ebadeg ga pasiya sota barko, ja kaitolshon ni makedsang nga shagem, mebedin na tetngelen nonta ootik ka singa ipay shi obet to, jet mebedin na itorong nonta emegegni shi piyan ton itorongan. <sup>5</sup> Sajay day nay-arigan ni shila: ootik nga agpayso, nem ebadeg i banag ni toka ikowan. May-eshig pay shi apoy. Angken na ootik i shalang ni apoy no pilmiro, mebedin na poolan toy embanaw wa shontog. <sup>6</sup> Isonga say shila, asdeg ton ememilshi ja singa apoy. Si-katoy emengilenod ni bakdang to shorog. Say esel la medepod shila, inges toy apoy, ja singa apoy alid impiyarno. <sup>7</sup> Emin na kompormin kalasi ni animal, mebedin na mamo. Angken pay sota ira titit, oleg, tan sota ira wared baybay ket waray inemo ni too. <sup>8</sup> Nem say shila, eg kabaalan ni toon emoen, tep enapno-an ni ngaaw, asan edigat ja metod-an. Emeneshal ja singa shita ni oleg ja ememono. <sup>9</sup> No sina-shom, ema-osal i shila ja pansedamat son Apo Shiyos ja Ametayo, et no sina-shom, ema-osal ngo ja pengebis ni kait ta too, angken pinalsowa nen Apo

Shiyos i too ja wáray toka kay-ingesi son si-kato. <sup>10</sup> Sajay ya esel — pansedamat tan pengebíg — saksakey i toka bo-dayi, ja shi bongot. A-akik shi pamati, na-alas itan na pesing! <sup>11</sup> Arig toy temtem. Enshiy nak inon-an na temtem ja emansina-dat aliy mapteng tan empait ta shanom ja onbo-day nodta saksakey ya toka panbo-dayi. <sup>12</sup> A-akik shi pamati, arig to mowan ima kadasan ja kowan sha ey higos: eg ondames ni dames ni olibas. Tan sota kowan sha ey obas, eg ondames ni dames ni higos. Eg mebedin mowan ja onbo-day i mapteng nga shanom shima temtem ja panbo-dayi ni asin.

*Ema-amta-i i kinadaing ni too shi toka pengibeba ni bakdang to*

<sup>13</sup> No wára son si-kayo i kowan to ey edaing nga mengitoshó, mesepol la mapteng i ogadi to, mesepol la ekombaba, tep sotan i ka-amta-an to ey podnon edaing. <sup>14</sup> Nem no si-kayo ket wáray ngaaw wa pangkep shi nemnem jo, ja apal, ono joka ipilit i kostoyo, eg kayo koma ondastog ja ikowan jo ey edaing kayo, ta o-owap itan na daing jo, aliwén podno. <sup>15</sup> Sajay ya daing, aliwén si Apo Shiyos ja wáred dangit i edapo-an to, no diket daing bengat ni tood ja dobong; aliwén Ispirito Santo nen Apo Shiyos i engitoshong, no diket si Satanas. <sup>16</sup> Ta no man-i-inapal i too, tan sanseskey son si-kara ket ipilit shay kostora, enshiy olnos sha. Jet ngaaw ni olay i medeka. <sup>17</sup> Nem no si Apo Shiyos i edapo-an ni daing ni too, poro mapteng i ogadira. Si-kara, eg sha ibalnay i kait shen mekibekal, jet amtaren mengibeba ni bakdang sha. Eg sha ipilit i kostora, amtaren mengaasi, jet wáray mapteng nga panbenagan ni aramid sha. Enshiy showashowa sha maypangkep ni

pamatira son Apo Shiyos, jet shi poso sha, wáray nemnem shen ontolong. <sup>18</sup> No mapteng i pesing ni too so ni kait to, tan toka isingpet i kait ton emanbekal, say panbenagan to, a-shoman nen Apo Shiyos i mapteng nga ogadi to.

## 4

*Si-kayo ket eg kayo mankasakey ta joka nemnemnemay pandadsakan jo bengat*

<sup>1</sup> Say kabol ni joka panbabakali tan pankokontra-i, edapo met laeng shi ngaaw wa nemnem jo. Isonga ka-iri-irin i pipiyan jon dagdag-en ja ngaaw. <sup>2</sup> No eg kayo maka-ala, si-katoy kabol la joka nemnemnemi so ja onbono. Tan no wára pay i asen jon kokowa ni eshom, joka pan-epali. Isonga kayoka mansosongbat tan manbabakal tep eg kayo maka-ala ni piyan jo. Ayshi son si-kayo i piyan jo tep inbiyang jon manshewát son Apo Shiyos. <sup>3</sup> Jet angken manshewát kayo son Apo Shiyos, eg to i-akan i piyan jo tep say pangkep jo, ngaaw: piyan jon osalen sotan na joka panshewata shi pandadsakan jo bengat, ja aliwén mansilbi son Apo Shiyos. <sup>4</sup> Apay nga aliwa eshan na si Apo Shiyos bengat i naymongsanan ni semek jo? Eg jo aya amta ey sota toon pipiyan ton onoran i aramid ni toon eg memati son Apo Shiyos ket emaykontra son si-kato? No say piyan ni toon dagdag-en ket saja kompormin aramid ni toon eg memati, kenshat ta naykontra ngo son Apo Shiyos. <sup>5</sup> No sajay i wáred nemnem jo, singa kowan jo ey enshiy silbi nonta naysolat nonta bayag da, ja kowan to ey, “Say Ispirito Santo ja inpaniyan nen Apo Shiyos son si-katejo, piyan ton si Apo Shiyos bengat i sesmeken tayo.” <sup>6</sup> Jet siya, ebadeg

i namnama ton sesmeken tayo, nem makedsang ngo eshan i kaasi to son si-katejo say pati-en tayo. Isonga waray naysolat ja kowan to ey, “Eg kosto nen Apo Shiyos sota toon edastog, nem sota ira ekombaba, si-kara et ngo mowan i toka i-akni ni kaasi.”<sup>7</sup> Isonga mesepol la si Apo Shiyos komay pankombaba-an jo, ja eg kayo onpa-so. Karejo itolok ja sairon-en shakejo nen Satanas, say eshawi-an tokejo.<sup>8</sup> Si Apo Shiyos komay nemnemnemen jo, jet si-kato ngoy wara son si-kayo ni olay. Nem mesepol la ibi-jag jon mandeka ni ngaaw, say onmapteng i nemnem jo, tep sigod ja waray basol jo, tan nanshoway nemnem jo maypangkep son Apo Shiyos.<sup>9</sup> Karejo pan-imdengan i ngaaw wa aramid; ibebawi jo, iyokmos jo, inengis joy nankolan-gan jo.<sup>10</sup> Mesepol la si Apo Shiyos i pankombaba-an jo say si-kato met laeng i mengi-kan ni kedsang ni pamatiyo.

<sup>11</sup> Si-kayon a-akik shi pamati, karekayo mansisinomang. Ta no sajay i pesing jo, ja endedamsis joy kait jo, si-kayo pay i sakey ya makadedamsis ni bilin nen Apo Shiyos, ja kowan to ey, “Semek moy kait mon too.” Jet no endedamsis moy bilin nen Apo Shiyos, ja eg mo pati-en, pina-so-an moy bilin to.<sup>12</sup> Ta sakey bengat i engi-kan ni bilin, ja si Apo Shiyos; si-kato met laeng i waray kalintegan ton mengigsheng ni kaysedakan ni too ono kepilshi to. Isonga enshiy biyang mo ja en mengiledamsis ni kait mo.

*Karejo ibiyang si Apo Shiyos shi emin na kowan jo ey dag-en jo*

<sup>13</sup> Niman, iyay i ikowan ko son si-kayon mengibiyang son Apo Shiyos maypangkep ni planoyo. Aliwen inges niyay komay itsora ni planoyo, ja kowan jo ey, “Eti,

niman ono kabasan, ondaw kitod man na dogad jet angken makatawen tayod man. Man-biyaki kitod man say waray kenansiya-en tayo.”<sup>14</sup> Nem sajay ya planoyo, aliwen sigorado. Ta no kabasan, eg jo amtay mepesamak ali. Apay eg jo aya amta ey say biyag jo ket singa inges toy dowag? Mebedin na wara niman, nem no ekay, ma-enshi mala.<sup>15</sup> Inges niyay koma et mango i itsora ni planoyo, ja kowan jo ey, “No ipalobos nen Apo Shiyos, ja wara kitejo pay laeng shiya biyag, dag-en tayo iyay.”<sup>16</sup> Nem apil met eshan i ogadiyo. Angsan i joka pesing. Joka ibiyang si Apo Shiyos. Sajay ya itsora, dastog, jet say pandastog, ngaaw.

<sup>17</sup> Siya, intod-an takejo ni kosto maypangkep niyay, jet no amtayoy koston dag-en jo, nem eg jo met onoren, onbasol kayo.

## 5

*Kaasi kayo din bebaknang no on-onong kayon ma-isew*

<sup>1</sup> Niman, iyay i ikowan ko son si-kayon waray mebedin to. Sigoradon wara aliy digat ja dakaman jo; isonga niman, nangis kayo, ngagngag kayo ni daringit jo.<sup>2</sup> Ta sota eshakil la inolnong jon kokowayo, enshi malay pansilbi-an to. Tan angken sota ira baro jon insholin jo, nankebotbotan.<sup>3</sup> Sota balitok jo tan pilak jo, nandati et sota dati to, si-katoy ka-amta-an to shorog ey in-emot jo bengat, ja eg jo intolong so ni makasapol. Jet no onsabi ali sota pandikat jo, sotan na inpangikot jo ni kokowayo i kabol la kepokawan jo, ja singa mepoolan kayo ni apoy. Shanshani ali sota ka-onoran na akew et nganto emo aliy pesingan jo so ira nita kokowayo?<sup>4</sup> Na-olnong itan na pilak jo ta saol la emin

i inpasing jo so nonta ira inpan-obdayo shi bo-day jo; kasta met ira sota inpan-ani jo. Nakol ni shaka pan-i-ibajos so nen Apo Shiyos et intenengan to, jet si-katoy mengibediw son si-kara.<sup>5</sup> Siya, say biyag jo niman, nam-ay, ja kayoka mandaddadsak. Nem no ka-onoran alin akew, ikaro jo. Singa inges jo sota kalniron timaba ni pangan ni edet, nem eg to amta ey mepalti gayam ali.<sup>6</sup> Si-kayo, inpabasolan jo iray toon enshiy basol sha; inpabonoyo pay i eshom. Jet sajay, in-onod sha tep enshiy baal sha son si-kayo.

*Pan-anos kayo et niman na timpo; panshawwat kayo son Apo Shiyos*

<sup>7</sup> Si-kayon a-akik shi pamati, pan-anos kayo nin, ingkatod idaw mowan ali nen Apo Jesus. Jet say nemnememen jo koma ja iarigan jo so ni anos jo, sota toon nanmola: toka enosin mansesked ni i-oran to, ja onsibog ni moleto, tan toka enosin mansesked mowan ni i-apit to so. Eg on-ekdas ni seked to tep amta to ey mapteng i panpa-no-an to ali.<sup>8</sup> Pan-anos kayo ngo, karekayo medismaya, tep sota akew wa idaw mowan ali nen Apo Jesus, shanshani ma.

<sup>9</sup> Isonga si-kayon a-akik shi pamati, karejo noy-an i eshom ni joka pandikat, say enshiy jo ikaro son Apo Shiyos. Pannemnem kayo, ta kompormin oras i imotok ali ni kowis; singa wared sakepan ja shanshanin onsekep.<sup>10</sup> Si-kayon a-akik shi pamati, nemnem jo kari iyay. Sota ira para padto nonta bayag da ja engikowan ni esel nen Apo Shiyos, intoled shen inenosan i emin na digat ta mimotok son si-kara. Isonga si-kara koma ngoy onoran jo ja mengitoded tan mengenos ni digat.<sup>11</sup> Wara sota kowan tayo ey, "Sota toon eg to tinengdawan i digat

ket mayshedjaw." Kaspangarigan sota too nonta bayag da ja si Job; eg na-opay ni pamati to, et amtayo ey mapteng i nanbanagan to, ja si-katoy ka-asan to ey si Apo Shiyos ket eg medokod i semek tan kaasi to.

<sup>12</sup> Si-kayon a-akik shi pamati, mesepol la pati-en jo iyay ta kasapolan na pasiya. Karejo iba-ngat i sangba son Apo Shiyos, ono shiya dobong, ono kompormin ngaran. On-anay sota esel la owen ono enshi ja isongbat jo. No owen, owen; no enshi, enshi. Sajay i pesing jo say enshiy jo ikaro di son Apo Shiyos.

<sup>13</sup> No wára son si-kayoy emandikat, mesepol la si Apo Shiyos komay panshewatan to ni tolong. Inges to ngo no wára son si-kayoy edadsak, si Apo Shiyos i ikansiyonan to ni iyaman to.<sup>14</sup> No wára son si-kayo i emansekit, to pa-odop ali sota pangolo jod pamati, say ondaw ira di, ja sha ishawatan son Apo Shiyos, tan dag-en sha sota sigod ja shaka pesing ja mengipojok ni dana, jet ingadnan sha pay i ngaran nen Apo Shiyos.<sup>15</sup> Sota shawat ta etaksholan ni pamati, si-katoy kabol la kedsangan ni toon emansekit, tep pemapteng nen Apo Shiyos, tan kasta met sota basol la dingka to, mepekawanan.<sup>16</sup> Isonga mesepol la eg jo i-emot i kompormin nanbasolan jo; nem ipodnoyo et shi eshom na kait jon emati. Tan pan-irewati joy sakey tan sakey son si-kayo, say no waray digat jo, ma-kal. Ta sota shawat ni toon mapteng i wared nemnem to, asdeg ton waray banag to.<sup>17</sup> Inges to ngo sota shawat nen Elias, ja para padto nen Apo Shiyos nonta bayag da. Too si Elias ja inges tayo, nem inpasnek ton nanshawwat son Apo Shiyos ey eg koma on-oran, jet eg imoran nga agpayso ni

tedon tawen tan enem ma bolan.  
<sup>18</sup> Jet idi edabas mala iyay, asan mowan manshawwat si Elias son Apo Shiyos ey on- oran koma, jet imoran ali nga agpayso, jet nankebiyag ira may mola.

<sup>19-20</sup> Si-kayon a-akik shi pamati, no wára son si-kayoy inbi-jag toy pamati to, i-odiyo nodta sigod ja pamati to, ja itorong jo shi pansigshan to. Ta no eg may-odi sotan na pamati to, kenshat ta shosa-en nen Apo Shiyos. Jet sotan na toon mengi-odi ni sakey ya too shi pamati, si-katoy kabol la kepekawanan ni eshakel la basol to.

## SOTA PILMIRON SOLAT NEN SAN PEDRO

<sup>1</sup> Si-kak si Pedro ja makasolat niyay jet sajay ya solat ko, para son si-kayon emin na too nen Apo Shiyos ja engilekjas ni ili sha, ja naywáris shita Ponto, Galasia, Kapadosia, Asiya, tan Bitinia. <sup>2</sup> Si Apo Shiyos ja Ametayo, sigod ja pinidi shakejo ja manbedin ni too to, jet sota Ispirito Santo to, si-katoy mengitoshong son si-kayo say enshiy jo kebedawan tan say memati kayo ni olay nonta bilin nen Jesucristo. Sigod ja ninem-nem nen Apo Shiyos ey sota shala nen Cristo ja imayos shi koros nonta inkatey to, si-katoy on-omas so ni basol jo.

Say shawat ko son Apo Shiyos, sapay koma ta sota kaasi tan talna ja in-akan to son si-kayo, si-kato komay ontoltoloy ya ma-shoman.

Si-kak i sakey ya apostol nen Jesucristo, isonga itnengi jon pasiya iya ikowan ko.

*Emankeparas i pamatiyo nem mapteng aliy pantongpalan to*

<sup>3</sup> Man-iyaman kito ni olay so nen Apo Shiyos ja Ama nen Jesucristo ja Apo tayo, ta ebadeg ga pasiyay kaasi to son si-katejo. Isonga in-aknan shakito ni biyag ja bado kabol ni inpamati tayo son Cristo. Jet niman ma, ebadeg i namnama tayo ey man-ongal kito ali tep si Jesucristo, si-katoy epangdon nan-ongal nontan da. <sup>4</sup> Jet sajay ya biyag alin tayoka namnama-a ey i-akan nen Apo Shiyos, eg mesheshal, eg medopok, no diket wára ni olay ingkatod ingka, ta insagana nen Apo Shiyos shi dangit para son si-kayo. <sup>5</sup> Sota panakabalin nen Apo Shiyos i emengajowan son si-

kayo ingkatod onsabi ali sota timpon ketongpal nonta namnama tayan maysedakan. Jet say kabol la eg tokejo i-owayan, sota joka pemati so nen Cristo. Sajay ya kaysedakan tayo, insagana ngore-shan nen Apo Shiyos, nem eg tayo nin asen ingkatod ka-onoran alin timpo.

<sup>6</sup> Amtak ey niman na timpo, eshakel nin i digat ja joka da-da-kami, nem angkena satan, kayoka eman-imdeng pay laeng tep sigoradoy kaysedakan jo di nem ka-onoran. <sup>7</sup> Sajay ya digat, inpalobos nen Apo Shiyos ja medeka son si-kayo, say ma-sas no agpayso met laeng i pamatiyo son si-kato. Isonga may-eshig nodta balitok ja epalit i bayad to. Tep say balitok, shaka epoyi say ma-anta-an no poro met laeng. Sajay i kay-eshigan nonta pamatiyo, nem say balitok, aliwén ingkatod ingka. Isonga angken eshakel i digat ja joka da-da-kami, no makedsang i pamatiyo, ishayaw shakejo nen Apo Shiyos no ondaw mowan ali si Jesucristo, jet ikowan sha pay ey si-kayo i shaka pan-imdengi. <sup>8</sup> Amtak ey ingkato niman pay laeng ket eg jo inonan si Jesucristo nem wáray semek jo son si-kato, tan joka pati-a i bilin to. Enshiy kay-ingesan ni imdeng jo — eg kabaalan ni esel ni too ja mengikowan ni kabadeg to tep edapo nodta namnama tayan mayda-kam son Apo Shiyos shi dangit. <sup>9</sup> Amtayo ey say pantongpalan ni pamatiyo ket maysedakan kayo; isonga sajay i itsora ni joka pan-imdeng.

<sup>10</sup> Sota ira para padto nen Apo Shiyos nonta bayag da, sota may-pangkep ni kaysedakan ali ni too i shaka en-enapa, ono shaka tontontona. Nem eg ira makatonton: inpadora bengat ey wára aliy kaasi nen Apo Shiyos, ja i-awat to

— jet si-kayoy sima-kop so niyay ya kaasi ton naypadto. <sup>11</sup> Sota ira para padto nonta bayag da, pineshas shen pasiya ja inashal sota maypangkep ni inpa-amta ni Ispirito Santo nen Cristo son si-kara, tep eg sha inewatan sotan na inpa-amta to, ja ipadtora. Inpa-amta ni Ispirito Santo son si-kara ey wára diy ibetkag nen Apo Shiyos ja mengisedakan, nem kowan to ey manda-kam nin ni digat asan ka-oli shi dangit. Piyan ira nonta para padto ja amta-en no pigan i ketongpal niyay ja inpadtora, tan no sipa sotan na ibetkag to ali. <sup>12</sup> Nem inpa-amta nen Apo Shiyos son si-kara ey eg sha sa-kopen iyay ja inpadtora, no diket si-kayon too niman na timpo i mena-kop. Jet siya, sota mapteng nga shamag maypangkep so nen Jesucristo, inpa-amta nonta ira emansilbi so nen Apo Shiyos son si-kayo, ja intorong ni Ispirito Santon ibetkag ali nen Apo Shiyos ja edapod dangit. Kaskasshaaw iyay! Isonga angken sota ira anghil nen Apo Shiyos shi dangit, piyan shen wára komay angken ootik ja amta-en shen maypangkep niyay.

*Nemnem jo ngoy inpasing nen Apo Shiyos son si-kayo, isonga ampet sota piyan to ngoy dag-en jo*

<sup>13</sup> Isonga niman, say nemnemenen jo, sota kaasi ali nen Apo Shiyos son si-kayo ni idaw ali mowan nen Jesucristo. Mesepol la esagana kayo ni olay ja menongpal ni bilin nen Apo Shiyos, say enshiy dag-en jon jo kaydawan. <sup>14</sup> Jet niman ta annak shakejo ma nen Apo Shiyos, sota bilin to komay onoren jo ni olay. Baliwiyo ma sota sigod ja ogadiyo nonta eg jo pay laeng inamta-an i bilin to. <sup>15</sup> Nemnem jo ey si Apo Shiyos, si-katoy emili son si-kayo ja manbedin ni too to. Si-kato,

enshiy basol to; isonga mesepol la si-kato ni olay i onoran jo ni emin na joka dagdag-a. <sup>16</sup> Sajay ya ogadi i piyan nen Apo Shiyos ja dag-en ni totoo, isonga wáray insolat shen esel to nonta bayag da, ja kowan to ey, “Enshi son si-kak i basol, isonga mesepol ngon eg kayo manbesol.”

<sup>17</sup> No manshewát kayo so nen Apo Shiyos, joka ewagin Amejo; isonga niman na kawashayo pay laeng shiya dobong, mesepol la si Apo Shiyos i ishayaw jo ni olay. Nemnem jo ey si Apo Shiyos met laeng i mengigsheng ni panbenagan ni emin na too ingkatod ingka, jet i-anam to nodta dingka ni sakey tan sakey nonta wára ired biyag; enshiy to paboran. <sup>18</sup> Nontan da, istay enshiy silsilbi ni biyag jo tep say ogadiyon tinewid jo so nonta apapo jo la, poro ngaaw. Nem si Apo Shiyos, indasin tokejo nodtan na kalasin biyag. Aliwén pilak ono balitok ja emepokaw i inbayad to say kokowa-en tokejo ma, <sup>19</sup> no diket say inpasing to, may-eshig ey sota shala nen Cristo nonta inkatey tod koros i inbayad to. Isonga si Cristoy kay-eshigan nonta kalniron naydaton son Apo Shiyos ja enshin polos i to kebedawan. <sup>20</sup> Nonta eg pay laeng epalsowa iya dobong, wára ngo eshan shi nemnem nen Apo Shiyos ey si Cristo i mengisedakan ali son si-katejo. Eg nin nayto-to-wá nontan da iyay, nem niman den ka-onoran na timpo i nayto-to-wá-an ni indaw ali nen Cristo, say maysedakan kayo. <sup>21</sup> Niman ma, kabol ni inpatatiyo son Cristo, marinel kayo so nen Apo Shiyos. Inpan-ongal nen Apo Shiyos si Cristo, tan in-aknan to pay ni ebadeg ga shayaw tod dangit, isonga niman, si-kato bengat i joka panshindi tan pannamnama-

i.  
<sup>22</sup> Jet niman, ta kayoka memati nonta podnon toro ja maypangkep son si-kato, poro kayo ma ja edinisan jet enshiy jo kebedawan son Apo Shiyos. Isonga enam-ay kayon menmek ni kait jon emati ni aliwén sinsinan na semek. Isonga say bilin ko son si-kayo, ipekat jon emin i kabaalan jon menmek ni sakey tan sakey son si-kayo. <sup>23</sup> Niman, waray badon biyag jo, jet sajay ya badon biyag jo, edapo so nen Apo Shiyos. Aliwén na inges to sota biyag ga wára son si-kayo nonta inkay-anak jo. Sajay ya biyag ja wára son si-kayo niman, biyag ja enshiy to engintegan, ja in-akan nen Apo Shiyos son si-kayo nonta emati kayo nonta esel to ja intenengan jo nontan da. Manakabalin iyay ya esel tep si Apo Shiyos ja edapo-an to, wára ni olay shi biyag ingkatod ingka. <sup>24</sup> Isonga wára sota naysolat nonta bayag da ja esel nen Apo Shiyos ja kowan to ey,

“Say itsora ni biyag ni emin na too, entikey; isonga may-eshig ey singa edet. Jet say shayaw ni too, inges toy itsora nonta sabsabong nonta edet. Sota edet, maganon mekkit jet sota sabong to ngo, ma-kas. <sup>25</sup> Nem sota esel nen Apo Shiyos ja inkowan to, eg mebediwan; si-kato ni olay ingkatod ingka.”  
 Sajay i kowan nonta esel nen Apo Shiyos nonta bayag da. Jet sajay ya esel nen Apo Shiyos ja inkowan to, si-kato sota mapteng nga shamag maypangkep so nen Cristo ja naytoro da son si-kayo.

## 2

<sup>1</sup> Niman, ta badoy biyag jo, ibi-jag jo men emin sota ngaaw wa aramid jo: sota pengi-owap ono penikap ni eshom, tan angenkay poy sota apal, tan sota penomang.

<sup>2</sup> Say pipiyan jo koma ket sota ketod-an jo ni koston pannem-nem, ja inges to sota nga-ngen ikaybo-day to ja say pipiyan to ket sota menoso. No metod-an kayon kosto, onba-deg i pamatiyo ingkatod ka-enayan ni kaysedakan jo. <sup>3</sup> Mebedin na mannemnem kayo ma ni kosto, ta dineknayo i kabadeg ni semek nen Apo Jesucristo son si-katejo.

<sup>4</sup> Si Apo Jesus i onoren jo ni olay, ta si-katoy emengikan ni biyag son si-katejo. Si-kato, may-eshig ey baton binedaw ira nonta emengemag ni baley ta kowan sha ey enshiy silbi to, nem eg sha amta ey si Apo Shiyos i emili nontan na binedaw shen bato tep son si-kato, epateg mango iyay ya bato. <sup>5</sup> Jet si-kayon emati ja in-aknan to ni badon biyag, may-eshig kayo ngod baton osalen nen Apo Shiyos nodta baley ya toka panpedeka. Jet no meksheng nga medeka sotan na baley nen Apo Shiyos, wared nemnem to ey si-kayo met laeng i mansilbi son si-kato nodtan na baley, ja inges to sota pari ni Hodiyo ja para daton shi Timplo niman. Nem say sakey ya naydasinan ni pansilbiyo son Apo Shiyos nodta maramen kepansilbi ira nonta pari ni Hodiyo shi Timplo, sajay: si Jesucristo i ontolong son si-kayo say sota pansilbiyo ket kosto-an nen Apo Shiyos. <sup>6</sup> Nonta bayag da, waray naysolat ja esel nen Apo Shiyos ja kowan to ey, “Waray pinidik ka toon insaad kod Jerusalem ja may-eshig ey baton ena-det. Si-katoy panshingan jet emin na toon manshinel son si-kato, eg ali medismaya.”

<sup>7</sup> Sotan na may-eshig ey baton ena-det, ja si Cristo, epateg son si-kayon emati, nem sota ira eg emati, enshiy pateg nen Cristo son si-kara. Jet sota shaka pemedaw son si-kato, sotan i kaytoshongan nonta esel nen Apo Shiyos nonta



bayag da ja kowan to ey, “Sota baton binedaw ira nonta para amag ni baley, ja kowan sha ey enshiy silbi to, si-kato et ngo mowan sota epateg ga mesepol shen pasiya.”<sup>8</sup> Jet wara pay i naypadto nonta bayag da ja esel nen Apo Shiyos met laeng ja kowan to ey, “Sajay sota baton inba-ngat ira nonta tooy katin jet naysokbab ira et etodang ira.” Sotan i kowan nonta padton mepesamak son si-kara ta oltimon eg ira memati nonta esel nen Apo Shiyos. Nem sigod ja amta nen Apo Shiyos ey sotan i medeka son si-kara.

<sup>9</sup> Nem si-kayo, pinidi shakejo nen Apo Shiyos ja manbedin ni too to, tan si-kayo pay i pinidi ton may-eshig ey singa parin mansilbi son si-kato ja Ari tayo. Isonga si-kayoy indasin ton too to tep piyan ton si-kayoy mengipamta so ni eshom ni kaskasshaaw wa inpasing to son si-kayo, ta nontan, singa wara kayod embolinget nem dinewagan toy nem-nem jo.<sup>10</sup> Nonta epangdon timpo la, aliwen too shakejo nen Apo Shiyos jet singa enshiy makatoo son si-kayo; nem niman, too shakejo ma. Nontan da, eg jo amta ey si Apo Shiyos ket ebadeg gayam i kaasi to son si-kayo, nem niman, mismon pineshasan joy kaasi nen Apo Shiyos son si-kayo.

*Iyay i mapteng nga ogadin onoran ni emati son Cristo*

<sup>11</sup> Si-kayon ensemek ko, iyay i shewaten ko son si-kayo. Say pilmiro, sota maypangkep ni pekibibiyag jo so nonta ira paganon totoo. Nemnem jo ey aliwen shiya dobong i naypilmi-an tayon pan-i-yanan ni olay, no diket may-eshig ey singa bisita kito bengat shiya dobong. Isonga say shewaten ko son si-kayo, eg jo koma itolok i bakdang jon mandeka nonta pipiyan ni

bakdang jon dag-en ja ngaaw, ta sotan i onsharal met laeng ni pamatiyo son Cristo.<sup>12</sup> Karejo dibdibkan ja mandeka ni mapteng ni olay, say mapteng ngo i pengidmang ni toon enshiy Shiyos sha son si-kayo. Ta angken bilang ey notnotnoten shakejo ja kowan sha ey aliwen kostoy joka dagdag-a, no asen sha met laeng i mapteng nga ogadiyo, si Apo Shiyos met laeng i ishayaw sha no onsabi ali sota akew wa idaw to ali.

<sup>13</sup> Say maykadwen shewaten ko son si-kayo, sota maypangkep ni pematiyo ni bilin nonta ira emengitoshay ni ili. Mesepol la patien jon emin sota ira toray, ja insaad ni too, say si Apo Jesus ja pinatiyo i mayshedjaw. Say nangnangshon pati-en jo, sota ari shi Roma, ta si-katoy kangeto-an na toray shiya dobong,<sup>14</sup> pati ira sota gobinarol, ta si-karay shinotokan nonta ari ja mengigsheng ni shosa ira nonta nanbasol, tan si-kara met laeng i mengi-kan ni kayshed-jawan ira nonta toon maronong.

<sup>15</sup> Say piyan nen Apo Shiyos, sota mapteng nga ogadiyo i pesalsheng so ni notnot ni eshom ma too ja makakontra son si-katejon emati. Sajay iren too, enshi ngoy amamtara, nem shaka iba-ba-ngat i notnot.<sup>16</sup> Agpayson si Apo Shiyos i makabaga-en son si-kayo

jet ewaya kayo ja enshiy eshom ma mengipidit ni kostora ja piyan shen dag-en jo. Nem aliwa komen sotan na kawedjajo i ipangbal jon manbesol. Say mapmapteng, sota pandeka ni mapteng ta si-katoy anam ni baga-en nen Apo Shiyos.<sup>17</sup> Mesepol la waray rispitojo so ni emin na too, mesepol la waray semek jo so ni kait jon emati, tan mesepol la entakot kayon mandeka ni eg kosto nen Apo Shiyos. Tan mesepol pay ya pati-en jo sota bilin ni ari.

18 Niman, iyay i shawat ko son si-kayo ngon бага-en. Mesepol la pati-en jo ni olay sota kowan ni makabaga-en son si-kayo, tan rispitooyo pay ira. Aliwén sota na-anos bengat i pati-en jo, no diket angken bilang ey makedsel sotan na apo jo, patiyoy. 19 Ta say ka-aporbali nen Apo Shiyos, sota toon mengenos ni kedsel ni kait ton too son si-kato, no enosan to kabol ni toka pematí son Apo Shiyos. Nem mesepol la sajay ya digat ket aliwén pengikesho to ni basol la dingka to. 20 Ta no enosan joy shosa ja peda-kam sha son si-kayo pangkep nonta ngaaw wa aramid jo, simpri enshiy kowinta to ta bayad nonta basol jo. Say kekosto-i nen Apo Shiyos, sota toon mengenos ni digat ja on-sabi son si-kato ey enshiy dingka ton ngaaw. 21 Pinidi shakejo nen Apo Shiyos say amta-en jon mengenos ni digat. Si Cristo komay nemnemen jo ni olay. Ta si Cristo, epalikat nonta kawasha tod ja dobong, nem inenosan to say waray onoran jo. Isonga nansigshan joy epalikatan to. 22 Si Cristo, enshin polos i basol to, tan angken sipa, enshiy emengikowan ey waray intenengan ton o-owap ja inkowan to. 23 Angken pay nonta ngaaw i shaka ikokowan son si-kato, enshiy ngaaw wa to insongbat. Idi indansara shi koros, eg to inta-kot i keshosara di son Apo Shiyos. No diket kowan to ey maka-amta ngos Apo Shiyos son si-kato ta si Apo Shiyos, kostoy toka pengigsheng, jet amta to ey enshiy basol ton toka pan-ikaro. 24 Ta sota basol tayo, si-katoy toka pan-ikaro nonta inkaydansa tod koros, jet sajay i dingka to say si-katejo ngo, enshi may kaybiyan-gan tayod basol. Isonga may-eshig ey sota ira sogat to nonta inkaydansa to shi koros, si-katoy

singa engilteg son si-kayo. 25 Ta nonta eg kayo pay laeng emati, may-eshig ey singa kalniro kayon apil i tinoshong to. Nem niman ma, nay-oli kayo mowan ali so nen Cristo et si-katoy emengajowan tan emanbantay son si-kayo.

### 3

1 Si-kayo ngon bibii ja waray asewa to, iyay i shawat ko son si-kayo. Patiyoy asewayo, say no waray mengesas son si-kayo ja eg pay laeng emati nonta esel nen Apo Shiyos, balang nem memati ira ngo, angken enshiy jo ikowan son si-karen maypangkep ni p-mati. 2 Tep asen sha ey maronong kayo, tan asen sha ey joka pati-a iray asewayo. 3 Si-kayon bibii, aliwén jo ipangkep ey sota peningsingpet jo ni bowek jo i mapteng nga pengidmang ni totoo son si-kayo, ono sota pengosal jo ni ebalitokan, ono epalit ta dopot. 4 No diket say epateg ga mesepol la ma-sas son si-kayo, sota mapteng nga nemnem ja agpayso, tan sota talna. Sajay ya itsora ni ogadi, si-katoy on-onong son si-kayo ni olay, eg ma-enshi, jet sajay i epateg son Apo Shiyos. 5 Ta nonta bayag da, sota bibiin eshiyosan, say inpasing sha, say mapteng i pengidmang ni totoo son si-kara, si Apo Shiyos ni olay i shaka nemnemnema, tan pinatira ni olay sota inkowan ni asewara. 6 Nontan da, sota asewa nen Abraham, ja si Sara, pinati to ni olay si Abraham. Inewagan to pay si asewa to ey apo to. Jet si-kayo ngon bii niman, no mapteng i ogadiyo, tan etalna kayo, si-kayoy maybidang ey annak nen Sara. 7 Inges to ngo son si-kayon daleki ja waray asewa to, mesepol la ajowanan jo ira, tan singpeten jo ira, ta say bibii, aliwén inges jon makedsang. Tan say sakey pay, in-aknan ngo ira nen Apo Shiyos

ni biyag ja enshiy to engintegan ja inges to sota wára son si-kayo. Sajay komay pesing jo say sota joka panshéwat so nen Apo Shiyos ket eg medingding.

<sup>8</sup> Say piyan na a-selen nonta emin na inkowan ko la, sajay. Mesepol la man-i-inawatan kayo, tan mesepol la waray pengisekit jo ni sakey tan sakey son si-kayo. Semek joy sakey tan sakey son si-kayo, ta san-a-aki kayo shi pamati. Nemnem joy pansigshan ni eshom jet pankikinombaba kayo. <sup>9</sup> No bilang ey wáray too ja ngaaw i dingka to ono inkokowan to son si-kayo, aliwen jo ibales ja ngaaw ngoy dag-en jo ono ngaaw ngoy ikowan jo son si-kato, no diket ikowan jo koma ey si Apo Shiyos i onbindisiyon son si-kato. Ta say kabol ni pinidi-an nen Apo Shiyos son si-kayo, piyan ton mapteng komay pesing jo so ni eshom, say bindisiyonan tokejo. <sup>10</sup> Isonga wáray naysolat nonta bayag da ja esel nen Apo Shiyos ja kowan to ey,

“Sota toon piyan ton mapteng i biyag to shiya dobong, tan piyan to ja mewad-an ni im-deng, mesepol la enshiy to ikokowan na ngaaw wa esel ono to dag-en na pengi-owap. <sup>11</sup> Mesepol la isalsheng to sota aramid ton ngaaw, ja sa-datan to ni mapteng, jet say nemnemen to koma, sota mengi-kan ni pan-i-inawatan ni totoo. <sup>12</sup> Ta si Apo Shiyos, eg to i-oway sota ira maronong; toka i-akan sota shaka shewata. Nem sota toon ngaaw i aramid sha, eg kosto nen Apo Shiyos; kontra to ira.”  
Sajay i inkowan ni naysolat nonta bayag da.

*Si Cristoy nemnemen jo no on-motok i digat son si-kayo*

<sup>13</sup> No sota mapteng ni olay i edisto-an jon dag-en, man-manoy mengitoded ja menekit son si-kayo. <sup>14</sup> Nem no bilang ey manda-kam kayo ni digat pangkep nonta dingkayon piyan nen Apo Shiyos, mebindisiyonan kayo. Isonga eg kayo koma ontakot so ni kait jon too, ono kayo manshanag pangkep ni pena-kot sha. <sup>15</sup> Si Cristoy nemnemnemen jon ishayaw, jet itodok jo ta bakdang jon itorayan to. Mesepol la esagana kayo ni olay ja mengilewag nodta toon mansedodsod no apay nga si-kayon emati son Cristo, wára ni olay i ebadeg ga namnama jo. Nem dododop jon menongbat son si-kara; karekayo mandastog. <sup>16</sup> Mesepol la tanshaaniyoy ogadiyo say enshiy jo dag-en na kaydaw-anan jo. No mapteng ni olay i ogadiyo, mebebaingan sota menoyshey son si-kayo ja kowan to ey enshiy kowinta ni inpamatiyo son Cristo. <sup>17</sup> Nem no kenshat ta pedigaten shakejo ni totoo, angkena, no maypangkep ni eg sha so kosto-i ni mapteng nga ogadiyo, ta no sina-shom, sotan i piyan nen Apo Shiyos ja medeka son si-katejo. Say aliwen koston mepesamak, sota ipalikat shakejo so ni too, kabol ni basol jo. <sup>18</sup> Nemnem jo sota inkatey nen Cristo. Ta si Cristo, si-katoy engitodok ni bakdang to shorog ja metey say ikaro ton emin i basol ni totoo, tan say i-esop shakito so nen Apo Shiyos. Jet si Apo Jesus, enshin polos i basol to, nem etey ni maypangkep son si-katejon toon eshakel i basol to. Etey nin mangon pinsak i bakdang to, nem sota dinawa to, eg etey. <sup>19</sup> Jet sotan na dinawa nen Cristo, dimaw nodta naybaloshan ira nonta dinawa ira nonta nan-ketey ya too nonta bayag da, jet

to tinod-an ira. <sup>20</sup> Sotan ira sota dinawa ni totoo nonta bayag da ja nanketey ja eg emati so nen Apo Shiyos nonta timpo nen Noe. Ta si Apo Shiyos, singsingked to no memati ira nonta maramen pandag-a nen Noe sota barko to. Nem eg emati ira sotan na totoo; isonga walo bengat i simekep nodta barko ja toon naysalakan ja engilesat nonta shanom. <sup>21</sup> Sajay i arig nonta shanom ma ebonjagan jo, ta si-katoy naysalakanan jo. Say bonjag, aliwen maypangkep ni inkalinis ni bakdang jo, no diket sota inshawat jo so nen Apo Shiyos ey pekawanan to sota naksheng den dingkayo tan say todongan shakejon mandisi ni basol. Isonga waray kedsang ni bonjag ja mengisedakan, ta nan-ongal si Jesucristo. <sup>22</sup> Idi nan-ongal si Jesucristo, dimaw da shi dangit jet wara niman shi petek ni kanawan nen Apo Shiyos, ja emekitoshay son si-kato. Intorayan ton emin sota wared dangit: sota ira anghil tan sota eshom ma waray saad to ono panakabalin to.

#### 4

<sup>1</sup> Si Cristo, nanda-kam ni digat nonta kawasha tod ja dobong jet inenosan to; isonga mesepol la sota inpanganos to ngoy nemnemen jo no onmotok aliy digat jo. Sota toon manda-kam ni digat, eg mannemnem ja mandeka ni ngaaw ono ngaranton panbesolan to. <sup>2</sup> Manipod niman ingkatod ketey jo, sota piyan nen Apo Shiyos komay dag-en jo, aliwen sota pipiyan ni bakdang jo bengat i jo tongtongpalen ono patpati-en. <sup>3</sup> On-anay koma sota epalabas den timpo ja dingdingka-an jo so ni pipiyan jon dag-en, ja inges to sota pipiyan na dag-en ni toon enshiy Shiyos to. Nontan da, kabebaing i aramid jo, ta apil i istay pipiyan jon dag-en: kayoka

manbotboteng nontan, jet no ma-olnong kayo, nayda-kad i istay joka pesing, joka pay pandag-ay aliwen nebeng nga dag-en jo. Jet say nanbasolan jo pay nontan so nen Apo Shiyos, apil i joka panshedjawi; aliwen na si-kato, no diket sota sinan shiyos ja dingka ni too. <sup>4</sup> Jet niman sota ira toon eg emati, ireka messhaaw ta eg kayo mala may-a-shom son si-kara ja mandeka nonta kakedsel sha ja sigod ja joka dagdag-a. Jet sotan i kabol ni shaka pengikowani ey na-ap-apil kayo. <sup>5</sup> Nem aliwen sotan i jo nemnememen, ta emin na aramid sha, songbatan sha di so nen Apo Shiyos shi ma-onod alin timpo. Tep si Apo Shiyos, esagana ja menosa so nonta ira totoo ngaaw i aramid sha, angken sota ira nanketey da, tan sota ira wara pay laeng shi biyag niman. <sup>6</sup> Sota ira nanketey da, inpa-amta nen Apo Shiyos sota mapteng nga shamag son si-kara ja maypangkep so nen Cristo, say angken na pineshas sha len etey, ja inges to ngon peshasan ni emin na tood ja dobong, mebedin ngon manbiyag ali i dinawara ja singa si Apo Shiyos sa wara ni olay ingkatod ingka.

*Shanshaniy pantepos niya dobong, isonga id gawa-i jon mansilbi son Apo Shiyos*

<sup>7</sup> Shanshani may pantepos niya dobong, isonga mesepol la bidin-nen joy bakdang jo shorog, say kosto ni olay i pannemnem jo, say enshiy ondingding ni joka panshewat so nen Apo Shiyos. <sup>8</sup> Say epateg so ni emin, mesepol la wara ni olay son si-kayo sota agpayson semek jo so ni sakey tan sakey son si-kayo. Ta no wara iyay ya semek son si-kayo, mebedin ma ja manipipinasinsiya kayo ni nankolongan ni sakey tan sakey son si-kayo, angken nansasekdet

i nankolongan sha. <sup>9</sup> No wáray kait jon emati, ja ondaw shi baley jo, sintil jo; eg jo ira ikotot. <sup>10</sup> Si Apo Shiyos, ekalkalasi i in-akan ton kabaalan ni sakey tan sakey ja mebedin na dag-en to, jet sajay ya in-akan to, mesepol la osalen jon ontolong shi eshom. Ta no wáray nay-akan son si-kayo, si-kayo ngoy maka-amta ja mengosal shi panmaptengan ni kait jo. <sup>11</sup> No bilang ey si-kam ket pantosho i nay-awat son si-kam, itoshom sota piyan nen Apo Shiyos ja itorom so ni totoo. Kasta met no sota penodong ni kait moy nay-awat son si-kam, tolongim ira, nem eg mo koma dibdibkan ey si Apo Shiyos i edapo-an nitan na baal mon ontolong. Sajay i pesing jo ni olay, say no asen ni kait jo i joka penodong ni eshom, nemnemen sha ey si Jesucristo i kabol la nanbalbaliwán jo et ishayaw sha ma si Apo Shiyos. Jet angken sipa, enshiy maka-inges son si-kato tep si-katoy kakedsangan so ni emin na toray ingkatod ingka, enshiy eshom. Siya, satan da.

<sup>12</sup> Si-kayon ensemek ko, eg kayo koma messhaaw nonta ebadeg ga digat ja joka panda-kami niman, ta sajay, emankepasemak say masas no agpayso i pamatiyo son Apo Shiyos. Eg jo koma ikowan ey apapil iyay ya emankepasemak son si-kayo, ta mepesamak ngoreshan iyay. <sup>13</sup> Say nemnemen jo et mango, pan-imdeng kayo no dakaman joy digat, ta singa ekilikat kayo shi digat ta dina-kaman nen Cristo nontan da. Et pan-imdeng kayo, ta shi ma-onod alin timpo, ja asen jon mismo i panakabalin ni idaw to ali, mas ebadbadeg pay ali i pan-imdeng jo. <sup>14</sup> No wáray toon ngaaw i shaka ikokowan son si-kayo maypangkep ni pamatiyo so nen Cristo, pan-imdeng kayo, ta sajay i amta-an jo so ey sota Ispirito Santo nen Apo Shiyos ja

inbetkag to alid dangit, si-katoy emengitoshong son si-kayo. <sup>15</sup> Nem asas jo ta baka say kabol la joka panda-kam ni digat ket, sota karo ni aramid jon ngaaw. Ngaaw no say kabol la kepedigatan jo ket bimono kayo, ono engibot kayo, ono wáray dingkayon kolo, ono sota joka pekibibiyang shi obda ni eshom. <sup>16</sup> Nem no say kabol la joka da-da-kami so ni digat ket sota maypangkep ni pamatiyo so nen Cristo, aliwén jo ibaing, no diket pan-iyaman kayo et so nen Apo Shiyos, ta nayngadnan kayo men too nen Cristo.

<sup>17</sup> Sota tayoka panda-kam ni digat niman, si-katoy pengamtaan ey inshogi ma nen Apo Shiyos i toka penepdat, jet sota too to ja may-eshig ey pamilja to i pinangdo to. No saja too to ket sinepdad to, sigoradon ebadbadeg pay i peda-kam ton sepdad nodta toon eg emati nonta maypangkep son Cristo ja piyan ton pa-amta so ni totoo. <sup>18</sup> Isonga wáray esel nen Apo Shiyos ja naysolat nonta bayag da ja kowan to ey, “No sota toon maronong ket nganngani pay ya eg sha disi-an i shosa, ekarkaro ngarod ja eg idisi-an iren ja eg emati i shosa tep nga-ngaaw i aramid sha.”

<sup>19</sup> Isonga si-kayon too nen Apo Shiyos ja inpalobos ton mandakam ni digat, ipiyal joy bakdang jo son si-kato, jet itodoy joy joka pandeka ni piyan ton dag-en jo. Si Apo Shiyos i emalsowa son si-kayo, isonga eg shakejo i-oway.

## 5

*Iyay i nemnemen jo niman na timpon digat*

<sup>1</sup> Edigat nga agpayso i timpo niman. Isonga si-kayon pangolo ira nonta emati shi ka-ili-ili, iyay i piyan kon ikowan son si-kayo. Waray kanebengan kon

mengikowan niyay ta sakeyak ngon pangolo shi pamati, tan inon-an kon mismo i inbandigat nen Cristo nonta inkatey to. Asan sakey pay, sakeyak nodta mekila-kam nonta kaskasshaaw alin pesing nen Apo Shiyos shi toon emati son si-kato. Jet iyay sota bilin ko. <sup>2</sup> Singpet joy ajowan ira nonta emati shita kad-an jo, ta si-kara sota may-eshig ey kalniro nen Apo Shiyos ja inpiyal ton bantayan jo. Enshiy memidit son si-kayo ja mengajowan iren jay; wára son si-kayo, nem mapmapteng pay no masi-met kayo. Aliwén jo ira ajowanen bengat kapota mesowilsho-an kayo, no diket sotan i dag-en jo koma ta mapiyan kayon ontolong son si-kara. <sup>3</sup> Sota toon may-eshig ey kalniro nen Apo Shiyos ja inpiyal to son si-kayo, aliwén jo ira itorayan, no diket si-kayo et ja mismo i mepangdon mengipa-sas ni mapteng nga ogadi son si-kara say wáray onoran sha. <sup>4</sup> Jet no on-oli ali mowan si Cristo ja mandepod dangit, si-katoy mengi-kan nonta kaskasshaaw wa konkona jo, ta si-katoy apo nonta para bantay ni kalniro nen Apo Shiyos. Jet sota i-akan to, wára ni olay son si-kayo ingkatod ingka.

<sup>5</sup> Si-kayo ngon bedoleki, patiyo ni olay sota bilin ni pangolo, tan emin kayo, mesepol la mewad-an kayo ni pankombaba so ni sakey tan sakey son si-kayo, aliwén kayo ondstog. Nemnem jo sota naysolat nonta bayag da ja kowan to ey, “Eg kosto nen Apo Shiyos sota toon edastog, nem sota ira toon ekombaba, si-kara et ngo mowan i toka i-akni ni kaasi.” Kowan nonta naysolat. <sup>6</sup> Isonga pankombaba kayo son Apo Shiyos ja Manakabalin, aliwén jo pa-so-an. Jet no onsabi sotan alin timpo, si Apo Shiyos i mengi-kan ni shayaw jo. <sup>7</sup> Angken ngantoy shanag ja

wára son si-kayo, ipiyal jo so nen Apo Shiyos ja si-kato may makamta so, ta si-katoy ebadeg i toka pengisekit son si-kayo.

<sup>8</sup> Pantanshaan kayo, bilin jon shorog i bakdang jo ni olay! Ta si Satanas ja makakontra son si-kayo shi pamati, may-eshig nodta kowan sha ey lion ja eman-ekad ni toka pungenap ni she-shalen to, ono isekmol to. <sup>9</sup> Nem si Apo Shiyos i ki-detan jon patien ni olay, eg jo patpati-en i piyan nen Satanas. Say nemnemen jo, aliwén si-kayo bengat i emandakam ni digat, no diket emin ira ja kait tayon emati shi intiron dobong. <sup>10</sup> Saja digat ja joka dada-kami niman, eg mebedjag i panda-kam jo tep si Apo Shiyos, ja eg nagshengan i toka pengaasi, eg shakejo i-oway. Si-katoy emili son si-kayo say maybidang kayo nodta too tod dangit ingkatod ingka kabol ni inpatiyo son Cristo. Isonga kenshat ta isingpet tokejo, pan-odi tokejo nodta sigod ja mapteng nga kasesaad jo, tan pekedsang shakejo. <sup>11</sup> Jet si Apo Shiyos ma, si-katoy panshedjawan tayo ingkatod ingka, ta si-katoy Kangeto-an, enshiy eshom. Siya, satan da.

<sup>12</sup> Say timolong son si-kak ja engisodat niyay, si Silas, ja naka ikarin epateg ga agik shi pamati. Sajay ya entikey ya solat ko ket si-katoy mengipa-amta ni kepesing nen Apo Shiyos ja mengaasi, isonga karejo ibi-jag sota joka panshinel nodta kaasi to.

<sup>13</sup> Sota ira emati ja i-Babilonia ja inges jon pinidi nen Apo Shiyos, inkowan sha ey pekikowan kod ja solat koy semek sha son si-kayo. Jet angken si Marcos ja naka ikarin anak ko shi pamati, piyan to ngon pekikowan ko ngoy semek to son si-kayo.

<sup>14</sup> Ipa-sas joy semek jo so ni sakey tan sakey son si-kayo.

Jet sota talna ja wára son si-  
kayon emin ja wáred tan ja emati  
son Cristo, sapay koma ta ma-  
shoman.

## SOTA MAYKADWEN SOLAT NEN SAN PEDRO

<sup>1</sup> Si-kak si Simon Pedro ja maka-solat niyay, jet sajay ya solat ko, para son si-kayon tinodongan nen Jesucristo ja emati son si-kato. Epateg i pamatiyo son si-kato ja inges toy pamati mi. Tinodongan shakejo nen Cristo ta nan-i-inges i toka pesing so ni totoo. Jet niman ma, si-kato may Shiyos tayon emin, ja engisedakan son si-katejo.

Si-kak i sakey ya apostol nen Jesucristo ja shinotokan ton mansilbi son si-kato, isonga itnengi jon pasiya iya ikowan ko.

<sup>2</sup> Say shawat ko son Apo Shiyos, sapay koma ta sota kaasi to tan talna ja wára son si-kayo, si-katoy ma-shoman, ja inges to ngoy kepanka-shomi ni amtayo may-pangkep son si-kato tan si Jesus ja Apo tayo.

*Dingka nen Apo Shiyos i pangishan jo, nem mesepol la i-anam joy ogadiyo*

<sup>3</sup> Si Apo Shiyos, ta ebadeg i panakabalin to, in-akan toy emin na kasapolan tayo say mewad-an kito ni eshiyosan na ogadi. Jet say inpasing to, inalobos ton amta-en tayo i maypangkep son Cristo ja emili son si-katejo ja memati, say mayda-kam kito shi shayaw to tan say ingesen tayoy ogadi to. <sup>4</sup> Aliwén sajay bengat, no diket inkari to pay son si-katejo ey waray mepesamak alin mapteng nga pasiya tan kaskasshaaw son si-katejo. Inkari to iyay say eg kayo ma-edinan nonta edogit ta aramid ni toon eg emati, ta sotan i meneshal son si-kayo jet piyan ton ingesen tayo i ogadi nen Apo Shiyos.

<sup>5</sup> Jet no piyan jon mayto-towa son si-kayo iyay, mesepol la eg kayo ma-kep ni inpamatiyo bengat. Mesepol la dag-en joy kabaalan jon mengshom nonta pamatiyo ni mapteng nga ogadi. Saja mapteng ngon ogadi, ma-shoman ngo koma ni koston pan-nemnem. <sup>6</sup> Nem aliwén sajay bengat i dag-en jo: mesepol pay ya amta-en jo shorog ja menosho ni bakdang jo, mengenos ni angken nganton digat, tan mengonod ni olay ni piyan nen Apo Shiyos ja dag-en jo. <sup>7</sup> Mesepol pay ya mewad-an kayo ni olay ni semek so ni eshom, jet aliwén sota kait jo bengat shi pamati i sesmeken jo, no diket emin na kait jon too. <sup>8</sup> No sajay ira day dag-en jo ni olay ja nemnemnemen jo, sigoradon ebadeg i panpa-no-an ni inpangamtayo so nen Jesucristo ja Apo tayo.

<sup>9</sup> No bilang ey waray toon kowan to ey emati, nem sajay den eshiyosan na ogadi ket enshi son si-kato, sotan na too ket malibag, eg maka-awat ni maypangkep ni pamati, ta eg to nemnemen sota mapteng nga dingka nen Apo Shiyos son si-kato ni inpa-makawan to ni basol to. <sup>10</sup> Isonga si-kayon a-akik shi pamati, enshiy panshowashowa-an jo ey pinidi shakejo nen Apo Shiyos ja manbedin ni too to, nem mesepol la dag-en jon emin i kabaalan jon menginam ni ogadiyo nodta pinidi-an shakejo so. Ta no sajay ya ogadin inkowan ko la ket si-katoy dag-en jo, wára kayo son Apo Shiyos ni olay ja eg kayo maysi-jan son si-kato ingkatod ingka. <sup>11</sup> Jet ipalobos to alin onsekep kayo ja mayda-kam shi pantoshayan nen Jesucristo ja Apo tayon engisedakan son si-katejo. Jet sajay ya pantoshayan to, enshiy to pengintegangan.



<sup>12</sup> Saja inkowan ko la, si-katoy podnon pinatiyo nonta pilmiro, jet ingkato niman, si-katoy joka ki-detin ka-on-onori. Nem ekak met laeng ibi-jag ja mengipinpinshowen mengikowan niyay son si-kayo, tep piyan kon mayenam i ogadiyo. <sup>13</sup> Niman na kawashak pay laeng shiya biyag, say wared nemnem ko, baka dibkan jo; isonga mapteng no ipinpinshowak iyay son si-katayo. <sup>14</sup> Ta amtak ey say ketey ko, shanshani may timpo to, ta si-katoy inpa-amta nen Jesucristo ja Apo tayo son si-kak nontan da. <sup>15</sup> Isonga niman na kawashak pay laeng shiya biyag, ishingon ko ni olay ya mengikowan son si-kayo, say no ma-enshi-ak mala, waray penguineman jo ni olay nonta inkowan ko la.

*Inon-an min mismo sota mika pan-idawag son si-kayo may-pangkep son Cristo*

<sup>16</sup> Sajay ya intoro mi son si-kayo maypangkep nonta kaskasshaaw wa indaw ali nen Jesucristo ja Apo tayo, aliwen istoriya ja inemag ni toon edaing. Sajay ya indaw to di, etaksholan ni panakabalin nen Apo Shiyos. Sajay, amta min apostol ta inon-an min mismoy kaskasshaaw wa itsora ni bakdang to, <sup>17-18</sup> nonta wara kamin eki-odop son si-kato shima shontog ga dinespagan nen Apo Shiyos. Inon-an min mismo nonta inpanbaliw nen Apo Shiyos ja Ameto i bakdang nen Cristo. Emenenili ma nontan ja inges tos Apo Shiyos. Jet intenengan mi pay sota esel nen Apo Shiyos ja Kangeto-an ja kowan to ey, "Sajay i Anak ko jet ensemble ko, jet si-katoy emengikan ni naka pan-imdeni."

<sup>19</sup> Isonga sota inkowan ira nonta para padto nen Apo Shiyos nonta bayag da, amta tayo men pasiya ey panshingan. Jet pansigshan jo no sotan na esel ni para padto i

pati-en jo. Ta sotan i may-eshig ey onsilew son si-katejon wared dogad ja embolinget ingkatod onsabi ali sota akew wa idaw mowan alin nen Cristo. Ta si Cristo i may-eshig ey mamowas sa talaw ja mengipasas ey emankewa-wa ma, jet si-katoy ondawag ni nemnem jo.

<sup>20</sup> Nem mesepol la mantan-shaan kito, ta angken sipen too, eg to koma iba-ngat i pengi-odog to nonta esel nen Apo Shiyos ja insolat ira nonta para padto nonta bayag da. Mesepol la may-enam nodta kostokoston olog to. <sup>21</sup> Ta sajay ya toro, aliwen edapod nemnem ni too bengat, no diket si Apo Shiyos met laeng. Jet sajay, inpa-amta to so nonta ira para padto nonta bayag da jet si-karay engisodat, ja intorong nonta Ispirito Santo nen Apo Shiyos.

## 2

*Pantanshaan kayo ali ni totoon o-owap i toro sha*

<sup>1</sup> Nem angken nonta bayag da, wara met laeng iray sinan para padto ja o-owap i intoro sha so nonta ira too nen Apo Shiyos. Jet angken niman na emankedabas sa timpoyo ngo, wara ira aliy inges sha ja kowan sha ey si Apo Shiyos konoy engibetkag son si-kara. Nem o-owap kariy toro sha. Sotan alin itoro sha, sikap, jet si-katoy meneshal ni pamati ni eshom. Eg sha mala ewaten ey si Jesus i Apo sha, anta nga si-katoy engisedakan son si-kara nonta pilmiro. Eg ira met kitdi mebedjag, ta sajay ya shaka dagdag-a, si-katoy mengi-kan ni kesheshalan sha, <sup>2</sup> nem eshakil mengonod ni toro sha, ja kowan sha ey aliwen basol i pandeka ni edogit ta aramid. Jet sotan iren i-owapan sha, si-karay kabol la ngaaw i ikokowan ali ira nonta

eg memati maypangkep nonta pamati tayon podno. <sup>3</sup> Sajay iren o-owap i toro sha, pilak i shaka nemnemnema. Isonga say pesing sha son si-kayo, tapngan shakejo ni en-amis sa esel ja o-owap say panpidakan shakejo.

Nem emansessesked i keshosara ja singa eman-a-agag ni imotok sha, ta sigod ja inkesheng nen Apo Shiyos ey kenshat ta meshosa ira. <sup>4</sup> Ta sinto pay sota ira anghil ja nanbasol nontan da, enshiy binaybay-an nen Apo Shiyos son si-kara, no diket inpalaw to iren emin shima impiyarno jet naybalod mala ired man ingkatod onsabi ali sota timpon shosa-an so ira nen Apo Shiyos. <sup>5</sup> Asan sakey pay, sota ira totoo nonta bayag den timponen Noe ja nankekedsel, enshiy en binaybay-an nen Apo Shiyos son si-kara. Dinedjos to iya dobong et nalned ja emin ira sota totoon eg emati son si-kato. Say ebiyag nontan ja eg nalned, si Noe bengat tan sota piton kait to, ta si Noe bengat i engikowan nontan ey manbebawi iray totoo ja mapteng may dag-en sha. <sup>6</sup> Jet angken pay sota ira tood ma dogad ja kowan sha ey Sodoma tan shi Gomora, shinoso nen Apo Shiyos iren dinalshep ni inpool to so ni ili shen inpanbalin to ni shep-ol. Sajay i inpasing nen Apo Shiyos say waray banshaan so ira nonta eg memati son si-kato. <sup>7</sup> Nodtan na dogad, say ebiyag bengat ja insalakan nen Apo Shiyos, si Lot, ta maronong nga too. Si Lot, ngaaw i dekna to tep sota ira nankekedsel la kaidiyan tod man, ensekig ni olay i shaka dagdag-a. <sup>8</sup> Naydaok si Lot so ira nontan na totood Sodoma jet ina-akew ja say toka asa tan toka itentenengi son si-kara, poro kedsel la emin. Jet sajay ya epaspasemak, ngaaw i dekna to, ta si-kato, maronong.

<sup>9</sup> Sajay ya inkowan ko len dingdingka nen Apo Shiyos nonta bayag da, si-katoy nemnemnemen jo, ta si Apo Shiyos, amta ton mengisedakan so nonta ira totoon emati son si-kato, angken naydaok ira shi nankekedsel la totoo. Jet amta to pay i pesing to so nonta ira eg memati son si-kato ingkatod onsabi sota akew wa inkesheng ton keshosara, <sup>10</sup> agdalo ira sota toon say shaka dagdag-a, sota pipiyan shen ensekig ga aramid tan sota ira kaonsopngil so ni toray ya insaad nen Apo Shiyos.

Sota ira o-owap i shaka itoro, eg ira mebidin, tan enshiy baing sha. Enshiy takot shen mengikokowan ni ngaaw maypangkep so ira nonta anghil ja pinalsowa nen Apo Shiyos shi dangit. <sup>11</sup> Nem sota ira anghil, angken waray panakabalin sha, tan waray nebeng sha ja in-akan nen Apo Shiyos, wara met laeng i annad sha ja mengikowan ni ngaaw wa esel maypangkep so nonta ira o-owap i toro sha shi sango-an nen Apo Shiyos. <sup>12</sup> Sotan iren too ja o-owap i toro sha, singa atap iren animal la wared shontog, ta eg sha nin nemnemen i dag-en sha, ta sota deknara, si-katoy shaka pemasigin dag-en. Jet say sakey pay ya kay-ingsan shed animal, enshiy panpa-no-an ni biyag sha nem eg ma-shel ira et mebono. No wara pay i eg sha ewatan, nga-ngaaw i esel la ikokowan sha. Jet say panbenagan sha, inges to sota animal la mesheshal ngoreshan; <sup>13</sup> sota epaladon kakedsel sha, ikaro sha ngoreshan. Angken timpo ni ka-akawan, ja eshakil i totoo, shaka ipalantaro ja dag-en sota pipiyan sha, ta sotan konoy siged son si-karen shaka pandad-saki. Ensekig ira jay ya pasiya! En-asimogal jo komen may-odop son si-kara, ta na-alas i shaka

pesing no maydikob ira son si-kayo ni timpon joka penguinem-nem son Cristo. <sup>14</sup> Sajay iren totoo, no waray asen sha pay ya bii, apil la shagos i wared nemnem sha. Eg ira on-ekdas ja mandeka ni ngaaw wa wared pangkep sha. Sota ira toon emanbinaliw i nemnem sha, si-karay shaka en-enapa ja i-owapan, jet edaing iren mengamkam ni kompormi. Sajay i shosa-an so ira nen Apo Shiyos. <sup>15</sup> Bimaki ira ja singa inbiyang sha sota mapteng nga ogadi ja ka-aporbali nen Apo Shiyos, jet say inonod sha et ngo mowan, sota ngaaw wa aramid. Inonoran sha sota aramid nen Balaam ja anak nen Bosor nonta bayag da, ja say pipiyan ton dag-en, ja pengalan to ni pilak, sota pandeka ni ngaaw. <sup>16</sup> Nem nemnem jo kari sota epasemak son Balaam. Imesel sota animal ton nankabajo-an to, ja inseg-ang to si Balaam ta ngaaw i aramid to. Jet siya, eg ma timoloy ya to dag-en sota istay ninemnem ton dag-en ja naydakad.

<sup>17</sup> Sajay iren totoon o-owap i toro sha, enshiy jo kon-oren son si-kara, ta say kay-eshigan sha, singa ba-wék ira ja enshiy shanom to, ono singa sota kolpot ja pan-itekjab bengat ni shagem ja enshiy to inegni-an na oran. Jet sajay iren totoo, waray insagana nen Apo Shiyos ja embolinget ta dogad ja keshosa-an sha. <sup>18</sup> Sajay ira, shaka pay itangsit sota aramid shen ensekig ja enshiy silbi to, jet sotan i shaka pengewis ni totoo say si-kara konoy onoren sha. Jet say shaka en-enapa pay ja ewisen, sota ira toon ikaybi-jag shen meki-od-odop so nonta ira toon ap-apil i shaka dagdag-a. <sup>19</sup> Say shaka pengewis son si-kara, kowan sha ey no si-karay onoren sha, bolos konoy pipiyan shen dag-en, angken nganto. Nem si-

karen mismo, nagshengan i mebedin shen dag-en. Ta si-kara, basol i indowam shen dagdag-en, jet angken si-katoy meneshal son si-kara, eg mebedin na ibi-jag sha. Angken nganto, no eg mebedin na ibi-jag ni toon dag-en, sotan i may-eshig ey makabaga-en son si-kato, isonga aliwen bolos i piyan ton dag-en.

<sup>20</sup> Mapteng i kasesaad ni toon emati so nen Jesucristo ja Apo tayon engisedakan son si-katejo, no ibi-jag to sota ensekig ga aramid ja kedagdag-a ni tood ja dobong. Nem no itolok to shorog i bakdang ton maydowam nodta sigod ja aramid to, ja enshi may kedsang ton memediw nontan na ogadi to, mema-ma may kasesaad to ey say nonta pilmiro. <sup>21</sup> Istay mapmapteng koma no sajay iren too ket eg sha inamta-an i maypangkep ni mapteng nga ogadin ka-aporbali nen Apo Shiyos. Ta kimawas sota inpangamtara nonta bilin nen Apo Shiyos ja naykowan son si-kara nontan, no on-oli mowan ira nodta sigod. <sup>22</sup> Isonga agpayso sota kowan nonta arig ey, “Sota aso, to inodin kinan met laeng sota in-ota to. Tan sota keshel ja na-mes, nay-oli met laeng nga en nanpitdaw shi pitek.” Sajay i kaytoshongan nonta ira toon istay edinisan nonta aramid ton ensekig nem nay-oli met laeng mowan na sotan i toka dagdag-a.

### 3

*Maypangkep bengat ni kaasi nen Apo Shiyos i eg to nin pengokoman niya dobong*

<sup>1</sup> Si-kayon ensemek ko, sajay i maykadwen solat ko para son si-kayo, jet say pangkep ko ni sajay den solat kon showa, say eg jo dibdibkan sota koston pannemnem ja inpinpinshowak da son

si-kayo. <sup>2</sup> Karejo dibdibkan sota inkowan ni para padto nen Apo Shiyos nonta bayag da tan sota inbilin nen Apo Jesus son si-kamin apostol to ja mi itoro. Si Apo Jesus i engisedakan son si-katejo.

<sup>3</sup> Say epateg ga nemnemnemen jo koma, sota maypangkep ni karonan alin timpo. Ta no sa-jay alin timpo, kenshat ta wára aliy onbo-day ya totoon dedamsis bengat i amtara, ta sota pipiyan sha bengat i shaka kosto-i ja dagen. <sup>4</sup> Jet ikowan sha ni dedamsis sha son si-kayo ey, "Towa da sota inkari nen Jesus nontan da, ja kowan to ey on-oli ali? Ebayag met, nanketey mala ira sota nankepangdon emati son si-kato. Manshoki nonta inkapalsowa niya dobong ingkato niman, iso met laeng nga enshiy to nanbalbaliwán!" Sajay i ikowan sha ali. <sup>5</sup> Nem sota ira toon sajay i ikowan sha, shaka ibiyang sota inpanbaliwán nen Apo Shiyos niya dobong nonta inpalamsowa to. Ta si Apo Shiyos, inkowan to ey medeka i dangit tan dobong et ewára nga agpayso. Nem shanom nin i wára nonta pilmiro, asan bo-day ma. Isonga shanom i nandikmot. <sup>6</sup> Jet shanom met laeng i inosal to nonta dinedjos to iya dobong. <sup>7</sup> Asan sakey pay, panbediw to iya dobong no ma-onod alin timpo. Iso met laeng nga ikowan to ey mesheshal ira ma naykayang tan saja dobong ja mismon wára niman, jet mepoolan mala ira. Emansesked bengat si Apo Shiyos ni timpon inkesheng ton peneshal to ira nonta toon eg memati son si-kato.

<sup>8</sup> Nem si-kayon ensemek ko, eg kayo koma ma-enshi-an ni namnama ni saja emankedabas sa tawen ey eg pay laeng metongpal sota inkari nen Cristo. Mesepol la eg jo koma dibdibkan ey son Apo Jesus ket angken na ondabas

i sandibon tawen, singa sakey ya akew sotan son si-kato. Ta son si-kato, nan-inges i shokey ni sakey ya akew tan sandibon tawen. <sup>9</sup> Isonga sota ira eshom ma too, ekolang i shaka pannemnem, ta say kowan sha, si Apo Jesus ket singa eg to nemnemnemen sota inkari to nontan da. Aliwén sotan, no diket si Apo Jesus, nanos son si-katejo jet piyan ton i-aknan i emin na too ni waya sha ja manbebawi, maypangkep nonta basol sha. Ta say wára son si-kato, no mebedin koma, angken sakey so ni tood dobong, enshi son si-kara i meshosa ingkatod ingka. <sup>10</sup> Nem si Apo Jesus, sigoradon tongpalen to ali sotan na inkari to, jet palibdig aliy idaw to ja inges toy emengibot. Jet sama wáred ma naykayang, mamas ma ira ja may-inshas nodta makedsang nga bongog. Angken saja dobong, tan saja emin na wáred jay, mepoolan, jet eg mala metongolan ey istay si-kato iya sigod ja dobong.

<sup>11</sup> Niman ma, ta amtayo i mepesamak ali shiya dobong ja mepoolan na emin iya kompormi, mesepol la asen joy itsora jo, no say wára met laeng son si-kayo ket sota mapteng nga itsora nen Apo Shiyos. <sup>12</sup> Niman na kayoka mansessesked ni idaw mowan ali nen Cristo, tan kayoka man-a-agag ey metongpal alin shagos, mesepol la edisto-an jon mansilbi son si-kato. Agpayso noman ja sotan alin akew wa idaw to, sama emin na wáred naykayang, pati sama ira talaw, mepoolan et metonaw ja eg mala ma-imatonan, <sup>13</sup> nem say inkari to, wáray bado alin naykayang, tan badon dobong. Si-katoy tayoka sesseskera. Jet nodtan ali, tima-nil la mapteng i medeka.

<sup>14</sup> Isonga niman, ta kayoka mansessesked niyay ali, si-kayon

ensemek ko, dagejoy kabaalan jon mengonod nonta piyan to say enshiy kolang jo, ono kompormin jo kebedawan, no diket sota talna koma i wára son si-kayo ni olay. <sup>15</sup> Nemnem jo ey say kabol la eg sheshalan nin nen Apo Shiyos so niya dobong, piyan ton sota ira totoo, manbebawi koma ira, say eg ira mayda-kam ja meshosa ingkatod ingka. Angken si Pablo ja epateg ga agi tayo shi pamati, sajay met laeng i inkowan to nodta solat to son si-kayo, ta sotan i inpa-amta nen Apo Shiyos met laeng son si-kato. <sup>16</sup> Emin na solat to shi eshom ma emati, sajay met laeng i inkowan to son si-kara. (Waren agpaysoy edigat ta ma-ewatan nodta solat nen Pablo, nem kakaasi sota ira toon emaliktad ni olog to, ta sotan i kabol la keshosa-an sha. Angken pay sota eshom ma inpaisolat nen Apo Shiyos, shaka bediktaray olog to. Sajay iren too, enshiy am-amtara, tan emanbinaliw i nemnem sha.)

<sup>17</sup> Jet niman ma, si-kayon ensemek ko, insigod kon inkowan iyay son si-kayo. Isonga pantanshaan kayo, ta baka et ey pati-en jo sotan na o-owap pa toro ira nonta eg memati ni koston bilin nen Apo Shiyos, nakol ni ibi-jag jo sota pamatiyo ja naynadnaran jo niman. <sup>18</sup> Niman ma, pakedsang joy pamatiyo nodta kaasi nen Apo Jesucristo ja engisedakan son si-katejo, say ma-shoman i amtayo maypangkep son si-kato.

Si-katoy panshedjawan tayo niman ingkatod ingka. Siya, satan da.

## SOTA PILMIRON SOLAT NEN SAN JUAN

<sup>1</sup> Iyay i isolat ko para son si-kayo, ta piyan kon ikowan son si-kayo sota maypangkep son Cristo ja emengipa-amta ni maypangkep son Apo Shiyos, tan emengi-kan ni biyag. Si Cristo, sigod ja wára ngoreshan nonta eg pay laeng epalsowa iya dobong jet nonta indaw to did ja dobong, mismon intenengan miy inkowan to, inonan miy dingka to, tan pinishat mi pay i bakdang to. <sup>2-3</sup> Sikatoy kawad-an ni biyag ja enshiy to engintegangan jet sigod ja wára ngoreshan son Apo Shiyos ja Ameto. Jet si Apo Shiyos, inbetkag to di son si-kami, jet inonan min mismo sotan na biyag ja wára son si-kato. Isonga niman, mesepol ngon sota inon-an mi tan intenengan mi, ikowan mi son si-kayo, say maykait kayo ngo son si-kami ni inpakikadwa mi son Apo Shiyos ja Ama, tan si Jesucristo ja Anak to. <sup>4</sup> Isolat mi iyay say manannay i imdeng tayon emin.

*Si Apo Shiyos komay onoran tayo ni olay*

<sup>5</sup> Say ikowan mi son si-kayo, sota intenengan mi son Cristo, ja kowan to ey, “Si Apo Shiyos, poro mapteng i wára son si-kato jet enshin polos son si-kato i ngaaw. Isonga may-eshig ey sikatoy silew et enshin polos son si-kato i embolinget.” <sup>6</sup> Jet no kowan tayo ey kitoka mekikadwa son si-kato ey sota itsora ni biyag tayo mango ket ngaaw, ono ngaaw i tayoka dagdag-a, o-owap sota kowan tayo ey tayoka pekikadwa son si-kato, ta eg nay-anam sota ngaaw wa aramid nodta podnon bilin to. <sup>7</sup> Nem no si Apo

Shiyos komay onoran tayo ni olay, ja mapteng i tayoka pesing, kenshat ta wára ngoy mapteng nga pekikadwa tayo ni sakey tan sakey, jet sota shala ni Anak ton si Jesus ja imayos shi koros, sotan i kaon-omas so ni emin na basol tayo. <sup>8</sup> No kowan tayo ey enshiy basol tayo, naytopo sotan na nemnem, jet enshi son si-katejo i podno. <sup>9</sup> Nem no ipodno tayoy basol tayo, pekawanan shakitejo nen Apo Shiyos, jet omasen toy aramid tayon ngaaw et sa-datan to ni mapteng. Sajay i pesing to ta mepiyal ja mengaasi tan mapteng ni olay i toka dagdag-a, enshiy toka pankodangi. <sup>10</sup> Jet say kowan to, emin na too, sapasap pa nanbasol; isonga no kowan tayo ey enshiy aramid tayon ngaaw, singa si Apo Shiyos et ngo mowan i kowan tayo ey ma-o-owap, ta eg tayo ewaten sota kowan to ey emin na too, sapasap pa nanbasol.

## 2

<sup>1</sup> Si-kayon singa annak ko, sajay i isolat ko son si-kayo, say eg kayo mandeka ni ngaaw wa aramid. Nem no bilang ey waray manbesol ja kait jo, mebedin na may-odi sota toka pekikadwa mowan son Apo Shiyos, ta waray mengitakshel son si-katejo shi sango-an nen Ametayo ja si Apo Shiyos, ja si Jesucristo. Kabaalan ton dag-en iyay tep enshin polos son si-kato i basol. <sup>2</sup> Sikatoy engikesho ni basol tayon emati son si-kato ni inkatey to shi koros jet aliwen si-katejo bengat, no diket angken sota basol ni emin na totood ja dobong.

*Sota pesing nga mengamta no wára kito son Apo Shiyos*

<sup>3</sup> Niman, sajay i amta-an tayo so no podnon amta tayo si Apo Shiyos. No tayoka pati-a i bilin to, wára kito son si-kato.

<sup>4</sup> No kaspangarigan ey wáray toon mengikowan ey amta to si Apo Shiyos, nem eg to kari pati-en sota bilin to, sotan na too, ma-owap; enshiy podno son si-kato. <sup>5</sup> Nem sota toon ememati ni bilin to, sajay ya too, si-katoy sigoradon enshiy kolang ni semek to son Apo Shiyos. Isonga say amta-an tayo so ey wára kito son si-kato, sajay. <sup>6</sup> No sipay toon kowan to ey wára son Apo Shiyos, wára komay mapteng nga ogadi to, ja inges tos Cristo.

<sup>7</sup> Si-kayon kait ko ja ensemek ko, mesepol la pati-en tayon emin i bilin nen Apo Shiyos, jet say wá-wa-sha koma son si-kayo, sota penmek ni sakey tan sakey. Sajay ya naka pan-isolat, aliwén bado, no diket sigod iyay ja bilin; intenengan jo ngoreshan nonta pilmiro. <sup>8</sup> Jet siya, wára ngo son si-kayo i semek ja inges toy kawasha to son Cristo nontan da. Nem singa bado iyay ya bilin tep emanka-omas ma niman shiya dobong sota may-eshig ey embolinget. Jet emankaisa-dat ma sota podno ja edapo son Apo Shiyos, ja may-eshig ey niyal. <sup>9</sup> No sipay toon kowan to ey wáred niyal tep toka onoris Apo Shiyos, nem en-oges to kariy kait to, say kay-eshigan ni kasesaad nontan na too, wára karid embolinget ingkato niman. <sup>10</sup> Nem no sipay toon ensemek toy kait to, si-katoy may-eshig ey wáred niyal, jet enshiy to panshanagan ey wáray kaysepti-an to. <sup>11</sup> Nem sota toon en-oges toy kait to, may-eshig ey wáred embolinget, jet singa embolinget pay ya emin i toka pan-ak-akshi; isonga eg to amtay toshongen to. Ta singa kinoshab ni embolinget.

*Mesepol ngon maysi-jan kito shiya maramen ngaaw wa aramid shiya dobong*

<sup>12</sup> Mebedin na mansodatak son si-kayon naka ikarin annak ko, tep epakawanan i basol jo ni inpamatiyo ni ngaran nen Jesus. <sup>13</sup> Mebedin na mansodatak son si-kayon amma tep amtayos Jesus ja wára ngoreshan nonta eg pay laeng epalsowa iya dobong. Mebedin na mansodatak son si-kayon bedoleki tep inebak jo sota ngaaw i aramid to ja si Satanas. <sup>14</sup> Mebedin na mansodatak son si-kayon a-anak tep amtayos Apo Shiyos ja Ametayo. Mebedin pay ja mansodatak son si-kayon amma tep amtayos Jesus ja sigod ja wára ngoreshan nonta eg pay laeng epalsowa iya dobong. Mebedin na mansodatak son si-kayon bedoleki tep makedsang kayo. Ta say joka nemnema ni olay, sota esel nen Apo Shiyos; isonga inebak jos Satanas.

<sup>15</sup> Saja kompormin ngaaw ja wára so ni karakdan shiya dobong, aliwén sotan et ngo mowan i jo piyanen. Ta no sipay toon sajay i wáred nemnem to, eg ngo mebedin na may-inshas ja sesmeken tos Apo Shiyos ja Ametayo. <sup>16</sup> Jet sajay ira sotan na ngaaw ja wára so ni karakdan shiya dobong; sota ngaaw wa itsoren pengamkam ni kompormi, sota ngaaw wa pangkep no wáray asen, sota pengitangsit ni kasesaad ni biyag. Sajay ira, aliwén si Ametayo ja si Apo Shiyos i edapo-an to, no diket sajay i ogadi ni karakdan shiya dobong ja eg emati son si-kato. <sup>17</sup> Isonga aliwén sotan i jo piyanen, ta saja marama niman, mepokaw ali jet ma-enshi mala sota kekamkamkami ni totoo niman. Nem sota toon ememati ni kowan nen Apo Shiyos ey dagen to, si-katoy mebay-an ja wára ni olay ingkatod ingka.

*Pantanshaan kayo, ta wára ma ira sota makakontra son Cristo*

18 Si-kayon annak ko, entikey may timpo! Intenengan jo ey wara nin ali sota sakey ya sinan Cristo ja kontra to kariy obda nen Cristo, jet niman, eshakil ira ma shiya dobong. Isonga sajay i amta-an tayo so ey shanshani may tapos ni dobong. 19 Sajay iren too, istay ya singa nay-eshom ira son si-katejon emati son Cristo, nem enshi gayam. Isonga tinaynan shakito, ja eg sha ma intoloy ja mekikadwa son si-katejo. No agpayson naykait ira son si-katejo, ka-onong koma ira niman. Nem indekjas shakito, jet sajay i kamta-an ton pasiya ey emin ira, apil ira, aliwa karin kait tayod pamati. 20 Nem si-kayo, amtayon mengilesin nonta podno, ta tinod-an shakejo nonta Ispirito Santo nen Apo Shiyos. 21 Say kabol la insolatan ko so niyay son si-kayo, aliwen gapota eg jo ewatan iya maypangkep ni podnon kowan nen Apo Shiyos, no diket amtayo. Amtayo met ey enshiy o-owap pa mandepo nodta podnon kowan to.

22 Say owap pa toro ira nonta ira toon ma-owap, kowan sha ey si Jesus, aliwen si-kato kari sota inbetkag nen Apo Shiyos alid ja dobong. Sajay iren too ja eg memati son Apo Shiyos tan si Jesucristo ja Anak to, si-karay makakontra ni obda nen Cristo. 23 Nem say nemnemen jo, sajay. No sipay too ja eg memati ey si Cristoy Anak nen Apo Shiyos, eg maybidang ey Ametos Apo Shiyos. Nem no sipay toon ememati ey si Jesus i Anak nen Apo Shiyos, si-katoy maka-ama so nen Apo Shiyos.

24 Jet niman, say pesing jo say eg kayo ma-ewis son si-kara, sajay. Sota toron intenengan jo ngore-shan pangkep son Cristo, sotan komay nemnemen jo; karejo sa-datan. No sajay i pesing jo, wara kayo ni olay son Apo Shiyos,

tan si Jesus ja Anak to. 25 Jet say inkari nen Cristo son si-katejon on-onong ja memati son si-kato, biyag ga enshiy to engintegan.

26 Nem mesepol la mantan-shaan kayo, ta wara iray apil i toro sha ja piyan shakejon i-owapan. Isonga insolat ko iyay ya banshaan son si-kayo. 27 Wara pay laeng son si-kayo sota Ispirito Santo nen Apo Shiyos ja in-akan nen Cristo, jet si-katoy emengitosho son si-kayo ni emin na podno ja enshiy o-owap to. Isonga angken eg jo itolok ja itod-an shakejo nonta ira aliwen kait jod pamati. Sota intoro ngore-shan nonta Ispirito Santo nen Apo Shiyos son si-kayo, si-katoy nem-nemnemen jo; karekayo mebeg-nad nodta apil la toro.

*Annak shakito nen Apo Shiyos; isonga mesepol la may-enam i ogadi tayo*

28 Niman si-kayon naka ikarin annak ko, mesepol la si Cristoy pengipilmi-an jo so ni nemnem jo, say no onsabi ali sota timpo ja imotok to, eg kito mebebain-gan ja singa onkesen shi sango-an to. 29 Amtayo met ey si Apo Shiyos, poro mapteng i toka dagdag-a. Isonga niman, say koskoston pengimatonan jo nonta ira annak nen Apo Shiyos, si-kara sota kaon-onod ni mapteng ja kowan nen Apo Shiyos.

### 3

1 Iyay i nemnemen jo koma. Say semek nen Apo Shiyos son si-katejon annak to, ebadeg ga pasiya, isonga mayngadnan kito ey annak to. Aliwen awag bengat, no diket podnon naykari kito ey annak to. Sota toon eg memati son si-kato, eg sha ewatan i kasesaad tayo ta angken si Apo Shiyos, eg sha pati-en. 2 Si-kayon kait kod pamati ja ensemble ko, amta tayo



ey annak shakito nen Apo Shiyos, nem niman, eg to pay inpa-amta son si-katejo no ngantoy panbedinan tayo di. Nem amta tayo ey no onmotok alis Cristo, asen tayon mismo, jet ingesen tayo may itsora to. <sup>3</sup> Jet emin na toon sajay i namnama sha, ja emansessesked son Jesucristo, mesepol la enshi komay sha panbesolan, ta si Jesus, enshi ngoy toka panbesoli.

<sup>4</sup> No sipay toon ngaaw i aramid to, si-katoy eg memati ni bilin nen Apo Shiyos, ta emin na ngaaw wa aramid, maykontra nodta bilin to. <sup>5</sup> Amtayo met ey say kabol la dinawan ali nen Cristo, to omasen iray ngaaw wa aramid tayo, ono basol tayo. Jet amtayo pay jey si-kato, enshiy basol to. <sup>6</sup> Isonga no sipay toon emati ja si Cristoy engipilmi-an to ni pamati to, ibi-jag toy ngaaw wa aramid to. Nem sota toon ngaaw ni olay i aramid to, si-katoy kamta-an to ey eg to am-amta tan eg memati son Cristo. <sup>7</sup> Jet no kowan to ey angken mandeka ni ngaaw, ta naykari met laeng da so nen Apo Shiyos, karejo i-onod, si-kayon naka ikarin annak ko. Ta say kekosto-i nen Apo Shiyos, sota inges tos Cristo ja emandeka ni olay ni mapteng. <sup>8</sup> Sota ira ngaaw ni olay i aramid to, wara ira son Satanas, ta angken nonta pilmiron timpo ngoreshan, si Satanas, ngaaw ni olay i aramid to. Jet say kabol la dinawan ali nen Cristo ja Anak nen Apo Shiyos, say ngawngawen ton emin sota kepengewis nen Satanas son si-katejo ja mandeka ni ngaaw. Isonga tanshaaniyo, ta no maya-shom kayo nodta ngaaw wa aramid nen Satanas, maykontra kayo son Cristo.

<sup>9</sup> No sipay toon si Apo Shiyos i Ameto, eg ma mandeka ni ngaaw, ta nan-inges i ogadiren san-ama, jet eg ma mebedin na itoloy ton

manbesol ni olay, tep anak ma nen Apo Shiyos. <sup>10</sup> Isonga sajay den inkowan ko la, sajay i pengamta-an ni toon anak nen Apo Shiyos tan toon wara ngo so nen Satanas. Sota toon ngaaw i toka dagdag-a, ono enshiy semek to ni kait to, aliwen si Apo Shiyos i kawad-an to.

*Mesepol i semek so ni kait*

<sup>11</sup> Angken nonta pilmiron emati kayo, sajay ngoreshan i intengangan jo, ey mesepol la ensemble tayoy kait tayo. <sup>12</sup> Aliwen tayo koma onoran sota inpasing nen Kain nonta bayag da ja ngaaw. Si-kato, wara son Satanas; ngaaw ngoreshan i aramid to. Isonga binono tos agi ton si Abel, tep si Abel, mapteng i ogadi to. <sup>13</sup> Isonga si-kayon kait ko, karekayo messhaaw nem en-oges shakejo ni karakdan na tood ja dobong, ja enshiy Shiyos sha. <sup>14</sup> Nem si-katejo, ensemble tayoy kait tayod pamati, jet sotan i tayoka penigorado-i ey angken metey kito, wara ngoreshan i biyag tayo alin enshiy to engintegan. Nem sota enshiy semek to so ni kait to, ka-onong ja emantoshong shi patey ingkatod ingka. <sup>15</sup> Sota enshiy semek to ni kait to, maybidang ey mabono. Jet amta tayo ey say toon mabono, enshi son si-kato i biyag ga enshiy to engintegan ja edapo son Apo Shiyos. <sup>16</sup> Jet say amta-an tayo so ni podnon semek, sajay. Si Cristo, intolok toy bakdang ton metey shi koros say ikaro toy basol tayo; isonga kasta met koma son si-katejo, sajay i mesepol la onoran tayo. Itolok tayo koma ngoy biyag tayo ni pansigshan ni kait tayo. <sup>17</sup> No kaspangarigan ey waray toon kostoy biyag to, tan wara ngoy toon ebiteg, jet saja sakey ya toon kostoy biyag to, amta to ey sajay ya ebiteg,

maligdigat, ita et mangon ikowan to ey wáray semek to son Apo Shiyos ket eg to met kaasi-an i kait to? <sup>18</sup> Si-kayon naka ikarin annak ko, say semek tayo koma shi kait tayo, aliwén sota notnotnot ono esel bengat ja emedepod bongot, no diket mesepol la podnon semek ja wáray maykaasi shi eshom.

*No ensemek tayo i kait tayo, wára ngoy shinel tayo ja mengshew son Apo Shiyos ni tolong*

<sup>19</sup> No wáray semek tayo so ni eshom, sotan i amta-an tayo so ey wára kito son Apo Shiyos ja kedepo-i ni podno, jet enshi may shanag tayo no ewaten shakito nen Apo Shiyos ono enshi. <sup>20</sup> Jet angken bilang ey dekna-en tayo nem sina-shom ey ngaaw kiton too, eg kito koma meshanagan. Wara kito ngoreshan son Apo Shiyos. Engatngato ngoreshan si Apo Shiyos jet amta ton emin i wáred poso tayo, no mapteng ono ngaaw. <sup>21</sup> Nem no bilang ey enshiy dag-en tayon ngaaw, enshiy dekna-en tayon embalaw shorog ni bakdang tayo, isonga mapmapteng pay, ta eg kito onbaing son Apo Shiyos. <sup>22</sup> Jet no mengshaw kito son si-kato ni angken nganto, i-akan toy kekshawen tayo, ta tayoka pati-a i bilin to, tan tayoka dag-a i piyan to. <sup>23</sup> Jet say bilin nen Apo Shiyos, kowan to ey mesepol la pati-en tayo i ngaran nonta Anak ton si Jesucristo, tan mesepol la ensemek tayoy kait tayo. Jet angken si Cristo, sajay met laeng i inbilin to son si-katejo. <sup>24</sup> Sota ira ememati ni bilin nen Apo Shiyos, si-karay wára son Apo Shiyos, jet si Apo Shiyos, wára ngo son si-kara. Say amta-an tayo so ey si Apo Shiyos ket wára ni olay son si-katejo, wára sota Ispirito Santo to ja nan-nyan son si-katejo ja edapo son si-kato.

## 4

*Iyay i pengilesinan jo ni podno tan o-owap*

<sup>1</sup> Si-kayon kait kod pamati ja ensemek ko, karejo iba-ngat ja pati-en i kompormin too ja ikowan to ey sota Ispirito Santo nen Apo Shiyos i kedepo-i ni toka itoro. No diket ashal jo nin no agpayson edapo son Apo Shiyos, tep eshakel iray ma-o-owap ja kowan sha ey si Apo Shiyos i engibetkag son si-karen mengitosh. Jet si-karay naywáris shi emin na dogad. <sup>2</sup> Nem sajay i amta-an jo so no agpayson wára sota Ispirito Santo nen Apo Shiyos son si-kara ono ayshi: sota ira mengitosh ey si Jesus, si-kato sota inbetkag ali nen Apo Shiyos, ja nay-anak ja too, si-karay podnoy toro sha, ja wáray Ispirito Santo nen Apo Shiyos son si-kara. <sup>3</sup> Nem sota ira aliwén sajay i shaka itoro, enshiy Ispirito Santo nen Apo Shiyos son si-kara, no diket si-kara sota kawad-an ni ispiriton makakontra son Cristo. Intenengan jon wára di sota makakontra son Cristo, jet niman wára ira ma ja naywáris shiya dobong.

<sup>4</sup> Nem si-kayon naka ikarin annak ko, wares Apo Shiyos son si-kayo, isonga inebak jo ira jay; eg kayo na-awis. Ta si Apo Shiyos ja wára son si-kayo, makedkedsang nem say si Satanas ja wára so nonta ira karakdan shiya dobong ja eg emati. <sup>5</sup> Saja o-owap i toro sha, nay-eshom ira shima wáred ja dobong ja makakontra son Apo Shiyos. Isonga sota toro sha ngo, inges to sota nemnem nonta nay-eshoman sha. Jet sota karakdan shiya dobong, pipiyan shen itenengan sota kaikokowan ngo ira nonta o-owap i toro sha. <sup>6</sup> Nem si-kami i shinotokan nen Apo Shiyos ja mengitosh ni podno, jet sota ira maka-

amta ngo son Apo Shiyos, shaka pati-a iya kowan mi. Nem sota ira eg memati son Apo Shiyos, endedamsis sha iyay. Isonga sajay day pengilesinan tayo no sipay kawad-an ni Ispirito Santo nen Apo Shiyos ja podnoy toro to, tan no sipay o-owap i wára son si-kato.

*Si Apo Shiyos, inpa-sas toy semek to son si-katejo jet sesmeken tayo ngoy kait tayo*

<sup>7</sup> Si-kayon ensemek ko, mesepol la wáray semek tayo ni olay so ni kait tayo. Ta say edapo-an ni semek, si Apo Shiyos. Isonga sota ensemek toy kait to, si-karay podnon maka-amta son Apo Shiyos jet si-karay annak to. <sup>8</sup> Sota enshiy semek to ni kait to, eg to amta si Apo Shiyos, ta si Apo Shiyos, poro semek i wára son si-kato. <sup>9</sup> Say amta-an tayo so ey ebadeg i semek nen Apo Shiyos son si-katejo, sajay. Inbetkag to ali sota sesakey ya Anak to shiya dobong, say mewad-an kito nonta biyag ja enshiy to engintegangan, pangkep nonta inkatey tod koros. <sup>10</sup> Owen, say itsora nonta mapteng nga semek ka kowan ko la son si-kayo, aliwén inges to sota semek tayo son Apo Shiyos, no diket sajay sota ebadeg ga semek nen Apo Shiyos son si-katejo, jet say ka-amta-an to, inbetkag to ali sota Anak to shiya dobong ja etey shi koros, say ma-omas i basol tayo.

<sup>11</sup> Si-kayon ensemek ko, nem-nem jo sota inpasing nen Apo Shiyos ni semek to son si-katejo; isonga mesepol ngon onoran tayo ja sesmeken tayo i kait tayo.

<sup>12</sup> Enshi pay nin i toon engasas son Apo Shiyos, nem no ensemek tayo i sakey tan sakey son si-katejo, si Apo Shiyos, wára ngo son si-katejo. Jet mebedin na singa asen ni eshom i itsora nen Apo Shiyos,

ta sota semek tayo, wáray nay-ingesan to shi semek to.

<sup>13</sup> Say kabol la tayoka penigorado-i ey wára kito son Apo Shiyos, tan wára ngo si Apo Shiyos son si-katejo, sota inpan-iyen ni Ispirito Santo to son si-katejo. <sup>14</sup> Isonga amta tayo ey sota Anak nen Apo Shiyos ja inbetkag to di, si-katoy mengisedakan ni emin na tood ja dobong. Inon-an min mismo jet si-katoy mika ikokowan so ni totoo. <sup>15</sup> Jet no sipay toon ememati ey si Jesus ket Anak nen Apo Shiyos, si-karay kawad-an nen Apo Shiyos, tan wára ngo ira son si-kato. <sup>16</sup> Jet sajay i in-amta-an tayo so ey si Apo Shiyos, ebadeg ngoreshan i semek to son si-katejo, jet pinati tayo ma.

Si Apo Shiyos, poro semek i wára son si-kato, isonga sota toon wára ni olay i semek to ni kait to, wára son Apo Shiyos, tan si Apo Shiyos, wára ngo son si-kato. <sup>17</sup> Isonga sota semek ja inamta-an tayo, si-kato sota semek ja enshiy kolang to. Jet angken onsabi ali sota akew ja pengigsheng nen Apo Shiyos no sipay maysedakan, wáray shinel tayo, enshiy tayo panshanagan, ta angken niman shiya dobong, wáray semek tayo so ni kait tayo ja inges tos Cristo. <sup>18</sup> No wáray semek tayo so ni kait tayo, enshiy takot tayo. Ta sota shinel son Apo Shiyos ja wára son si-katejo no ensemek tayoy kait tayo, si-katoy kaondingding ni takot. Sota wáray takot to, kolang i semek to, ta say kabol la ewára-an ni takot to, wáray basol ton ikaro to.

<sup>19</sup> Si Apo Shiyos i epangdon wáray semek to son si-katejo, isonga wára ngoy semek tayo. <sup>20</sup> No kaspangarigan ey wáray toon mengikowan ey ensemek tos Apo Shiyos, nem en-oges to kariy kait to, sajay ya too, ma-o-owap.

Ta kas-ano karin waray semek to son Apo Shiyos ket eg to inon-an? Nem sota kait ton toka as-asa ni olay ket, en-oges to! <sup>21</sup> Nemnem jo sota bilin nen Cristo son si-katejo, ja kowan to ey, “No sipay toon waray semek to son Apo Shiyos, mesepol ngon ensemek toy kait to.”

## 5

<sup>1</sup> Sota ira ememati ey si Jesus, si-kato sota inbetkag ali nen Apo Shiyos shiya dobong, si-karay podnon annak nen Apo Shiyos, jet sota ira waray semek to son Apo Shiyos ja Maka-anak son si-kara, wara ngoy semek sha so nonta kait shen annak to. <sup>2</sup> Say amtan tayo so ey ensemek tayoy kait tayan annak nen Apo Shiyos, no tayoka pati-a i bilin to. <sup>3</sup> Say ka-asan ni semek tayo son Apo Shiyos, sota pemati tayo ni bilin to. Jet sajay ya bilin to, aliwen edigat ta mepati, <sup>4</sup> ta si-katejon annak nen Apo Shiyos, si Apo Shiyos i ontolong son si-katejo tep waray pamati tayo son Cristo. Isonga eg kito ontolok ja ma-ebak ja mandeka ni ngaaw ja inges toy kedagdag-a ni karakdan na tood ja dobong. <sup>5</sup> Enshiy eshom ma makabaal ja mengebak ni olay nem eg ira sota ememati ey si Jesus, si-kato sota Anak nen Apo Shiyos.

*Sota kabol ni kepenigorado-i ni emati son Cristo*

<sup>6</sup> Sajay ya si Jesucristo, dimaw ali shiya dobong, jet nonta indaw to ali, ebonjagan ni shanom, tan imayos i shaletto ni inkatey tod koros. Eg maykowan ey shanom bengat i takshol to ni indaw to di, no diket naytakshol pay son si-kato sota shala. Jet sota Ispirito Santo nen Apo Shiyos i emengikowan ey podno iyay, ta sotan na Ispirito Santo, podnon emin i wara son si-kato. <sup>7-8</sup> Isonga

waray tedo ja sesakey i kowan sha pangkep son Cristo, jet sajay ira sota tedo: sota Ispirito Santo nen Apo Shiyos, sota shanom, tan sota shala, jet saja tedo, nan-inges i kowan sha. <sup>9</sup> No tayoka pati-a i kowan ni too pangkep ni inon-an sha, mas epatpateg pay i kowan nen Apo Shiyos, jet say inkowan to maypangkep son Jesus, kowan to ey, “Si-katoy Anak ko.” <sup>10</sup> Jet sota ememati so nonta Anak nen Apo Shiyos, sajay ngoy shaka nemnemnema; nem sota ira eg memati, enshi, eg sha nemnemen. Ta eg sha pinati sota kowan nen Apo Shiyos maypangkep so nonta Anak to. Jet singa si Apo Shiyos et ngo mowan i kowan sha ey ma-owap. <sup>11</sup> Jet sotan na kowan nen Apo Shiyos, ja mesepol la pati-en, kowan to ey waray in-akan ton biyag son si-katejo ja enshiy to engintegan, jet sajay ya biyag, may-ekan bengat so nonta ira memati son Jesus ja Anak to. <sup>12</sup> Isonga sota ira memati son si-kato, wara son si-kara iyay ya biyag, nem sota ira eg memati son Jesus ja Anak nen Apo Shiyos, enshi son si-kara iyay ya biyag ja enshiy to engintegan.

*Sota esa-nopan ni inkowan ko la*

<sup>13</sup> Insolat ko la iyay son si-kayo ja emati so ni ngaran nen Jesus ja Anak nen Apo Shiyos, say penigorado-an jo ey si-kayo, waray biyag jon enshi to engintegan. <sup>14</sup> Asan sakey pay ja piyan kon penigorado-an jo, sota maypangkep ni panshewat jo son Apo Shiyos. Ta no manshewat kito son Apo Shiyos, sintilen to, no maykompas nodta piyan ton medeka. <sup>15</sup> Siya, toka sintila i shawat tayo; isonga sota ibaga tayo son si-kato, amta tayo ey i-akan to.

<sup>16-17</sup> Emin na ngaaw wa aramid ja dag-en ni too, maybidang ey

basol. Nem eg nan-i-inges i pengikesho ni basol. Iman i eshom ma basol ja aliwen patey ingkatod ingka i pantongpalan to. Nem wara ngoy eshom ma basol ja patey i pantongpalan to. Isonga no waray inon-an jon nanbasol ja agi jod pamati, ikshawi jo son Apo Shiyos ni kaasi, no sotan na basol to ket, aliwen patey i pantongpalan to. No sotan i dagen jo, si Apo Shiyos, biyagen to sotan na agi jo. Nem sota eshom ma basol, ja patey i pantongpalan to, aliwen sotan i kowan ko ey ishawatan jo son Apo Shiyos.

<sup>18</sup> Amta tayo ey si-katejon annak nen Apo Shiyos, inbi-jag tayon manbesol ma, ta si Jesucristo ja Anak nen Apo Shiyos, si-katoy emengitoshong son si-katejo shi mapteng. Jet si Satanas, enshiy pesing ton onsharal son si-katejo.

<sup>19</sup> Amta tayo pay ey wara kito son Apo Shiyos, nem saja intiron dobong ja naydaokan tayo, tinnigel nen Satanas.

<sup>20</sup> Jet amta tayo pay ey sota Anak nen Apo Shiyos, dimaw ali shiya dobong jet engi-kan son si-katejo ni koston pannemnem say ewatan tayo i maypangkep son Apo Shiyos, ey si-kato i podno. Jet say kawad-an tayo ma niman, sota podnon Shiyos, tan si Jesucristo ja Anak to. Sajay i podnon Shiyos, ja emengi-kan ni biyag ja enshiy to engintegan.

<sup>21</sup> Niman si-kayon naka ikarin annak ko, tanshaaniyo; baka wara iray aliwen podnon Shiyos ja pati-en jo. Siya, satan da.

## SOTA MAYKADWEN SOLAT NEN SAN JUAN

<sup>1</sup> Si-kak i sakey ya kalekayan nodta emati son Cristo, jet sajay ya solat ko, para son si-kam ma shinotokan nen Apo Shiyos, tan para so nonta ira annak mo. Podnon ensemek takejon emin jet aliwen si-kak bengat, no diket emin ira sota maka-amta ni podno, waray semek sha ngo son si-kayo. <sup>2</sup> Isonga ensemek mijejo ta wara son si-katejon emin i podno et sajay i wara ni olay son si-katejo.

<sup>3</sup> Sapay koma ta ma-shoman ali son si-katejo sota tolong, kaasi, tan talna, ja wara son si-katejo ja edapo so nen Apo Shiyos, ja Ametayo tan si Jesucriston Anak to. Siya, sajay komay ma-shoman say wara kito ni olay shi podnon pamati tan say wara ni olay i semek tayo ni sakey tan sakey.

*Iyay i ibilin ko tan ibanshaan ko son si-kayo*

<sup>4</sup> Ebadeg ga pasiya i indeng ko, ta waray inon-an kon annak mo ja ememati ni podnon pamati, ja inonod sha i inbilin nen Apo Shiyos son si-katejo. <sup>5</sup> Niman, iyay pay i piyan kon ikowan son si-kam ma biin pinidi nen Apo Shiyos. Jet sajay sota sigod ja bilin nen Cristo ja intenengan tayo, manipod nonta pilmiro, ja kowan to ey mesepol la waray semek tayo ni sakey tan sakey. Enshiy nak isolat ja badon bilin. <sup>6</sup> Jet say ka-asan ni semek tayo son Apo Shiyos, mesepol la pati-en tayo sota inbilin to. Jet say inbilin to, ja intenengan tayo manipod nonta pilmiro, mesepol la mansinemek kitejo ni olay.

<sup>7</sup> Tanshaani jo, tep baka et ey may-owapan kayo. Ta eshakil ired ja dobong i eg memati ey si Jesucristo, dimaw alin nanbalin ja too. Sajay ira sota ma-owap ja makakontra son Cristo. <sup>8</sup> Isonga mesepol la tanshaanan jo, say eg onkawas sota nandigatan tayo pangkep ni pamatiyo. Piyan kon ewaten joy konkona ni nandigatan tayo.

<sup>9</sup> Sota eg meki-onod nonta koston toro nen Cristo, ja toka da-to-i, enshis Apo Shiyos son si-kato. Nem sota ka-onong shi koston pamati son Cristo, wara son si-kato si Apo Shiyos ja Ama, tan si Jesucriston Anak to. <sup>10</sup> Niman, no waray ondaw son si-kayo ja apil i itoro to, ja aliwen inges toy toron Cristo, karejo peskep shi baley jo, ono karejo sintilen. <sup>11</sup> Sajay i kabol la inkowanan ko so niyay, ta no sintilen jo, singa nayda-kam kayo nodta ngaaw wa aramid to.

<sup>12</sup> Eshakil pay i piyan kon ikowan son si-kayo, nem ekak koston isolat ta emin, ta waray namnamak ka ondaw den man-bisita son si-kayo jet mismon mantatabtabal kitejo, jet say ma-enay i dadsak tayan emin.

<sup>13</sup> Sota annak ni agim na biin shinotokan nen Apo Shiyos, inkowan sha ey pekikowan kod ja solat koy semek sha son si-kam.

## SOTA MAYKATDON SOLAT NEN SAN JUAN

<sup>1</sup> Si-kak i sakey ya kalekayan nodta emati son Cristo, jet sajay ya solat ko, para son si-kam Gayo, ja podnon ensemek ko.

<sup>2</sup> Si-kam ma kajem ko ja ensemek ko, amtak ey mapteng i wared nemnem mo, ja wara ni olay son si-kam si Apo Shiyos. Jet say shawat ko ngo son si-kato, sapay koma ta mapteng ngo ni olay i bakdang mo, tan emin na dag-en mo, mapteng komay panbenagan sha. <sup>3</sup> Ebadeg ga pasiya i imdeng ko, ta waray agi tayon mimotok alin edapo son si-kayo, jet si-karay engikowan ali son si-kak ey agpayson kaka mematin pasiya ni olay ni podno maypangkep son Cristo, tan moka i-anam i moka panbibiyag. <sup>4</sup> Enshiy eshom ma mengi-kan ni ebadeg ga pan-imdengan ko nem eg sota intenengan kon shamag maypangkep son si-kayon annak kod pamati, ja kowan sha ey kayoka memati ni podno.

*Itodtodoy moy moka penintil ni kait shi pamatin kaonmotok shitan*

<sup>5</sup> Si-kam ma ensemek kon kajem ko, mapteng nga pasiya i inpasing mon enintil nonta agi tayod pamati. Angken eg mo pay ira iningsa-an sota eshom, siningpet mo ira. <sup>6</sup> Jet sotan ira diy mismon engi-istoriya son si-kak nonta mapteng nga inpasing mo, ja ka-asan ni ebadeg ga semek mo son si-kara. Inkowan sha iyay nonta inpakisa-nop sha son si-kamin ememati son Cristo shiyay. Mapteng itan na inpasing mo jet no itoloy mon ontolong son si-kara, si-katoy mengi-kan ni pan-imdengan ngo nen Apo Shiyos. <sup>7</sup> Si-kara, indekjas shay

ili sha, ja en mengikowan ni maypangkep son Jesus shi toton eg pay laeng memati son si-kato. Isonga mapteng i inpanintil mo son si-kara tep eg mebedin na mengshaw ira ni tolong so ira niya toon eg pay laeng emati. <sup>8</sup> Isonga mesepol la ontolong kito son si-kara ni kasapolan sha, say maydakam kito nodta obdara ni shaka pengikowan ni podnon pamati.

<sup>9</sup> Waray solat ko so nonta ira kait mod tan ja ememati met laeng son Cristo, nem si Diotripis, eg to pag-an-ano i kowan mi, endedamsis to. Say piyan to, ampet ta si-katoy ma-onoran. <sup>10</sup> Isonga no ondawak da, waray ikowan ko son si-kayo maypangkep ni inpasing nen Diotripis son si-kak. Epaladoy inpangi-istoriya to maypangkep son si-kak. Nem aliwen sajay bengat pay i aramid to: eg to pay sintilen no waray onmotok shita kad-an jo ja agi tayod pamati, tan toka iparit pay i eshom ja menintil son si-kara. Sota ira menintil, toka pay pan-a-kala; eg to itolok ja mekisanop ira nodta kait ta emati son Cristo.

<sup>11</sup> Si-kam ma kajem kon ensemek ko, karam onoran mango iyay ya ngaaw wa aramid to, no diket say onoran mo, sota mapteng. Sota mapteng i aramid to, wara son Apo Shiyos. Nem sota ngaaw i aramid to, enshiy Shiyos to.

<sup>12</sup> Si Demetrio i sakey ya onoran jo. Eshakel i emengikowan ey mapteng i aramid to, jet say kasaan to, sota in-onod to so ni podno. Jet angken si-kami, mika ikowan ey agpayso ja mapteng i aramid to et amtayo met ey say mika ikowan, podno.

<sup>13</sup> Eshakel pay i piyan kon ikowan son si-kam nem ekak koston isolat ta emin. <sup>14</sup> Waray namak ka ondaw shagos ja man-

bisita da son si-kam et mantabtabal kita ja mismo.

<sup>15</sup> Sapay koma ta wára ked talna. Saja ira emin na makamta son si-kam shiyay, kowan sha ey pekikowan koy semek sha son si-kam. Jet pekikowan mo ngoy semek mi so nonta ira emin na am-anta mid tan.



## SOTA SOLAT NEN SAN JUDAS JA AGI NEN SANTIAGO

<sup>1</sup> Si-kak si Judas ja agi nen Santiago. Sajay ya solat ko, para son si-kayon emin na toon pinidi nen Apo Shiyos ja Ametayo ja nanbalin ni too to. Si Apo Shiyos, ebadeg i semek to son si-kayo, isonga si-kato met laeng i mengajowan son si-kayo, ingkatod on-daw ali si Jesucristo.

Si-kak i sakey ya shinotokan nen Jesucristo ja mansilbi son si-kato, isonga itnengi jon pasiya iya ikowan ko.

<sup>2</sup> Say shawat ko son Apo Shiyos, sapay koma ta sota kaasi, talna, tan sota semek nen Apo Shiyos ja wára son si-kayo ja edapo met laeng son si-kato, sotan ni olay komay ma-shoman.

*Karekayo pai-owap so ni toon apil i toro sha*

<sup>3</sup> Si-kayon ensemek ko, is-tay piyan kon pasiya ja manso-dat son si-kayo pangkep nonta inkaysalakan tayo ja pineshasan tayon emin ja emati. Nem niman, binediwan koy piyan kon isolat. Epilitanak ka mengadok son si-kayo ey mesepol la eg jo i-onod ja mesa-datan i pamatiyo. Ta saja pamati tayo, in-akan nen Apo Shiyos son si-katejon too to, jet eg mesepol la ma-shoman ta kompli-ton sigod, wáren emin. <sup>4</sup> Sajay i naka pan-i-adok ta wára iray toon nandibas ja nay-eshom son si-katejon emati, jet apil i toro sha maypangkep nonta kaasi nen Apo Shiyos. Say kowan sha, si Apo Shiyos, manangaasi, isonga angken memii kito kono ono mek-ileki, eg shakito shosa-en nen Apo Shiyos. Eg sha pay pati-en ey si Jesucristo, si-kato bengat i Apo

tayo. Sajay iren itsora ni tooto, si-katoy kaytoshongan nonta nay-padto nonta bayag da ja kowan to ey say toshongen sha, shima dogad ja insagana nen Apo Shiyos ja shosa-an.

<sup>5</sup> Amtak met kitdi ey amtayon emin iyay, nem say piyan ko, eg jo koma dibdibkan ey sota epasemak da nonta bayag ket si-katoy on-banshaan son si-katejo. Nemnem jo kari sota epasemak shi tootoon intorayan nen Moises. Siya, in-salakan nen Apo Shiyos ira say eg ira mandikat ta pasiya shi Egypt, nem shi ka-onoran, binono to met laeng ira sota eshom son si-kara ja bimakin eg timoloy ja emati.

<sup>6</sup> Tan nemnem jo pay kari ira sota anghil nen Apo Shiyos ja tinoy-an sha sota saad sha ja in-awat nen Apo Shiyos son si-kara et indekjas shay dangit ja dogad ja in-akan nen Apo Shiyos ja koston pan-inan sha. Isonga si Apo Shiyos, inpalaw to ira shima dogad ja nayshalem, ja embolinget, jet naybalod mala ired man ingkatod onsabi ali sota timpon inkesheng nen Apo Shiyos ja shosa-an to son si-kara. <sup>7</sup> Asan nemnem jo pay sota epasemak so nonta ira i-Sodoma, tan i-Gomora, tan angken pay sota ira nay-esop nodtan na dogad. Say dingkara, inges toy ngaaw wa aramid ira nonta anghil, ta say pipiyan shen dag-en, sota aliwén nebeng ja medeka. Ta indowam sha malay pengeshem ja en-oges nen Apo Shiyos. Isonga si Apo Shiyos, shinosa to ira ja inpalaw toy apoy son si-kara. Sajay i banshaan so ni emin na tooto say disi-an sha koma sota apoy ya eg ma-ma-shep.

<sup>8</sup> Jet angken saja too niman ja makakowan ey a-aki tayo shi pamati nem kinapodno to ket en-shi kari, inges to met laeng i aramid sha. Naytopoy nemnem sha isonga may-eshig ey si-kara

met laeng i dimo-shis ni bakdang sha, ta ngaaw i aramid sha. Asan endedamsis sha pay sota ira toray ja insaad nen Apo Shiyos, tan ngaaw i shaka ikokowan maypangkep nonta pinalsowa ton anghil shi dangit. <sup>9</sup> Edabas i esel la shaka ikokowan, nem sinto pay si Miguel ja kapitan ni anghil nen Apo Shiyos, nonta nansongbat ira nen Satanas no sipay mengeda ni etey ya bakdang nen Moises, eman-annad si Miguel ja mengikowan ni ngaaw wa esel son Satanas. Jet say inkowan to bengat, “Si Apo Shiyos, si-katoy maka-amten memidin son si-kam!” <sup>10</sup> Nem sajay iren sinan a-aki tayo shi pamati, enshiy annad sha. No waray eg sha ewatan na kompormi, ngaaw ni olay i shaka ikowan. Wara mangoy amtara, nem say inpasing shen engamta, inges toy kepesing ni atap pa animal ja sota deknaray shaka pengashal. Jet sotan na inamtara, kepandadsaki ni bakdang sha; isonga sotan i kabol la keshosa-an sha.

<sup>11</sup> Kakaasi aliy kasesaad ira niyay ya too, ta say ogadira, inonoran shay aramid nen Kain nonta bayag da ja ngaaw, himaki ira ja inonoran sha sota aramid nen Balaam, ta pilak i shaka nem-nemnema, tan inonoran sha pay si Kora da nonta bayag, ta piyan shen da-pa-an sota inpangipangolo nen Apo Shiyos shi totoo to. Jet iso met laeng nga ingesen shes Kora ja meshosa. <sup>12</sup> Sajay iren sinan a-aki tayo shi pamati, no mekilikob ira son si-kayo ni joka pangan ja penginemneman jo so nen Cristo, may-eshig ira ey dogit ira ja naydaok nodtan na joka pankena. Ta no may-a-shom ira ja mekipangan son si-kayo, say shaka kamkamkami bengat, sota kepsel sha, tan enshi pay i bebaing sha. Sajay iren

too, may-eshig ira nodta kolpot ja kaitektekjab ni shagem ja enshiy to inegshi-an ja oran. May-eshig pay ey singa iren sota molen eg ondames, angken na timpo komen pandemes to. Singa pay iren sota molen ekabot ja ekigebot ta emin ali sota damot to, jet oltimon patey to ma, ja eg onbengis mowan. <sup>13</sup> May-eshig pay ey singa ira sota sipjak ni shanom ja emenginoli shima naykilig ni baybay, ja toka pan-iwakdin sota ensekig shima naykilig. Singa pay iren sota talaw shima naykayang ja eman-intan; isonga eg panshingan. Sajay iren itsora ni too, waray dogad ja embolinget ja insagana nen Apo Shiyos ja keshosa-an sha ingkatod ingka.

<sup>14</sup> Si Inok ja maykapiton apo nen Adan ja pilmiron too nonta bayag da, waray inpadto to jet sajay iren too i kaytoshongan to. Kowan nonta padto to ey,

“Asas jo, ondaw ali si Apo Shiyos jet odopen to aliy dinibon anghil to. <sup>15</sup> Jet ikesheng toy panbenagan ni emin na too ingkatod ingka: shosa-en to ira sota toon ngaaw i aramid sha, tan sota toon ngaaw i shaka ikokowan pangkep son si-kato.” Kowan nen Inok. <sup>16</sup> Sajay iren sinan a-aki tayo shi pamati, magotot ira jet shaka pay ikotot si Apo Shiyos pangkep nonta kowan sha ey ngaaw wa kasat sha. Say pipiyan shen dag-en, sota kompormin edogit ja nemnemen sha. Ampet shaka ilastog i kompormin wara son si-kara, tan edaing iren mengi-kan ni en-amis sa esel so ni toon namnama shen waray konoren sha son si-kato.

*Nemnem jo ni olay sota naytoro son si-kayon mapteng nga ogadi*

<sup>17</sup> Nem si-kayon ensemek ko, nemnem jo sota intenengan jon inpadto ira nonta kait kon apostol

nen Apo Jesucristo, <sup>18</sup> ja kowan sha ey, “Shi ka-onoran alin timpo, waray toon mengitoshon ali ja dedamsisen sha ira sota emati son nen Jesucristo, ta say pipiyan sha bengat ta dag-en, sota ngaaw wa pangkep sha.” Sajay i padtora. <sup>19</sup> Sajay iren too, si-karay mengikan ali ni eg pan-i-inawatan ni si-katejon emati, ta enshi sota Ispirito Santo nen Apo Shiyos son si-kara. Isonga say wara bengat shi nemnem sha, sota inges ni nemnem ira nonta karakdan shima dobong ja memati son Apo Shiyos.

<sup>20</sup> Nem si-kayon ensemek ko, say kowan ko son si-kayo, pantitnolong kayo say onkedsang i pamatiyo ja in-awat nen Apo Shiyos. Panshawit kayo ni olay son si-kato jet i-onod jo i pesing ni Ispirito Santon mengitoshong son si-kayo ni joka panshewat. <sup>21</sup> Karejo pay dibdibkan sota ebadeg ga semek nen Apo Shiyos son si-kayo. Anosiyon mansessesked ni idaw ali mowan nen Jesucristo ja Apo tayo, ta kaasi-an shakito di ja i-aknan shakito ni biyag ga enshiy to engintegan.

<sup>22</sup> Sota eman-showashowa maypangkep ni sajay, itod-iyo ira say ewatan sha. <sup>23</sup> Itod-iyo pay ira sota eshom ni maypangkep son Cristo say memati ngo ira, say eg ira meshosa shima apoy ja manshedang ingkatod ingka. Waray eshom pay ja si-karay tanshaanan jo. Say kowan ko son si-kayo, semek jo mango ira jay, nem panannad kayo ta baka et ey ma-ewis kayo ngon mandeka ni ngaaw wa aramid ja inges toy aramid sha.

<sup>24</sup> Si Apo Shiyos bengat i makabaaal ja mengitoshong son si-kayo, say enshiy jo pankodangan ja kaybebaingan jo ingkatod onsabi kayo son si-kato shima kawadan tod dangit. Jet ebadeg i imdeng jo no onsabi kayod man. <sup>25</sup> Si-

katoy mengisedakan son si-katejo tep emati kito so nen Jesucristo ja Apo tayo. Angken sipa, enshiy maka-inges son Apo Shiyos: si-katoy Kangeto-an, kakedangan son ni emin na toray, enshiy eshom. Ebadeg i panakabalin to ngo eshan, angken nonta eg pay laeng epalsowa iya dobong, isonga si-katoy sigod ja emayshedshedjaw nontan da ingkato niman et ingkatod ingka. Siya, satan da.

**SOTA  
INPA-AMTA NEN  
JESUCRISTO  
SO NEN SAN JUAN JA  
MEPESAMAK ALI**

<sup>1</sup> Saja naysolat shiyay ya dibsho, si-katoy inpa-amta nen Jesucristo maypangkep ni mepesamak alin shagos. Istay ya enshiy maka-amta so, nem inpa-amta nen Apo Shiyos iyay so nen Jesucristo, say ipa-amta to ngo son si-katejon emansilbi son si-kato. Jet inbetkag to sota anghil to ja to ngo ipa-amta ali son si-kak ja emansilbi son si-kato. <sup>2</sup> Jet si-kak, insolat kon emin sota inon-an ko ja inpa-amta nen Jesucristo, tan sota inkowan nen Apo Shiyos. <sup>3</sup> Jet sota toon mengibasa so niyay ya padto, bin-disiyonan ira nen Apo Shiyos, tan angken ngo pay sota mengitneng, no pati-en sha. Ta say timpon ketongpal niyay, shanshani ma.

<sup>4-5</sup> Si-kak si Juan ja mismon makasolat niyay et sajay ya solat ko, si-kak i engisodat para son si-kayon piton gropo ja emati son Cristo shi piton siyodad shi Asiya.

Say shawat ko son Apo Shiyos, sapay koma ta sota kaasi, tan talna ja edapo son si-katon wára son si-kayo, si-katoy ma-shoman. Si Apo Shiyos, si-kato sota sigod ja wára ngo eshan, ingkato niman et si-kato met laeng aliy ondaw shi ma-onod ja timpo no mantepos iya dobong. Sota Ispirito Santo nen Apo Shiyos, ja eg nagshengan i kabedinan to, ja wára nodta sango-an ni tinongawan to, tan si Jesucristo, sapay koma ta si-kara met laeng i mengi-kan ni kaasi tan talna son si-kayo. Si Jesucristo, agpayso i toka ikowan, tan si-kato, nanbiyag alid patey, isonga si-katoy singa pangodowan tayon

emin ja manbiyag shi patey. Si-kato pay i mengitoshay so nonta ira emin na ari shiya dobong.

Si Jesucristo, imayos i shaletu ni inkatey to shi koros pangkep nonta ebadeg ga semek to son si-katejo et sotan i kabol la epakawanan ni emin na basol tayo. <sup>6</sup> Si-kato met laeng i engikowan ey may-eshig kito konon singa arin emin, tan parin emansilbi so nen Apo Shiyos ja Ameto. Jet si Jesucristo, angken sipa, enshiy maka-inges son si-kato tep si-katoy kakedsangan so ni emin na toray ingkatod ingka, enshiy eshom. Siya, satan da.

<sup>7</sup> No ka-onoran alin timpo, ondaw mowan ali ja metaksholan ni kolpot et emin na too, tan angken pay sota toon timebek son si-kato nontan da, asen sha. Jet emin na tood ja dobong, onnangis ira ni daringit sha. Siya, sajay aliy medeka.

<sup>8</sup> Say kowan nen Apo Shiyos, "Si-kak sota kowan sha ey Alpa tan Omiga, ono sota shoki-an to tan engintegangan to." Kowan nen Apo Shiyos ja Manakabalin. Si-kato sota sigod ja wára ngo eshan ingkato niman et si-kato met laeng sota ondaw mowan ali shi ma-onod ja timpo, ja pantepos niya dobong.

*Sota esel ja intenengan nen Juan, tan sota inon-an to*

<sup>9</sup> Si-kak si Juan ja kait jon emati son Jesus. Nan-i-inges kiton man-enos ja mekila-kam ni digat, nem angken tep nan-i-inges kiton mekitewid ni pantoshayan ali nen Jesus. Say sakey ya digat kon dina-kaman ko nontan da, inpalaw sha-ak shima ootik ka dogad ja naykawa shi baybay, ja kowan sha ey Patmos, tep kabol ni katoded kon engitoshu nonta esel nen Apo Shiyos maypangkep so nen Jesus.

<sup>10</sup> Jet nonta wára-ak shiman, nay-tompong ni akew ni Domingko, ja akew wa panshedjawan son Apo Jesus et inshalan towak ni Ispirito Santo nen Apo Shiyos; isonga nontan, wáray intenengan kon makedsang nga esel shi petek ni beneg ko ja singa trompita i kakedsang to, <sup>11</sup> ja kowan to ey, “Emin iya asen mo ali, isodat mod dibsho et ipaw-it mo so nonta ira esa-nop pa emati shima piton dogad. Jet sajay ira sotan na dogad: Ipiso, Simirna, Pirgamom, Tiyatira, Sardis, Piladilpia, tan Laodisia.”

<sup>12</sup> Nanposiposak ta piyan kon asen sota eman-a-sel et wáray inon-an kon piton balitok ja sagpatan ni kingki. <sup>13</sup> Jet nodta naykawa ja kad-an ira nonta kingki, wáray inon-an ko ja singa sota kowan sha ey Anak ni Too. Edayag i baro to, tan ebedbeshan pay i pagew to ni balitok. <sup>14</sup> Sota toktok to tan bowek to, empotin pasiya ja singa sota poti nonta shotshot ni kalniro ja inapotira, ono sota poti ni angshap. Sota mateto ngo, singa shalang ni apoy i itsora to. <sup>15</sup> Sota sedi to, singa dining ni boronsi ja enalshang shi apoy et sota kedsang ni esel to, singa bongog ono kiyas ni eshakil la shanom. <sup>16</sup> Shi kanawan na takday to, wáray piton talaw wa inegshi-an to. Jet shi bongot to, wáray singa kampilan ja nanbangi i tarem to. Emenenili pay i dopa to ja singa sota akew nem alasdosi ma.

<sup>17</sup> Jet nonta in-asas ko so niyay, nanshomogak shi sango-an to ja singa eteyak nodtan. Nem insakpal toy kanawan na takday to son si-kak, ja kowan to ey, “Kareka ontakot; si-kak sota sigod ja wára ngo eshan et enshiy en maysa-dat son si-kak. <sup>18</sup> Si-kak sota wáray biyag to! Agrayson eteyak, nem nan-ongalak et ekak ma metmetey

ingkatod ingka. Si-kak i engegshi nonta tolbek ja mengilokat nonta dawán ira nonta nanketey. Tan si-kak pay sota wáray kabedinnan ton mengeda ni biyag ni too, nem mebedin na panbiyag ko ali mowan shi patey. <sup>19</sup> Jet niman ma, say ikowan ko son si-kam, isodat mon emin iya inon-an mon emankepasemak niman tan sota on-an mo alin mepesamak shi maonod ja timpo. <sup>20</sup> Say olog nonta piton talaw ja inon-an mo shi kanawan na takday ko, tan sota piton sagpatan ni kingki ja balitok, sajay. Sota piton talaw, si-karay may-eshig nodta ira piton emengajowan ira nonta emati shima piton dogad et sota piton sagpatan ni kingki, si-kara met laeng sota emati son Jesus ja emesa-sa-nop nodta piton dogad.

## 2

*Sota bilin ja para so nonta sanseskey ja piton gropo ja emati*

<sup>1</sup> “Iyay i ikowan ko so nonta pangolo ni emati shiya piton dogad tep si-karay emengajowan. Jet say isolat mo so nonta pangolo ni emati shi Ipiso, sajay: ‘Iyay i esel la kowan nen Apo, ja engegshi nonta piton talaw shi kanawan to, tan emenginoli nodta nankinawan ni piton sagpatan ni kingki ja balitok. <sup>2</sup> Kowan nen Apo son si-kayon i-Ipiso ey, “Si-kak, amtak ka emin i joka dagdag-a. Amtak i digat jo, tan sota anos jo. Amtak ey si-kayo, eg jo kosto sota toon ngaaw iray aramid to. Pineshas jon ibag-an sota ira kowan sha ey apostol la inbetkag ko kono et inamta-an jo ey ma-o-owap gayam ira. <sup>3</sup> Amtak ey joka en-enosin pasiya i digat ja simabi son si-kayo maypangkep ni inpamatiyo son si-kak et eg jo intolok ka bijagan sotan na pamatiyo. <sup>4</sup> Nem wáray naka bedawa son si-kayon

i-Ipiso. Eg jowak da ensemek ja inges to nonta pilmiro. <sup>5</sup> Isonga niman, nemnem jo sota mapteng nga kasesaad jo nontan et panbebawo kayo ma niman say may-odi. Daga jo met laeng sota dingkayo nonta pilmiro. Nem no eg kayo manbebawo, ondawak alin shagos et a-kalen ko sota inkaybilang jo shita Ipiso ey too takejo. <sup>6</sup> Nem waray mapteng nga eshom ma joka pesing, ta agpayso ja eg jo kosto sota ngaaw wa aramid ira nonta imonod son Nicolas ja emanshedjaw ni sinan shiyos. Ta angken si-kak, ekak kosto sotan na shaka pesing. <sup>7</sup> Singpet jon itenengan iya ikowan ni Ispirito Santo nen Apo Shiyos so nonta ira emati. Jet sota mengenos ni digat, ja eg ma-ebak, si-karay maydakam ma mengan nonta dames ni kadasan na naymola shi kad-an nen Apo Shiyos, ja mengi-kan ni biyag.”’ Sajay day isolat mo para so nonta i-Ipiso.

<sup>8</sup> “Isodat mo ngo iya so nonta pangolo ni emati shi Simirna: ‘Iyay i esel la kowan nen Apo ja sigod ja wara ngoreshan ingkatod ingka, ja etey, nem nangingal mowan. <sup>9</sup> Kowan to son si-kayon i-Simirna ey, “Amtak iray digat jo; amtak ey ebiteg kayo, nem say podno, baknang kayo. Amtak sota ngaaw ja kaikokowan ira nonta Hodiyo son si-kayo. Nem si-kara, eg sha onoren si Apo Shiyos, isonga singa aliwen Hodiyo ira; too gayam ira nen Satan. <sup>10</sup> Eg kayo koma metekot nonta digat alin da-kaman jo. Asas jo, ta si Satan, kowan to ey peshasen to no kas-anoy kedsang ni pamatiyo; isonga ibalod toy eshom son si-kayo shi badoran et pandikat shakejo ni sampolon akew. Nem anosiyo ja angken na metey kayo, ta say sobadit ni kamos jo, i-aknan takejo ni biyag ja

enshiy to engintegan.”’ <sup>11</sup> Isonga singpet jon itenengan iya kowan ni Ispirito Santo nen Apo Shiyos so nonta ira emati. Jet sota ira mengenos ni digat, ja eg ma-ebak, eg sha da-kaman i maykadwen patey.” Sajay day isolat mo para so nonta ira i-Simirna.

<sup>12</sup> “Sajay ngoy para so nonta pangolo ni emati shi Pirgamom: ‘Iyay i esel la kowan nen Apo ja engegshi nonta kampilan na nanbangiy tarem to; kowan to ey, <sup>13</sup> “Si-kak, amtak i kawad-an jo. Naydaok kayo shima dogad ja intorayan nen Satan, nem kinitet jo sota pamatiyo son si-kak. Eg jo inbi-jag, angken nonta timpon inbono sha so nen Antipas da, ja na-anos den nansilbi son si-kak. Binonora shima ili jo ja baley nen Satan. <sup>14</sup> Nem si-kayo, waray eshom ma ogadiyo ja ekak kosto, ta sota eshom pay laeng son si-kayo, inonod sha sota toro nen Balaam nonta bayag da. Si Balaam nontan da, intod-an tos Balak, say si Balak ngoy mengi-kan ni panbesolan ira nonta tood Israel. Jet say nanbasolan sha, engan ma ira nonta naydaton shi sinan shiyos, tan emii pay ira. <sup>15</sup> Tan wara pay iray eshom son si-kayo ja imonod so nonta toro nen Nicolas, ja angken konon manshedjaw ira nodta sinan shiyos. <sup>16</sup> Isonga mesepol la a-kalen jo ira ja eg jo ma ibilang ira shi pamati. Ta no eg jo dag-en iya ma, ondawak den shagos et kobaten ko ira, ja osalen ko sota kampilan na wared bongot ko. <sup>17</sup> Isonga si-kayo, singpet jon itenengan sota panikowan ni Ispirito Santo nen Apo Shiyos so nonta ira emati. Sota ira mengenos ni digat, ja eg ma-ebak, i-aknan ko ira nonta tinapay ya kowan sha ey mana ja naysagana ja para son si-kara. Tan sota ngaran sha, mesa-datan. Isolot ko nodta empotin bato, et sajay

ya bato, i-akan ko son si-kara, jet angken sipa, enshiy maka-amta so ni ngaran shen bado, nem eg si-kara bengat ja imawat so.”’ Sajay day isolat mo para so nonta ira i-Pirgamom.

18 “Isodat mo ngo iyay para so nonta pangolo ni emati shi Tiyatira: ‘Iyay i esel la kowan nonta Anak nen Apo Shiyos ja say itsora ni mateto, singa shalang ni apoy, tan say itsora ni sedi to, singa dining ni boronsi. Sajay i kowan to: 19 “Amtak ey emanpigsay joka pansilbi son si-kak nem say nonta pilmiro. Amtak ey ebadeg i semek jo tan pamatiyo, tan asdeg to sota ka-anos jon emengitoded ni digat. 20 Nem wáray naka bedawa son si-kayon i-Tiyatira. Intolok jon mantosho son si-kayo sota biin si Jisibil ja kowan to ey si-katoy mismon para padto kono nen Apo Shiyos. Jet nakol ni sota ira took, nay-owapan ira, jet etod-an ma ira ja memii, tan ireka pay mengan mala ni naydaton shi sinan shiyos. 21 In-aknan ko iyay ya bii ni timpon panbebawi to, nem eg to koston manbebawi nonta aramid ton edogit. 22 Isonga niman, pansekit ko, jet sota intod-an to ngon mabii, manda-kam ngo ira ni ebadeg ga digat. Sajay i pesing ko no eg ira manbebawi ni sajay ya inonod shen aramid nontan na bii. 23 Tan angken sota ira annak to, shosaken ko, et metey ira. Sajay i dagen ko say sota emin na emati son si-kak, amta-en sha ey si-kak ket amtak i emin na wáred nemnem tan poso ni too, tan say amta-en sha ey si-kak i onsobadit ni dingka ni sanseskey son si-kayo. 24 Nem wáray eshom son si-kayo shi Tiyatira ja eg imonod so nonta toron ngaaw, tan eg engashal nonta kowan sha ey eda-med konon ashal nen Satanas. Jet say kowan ko son si-kayo, eg takejo ida-karan; on-anay sota sigod ja

bilin ko son si-kayo. 25 Nem mesepol la sota mapteng nga am-tayo, si-katoy nemnememen jo ni olay ingkatod idaw ko mowan ali. 26 Jet sota ira mengenos ni digat, ja eg ma-ebak, tan mengitoday ni piyan ko ingkatod meksheng nga emin, si-katoy itakshel kon mengitoshay ni ka-ili-ili, 27 ja inges toy inpasing nen Amak son si-kak ja inpiyal towak ja mengitoshay. Ta ipakat shay saad shen mengitoshay et enshiy onsopngil so. Jet sota pantoshay sha, may-eshig shi toon engegshi ni barita ja olay toy piyan ton pontan-an. Jet sota mepontan-an, memisit ja singa banga. 28 Jet si-kak, i-aknan ko ira ni talaw ja kowan sha ey mamowas. 29 Isonga singpet jon itenengan sota kowan ni Ispirito Santo nen Apo Shiyos so nonta ira emati.”’ Sajay i isolat mo para so nonta ira i-Tiyatira.

### 3

1 “Iyay ngoy isolat mo so nonta pangolo ni emesa-sa-nop pa emati shi Sardis: ‘Say kowan nen Apo, ja kawad-an ni kedsang ni Ispirito Santon eg nagshengan, tan kawad-an nonta piton talaw, kowan to ey, “Si-kak, amtak ka emin i joka dagdag-a. Say kowan ni eshom ma too, wáray biyag jo, nem say agpayso, etey kayo. 2 Niman, panmoliyat kayo et asas jo sota ootik ka ebay-an ja biyag jo, say eg medengbos. Ta say kowan nen Apo Shiyos, enshin polos i koston nantongpalan ni obdayo. 3 Nemnem jo koma sota naytoro son si-kayo nontan, tan sota itenengan jo. Si-katoy pati-en jo, et ibi-jag jo sota ngaaw wa aramid jo. No eg kayo manmodiyat, on-dawak da ja palibdigab et ondibag kayon inges toy toon ekibotan. 4 Nem wáray eshom son si-kayo shita Sardis ja eg to dino-shis i

baro to. Si-karay maykeshi ja odopen ko et panbeshok ira ni empoti. <sup>5</sup> Sota ira mengenos ni digat, ja eg ma-ebak, may-aknan ira ni empotin baro sha et sota ngaran sha, ekak omasen shima dibsho ja naysolatan ni ngaran ira nonta nay-aknan ni biyag ja enshiy to engintegangan. Jet ikowan ko ngo so nen Amak tan so nonta ira anghil to ey sajay iray took, ireka mepiyal. <sup>6</sup> Singpet jon itenengan iya kowan ni Ispirito Santo nen Apo Shiyos so nonta ira emati ja esa-nop.”’ Sajay i isolat mo para so nonta ira i-Sardis.

<sup>7</sup> “Jet sajay ngoy isolat mo so nonta pangolo ni esa-nop pa emati shi Piladilpia: ‘Iyay i kowan nen Cristo ja kawad- an ni podno, tan mengitodoy ni toray nen Ari David da nonta bayag. Sota ipalobos ton onsekep shi pantoshayan to, idokatan to, nem no sota eg to koston onsekep, ibagatan to. Jet angken sipa, enshiy onpilit so no eg to ipalobos. <sup>8</sup> Jet kowan to ey, “Si-kak, amtak ka emin i joka dagdag-a et amtak pay ey endedamsis shakejo ni eshom ma too ja kaidiyan jod tan. Nem pinatiyoy inbilin ko son si-kayo et eg jo indibak ey too takejo. Jet niman, inpalobos kon mebedin na ikowan joy maypangkep son si-kak so ni totood tan et enshi may toon meniped son si-kayon mengikowan. <sup>9</sup> Jet niman ma, pengebak takejo, ebaken jo ira sota Hodiyo ja makakontra son si-kayo. Si-kara, too gayam ira nen Satanas. Kowan sha ey Hodiyo ira, nem enshi kari ta eg sha onoren si Apo Shiyos; ma-owap ira. Say pesing ko, pedaw ko ira son si-kayo et mantedimokod ira shi sango-an jo ta amta-en sha ma ey si-kayo i ensemek kon took. <sup>10</sup> Pinatiyo sota inkowan ko ey man-enos kayo; isonga no onsabi ali sota digat shiya intiron

dobong, ja mepedigat ta emin i too, idisi takejo. <sup>11</sup> Magenoy i-olik ali mowan, isonga sota wara son si-kayo, si-katoy nemnememen jo, say sigoradon ewaten jo sota konkona jo. <sup>12</sup> Sota ira mengenos ni digat, ja eg ma-ebak, si-karay panbedin kon may-eshig ey tokod nonta Timplo nen Apo Shiyos. Jet eg mebedin ma ja maysi-jan ira son Apo Shiyos. Malka-an ko pay ira ni ngaran nen Apo Shiyos, tan sota ngaran ni siyodad to ja badon Jerusalem ja medepo son si-kato alid dangit. Malka-an ko pay ira ni badon ngaran ko. <sup>13</sup> Singpet jon itenengan iya kowan ni Ispirito Santo nen Apo Shiyos so nonta ira esa-nop pa emati.”’ Sajay i isolat mo para so nonta ira i-Piladilpia.

<sup>14</sup> “Iyay ngoy isolat mo so nonta pangolo ni emesa-sa-nop pa emati shi Laodisia: ‘Iyay i kowan nen Apo ja podnon emin i wara son si-kato. Podnon emin i toka ikowan, isonga emepiyal. <sup>15</sup> Jet kowan to ey, “Si-kak, amtak ka emin i joka dagdag-a. Kowan jo ey emati kayo, nem pampa-maayan. May-eshig ey singa shanom kayon empetang ni otik. Angken koma nem empetang kayo et ngon pasiya, ono angken engketit et ngo. <sup>16</sup> Nem si-kayo, ta empetang kayo ni otik bengat, ja aliwa et ngon engketit kayo ono empetang nga pasiya, ngaaw sotan na itsora; isonga ibojak takejo ma shiya bongot ko. <sup>17</sup> Say kowan jo, bimaknang kayo ma, ja enshiy eshom ma mesepol jo, nem eg jo amta ey kakaasi kayon pasiya! Singa ebiteg kayo, may-eshig ey ekorab kayo, tan nandabos kayo. <sup>18</sup> Isonga niman takejoka pan-ewisa ja menongkal ni balitok son si-kak — sota poron balitok ja tinonaw ni apoy — say onbaknang kayon kosto. Panongkal kayo pay son si-kak ni empotin baro, say waray isa-



din jo nodta kabebaing nga in-pandabos jo. Panongkal kayo pay son si-kak ni agas, say waray i-agas jo shita matejon ekorab, say man-esas kayo ma. <sup>19</sup> Sota ira ensemek ko, naka ikowan i nankolongan sha, tan naka bidina ira, say mannemnem ira. Baliwiyo i ogadiyo et pan-alisto kayo ma. <sup>20</sup> Itnengi jo, ta singa wara-ak shi sakepan ja emenogtog. Naka on-esel pay jet sota mengitneng, no idokatan towak, onsekepak et mekipenganak son si-kato; man-okob kamin showa. <sup>21</sup> Sota mengenos ni digat, ja eg ma-ebak, si-karay ikowan ko ey mayda-kam ja mekitongaw son si-kak shima pantoshayan ko. Ta angken si-kak, inenosan koy digat et nayda-kamak ngo ja mekitongaw so nen Amak shi pantoshayan to. <sup>22</sup> Singpet jon itenengan iya kowan ni Ispirito Santo nen Apo Shiyos so nonta ira esa-nop ja emati.”’ Sajay day isolat mo para so nonta ira i-Laodisia. Sajay i engintegan ni bilin kon isolat mo so nonta pangolo ni emati shiya piton dogad.” Kowan nen Apo.

## 4

*Sota shaka pesing ja manshed-jaw son Apo Shiyos shi dangit*

<sup>1</sup> Idi enaksheng mala iyay, tinangkak koy naykayang et inonan koy emankepasemak shi dangit, ja singa waray dowangan na edo-katan. Jet nontan, intenengan ko mowan sota esel la singa trompitay kedsang to, ja kowan to ey, “Kaled jay et ipa-sas ko son si-kam sota medeka ali shi ma-onod ja timpo.” Kowan to, <sup>2</sup> jet ebigla ja indaw towak nonta Ispirito shi dangit. Jet inon-an ko ma sota tongawan et nodtan, waray sakey ya timongaw. <sup>3</sup> Sota timongaw nodtan, emenenili: singa din-ing nonta baton epalit ja kowan

sha ey jaspir, tan sota kowan sha ey karniliyan. Jet sota tongawan nodtan, waray nandikmot ja bongdol, jet say itsora nonta tongawan, emandinging nga pasiya ja singa sota baton kowan sha ey ismiralda. <sup>4</sup> Jet sota sakey ya tongawan, dinikmot met laeng ni showen polo tan epat ja tongawan ja tinongawan ira nonta showen polo tan epat ja singa pangolo ni emati son Cristo. Nanbaro ira ni empoti, tan say koronara shi toktok sha, balitok. <sup>5</sup> Jet nodtan na tongawan ja naykawa, si-katoy panbo-dayi ali nonta bagidat tan kirol, tan wara pay i bongog ja emankedapo nodtan. Nodta sango ni tongawan, waray emanshedang nga piton silew. Jet say olog nonta silew, sota kedsang nonta Ispirito nen Apo Shiyos ja eg nagshengan. <sup>6</sup> Nodta sango-an ni tongawan, waray singa baybay ya singa samding i itsora to; malonas sa pasiya ja singa sota kowan sha ey kristal.

Jet nodta sakey ya tongawan, waray nandikmot pay ja epat ta palsowa ja eshakil i matesha shi sango tan shi beneg sha. <sup>7</sup> Sota pilmiron palsowa, singa lion; sota maykadwa, singa baka; sota maykatdo, say dopa to, singa dopa ni too; sota mayka-pat, singa tolsho ja emantedjab. <sup>8</sup> Sota ira epat ngon palsowa, waray enem ma payad sha et nanbabangi i matesha ja nandikmot shi bakdang sha. Jet ka-akawan tan kalebi-an, eg ira onsalsheng ni kansiyon ja panshedjaw son Apo Shiyos, ja kowan sha ey, “Enshiy maka-inges son Apo Shiyos, angken sipa — si-katoy Kangeto-an! Si-katoy sigod ja wara ngoreshan, ingkato niman, ingkatod ingka!” <sup>9</sup> Jet sajay iren palsowa, ireka mankansiyon ni shayaw sha, tan ireka man-iyaw

man so nonta wára ni olay shi biyag ingkatod ingka, ja timongaw nodta naykawen tongawan. No mankansiyon ira, <sup>10</sup> sota showen polo tan epat ja singa pangolo ni emati son Cristo, mantedimokod ira shi sango-an to, jet sota koronara, isepara nodta sango-an ni tongawan, ni shayaw sha so nonta wára ni olay ingkatod ingka, jet mankansiyon ngo ira ja kowan sha ey. <sup>11</sup> “Si-kam ma Apo mi tan Shiyos mi, anam mon panshed-jawan mi; si-kam i Manakabalin. Ta si-kam i emalsowa ni emin na banag et say kabol la ewára-an niyay, ninemnem mo ngo eshan ey mepalsowa!”

## 5

*Sota piton naybedbed shi ekopikop pa papil*

<sup>1</sup> Jet nodta kanawan na takday nonta timongaw shi naykawen tongawan, waray inon-an kon ekopikop pa papil, ja esolatan i sango to tan beneg to et ebedbeshan ni piton bedbed. <sup>2</sup> Jet wáray inon-an kon anghil ja makedsang i keljaw to, ja kowan to ey, “Sipay anam ton mengokas nonta naybedbed shima papil ja ekopikop say bitdagen to?” <sup>3</sup> Nem angken sipa shi dangit ono shiya dobong, ono shima nayshalem ni bo-day, enshiy maka-anam ja on-bitdag so, isonga enshiy imasas so nonta naysolat. <sup>4</sup> Jet nimangisak ka pasiya, ta enshiy angken sipa ja simpolan sha ja anam ton on-bitdag so. <sup>5</sup> Jet wáray sakey so nonta singa pangolo ni emati son Cristo, ja kowan to son si-kak ey, “Kareka onnangis; asas mo, wára aliy kakedsangan ja edapo shi poli nen Joda, ja engibengon so nen Ari David da. Si-katoy engabak ali, isonga si-katoy on-okas so nonta piton naybedbed nodta ekopikop pa papil et bitdagen to.”

<sup>6</sup> Jet nodta kad-an ni tongawan, tan sota epat ta palsowa, tan sota ira singa pangolo ni emati son Cristo, inon-an ko nodta naykawa i Kalniron dimayat, ja esogat, ja singa naydaton nontan da. Waray piton sakdod to, tan pitoy mateto. Say olog nonta piton mateto, sota kedsang ni Ispirito nen Apo Shiyos ja naybetkag ja ondaw shi emin na sakop ni dobong. <sup>7</sup> Jet sota Kalniro, si-katoy en engala nonta ekopikop ja papil nodta kanawan na takday nonta timongaw shi naykawen tongawan. <sup>8</sup> Jet idi inda to sotan na ekopikop pa papil, sota epat ta palsowa, tan sota showen polo tan epat ja singa pangolo ni emati son Cristo, nantalimokod ira shi sango-an nonta Kalniro. Jet emin ira jay ja singa pangolo ni emati, engegshi ira ni sanseskey ya kalshang, tan wára pay iray malokong shen balitok ja napno ni kowan sha ey insinso. Saja insinso, say olog to, sotan i shawat ira nonta emati ja timorong son Apo Shiyos. <sup>9</sup> Jet sajay ira, nankansiyon ira ni badon kansiyon, ja kowan sha ey, “Si-kam i anam ton mengeda nonta ekopikop pa solat et si-kam i anam ton on-okas so nonta bedbed to, ta si-kam, inkoros shaka et sota shalam ja imayos nontan, sotan i engi-sop ni totoo so nen Apo Shiyos, say too to ma ira, jet angken sipen kalasin too, enshiy to dinabsan. <sup>10</sup> Jet inkowan mo ey singa ari ira, ono pari iren mansilbi so nen Apo Shiyos ja mika shedjawa, jet si-kara pay i mantoshay shi dobong.” Sajay i inkansiyon sha.

<sup>11</sup> Jet idi onshemangak, wáray intenengan kon esel ira nonta dinibon anghil ja eg mebidang, ja nandikmot nodta naykawen tongawan, tan so nodta palsowa tan sota singa pangolo ni

emati son Cristo. <sup>12</sup> Jet inked-sang shay esel sha, ja kowan sha ey, “Sota Kalniro ja ebono nontan da, si-katoy anam ton may-aknan ni panakabalin, kin-abaknang, kinadaing, kedsang, shayaw, tan anam to pay ya si-katoy kaykowanen ni semek min emin!” Sajay i kowan sha, <sup>13</sup> jet intenengan ko pay i esel ni emin na palsowa ja wared dangit, shiya dobong, shima nayshalem ni boday, tan angken pay shima baybay, ja kowan sha ey, “Sota timongaw shima naykawen tongawan, tan sota Kalniro, si-karay kaykowanen ni semek min emin ingkatod ingka, tan wára pay son si-kara sota shayaw, tan sota panakabalin!” <sup>14</sup> Jet sota epat ta palsowa, kowan sha ey, “Siya, satan da!” Jet sota ira singa pangolo ni emati son Cristo, nantalimokod ira ja nanshayaw.

## 6

*Sota enem ma naybedbed nodta ekopikop ja papil, inokas nonta Kalniro*

<sup>1</sup> Nontan met laeng, inon-an ko sota Kalniro ja inokas to sota sakey ya bedbed nonta ekopikop pa papil et nontan, sota sakey so nonta ira epat ta palsowa, imesel ja singa kirol i kedsang to, ja kowan to ey, “Kala!” <sup>2</sup> Jet wára aliy inon-an ko ja empotin kabajo et sota nankabajo nodtan, waray paneto. Jet idi mimotok nodtan, nay-aknan ni korona to, ta si-katoy engabak ali, jet bimo-day ja en mekibekal mowan. Jet si-katoy mengebak met laeng.

<sup>3</sup> Idi inokas nonta Kalniro sota maykadwen bedbed, intenengan koy kowan nonta maykadwen palsowa, ja kowan to ey, “Kala!” <sup>4</sup> Jet waray bimo-day alin kabajo ja embalengen pasiya et sota nankabajo nodtan, nay-aknan ni

panakabalin to ja mengkal ni talna shi dobong, say sota ira too, manbibinono ira, jet sotan na nankabajo, nay-aknan ni enshokey ya kampilan.

<sup>5</sup> Idi inokas nonta Kalniro sota maykatdon bedbed, intenengan ko sota kowan nonta maykatdon palsowa, ja kowan to ey, “Kala!” Jet waray bimo-day mowan alin etoling nga kabajo et sota nankabajo nodtan, waray inegshi-an ton timbangan. <sup>6</sup> Jet waray intenengan kon esel ja singa edapo nodta epat ta palsowa, ja kowan to ey, “Edigat niman i mekan; isonga say dagbon san-akew, eg to posi-en i angken sansalop pa trigo, ono showen salop pa barley! Nem bay-im sota naymola-an ni obas tan olibas, say eshakil i daneb tan adak!”

<sup>7</sup> Jet idi inokas nonta Kalniro sota mayka-pat ta naybedbed, intenengan ko sota kowan nonta mayka-pat ta palsowa, ja kowan to ey, “Kala!” <sup>8</sup> Jet waray bimo-day alin kabajo ja singa imopsat i kolor to et say ngaran nonta nankabajo nodtan, si Patey et say timened son si-kato, si Impiyarno. Jet naypalobos ira ey sota inkapat ta bilang ni tood ja dobong, bono-en shay eshom ni kampilan, jet sota ira eshom, bono-en sha ni agang, tan pisti-en shay eshom. Jet sota ira eshom, bono-en ira ni atap pa animal.

<sup>9</sup> Jet idi inokas nonta Kalniro sota maykedimen naybedbed, inon-an ko nodta naydoong ni altar sota dinawa ira nonta ebono pangkep ni ka-anos shen engipedawag nonta esel nen Apo Shiyos nontan da. <sup>10</sup> Sotan ira, kimeljaw iren pasiya ja kowan sha ey, “O Apo, kamika manshinel nonta inkowan mon podno! Jet pigan aliy itongpal mo so nonta karim ma kowan mo ey ibales mon shosa-en ira sota toon

shimangkas son si-kami?" <sup>11</sup> Idi sotan, nay-aknan iren emin ni empotin baro et inkowan nen Apo Shiyos son si-kara ey, "Pan-anos kayo nin; pansalsheng kayo nin ni otik ka timpo ingkatod ma-anay sota bilang ni kait jon mebono. Ta sotan iren a-akiyo shi pamati, wára ira pay laeng niman ja emansilbi son si-kak."

<sup>12</sup> Jet idi inokas ma nonta Kalniro sota mayka-nem ma bedbed, nay-inshas i makedsang nga jegjeg et sota sekit, nanbalin ni singa etoling nga dopot. Jet sota bolan ngon masdag, nanbalin ni embalengen pasiya ja singa shala. <sup>13</sup> Jet sota talaw shima naykayang, epalaspas ali shiya dobong, ja inges to sota dames ni kadasan ja inwagas ni makedsang nga shagem. <sup>14</sup> Jet sama naykayang, na-omas ja singa papil la ekopikop. Angken pay sota ira shontog, tan sota ira dogad ja wáred ma kawa ni baybay, na-kal ired ma sigod ja kad-an sha. <sup>15</sup> Jet emin na totoo, angken ngantoy saad to, ira nan-emot shima diyang tan shima kakembaleg ga bato shima shonshontog, pati sota a-ashi, toray, nankengaton kapitan ni solsharo, bebaknang, tan sota ira eshom ma makedsang. <sup>16</sup> Jet nansekang ira ja kowan sha ey, "Si-kam ma shontog! Si-kayon bato! Karalshal ka di, sa-dini jokami, say eg shakami asen nima timongaw shima naykawen tongawan, tan say eg mi dakaman i bales nonta Kalniro. <sup>17</sup> Ta simabi ma niman sota pengibedes sha, jet enshiy mengitoded nima ebadeg ga pasiyeen bonget sha!"

## 7

<sup>1</sup> Jet idi sotan, wáray inon-an kon epat ta anghil ja dimayat shima epat ta shogo ni dobong ja tinnigel shay shagem say enshiy

shagem ma manshedan nodta epat ta sigod ja shalan to, jet enshi ma i shagem ja onsi-bok so ni kamag-an, ono onsi-bok so ni baybay. Jet angken sakey ya kiyew, enshi may shagem ma pekeykey so. <sup>2</sup> Jet wára pay i inon-an kon anghil ja emankedjang shima bedalan, ja inegni-an to sota para malka ja ka-osala nen Apo Shiyos, jet kineljaw to ira sota epat ta anghil. Si-karay maka-amta ja meneshal ni kamag-an tan baybay, <sup>3</sup> nem kowan to ey, "Karejo nin sheshalen i kamag-an tan baybay, karejo sheshalen i kiyew! Malka-an mi nin i temok ira nonta emansilbi so nen Apo Shiyos." Jet say intenengan kon kabebilang ira nonta emalka-an, sandasos tan epat ta polo tan epat ta dibo. Sajay i kabebilang ira nonta emin na emalka-an ja edapod poli da nen Israel. <sup>4-8</sup> Sampolo tan showa i nanshogi-an ni poli nen Israel, ja anak to et sajay iray ngaran sha: si Joda, si Robin, si Gad, si Asir, si Niptali, si Manasis, si Simeon, si Levi, si Isakar, si Sabolon, si Jose, tan si Benjamin. Say emalka-an ja poli ni sanseskey so ira niyay, sampepolo tan showen dibo.

<sup>9</sup> Idi naksheng ma iyay, inon-an ko i eshakel la pasiyeen too ja eg mebedin na mebidang. Edapo ired emin na sakop ni dobong, tan edapod emin na kalasin too, jet wára iren esho-kon shima sango-an nonta naykawen tongawan, ja sango-an met laeng nonta Kalniro. Nanpanbaro ira ni edayag ga empoti, tan nanpengegni ira ni bolong nga singa bolong ni niyog. <sup>10</sup> Ireka mankeljaw ja kowan sha ey, "Say engisedakan son si-kami, si Apo Shiyos ja timongaw shima naykawen tongawan, tan sota Kalniro!" <sup>11</sup> Jet emin ira sota anghil, dimayat ira ja dinikmot sha sota tinongwan nen Apo Shiyos, tan sota ira singa pan-

golo ni emati son Cristo, tan sota epat ta palsowa. Jet nanshomog ira nodta sango nonta naykawen tongawan ja nanshayaw so nen Apo Shiyos, <sup>12</sup> ja kowan sha ey, “Siya! Si Apo Shiyos, si-katoy kaykowan ni semek min emin! Si-katoy kawad-an ni shayaw, kinadaing, panakabalin, kedsang, tan si-katoy pan-iyamanan ni olay ingkatod ingka! Siya, satan da!”

<sup>13</sup> Jet sota sakey so nonta ira singa pangolo ni emati son Cristo, wimingi, jet inbaga to son si-kak ey, “Saja ira nanbaro ni edayag ga baron empoti, amtam i katoo ira niyay? Amtam i edapdapo-an sha?”

<sup>14</sup> Simongbatak ja kowan ko ey, “Apo, ekak amta. Isonga ikowan mo son si-kak.”

Jet kowan to son si-kak ey, “Sajay iray nansilbi son Apo Shiyos ja enganos nonta ebadeg ga digat ja marama niman. Empoti ma niman i baro sha tep inbelak sha nodta shala ni Kalniro. <sup>15</sup> Isonga wara ired jay niman so nen Apo Shiyos, ja emansilbi son si-kato ni ka-akawan tan kalebian shiya Timplo to. Jet si-katoy mengajowan son si-kara. <sup>16</sup> Eg ira ma ma-ekang, eg ira ma-kew ni shanom, eg sha da-kaman i sekit ono petang. <sup>17</sup> Ta sota Kalniro ja wara nodta kad-an ni naykawen tongawan, si-katoy mengajowan son si-kara ja inges to sota para pastol ni kalniro, jet si-katoy mengajowan son si-kara nodta agseb ni shanom ja mengi-kan ni biyag. Jet si Apo Shiyos, po-naren to sota sayesha say enshi may daringit sha.”

## 8

*Sota maykepton naybedbed shi papil, inokas nonta Kalniro id san jenganget sota enem ma trompita*

<sup>1</sup> Idi inokas nonta Kalniro sota maykepton bedbed, enshiy

en imes-esel nin shi dangit ni kagoshowen oras. <sup>2</sup> Jet idi epospos ma iyay, inon-an ko sota piton anghil ja wared ma sango-an nen Apo Shiyos, ja nay-aknan ira ni piton trompita. <sup>3</sup> Jet waray sakey ya anghil ja dimaw ali nodta altar ja engegni ni malokong nga balitok ja shaka pemooli nonta kowan sha ey insinso. Jet in-aknan sha ni eshakil la insinso ja kowan sha ey idaok to nodta shawat ira nonta emin na emati son Apo Shiyos nodta altar ja ebalitokan. Wara iyay nodta sango-an nonta naykawen tongawan. <sup>4</sup> Sota asok nonta insinso, ja takshol nonta shawat ira nonta emin na emati, dimowet nodta inegni-an ni anghil shi sango-an nen Apo Shiyos. <sup>5</sup> Jet sota anghil, inda to sota kepemooli ni insinso et pinno to ni apoy ya edapo nodta altar asan toka ikespig shi dobong. Jet nontan, waray intenengan kon makedsang nga kirol, tan bongog, jet wara pay i bagidat tan jegjeg.

<sup>6</sup> Jet nontan ma sota piton anghil ja na-peng ni sanseskey ya trompita, esagana ira ja pejenget sota trompita sha.

<sup>7</sup> Sota pilmiron anghil, inpayanget to sota trompita to et inon-an kon nandanti la ni kakembaleg, tan wara pay i apoy ja etaksholan ni shala ja na-kas da shi dobong. Jet sota inkatdon sakop ni dobong, tan sota inkatdon kawad-an ira ni kadasan, tan emin na angken nganton edet, epoolan.

<sup>8</sup> Sota maykadwen anghil, inpayanget to sota trompita to et waray singa shontog ja emanshedang ja naykespig da shima baybay, <sup>9</sup> jet sota inkatdon sakop ni baybay, nanbalin ni embalengen pasiya ja singa shala, jet sota inkatdon palsowa ja emanbibiyag nodtan na baybay, etey ira, jet

angken sota ira inkatdon kabebilangan ni bapor ja wared ma baybay, esharal.

<sup>10</sup> Sota maykatdon anghil, inpayanget to sota trompita to et sota sakey ya ebadeg ga talaw shima naykayang, na-kas da shima dobong ja emanshedang ja singa silew. Jet nayponta so nonta ira inkatdon kabebilangan ni pa-dok, tan asolan. <sup>11</sup> Say ngaran nontan na talaw ja na-kas da, kowan sha ey Toba et sota inkatdon shanom, etoba-an et eshakil i toon etey.

<sup>12</sup> Sota mayka-pat ta anghil, inpayanget to sota trompita to et sota inkatdo so nonta sekit, bolan, tan sota ira inkatdon kabebilangan ni talaw, simalsheng i niyal sha. Jet sota ka-akawan tan kalebi-an, na-kal i inkatdon niyal nonta sekit tan bolan.

<sup>13</sup> Jet idi onshemangak, waray inon-an kon ebadeg ga tolsho ja emantedjab shima kawa ni naykayang ja emankeljaw, ja kowan to ey, "Ka-kaasi iren pasiya i nanbaley shi dobong, ta wara pay aliy tedon janget ni trompita ira nonta tedon anghil et shanshanin pejenget sha."

## 9

*Sota shoron ja menekit ni totoo*

<sup>1</sup> Jet sota maykedimen anghil, inpayanget to sota trompita to et waray inon-an kon edapod dangit ja singa talaw et nay-awat son si-kato sota tolbek ja mengilokat nonta osok ka ontorong shima nayshalem ma naybaloshan ni dimonyo. <sup>2</sup> Dinokatan to sotan na osok et dimowet alin pasiya ja inges to sota etoling nga asok ja emankedapo nodta ebadeg ga pogon, jet tinoding toy naykayang et eg ma-sas sota akew. <sup>3</sup> Jet sotan na dowet ja edapo nodta osok, nay-olop ali ira sota shoron et sotan iren shoron, naypalobos

ja sekitan shay too, ja inges toy kamajan. <sup>4</sup> Naybilin son si-kara ey baybay-an sha ira sota edet, ono korpormin bimengis, ono kadasan shi dobong. Say sekitan sha bengat kono, sota ira totoo ja enshiy malka nen Apo Shiyos shi temok sha. <sup>5</sup> Naypalobos son si-kara ey angken pedigaten sha ira sota totoo ni dimen bolan, nem eg naypalobos sa bono-en sha ira. Jet say itsora ni shaka pesing nga memedigat ira nonta totoo, inges toy sakit ni kalat ira nonta kamajan. <sup>6</sup> Jet nontan na timpo, sota ira totoo, kowan sha ey angken metey ma ira, nem ayshi, eg mebedin, angken ngantoy pesing sha.

<sup>7</sup> Say itsora ira nonta shoron, singa kabajon para kobat. Jet sota toktok sha, singa ekorona-an ni balitok et sota dopara, singa dopa ni too. <sup>8</sup> Sota bowek sha ngo, singa bowek ni bii et sota sangi sha, singa sangi ni lion. <sup>9</sup> Sota siksik sha, singa sota ka-osala ni too ja danshok ka sa-din ni pagew. Sota bongog ni payad sha, no ontayab ira, singa janget ni eshakil la kabajo ja engigojod ni dokanan ira nonta solsharon en mekikobat. <sup>10</sup> Sota ikol sha, singa kamajan et sotan i emenodid. Jet sotan na tolid, si-katoy memedigat ni too ni dimen bolan. <sup>11</sup> Waray ari sha jet si-kato sota anghil ja emanbantay nonta naybaloshan ni dimonyo. Say ngaran to shi esel ni Hodiyo, kowan sha ey Abadon et shi esel ni Grigo ngo, kowan sha ey si Apolyon.

<sup>12</sup> Sota pilmiron pandikat ni tood dobong, enaksheng da, nem wara pay i showen digat ja onsabi ali son si-kara mowan.

<sup>13</sup> Sota mayka-nem ma anghil, inpayanget to sota trompita to et waray intenengan kon esel ja edapo nodta epat ta shogo nonta altar shima kad-an nen Apo Shiyos, <sup>14</sup> ja kowan to so nonta

mayka-nem ma anghil ey, “Ibodos mo ira sota epat ta anghil ja nay-pagod shima kilig nima ebadeg ga pa-dok ja kowan sha ey Yopratis.”

<sup>15</sup> Jet sota epat ta anghil, nay-bolos ira ja memono ni inkatdon kabebalang ni tood dobong. Naysagana iren nanseked niya koston oras ja inkowan nen Apo Shiyos ja ibo-day sha. <sup>16</sup> Say intenengan kon kabebalang ira nonta solsharon nankabajo ja pemono nonta ira anghil, showen dibon dasos ja dibo. <sup>17</sup> Jet sajay i it-sora ira nonta kabajo tan sota ira nankabajo ni in-asas ko so ja singa kokokip: Sota sa-din ni pagew sha, say kolor to, singa apoy ya embalenga, tan singa wára pay i kowan sha ey blue tan yellow. Sota toktok nonta kabajo, singa lion et say emanbo-day shi bongot sha, apoy, ja etaksholan ni asok tan asopri. <sup>18</sup> Jet nontan ma, sota inkatdon kabebalang ni tood dobong, binono nonta apoy, asok, tan asopri ja emanbo-day nodta bongot ni kabajo. <sup>19</sup> Ta say pemono ira nonta kabajo so ni too, sota medepod bongot sha, tan sota ikol sha. Sota ikol sha, singa oleg, ja wáray toktok to et sajay i onsogat so nonta ira totoo.

<sup>20</sup> Sota ira toon eg etey, ja engilesat niyay ya digat, eg sha pay laeng inbi-jag sota shaka panshedjaw nonta dingkara met laeng nga sinan shiyos; ireka pay laeng emanshedjaw so nonta ira dimonyo, tan sota ira sinan shiyos ja balitok, palata, boronsi, bato, tan kiyew. Enshiy biyag iren jay ya sinan shiyos — eg man-esas, eg mantetneng, eg man-ekad. Nem sota ira totoo, ireka memasig ga manshedjaw so ira niyay. <sup>21</sup> Eg ira pay nanbebawi ni inpamonora ni kait shen too, ono sota shaka pan-mantala, ono sota shaka pemii, ono sota inpangibot sha.

## 10

<sup>1</sup> Wára pay i inon-an kon maked-sang nga anghil ja edapod dangit; singa insala-wáki toy kolpot et sota petek ni toktok to, wáray bongdol to; jet sota dopeto, singa sekit; sota sedi to singa tokod ja emanshedang. <sup>2</sup> Jet wáray ootik ka papil ja inegni-an ton ebitdag. Sota kanawan na sedi to, kimatin shi baybay et sota kanigid ja sedi to, kimatin shi kamag-an. <sup>3</sup> Jet kimejaw ni makedsang ja singa inges toy ngaled ni lion et nontan na inkeljaw to, kimirol ngo ni pito. <sup>4</sup> Jet idi kimirol ni pito, istay ya kowan ko ey isolat ko sota kowan ni kirol, nem wáray intenengan kon esel ja edapod dangit, ja kowan to ey, “Bay-im, angken eg mo isolat.” <sup>5</sup> Jet sota anghil ja inon-an kon dimayat ja inkatin toy baybay tan kamag-an, inkayang toy kanawan na takday to shi petek ni dangit, <sup>6-7</sup> jet inkowan to ey, “Enshi may ontaktak so! No pejenget nonta maykepiton anghil i trompita to, si-kato may ketongpal nonta inkowan nen Apo Shiyos so nonta ira pinidi ton para padto ja plano ton eg ma-éwatan nontan da! Si Apo Shiyos, amta to iyay, ja medeka alin shagos, ja enshiy taktak to! Si-katoy nanngel ni emin, ta si-katoy emalsowa ni dangit, tan dobong, tan sota emin na wára nodtan!”

<sup>8</sup> Jet intenengan ko mowan sota esel ja edapod dangit, ja kowan to son si-kak ey, “Daw ka, mo ala ima ootik ka papil ja ebitdag, ja wáred takday nima anghil ja dimayat, ja engigetin ni baybay tan kamag-an.”

<sup>9</sup> Dimawak so nontan na anghil, nak inkowan ey i-akan to son si-kak sota ootik ka papil et kowan to son si-kak ey, “Alam et kan mo. Mansedangat shita ekes mo, nem shita bongot mo, en-amis sa

pasiya ja inges to sota shanom ni dinowan.”

<sup>10</sup> Indak sota ootik ka papil nodta takday nonta anghil et kinnan ko, jet siya, en-amis sa pasiya shi bongot ko ja inges to sota shanom ni dinowan, nem idi tindenden ko la, emansedangat shi ekes ko.

<sup>11</sup> Jet intenengan koy esel pay ja kowan to ey, “Mesepol pay ya mengipadto ka nonta mepesamak ali so ni tootod ma ka-ili-ili, ja ekalkalasiy esel sha, pati sota kajari-pay.”

## 11

### *Sota maykepton trompita*

<sup>1</sup> Jet nay-akan son si-kak i singa sowan ja para dokod et waray imesel ja kowan to ey, “Dayat ka et dokod mo ima Timplo nen Apo Shiyos, tan sama altar et bilang mo ira ma emanshedjaw shiman. <sup>2</sup> Nem karam dokoren ima bo-dayan ja naydasin shima Timplo; baybay-im iman, ta nay-akan shi eshom iren ili ja aliwen Hodiyo, et olay toy piyan shen dag-en ja makedsel shima siyodad ni Jerusalem ni tedon tawen tan enem ma bolan. <sup>3</sup> Nem waray ibetkag kon showen too ja en mengikowan ni esel ko nontan na timpo met laeng. Jet say baro ira nontan, sota baro ni emandeshingit.”

<sup>4</sup> Saja showen too, singa sota kadasan ja kowan sha ey olibas, ono sota sagpatan ni kingki, ja wara ni olay ja kaishemshemang nen Apo Shiyos ja toray niya dobong. <sup>5</sup> Jet no waray kowan to ey onshangkak son si-kara, waray apoy ya onbo-day alid bongot sha ja meneshal nonta makakontra son si-kara. Isonga sota toon kowan to ey menangkak so ira niyay, metey ira. <sup>6</sup> Waray panakabalin shen showa ja mengikowan ey eg ali on-oran

nontan na timporen mengipadto, tan wara pay i panakabalin sha ja mengikowan ey sota shanom, manbedin ni singa shalen embalengen pasiya, tan mengikan ni angken nganton pandikatan ni tood dobong no piyan sha, angken meminsakel. <sup>7</sup> No meksheg iyay ya pengikowan sha nonta esel nen Apo Shiyos, sota Animal, onbo-day ali shima nayshalem ma naybaloshan ira ni dimonyo, jet mekikobat sota Animal so nonta ira showen para padto, jet bonoen to pay ira. <sup>8</sup> Jet sota bakdang sha, maypoday shima kalsara ni Jerusalem ja naydansa-an nonta Apo sha la shi koros. Nem eg naydiritso i ngaran nontan na siyodad; isonga kowan sha ey Sodoma, ono Egypt. <sup>9</sup> Tedon akew tan kagoshowa ja sota bakdang nonta showen toon etey ya para padto, boja-en ira nonta emin na kalasin totoo, ja nan-i-inapil i esel sha, ja edapod emin na ka-ili-ili, jet iparit shen maybebka ira, say enshiy malka ni naybek-an sha ja penginemneman ni totoo son si-kara. <sup>10</sup> Jet sota ira tood ja dobong, mandaladsak ira ni imdeng sha ni inkatey nonta showen para padto et man-i-inakan pay ira ni kompormin i-akan sha, shi kait sha, ta kowan sha ey, “Siya, enshi mala sota kaondistorbo son si-katejo!”

<sup>11</sup> Nem idi edabas ma sota tedon akew tan kagoshowa, si Apo Shiyos, in-oli toy jasjas ira nonta showen etey et dimayat iren bimangon et emin sota engasas son si-kara, epaladoy takot sha. <sup>12</sup> Jet waray makedsang nga esel alid dangit ja kowan to so ira niya showa ey, “Kalejod jay!” Jet kimayang da ira shi dangit et dinikopan ira ni kolpot. Sajay, mismon inon-an ira nonta makakontra son si-kara. <sup>13</sup> Jet nontan met laeng nga oras,



waray makedsang nga jegjeg et sota inkasampolon sakop nontan na siyodad, esharal et piton dibon too i etey nodtan. Sota ira eshom ma too, ontakot iren pasiya et kowan sha ey, “Niman amta tayo ma ey si Apo Shiyos ja wared dangit i makabalin niyay!”

<sup>14</sup> Sota maykadwen pandikat ni tood dobong, naksheng ma et sota maykatdo, si-katoy ontene ma ali.

<sup>15</sup> Jet sota maykepiton anghil, inpayanget to sota trompita to et waray makedsang nga kiyaw shi dangit ja kowan sha ey, “Sak-sakey ma niman i mantoshay shi intiron dobong! Si Apo Shiyos, tan si Cristo ja shinotokan to i mantoshay ma ingkatod ingka ja enshiy to pengintegan!”

<sup>16</sup> Jet sota showen polo tan epat ja singa pangolo ni emati son Cristo ja timongaw shima kad-an nen Apo Shiyos, nanpanshomog ira ja nanshayaw so nen Apo Shiyos. <sup>17</sup> Jet kowan sha ey, “Kamika man-iyaman son si-kam, Apo Shiyos ja Manakabalin! Si-kam i sigod ja wara ngoreshan ingkato niman et salamat ta in-pakat mo ma i katekal mo et si-kam ma i mantoshay. <sup>18</sup> Sota ira tootood dobong, ireka manbonget tep eg sha kosto, nem enshiy mebedin sha tep simabi may timpon penosam so nonta ira toon ememedigat ira ni toom. Jet sota ira para padto, tan sota eshom ma nansilbi son si-kam ja emati, i-awat moy konkona sha, angken sota nankengato ono nankebaba. Angken sota ira nanketey, niman may pengigsheng mo ni panbengan sha ingkatod ingka!”

<sup>19</sup> Jet sota Timplo nen Apo Shiyos shi dangit, edo-katan et sota kakon ja naytalo-an nonta naysolat ta bilin ton nay-awat son Moises, ma-sas ja wara nodta Timplo. Jet nontan ma, wara

iray makedsang nga bagidat, tan makedsang nga oni ni kirol, tan jegjeg, tan nandanti pay ni kakambaleg.

## 12

*Sota biin imanak, tan sota bowaja*

<sup>1</sup> Jet waray kaskasshaaw wa sinjas sa inon-an kod ma naykayang. Waray bii ja say baro to, singa sekit ja emeneni et sota sedi to, singa inkatin to sota bolan, jet nodta toktok to, waray nandiktob ja sampolo tan showen talaw ja singa korona to. <sup>2</sup> Sajay ya bii malokon et makedsang i pekis to ta ensakit sota pan-enak to.

<sup>3</sup> Jet wara mowan i kaskasshaaw wa sinjas ja inon-an kod ma naykayang ja ebadeg ga embalengen bowaja. Pitoy toktok to, sampoloy sakdod to, jet sanseskey i korona nonta piton toktok to. <sup>4</sup> Sota ikol to, pinedaspas to sota inkatdon kabebilang ni talaw shima naykayang et na-kas ira shi dobong. Jet sota bowaja, dimayat ja sinengo to sota biin shanshanin on-anak, tep piyan ton kenen sota nga-nga ali no onbo-day. <sup>5</sup> Nem idi imanak ni daki sota bii, sinipshot da nen Apo Shiyos sota nga-nga shima kad-an to, ta sotan na nga-nga aliy mengitoshay ni emin na ilid dobong, jet enshiy onsopngil so; sota piyan ton pengitoshay, si-kato. <sup>6</sup> Jet sota biin imanak, nantik ja en dimasin shi dogad ja insagana nen Apo Shiyos, jet inajowanan nen Apo Shiyos shiman ni sandibo tan showen dasos tan enem ma polon akew.

<sup>7</sup> Jet nontan ma, waray kobat shima dangit. Si Miguel, tan sota ira kait ton anghil ja intorayan to, kinobat sha sota bowaja. Jet sota bowaja tan sota anghil to ngo, ekikobat ira. <sup>8</sup> Nem na-abak ira sota kinobat nen Miguel et

shinagshag sha ira sota na-abak ja eg ira ma man-iyen shi dangit. <sup>9</sup> Jet sota ebadeg ga bowaja ja kowan sha ey oleg nonta bayag da, ja si Dimonyo kari, ono si Satanas, ja mengi-o-owap ni emin na tood ja dobong, idi na-abak shi dangit, in-ekas sha alid ja dobong, angken pay sota ira anghil to ngo. <sup>10</sup> Jet waray makedsang nga esel ja intenengan kon edapo alid dangit ja kowan to ey, “Niman mapteng ma, enshiy panshanagan, ta sota emengikokowan ni olay so nen Apo Shiyos ni ka-akawan tan kalebi-an ey ngaaw i kait tayon emati, eshagshag shi dangit! Jet niman ma si Apo Shiyos i matekal la toray et si Cristo ja shinotokan to, mantoshay ma! <sup>11</sup> Inebak nonta a-aki tayod pamati si Satanas et say kabol la inebakan sha so, sota shala nonta Kalniro ja imayos nonta inkatey to, tan sota esel nen Apo Shiyos ja inkowan sha. Sajay i edaga ta eg sha tinepi i biyag sha ja angken metey ira. <sup>12</sup> Isonga niman ma si-kayon wared ja dangit, pan-imdeng kayo! Nem si-kayon wared ta dobong, pati si-kayon wared ta baybay, kaasi kayo, ta si Satanas, wara ma son si-kayo jet nansekang nga pasiya ja emanbonget, tep amta to ey entikey may timpo to!”

<sup>13</sup> Idi indasin ma nonta ebadeg ga bowaja ey nay-ekas da shi dobong, inosil to sota biin enginak nonta nga-ngen daki, <sup>14</sup> nem sota bii, nay-aknan ni showen payad nonta ebadeg ga tolsho, say mebedinan ton ontayab ja onbetik. Jet namtik ja dimasin shima dogad ja pengajowanan so nen Apo Shiyos son si-kato ni tedon tawen tan kagoshowa. <sup>15</sup> Nem sota bowaja, ememasig ja panosila sota bii, jet inpabo-day to pay shi bongot to i eshakel la

shanom ja singa ebadeg ga padok, ta piyan ton say ma-enod sota bii. <sup>16</sup> Nem saja bo-day, tinodongan to sota bii. Nabtak shorong jet edangag ma sota ebadeg ga shanom ja edapo nodta bongot nonta bowaja. <sup>17</sup> Jet sota bowaja bimonget, ta eg to kabaalan sota biin sheshalen jet dimaw ja to sinodngan sota ira eshom ma annak nonta bii. Sota annak to, sikara sota ememati ni bilin nen Apo Shiyos, tan emengikowan ni maypangkep so nen Jesus.

## 13

*Sota Animal ja edapod baybay tan sota sakey ngon edapod kamagan*

Nontan, wara-ak shi kilig ni baybay.

<sup>1</sup> Jet waray inon-an kon Animal ja kima-jat ali shima baybay. Waray sampolon sakkod to, tan pitoy toktok to, jet waray korona nodta sanseskey ja sakkod to. Jet nodta ira toktok to, waray nayso-lat ja dastog ton toka pa-so-i si Apo Shiyos. <sup>2</sup> Sotan na inon-an kon katetakot ja Animal, singa inges to sota kowan sha ey tigri, nem sota sedi to et mango, singa sedi nonta kowan sha ey oso, jet sota bongot to singa bongot ni lion. Jet sota bowaja, in-aknan to sotan ni panakabalin ton mantoshay jet kowan to pay ey sota piyan nonta Animal la dag-en, si-kato. <sup>3</sup> Sota sakey ya toktok to, singa esogatan; istay ipatey to koma, nem epiged. Isonga emin na tood ja dobong, ireka messhaaw, jet sotan i inonod sha. <sup>4</sup> Jet sota ira totood ma dobong, sota bowaja i nanshayawan sha, ta inpalobos to sota pantoshay nonta Animal. Sota ira totoo, nanshayaw pay ira so nonta na Animal, ja kowan sha ey, “Enshiy on-inges so niyay ya

Animal, tan enshiy makabaal ja on-abak so!”

<sup>5</sup> Sotan na Animal, naypalobos ja on-esel et epaladon toka pa-so-i si Apo Shiyos, jet naypalobos pay ja angken ngantoy dag-en to ni tedon tawen tan enem ma bolan. <sup>6</sup> Jet say itsora ni toka pema-so son Apo Shiyos, kowan to ey enshiy kenkenshat kono nen Apo Shiyos, pati sama kad-an tod dangit, tan angken pay sota ira wared man. <sup>7</sup> Naypalobos pay ja kobaten to ira sota emati son Jesus ingkatod mengebak. Jet naypalobos pay ya si-katoy mengitoshay so ira nonta emin na kalasin too, ja nan-i-inapil i esel sha, ja wared ka-ili-ili shi intiron dobong. <sup>8</sup> Jet emin na tood ja dobong, sotan i shedjawen sha, nem say eg manshedjaw so nontan, sota ira naysolat i ngaran sha shima dibshon dista-an ni toon nay-aknan ni biyag ja enshiy to engintegan. Sajay ya dibsho, wára so nonta Kalniron naykoros nontan da jet sota toon naydista nodtan, sigorado ngoreshan i kaysedakan sha, angken nonta eg pay laeng epalsowa i dobong.

<sup>9</sup> Iyay i ikowan kon epateg; isonga singpet jon itenengan. <sup>10</sup> Sota toon kenshat ta maybedod, maybedod ngoreshan; isonga angken eg kayo onsopngil. Nem sota toon memono ni kait to ni kampilan, maybedes ngon mebono ni kampilan. Isonga mesepol la si-katejon too nen Apo Shiyos, man-enos kito, tan mesepol la pekedsang tayoy pamati tayoy.

<sup>11</sup> Jet wára pay i inon-an ko ja Animal la bimo-day ali nodta boday, jet waray showen sakdod to ja singa kalniro. Say itsora to no on-esel, inges toy bowaja. <sup>12</sup> Jet emin na toka dagdag-a, inges to met laeng sota panakabalin nonta pilmiron Animal ja bimo-day alid baybay, nem eg to pa-so-an sota

pilmiron Animal. Say inpasing to, pinidit ton emin iray tood dobong nga manshedjaw ira so nonta pilmiron Animal. Sajay sota Animal la epiged ma sota sogat shi toktok to, ja singa ipatey to nontan da. <sup>13</sup> Saja maykadwen Animal, eshakil i dingdingka ton kaskasshaaw wa milagro et say sakey ya inpa-sas ton milagro, inpan-oran to alid naykayang ni apoy, jet inon-an ni totoo. <sup>14</sup> Jet sota totood dobong, na-adilaw ira nontan na milagron naypalobos ja dag-en to para so nonta pilmiron Animal. Jet sotan na Animal, inkowan to so nodta ira totoo ey mengemag ira ni sinan bakdang nonta pilmiron Animal ja pinesjang ni kampilan i toktok to nem eg etey. <sup>15</sup> Jet sotan na Animal, naypalobos ja i-aknan to ni biyag sota dingka ni too ja sinan bakdang nonta pilmiron Animal. Jet mebedin ma ja on-esel, et inkowan to ey sota ira eg manshedjaw son si-kato, mebono ira. <sup>16</sup> Inkowan to pay ey angken sipen too — nankehaba ono toray, bebaknang ono nankebiteg, aliwén baga-en ono baga-en-memalkakan i kanawan na takday sha, ono temok sha. <sup>17</sup> Jet inkowan to ey angken sipa, eg makatongkal ono eg makadako, no enshiy malka to. Say naymalka, sota ngaran nonta pilmiron Animal, nem domiro i inosal ton ka-amta-an ni ngaran to. <sup>18</sup> Sajay ya domiron enem ma dasos tan enem ma polo tan enem, ja naymalka, emengirinjas ni ngaran ni sakey ya too, jet olay toy matekal la on-awat so ni olog niyay.

## 14

*Sota inkowan ira nonta anghil*

<sup>1</sup> Idi onshemangak, inon-an ko sota Kalniro ja dimayat shima shontog ni Jerusalem ja kowan

sha ey Siyon, jet say kait to nod-tan, sota ira totoo to, ja sandasos tan epat ta polo tan epat ta dibo. Emalka-an i temok shen emin ni ngaran nonta Kalniro, tan ngaran nen Apo Shiyos, ja Ameto.

<sup>2</sup> Jet wáray intenengan kon esel ja edapod dangit ja singa bongog ni eshakil la shanom, tan singa makedsang nga kirol. Nem sotan na intenengan ko, singa mosiko met laeng ja janget ni kalshang.

<sup>3</sup> Jet nankansiyon ira ni badon kansiyon shima sango-an nonta naykawen tongawan, tan sota ira epat ta palsowa, tan sota ira singa pangolo ni emati son Cristo. Jet sota sandasos tan epat ta polo tan epat ta dibo, ja naysalakan na totoo dobong, si-kara bengat i mebedin na mengashal so nontan na kansiyon; ayshi pay i eshom ma mebedin na on-ashal so nontan na kansiyon.

<sup>4</sup> Si-kara sota toon etopog ga si Apo Shiyos i shaka panshedjawi; isonga eg sha dino-shis i bakdang sha ja emii. Si-kara sota kaon-onod nonta Kalniro angken toway dawán to. Sajay iray pilmiron naysalakan na totoo shi dobong, nem wára pay ali y eshom; aliwén abos sha bengat.

<sup>5</sup> Jet sajay ira, enshin polos i owap ja sha inkokowan; jet enshiy sha kebedawan.

<sup>6</sup> Jet wáray inon-an kon sakey mowan na anghil ja emanted-jab shima kawa ni naykayang, ja en mengikowan ni mapteng nga shamag so ni emin na tood dobong, say amta-en ni emin na toon wáred ja ka-ili-ili, ja ekalkalasiy esel sha. Sajay ya shamag ja to ikowan, sajay sota sigod ja shamag ja wára ni olay ingkatod ingka.

<sup>7</sup> Jet kowan to ni makedsang nga esel ey, “Si Apo Shiyos i tekotan jo et si-katoy panshedshedjawan jo, ta sota timpon pengigsheng to no sipay maysedakan, simabi ma! Si-ka-

toy shedjawen jo ja emalsowa ni dangit, baybay, tan angken sota kedepo-i ni shanom!”

<sup>8</sup> Jet wáray maykadwén anghil ja timened, ja kowan to ey, “Babilonia, ja ilin mayshedshedjaw ey katekalan, sharal to ma, epilshi ma! Sotan na ili, epaladoy basol to et pinidit toy emin na too ja mayda-kam so nontan na edogit ta pasiya ja aramid to.”

<sup>9</sup> Jet wáray apil mowan alin anghil ja maykatdon timened, jet kowan to ni makedsang nga esel ey, “No sipa ira sota manshedjaw so nonta Animal, tan manshedjaw so nonta na-amag ga kabakbakdang nonta Animal, tan no sipay engitodok ja emalka-an i temok sha ono takday sha,

<sup>10</sup> dakaman sha sota epaladon bonget nen Apo Shiyos ja aliwén pampamaayan. Da-kaman shay pemedigat ni apoy, tan sota petang ni asopri shi sango-an ira nonta anghil nen Apo Shiyos, tan shi sango-an nonta Kalniro.

<sup>11</sup> Jet sota dowet nonta apoy ya memedigat son si-kara, metowen ni olay ingkatod ingka. Enshiy salsheng ni digat sha ni ka-akawan tan kalebi-an. Sajay i shosa ira nonta emanshedjaw so nonta Animal, tan sota emanshedjaw so nonta inemag ja kabakbakdang niyay ya Animal, tan sota ira timolok ja emalka-an ni ngaran nonta Animal.”

Kowan nonta anghil.

<sup>12</sup> Isonga mesepol la man-enos kitan too nen Apo Shiyos, ja kaon-onod so nonta bilin to, tan ememati so nen Jesus.

<sup>13</sup> Jet wáray esel ja intenengan kon edapo alid dangit ja kowan to ey, “Isodat mo iyay. Si Apo Shiyos i onbindisiyon so nonta ira metey ali ni shaka pansilbi so nen Apo Jesus.”

Kowan nonta esel la edapo alid dangit. Jet say kowan ngo nonta Ispirito Santo nen Apo Shiyos, kowan to ey, “Agpayson man-imdeng ira, ta

mansalsheng ma ira ni obdara, ta sotan na dingkara, wáray sobadit shed dangit.”

<sup>14</sup> Jet idi onshemangak, wáray inon-an kon empotin kolpot, jet wára nodtan i timongaw wa singa sota kowan sha ey anak ni too. Nankorona ni balitok, jet wáray inegni-an ton mateshem ma kompay. <sup>15</sup> Jet wáray sakey ya anghil ja bimo-day ali nodta Timplo ja makedsang i esel to, jet inkowan to so nonta timongaw shi kolpot ey, “Ikompay mo ita kompay mo, ta sota timpon pengepit, simabi ma. Singa edowem ma ni kosto i tood dobong ja ma-eni.” <sup>16</sup> Jet siya, sota timongaw shima kolpot, inkompay to sota kompay to shiya dobong jet sota inpangepit to niya dobong, enaksheng ma.

<sup>17</sup> Jet wára mowan i apil la anghil ja bimo-day ali nodta Timplo shi dangit, jet wára ngoy mateshem ma kompay to. <sup>18</sup> Wára ngo i anghil ja edapo ali nodta kowan sha ey altar jet si-kato ngoy para pool. Kimeljaw ni makedsang so nonta anghil la mateshem i kompay to, ja kowan to ey, “Ikompay mo ita kompay mo, apit mo ira sota obas shima dobong, ta sota dames to, edowem ma.” <sup>19</sup> Jet sota anghil, inkompay to sota kompay to shiya dobong jet napit ma sota obas, jet inkespig to nodta para pespes ni obas. Sotan i kay-eshigan ni penosa nen Apo Shiyos. <sup>20</sup> Sota ira dames ni obas, epespes ira shima dasin ni siyodad, jet bimo-day aliy shala nodta pespesan. Jet say karokey ni dinedjos nonta shala, epat ta dasos ja kilomitro, tan dimen piya i ka-oneg ni debeng to.

## 15

*Sota piton anghil la engipedaw nonta penosa nen Apo Shiyos*

<sup>1</sup> Jet wára mowan i apil la kaskasshaaw wa sinjas ja inon-an kod ma naykayang. Waray piton anghil ja emengimotok ni piton kalasin pandikat ni tood dobong. Sajay may ka-onoran na pandikat ni too ja penosa nen Apo Shiyos, ta sajay i pospos ni bonget to.

<sup>2</sup> Jet wára pay i inon-an kon baybay ja singa samding i itsora to, nem wára ngoy singa apoy to. Jet sota ira toon engabak nonta Animal, tan eg nanshayaw nonta dineka ja kabakbakdang nontan na Animal, ono eg emalkaan ni domiro nonta ngaran to, si-kara sota dimayat nodta kadan ni baybay ya singa samding. Nanpengegshi ira ni kalshang ja in-akan nen Apo Shiyos son si-kara. <sup>3</sup> Jet inkansiyon sha sota kansiyon nen Moises ja emansilbi so nen Apo Shiyos nonta bayag da, tan sota kansiyon nonta Kalniro, ja kowan sha ey, “Kangeto-an tan kaskasshaaw i dingdingkam, si-kam Apo Shiyos ja Manakabalin! Koston emin, tan podnon emin i aramid mo. Si-kam i ari ja wára ni olay ingkatod ingka. <sup>4</sup> Angken sipa, entakot shaka Apo Shiyos et sota ngaran mo i emayshedjaw, ta si-kam bengat i koston Shiyos. Emin na ka-ili-ili shi dobong, ondaw ira di ja si-kam i panshedjawan sha, ta sota moka pengigsheng ja kosto, inon-an sha.” Sajay i inkansiyon sha.

<sup>5</sup> Jet idi naksheng iyay, inon-an ko sota Timplo shima dangit ja edo-katan et inon-an ko sota mismon kad-an nen Apo Shiyos. <sup>6</sup> Nodta Timplo, bimo-day ali sota piton anghil ja engita-jon nonta pito ngon kalasin pandikat ni tood dobong. Jet sota ira anghil, nanbaro ira ni kowan sha ey linen ja emenenili. Sota pagew sha, ebedbeshan ni balitok. <sup>7</sup> Jet sota sakey ya mayka-pat ta palsowa

ja wára nodta kad-an ni tinongawan nen Apo Shiyos, in-aknan to sota piton anghil ni pito ngon malokong. Sajay iren malokong, nankepno, jet si-katoy may-eshig ey nay-inan ni penosa nen Apo Shiyos. Si Apo Shiyos, wáred biyag ni olay ingkatod ingka. <sup>8</sup> Jet sota Timplo, enapno ni asok ja edapo son Apo Shiyos. Sotan i mengipa-sas ni kayshedjawan to, tan sota panakabalin to, jet angken sipa enshiy makasekep nodta Timplo ingkatod mepospos sota piton digat ja pedaw ira nonta piton anghil.

## 16

<sup>1</sup> Idi nontan, wáray intenengan kon makedsang nga esel ja edapo nodta Timplo ja kowan to so nonta piton anghil ey, “Daw kayo, jet jo iro-jag shima dobong sota nay-iyen nodta piton malokong, ja si-kato sota penosa nen Apo Shiyos.”

<sup>2</sup> Jet sota pilmiron anghil, dimaw ja to insho-jag sota nay-iyen nodta malokong to shi dobong jet say edaga nontan shi dobong, ebaybayang nga pasiya i bakdang nonta totoon minalka-an nonta Animal tan nanshayaw so nonta kabakbakdang nontan na Animal ja inemag ni too.

<sup>3</sup> Jet sota ngo maykadwen anghil, insho-jag to sota nay-iyen nodta malokong to nodta baybay jet nanbalin sota shanom ni singa shala ni etey ya too. Jet angken nganton emanbibiyag nodta baybay, etey iren emin.

<sup>4</sup> Insho-jag nonta maykatdo ngon anghil sota nay-iyen nodta malokong to shima ira pa-dok, tan shima ira eshom ma kedepo-i ni shanom, jet nanbalin sota shanom ni shala. <sup>5</sup> Jet intenengan ko sota anghil ja apo ni shanom ja kowan to ey, “Si-kam ma koston Shiyos ja wáren sigod ingkato niman, kosto iyay, ta in-anam moy dingkam ja

moka penosa! <sup>6</sup> Ta sotan iren totoo, binonora sota emati son si-kam, angken pay sota ira para padton inbetkag mo. Imayos i shalesha ni inkabonora; isonga in-aknan mo ngo sota ira totoon bimono son si-kara ni shala ja inomen sha! Anam ton sajay ngoy medeka son si-kara!” <sup>7</sup> Jet wáray intenengan kon esel ja edapod ma altar ja kowan to ey, “Owen Apo Shiyos ja Manakabalin, koston emin, podnon emin i moka penosa!”

<sup>8</sup> Sota mayka-pat ta anghil, insho-jag to sota nay-iyen nodta malokong to shima sekit, jet sota petang nonta sekit, nanbalin ni singa apoy ja toka pandenanga ira sota totoo shi dobong. <sup>9</sup> Jet sota ira totoo, na-atongan ira nonta epaladon petang ni sekit, jet sota na-atongan na totoo, shaka pan-i-abigi si Apo Shiyos tep si-katoy wáray panakabalin ton emengikan niyay ya digat sha. Nem eg ira pay nanbebawi, tan enshi pay i kowan sha ey ishayaw sha si Apo Shiyos.

<sup>10</sup> Idi naksheng sota mayka-pat, insho-jag ngo nonta maykedimen anghil sota nay-iyen nodta malokong to shima tinongawan nonta Animal, jet sota dogad ja intorayan to, bimolinget. Jet sota ira intorayan ton totoo nodtan, kinkindat sha shorog i shilesha, ta ensakit ta pasiay deknara. <sup>11</sup> Jet shaka pan-i-abigi pay si Apo Shiyos ja wáred dangit may-pangkep nonta sakit sha, tan sota bayang sha, nem eg ira nanbebawi nonta aramid shen ngaaw.

<sup>12</sup> Jet sota mayka-nem ma anghil, insho-jag to ngo sota malokong to shima ebadeg ga padok ja kowan sha ey Yopratis et sota shanom nodtan, ena-ti, say mesekana sota panshandan ali ira nonta ari tan sota solsolsharo shen medepod bedalan. <sup>13</sup> Jet

idi onshemangak, waray inon-an kon tedon ngaaw wa ispirito ja singa tingey ja emanbo-day ali nodta bongot nonta bowaja tan nodta bongot nonta Animal, tan nodta bongot nonta maykadwen Animal ja sinan para padto. <sup>14</sup> Say agpayso, sota emanbo-day ali, dimonyo ira ja emandeka ni milagro et si-karay ondaw shima a-ashi shiya intiron dobong ja mengolnong son si-kara ja mekigobat so nen Apo Shiyos ja Manakabalin, no onsabi sota akew ja ipa-sas son Apo Shiyos ni panakabalin to. <sup>15-16</sup> Sa-nopen sha ira shima dogad ja kowan shed esel ni Hodiyo ey Armagidon. (Jet say banshaan nen Cristo son si-katejo, kowan to ey, "Ondawak den palibdigab ja inges toy kaimotok ni mengibot jet man-imdeng sota esagana ni imotok ko, ja arig toy eg na-ogip, ja nanbaro, ta eg mebebaingan no onbo-day.")

<sup>17</sup> Sota maykepiton anghil, insho-jag to sota nay-iyen nodta malokong to shima shagem et waray makedsang nga esel la edapod ma Timplo, tan shima tinongawan nen Apo Shiyos, ja kowan to ey, "Naksheng ma!" <sup>18</sup> Jet waray makedsang nga bagidat, tan makedsang nga kirol, tan makedsang nga jegjeg. Epaladon makedsang sotan na jegjeg, ja enshiy toka kay-ingesi. Angken nonta pilmiron epalsowan ni tood dobong, ingkato niman, enshiy jegjeg ja inges nontan i kakedsang ton epasamak. <sup>19</sup> Sota kabalkan na siyodad, nantedon nabtak, jet sota ira siyodad shi emin na ilid dobong, epilshi mala. Jet si Apo Shiyos, ninemnem to sota siyodad ni Babilonia ja emayshedshedjaw ey katekalan et inpalaw toy bonget ton pasiya nodtan. <sup>20</sup> Jet emin na kamagan ja wared kawa ni baybay, na-

omas et angen sota ira shontog, na-enshi la. <sup>21</sup> Jet nandanti ni kakembaleg, ja say bel-at ni sanseskey, dimen polon kilo et binesian sha ira sota totoo. Jet sota ira totoo, shaka pan-i-abigi si Apo Shiyos, ta epalado sotan na inpendanti to son si-kara.

## 17

*Sota maypangkep ni Babilonia ja nay-arig ey biin maleki*

<sup>1</sup> Jet sota sakey so nonta piton anghil ja engegshi nonta maykepiton malokong, dimaw ali son si-kak et kowan to ey, "Kala, ipasas ko son si-kam i keshosa nonta biin maleki. Si-katoy emantoshay shima kad-an ni eshakil la shanom et si-katoy shaka ishaysyaw. <sup>2</sup> Jet si-katoy etodan ira nonta a-ashi shi dobong ni edogit ta aramid. Jet sota ira totoo shi dobong, singa ebotent ira ni adak, ta sota ngaaw wa aramid nontan na bii, si-katoy shaka on-onori, ja eg sha amtay shaka dagdag-a."

<sup>3</sup> Nontan ma, indaw towak nonta anghil shima dogad ja naybetaw wa enshiy totoon nanbaleley jet sota Ispirito Santo ngo nen Apo Shiyos i engitoshong son si-kak. Nodtan, waray biin inon-an ko ja nankabajo shi embalengen animal. Jet sotan na animal, si-katoy naysolatan ni ekalkalasin ngaran, jet sajay ya naysolat, sotan i emengipa-amta ey piyan nonta biin da-pa-an si Apo Shiyos. Waray piton toktok nonta animal la nankabajo-an to, tan sampoloy sakdod to. <sup>4</sup> Jet sotan na bii, nanbaro ni poron embalenga. Jet ebisti-an ni balitok tan ekalkalasin baton ebanol ja sesiked i boya to. Waray inegshian ton balitok ka tasa, ja singa si-katoy napno-an nonta na-na-jew wa edogit ta aramid to ni toka

pekileki. <sup>5</sup> Jet shi temok to, wáray naysolat ja ngaran, nem eg amta no ngarantoy olog nontan, jet say naysolat ja ngaran, sajay: “Si-kak si Babilonia, ja ina ni emin na biin maleki, tan emin na totoon edogdogit i shaka pespesing shi dobong.” <sup>6</sup> Sotan na bii, inon-an kon singa inboteng toy shala ira nonta too nen Apo Shiyos, ja binbinora tep ireka mengitosho ni maypangkep son Jesus. Jet nonta in-asis ko so nontan na bii, asdeg ton naka messhaaw ni itsora to.

<sup>7</sup> Jet nontan, sota anghil, kowan to son si-kak ey, “Ngantoy moka kesshaawi? Ikowan koy olog nonta biin inon-an mo, tan sama animal la pitoy toktok to tan sampoloy sakkod to, ja nankabajo-an to. <sup>8</sup> Sama animal la inon-an mo, wára nontan shi biyag, nem niman, etey ma. Onbo-day ali shima nayshalem ma naybaloshan ni dimonyo, nem meshosa met laeng ja pilshi-en ali nen Apo Shiyos. No asen ira nonta totoo shi dobong i ibo-day to, messhaaw ira sota eshom, ja aliwén too nen Cristo, ta say amtara, etey, nem iyay ya ebiyag mowan ali. Messhaaw ira ta eg ira nayda-kam nodta sigod ja dista-an ni ngaran ira nonta wáray biyag to ingkatod ingka.”

<sup>9</sup> Jet inkowan pay nonta anghil sota olog ni inon-an ko, ja kowan to ey, “Olay toy wáray nem-nem ton mengamta so niyay ya ikowan ko. Sota piton toktok nonta animal, si-katoy kaytoshongan nonta piton shontog ja tinongawan nonta bii. Tan maytoshong pay so nodta piton ari. <sup>10</sup> Nem sota dima, aliwén ari mala ira, nem sota sakey, si-katoy wáred toray, jet sota sakey, aneng nin aliy pantoshay to. Jet sotan aliy mantoshay ni sankatikan bengat. <sup>11</sup> Sota animal ja wára nontan shi biyag, ja eg nin manbiyag niman, si-katoy maykewalo, ja kait

ira nonta piton ari, nem mepilshi met laeng nem ka-onoran. <sup>12</sup> Jet sota sampolon sakkod to ja inon-an mo, si-katoy kaytoshongan nonta sampolon ari. Eg sha nin inewát i kedsang ni pengitoshay sha, nem no ewáten shay kedsang shen mengitoshay, man-inshas iren mantoshay ni sakey ya oras bengat, ja kadwa nonta animal. <sup>13</sup> Sajay iren sampolon ari, nani-inges i pangkep sha, jet itolok sha sota animal ja mengosal nonta kedsang sha pangkep ni kina-ari sha. <sup>14</sup> Jet sajay ira, kobaten sha sota Kalniro, nem sota Kalniro, ebaken to ira, ta si-katoy Apo ni emin na apo, tan si-katoy Ari ni emin na ari. Jet sota ira too ton pinidi to, ja ebadege i pamatira, ja imonod son si-kato, mayda-kam ngo ira son si-kato ni pengebak to.”

<sup>15</sup> Jet kowan pay nonta anghil son si-kak ey, “Sota eshakil la shanem ja inon-an mon kad-an ni tinongawan nonta biin maleki, si-katoy kaytoshongan ira nonta eshakil la totood emin na ilid dobong ja ekalkalasiy esel sha. <sup>16</sup> Jet sota sampolon sakkod ja inon-an mo, tan sota animal, kontra-en sha met laeng sotan na biin maleki, jet al-en shen emin sota wára son si-kato. Debosan sha et kenen sha pay sota daman to et poolan sha ma sota ebay-an. <sup>17</sup> Ta si Apo Shiyos met laeng i engipanemnem so nonta ira sampolon ari ey mansekekey iren mengipiyal ni toray sha so nonta animal, tep sotan i sigod ja plano nen Apo Shiyos, ingkatod metongpal sota kowan to. <sup>18</sup> Jet sota biin inon-an mo, sotan i kaytoshongan nonta kabalkan na siyodad ja timengel so ni emin na ari shi dobong.”

## 18

<sup>1</sup> Idi naksheng den emin iyay,



waray inon- an kon anghil ja edapo alid dangit ja dimespag, jet sajay ya anghil, ebadeg i panakabalin to. Emenenili et sinilwan to sota intiron dobong. <sup>2</sup> Jet kimeljaw ni makedsang, ja kowan to ey, “Babilonia, ja ilin emayshedshedjaw ey katekalan, sharal to ma, epilshi ma! Nanbalin ma niman ni singa dogad ira nonta dimonyo, ta enshi may balebaley. Anam ton pan-inan ira ni angken sipen makedsel la dimonyo, ono paninan ira nonta titit ta emengan ni toon etey. <sup>3</sup> Say kabol la epilshian to, emin na tood ja dobong, nayda-kam ira so nonta edogit ta pasiya ja aramid to. Jet sota ira a-ashi shiya dobong, singa biniira tep si-katoy etod-an sha ni edogit ta aramid. Jet sota ira emanbiyaki shiya dobong, inpabaknang to ira, ta ebosdon ja mengosal ni kompormi, jet angken piga, tongkalen to.”

<sup>4</sup> Jet wára pay i intenengan kon esel ja edapod dangit ja kowan to ey, “Si-kayon totook, ilekjas jo, ta baka et ey ma-ewís kayon mandeka nonta ngaaw wa aramid ja toka dagdag-a. Ilekjas jo say eg kayo mayda-kam nonta digat ja da-kaman to ali. <sup>5</sup> Ta sota basol to, nansasekdet ja singa simabi alid ja dangit, jet sotan na aramid ton ngaaw, eg dibkan nen Apo Shiyos. <sup>6</sup> Sota dingka to son si-kayo, ibedes jo, jet angken pandobliyo i pengikesho to nonta emin na aramid to. Tamtamen to ngo, ja angken mandoblin dakaman toy digat. <sup>7</sup> Epaladoy toka pengi-tek shorog ni bakdang to, jet basta nganton piyan to, alen to. Isonga say pesing jo, i-enam jo nodtan na aramid to i shosa to: i-akniyo ni pandikatan to, ja pannengnengisan to, ta say wared nemnem to, kowan to ey si-katoy toray ja ari, jet kowan to pay ey, ‘Apay ebalo-ak? Enshiy

nak pandeshingitan.’ <sup>8</sup> Sotan den dastog to, san-akew ja onsabi son si-katoy digat et sajay iray digat ja dak-aman to: sakit, daringit, bitil, jet mepoolan pay ni apoy. Ta si Apo Shiyos ja onshosa son si-kato, si-katoy kakedsang.

<sup>9</sup> “Jet sota ira a-ashi shi dobong ja emii son si-kato, ja kinenkenas shay wára son si-kato, onngognog ira, ta asen shay asok to nem mankepooli. <sup>10</sup> Eg ira on-esop tep en-asimogal shen asen i toka panda-kam ni digat. Jet kowan sha ey, ‘Ara! Kasipa day Babilonia ja kabalkan na siyodad ja katekalan! Sakey ya oras bengat ja simabi ali sota keshosa to!’

<sup>11</sup> “Jet angken sota ira emanbiyaki shi dobong, onnangis ira ni ma-kes sha, tep enshi may menongkal nonta dakon kalkara; kenshat ta onkawas ma. <sup>12-13</sup> Jet say kalkalasin dako sha, sajay: waray baka, kalniro, kabajo, tan sota dokanan na kaikoyod ni kabajon para kobat; waray balitok, palata, boronsi, danshok, manmanon kiyew ja emansengew, sota kiyew wa inemag shen para arti ni baley ja epalit; tan sota baton mapteng ja kowan sha ey marble; wára pay sota kalasin dopot, ja empotiy eshom, embalengay eshom, tan violet i eshom, tan sota sida; wára pay sota baton epalit ja osal ni bii, ja pirlas i eshom; wára pay iray adak, daneb, sota kalasin para daok ni sira, tan sota kalasin bangbangdo, sota kalasin arina ja medeka ni tinapay ja en-amis; wára pay sota sangi ni ilipantin edaga ni para alkos; tan wára pay i toon idako sha ja para бага-en.

<sup>14</sup> “Jet sota ira emanbiyaki, kowan sha so nontan na siyodad ja epilshi ey, ‘Emin sota ka-iririn ja piningitan mo, enshi ma son si-kam, jet sota kabaknang

mo onto nam-ay ya biyag mo, epokaw ma; jet eg on-oli ma son si-kam!’<sup>15</sup> Jet sota ira emanbiyaki ja emengileko ni ka-iri-irin son si-kato, ja si-katoy inbaknang sha, eg ira on-esop tep en-asimogal sha ngon asen i toka panda-kam ni digat. Jet onnangis iren makedsang ni ma-kes sha, jet ikowan sha ey,<sup>16</sup> ‘Ara! Kasipa da ima kabalkan na siyodad, ja emengosal ni ekalkalasin dopot ta epalit, ja ema-alkosi ni balitok tan sota eshom ma ekalkalasin ebanol la maosal!’<sup>17</sup> Sakey ya oras bengat i inkareshal nonta ebanol la ka-iri-irin ja wara nodtan!’

“Jet sota ira emin na pangolo nodta bapor, tan sota ira emengitoshong nonta bapor shi dawán sha, tan angken pay sota ira emanobda nodtan, tan angken pay sota ira emanbiyaki ja nangogan, bimetaw ira et binojara.<sup>18</sup> Jet epaladoy nangis sha, ni in-asas sha so nonta dowet ni siyodad ja emankepooli, jet kowan sha ey, ‘Ara! Kasipa da ima kabalkan na siyodad! Enshiy maka-inges son si-kato, manipod nontan da ingkato niman!’<sup>19</sup> Jet shina-peg shay toktok sha ni depok, jet ni-mangis iren makedsang, ni makes sha, ja kowan sha ey, ‘Ara! Kasipa da iman na siyodad ja kabalkan! Si-katoy binaknangan iren emin nonta waray bapor to, ta angken nganto, kabaalan ton tongkalen. Jet niman, sakey ya oras bengat i inkareshal to!’

<sup>20</sup> “Nem si-kayon tood dangit, pan-imdeng kayo ni inkapool to! Si-kayon too nen Apo Shiyos, pati si-kayon apostol tan para padto nen Apo Shiyos, pan-imdeng kayo ta sota inpasparing to son si-kayo, inbales nen Apo Shiyos ja shinosa ta ngo!”

<sup>21</sup> Jet sota sakey ya anghil ja makedsang, engala ni ebadeg ga bato, ja singa sota baton kidingan,

jet inkespig to nodta baybay, ja kowan to ey, “Jet niman, sota siyodad ni Babilonia ja katekalan na siyodad, mesheshal ja singa maybes-ig, ja inges to sota kidingan ja inbes-ig kod ma baybay! Jet eg ma may-odi mowan na siyodad ingkatod ingka.<sup>22</sup> Jet enshi may mandaladsak nodtan; enshi la sota ira emangitara, enshi la sota para mosiko, enshi la sota janget ni kolesing tan trompita. Jet sota ira emandeka ni angken nganto ja wara nodtan, ma-enshi ma ira. Angken pay sota kiyas ni kidingan nodtan, ma-enshi mala.<sup>23</sup> Jet sota kingki ja kaonniyal nodtan, ma-shep ma et ma-enshi mala sota noteng ni emandaladsak shima kad-an ni nankasal. Sajay i mepesamak so nontan na siyodad, ta sota emanbiyaki ja edapod jay, si-karay katekalan shi intiron dobong, jet emin na ilid ja dobong, inedinan sha ni ngaaw; inodaw ton emin i totoo ja si-kato may inonod sha.”

<sup>24</sup> Sota ira para padto ja inbetkag nen Apo Shiyos, tan sota ira eshom ma too nen Apo Shiyos, shiman i eteyan sha ja naybok-bokan ni shalesha. Isonga shinosa nen Apo Shiyos sotan na siyodad, say ikaro to sota emin na nankebonon too shiya dobong!

## 19

*Sota kankansiyon shi dangit ni inpanshayaw sha ni inpangabak nen Apo Shiyos*

<sup>1</sup> Idi naksheng da ira jay, waray intenengan kon singa makedsang ja esel ni eshakel la too shi dangit ja kowan sha ey, “Manshedjaw kito so nen Apo Shiyos! Si-katoy emengisedakan, si-katoy emengebak ni olay, si-katoy waray panakabalin to!”<sup>2</sup> Ta say wared nemnem to, sota koskosto

ja enshiy kolang to. Isonga shi-nosa to sota siyodad ja edogit i aramid to, ja singa maleki, tep si-katoy singa dimogit so ni intiron dobong ja inedinan to ni edogit ta aramid to. Eshosa ta ikaro to sota inbono to so nonta ira emansilbi son Apo Shiyos!”<sup>3</sup> Jet intenengan ko mowan i keljaw ira nonta wared dangit, ja kowan sha ey, “Manshedjaw kito so nen Apo Shiyos! Sota asok nonta siyodad ja epoolan, etowen ni olay ingkatod ingka!”

<sup>4</sup> Jet sota showen polo tan epat ta singa pangolo ni emati son Cristo, tan sota epat ta palsowa, nanshomog ira ja nanshayaw son Apo Shiyos. Wara si Apo Shiyos ja timongaw nodta naykawen tongawan to, jet kowan sha ey, “Siya! Si Apo Shiyos i panshedjawan tayo!”

<sup>5</sup> Jet wára pay i intenengan kon edapo nodta naykawen tongawan ja makedsang nga esel, ja kowan to ey, “Si Apo Shiyos i panshedjawan ni emin, angken sipa — si-katoy emansilbi tan emati son si-kato, si-katoy ebaba tan si-katoy waray saad to!”

<sup>6</sup> Jet wára mowan i intenengan kon singa esel ni eshakil la too, ja singa bongog ni eshakil la shanom tan singa kedsang ni kirol i pigsa to, ja kowan sha ey, “Manshedjaw kito so nen Apo Shiyos! Si-katoy Kangeto-an et emantoshay ma!”<sup>7</sup> Mandaladsak kito et ikowan tayoy imdeng tayo, tan manshedjaw kito son si-kato. Ta sota Kalniro, simabi ma sota pengesawa to. Sota esaw-en ton bii, nansagana; <sup>8</sup> jet naypalobos sotan na bii ja manbesho ni empotin dopot ja emenenili.” Kowan nonta esel nonta eshakil la too. Jet say olog nontan na empotin dopot, si-kato sota eshiyosan na aramid ira nonta too nen Apo Shiyos.

<sup>9</sup> Jet sota anghil, kowan to son si-kak ey, “Isodat mo iyay: Manimdeng ira sota na-awis ja mekilikob so nonta Kalniro ni pengesawa to.” Jet kowan to pay son si-kak ey, “Sajay ya inkowan ko, podnon esel nen Apo Shiyos.”<sup>10</sup> Jet si-kak, nanshomogak shi sango-an nonta anghil ja kowan ko ey manshedjawak koma son si-kato, nem say kowan to, “Enshi! Kareka manshedjaw son si-kak! Nan-inges kita ja emansilbi son Apo Shiyos, ja inges to ira sota eshom ma a-akim shi pamati ja etoled ja mengikowan ni maypangkep so nen Jesus shi dobong. Si Apo Shiyos i panshedjawan mo.” (Inkowan to iyay ta sota ira etoled ja mengikowan ni maypangkep son Jesus, inges sha ira sota para padto nonta bayag da ja emengikowan ni esel nen Apo Shiyos.)

*Sota Animal, tan sota sinan para padto, na-abak mala ira*

<sup>11</sup> Jet nontan, inon-an kon singa edo-katan i dangit et waray inon-an kon empotin kabajo. Jet waray nankabajo nodtan, jet say ngaran nonta nankabajo, si Podno, ono si Panshingan. Jet say kabol ni toka pekikobati, tan sota toka pengowis, say mewesha ni olay sota koskosto ono podno. <sup>12</sup> Sota mateto singa shalang ni apoy jet eshakil ngoy korona ni toktok to. Waray ngaran ton naysolat met laeng son si-kato, nem angken sipa, enshiy maka-amta ni emin na olog nontan, no diket si-kato bengat. <sup>13</sup> Sota baro to, masas sa naybanew shi shala, jet sota ngaran na kai-awag nonta totoo son si-kato, Esel nen Apo Shiyos. <sup>14</sup> Jet sota ira kesolsolsharo shi dangit, imonod ira son si-kato, ja nanpankabajo ira shi empotin kabajo, jet say baro sha, poron empoti ngo. <sup>15</sup> Waray singa

kampilan ja nanbangiy tarem to ja emanbo-day ali nodta bongot to, jet si-katoy osalen ton meneshal ni ka-ili-ili shi dobong. Si-katoy mengitoshay ni ka-ili-ili et say itsora ni pantoshay to, olay toy piyan ton pengitoshay; enshiy on-sopngil so. Si-katoy mengipedaw nonta epaladon shosa nen Apo Shiyos so nonta ira nankekedsel. <sup>16</sup> Nodta baro to, tan nodta olpo to, wára mowan i sakey ya ngaran ton naymalka, ja kowan to ey, “Ari ni emin na ari, tan Apo ni emin na apo.”

<sup>17</sup> Jet wáray inon-an kon anghil ja dimayat ja nanpatok shi sekite et kimeljaw ni makedsang, ja tinewal to ira sota titit ja emantedjatedjab shima naykayang, ja kowan to ey, “Kalejo, ka-olnong kayo di ja mengan nonta insagana nen Apo Shiyos ja kenen jo. <sup>18</sup> Say ipakan to son si-kayo, sota daman ira nonta a-ashi, sota daman ira nonta kapitan ni solsharo, sota daman ira nonta matekal la too, tan sota daman ni angken sipen too — baga-en ono aliwen baga-en, sota ebaba ono sota ira wáray toray to — tan angken pay sota daman ira nonta kabajon nankabajo-an sha!”

<sup>19</sup> Jet nontan, inon-an ko sota Animal, tan sota a-ashi shi dobong ja na-olnong ira. Na-olnong pay ira sota eshakil la solsharo sha, ja kobaten sha sota nankabajo nodta empotin kabajo, pati pay sota ira solsharon imonod so nonta nankabajo. <sup>20</sup> Nankobat ira et enaskel sota Animal tan angken pay sota sinan para padto ja emandegdeka ni kaskasshaaw. Sotan na sinan para padto, si-kato sota maykadwen Animal la engi-owap ira nonta totoo nontan da et imonod noman ira sota totoo ja emalka-an nonta malka ni Animal tan sota totoo nanshayaw so nonta dineken kabakbakdang

nonta pilmiron Animal. Jet sotan iren showa, naykespig iren mabi-day shima apoy ya singa baybay ja asoprin emanshedang ni olay. <sup>21</sup> Jet sota ira eshom ma kait nonta Animal, binono nonta kampilan ja bimo-day shi bongot nonta nankabajo shi empoti. Jet emin ira sota titit, dimekeng ira nonta daman ni toon kinan sha.

## 20

*Sota pantoshay nen Cristo ni sandibon tawen, tan sota oltimon ka-ebak ma nen Satanas*

<sup>1</sup> Jet wáray anghil ja inon-an kon edapo alid dangit ja inegshian to sota tolbeke ja mengilokat nonta nayshalem ma naybaloshan ni dimonyo, tan wára pay i inegshian ton ebadeg ga kolkolong. <sup>2-3</sup> Jet inshel to sota bowaja ja kowan sha ey oleg nonta bayag da, ja si-kato met laeng kari si Dimonyo, ono si Satanas, jet binedod to. Jet idi naksheng nga binedod to, inpalaw to nodta nayshalem ma naybaloshan ni dimonyo et ebalod med man ni sandibon tawen. Pinokit to sota osok, asan toka itolbek, say eg ma ali makabo-day, say eg to ma i-owapan i totoo dobong ingkatod eg nin mepospos sota sandibon tawen. Nem no mepospos sota sandibon tawen, mebdos ni sankatikan mowan.

<sup>4</sup> Jet wára iray inon-an kon tongawan, jet say timongaw nodtan, si-karay epiyal ja mantoshay. Jet inon-an ko pay i dinawa ira nonta ebono shi dobong maypangkep nonta inpangitoto sha nonta maypangkep son Jesus, tan sota inpangikowan sha nonta esel nen Apo Shiyos. Sajay ira sota eg nanshayaw so nonta Animal, ono eg nanshayaw so nonta kabakbakdang nonta Animal ja inemag. Tan sajay ira sota eg timolok ja

memalka-an i temok sha, ono tak-day sha nonta malka ni Animal. Nem angken ebono ira, nanbiyag met laeng ira jay et ekitoshay ira so nen Cristo ni sandibon tawen. <sup>5</sup> Sajay ya inpanbiyag ira nonta ebono, si-katoy pilmiron inpanbiyag ni eshakil la totoo. Jet sota ira eshom ma nanketey, manbiyag ngo ira di met laeng no mepospos sota sandibon tawen. <sup>6</sup> Man-imdeng ira sota maydakam nodta mepangdon man-ongal, ta kinaasi-an ira nen Apo Shiyos ja pasiya. Jet no onsabi sota maykadwen ketey ni too, ja patey ingkatod ingka, eg ma-anano ira ja epangdon nan-ongal, no diket si-kara may papashi nen Apo Shiyos tan si Cristo et mekitoshay ira son si-kato ni sandibon tawen. <sup>7</sup> No mepospos sota sandibon tawen, mebodos ali si Satanas nodta naybaloshan to. <sup>8</sup> Jet to i-owapan mowan iray totoo shi intiron dobong et olnongen to ira ja mekigobat. Jet say karakel sha, eg mebidang ja singa sharat shima kilig ni baybay. Sajay ya eshakil la totoo, si-katoy inpactora nonta bayag da ey si Gog nen Magog. <sup>9</sup> Jet sajay ira, embanaw i singkeb sha ni shaka pan-ekad ali et dimoten sha ira sota kampo nonta totoo nen Apo Shiyos tan sota siyodad ja ensemek to. Nem si Apo Shiyos, pan-oshan to di ni apoy shi dangit et poolan to ira sota nandi-mot so nonta totoo nen Apo Shiyos, ja makakontra son si-kara. <sup>10</sup> Jet si Satanas, ja engi-owap iren ja eshakil la totoo, maykespig ma shima apoy ya singa baybay ya asoprin emanshedang, ja naykespigan nonta Animal tan sota maykadwen Animal ja sinan para padto. Jet shiman, mandikat ira ni ka-akawan tan kalebi-an ja enshiy salsheng to, ingkatod ingka.

*Sota keshosa ali nonta eg emati*

<sup>11</sup> Jet waray inon-an kon ebadega empotin tongawan et waray timongaw nodtan. Jet say dobong, tan sama wared naykayang, namomas ira tep singa eg sha itoled i kawasha nonta timongaw nodta empotin tongawan. Sota dobong, tan sama naykayang, kolpin nanshi mala. <sup>12</sup> Jet inon-an ko ira sota nanketey, ja nankengato tan nankebaba, ja dimayat ired sangan nonta empotin tongawan. Jet wara iray dibshon na-okdag. Jet waray apil la dibshon na-okdag ja si-katoy naysolatan ira ni ngaran nonta nay-aknan ni biyag ja enshiy to engintegangan. Jet sota ira nanketey, no ngarantoy naysolat nodta ira dibsho ja aramid sha nonta wara ired biyag, si-kato ngoy kaybetayan ni panbenagan sha. <sup>13</sup> Jet sota ira nanketey shima baybay ja dimeneng, tan sota ira nanketey ya wared ma nayshalem ni bo-day, bimo-day ira di et emin ira, say panbenagan sha, maybetay nodta aramid sha ngo. <sup>14</sup> Jet sota patey, enshi mala ja singa naykespig shima singa baybay ya emanshedang jet enshi ngo la sota kedawi ni nanketey ja kowan sha ey Hadis. Sota apoy ya singa baybay, si-kato sota maykadwen patey, <sup>15</sup> jet sota toon enshiy ngaran shen naysolat nodta dibshon naysolatan ira nonta nay-aknan ni biyag, maykespig ira nodta singa baybay ya emanshedang ni olay.

## 21

*Sota badon dangit tan badon dobong ali*

<sup>1</sup> Idi naksheng ma iyay, waray inon-an kon badon dangit tan badon dobong, ta sota pilmiro den dangit tan pilmiro den dobong, enshi mala ira, pati sota shanom shi baybay. <sup>2</sup> Jet inon-an ko ali sota Siyodad nen Apo Shiyos, ja

badon Jerusalem ja sa-dat nonta na-omas da. Edapo ali jay shi dangit, ja mapteng nga mayshed-mang, ja singa sota biin nanbisti ni i-asewara so. <sup>3</sup> Jet nontan, waray intenengan kon maked-sang nga esel ja edapod ma empotin tongawan, ja kowan to ey, “Jet niman ma, sota dogad ja pan-iyanan nen Apo Shiyos, wara ma shi kad-an ni too! Si Apo Shiyos, meki-yan son si-kara et si-kara may too to; wara ma son si-kara et si-katoy etopog ga Shiyos sha. <sup>4</sup> Po-naren toy sayesha et enshi mala i metey; enshi pay i mandeshingit ono onnangis, tan enshi pay mala i ensakit. Ta sota sigod ja emengi-kan ni digat, enshi mala.”

<sup>5</sup> Jet sota wared ma tongawan, kowan to ey, “Niman, sa-datan ko ni badon emin sota sigod!”

Jet kowan to pay son si-kak ey, “Isodat mo iyay: sota esel ko, agpayso; isonga mebedin na panshinda. <sup>6</sup> Jet siya, etongpal nga agpayso! Si-kak sota kowan sha ey Alfa tan Omega, ono sota shoki-an to tan engintegan to. Jet sota na-kew ni shanom, i-aknan ko ni shanom ja mengi-kan ni biyag ja enshiy to engintegan, ja enshiy bayad to. <sup>7</sup> Tep sotan i koston kayda-kaman ira nonta enganos ni digat ja eg na-abak. Jet si-kak ma i etopog ga Shiyos sha et si-kara ma i annak ko. <sup>8</sup> Nem no sota ira makedsel, say toshongen sha, shima singa baybay ja aso-prin emanshedang. Jet sajay ira sota ontorong shiman: sota entapi shay bakdang shen metey may-pangkep son Cristo, sota ira eg memati son si-kato, sota ira edogit i shaka dagdag-a, sota ira mabono, sota ira mabii ono maleki, sota ira manmantala, sota ira manshed-jaw ni inemag met laeng ni too ja sinan shiyos, tan sota ira malobod. Sota kaykespig ira niyay

shima apoy ya emanshedang ingkatod ingka, sotan i maykadwen patey.”

### *Sota badon Jerusalem*

<sup>9</sup> Jet sota sakey so ira nonta maykepiton anghil ja engegshi nonta maykepiton malokong, ja nay-inan nonta digat ni too nontan da ja ka-onoran, kowan to son si-kak ey, “Kala, ipa-sas ko son si-kam sota esaw-en nonta Kalniro.” <sup>10</sup> Jet sota anghil, indaw towak shi ekayang nga shontog ja intorong ni Ispirito Santo nen Apo Shiyos et inpa-sas nonta anghil son si-kak sota siyodad nen Apo Shiyos ja Jerusalem, ja maramen emankedapo ali son si-kato shi dangit. <sup>11</sup> Emenenili ja inges to si Apo Shiyos; emandining nga pasiya, ja inges to sota kapaditan na baton para alkos, ono sota kowan sha ey jaspir, tan malonas pay ya pasiya ja singa sota kowan sha ey kristal. <sup>12</sup> Na-alad ni ekayang nga alad et waray pasbol ton sampolo tan showa, jet wara ngoy sampolo tan showen anghil ja emanbantay nodtan na pasbol. Nodtan na pasbol, naysolat iray ngaran nonta sampolo tan showa ja anak nen Israel, ja makapoli so ni emin na Hodiyo. <sup>13</sup> Jet nodta petek ni bedalan tan ditopan, tan nodta petek ni inpawsaw tan inpasdong, waray santetdon pasbol. <sup>14</sup> Jet sotan na siyodad, waray sampolo tan showen tokod to et naysolat nodtan na tokod iray ngaran nonta sampolo tan showen apostol nonta Kalniro.

<sup>15</sup> Jet sota anghil ja ekitbal son si-kak, waray balitok ja inegshian ton para dokod, ja osalen ton pandokod nonta siyodad, pati sota pasbol to, tan sota ira alad to. <sup>16</sup> Jet sotan na siyodad, say banaw to tan shokey to, nan-inges. Dinokod to sota siyodad nonta para dokod to et say dokod ni

banaw to, shokey to, tan kayang to, nan-i-inges ja showen dibo tan showen dasos ja kilometro. <sup>17</sup> Sota anghil, dinokod to mowan sota kayang ni alad et say kayang to, piton polo tan epat ja mitoros shi dokod tayon too, tep si-katoy inosal nonta anghil ni inpandokod to.

<sup>18</sup> Say nay-alad nodta siyodad, sota baton kowan sha ey jaspir; nem sota oneg ni siyodad, poron balitok. Jet emandining ja singa samding. <sup>19</sup> Jet sota tokod ja nay-edetan nonta alad nonta siyodad, na-alkosan na emin nonta ekalkalasin ebanol la bato. Say nay-amag nodta pilmiron tokod, sota kowan sha ey jaspir; sota maykadwa, sota sapiro; jet sota maykatdo, sota agata; sota mayka-pat, sota ismiralda; <sup>20</sup> sota maykedima, sota onisi; sota mayka-nem, sota karniliyan; sota maykepito, sota krisolito; jet sota maykewalo, sota birilo; sota maykesiyam, sota topas; sota maykesampolo, sota krisoprasa; sota maykesampolo tan sakey, sota hasinto; jet sota maykesampolo tan showa, sota amatista. Sajay iray kalkalasin bato ja nay-amag nodtan.

<sup>21</sup> Jet sota sampolo tan showa ja pasbol nonta siyodad, say nay-dekeb so ni sanseskey so ira niyay, sota kowan sha ey pirlas. Sota kalsara nonta siyodad, poron balitok ja emandining nga singa samding.

<sup>22</sup> Nodtan na siyodad, enshiy nak inon-an na Timplo. Eg mesepol, ta si Apo Shiyos ja Kangeto-an, tan sota Kalniro, wara iren mismo nodtan et si-karay singa Timplo nodtan. <sup>23</sup> Jet sotan na siyodad, eg to mesepol i sekit ono bolan na onsilew so, ta si Apo Shiyos ja emenenili tan sota Kalniro, si-karay onsilew so nontan na siyodad. <sup>24</sup> Si-karay mengi-kan ni

olnos shi intiron ili ni dobong, ja singa sota silew ja kaondawag ni shalan na pan-akshan ni too. Jet sota ira a-ashi shi dobong, ondaw iren waray sha i-akan ja pengiredjaw sha son Apo Shiyos. <sup>25</sup> Sota ngo ira pasbol nonta siyodad, nay-dokat ni olay tep ka-akawan shiman ni olay et enshiy kalebi-an ja pengilkeb sha so. <sup>26</sup> Jet sota ira totoo ja edapod emin na ka-ili-ili, ireka onsekep ja mengi-kan ni panshedjaw sha tan pan-iyaman sha son si-kato. <sup>27</sup> Nem no sota ira ngaaw i aramid to, ja ma-owap ono edogit i toka dagdaga, eg ira mebedin na onsekep nodtan na siyodad. Say wara bengat nodtan, sota ira naysolat i ngaran sha nodta dibshon naysolatan ni ngaran ira nonta ewad-an ni biyag ja enshiy to engintegan.

## 22

<sup>1</sup> Sota anghil, inpa-sas to son si-kak sota shanom ma emengikan ni biyag et sajay ya shanom, emandining ja singa sota kowan sha ey kristal. Edapo ali sotan na shanom nodta tongawan nen Apo Shiyos, tan nodta kad-an ni Kalniro. <sup>2</sup> Emanbodos sotan na shanom nodta kawa ni kalsara nodtan na siyodad. Sota kilig nonta shanom, waray nanmamang nga kadasan et kaondames sotan ni binodan, jet say toka demesa, sampolo tan showen kalasi ni makatawen. Jet sota bolong nontan na kadasan, si-katoy emengekas ni sakit ni too shi ka-ili-ili. <sup>3</sup> Jet sota toon engikan ni digat ni totoo nontan da shi dobong, enshi nodtan na siyodad, ta si Apo Shiyos, tan sota Kalniro, wara nodtan ja timongaw. Jet sota ira emansilbi son si-kato, manshedjaw iren mismo son si-kato. <sup>4</sup> Jet asen sha sota dopa ton mismo et maysodat i ngaran to nodta temok sha. <sup>5</sup> Jet nodtan

na siyodad, ka-akawan ni olay, eg mesepol i silew, ono kingki, ono sekil, ta si Apo Shiyos ja emenenili i mismon silew nodtan na siyodad. Jet mekitoshay ira son si-kato ingkatod ingka.

*Sota ka-onoran ja intenengan nen Juan, man sota inon-an to*

<sup>6</sup> Jet kowan nonta anghil son si-kak ey, “Saja insolat mo agpayso; isonga mebedin na panshingan. Si Apo Shiyos i engi-kan ni Ispirito to ja mengitoshong so nonta ira para padto et si-kato met laeng i engibetkag nonta anghil to ja mengipa-sas so nonta ira emansilbi son si-kato no ngarantoy kenshat ta medeka ali.” Kowan nonta anghil.

<sup>7</sup> Kowan nen Apo Jesus ey, “Tala-ak den shagos et sota toon memati niya naypadto ja naysolat shiyay, bindisiyonan nen Apo Shiyos!”

<sup>8</sup> Si-kak si Juan ja mismon engitneng tan engas ira niyay ya insolat ko la. Jet nontan, istay kowan ko ey manshedjawak koma so nonta anghil ja engipa-sas niyay son si-kak, <sup>9</sup> nem say kowan to son si-kak, “Enshi! Kareka manshedjaw son si-kak! Naninges kita ja emansilbi son Apo Shiyos, ja inges toy kepansilbi ira nonta a-akim shi pamati, tan sota ira para padto, tan sota ira eshom ma ememati niya naysolat shiyay ya dibsho. Si Apo Shiyos i panshedjawan mo!”

<sup>10</sup> Jet kowan to pay son si-kak ey, “Sajay ya naypadto shiyay ya dibsho, ipedawag mo, karam baybay-an, ta sota timpon ketongpal niyay, nay-esop ma. <sup>11</sup> Nem ni-man, sota ira ngaaw i aramid sha, itoloy shen mandeka ni ngaaw. Jet sota edogit i aramid sha, itoloy shen mandeka ni edogit. Nem sota ira maronong, itoloy shen mandeka ni kinashonong et sota

eshiyosan i nemnem sha, sotan ngoy itoloy shen dag-en.” Kowan nonta anghil.

<sup>12</sup> Jet kowan nen Apo Jesus ey, “Tala-ak den shagos et sobalitan koy sakey tan sakey son si-kayo ni dingka to. <sup>13</sup> Si-kak sota kowan sha ey Alpa tan Omiga, ono sota kapangdo-an tan ka-onoran, ono sota shoki-an to tan engintegan to. Si-kak sota wára ngoreshan ingkatod ingka!” Kowan nen Apo Jesus.

<sup>14</sup> Si Apo Shiyos bindisiyonan to sota ira may-eshig ey engibel-ak ni baro sha, tep si-karay wáray nebeng shen mayda-kam ja mengan nonta dames nonta kadasan ja emengi-kan ni biyag. Jet si-kara bengat i maypedobos ja onsekep nodta siyodad. <sup>15</sup> Nem sota showal ni siyodad, say wára nodtan, sota ira eg memati so nen Apo Shiyos, sota ira emanmantala, sota maleki tan mabii, sota ira mabono, tan sota ira emanshedjaw so nonta ira inemag ni too ja sinan shiyos, tan sota ira emin na o-owap i shaka ikokowan tan o-owap i shaka dagdag-a.

<sup>16</sup> Jet kowan nen Jesus son si-kak ey, “Si-kak si Jesus ja engibetkag ni anghil ko ja mengikowan niyay son si-kam et isodat mo ngo so nonta ira emati son si-kak ja wáred ma ka-ili-ili. Si-kak, say polin edapo-an ko, si Ari David nonta bayag da. Si-kak sota may-eshig ey talaw wa mamowas ja maniyal.” Kowan nen Apo Jesus.

<sup>17</sup> Sota Ispirito Santo nen Apo Shiyos, tan sota totoon emati son Apo Jesus ja may-eshig ey esaw-en to di, kowan sha ey, “Kala!”

Sota ira mengitneng niyay, ikowan to koma ngo ey, “Kala!”

Kalejo, si-kayon na-kew ni shanom, awat jo iya shanom ja emengi-kan ni biyag ja enshiy bayad to. Angken sipa ja makapiyan, ondaw ali.



<sup>18</sup> Bانشاanan ko i sakey tan sakey son si-kayo ja engitneng niyay ya esel la naysolat shiyay ya dibshon padto. No sipay mengshom niyay ya padton naysolat shiyay ya dibsho, si Apo Shiyos, eshom to ngo iya digat ja naysolat shiyay ya dibsho, ni keshosa nontan na toon mengshom. <sup>19</sup> Jet no sipay mengkal ni eshom ma esel la naysolat shiyay ya dibsho, si Apo Shiyos, a-kalen to ngo i kaydakam nontan na too nodta mengan ali nonta dames ni kadasan ja emengi-kan ni biyag. Tan ma-kal

pay i istay kayda-kaman to shima siyodad nen Apo Shiyos, ja wared jay ya naysolat.

<sup>20</sup> Si Apo Jesus ja engipedawag niyay ya emin, pininshowa ton inkowan sota kari to, ja kowan to ey, “Tala-ak den shagos: sigorado!” Jet say kowan ko ngo, “Siya Apo Jesus, daw ka di!”

<sup>21</sup> Say shawat ko son Apo Shiyos, sapay koma ta sota kaasi nen Apo Jesus ja wara son si-kayon emin ja too to, si-katoy ma-shoman. Siya, satan da.